


Bëngbe Bëtsa
Cabëngaftaca
Entsoyebuambna



New Testament in Camsá

Bëngbe Bëtsa Cabëngaftaca Entsoyebuambna

New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files dated 29 Jan 2022
19104c0e-9046-5ff3-82fb-eb838c88dcf9

Contents

San Mateo	1
San Marcos	72
San Lucas	115
San Juan	186
Hechos	239
Romanos	306
1 Corintios	343
2 Corintios	378
Gálatas	401
Efesios	415
Filipenses	427
Colosenses	436
1 Tesalonicenses	445
2 Tesalonicenses	452
1 Timoteo	456
2 Timoteo	466
Tito	473
Filemón	477
Hebreos	479
Santiago	508
1 San Pedro	517
2 San Pedro	527
1 San Juan	533
2 San Juan	542
3 San Juan	543
San Judas	545
Apocalipsis	548

San Mateo

Jesusbe bêts taitanga
(Lc 3.23-38)

¹ Quemënga immamna Jesucristbe bêts taitanga: Jesucristna Rey David y Abrahambentsana entsá inamna.

²⁻⁶ Abraham yojamna Isaacbe taitá;

Isaacna Jacobëbe taitá

y Jacob, Judá y chabe catšátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaibe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chë Babilonioca entsanga chë israelitënga tmojánishëche y chocha imo-
janëtámena ora, Josías chë básenga yojánabamna.

¹²⁻¹⁶ Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadoche taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesusbe mamá, Jesús chë Bëngbe Bëtsabe Uámana Uabuayaná, chë Cristo ca uabainá.

¹⁷ Chcasna, Abrahámbentsana Davidbentscoñe bnëtsana canta bëts pamíllanga imojëftsemna. Davidbentsana y chë israelitënga Babilonioca imojanëtamënëtsuana inÿe bnëtsana canta bëts pamíllanga; y inÿe bnëtsana canta bëts pamíllanga chë Israeloca entsanga imojanëtamënëtsana, chë Cristo tojanonÿnántscöñe.

Jesucristo tojanonÿná (Lc 2.1-7)

¹⁸ Jesucristo jónÿnamna mëntsá tojanopasá: María tbojanšbuachená Josëftaca jobouamayama, pero cabá ndoñe cánÿiñe ibontsiyena ora, tojanopasá Mariyna ngomamaná yojoquëda chë Uámana Espiritbe obenánaca. ¹⁹ José, Mariybe boyá, canÿe nÿetsca soyënguifne tšabá jamama bošá inamna. Cha ndoñe yontseboše entsangbe delante cha mal jaquëdana; chíyecna tojanjuabó nÿe iytëcana Mariybentsana jtsojuánañana. ²⁰ Y chca yojtsejuabnantsuana, mo otjenayoquëcá canÿe Bëngbe Bëtsabe ángel tbojáninÿe y chana Josëbioye tbojanianyana: “José, Davidbentsana entsá, ndoñe matenócochinÿenana Mariáftaca jobouamayama, er chë bochántsebmna šešona chë Uámana Espiritbe obenánaca cha bochántsebmna. ²¹ María canÿe šešona bochántsebmna y cha Jesús ca cochjuabaye. Chca echantsabaina er cha chabe entsanga chëngbe bacna soyënguentsana echanjátsebacaye ca” —chë ángel tbojanianyana.

²² Lempe chca tojanochnëngo, cachcá chaotsemnana ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntsá tojánayana:

²³ Chë cabá boyabása nduabuatmá ngomamaná echanjoquëda y canÿe šešona boyabásetema bochántsebmna, y cha mochanjuabaye Emanuel ca.
(Emanuel endayana “Bëngbe Bëtsá bëngaftaca ca”).

²⁴ José chë otjénayentsana tojanofšená ora, tojanma ntšamo chë Bëngbe Bëtsabe ángel tbojanmandacá y Mariáftaca tojanobouamá. ²⁵ Pero ndoñe cánÿiñe ibontsaniyena, sinó nÿe chë šešonatema tojanonÿná orscana. Chë šešonatema tojanonÿná orna, José chábioye Jesús ca tbojanabaye.

2

Reyes Magos Jesúsbioye tmojána

¹ Herodes judiëngbe rey yojamna ora, canÿe pueblo Judeoca, Belén ca uabáinentše Jesús tojanonÿná. Chentsana, báseftanga, estrellënga uatsjëndayënga, magos ca uabáinënga, canÿe bëts puebloye Jerusalén ca uabáinoye tmojánashjajna. Chënga tmojánabo shinÿe bocanoye luarëngocana. ² Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnana tojonÿná cha ca? Bëngbe luarëngoca shinÿe bocanoye chabe onÿnana estrella fsënjinÿe y as muentše cha jaboadórama tifjabo ca.”

³ Rey Herodes chca tojanuena ora, corente yojtsenócochinÿena, y nÿetsca chë Jerusalenentše oyenëgnaca. ⁴ Chentsana chë rey tojánachembo nÿetsca chë judiëngbe bachnangbe amëndayënga y chë judiëngbe ley abuátambayënga jenoyeunayëngama. Mëntsá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónÿnama ibomna ca?

⁵ Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

⁶ Y tšëngaftanga, Judeoca Belenentše oyenënga, canÿe mandayá tšëngaftangbentšana echanjabo.

Cha nyetsca chë Judeoca mándayëngbiama más uamaná echántsemna, y atšbe entsšanga Israeloca echántsanyëna.

Chiyeca tšëngaftangbe pueblo ndoñe nÿe batsá uamana pueblo quenátsmëna ca.

⁷ Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninÿama. ⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanëyana: “Choye motsajna y tšabá chë šešona šmochjánguango. Chašmojínÿena ora, šmochjabëuenaye, as átšnaca chayobená jama chë šešona jadórama ca.”

⁹ Rey Herodes chë soyënga tojánëyanentsana, chë maguënga tmojtsatanoñe. Chora cachiñe tmojtaniñe chë chëngbe luarëngoca tmojáninÿe estrella y yojtsanebnatsana chë šešona yojtsemnëntscoñe. Chentša juatsbuacá chë estrella yojójaiyiye. ¹⁰ Chë maguënga chë estrella tmojáninÿe orna, corente oyejuayënga imojtsemna. ¹¹ Chë yebnoye tmojánamashjna ora, chë šešona tmojáninÿe chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canÿe botamana uangüëtše soye, mirra ca uabáiniye. ¹² Chentšana, mo canÿe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshëcuanama. As chënga chentšana inÿe benachëjana cachëngbe luarëngoye tmojësanshëcuana.

Egiptó luaroye tmojtsanachá

¹³ Chë maguënga tmojtsatanoñe ora, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojaniyana: “Motsbaná, chë šešonatema y chabe mamá mesëbiatše y Egiptoye motsachá. Herodes chë šešonatema bochanjánguango jtsóbama, chiyeca choca cochtsoquedañe atše chachochjábuayenantscuana ca.”

¹⁴ As José tojantsbaná, chë šešonatema y chabe mamá tojesanëbiatše y ibeta Egiptó benache tojëftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnama ntšamo Bëngbe Bëtsá chabe juabna oyebuambnayabijana tojanayancá. Chë oyebuambnayá mëntšá tojánayana: “Egiptocana atšbe uaquíñá sënjanchembo ca.”

Herodes tojanmandá basetémënga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe pueblënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninÿama. ¹⁷ Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

¹⁸ Ramá ca uabaina pueblentše canÿe oyebuambnayana tmojanuena, ngménaca ošachiyana y becá tsetšanánaca oyebuambnayana.

Raquel yojamna chabe básengbiama ošachiyiñe, pero ndoñe yontseboše chamuatebiajuama, chabe básenga ya obanënga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chentšana, otjénayoca José canÿe Bëngbe Bëtsabe ángelbioye tbojáninÿe y cha mëntšá

tbojanianyana: ²⁰ “Motsbaná, chë šešonatema y chabe mamá mesëbiatše y Israeloye cochtá. Chë šešonatema jóbama bošënga ya obanënga montsemna ca.”

²¹ As José tojantsbaná y chë šešonatema y chabe mamá Israel luaroye tojtësanëbiatše. ²² Arquelao Judeoca yojanmánda chabe taitá Heródesbe cuentíne, y José chca tojántatsëmbona orna, yojtsauatja choye jama. Pero otjénayoca Bëngbe Bëtsá Josëbiyoye tbojanbuayená; chíyeca Josena Galilea ca uabaina luaroye tojána. ²³ Choye tojánashjango ora, José tojána canyë pueblo Nazaret ca uabáinoye chentše joyënanama. Chca tojanochnëngo cachcá chaotsemnana ntšamo chë Bëngbe Bëtsabe juabna oyebuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

3

Juan chë Ubayaná entsanga yojanabuayiyiná (Mc 1.1-8; Lc 3.1-9, 15-17; Jn 1.19-28)

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mëntsá cha yojanëtsësnaye: “Bëngbe Bëtsabe amëndayana ya echanjòshjango. Ngmënaca šmochtenójuaboye tšëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canyã ndabiama chë Bëngbe Bëtsabe juabna oyebuambnayá Isaías mëntsá tojánayana:

Entsanga ndoyena luaroca canyã enduáyebuache:

“Bëngbe Utabná echanjabo ca;

mo nda canyë benache tojtseprontacá canyë uámana entsá jashjanguama, tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

⁴ Juanbe entsáyá inauapormana camellbe stjënasheca y bobache yojanasnana. Cha inasaye chapulinatëmënga y tjoca tjouangbe méloye.

⁵ Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama. ⁶ Bëngbe Bëtsábiyoye chëngbe bacna soyëngama jaimpáda chentšana, Juan chë Jordán béjayiñe chënga yojanëbáyana.

⁷ Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanëyana: “¡Mëtšcuaye entsanga! ¿Nda tcmënjáuyana chë echanjòshjango uabouana castigüentšana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tšëngaftanga ndegombre šmojsajbanama. ⁹ Y ndoñe šmattsejuabnaye cach tšëngaftangbiana jayanama: ‘Abrahámbentšana entsanga fsëndmëna ca’.

Er atše šcuayana, Bëngbe Bëtsá quem ndëtsbéngacnaca Abrahámbentšana entsanga nanjábiana. ¹⁰ Chë tatšniá ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tontseshajo, jtseshatëtšana y iñoye jtsatmetšana. Tšëngaftangafácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjaye ca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše mercedo taitsatobuajoñe ni

mo chabe shecochëtjonëshe jtsámabñama. Chë chabe benache aifne chamojtishachëngbiama Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequécá. ¹² Canye entśá chabe mëtśá cucuatśiñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcjnaye tsañe jtsabuájuaana, y chë ndoservena shácuanëngna iñoje jtsatmetśana. Cachcá, chë atśbe ústonoye echanjabana, chë tśabe entśanga echanjúbuaja, y chë bacna entśangna canye iñeshiñe echantsacastígaye, y chë iñe ndocna te queochátsfsana ca” —cha tojanéyana.

Juan, Jesúsbiye tbojanabaye

(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoye, cha chabuábayama. ¹⁴ Pero Juan ndoñe yontseboşe Jesús juabáyama, y mëntśá tbojanianyana: —Atşe şontsemna aca chaşcuabaye, y ¿más atşe aca cchochjuabaye ca?

¹⁵ Chora Jesús tbojanjuá: —Morna chca chaotsemna. Entsemna lempe ntśamo Bëngbe Bëtsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chë buyeshoicana tojtanshëbëbocna. Chorna Jesús tśbanánoye yojontjeşiyey tojáninýe chë celoca atëfjñiñe y chë Uámana Espíritu mo canye palomatemcá chábiyey yojtsastjajuana. ¹⁷ Chora celocana Bëngbe Bëtsá mëntśá tojánayana: “Mua atśbe bonshana uaquíñá endmëna. Chabiyama corente sëntsoyejuá ca.”

4

Jesús tojanobená Satanás jayëñjanama

(Mc 1.12-13; Lc 4.1-13)

¹ Chentśana chë Uámana Espíritu entśanga ndoyena luaroye Jesús tbojanánatse, as Satanás chauábama cha jisháchichiyama.

² Chentşe canta bnëtsana te y canta bnëtsana ibeta ntjascá tbojanjëtana; chíyeca chora tbojaneshëntsena. ³ As Satanás tbojanobobeconá y tbojanianyana: —Aca ndegombre Bëngbe Bëtsabe Uaquíñá tcomnëse, momandá quem ndëtşebenga tandëşe chaobiyama ca.

⁴ Pero Jesús tbojanjuá: —Bëngbe Bëtsabe uabemana palabrenguifne mëntśá endayana: “Entśá nýe tandëşeca ndoñe vida ntsebonnana, sinó entśá endobena jtsiyenana lempe ntśamo Bëngbe Bëtsá tojayancá tbojtseyeunanëse ca.”

⁵ Chentśana Satanás, Jerusalén, chë uámana bëtş pueblo ca uabáinoye Jesús tbojanánatse, y chë Bëngbe Bëtsabe bëtş yebnentşe chë más tśbanánoca tbojanatsá. ⁶ Chentşe Satanás mëntśá tbojanianyana: —Aca ndegombre Bëngbe Bëtsabe Uaquíñá tcomnëse, muentśana fshantsoye montşënja, er Bëngbe Bëtsabe uabemana palabrenguifne endayana:

Bëngbe Bëtsá chabe angelënga echanjichamuá, chacmotsinýenama.

Chënga buacuatşëngaca cmochanjishache, shecuatşe ndëtşbeñe ndocá chacodomama ca —cha tbojanianyana.

⁷ Chora Jesús tbojanjuá: —Cach Bëngbe Bëtsabe uabemana palabrenguifne mëntśá endayana: “Ndoñe matsbošana acbe Bëtsá chë Utabná bacna soyëngama jacoçhënguama ca.”

⁸ Cabana, Satanás tbojanánatse canye bêts tjoye y betscó nÿetsca quem luarentša amëndayëngenbenache y chentša nÿetsca uamana soyënga Jesúsbiöye tbojaninÿinÿé. ⁹ As Satanás tbojanianyana: —Aca chacojoshëntsamentšé y chašcojadorase, lempe chë soyënga cbochjatštaye ca.

¹⁰ Y Jesús tbojanjuá: —Satanás, átšbentšana mojuaná! Bëngbe Bëtsabe uabemana palabrénguiñe mëntšá endayana: “Bëngbe Bëtsá cochtsadorana y nÿe cha cochtseservenica ca.”

¹¹ As Satanás cachcá tbojanonÿá. Cachora Bëngbe Bëtsábiocana angelotémënga tmojánabo Jesús jtseservénama.

Jesús tojanontšé Galileoca chabe trabajo jamana

(Mc 1.14-15; Lc 4.14-15)

¹² Juan chë Ubayaná cárceloye tmojanëtámiaa Jesús tojanuena ora, Galilea luaroye cha tojtaná. ¹³ Pero ndoñe tonjanoquedá Nazaret pueblentše, sinó Capernaumoca, uafjónaye tsachañe; choye tojána joyënanama, chë uamana bêts taitata Zabulón y Neftalibe luariñe. ¹⁴ Chca tojanochnëngo, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán bėjaye chenguánoica, uafjónaye tsachañe;

Galilea luariñe, ndoñe judío entšanga oyenentše.

¹⁶ Chë mo ibetiñe cuafsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábiöye nduabuatmëngbiama,

y chë causa chabiama imomna mo obanëngcá, ndoñe binÿniñe jtsiyenëse ca —cha tojanábema.

¹⁷ Cach orscana Jesús tojanontšé entšanga jábuayenama: “Bëngbe Bëtsabe amëndayana ya echanjóshjango. Ngmënaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuas-tama

(Mc 1.16-20; Lc 5.1-11)

¹⁸ Canÿe te, Jesús chë Galilea uafjónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuëtsetšañe, er beonga ashebuánayata ibnamna. ¹⁹ Jesús tojanëyana: “Atšeftaca mabata; atše cbochanjábiamá Bëngbe Bëtsabiamá entšanga anguayata, y morskana nÿe beonga ashebuánayata ya ndoñe quešochátsmëna ca.” ²⁰ Cachora chatbe atarraiëshangá cachcá tbojésanaboshjuana y Jesús tmojanasto.

²¹ Y más choye, Jesús inÿe uta catsátata tojánanÿe: Santiago y Juan, chë Zebedeobe uaquiñata. Chata ibojtsomñe canÿe barquëshañe, chatbe taitáftaca, chëngbe atarraiëshangá atapórmayinÿe. Jesús tojánachembo, ²² y cachora chë barquësha tbojésanaboshjona, chë taitá cachentše imojëseboshjona y Jesús tmojanasto.

Jesús ba entšanga yojanubuatambá y yojánashnaye

(Lc 6.17-19)

²³ Jesús nÿets Galilea luarëjana yojánana, chentše judiëngbe enefjuana yebnënguenache abuátambaye. Chë tšabe noticiënga Bëngbe Bëtsabe

amëndayama entsanga yojanabuayiyá y nyetsca šocanëngama y tsetšanëngama yojánashnaye. ²⁴ Nyets Siria luarëjana entsanga cha imojtsebáyana. As entsanga nyetsca šocana bomnënga Jesúsbiöye imojtsënachaye: šoquënga y tsetšanana bomnënga, bacna bayëjbe juabna uambayënga, ataque osháchichanënga y jama ndobenënga. Jesús nyetscanga yojánashnaye.

²⁵ Mallajta entsanga Galileocana, Decápolis luarocana, Jerusalenocana, Judeocana y chë Jordán béjaye chenguanóicana Jesús imojústona.

5

Ndayá Jesús tjoca tojanabuatambá

¹ Jesús chë mallajta entsanga tojánanyë ora, batsjoye tojántsua y tojanótbema. Chabe ústonënga tmojanobobeconá y ² Jesús tojanontsé mëntšá jabuátambana:

Ndëmuanyënga imomna chë ndegombre oyejuayana bomnënga (Lc 6.20-23)

³ “Puerte oyejuayënga mochántsemna chë Bëngbe Bëtsabe soyënga tša imuajaboto ca juabnyënga. Chca entsanga mochántsemna chë Bëngbe Bëtsabe amëndayoca mochtsiyenënga.

⁴ “Puerte oyejuayënga mochántsemna chë mondbëtsošachiyënga; chënga Bëngbe Bëtsá entsëjabuáchana ngménaca ndoñe chamondëtsemnama.

⁵ “Puerte oyejuayënga mochántsemna chë uámanënga ndoñe mondbëtсенobiamnyënga, er chënga mo chëngbe otocana soycá quem luare mochanjójyëngacñe.

⁶ “Puerte oyejuayënga mochántsemna chë nyetsca soyënguiñe tšabá jamama bošënga. Chëngbe bošana entsemna mo chë oshëntsiyá y uajuendayabe bošancá. Chë nyetsca soyënguiñe tšabá jamama bošënga mochanjobenaye jëftsinýana lempe ntšamo tmojtsebošcá.

⁷ “Puerte oyejuayënga mochántsemna chë ínýengbiama ongmiayënga, er Bëngbe Bëtsá chëngbiama bochanjóngmia.

⁸ “Puerte oyejuayënga mochántsemna chë nye tšabe juabnënga ainaniñe bomnënga; chënga Bëngbe Bëtsá mochanjinýe.

⁹ “Puerte oyejuayënga mochántsemna chë nyetscanga natjëmbana chamot-siyenama amënga, er chënga Bëngbe Bëtsabe básenga ca mochantsabaina.

¹⁰ “Puerte oyejuayënga mochántsemna chë ínýënga tmojama chamot-sesufrínënga, ntšamo Bëngbe Bëtsá yobošcá bétsamama; chca entsanga mochántsemna chë Bëngbe Bëtsabe amëndayoca mochtsiyenënga.

¹¹ “Puerte oyejuayënga tšëngaftanga šmochtsemna, entsanga chacmojoyánguango y chacmojtšëcamena ora y nyetscna soyëngaca chacmojtšëbuayatsenaye ora, atšbe ústonënga bëtsemnama. ¹² Móyejuanga, puerte móyejuanga, tšëngaftanga celoca becá šmochanjójyëngacñe. Er ntšamo entsanga tšëngaftanga cmëcamena, cachcá chë Bëngbe Bëtsabe juabna oyebuambnyëngbiöye, chë tšëngaftangbe natsana monjaniyenëngbiöye entsanga monjanëcamena ca” —Jesús tojánayana.

Ošbuáchiyënga jtsemnana mo tamocá y binýnayënga quem luarentša entsangbiama (Mc 9.50; Lc 14.34-35)

13 “Tšëngaftanga, quem luarentša entsanga jtsējabuáchanëse šmojtšiyena, Bëngbe Bëtsabe soyënga chamotsetatsëmbuama, as chëngbiana šmochántsemna mo chë mëntšëna ndoñe chaondóndbemama tcojatboto tamocá. Pero chë tamó fténana tojtsóbmëse, ndoñe ntsopodénana tempcá sanana cachiñe jtësmënana. Chca, ya tondayama ntoservénana; chíyeca chë tamó tsáshenoye jtsësenana y entsanga jtsebótájayana.

14 “Tšëngaftanga, ntšamo tšabá yomncá šmojtšiyenëse, as quem luarentša entsangbiana šmochántsemna mo chë ibetiñe tojtsebínýna soycá. Canýe bëts pueblo batsjo juatsbuañe tomñëse, ndoñe ntsopodénana iytëmencá jtsemnama. 15 Canýe uajuinýanësha tcojuajuinýena ora, ndoñe cajonëshe tajsoye jtsabuájuama, sinó tsbanánoca juajájuama, chca, nyetsca entsanga chë yebnentse tmojtsemnëngbiana chaotsebínýnama. 16 Cachcá tšëngaftanga, entsangbe delante mo binýnayëngcá šmochtsemna, as chënga tšëngaftanga tšabe soyënga šmuamama chamuinýama, y chca, chënga chamuinýanyé chë Taitá, Bëngbe Bëtsá celoca endmëná, corente uamaná y obená bëtsemnama ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyíñe iuayancá y chë Bëngbe Bëtsabe juabna oyebuambnayënga tmojanayancá jabëtsepochochama atše tijabo ca. Atše ndoñe chiyátabo chë soyënga jabëtsepochochama, sinó jabábuayenama ndayá chë soyënga ndegombre bëtsayanama. 18 Ndegombre šcuayana: Celoca y quem luare chaojëtsemnëntscuana, ndocná queochatobenaye ni canýe punto, ni canýe letra chë leyënguentsána jtsejuánana, lempe ntšamo jochnënguama yomncá chaojtsemnëntscuana. 19 Chíyeca, nda nýe mo canýe mando chë leyënguine ndoñe tonjoyeuná cha, masque nýe base soye chë mando tojtsemna, y chë ínýenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanýenga tmojtsama ntšamo Bëngbe Bëtsá tojamëndacá y chë ínýenga cachcá chamot-samama tmojtsabuátambase, chënga Bëngbe Bëtsabe amëndayoca uámanënga mochántsemna. 20 Chë soyëngamna mëntšá šcuayana: Tšëngaftanga chë ley abuátambayënga y fariseúngbiye ndoñe šmontsayëñjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínýengaftaca tbojetnama Jesús tojanabuatambá

21 “Tšëngaftanga šmojuena ntšamo Bëngbe Bëtsá tšëngaftangbe bëts tai-tanga tojanamëndacá: ‘Ndoñe catjóba ca. Chca ochjainyá bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca.’ 22 Pero atše šcuayana, nda cachabe catšátaftaca tbojetna, chánaca bontsemna jobuambayana chë entsangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbiye puerte tbojtsáboyënja, cha bontsemna chë Sane-drín ca uabaina mandayëngbe delante jobuambayana ndáyeca chca ca; y nda cachabe catšatbiana opjema ca tojayana, ntšamo cha bëtsamama, cha bontsemna chë infiernoca iñeshoye jama.

23 “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, 24 as chë tcojiyëbo soye chë altarentša natsanoica cochjéshobshjona,

cochtá y acbe catšátaftaca cochtenoyántsia. Chentšana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšíne cmochanjáboshjona y chënga cárceloye cmochanjutame. ²⁶ Ndegombre chëyana: Chentšana ndoñe quecochtëtsbocna lempe candesopagantscuana ca” —Jesús tojánayana.

Chë boyá o shëmbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shëmbioye ínÿaftaca ndoñe catjaíngña.’ ²⁸ Pero atše chëyana: Nderado canÿe boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shëmbioye tbojtseingñé.

²⁹ “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bominÿe cochtsenobuchjatsëca y cochtsëtšena. Nÿets cuerpo jtsebomnana y lémpeca infiernoye jama chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé. ³⁰ Nderado acbe catšbioica cucuatšeca bacna soye tcojamëse, más tšabá nántsemna chë cucuatše cochtsenástjango y cochtsëtšena. Nÿets cuerpo jtsebomnana y lémpeca infiernoye chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

Chë bouamnata enëšanama Jesús tojanabuatambá

(Mt 19.9; Mc 10.11-12; Lc 16.18)

³¹ “Mëntsánaca leyíne enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiyiyana, ndayéchañe chaotsayana cha ya ndoñe chabe shema yontsemna ca.’ ³² Pero atše chëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbojtseingñé causa, as chë boyá jtsamana cha chabotseingñema, chë shema ínÿaftaca tojtóbouamase. Y nda chë útsena shémaftaca tojtobouamá, chana canÿe uabuatmá jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entsanga júrayama Jesús tojanabuatambá

³³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ ³⁴ Pero atše chëyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna. ³⁵ Ni quem luarama, er Bëngbe Bëtsabiamá mo tšenëtemcá endmëna, chiñe chabe shecuaatšënga jacayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. ³⁶ Ni tšëngaftangbe bestsašama cach ndoñe, er tšëngaftanga ndoñe quešmátobena ni mo canÿe stjënashe ftsenguëshe o fjantsëshe jabemana. ³⁷ Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

Chë entsanga mondbátenachnënguama Jesús tojanabuatambá

(Lc 6.29-30)

³⁸ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebmna canyëbé cha jëtsbuchjatsëcama ca; y nderado nda canyë juatsaše tcmojtsásiye, ácnaca derecho contsebmna cányëše cha jtašiyama ca.’³⁹ Pero atše cbëyana: Ndoñe matsbošana chë ndayánaca tcmojaborlábíoye jtachnënguama; chamna, ndánaca catsbioica tcmojajuebiantšetase, cochjomíye chë ínyoica cachcá chacmomama.⁴⁰ Nderado nda tcmojademandá y tojtseboše acbe shabuanguanëjúa jtsabocñama, cha molesenciá acbe quëfsaíyanaca chauetsácñama.⁴¹ Nderado nda tcmojuasamá y tcmojamandá bnëtsana cuadroca juyambama, inyë bnëtsana cuadro cochjuyamba.⁴² Nda ndaye soye tcmojotjañëse, cochjatštaye; y nda ndaye soye tcmojuatjase, cha ndoñe stëtsoye catjaquéda ca” —Jesús tojánayana.

Chë uayayëngbiana bonshánana jtsebmna
(Lc 6.27-28, 32-36)

⁴³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’⁴⁴ Pero atše cbëyana: Tšëngaftangbe uayayënga šmochtsababuányëshana, y chë cmëcamenëngbiana Bëngbe Bëtsá šmochtsaimpadana.⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entsángbeñe chabe shinýe chaotsebinýnayama, y endbëtsama chë nyetsca soyënguiñe tšabá jamama bošënga y ndoñe chca entsángbeñe chauftema.⁴⁶ Tšëngaftanga nyë chë tšëngaftanga tcmojtsababuányëshanënga šmojtsababuányëshanëse, ¿Bëngbe Bëtsábíocana ndayá šmochjuacaná? Romocama crocénana entsángbioye atjanayëngnaca chca monduamana.⁴⁷ Y nyë chë amiguëngbioye šmojtsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama.⁴⁸ Tšëngaftangbe Taitá, Bëngbe Bëtsá celoca endmëná, nyetsca tšabe soyënga bomná y amá endmëna. Tšëngaftángnaca cachcá šmochtssemna ca” —Jesús tojánayana.

6

Jesús tojanabuatambá ntšamo tšabe soyënga ínýëngbiana jamana

¹ “Cuedado šmochtssebmna ndoñe ntsamama entsángbeñe tšëngaftangbe tšabe soyënga, nyë chënga chca chamuinýama. Chca šmojamëse, tšëngaftangbe Taitá, Bëngbe Bëtsá, celoca endmëná ndocna uacanana soye quecmochtëtatsataye.

² “Chcasna, nderado nda caridá tcojábemëse, chca ndoñe šmatjama chë ntšamo šmojtsamama nyetscanga chamotsetatsëmbuama, mo canyë trompetëfjua cuaftsajatëtancá, chë caridá šmojábemama chaotsótatsëmbuama; chca monduamana chë bacna entsanga chë ntšamo ndegombre tmojuabnacá ndinýinýayënga, chë judiëngbe enefjuana yebnënguenache y tsáshenañe. Ndegombre cbëyana, chë chca amënga ya chëngbe uacanana soye tmojóyëngacñe, ntšamo chënga tmojamama entsanga tšabá chëngbiana tmojtsoyeubamná ora.³ Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatše ndoñe queondbatstatsëmbcá ndayá chë catsbioica cucuatše tojtsamama,⁴ chca, acbe caridá iytëcana chaotsemnana. As, tšëngaftangbe Taitá, nda bominyë

endbétsequécjnaye chë iytemencá tcojtsama soye, acbe uacanana soye cmochántatštaye ca” —Jesús tojánayana.

Jesús tojanabuatambá ntšamo Bëngbe Bëtsáftaca jencuéntana
(Lc 11.2-4)

⁵ “Bëngbe Bëtsáftaca šmojtsencuénta ora, ndoñe šmattsama chë bacna entšanga ntšamo ndegombre tmojuabnacá ndinýinýnayëngcá. Chënga corente jtsogetánana chë judiëngbe enefjuana yebnënguenache tsanana y tsashená tsëntsaca Bëngbe Bëtsáftaca jtsencuéntayana, chca, nýe entšanga chë soye chamuinýama. Ndegombre šcuayana: chënga nýe morskama ya montsábouacananana, chënga tšabá imojtsama ca entšanga tmojayana ora.

⁶ Pero aca Bëngbe Bëtsáftaca jencuéntama orna, acbe tsoye cochtamáshëngo, bëshása cochtatame y cháftaca cochjencuénta. Chánaca chë iytemenentše ácaftaca echántsemna. Bëngbe Taitá lempe bominýe endetsequécjná, masque cánýenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

⁷ “Bëngbe Bëtsáftaca šmojtsencuénta ora, ndoñe nýe cachcá ndoservena palabrénga ba soye šmattsichamo. Chca mondbétsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóayunaye ca. ⁸ Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. ⁹ Chamna tšëngaftanga mëntšá cmontsétocana Bëngbe Bëtsáftaca jencuéntana:

Bëngbe Taitá, celoca icotsomñe.

Acbe uabaina chë más uámana uabainana chauesomñe.

¹⁰ Acbe amëndayana chaóshjango.

Celoca yojtsemna ntšamo icobošcá;

quem luaríñnaca cachcá chaotsemna.

¹¹ Mënté šmiyatšatá cada te šnetsëjaboto tandëše.

¹² Bacna soyënga bënga fsënjama: šmotsaperdónaye;

cachcá ntšamo chë bëngbiana bacna soyënga amënga fsëndbetsaperdonaycá.

¹³ Bacna soyënga jamama šojocohëngo ora, šcochjubabuache chca nde-nobuiyama.

Nýetsca bacna soyënguentšana šmatsebacaye.

¹⁴ “Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. ¹⁵ Pero chë tšëngaftangbiana bacna soyënga amënga ndoñe šmotsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inýe ora tondaye ntjascá šmojtsemna Bëngbe Bëtsáftaca jencuéntama, juebëngménënga ndoñe šmattsemna, ntšamo chë bacna entšanga chë ndegombre tmojuabnacá ndinýinýnayënga mondbet-samcá, as chca, chënga imojtsayúnama entšanga chamuinýama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora. ¹⁷ Aca nderado tcojtsayúna ora, cochtsojuejbabiye y aceitíyeca botamana cochtenochquëca, ¹⁸ as chca, entšanga ndoñe chamondëtsetatšëmbo aca tondaye ntjascá cojtsemnama. Nýe acbe Taitá, lempe chë mo iytemencá yomna soyëngama

tatšëmbuá, chama echántsetatšëmbo. Y cha, chë iytëmcá tcojama soye bominye endbetsequëcjnyá, acbe uacanana soye cmochántatštaye ca” — Jesús tojánayana.

Chë celoca bomnana

(Lc 12.33-34)

¹⁹ “Bomnana quem luarentše ndoñe šmattsëjuabaye. Muentšna chë mejojón y inye pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. ²⁰ Más tšabá tšëngaftangbiana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inye pochócaye soyënga acbe soyënga quemochatspochóca, ni atbëbanënga quemochátamashjna jatbëbama. ²¹ Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” — Jesús tojánayana.

Chë cuerpama uajuinjănësha

(Lc 11.34-36)

²²⁻²³ “Acbe bominye tšabá totsomñëse, mo canye uajuinjănëshacá acbe cuerpama jtsemnana, chíyeca aca jtsobenana ntšamo tcojtsamcá chë bominyeca jtsonjáyana. Chë bominye ndoñe tšabá tontsemnëšna, chë bominye tondaye ntsoberenana jamana, ntšamo tcojtsamcá chacobená jinjama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëšna, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” — Jesús tojánayana.

Chë Bëngbe Bëtsabiana bonshánana o chë nyë quem luarentša soyënga jtsebošana

(Lc 16.13)

²⁴ “Ndocná ntsoberenana uta mandayata jtsaservénana: cánjyabioye bochantsáboyënja y chë injyabioyna bochántsebobonshana, o cánjyabiana tšabá echántsetrabajaye y chë injyabianna ndoñe tšabá. Ndoñe quecátobena Bëngbe Bëtsá jtsebobonshánana, nyë quem luarentša soyënga jtsebonnama yapa tcojtsebošëse ca” — Jesús tojánayana.

Bëngbe Bëtsá chabe básënga jtsanjënana

(Lc 12.22-31)

²⁵ “Chcasna atše šcuayana: Ndoñe šmattsenócochinjëna ndayá šmochjase o šmochjofšiyë vida jtsebonnama, ni ndaye entšayá šmochjuichëtjuama cach ndoñe. Ndegombre, vida chë sanama más enduámana y cuerpo chë entšayama más. ²⁶ Smochjanjyë chë shloftšënga jtsongüëfnayana. Chënga tondaye ntjájena, ni jaja saná ntjátbanana, ni chë grano uaquëcjnyaye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftsetémëngbiana puerte más šmonduámana! ²⁷ Masque chca endmëna, canya masque tša tojtsenócochinjëna, ¿ntšamo nanjobenaye jamana chë ntsachetšá vida yochtsebonnentšana, canyë hora vida más jabotiayana?

²⁸ “Y ndayá šmochjuichëtjuama, ¿ndáyeca šmojtsenócochinjëna? Smochjinjyë chë jajañe lirio uantšëfjushangá jtsajujnana: ndoñe ntsetrabájayana, ni ntshabiamnayana. ²⁹ Pero atše cbëyana, ndegombre ni mo Rey Salomón

nÿetsca chabe bomnánaca nÿetsá botamana mo chë lirio uantsefjushangacá quenjatspormana. ³⁰ Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tsëngaftangbiámnaca Bëngbe Bëtsá echanjama entsáyá chašmotsábomnana, jentsanga nÿe batsá Bëngbe Bëtsábeñe ošbuáchiyënga! ³¹ Ndoñe šmattsenócohinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ ³² Chë soyëngama, chë Bëngbe Bëtsábioye nduabuátmënga mondbétsenocochinÿena, pero tsëngaftanga ndoñe. Tsëngaftangbe Taitá, Bëngbe Bëtsá, ndayá cmojtséjabetama endétatsëmbo. ³³ Chiyeca, tsëngaftangna natsana šmochjshëtseboše Bëngbe Bëtsá tsëngaftangbe ainaniñe chaotsemándama y lempe ntšamo cha tojamandacá šmochtsama. Chca šmojamëse, Bëngbe Bëtsá lempe ntšamo cmojtséjabetcá cmochanjátataye. ³⁴ Ndoñe matenócohinÿenana ndayá yëfse yochjochnënguama. Yëfse luare cochántsebomna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

7

Ndoñe ntsichámuana chë ínÿenga tsábá o ndoñe tsábá tmonjamama

(Lc 6.37-38, 41-42)

¹ “Ndocá ínÿengbiamá šmattsichamo chë ndoñe tsábá tmontsamama. Chca, Bëngbe Bëtsá ndoñe queochátichamo tsëngaftanga ndoñe tsábá šmonjama ca. ² Chë ntšamo tsëngaftanga ínÿengbiamá šmojtsichamcá tsábá o ndoñe tsábá tmontsamama, cachcá Bëngbe Bëtsá tsëngaftangbiamá chë ntšamo šmojamama echántichamo. Y ntšamo ínÿengbioye chašmojábiamá, uabuana o ndoñe jabuache soyënga, cachcá Bëngbe Bëtsá tsëngaftangbioye cmochanjábiamá.

³⁻⁵ “Nderado canÿa chabe bominÿiñe canÿe niñëfja tojtsebomnëse, cha ndoñe ntsobenana chabe catšata jauyanama: ‘Acbe bominÿentšana canÿe polvështema jtsebuchjátsëcama šmoleseñcá ca’. Natsana cha bontsemna cachabe bominÿentšana chë niñëfja jtse nobuchjátsëcana tsábá jinÿama jobenayama, chabe catšatbe bominÿentšana polvështema jtsebuchjátsëcama. Cachcá entsemna acbiamá, jbacna entsá chë ntšamo ndegombre tcojuabnacá ndinÿinÿnayá!, chë tša bacna soye cojtsama ca acbe catšata tcojauyana ora, cach acá tša bëts bacna soyënga cojtsamama ntjenouaboycá; y chca, acá jamana canÿe bacna soye. Natsana cmontsemna chë cach acá ndoñe tsábe soyënga cojtsamama ngmënaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tsábá yomncá chaotsamama.

⁶ “Chë Bëngbe Bëtsábe soyëngama josértama ndëboše entsanga ndoñe šmattsabuayinÿaye. Añëse nántsemna mo chë Bëngbe Bëtsábe bëts yebnoca uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtsëtémënga cotšëngbioye cuaftsëtšancá, chënga nÿe jtsebotájayana ca” —Jesús tojánayana.

Šmochjotjañe, šmochjánguango y šmochjachembo

(Lc 11.9-13; 6.31)

⁷ “Šmochjotjañe y Bëngbe Bëtsá cmochanjátataye; šmochjánguango y cmochanjinÿena; šmochjachembo y bëšása cmochanjébëtafjo. ⁸ Er ndánaca

tojtsotjanaña, jóyëngacñana; y nda tojtsenguá cha, jónyënana; y nda tojtsechëmbuanábioye jebiatëfjuana.

⁹ “¿Ndëmuanÿe boyabása tsëngaftanguentsá, canÿe tandëse chabe uaqiñá tbojtsotjanañe ora, canÿe ndëtsbé chábioye buanjatštaye? ¹⁰ ¿O canÿe mëtscuaye buanjatštaye, beona tbojtsotjanañe ora? ¹¹ Y chca, tsëngaftanga, bacna soye amënga, tsëngaftangbe basetëmënga tsabe soyënga jatšatayama šmojtsamanëse, jmás tsëngaftangbe Taitá, Bëngbe Bëtsá celoca endmëná, chë tmojtsotjanañënga tsabe soyënga echanjátšataye!

¹² “Inÿengaftaca šmochtsama ntšamo chë ínÿënga tsëngaftanguaftaca chamot-samama šmojtsebošcá. Chca endmëna ntšamo Moisesbe leyinë y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” — Jesús tojánayana.

Chë base utëntsá bësásá

(Lc 13.24)

¹³ “Chë base utëntsá bësásájana šmochjámashjna. Chë utëntsá bësásájana y chë paselo jóyënama benache, infiernoye cmochanjuánatse y banga chëjana mondámashjuana. ¹⁴ Chë tsabe vida binÿnoye jamna base utëntsá bësásájana endmëna y ndoñe paselo jóyënama benache, y chiñe báseftanga mondbinÿëna.

Chë Bëngbe Bëtsabe ndoñe ndegombre juabna oyebuambnayënga

(Lc 6.43-44)

¹⁵ “Cuedado šmochtsebmna chë Bëngbe Bëtsabe ndoñe ndegombre juabna oyebuambnayëngbiamna. Chënga mo oveshëngcá tsëngaftangbioye mochanjabo, pero ndegombre chënga mondmëna mo tsátjaye tjañe quešëngcá. ¹⁶ Tsëngaftanga betiyënga jtsabuutmana ntšamo cada ona tojtseshajcá; cachcá tsëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuëbé cardo betiyentsana. ¹⁷ Chca, nÿetsca tsabe betiyiñe tsabe soye jashájonana; y chë ndoñe tsabeshiñna podesca soye. ¹⁸ Canÿe tsabe betiyiñe quenátopodena podesca soyënga jashájonana, ni canÿe ndoñe tsabe betiyiñe tsabe soyënga jashájonana. ¹⁹ Ndaye betiye podesca shajuanëshe jtseshatëtsana y iñoye jtsatmetšana. ²⁰ As chca tsëngaftanga chënga šmochantsëbuatma, ndayá chënga mochtsamama ca” — Jesús tojánayana.

Bëngbe Bëtsabe amëndayoye ndoñe nÿetscanga jamashjnana

(Lc 13.25-27)

²¹ “Ndoñe nÿetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nÿe ntšamo atšbe Taitá, celoca endmëná, tojtsebošcá amëngna aiñe. ²² Quem luare jopochócama te banga atše šmochanjuayana: ‘¡Bëngbe Utabná! ¡Bëngbe Utabná! Aca jótšëmbonëse, ábeñe betsošbuáchemna, bënga fsëndoyebuambná, y ácbeyeca bacna bayëjëngbe juabna entsángbentsana fsëndëtabocana, y ácbeyeca bëts soyënga fsëndama ca.’ ²³ Chora atše chanjójuaye: ‘Ndocna te checbaisëbuátmana. Atšbentsana mojuánanga, bacna soye ama entsanga ca’ ” — Jesús tojánayana.

Chë uta ucuatjoniñe

(Mc 1.22; Lc 6.47-49)

²⁴ “Chcasna, nda atše šojoyeuná y chë ntšamo sentsichamcá tojtsama, endmëna mo canÿe tsabá juabnaye boyabasacá. Chë boyabásana ndëtsbeñe chabe yebna yojajëbo. ²⁵ Uaftena yojuáshjango, chë bëjayënga yojóftjajna, chë

yebnoye puerte yojtsebinjiaie, pero chë yebna ndoñe ntjuáshajayana, chë yebna ndëtsbeñe inajéboyeca. ²⁶ Pero nda atšbe palabra tojouena y ntšamo sentsichamcá ndoñe tontsama, endmëna mo canyë ndëjuabnaye boyabasacá. Chë boyabásana chabe yebna cascajuiñe yojajebo. ²⁷ Uaftena yojuáshjango, chë bëjayënga yojóftjajna, chë yebnoye puerte yojtsebinjiaie y chë yebna uabouancá yojtsáhajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entsanga ojanánënga imojtsemna ntšamo cha tojánabuatambama. ²⁹ Jesús tojanabuatambá nÿets obenánaca, mo canyã mando bomnacá y ndoñe nÿe mo chë ley abuatambayëngcá.

8

Jesús, canyã bacna nguayanánaca šocábioye tbojanshná (Mc 1.40-45; Lc 5.12-16)

¹ Jesús tjoicana tojtantsmá ora, ba entsanga tmojanasto. ² Chora canyë boyabása bacna nguayanánaca šocá Jesúsbioye tojanobeconá, chabe delante yojshamentsiye y tbojaniana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenyãñejaná, chë boyabásabioye tbojánbojajo y tbojaniana: —Aíñe, sëntseboše. Socana cbotsebojuaná ca.

Y cachora chabe šocana tbojtsanóbojuanañe. ⁴ Jesús chë shnanábioye tbojaniana: —Mouena, ndocnábeñe cattsecuëntaye; nÿe chë Jerusalenoca báchnëbioye motsa, y cha cochjinÿinÿiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nÿetscanga chamotatsšëmbona mora aca ya ndoñe šocá contsemnama ca —Jesús tbojaniana.

Jesús canyë Romano soldadëngbe amëndayabe bochichnayábioye tbojanshná (Lc 7.1-10)

⁵ Jesús Capernaumoye tojánamashëngo ora, canyë Romano soldadëngbe amëndayá Jesúsbioye tojanobeconá canyë pavorama jaimpádama. ⁶ Jesúsbioye tbojaniana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadëngbe amëndayá tbojaniana: —Señor, atše mercedo taitsatobuajoñe atšbe yebnentše chacuamashënguama; nÿe mayana y atšbe bochichnayá tšabá echántsatsmëna. ⁹ Atšbioye mándayënga atše sëndábamna y átšnaca soldadëngbe amëndayá sëndmëna. Atše canyë soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjnáná y chë ústonënga tojanëyana: —Ndegombre cbëyana, ni mo nÿets Israelentše ni canyã quem boyabasacá Bëngbe Bëtsabeñe nÿetsá ošbuachiyá chiyátinÿena. ¹¹ Y šcuayana, shinÿe bocanoicana y šinÿe uenatjëmbananoicana bëtscá entsanga mochanjajo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiama Bëngbe Bëtsabe amëndayoca, cánÿiñe juasama. ¹² Ba Israeloca entsanga, chë ndëmuanÿengbiama Bëngbe Bëtsabe amëndayana natsana

yochtsanmëna, chocana mochantëbuacana chë ndëbinÿna luaroye, infiernoye. Chentše puerte mochanjenóbošachna y chë tsetšanama juatsašënga mochantseoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojanianyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtatsmëna.

Jesús, Pédrëbe uambén mamábioye tbojanashná

(Mc 1.29-31; Lc 4.38-39)

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóracá yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtšanóbojuanañe. Chorna chë uambén mamá tojtantsbaná y tojanontšé chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

¹⁶ Chë te jaibëtatama ora, Jesús yojtsemnoye banga bacna bayëjëngbe juabna uambaye entšanga tmojanënatse. Chora, nÿe canÿe Jesús jóyebuambayë chë bacna bayëjënga imojtsaisebocana y nÿetsca šoquënga tojanashná. ¹⁷ Chca Jesús tojanama, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

¹⁸ Jesús tojánanyë mallajta entšanga chabe šhëconana; as tojanmandá uafjajónaye chenguana jama. ¹⁹ Chorna, canÿe ley abuatambayá Jesúsbioye tbojanobobecná y tbojanianyana: —Buatëmbayá, atše sëntseboše aca juastama, ndëmoye chacojtsá choye ca.

²⁰ As Jesús tbojanianyana: —Chë zorrënga mondbomna cuevëšhënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹ Chora inÿa, cach uatsjendayënguentšá, Jesúsbioye tbojanianyana: —Bëngbe Utabná, šmoleseñciá atšbe taitá chjshesabotbontsañe ca.

²² Chora Jesús tbojanjuá: —Nÿe šmasto. Chë Bëngbe Bëtsabiana mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsébuangca.

Jesús chë binÿia y chë bëjaye bonguana yojëtsbema

(Mc 4.35-41; Lc 8.22-25)

²³ Chentšana Jesús canÿe barquëshoye tojánamashëngo y chabe uatšjëndayënga imojtsetjëmbambnaye. ²⁴ Ndeolpe tša jabuache binÿia chë uafjajónaye bëjayiñe yojóshjango; nÿetsá jabuachana yojtsemna, chë olëšhënga barquësha imojtsëtsbotsana. Y Jesús chora inëtsomañe. ²⁵ As chabe uatšjëndayënga tmojána Jesús jetsefšenama y tmojanianyana: —;Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtšauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë býeshe bonguana chaotsatmënama, y lempe natjëmbana yojtatsmëna.

²⁷ Chabe uatsjéndayënga ojnánánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

Chë Gadara luaroca entšata, bacna bayëjbe juabna uambayata
(Mc 5.1-20; Lc 8.26-39)

²⁸ Jesús uafjájónaye chenguana tojánashjango, canÿe luare Gadara ca uabáinentšë. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbiöye tbojanobobéconata. Puerte tšatjayata ibnamna, chíyeca entšanga ndoñe ntsobenana chëjana jtsachñëjuanana; ²⁹ y chora tbojanontšë chë bacna bayëjëngbeyeca mëntšá uayebuáchana: — ¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

³⁰ Chentša béconana ba cotsënga imnajena y chënga imnétsosañe. ³¹ Y chë bayëjënga Jesús tmojanimpadá: —Muentšana jésecocanama aca tcojamëse, cochjama bënga chë cotsëngbeñe fchayamashjnama ca.

³² Y Jesús tojanëyana: —Motsajna ca.

Chora chë bayëjënga chë boyabásatbentšana tmojésanbocana y chë cotsëngbeñe tmojánamashjna; cachora chë cotsënga batsjocana penëšëjana uafjájónayoye imojtsoshbuetše y yojtsatajo.

³³ Chora chë cotsënga anÿenënga tmojtsanacheta, y chë pueblöye tmojánashjajna ora, tmojanontšë lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca. ³⁴ Chora nÿetsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninÿe ora, tmojanimpadá chë luarentšana chauesehocnama.

9

Jesús, canÿe jama ndobenábíoye tbojanshná
(Mc 2.1-12; Lc 5.17-26)

¹ Chca tojanopasá chentšana, Jesús canÿe barquëshoye tojánamashëngo, uafjájónaye chenguana tojána y cachabe pueblöye Capernaumoye tojtanashjango. ² Chora, canÿe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninÿe chënga tša imojtsošbuáchema chë šocábíoye jáshnama cha bëtsobenama; as chë šocábíoye tbojaniyana: “Sobreno, añemo matsca; acbe bacna soyënga tcbontseboperdoná ca.”

³ Chca causa, báseftanga ley abuatambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabíama; mo chábíoye cuafjoyenguangcá entsemna ca.” ⁴ Pero Jesús yojtsetátšëmbo ntšamo chënga imojtsejuabnaycá; chíyeca tojanëyana: “¿Ndáyeca nÿetšá bacna juabnënga ainaniñe šmojtsebomna ca? ⁵ ¿Tšëngaftangbiama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’? ⁶ Atše cbochanjínÿanÿiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanëyana.

As chë jama ndobenábíoye tbojaniyana: “Matëtsbaná, acbe tjuashe mesocñe y acbe yebnoye motsatoñe ca.”

7 Chorna chë jama ndobená tojtantsbaná y cachabe yebnoye yojtsatoñe.
 8 Chca tmojáninÿama chë entsanga auatjanánenga imojtsemna y Bëngbe Bëtsá imojtsatschuanaye, cha chca obenana entsanga tojánatsatama.

Jesús, Matéobioye tbojanchembo chabuastama
 (Mc 2.13-17; Lc 5.27-32)

9 Jesús chentšana tojtsanoñe y canÿe entsábioye tbojáninÿe, Mateo ca uabainá, chë Romocama impuesto entsángbioye atjanayentše inétsotbemañe. Chora Jesús tbojaniana: “Smasto ca.” As Mateo chentšana tojëtsantsbaná y tbojanasto.

10 Jesús cach Mateobe yebnentše yojtsesaye ora, banga Romocama impuesto entsángbioye atjanayënga y inÿenga bacna soye amënga tmojánashjajna y mesëshentše Jesús y chabe uatsjëndayëngaftaca imojotbiama. 11 Chë fariseunga chca tmojáninÿe ora, Jesusbe uatsjëndayëngbioye tmojanatjá: —¿Ntšamo chca yojtsemna, tšëngaftange buatëmbayá chë impuesto atjanayënga y bacna soye amëngaftaca entsesá ca?

12 Jesús chca tojanuena y chë fariseunga tojanëyana: —Chë salud bomnënga ashnayá ndoñe ntsëjabótana, pero chë šoquënga añe. 13 Smochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrenguiñe:

Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsébánaye Bëngbe Bëtsá jëtschuayama ca. Atše ndoñe chiyátabo chë Bëngbe Bëtsabe hominÿiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuëntama tondaye saytescama
 (Mc 2.18-22; Lc 5.33-39)

14 Chentšana, Juan chë Ubayanabe ústonënga tmojanobconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuëntama. ¿Ndáyeca acbe uatsjëndayënga ndoñe chca ca?

15 As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacna.

16 “Ndocná canÿe uatanguá entsáyá base tsëm entsëjuaca jtarmëndana. Er chë tsëm entsëjua jtsabéconana y chë uatanguá entsáyá más jtsatanëcanana, y chca chë uátanëcniñe más bëtsiñe jtsabemana. 17 Y cach ndoñe chë tojtshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshana, y chë vínoye y chë jasabenga tondayama ntjatoservénana. Chiyeca comna, chë tojtshayana vínoyna tsëm jasabenguiñe juaftsuámana; y chca, chë jasabenga y chë vínoye jtsoservénana ca” —Jesús tojánayana.

Jesús canÿe shembásabioye tbojanshná y tojanma Jairëbe bembetema cháuatayenama
 (Mc 5.21-43; Lc 8.40-56)

18 Jesús entsanga yojsétsétsnantscuana, chë judiëngbe enefjuana yebnentsa canÿe mandayá tojánashjango y Jesusbe shecuatšentše yojobamentšiyé. Chë mandayá tbojaniyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

19 Chentsana Jesús y chabe uatsjëndayënga chë mandayá tmojanasto. 20-21 Imojtsaye ora, canÿe shembása stëtsoicana Jesúsbiöye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbiöye yojobeconá ora, yojtsejuabnaye: “Masque nÿe mo chabe entsáyá sibiájua chajjuábojajo, salud chantinÿena ca.” Chentsana chë šocá Jesusbe entsáyá tojanábojajo.

22 Tojanábojajo ora, Jesús tojanobuértana, chë shembásabiöye tbojáninÿe y tbojaniyana: “Añemo matsca, shembása. Bëngbe Bëtsábeñe icošbuachëyeca, mora tšabá contsatmëna ca.” Y cach orscana cha tšabá yojsatsmëna.

23 Chënga tmojtëtanontšë ayana y chora chë mandayábiöca chënga tmojánashjajna. Chentše Jesús tojánanÿe, ínÿengna chë veloriamama imojtsanflautaye y ínÿengna tša imojtšošachiye. 24 Chora Jesús tojanëyana: “Muentšana mobocnënga. Chë shembásetema cabá ndoñe obaná quenátsmëna; nÿe endëtsomañe ca.”

Pero chë entsanga Jesúsbiöye nÿe imojtsáfchaye. 25 Pero Jesús pronto chënga chë yebnentsana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. 26 Y nÿets chë luarëjana ndayá Jesús yojamama nÿetsca entsanga imojátatšëmbona.

Jesús uta jtanata tojanashná

27 Jesús chentsana tojëftsanbocna ora, uta jtanata tbojanasto y mëntšá ibojtsaiuáyebuache: —¡Davídbentsana Entšá, bëndata šmotsalastemá ca!

28 Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtšošbuaché atše chca jamama chjobenaye ca? Y tmojanjuá: —Arseñor. Añe ca.

29 Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

30 Y cachora jinÿama ibojtsobena. Jesús bëtscá chata mëntšá tojanamëndá: —Ndocná más quem soye chaondëtsetatšëmbo ca.

31 Pero chata chentsana tbojëftsanbocna y cachora tbojanontšë ndayá Jesús chátaftaca tojanmama nÿets chë luarëjana jacúntana.

Jesús, canÿe ndëbiábíöye tbojanshná

32 Chë jtanata ibojtsebocanëntsçuana, básefta entsanga canÿe ndëbiá, bacna bayëjbe juabna uambayá, Jesúsbiöye tmojanamba. 33 Jesús chë bacna bayëja chábensana tbojtánabocna y cachora chë ndëbiá tojtanontšë oyebuambnayana. Entšanga ojnanánënga imojtsichamo: “¡Ndocna te Israelentše chca bëts soye chemuáisinÿe ca!”

34 Pero chë fariseunga imojtsichamo: “Cach bacna bayëjëngbe amëndayá, Satanás, muábíöye obenana tbojatštá chë bayëjënga entsángbentsana jtëbuacanama ca.”

Jesús entsangbiamama tbojanongmé

35 Jesús nÿetsca pueblënguëjana y luarënguëjana yojsachnëjuana y chë judiëngbe enefjuana yebnënguenache entsanga yojsabuátambaye.

Yojanabuayiyná chë tšabe noticiënga Bëngbe Bëtsabe amëndayama, y nyëtsca šocanëngama y tsetšanama yojánashnaye. ³⁶ Y chë entsanga tojánanyë ora, puerte tbojanongmé. Er chënga imojtsemna mo abujajënyä ndbomna oveshëngcá, puerte uamëntšnyënga ba soyëngama padecena causa, y chaujabuachama ndocná ntsebmocná. ³⁷ Chora chabe uatsjëndayënga tojanëyana: “Canýe bëts jajañe bëtscá játbanama entsemna, pero peonga nýe báseftanga. Cachcá quem luarentše, bëtscá entsanga Bëngbe Bëtsábioye nduabuátmënga montsemna, y chëngbioye chabiamá abuyiynayënga nýe báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuyiynayënga chauichamoma, quem entsanga chábioye chamúbuajama ca” —Jesús tojanëyana.

10

Jesús chë bnëtsana uta uatsjëndayënga tojanabacacá

(Mc 3.13-19; Lc 6.12-16)

¹ Chentšana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjëngbe juabna entsángbentšana jtabocnama y nyëtsca šocanëngama y tsetšanama jashnayama.

² Chë bnëtsana uta uatsjëndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³ Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšifne Jesúsbioye boshjuaná.

Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶ Nýe Israeloca pueblëngoye šmochjá. Choca entsanga mo ótsena oveshëngcá montsemna, Bëngbe Bëtsábioye corente nduabu-atma causa. ⁷ Smochjá y entsanga šmochjábuayenaye Bëngbe Bëtsabe amëndayana echanjóshjanguama. ⁸ Chë šoquënga šmochjášhnaye, šmochjama chë obanënga chámuatayenama, bacna nguayanánaca šoquënga šmochjášhnaye y bacna bayëjëngbe juabna entsángbentšana šmochtábocna. Chë obenana šmonjóyëngacñe tondaye ntjëtsajuacá; cachcá, chë soyënga šmojtsamama tondaye entsanga šmattsayëngacaye.

⁹ “Ndoñe šmattsambaye crocénana uasnanëchiñe. ¹⁰ Ni shecnaja sanaca benachiñama, ni inýe entsáyá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

¹¹ “Nderado canýe bëts pueblentše o base pueblentše chašmojášhajna ora, smochjáanguango canýe tšabe entsá, inýengbioye ndaingñayá, y chabe yebnentše šmochtsoquedañe, inýe puebloye játantscuana. ¹² Canýe yebnoye chašmojámashjna ora, nyëtsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’

¹³ Chë yebnentša entsanga ainaniñe tšabe ebionana jtsebomnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndóñesna, nye cach tšëngaftangftaca chaotsonñe. ¹⁴ Y nderado canye pueblentše o bëtš pueblentše chë entsanga ndoñe tcmonjúbuaja y ndoñe tcmonjóyaunase, chentsana šmochjésebecana y chë shecuatšentša polvëshe šmochjésenstoto. Chca, chë entsanga mochántsetatšëmbo chënga tšëngaftangftaca ndoñe tšabá tmonjamama. ¹⁵ Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjayauná entsanga Bëngbe Bëtšá puerte jabuache echantsacastígaye, y chë bacna entsanga Sodoma y Gomorra luaroquëngna ndoñe nýa nyëtšá jabuache queochatacastígaye ca” —Jesús tojánayana.

Ntšamo chë uatsjëndayënga mochjansúfria

¹⁶ “Smochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. ¹⁷ Entšangbiama cuedado šmochtsebomna, chëngbe pueblentša amëndayëngbe cucuatšifne tšëngaftanga cmochanjábashējuana y chëngbe enefjuana yebnënguenache cmochanjátsetšenaye. ¹⁸ Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiana smotatsëmbcá jóyebuambayama. ¹⁹ Pero chë mandadëngbe cucuatšifne chacmojábashejuana ora, ntšamo o ndayá šmochjayanama ndoñe šmattsenócchinýena. Chca orna, Bëngbe Bëtšá tšëngaftanga cmochanjabuayená ntšamo o ndayá jóyebuambayama. ²⁰ Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtšabe Espiritu, tšëngaftangbiajana echantsóyebuambnaye.

²¹ “Y canye entšá cachabe catšátbiyoye uayayëngbe cucuatšifne bochanjáboshjona chamotsóbama; y canye taitá cachabe uaquiñábioynaca. Y chë básenga chëngbe bëtšëtsangbe contra mochántsemna y uayayëngbe cucuatšifne mochanjábashējuana chamotsébáyama. ²² Tšëngaftanga atšbe ústonënga bëtsemnama, nyëtšca entsanga cmochantsëbuayënja; pero nda nyëtš tempo átšbeñe ošbuachiyá chaotsonñá, atsbocaná echántsemna. ²³ Canye pueblentše chacmojtšécamena ora, inyë pueblöyoye šmochtsacheta. Ndegombre chëyana, Israelentša nyëtšca pueblëngoye cabá nda ora, chë Bëngbe Bëtšá Entšá tbojanbemá ya quem luaroye echanjabáshjango.

²⁴ “Ni canye uatsjendayá chabe buatëmbayabiana más uamaná ntsemnana, ni chë oservená chabe nduiñbiana más uamaná. ²⁵ Chë uatsjendayá ya cachabe buatëmbayacá jtsemnana tojashjáchëse, ndayá más nanjátšboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canye yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanëyana.

Nda ndegombre cuantsebiauatja

(Lc 12.2-7)

²⁶ “Chíyeca entšangbiama ndoñe matauatjëngana. Chë yoiytëmena soyentšana tondaye ntjinýcá queochaisoquéda, y chë ndótatšëmbo soye, ntsotatšëmbcá queochaisoquéda. ²⁷ Chë mora cbontsëtsëtsná soyënga, chë

entšangbiamana mo ibetiñe cuaftsemncá soyënga, tsëngaftanga šmochjama entšanga botamana chama chamotsetatšëmbuama. Y chë iytëcana cbontsëtsëtsná soyënga nyëtsca entšanga šmochtsabuayiyayey, mo nda canye yebnentša tsbanánocana noticiënga tojtsayebuachcá. ²⁸ Ndoñe matauatjëngana nye chë tsëngaftangbe cuerpo japochócama imobenëngbiamana y ainana jtsepochócama ndoñe ntsobenana. Más šmochtsebiauatja chë nda endobena tsëngaftangbe cuerpo y tsëngaftangbe ainana jtsepochócama, nyëtsca tescama infernoca.

²⁹ “Uta jaja shloftsetémata nye canye denario crocenánama mondbëtsena. Masque chca, ni cányetema obanatema fshantsoye jotsatšana, tsëngaftangbe Taitá, Bëngbe Bëtsá ndoñe tontsebošëse. ³⁰ Y tsëngaftangbiamana, Bëngbe Bëtsá botamana jtsantjeshnana, y chca, cha lempe tsëngaftangbiamana jtsetatšëmbuana, bueta stjënashënga tsëngaftangbe bestšašine yomnámna. ³¹ Chiyeca ndoñe matauatjëngana, tsëngaftanga ba jaja shloftsetémëngbiamana corente más šmonduámana ca” —Jesús tojánayana.

Ndabiamana Jesucristo yochjayana chabe entšá yomna ca
(Lc 12.8-9)

³² “Nda atšbe entšá yomna ca entšangbe delante tojayanabiamana, átšnaca, atšbe Taitá, chë celoca endmënabe delante chanjayana cha atšbe entšá yomna ca. ³³ Pero nda entšangbe delante atšbe entšá ndoñe yondmëna ca tojayanabiamana, átšnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanëyana.

Jesusbe causa, entšangbeñe más jtsentsjanayana
(Lc 12.51-53; 14.26-27)

³⁴ “Ndoñe šmattsejuabnaye atše quem luaroye tijabo nyëtsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejtsjanaye. ³⁵ Atše sënjabo chë uaquiñá cachabe taitabe contra chaotsemnana, chë bembe cachabe mamabe contra y chë bebincué chabe uambën mamabe contra chaotsemnana. ³⁶ Y chca, ba entšangbe uayayënga cachëngbe pamillanga mochántsemna.

³⁷ “Nda cachabe taitá o mamábioye atšbiamana más tbojtsebobonshánëse, cha ndoñe ntsomerecénana atšbe entšá jtsemnana. Nda cachabe uaquiñá o bëmbebïoye atšbiamana más tbojtsebobonshánëse, cha cach ndoñe. ³⁸ Y nda nyëtsca chabe quem luare soyënga ndoñe tonjëseboshjona atše juastama, y atšbiamana jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnana. ³⁹ Nda tojtsëtsëna quem luarentše bëtscá soyënga jtsebojnana y atšbiamana jasúfriama ndoñe tontseprontana, chë nyëtsca tescama yomna tšabe vida echanjobuetše. Pero nda quem luarentša soyënga cachcá tojesonýá atše juastama, masque chaóbana, chë nyëtsca tescama yomna tšabe vida echántsebojnana ca” —Jesús tojánayana.

Chë uacanana soyënga
(Mc 9.41)

⁴⁰ “Nda tsëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. ⁴¹ Nda canye Bëngbe Bëtsabe juabna oyebuambnayábioye tbojoyeuná, cha chca bëtsemnana, chábioye Bëngbe Bëtsá canye uacanana soye bochántatšëta, mo cach Bëngbe Bëtsabe juabna oyebuambnayabe uacanana soycá. Y nda canye nyëtsca soyënguine tšabá amábioye tbojofja, cha chca uamanama, chábioye Bëngbe

Bëtsá canÿe uacanana soye bochántatšetaye, mo cach nÿetsca soyënguifë tšabá amabe uacanana soyca. ⁴² Y ndánaca, tšëngaftanguentšá canÿe nduamanábioye masque nÿe mo base búyeshtema tbojuabuatšetá, atšbe us-toná bëtsemnayeca, ndegombre Bëngbe Bëtsá canÿe uacanana soye chábioye bochántatšetaye ca” —Jesús tojánayana.

11

Juan chë Ubayanabe ichmónënga
(Lc 7.18-35)

¹ Jesús tojanpochocá chabe bnëtsana uta uatsjëndayënga jábuayenama, y chentsana tojtsanoñe chë luariñe pueblënguenache oyena entsanga Bëngbe Bëtsabe palabra jabuátambama y jábuayenama.

² Chë tempo Juan chë Ubyaná cárceloye tmojanëtame. Choca cha vojouena ndayá Jesús yojtsamana. Y as, Jesús yojtsemnoye, básefta chabe ústonënga tojanichamó, ³ mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínÿabiamá jatobátmama ca?

⁴ Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinÿcá. ⁵ Cha šmochjacuénta: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatmëna y chë tësmënga montsuenana, chë obanënga tmontayena y chë ndbomnjëjmëngbiöye chë tšabe noticiënga montsabuayiyná ca. ⁶ ¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

⁷ Chënga tmojtsatanoñe ora, Jesús tojanontšé Juanbiamá chë entsanga jáuyanana, mëntšá: “Juan jinÿama šmojánbocana ora, ¿ndayá jinÿama chë entsanga ndoyena luaroye šmojánbocana? ¿Canÿe entšá ainaniñe tondaye añemo ndbomná, mo canÿe šëse bínÿiaca shatiyeynëscá? ⁸ Y ndoñese, ¿ndayá jinÿama choye šmojánbocana? ¿Canÿe boyabása uámana entsayaca bopormaná? Ndoñe. Tšëngaftanga šmondëtatšëmbo chë boyabásenga uámana entsayaca bopormánëngna chë mándayëngbe yebnënguifë mondbëtsiyenama. ⁹ Y asna, ¿ndayama choye šmojánbocana? ¿Canÿe Bëngbe Bëtsabe juabna oyeuambnayá jinÿama? Ndegombre, aifñe; y chëyana, ndegombre cha canÿe Bëngbe Bëtsabe juabna oyeuambnayabiamá más bëtsá endmëna. ¹⁰ Cha, Juan, endmëna ndabiamá Bëngbe Bëtsá chabe uabemana palabrenguifë tojánayana mo chabe ichmonacá, mëntšá tojánayana ora: Cristo, atšbe entšá natsana sënjichmó achiamá chaóyeuambama, entsanga jábuayenama aca jabama ainaniñe tšabe juabnëngaca chamotse-prontánama ca.

¹¹ Ndegombre chëyana: Nÿets tempo entsángbeñe, ndocná quenátsmëna Juan chë Ubayanabiamá más bëtsá; masque chca, Bëngbe Bëtsabe amëndayoca chë más batsá uamaná, más bëtsá echántsemna ntšamo mora Juan yomnama.

¹² “Juan chë Ubyaná tojánabo orscana mëntšcoñama, bëtscá entsanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imonnëngna, chëngbe nÿets añemoca montseboše chë mándayana jtsepochoçama. ¹³ Juan candabëntscuana, nÿetsca Bëngbe Bëtsabe juabna oyeuambnayënga y Moisesbe Ley nÿe Bëngbe Bëtsabe amëndayama tmonjanobuambá. ¹⁴ Y tšëngaftanga chë soyënga jóyëngacñama šmojtsebošëse, Juan entsemna chë Bëngbe Bëtsabe juabna oyeuambnayá Eliascá, chë

jabama ibojamná. ¹⁵ Chë jouenama tmojtsoebenënga, chamouena ca” —Jesús tojánayana.

¹⁶ Mëntsánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámana basetemëngcá; chënga chëngbe enutëngbiöye jtsayebuáchana ¹⁷ y mëntsá jtsichámuana: ‘Tšëngaftangbiamá fsënjaflautá y ndoñe chešmatslantsá; ngmënaca fsënjaversiá y ndoñe chešmatošachna ca.’ ¹⁸ Juan tonjánabo, y bëtscá entsángbeñe ndoñe quenjatamana ni jasana, ni jofšiyana, y entsanga montsanichamo chana bacna bayëbe juabna uambayá yojamna ca. ¹⁹ Morna, chë Bëngbe Bëtsá Entšá tbojanbemá tonjabo, y chana aíñe entsamana bëtscá entsángbeñe jtsesayana y jtsofšëšnayana, y entsanga montsichamo chana yapa uasayá y vínoye tmoyá entsemna ca y Romocama impuesto entsángbiöye atjanayënga y bacna soye amëngbe amigo ca. Pero Bëngbe Bëtsá endbëtsinýanýnaye cha nyets osertánana bomná yomnama, chë ndayá cha tojama ora ndayá chentsana tojóbcna soyëngaca ca” —Jesús tojánayana.

Chë nduauenana entsanga (Lc 10.13-15)

²⁰ Chentsana Jesús tojanontsé jucácanana chë entsanga, ndëmuanýenga imojoyena chë pueblënguiñe ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntsá yojsichamo: ²¹ “¡Tša lastema, Corazín puebloca entsangbiamá! ¡Tša lastema, Betsaida puebloca entsangbiámna! Chë chentše sënjama bëts soyënga, Tiro y Sidón bëts pueblënguentše matënjochnënguse, chentša bacna entsanga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojësha entsayangaca matmëntopormanga y chëngbe bestšašíñe jatinyá matmënjenotbótoto. ²² Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebomna, chë Tiro y Sidonoca bacna entsangbe castiguama. ²³ Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngmënaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe. ²⁴ Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastigaye, y chë Sodoma luaroca entsángbiöye ndoñe nyëtšá jabuache quemochatacastigaye ca” —Jesús tojánayana.

“Atšbiöye mabënga y šmochjóchna” (Lc 10.21-22)

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nýe batsá tatsëmbënga tcojanýanýé, chë tša tatsëmbënga y osertánëngbiamá tcojaiytëme soyënga. ²⁶ Aíñe, chama cbontsadorana, Taita, chca chaotsemnama tcojábosënayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nÿe chë Taitá aiñe. Y chë Taitábioye ndocná corente quebnatábuatma; nÿe chë Uaquiñá aiñe, y ndábioye chë Uaquiñá tojtseboše nda chë Taitá yomnama jinÿanÿiyama, chánaca chë Taitábioye bochantsábuatma.

²⁸ “Atšbioye mabënga nÿetsca tšëngaftanga uamëntsnyënga y bëtscá trabajo uangménënga, y atše chanjama tšëngaftanga chašmochnama. ²⁹ Ntšamo canÿe entšá, uacná yuguëšine juabatsécana juanatsama, cachcá, tšëngaftanga atše šmochjaleséncia jobnatsayama y jabuátambama. Atšbentsana šmochjuatsjinÿe: atše uantado mëná sëndmëna y ndoñe quetsatamana yapa uamaná jatenobiamnyana. Y chca, tšabá jóchnama šmochantsobena y ainaniñe más añemo šmochántsebmoma. ³⁰ Mo canÿe uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nÿetsca soyënga jamama echántsemna ca” —Jesús tojánayana.

12

Jesusbe uatsjëndayënga ochnayté trigo tmojanátabebe (Mc 2.23-28; Lc 6.1-5)

¹ Chë tempo, Jesús canÿe ochnayté canÿe jajajana yojtsachnjëuana. Chabe uatsjëndayënga shëntseca imojtsemna, chíyeca tmojanontsé trigo juatabebiana y chë meshënga jasana. ² Chë fariseunga chca tmojáninÿe ora, Jesús tmojaniana: —Minÿe, acbe uatsjëndayënga canÿe soye montsama y chë soye ochnayté jamama ndoñe quenátslesenciana ca.

³ As Jesús tojanëyana: —¿Ndoñe šmëndualía y šmondëtatšëmbo ndayá David y chabe enutënga tmojanmama, shëntseca imojtsemna ora? ⁴ Chca orna, David, Bëngbe Bëtsabe bëts yebnoye yojámashëngo y chë Bëngbe Bëtsá chentše yojamnama inÿinÿnaye tandëšënga yojase. Chë tandëse nÿe ndánaca jasama ndoñe yonjalesenciana, ni Davidbiana, ni chabe enutëngbiana. Nÿe bachnangbiana belesenciana chë tandëse jasama. Masque David chca tojanma, Bëngbe Bëtsá chora ndoñe tonjánayana David canÿe bacna soye tojanma ca. ⁵ ¿O ndoñe šmëndualía y šmondëtatšëmbo, Moisesbe leyinÿe, chë bachnanga ochnayté Bëngbe Bëtsabe bëts yebnentše jsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? ⁶ Y atše šcuayana: Muentše canÿa entsemna, cha chë Bëngbe Bëtsabe bëts yebnentša bachnangbiana más uamaná endmëna y chabe amëndayoca soyënga más entsámama chë bachnangbe mándayentša soyëngama. ⁷ Bëngbe Bëtsabe uabemana palabrenguiñe mëntšá endayana:

Atše sëntseboše tšëngaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca. Ntšamo chiñe entsayancá ndegombre cmojtsësertánëse, tšëngaftanga ndoñe chëngbe contra šmattsichamo, chë ochnayté chca tmojtsamëngbiana. ⁸ Chë Bëngbe Bëtsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

Chë buashana cucuatše bomna entšá (Mc 3.1-6; Lc 6.6-11)

⁹ Chentšana Jesús tojtsanoñe y chentša judiëngbe enefjuana yebnoye tojánamashëngo. ¹⁰ Chentše yojtsemna canÿe boyabása buashana buacuatše

bomná. Chë fariseunga imoijtsenguaye ndayánaca, as chca chënga jtse-bomnama ndaye sóyeca Jesús mal jaquédama. Chcasna, chora chënga Jesús tmojantjá: —¿Queoijtseselesciana canýe ochnayté šocá jáshnama ca?

¹¹ Y Jesús tojanějua: —¿Nda tšëngaftanguentšá, canýe oveshá tbojtsebomna y nýa chë ochnayté canýe fshantsentše atëfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? ¹² ¡Entšá oveshabíama puerte más uamaná endmëna! Chcasna, entselesciana chë ochnayté tšabe soye jamama ca —Jesús tojanéyana.

¹³ Chora Jesús chë buashana buacuatše bomnábioye tbojaníyana: “Macuenýanéjaná ca.” Y chë boyabásana tojanacuenýanéjaná y chora chëtša tšabá yojtsatamna mo cach inýetsacá. ¹⁴ Pero chë fariseunga tmojésanbocana ora, tmojanontšé juabnayana ntšamo jamëse Jesús jóbama.

Ndayá chë Bëngbe Bëtsabe juabna oyebuambnayá Jesusbíama tojánayana

¹⁵ Jesús chë soye tojántatšëmbona ora, chentšana tojtsanoñe y ba entšanga tmojanasto. Nýetsca šoquënga tojanashná, ¹⁶ y tojanamëndá chabíama entšángbeñe ndoñe chamondëtsóyebuambnama. ¹⁷ Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana:

¹⁸ Muentše atšbe oservená entsemna. Atše cha sënjabocacá, atšbe bonshaná, y atše corente chabíama sëntsoyejuá.

Atše chanjama atšbe Espíritu chabe ainaniñe chaotsemnama y entšanga echanjabuayená, Bëngbe Bëtsá nýetsca luarënguentshana entšangbíama yochjayanama chënga tšabá o ndoñe tšabá tmojanamama.

¹⁹ Cha ndoñe queochátayajuatsana, ni queochátschembumbuana. Chabe oyebuambnayana tsáshenañe ndocná queochatuena.

²⁰ Mo nda chë atcana šëse ndoñe más jatsndbimana, chë ndobenënga cha ndoñe queochátapochocaye.

Mo nda chë quinýenëfjua nýe uabojátsëna uajuinýnëfjua ndoñe ntsafsanana, chë Bëngbe Bëtsábeñe jtsošbuáchiyama imojtsebojátsangbe obatmanana chábeñe, cha ndoñe queochátabuajuanaye.

Cha nýets añémoca echanjëftsetrabája, entšanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹ Y nýetsca luarënguentshana entšanga chábeñe mochantsobátmana ca —cha tojánayana.

Fariseunga tmojánayana Jesús Satanásbentšana obenana tojanóyëngacñe ca (Mc 3.20-30; Lc 11.14-23; 12.10)

²² Chora, Jesús yojtsemnoye canýe boyabása jtaná y ndëbíá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínýnama y chabuatauénanama. ²³ Y nýetsca entšanga ojanánënga imojtsichamo: “¿Mua yojtsemna chë Davídbentšana Uámana Entšá, chë Cristo ca?”

²⁴ Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatštá chë bayëjënga chauatëbuacnama ca.”

²⁵ Y Jesús yojtsetátšëmbo ntšamo chënga imojtsejuabnayama; as tojanéyana: “Canýe amëndayentše entšanga tmojtsenojatá y tmojtsenáyase,

cachënga jenpochócana. Cachcá, canÿe bëts pueblentša entsanga o canÿe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nÿets tempo quemochátsmëna. ²⁶ Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëjtsebo mnana? ²⁷ Tšëngaftanga šmontsichamo atše Beelzebube obenánaca chë bayëjënga tsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebo mnna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama. ²⁸ Y atšna, chë Bëngbe Bëtsabe Espíritbeyeca chë bayëjënga entsángbentšana sëndëtëbuacana; y chë soye entsinÿinÿná Bëngbe Bëtsabe amëndayana tšëngaftangbiye tojóshjanguama.

²⁹ “¿Ntšamo nda nanjobenaye canÿe corente añemo bomna entsabe yebnoye jamashënguana y chabe soyënga jtsebocana, ndoñe natsana chábiye tconjshëtsebatsëquëse? Nÿe tcojshëtsebatsëquësna aíñe cuanjobenaye cha jefcana. Atše ya chca Satanásoftaca sënjama.

³⁰ “Nda ndoñe átseftaca tontsemná, atšbe uayayá jtsemnana. Y nda átseftaca ndoñe tontsetrabája, chana atšbe contra jtsetrabájayana.

³¹ “Chíyecna chëyana, Bëngbe Bëtsá entsanga echanjáperdonaye nÿetsca chëngbe bacna soyënga y chë Bëngbe Bëtsabiana puerte bacá oyebuambnayana, mo chábiye cuafyoyenguangcá; pero ndoñe queochátaperdonaye chë Uámana Espíritbiana puerte bacá ichámënga. ³² Bëngbe Bëtsá bochanjaperdóna chë Cha Entšá tbojanbemabiana ndoñe tšabá ichamuábioye; pero chë Uámana Espíritbiana ndoñe tšabá ichamuábioyna, ni quem luarentše, ni ndocna te queochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá
(Lc 6.43-45)

³³ “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. ³⁴ ¡Mëtšcuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsemnëse? Er ndayá ainanoca becá tomnama entšá jtsóyebuambnayana. ³⁵ Chë tšabe entšá, chë ainanoca tšabe juabnënga bomnentsana jtsóyebuambnayana, y chë bacna entsana chë ainanoca bacna juabnënga tobomnentsana jtsóyebuambnayana. ³⁶ Y ndegombre cbëyana, chë entsangbiana tšabá o ndoñe tšabá tomjamama jayanama tempo chaojobuache ora, ndaye ndoserverna palabra šmojóyebuambama, Bëngbe Bëtsabe delante šmochanjayana ndáyeca chca ca. ³⁷ Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

Chë bacna entsanga Jesús tmojanimpadá canÿe bëts soye chaoma, chabe obenana jinÿama
(Lc 11.29-32)

38 Chentšana, básefta fariseunga y Moisesbe ley abuatambayënga Jesús tmojantjá: —Buatëmbayá, bënga fséntseboše aca canýe bëts soye chacoma, acbe obenana chašcuinýanýema ca.

39 As Jesús tojanëjua: —Quem puerte bacna entsanga y ndošbuáchiyënga montseboše atše canýe bëts soye chaima, atšbe obenana jinýanýiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soy cá. 40 Ntšamo Jonás unga te y unga ibeta chë bëts beonbe uafsbioye yojéftsemná, cachá chë Bëngbe Bëtsá Entšá tbojanbemá unga te y unga ibeta fshantse jashenoye echanjëftsemna. 41 Morsca entsanga tšabá o ndoñe tšabá tmonjamama Bëngbe Bëtsá yochjayana te, Nínive bëts puebloca entsanga mochanjot-saye y morsca entsangbiamama mochanjayana ndoñe tšabá tmonjama ca; er chënga, Jonás yojtsabuayinayne ora, tmojanoyeuná y chë tšabe benache tmojanishache, y chë mora muentše entsemnana, Jonasbiamama más uamaná endmëna. 42 Morsca entsanga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsangbiamama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiamama más uamaná endmëna ca —Jesús tojánayana.

Ndayá inopása chë bacna entsángaftaca
(Lc 11.24-26)

43 Jesús mëntsánaca tojánayana: “Canýe bacna bayëja canýe entsábentsana tojësebozna ora, chë bayëjna bojojo luarënguenache jtsanana ndayentše jóchnama onguayiñe, y canýe luare ndoñe tonjínýena ora cha jenójuaboyana: 44 ‘Atšbe oyenoye, chë ndayentsana sënjëftseboznoye chanjeshëcona ca’. Y choye tojtashjango orna, jinýenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemná. 45 Chorna chë bayëjna jana y inýe canýsëfta bayëjënga chabiamama más opëjënga jobiatsana y nýetscanga choye jamashjnana chë boyabásabeñe joyénanama. Y chca, chë boyabása tempscama más bacna entsá jtsemnana, chora chë natsanama más bayëjënga abamna causa. Morsca puerte bacna entsángaftaca cachá echanjochnëngo ca” —Jesús tojánayana.

Chë Jesusbe ndegombre pamillanguentsënga
(Mc 3.31-35; Lc 8.19-21)

46 Jesús cabá entsanga yojtsëtsëtsnaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nýe shjoca imojtsemna; 47 asna, canýe boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

48 Pero Jesús chë jauenayama tojánabioye tbojanianayana: —¿Nda atšbe mamá yomna, y ndëmuanýënga atšbe catšátanga ca?

49 Y cachora chabe cucuatše tojanatsbaná, chabe uatsjëndayënga tojanëñanýe y tojánayana: —Quemënga montsemna mo atšbe mamacá y mo atšbe catšatangá. 50 Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca —Jesús tojánayana.

13

Chë jenabe cuento
(Mc 4.1-9; Lc 8.4-8)

¹ Cach te, Jesús yebnentsana tojëftsanbocna y uafjajónaye tsachoca tojanótbema. ² Mallajta entsanga choye tmojanobeconá; as Jesús, chë uafjajónayentse yojanamna canýe barquëshoye tojánasëngo, tojanótbema; y chë entsangna tsachoca imojtsemna. ³ Chorna ba soyëngama cuentëngaca chënga tojanabuatambá.

Mëntsá tojanëyana: “Canýe jená chë jénaye jaujuquëshama yojëftsebocna. ⁴ Yojtsejquëshaye orna, básefta jénaye benache juachañe yojuatquécjana, pero chë jaja shloftënga imojástjajna y lempe imojtsósañe. ⁵ Inýe meshëngna ndëtsbenguiñe yojuatquécjana, ndoñe yapa fshantse binýnentse. Chiñna betesco yojuábocna, fshantse ndoñe jashenocana yonjanmëna causa, ⁶ pero shinýe yojábocna ora, puerta yojojënýána y yojtсанcta; y yojtسابоjo, bëtscá tbëtëjënga tondaye causa. ⁷ Inýe meshëngna uchmëshangañe yojuatquécjana, y chë uchmëshangá yojuájua orna, lempe yojtсatscué. ⁸ Y inýe meshëngna, uanganëshiñe yojuatquécjana y puerta botamana chiñe yojuashajo: ínýenache nýe canýe jénayentsana mo patse meshënga yojuashájona, ínýeñna mo chñënguana bnëtsana meshe y ínýeñna mo unga bnëtsana meshe.”

⁹ Jesús chca jacuéntama tojanpochocá ora, mëntsá tojánayana: “Chë jouenama tmojtsobenënga, šmochjouena ca.”

Ndáyeca Jesús cuentëngaca yojánabuatambaye
(Mc 4.10-12; Lc 8.9-10)

¹⁰ Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuentëngaca cojtsabuatambá ca?

¹¹ As Jesús tojanéjua: —Bëngbe Bëtsá tsëngaftanga cmontsinýanýná nýetsca chë mo iytëmcá yomna soyënga chabe amëndayama, pero chë ínýengbioyna ndoñe. ¹² Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca. ¹³ Chíyeca atse cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinýama; y masque becá chë soyënga chamouena, ndoñe tsabá quemochátuenana, ni queochátësertana. ¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaiás tojanayancá: Masque becá chamouena, ndoñe queochátësertana.

Masque puerta chamotsantješna, ndoñe quemochátinýe

¹⁵ Quem entsanga ndoñe quemátsboše botamana jajuaboyana;

chënga uamatsächtonënga montsemna

y chëngbe bomínýnaca cachcá.

Chca ndóñesna, chënga muantsobena jinýama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atse chënga chayatsebacama ca —cha tojëftsanbema.

¹⁶ “Tsëngaftangna oyejuayënga šmochanjoyena, er šmondbomna bominýe y matscuasënga Bëngbe Bëtsabe soyënga jinýama y jouenama. ¹⁷ Ndegombre chëyana, banga Bëngbe Bëtsabe juabna oyebuambnayënga y nýetsca

soyënguifne tšabá amënga tmonjánbošena chë tšëngaftanga šmontsonjá soyënga jinýama, y ndoñe chemátaninýe; tmonjánbošena chë tšëngaftanga šmotsuenana soyënga jounama, y ndoñe chemátanuena ca” —Jesús tojanëyana.

Jesús chë jenabe cuentama tojanabuayená

(Mc 4.13-20; Lc 8.11-15)

18 “Chcasna, oído šmochajajajo; chë jenabe cuento mëntšá endayana: 19 Chë Bëngbe Bëtsabe amëndayama tmojouena y ndoñe tontsésertana entsanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentšana jabëtsabuajuanama, chënga chiñe ndoñe chamondëtsošbuáchemá. 20 Y chë ndëtsbenguifne yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entsangcá; 21 pero ndoñe nyëts tempo chana jochájuaña, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inýenga chëngbioye mochantsëbuayëña y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. 22 Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entsangcá, pero quem luarentša soyëngaca oyejuayënga jtsemnana yapa mochántsenojuabnaye y mallajta crocénana y ba soyënga jtseboznama mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. 23 Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entsangcá. Mo canýe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inýengna inýengbiama más bëtscá soyënga mochántsama, y chca, inýenga jtsemnana mo chë patse meshënga tojanshajo jenaycá, inýenga mo chë chñënguana bnëtsancá y inýengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

24 Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canýe boyabása chabe jajañe yojáje. 25 Pero nyëtscanga imojtsomañe orna, chabe uayayá yojáshjango y chë trigo jeniñe bacna shácuana yojesejé y yojtsatoñe. 26 Y chë trigo yojuájua y ya yojtseshajuana orna, chë bacna shácuanañe yojuábocna. 27 As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuana chiñe tojuábocna ca?’ 28 Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuana jetsejashtsëtsama ca?’ 29 Pero chë nduiño yojáuyana: ‘Ndoñe. Chë bacna shácuana šmojtsejashtsëtsana ora, chë trígnača šmattsejashtse ca. 30 Más tšabana, cachcá mochjonýaye cánýiñe chaójuama, chë jaja saná játbana tempo chaojbuáchëntscuana. Chora chë trabájayënga chanjichamú y chanjámëndaye natsana chë bacna shácuana chamotsejashtsëte y chamotsentsacuacjuá jtsejuinýiyama, y chentsana chë shajuana chamuatbaná y atšbe grano uaquécjnaye yebniñe chamotsatsumamá ca’ ” —Jesús tojánayana.

Chë mostaztiye jenayama cuento

(Mc 4.30-32; Lc 13.18-19)

³¹ Jesús mēntśánaca tojanacuntá: “Bēngbe Bētsabe amēndayana endmēna mo canye mostaza betiye jenaycá, canye boyabása chabe jajañe yojáje. ³² Ndegombre, nyetsca jenayēngama chē mostaza jénaye chē más bāsetema endmēna, pero tojójua orna, chē jajañentse chē más bēts betiye jóbemana. Tśa bēts betiye jtsemnana, chíyeca ba buacuashangá jtsabomnana y chē jaja shloftśēnga jana y chíñe uajajonētemēngá jauábopormana ca” —Jesús tojánayana.

Chē levadurama cuento

(Lc 13.20-21)

³³ Quem inye cuétnaca tojanēyana: “Bēngbe Bētsabe amēndayana endmēna mo levadurcá; canye shembása chana jenájua bana unga medida arninyañe, nyetsana chauabochama ca.”

Ndáyeca Jesús entsanga cuentēngaca yojanabuayiyá

(Mc 4.33-34)

³⁴ Jesús nyetsca chē soyēngama lempe cuentēngaca entsanga jtsētsētsnayana, y cuentēngaca ndoñesna ndoñe yonjanoyebuambná. ³⁵ Chca yojamna ndayá cachcá chaochnēngama ntśamo chē Bēngbe Bētsabe juabna oyebuambnayá tojanayancá, mēntśá:

Jabuátambamna cuentēngaca chanjóyebuambaye;

chanjayana chē iytēmena soyēngama y chē entsanga ndoñe mondētātśēmba soyēngámnaca;

Bēngbe Bētsá quem luare tojanma orscana chē soyēnga yomna ca —cha tojánayana.

Chē tríguañe bacna shácuana cuentama Jesús tojanabuayená

³⁶ Chentśana Jesús chē entsanga tojtanichamó y yebnoye tojtanamáshēngo. Chentśna chabe uatsjēndayēnga tmojanimpadá ndayá chē bacna shacuanama cuento betsayancá chauabuayenama. ³⁷ As Jesús tojanēyana: “Chē tśabe jénaye jená endmēna chē Bēngbe Bētsá Entśá tbojanbemá, ³⁸ y chē jajañna, quem luare. Chē tśabe jénaye entsemna chē Bēngbe Bētsabe amēndayoye mochjámashjna entsanga, y chē bacna shácuana entsemna chē bacna bayējēngbe amēndayabe entsanga, ³⁹ y chē uayayá, chē bacna shácuana yojáje chana, Satanás. Chē jaja saná atbanayana entsemna chē quem luare jopochócama chaojobuache ora, y chē trabájayēngna chē angelotēmēnga. ⁴⁰ Ntśamo chē bacna shácuana jtsejashtśétsana y iñoey jtsatmetśana jtsejuinīyama, cachcá echántsemna quem luare jopochócama te. ⁴¹ Chorna, chē Bēngbe Bētsá Entśá tbojanbemá chabe angelotēmēnga echanjichamuá chē ínēnga bacna soye chamomama amēnga y chē bacna soyēnga amēnga chabe amēndayentśana chamotsajuanayama. ⁴² Y chora chēngbioye chē uabouana iñeshoye mochantsēsetjango y chentśe puerte mochanjenóbośachna y chē tsetśanama juatsaśēnga mochantsenoftśojnaye. ⁴³ Chora, chē ntśamo Bēngbe Bētsá yomandacá amēngna corente mo shinycá mochantsebuashinīyāna chēngbe Taitá, Bēngbe Bētsabe amēndayoca. Chē jouenama tmojtsobenēnga, śmochjouena ca” —chora Jesús tojánayana.

Chē fshantsiñe uaiytēmena bomnanama cuento

⁴⁴ “Bēngbe Bētsabe amēndayana endmēna mo chē fshantsiñe uaiytēmena bomnancá. Canye boyabása chē bomnana yojuinīyena y chentśana iytēcana

cachentše yojesatbontsá. Corente oyejuayá yojtá, nyetsca chabe bomna soyënga yojetsatobuiye y chentšana chë fshantse yojtobuámiñe ca” —Jesús tojánayana.

Chë corente uámana fjantse ndëtsëtémama cuento

⁴⁵ “Mo canye entśá uámana fjantse ndëtsëtémënga obuamnañacánaca endmëna chë Bëngbe Bëtsabe amëndayana. ⁴⁶ Chana, canye corente uámana ndëtsëtëma yojinýena ora, yojtá y lempe chë inabomna soyënga yojetsatobuiye y chë ndëtsëtëma yojtobuámiñe ca” —Jesús tojánayana.

Chë atarraiëshama cuento

⁴⁷ “Bëngbe Bëtsabe amëndayana endmëna mo canye atarraiëshacá, buyeshoye jutšenana y nyetsca beonga jashebuáyana. ⁴⁸ Chë atarraiësha jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentše juatbemana chë beonga jabocacayama; chë tśábënga sbarëquënguiñe juatsuámana y chë ndoñe tśábënga jtsëtšanana. ⁴⁹ Cachcá echanjochnënga quem luare jopochócama tempo chaojbuache ora. Chë angelotémënga mochanjábocana chë tśabe entśángbentšana bacna entśanga jaluárama, ⁵⁰ y chë bacna entśangna chë uabouana ñëshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftëšjojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: —¿Lempe chama quecmojsésertana ca?

Y chënga tmojanjuá: —Arseñor, añe ca.

⁵² As Jesús tojanëyana: —Canye ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjëndá orna, mo canye yebnentša nduiñcá cha jtsemnana. Chë nduiñna chabe grano uaquëcjnyaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

Jesús Nazaretoca (Mc 6.1-6; Lc 4.16-30)

⁵³ Jesús chë soyënga jacuëntama tojanpochocá ora, chentšana tojtsanoñe.

⁵⁴ Y cachabe luaroye tojtanashjango y chentša judiëngbe enefjuana yebnentše tojanontśë jabuátambama. Entśanga ojnanánënga imojtsichamo: —¿Chë lempe yojtsetatšëmbcá ndëmoca mua tojuatsjinýe ca? ¿Ntšamo nantsobena chca bëts soyënga jamama ca? ⁵⁵ ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabëñanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? — chënga imojtsichamo.

⁵⁷ Y chë causa chë entśanga tmojanotjayaná y ndoñe imontseboše cha joyeunayana. Pero Jesús tojanëyana: —Nyetsquénache canye Bëngbe Bëtsabe juabna oyebuambnayá bëtsá jabemëngana, pero cachabe luarentše, cachabe yebnentše ndoñe ca.

⁵⁸ Chíyeca chentše Jesús ndoñe tonjëftsanma ba bêts soyënga Bëngbe Bëtsabe obenánaca, chë entšanga chábeñe ndoñe montsanosbuaché causa.

14

*Ntšamo Juan chë Ubayaná tojanóbana
(Mc 6.14-29; Lc 9.7-9)*

¹ Chë tempo, Rey Herodes, chë Galileoca mandayá tojanuena ntšamo nýetsca entšanga Jesucristbiamia imojtsichamcá. ² As cha chabe oservénënga tojanëyana: “Mua Juan chë Ubayaná ctsemna, obanënguentsana tojtayena, chíyeca chca obenana bêts soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipe shema. ⁴ Juan Heródesbioye mëntšá ibnauácacana: “Ndoñe quenátslesenciana aca acbe catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entšangbiamia yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. ⁶ Pero Heródesbe cumpleaño oboyejuaye ora, Herodíasbe bembe entšangbe delante tojanlantsá y Herodes puerta chama yojtsóyejuaye. ⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojaníyana: “Canýe šcneniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnana. ¹⁰ Y as tojanmandá chë Juan yojanëtámenoca chabe bestšaše chamuetsëstjanguama. ¹¹ Chentšana, canýe šcneniñe chë bestšaše tmojanamba y chë tobiaše tmojanëntšabuaché y chana, chabe mamábioye.

¹² Chentšana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

*Jesús shachna uaranga boyabásenga saná tojanacaredadó
(Mc 6.30-44; Lc 9.10-17; Jn 6.1-14)*

¹³ Jesús chca tojanuena ora, canýe barquëshañe tojtsanoñe canýe bën luaroye, entšanga ndoyena luaroye. Pero entšanga chama imojátatsëmbona y chë pueblënguentsana tmojánbocana shecuátsëca cha juastama. ¹⁴ Chentšana, chë barquëshoicana tojtanastjango ora, Jesús ba entšanga tojánanyë, chë cha tmojáanguanguënga. Chëngbiamia tbojanongmé y chë entšanguentsana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaníyana: —Ya jetiñe entsemna y quem luariñe ndocná quenatíyena. Entšanga cuantichamuá, pueblotëmëngoye chamotsoñama, saná chamobuámiñama ca.

¹⁶ As Jesús tojanëjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjúá: —Muentše tondaye queftsátsbomna; nýe shachna tandëse y uta beónata ca.

¹⁸ As Jesús tojanëyana: —Chë soyënga moye miyëbo ca.

19 Chentšana Jesús tojanmandá entsanga chamoshéntsjatbiamama. Chorna, chë shachna tandëse y chë uta beónata tojanca, celoye tojanontjesé y Bëngbe Bëtsábioye chama tbojtanchuá. Chora chë saná tojanjatá, chabe uatsjéndayënga tojanējátaye, y chëngna nýetsca entsanga tmojanacaredadó. 20 Nýetsca entsanga tmojanse jtoshachaye nýetsá y cabá chë ojamnëtmëngaca bnëtsana uta sbarëcua tmojanajutjé. 21 Chë tmojansënga imojamna mo shachna uaranga boyabásenga, shembásenga y básenga ntjacuntacá.

*Jesús bėjaye juatsbuacá yojsaye
(Mc 6.45-52; Jn 6.16-21)*

22 Chentšana, Jesús chabe uatsjéndayënga tojanamëndá chë barquëshoye jtamashjnama y chë uafjónaye chenguánoica chabe natsana jashjajnana. Chëntscuana Jesús entsanga yojtichamuá. 23 Nýetscanga tojtanichamó orna, Jesús canýe tjoye tojántsjua canýa jtsemnama, Bëngbe Bëtsáftaca jencuéntama. Yojaibétata ora, cha canýa chentše yojtsemna, 24 y chë barquëshana tsa-chocana bënoca yojtsemna. Y chë olëshënga chë barquëshu yojtšajantšetaye, chë binýia chëngbe contra yojtsemna causa. 25 Ya bínýanoyna, Jesús chëngbioye vojobeconá; bėjaye juatsbuacá yojsaye. 26 Chabe uatsjéndayënga chca cha tmojáninýe orna, tša imojocochauatjaná y puerte auatjanánënga tmojanoyó: —¡Canýe añemëse entsemna ca!

27 Pero chora Jesús tojanëyana: —¡Añemo šmochtsebmna, atše Jesús sëndmëna; ndoñe matauatjëngana ca!

28 Chora Pedro, Jesúsbioye tbojaniyana: —Bëngbe Utabná, ndegombre aca tcojtsemnëse, momandá atše bėjaye juatsbuacá ácbioye chayá ca.

29 Y Jesús tbojaniyana: —Mabo ca.

Chora Pedro chë barquëshoicana tojánastjango y tojanontsé bėjaye juatsbuacá Jesúsbioye jama. 30 Pero chë binýia tša jabuache yojtsemnama tojáninýe ora, Pedro puerte yojtšauatja y tojanontsé jtšenatjëmbambana. Chíyeca cha jabuache tojanchembo: —¡Bëngbe Utabná, šmatsbocá ca!

31 Y cachora Jesús tbojtanobuácuëntšiyë y tbojaniyana: —¡Tša batšatema ošbuachiyá! ¿Ndáyeca ndoñe bëtsá átsbeñe contsošbuaché ca?

32 Chentšana chë barquëshoye chata tbojtanamáshëngo y cachora chë binýia bonguana yojtšatsmëna. 33 Y chora, chë barquëshoye imojtsemnënga Jesusbe shecuatšentše tmojanoshamentšé y tmojaniyana: —¡Aca ndegombre Bëngbe Bëtsabe Uaquiñá comna ca!

*Genesaret ca uabáinoca, Jesús ba šoquënga tojanashná
(Mc 6.53-56)*

34 Chë uafjónaye tmojánenashbuachengo y canýe luare Genesaret ca uabáinoye tmojánashjajna. 35 Chentša entsanga Jesús tmojantëmbá ora, chë luarentša nýetsca entsanga chama tmojántatsëmbona. As chë entsanga chëngbe šoquënga Jesúsbioye tmojanënatse. 36 Y imojtseimpadana nýe mo chabe entsáyá sibiájuanaca juabojajuama chë šoquënga chaualesenciama. Y nýetscanga chabe entsáyá sibiájua tmojanábojajënga, shnánënga imojtsatoquedaye.

15

*Ndáyeca canýe entsá Bëngbe Bëtsabe delante ndoñe tšabia nántsemna
(Mc 7.1-23)*

1 Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioye tmojanobeconá y tmojanianyana: 2 —¿Ndayeca acbe uatsjëndayënga ndoñe montsama chë ntšamo bëngbe bëts taitanga monjanamancá ca? ¿Ndayeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábenga jtsatsmënana ca?

3 As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nÿe cach tšëngaftangbe bëtsëtsanga inmëtsama soyënga jtsamama ca? 4 Bëngbe Bëtsá mëntšá tojanmandá: “Acbe bëtsëtsata stëtšoye ndoñe catjáquedaye”, y “nda cachabe bëtsëtsatbiana podesca tojóyebuambase, chana jóbanama jtsemnana ca.” 5 Pero tšëngaftanga šmondbétsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; 6 y šmondbétsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtšoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y aife šmontsama ntšamo tšëngaftangbe bëtsëtsanga imojanamancá. 7 ¡Bacna entšanga, ntšamo ndegombre šmojuabnacá ndinÿinÿayënga! Nÿe tšabá chë Bëngbe Bëtsabe juabna oyeubunayá Isaiás tšëngaftangbiana tojanoyebuambá, mëntšá tojánayana ora:

8 Bëngbe Bëtsá tonjayana: “Quem entšanga mondbétsichamo Bëngbe Bëtsá tša tšabia yomna ca; chca nÿe uayásaca, pero chëngbe ainantšë atšbiana ndocna tšabe juabnëngaca.

9 Chënga nÿe bonamente mondbétsichamo: Bëngbe Bëtsá tša tšabia yomna ca; chënga nÿe entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

10 Chentšana Jesús entšanga tojánachembo y tojanëyana: —Smochjouena y chacmësértá. 11 Ndayá entšá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetsá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

12 Chora chë uatsjëndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

13 As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashitse. Cachcá echanjama chë nÿe entšangbe butatëmbana soyëngaca. 14 Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentšë bochanjetsótsatše ca —Jesús tojánayana.

15 Chora Pedro, Jesúsbioye tbojanianyana: —Ntšamo chë cuento bëtsayanama šmabuayená ca.

16 As Jesús tojanëjua: —¿Tšëngaftánagnaca cabá ndoñe cmontšësertana ca? 17 ¿Cabá ndoñe cmontšësertana lempe ntšamo šmojascá uafsbioye jomashënguana y chentšana cuerpentšana jtabocnana? 18 Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbiyoe Bëngbe Bëtsabe delante ndoñe tšábenga jábiamana. 19 Ainanocana jtsóbocanana bacna juabnënga: jenóbama, shema o boyábioye inÿaftaca jáingñama, shembása o boyabásaftaca bacna soye jamama, jatbëbama,

jobostérama y ínŷabiama jtsayátsenayama. ²⁰ Chë soyënga cocayé jtsobenana entšábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsoebenana Bëngbe Bëtsabe delante ndoñe tšabia jabemama ca —Jesús tojánayana.

Canŷe shembása inŷe luarocana ashjanganá Jesúsbeñe yojtsošbuaché (Mc 7.24-30)

²¹ Jesús chentšana, Tiro y Sidón luarëngoye tojtsanoñe. ²² Canŷe shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerta entsesufrina, bacna bayëjbe juabna entsebmna causa ca!

²³ Jesús ndocá tbojanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanŷenama nŷe chë entsànga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

²⁵ Pero chë shembása tojána, Jesusbe shecuatšentše tojanoshamentšé y tbojaniyana: —¡Utabná! Diosmanda pavor šmotsebema. ¡šmotsajabuache ca!

²⁶ Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ábioye tbojuajabuache y chëngbioye ndoñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

²⁸ Chora Jesús tbojaniyana:

—¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

Jesús ba šoquënga tojanashná

²⁹ Jesús chentšana tojëftsanbocna y chë Galilea uafjajónaye tsachoye tojána. Chentšana, canŷe batsjoye tojántsŷua y choca tojanótbema. ³⁰ Mallajta entsànga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha nŷetscanga tojanashná. ³¹ Y chca orna, chë entsànga tmojáninŷe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinŷna; y chama chënga corente ojanánënga imojtsemna. Chora chënga tmojanontšé jëtschuyana chë Israelentša entsànga imojánadorana Bëngbe Bëtsá.

Jesús canta uaranga boyabásenga saná tojanacaredadó

(Mc 8.1-10)

³² Chentšana Jesús, chabe uatsjëndayënga tojánachembo y tojanëyana: — Quem entsàngbiama šontsengmena, er ya unga te chënga átšeftaca muentše montsemna y jasama tondaye quemátsbmna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjéndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entsangbiama saná jinýenama ca?

³⁴ Y Jesús tojanatjá: —¿Bueta tandëse šmojtsebmna ca?

Y chënga tmojanjúá: —Canýsëfta tandëse y básefta beonatémënga ca.

³⁵ Chora Jesús tojanamëndá nýetsca entsanga fshantsiñe chamotbiamama.

³⁶ As chë canýsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjéndayënga tojanëjatá. Chentšana nýetsca entsángbioye tmojanacaredadó. ³⁷ Nýetsca entsanga tmojanse jtoshachaye nýetsá. Y chentšana cabá canýsëfta bëts sbarëcua tmojanajutjé chë tojanójamëtemëngaca. ³⁸ Chë tmojansënga imojamna canta uaranga boyabásenga, shembásenga y básenga ntjacuntacá. ³⁹ Chentšana Jesús, chë entsanga tojtanchamó, barquëshoye tojánamashëngo y Magadán luaroye tojtsanoñe.

16

Chë fariseunga y saduceunga tmojánbošena Jesús chaoma canýe bëts soye (Mc 8.11-13; Lc 12.54-56)

¹ Fariseunga y saduceunga tmojána Jesús jinýama, y jisháchichiyama imotseimpadana canýe bëts soye chaoma, as jtsetatšëmbuama Jesusbe obenana ndegombre Bëngbe Bëtsábioyana tainóbocanama.

² Pero Jesús tojanëjua: “Tšëngaftanga jetiñoye šmondbétsichamo: ‘Yëfse tšabe te echántsemna, er celoca buánganiñe entsemna ca.’ ³ Y cachëse šmondbétsichamo: ‘Mënté echanjuafte, er celoca buánganiñe y ibetiñe entsemna ca.’ Tšëngaftanga celoye jontješiyëse, ntšamo chë tempo yochtsemnama tša tšabá jayanama šmojtsobenëse, ¿ndáyeca ndoñe šmontsobena jtsetatšëmbuana ndaye bëts soye Bëngbe Bëtsá quem tempo cmojtsinýanýnama?

⁴ Quem puerte bacna entsanga y ndošbuáchiyënga montseboše atše canýe bëts soye chaima, obenana jinýanýiyama; pero ndoñe chca quemochátinýe, sinó nýe chë ndayá yomna mo chë Bëngbe Bëtsabe juabna oyebuambnaya Jonásoftaca tojanopasá soycá ca” —Jesús tojánayana.

Chora Jesús tojéšanabashejuana y chentšana tojtsanoñe.

Jesús tojanabuayená chë fariseungbe buatëmbana soyëngama (Mc 8.14-21)

⁵ Chë uafjajónaye chenguanoicana chënga tmojtano ora, chë uatsjéndayënga yojësebnëtjomba tandëse jesocñana. ⁶ Chora Jesús tojanëyana: —Smochtsantješna; cuedado šmochtsebmna chë fariseunga y saduceungbe levadurama ca.

⁷ Pero chë uatsjéndayëngna imojtsenatsëtsnaye: —Chca entsichamo, bënga tandëse ndoñe tmonjesocñama ca.

⁸ Jesús chë soye yojtsetatšëmbo; chíyeca mëntšá tojanëyana: —¿Ndáyeca tandëšama šmojtsenatsëtsná ca? ¡Tša batsatema ošbuáchiyana šmobomna!

⁹ ¿Cabá ndoñe cmontsësertana y ndoñe šmontsabouinýna chë shachna tandëšentšana shachna uaranga entsanga sënjanëjuatšema y bnëtsana uta sbarëcua šmonjánajutjema? ¹⁰ ¿Y ndoñe šmontsabouinýna chë canýsëfta tandëšana canta uaranga entsanga sënjanëjuatšema y canýsëfta sbarëcua šmonjánajutjema? ¹¹ ¿Ndáyeca ndoñe cmontsësertana atše tandëšama ndoñe sëntsóyebuambnama? Cuedado šmochtsebmna fariseunga y saduceungbe levadurama ca —Jesús tojanëyana.

12 As chora chë uatsjéndayënga tojanësertá, Jesús ndoñe tonjánayana chë tandësentša levdurama cuedado jtsebomnana ca, sinó ndayá chë fariseunga y saduceungbe buatëmbana soyëngama.

Pedro tojánayana, Jesús chë Cristo bétsemnama
(Mc 8.27-30; Lc 9.18-21)

13 Jesús, Cesarea de Filipino luaroye tojánashjango ora, chabe uatsjéndayënga tojanatjá: —¿Nda ca entsanga imojtsichamo chë Bëngbe Bëtsá Entšá tbojanbemá yojtsemna ca?

14 Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca ínÿe Bëngbe Bëtsabe juabna oyebuambnayá ca.

15 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

16 Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

17 Y Jesús tbojanayana: —Simón, Jonasbe uaquiñá, oyejuayá cochanyoyena. Ndocna quem luarentša entsá chë soye checmatinÿinÿé, sinó atšbe Taitá, celoca endmëná. 18 Y mëntšánaca cbëyana: Mora acna Pedro o chë ndëtšbecá contsemna, y chë ndëtšbeñe atšbe bëts yebna chanjajebo, y ni Satanás, chabe obenánaca entsá jóbanama, queochatobenaye jtsepochócama.

19 Atše cbochanjátšetaye obenana, mo llavëfjá, entsanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aiñe chaotsemna ca chacojayanëse, Bëngbe Bëtsá echanjayana aiñe chca chaotsemna ca —Jesús tbojanayana.

20 Chentsana chabe uatsjéndayënga tojanamëndá ndocnábeñe ntsecuéntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

Jesús tojánayana cha ibojamna jóbanana y jtayenana ca
(Mc 8.31–9.1; Lc 9.22-27)

21 Chorscana Jesús tojanontsé chabe uatsjéndayënga jábuayenana cha ibojtsemna Jerusalenoye jama, y chocna chë bëtšejemëngcá mándayënga, chë judiëngbe bachnangbe amëndayënga y chë ley abuátambayënga mochanjanma cha puerte chaopadecema ca. Tojanëyana cha mochanjóba, pero unga tianoye yochtanayena ca. 22 Chora Pedro, Jesúseftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrëbioye tbojanayana: —¡Satanás, átšbentšana mojuaná! ¡Aca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.

24 Chentsana Jesús chabe uatsjéndayënga tojanëyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiama jasúfriama chaotseprontana y cruciñe

jobanámnaca. ²⁵ Nda tojtsama quem luarentše bĕtsá soyĕnga jtsebomnama y atšbiama jasúfriama ndoñe tontseprontana, chĕ nĕyetsca tescama yomna tšabe vida echanjopĕrdia. Pero nda quem luarentša soyĕnga cachcá tojĕftsonĕyá atše juastama, masque chaóbana, chĕ nĕyetsca tescama yomna tšabe vida echántsebomna. ²⁶ ¿Ndayama entsá buanjosĕrvia nĕyetsca quem luarentša soyĕnga jtsebomnana, chĕ nĕyetsca tescama yomna tšabe vida tojtsoperdese? Ndegombre, canĕe entsá chĕ nĕyetsca tescama yomna tšabe vida tojtsoperdese, ndocna soye quenátsmĕna cha chaobená joyiyama, chĕ nĕyetsca tescama yomna tšabe vida jtsebomnama. ²⁷ Chĕ Bĕngbe Bĕtsá Entzá tbojanbemá, chabe Taitabe obenánaca y puerte buashinĕyiniñe echanjabo chabe angelotĕmĕngaftaca, y chora cada cánĕyabioye bochántatsetaye cachcá ntšamo cada ona tojĕftsemcá. ²⁸ Ndegombre šcuayana: Báseftanga muentše montsemnĕnga ndoñe quemochatóbana, Bĕngbe Bĕtsá Entzá tbojanbemá amĕndayacá jabana ntĕjĕftsinĕcá ca —Jesús tojánayana.

17

Jesús inĕyetsá tojanobinĕná (Mc 9.2-13; Lc 9.28-36)

¹ Chentšana chnĕnguana tianoye, Jesús tojĕftsanĕbiatše Pedro, Santiago y chabe catšata Juan, y inĕyoye tojanĕnatse nĕe chĕnga, canĕe bĕts tjoye. ² Chentše, chĕngbe delante inĕyetsá cha tojanobinĕná. Chabe jubia shinĕcá yojtsebuashinĕyiniñana, y chabe uichĕtjonĕjuangana mo binĕniñcá uafjantsĕjuangá yojtsamna. ³ Chca orna, chabe uatsjĕndayĕnga tmojáninĕe Moisés y Elías tbojanobinĕná, Jesúseftaca encuĕntaye.

⁴ Chora Pedro, Jesúsbiye tbojanianana: “Bĕngbe Utabná, itša tšabá bĕngbiana cuanmĕna muentše jtsemnana ca! Tcojtsebošĕse, unga tambotĕmĕnga atše chjapórma: cánĕyĕtema achiana, inĕyĕtema Moisesbiana y inĕyĕtemna Elíasbiana ca.”

⁵ Pedro chca yojtsōyebuambnantscuana, canĕe buashinĕyiniñana jantsetĕshe nĕyetscanga yojáutsbotse. Y chĕ jantsetĕshoicana canĕe oyebuambnayana tmojanuena mĕntšá: “Mua atšbe bonshana Uaquiñá endmĕna, atše chabiana sĕntsoyejuá. Cha šmochtseyeunana ca.”

⁶ Y chĕ uatsjĕndayĕnga chca tmojanuena ora, tmojanoshamentšĕ y jubia ca fshantsóntsoñe tmojanotsejbĕna, puerte auatjanánĕnga. ⁷ Chora Jesús chabe uatsjĕndayĕngbiye tojanobeconá, tojánabojajo y tojanĕyana: “Matĕtsbananga; ndoñe matauatĕngana ca.”

⁸ Y tsbanánoye tmojanontješĕ ora, Jesús nĕe canĕa tmojáninĕe, ndocná inĕa más.

⁹ Chĕ tjocana imojtsatstsmaye ora, Jesús tojanamĕndá: —Bĕngbe Bĕtsá Entzá tbojanbemá obanĕnguentšana candĕtayanĕntscuana, ndocnábeñe chĕ šmonjinĕe soyama šmatsecuĕntaye ca.

¹⁰ As chĕ uatsjĕndayĕnga Jesús tmojantjá: —¿Ndáyeca chĕ ley abuátambayĕnga mondbĕtsichamo, canmĕna Elías jabana chĕ Bĕngbe Bĕtsabe Uámána Uabuayanabe natsana ca?

¹¹ Chora Jesús tojanĕjua: —Ndegombre canĕa Eliascá natsana echanjabo y ntšamo jtsemnana yomncá, lempe echánjabatsma ca. ¹² Pero atše cbĕyana, canĕa mo Eliascá ya tonjabo, entsanga ndoñe chematanotĕmbá y cháftaca entsanga tmonjanma lempe ntšamo tmojanbošĕncá. Y cachcá, chĕ

Bëngbe Bëtsá Entśá tbojanbemá entśangbe cucuatśiñe echanjasúfria ca — Jesús tojánayana.

¹³ Chora chë uatsjédayënga tojanësertá, Juan chë Ubayanabiama Jesús chca yojtsëtsënma.

Jesús, canye bacna bayëja tbojanbojuaná

(Mc 9.14-29; Lc 9.37-43)

¹⁴ Entśanga imojtsemnoye chënga tmojtanashajna ora, canye boyabása tojanobeconá, Jesusbe natsanoica yojshamentśiye y tbojanayana: ¹⁵ — Utabná, atśbe uaquiñá motselastemá. Cha ataque bontśësháchichana y puerte entsesufrina, er cha inye ora iñoye jtseshajayana y inye orna, buyeshoye jtsoshbuetšana. ¹⁶ Acbe uatsjédayëngbioye cha sënjuánatse y ndoñe chematobená jtseshoshnama ca — cha tbojanayana.

¹⁷ As Jesús tojánayana: — ¡Nyetśá ndośbuáchiyënga y bacna entśanga ca! ¿Buetayté šojtsemna tśëngaftangafaca jëftsemnana? ¿Buetayté uantado tśëngaftangafaca chjëftsemna? Moye chë básetema mánatse ca.

¹⁸ Chora Jesús, chë basetëmbeñe bacna bayëjbioye tbojanácacana y chábertšana cha tojésanbocna. Cach orscana chë básetema tśabá yojtsatsmëna.

¹⁹ Chentšana, chë uatsjédayënga luaroca Jesúseftaca tmojanoyebuambá y tmojanayana: — ¿Ndáyeca bënga ndoñe fsënjobená chë bacna bayëja jtabocnama ca?

²⁰ Y Jesús tojanëyana: — Tśëngaftanga tśa batśatema ośbuáchiyana bomna causa. Ndegombre ścuayana: tśëngaftanga batśatema ośbuáchiyana šmojtsebonnëse, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tśëngaftanga lempe jamama šmattsobena. ²¹ Pero chca bayëjënga jtëbuacnamna jobenayana nye Bëngbe Bëtsáftaca jencuëntase y chama tondaye ntjascá jtsemnëse ca — Jesús tojanëyana.

Jesús cachiñe tojánayana cha ibojamna jóbana y jtayenana ca

(Mc 9.30-32; Lc 9.43-45)

²² Jesús y chabe uatsjédayënga cányiñe Galilea luaroye imojétsaye ora, cha tojanëyana: “Chë Bëngbe Bëtsá Entśá tbojanbemá entśangbe cucuatśiñe mochanjáboshjona, ²³ mochanjóba, pero unga tianoye echántayena ca.” Chë causa chë uatsjédayënga puerte ngmënaca imojtsemna.

Chë Bëngbe Bëtsabe bëts yebnama impuesto jtsatsquëcjnayama

²⁴ Jesús y chabe uatsjédayënga Capernaumoye tmojánashajna ora, chë Bëngbe Bëtsabe bëts yebnama entśángbioye impuesto atjanayënga Pédrëbioye tmojana y tmojantjá: — ¿Acbe uatëmbayá Bëngbe Bëtsabe bëts yebnama impuesto queonyëtsatsquëcjnaye ca?

²⁵ Y Pedro tojanëjua: — Aíñe, cha endbetsatsquëcjnaye ca.

Chentšana, Pedro chë yebnoye tojánamashëngo ora, Jesús natsana mëntśá chábioye tbojanayana: — Simón, ¿ntśamo catjajúaboje? ¿Quem luarentśa reyënga ndëmuanyëngbioye impuesto inmëtsayëngacaye y crocënana inmëtsatjanaye: cach luarentśe oyenëngbioye o chë inye luarocana ashjajnëngbioye ca?

²⁶ As Pedro tbojanjá: — Chë inye luarocana ashjajnëngbioye ca.

Y Jesús tbojanayana: — Chcasna, ndoñe queśnátsmëna chë atśbe Taitabe bëts yebnama impuesto jtsatsquëcjnayana ca. ²⁷ Pero ndocná mal chabonduínynanamna uafjajónayoye motsa, anzuelëfjua cochjútśena y chë natsana

chaojuásjana beona cochjuábocna. Cochjuayetëfjoná y choye crocénana cochanjínÿena y chánaca echanjoshjache atšbiana y acbiana jëtsjájuama. Cochjëftsejatsëca y cochjatsboshjona ca —Jesús tbojaniana.

18

¿Nda chë más uamaná yomna?

(Mc 9.33-37; Lc 9.46-48)

¹ Chentšana chë uatsjëndayënga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canÿe basetëmbioye tbojanchembo y chëngbe tsëntsaca tbojanatsá. ³ Y tojánayana: —Ndegombre cbëyana, nda mo basetemcá ndoñe tontóbema y ndoñe chacá Bëngbe Bëtsabe soyënga tonjóyëngacñe, cha ndocna te queochatobenaye Bëngbe Bëtsabe amëndayoye jamashënguama. ⁴ Chca, nda tojtsejuabná canÿe nduamaná yomna y quem basetemcá yomna ca, cha chë Bëngbe Bëtsabe amëndayoca chë más uamaná echántsemna. ⁵ Y nda átšbeñe ošbuachiyá bëtsemnayeca, tbojofja canÿa mo quem basetëmbioycá, chana atše jofjana ca —Jesús tojánayana.

Resjo yomna, nderado bacna soyënga cuanjama

(Mc 9.42-48; Lc 17.1-2)

⁶ “Nda canÿe básetema átšbeñe ošbuachiyábioye tbojaingñë bacna soye jamama, chabiana más tšabá nántsemna canÿe bëts nantsnëbé chamotseta-mošëntsëbua y chë mar béjaye shbuatsëntsoye chamotsashbuetše chabotsen-atjëmbama. ⁷ ¡Tša lastema quem luarentša entšangbiana, chë ínÿenga bacna soye jamama chaócochënguama tmojtsamëngbiana! Nÿets tempo chca amënga mochanjëftsemna. Pero, ¡payajema chë inÿa bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsëtšena. Acbiana más tšabá nántsemna celoye jamashënguana chë nÿetsca tescama yomna tšabe vida jtsebomnama, cucuatše ndbomná o cosheto, y ndoñe nÿets uta cucuátšeca o shecuátšeca chë nÿets tempo echanjesomñe ñëshoye chacmotsëstjango. ⁹ Nderado acbe bomínÿeca bacna soye tcojinÿe y cachca soye tcojama, chë bomínÿe cochtsenobuchjatsëca y bënoye cochtsëtšena. Acbiana más tšabá nántsemna, celoye jamashënguana nÿe canÿe bomínÿeca, y ndoñe nÿets uta bomínÿeca infiernoye chacmotsëstjango, chë bëts ñëshoye ca” —Jesús tojánayana.

Chë ótsëna oveshabiana cuento

(Lc 15.3-7)

¹⁰ Mëntsánaca Jesús tojánayana: “Ni mo cánÿabioye quem tsëm ošbuachiyënguentsana, chë mo basetemëngcá mondmënënga, mo nduamanacá šmattonÿaye. Ndegombre cbëyana, chëngbe angelotëmënga celocana, sempre atšbe Taitá celocáftaca mondëtsemna ca. ¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnënga jabátsebacama.

¹² “¿Ntšamo tsëngaftanga šmatjájuaboye? Canÿe boyabása patse oveshënga tojtsabamna y ndeolpe canÿe chentša oveshá tojtsotše. ¿Chë boyabása ndoñe chë inÿe esconëfta bnëtsana y esconëfta oveshënga tjoca cachca nanjesënÿaye, jama chë ótsëna oveshá jetsënguama? ¹³ Y chë oveshá jetsinÿënama tojobenase, ndegombre chë boyabása más oyejuayá jtsemnana chë ótsëna oveshabiana, y ndoñe nÿa chca chë inÿe esconëfta bnëtsana y esconëfta

oveshëngbiamä chë ndoñe tmonjanotšëngbiamä. ¹⁴ Cachcá, tsëngaftangbe Taitá, Bëngbe Bëtsá, chë celoca endmëná, ndoñe quenátsboše ni canýa quem basenquentšana mo otsenacá chaotsemna, bacna soyënga jtsamëse oyena causa ca” —Jesús tojánayana.

Ntšamo cuanjama inýa japerdónama
(Lc 17.3)

¹⁵ “Nderado acbe catšata, bacna soye tcmojaborlase, cochjá, cánýata sochjencüenta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tsábá ácaftaca echántsatsmëna. ¹⁶ Pero ndoñe tcmonjóyeunasna, inýe útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. ¹⁷ Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canýa Bëngbe Bëtsábioye nduabatmacá, mo canýe ndoñe judiyá ca o canýe bacna entšá mo canýa Romocama impuesto entšángbioye atjanayacá yomna ca.

¹⁸ “Ndegombre cbëyana: Tsëngaftanga Bëngbe Bëtsáftaca chašmojtsencüenta ora, chašmojayana canýe soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencüenta ora, chašmojayana canýe soye aiñe chaotsemna ca, Bëngbe Bëtsá echanjayana aiñe chca chaotsemna ca.

¹⁹ “Mëntšánaca cbëyana: Nderado útata tsëngaftanguentšana quem luarentše tbojenoyeuná Bëngbe Bëtsáftaca jencüentama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. ²⁰ Ndayentše útata o únganga tmojënefña, átsbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

²¹ As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojsemna cha japerdónana? ¿Canýsëfta soye ca?

²² Y Jesús tbojanjuá: —Ndoñe nýe canýsëfta soyama quecbatatsëtsná, sinó canýsëfta bnëtsana soye canýsëfta ca.

Ndayá inopása chë japerdónama ndëbošëngaftaca

²³ Mëntšánaca Jesús tojanëyana: “Cbochanjúyana ntšamo Bëngbe Bëtsabe amëndayana yomnana. Endmëna ntšamo canýe réyëftaca tojanopasacá. Cha yojábošena chabe oservënga crocénana jtsëtjañana. ²⁴ Jtsëtjañama yojóntša orna, canýe boyabása imojuánatse, chë réybioye mallajta crocénana ibnandebena. ²⁵ Chë oservená tondaye yonjábomna chë ndebënama jëtsájjuama; asna chë rey yojamánda cha chamotsiye nýets tempo nýe inýabiamä chaot-soservënama, chabe shema y chabe básengnaca, y lempe ntšamo yojan-bomncánaca, y chca chë ndebënama jtopágama. ²⁶ Chora chë oservená chë reybe shecuatšentše yojoshamentsiye y ibojtseimpáda: ‘Taita, Dios-manda šmotséuantajema. Atše lempe cbochanjëtsëntsabuachiye ca.’ ²⁷ Chë reyana chë boyabásabiamä ibojóngmia; as chë ndebënana ibojtseperdóna y ibojëtsboshjona.

²⁸ “Chë oservenana chentšana yojésebcna y benachiñe inýe oservenáftaca ibojenbetše, cach mandadbiama trabajayá. Chë inýe oservenana nýe batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiana y

měntšá ibojauyana: ‘¡Ndebénana šmatsěntšabuaché ca!’ ²⁹ Chora cha chě oservenabe shecuatšentše yojoshamentšiyē y ibojtseimpáda: ‘Diosmanda šmotsėuantajema. Atše lempe cbochanjětsěntšabuachiye ca.’ ³⁰ Pero chě oservená ndoñe yonjábosena, sinó yojama chě inye oservenábioye cárceloye chamotsětámíama, chě ndebénana candětsjájěntscuana. ³¹ Chě inye oservénęa chca imojinye ora, puerte yojóngmia y imojá lempe ntšamo yojopasacá chęngbe rey jacuéntama. ³² As chě rey yojamánda chě boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná. ³³ Acnaca cachcá cmondmėna chě cach aquēcá muentša trabájayabíama jóngmiana, ntšamo atše acbíama šonjongmecá ca.’ ³⁴ Y tša chě rey ibojtsetna; as yojamánda jabuache chamotsetsetšená nyets ndebénana candětsjájuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmėná, cachcá tšęngaftangafaca echanjama, tšęngaftangbe catšata ndoñe ndegombre nyets ainánaca šmonjaperdonase ca.”

19

Ndayá Jesús tojanabuatambá chě bouamnęga tmojtsenětšenama (Mc 10.1-12; Lc 16.18)

¹ Chě soyęga tojánayanentsana, Jesús Galilea luarentšana tojtsanoñe y Judeoye tojánashjango, Jordán chenguánoica. ² Ba entšanga tmojanasto y chěntše šoquęga tojanashná.

³ Básefta fariseunga Jesúsbioye tmojanobeconá y jisháchichiyama mēntšá tmojantjá: —¿Queojtselesenciana canye boyá nye ndayámnaca chabe shėmbioye cachcá jesonýayama ca?

⁴ As Jesús tojanějua: —¿Tšęngaftanga ndoñe chě Bęngbe Bětsabe uabemana palabrenguiñe šmėndualía, Bęngbe Bětsá, chě entšanga tojanabíamá, quem luare jobojátšama ora “boyá y shema tojánabíamama”? ⁵ Y Bęngbe Bětsá tojánayana: “Chíyeca boyabása chabe taitá y chabe mamá echanjėsabashejuana, chabe shėmaftaca jenútanama, y chě útata mo canýacá bochántsemna ca.” ⁶ Y chca, ya ndoñe útata quebochátsmėna, sinó mo nye canýacá. Chcasna, entšá ndoñe chaondėndbema ndayá Bęngbe Bětsá mo canýiñcá tojěftsema soye ca —Jesús tojánayana.

⁷ Chora chě fariseunga tmojaniyana: —¿As, ndáyeca Moisés tojanmandá, chě shėmbioye canye uabemana tsuanácha juiyiyana jtsenětšenama y cachcá jesonýayana ca?

⁸ Y Jesús tojánėyana: —Tšęngaftanga Bęngbe Bětsabe mandęga jójęngacñana ndoñe quešmátšboše causa, Moisés tmojanalesenciá shėmbioye jesětšenana. Pero quem luare jobojátšama orna, ndoñe chca quenjatsmėna. ⁹ Atše cbėyana, nda chabe shėmaftaca tbojtsenětšena y chca tojopasá ndoñe chě shema chabe boyábioye ínýaftaca tbontseingñe causa, y chě boyá ínýaftaca tojtóbouamasna, cha chě natsana shėmbioye ínýaftaca jtseingñayana ca —Jesús tojánayana.

¹⁰ Chora chabe uatsjėndayęga tmojaniyana: —Chca chě boyá y shėmaftaca tojtsemnėsna, ndoñe tšabá yontsemna jobouamayana ca.

¹¹ Y Jesús tojánėyana: —Nyetscanga ndoñe quemátobena chě palabrenga jójęngacñana, nye chě Bęngbe Bětsá tojama jójęngacñana chamobenama, chęngna añe. ¹² Ba soyęga comna ndaye causa chě boyabásęga ndoñe

ntsobenana jobouamayana. Inyenga jónynana jobouamayama ndobenenga, ínnyengbioye cach entsanga jábiamana jobouamayama ndobenenga y ínnyengna, nyets tempo nye Bèngbe Bètsabe amèndayama oserverna causa ca — tojanéyana.

Jesús, basetémbngbiana Bèngbe Bètsábioye tbojanimpadá
(Mc 10.13-16; Lc 18.15-17)

¹³ Entšanga basetémbnga Jesúsbioye tmojanénatse, cha chauabojajuama y Bèngbe Bètsábioye chéngbiana chaboimpadama. Pero ché uatsjédayèngna tmojanontsé ché basetémbnga unachayènga jtsécacaná. ¹⁴ Chora Jesús tojanéyana: “Cachcá mónyaye ché basetémbnga átšbioye chamuabo y ndoñe matéuyanana; er Bèngbe Bètsabe amèndayana endmèna mo quem basetemèngcá imomnèngbiana ca.” ¹⁵ As ché basetémbnga tojánabojajo, Bèngbe Bètsá jaimpádase; y chentšana cha tojtsanoñe.

Canye bomna bobontse Jesúsbioye tojána
(Mc 10.17-31; Lc 18.18-30)

¹⁶ Chentšana, canye boyabása tojána Jesús jinýama y mèntšá tbojantjá: — Buatèmbayá, ¿ndaye tšabe soye chjama ché nyetsca tescama yomna tšabe vida jtsebonnama ca?

¹⁷ Y Jesús tbojanjuá: —¿Ndáyeca ché tšabe soye ndayá bétsemnama šcojtsetjaná ca? Tšabia nye canya endmèna: Bèngbe Bètsá. Aca ché nyetsca tescama yomna tšabe vida jtsebonnama tcojtsebošése, mandènga cochtsebedecena ca.

¹⁸ Chora ché bobontse tbojantjá: —¿Ndaye mandènga ca?

Y Jesús tbojanjuá: —“Ndoñe catjóba, acbe shema ínnyaftaca ndoñe cattseingnyaye, ndoñe catjattbèba, ndoñe catjuaboínýena. ¹⁹ Acbe bètsétsata stètsoye ndoñe catjáquedaye y ndèmua entsánaca cochtsebobonshana ntšamo cach aca cuenobobonshancá ca” —Jesús tbojanijana.

²⁰ Chora ché bobontse tbojanjuá: —Atse lempe chca nyets tempo sèndocumplina. ¿Ndayá más šojtsebuáshbena ca?

²¹ As Jesús tbojanijana: —Aca lempe tšabá jamama tcojtsebošése, motsa, acbe bomna soyènga cochjetsatobuiye y ché crocénana, ndbomnjémènga cochtsatšataye; chca, bèts uacanana soye celoca cochántsebonna. Chentšana cochjabo y šcochjuasto ca.

²² Ché bobontse chca tojanuena ora, ngménaca yojtšatoñe, cha corente bomná bemna causa.

²³ Chora Jesús chabe uatsjédayènga tojanéyana: —Ndegombre cbéyana, puerte totcá entsemna canye bomnabiana Bèngbe Bètsabe amèndayoye jamashènguama ca. ²⁴ Ché bomnabiana cachiñe šcuatayana: Más paselo entsemna canye camello ché coshuffentša atèfjnèjana chauachnèngo, y ndoñe canye bomná Bèngbe Bètsabe amèndayoye jamashènguana ca.

²⁵ Chabe uatsjédayènga chca tmojanuena ora, puerte ojnánánènga imojtsemna y imojtsichamo: —As, ¿nda yochjobenaye atsocaná jtsemnama ca?

²⁶ Jesús chènga tojanènyanýe y tojanéyana: —Entšanga ndoñe quemátobena jamama canya atsbocaná chaotsemnama, pero Bèngbe Bètsá aifñe, er cha nyetsca soyènga jamama endobena ca.

²⁷ Chora Pedro tbojanijana: —Aca contsonyá, bènga lempe ché fsèndbomna soyènga fsènjésebošhona y ácaftaca fsèntsajna. As, ¿ndayá bènga fchjóyèngacñe ca?

28 As Jesús tojanéyana: —Ndegombre cbéyana, nyetsca quem luar-entša soyëngama mo tsmécá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinÿinÿyana bëts tšenësiñe reyca echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana tbemaniñe šmochanjot'biana mo reyëngcá, chë Israe-locá bnëtsana uta bëts pamillentsa entsangbiana jayanama tšabá o ndoñe tšabá tmonjamama. 29 Y ndëmuanyënga, atše jasérviana tmojëftsebošhona cachëngbe yebna, catšátanga o uabëngana, befta o bebmá, básenga o fshantsënga, chë soyëngama patse soye más mochanjójyëngacñe y chë nyetsca tescama yomna tšabe vídnaca. 30 Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

20

Chë trabájayëngbiana cuento

1 Mëntšánaca Jesús tojánayana: “Bëngbe Bëtsabe amëndayana endmëna mo canÿe bëts jajañe nduiñcá. Chë nduiñna canÿe te cabá cachëse yojábocna peonga janguanguama, chabe uvas betiyënga jajañe chamotrabajama. 2 Chë nduiño peonga yojánÿena orna, imojenóyeunaye canÿe tescama canÿe denario crocénana jtëbuénayama. As chora yojichamuá chë uvas betiyënga jajoye jatrabájama. 3 Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá. 4 As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. 5 Nyetsto ora y bëts mošenana ora, chë nduiño cachiñe yojábocna y cachiñe cachcá yojópása. 6 Mo la cinco ora, chë nduiño cachiñe yojábocna y chenache ínÿenga yojánÿena, tondaye ntsamcá. As yojátjaye: ‘¿Ndáyecca tšëngaftanga nyets díá ntjatrabajacá muentse šmotsomñe ca?’ 7 Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

8 “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojášhajnënguentšana cochjabójátša y chë natsana tmojášhajnënga ústonoye ca.’ 9 Y chë mo la cinco ora imojášhajnënga imojobeconá, y cada ona canÿe denario crocénana yojtáyentsbuachiye. 10 Chentsana, chë natsana jatrabájama imojášhajnënga yojtsamna jobéconama y chënga imojétsejuabnaye más crocénana mochjanóyëngacñe ca. Pero chëngnaca cach canÿe denario crocénana yojtëbuénaye. 11 Chca imojójyëngacñe orna, chënga imojóntša chë nduiñbiana bacá ichámuana, tmonëntšá: ‘Quemënga chë ústonoye tmonjášhajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nyets díá jabuache fsënjatrabajá y corente jënÿyá fsënjauantá ca.’

13 “Pero chë nduiño canÿa chca yojtsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca? 14 Chcasna, acbe uacanana crocénana mesocñe y motsatoñe. Atše sëntseboš chë ústonoye jatrabájama tojashjanguá jtabuénayana, cachcá ntšamo aca tchojtabuénacá. 15 Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebošna, atše tšabia tsmënama ca?’ ” —cha yojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

Jesús cachiñe tojánayana cha jóbana y jtayenama
(Mc 10.32-34; Lc 18.31-34)

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjëndayënga y tojanëyana: 18 “Tsëngaftanga šmontsonjá mora bënga Jerusalenoye montsajnama. Chocna chë Bëngbe Bëtsá Entsó tbojanbemá, chë bachnangbe amëndayënga y ley abuatambayëngbe cucuatšične mochanjáboshjona, y chënga mochanjayana jóbana cha ibojtsemna ca, 19 y chë ndoñe judiëngbe cucuatšične mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye
(Mc 10.35-45)

20 Chentsana, Zebedeobe uaquiñatbe mamá chabe uaquiñátaftaca Jesúsbiye tojanobeconá, chabe shecuatšentše yoJoshamentšičye canýe pavorama jaimpádama. 21 As Jesús tbojantjá: —¿Ndayá cojtseboše ca?

Y chë shembása tbojanijana: —Aca reycá chacojtsemánda ora, cochjamánda atšbe uaquiñata chabótbema canýa acbe catšbioica y chë inýa acbe uañicuayoica, ácaftaca chabotsemándama ca.

22 Y Jesús tojanëjua: —Ntšamo šmontsotjanañama, tsëndata ndoñe quešnátsatšëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjúá: —Aíñe, fchanjobenaye ca.

23 Chora Jesús tojanëjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmanýëngbiana atšbe Taitá tojprontacá ca.

24 Chë inýe bnëtsana uatsjëndayënga chca tmojanuena ora, chë uta catšátaftaca tmojanotjayaná. 25 Chora Jesús chë uatsjëndayënga tojánachembo y tojanëyana: —Tsëngaftanga šmondétatšëmbo, chë ndoñe judiëngbeñe chë reyënga lempe jtsemándayana nýa mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inýe entšanga sempre chamotsayaunanama. 26 Pero tsëngaftangbeñina ndoñe chca chaondëtsemna. Inýetšá; masna, nda tsëngaftanguentše chë más uamaná jtsemnama tojtsebošá bontsemna chë inýenga jtsaservénana. 27 Y ndánaca tsëngaftanguentšá chë más uamaná jtsemnama tojtsebošá bontsemna jtsemnana mo nýe inýabiana nýets tempo oservenacá. 28 Cachcá, chë Bëngbe Bëtsá Entsó tbojanbemá ndoñe chenátabo cha chamotseservénama, ndayá inýenga jabáserviama. Y mo nda inýenga játsbacama cuafjëtšajocá, cha echanjóbana, ba entšanga atsebácanënga chamotsemnama ca —Jesús tojánayana.

Jesús uta jtanata tojanashná
(Mc 10.46-52; Lc 18.35-43)

29 Chënga, Jericó bëts pueblentsana tmojánbocana ora, ba entšanga Jesús imojtsëstona. 30 Uta jtanata benache juachañe ibnatbemana. Jesús chëjana yojsachnějuanama chata tbojanuena ora, tbojanontšë uayebuáchana: —¡Utabná, Davidbentsana Entsó, šmotsalastemá ca!

³¹ Entšanga chë jtanátbïoye tmojtsanëcácana iytëca chabotsemnama, pero chatna más ibojtsáyebuache: —¡Utabná, Davídbentšana Entšá, šmotsalastemá ca!

³² As Jesús yojotsaye, chë jtanata tojánachembo y tojanatjá: —¿Ndayá sojtseboše atše tsëndatbïama chjamama ca?

³³ Y chata tbojanjúá: —Utabná, bëndata chabuatëbínýnama ca.

³⁴ Jesús chatbïama tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

21

Jesús Jerusalenoye tojánashjango (Mc 11.1-11; Lc 19.28-40; Jn 12.12-19)

¹ Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjéndayata tojanichamó,² y mëntšá tojanéyana: “Tsëndatbe natšana entsemna base pueblotémoye motsata. Cachora canýe burrá utsbuaná sochanjínýena y cháftaca canýe burrotema echántsemna. Sochjuajafjoná y sochjuánatse. ³ Nderado nda ndayánaca chacmojáuyanëse, sochjuayana: ‘Bëngbe Utabná bontsájaboto y chentšana camuentše echanjabáisabashejuana ca.’”

⁴ Chca tojanopasá, cachcá chaotsemnama ntšamo chë Bëngbe Bëtsabe juabna oyebuambnayá tojanayancá. Cha mëntšá tojanábema:

⁵ Jerusalén bëts pueblentše oyenënga mëyana:

“Minýënga, tšëngaftangbe Rey chentše tšëngaftangbïoye entsabó, ndoñe mo canýa cachá bëtsá enobiamnayacá; canýe búrrbeñe enjaquená; canýe burrotémiñe, canýe uatrabájaye bayabe sešónbeñe ca.”

⁶ Chora chë uatsjéndayata tbojána y tbojanma ntšamo Jesús tojanamëndacá.

⁷ Chë uatsjéndayatna chë burrá y chë burrotema tmojanënatse, entsáyëjuangá chábeñe tbojanájatse y chora Jesús chábeñe tojanenoyayé. ⁸ Bëtscá entsanga chëngbe entsayá chë benachëjana imojtsëtëtsatsana, y ínýëngna betiyeshënguñe buacuañjénga imojtsetcoye y chiñe imojtsequëcñá. ⁹ Y chë natsana imojtsajñénga y chë ústonoyënga mëntšá imojtsaiuíayebuache: “¡Rey Davídbentšana Entšá matschuanga ca! ¡Corente bendición bomná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

¹⁰ Jesús Jerusalenoye tojánamashëngo ora, nýetsca entsanga imojtsenbouenana y banga imojtsenotíciaye: —¿Nda mua yojtsemna ca?

¹¹ Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentsana enënga y obuámnyënga tojtanëbuacna (Mc 11.15-19; Lc 19.45-48; Jn 2.13-22)

¹² Chentšana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnañënga chentšana tojtanëbuacna. Chëntšnaca imojtsemna entsanga canýe crocénana enënga, y chë crocénana nýe Bëngbe Bëtsabe bëts yebnentsama inoserverna. Chëngbe mesëshangá tojtsanenásatajchquëca y chë palomatema enëngbe tšenëšëngnaca. ¹³ Y tojanéyana: “Bëngbe Bëtsabe uabemana palabrënguñe cha mëntšá tojanayana: ‘Atšbe bëts yebna echantsabaina átšeftaca encuéntaye yebna ca’; pero

tšëngaftangna, atbëbanëngbe oyeniñe chë yebna šmojtsebema ca” —Jesús tojanëyana.

14 Chentšana, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. 15 Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetëmënga Bëngbe Bëtsabe bëts yebnentše imojt-sayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davídbentšana Entšá matschuanga ca!” 16 As Jesús tmojanianya: —¿Ntšamo chë basetëmënga montsichamcá quect-suenana ca?

Y Jesús tojanëjua: —Aíñe, sentsuenana. Pero, ¿tšëngaftanga Bëngbe Bëtsabe uabemana palabrenguiñe chë soyama ndoñe šmëndualía? Chiñe mëntšá endayana:

Chë basetëmënga y ochóchaye šešonatëmëngbe cantëngaca aca tcojama entšanga chacmotsatschuanama ca.

17 Chora Jesús chënga tojésanabashejuana y Jerusalemntšana Betania puebloye tojtsanoñe; y chentše chë ibeta tbojánbobinÿna.

Jesús tojánayana canÿe higo betiye ndoñe más chaondëshájona ca
(Mc 11.12-14, 20-26)

18 Chë te cachëse, Jesús cach bëts puebloye yojtésa ora, tbojánishëntsena. 19 Chora canÿe higo betiye benache juachaca yojinÿe; as choye yojobeconá, pero ñe ena tsbuanáchënga chiñe yojinÿena. As Jesús chë higo betiye tojánayana: “¡Ndocna te más chaondëshájona ca!” Y betso chë higo betiye tojtsanbuashá.

20 Chë uatsjëndayënga chca tmojáninÿe ora, imojenjaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

21 Y Jesús tojanëjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebomna y chabiamana ainaniñe ndoñe inÿetšá šmonjátsjuabnase, šmochantsobena jamama ndoñe ñe ntšamo atše quem higo betiyecca sënjamcá, sinó quem tjoye, “muentšana mojuaná y uafjájónayoye moshbuetše ca” šmojayanëse, chca jochnënguana. 22 Y Bëngbe Bëtsáftaca chašmojtšencuénta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

Jesube obenana
(Mc 11.27-33; Lc 20.1-8)

23 Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobeconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtсамama nda mando tcmënjatšá ca?

24 As Jesús mëntšá tojanëjua: —Atšnaca canÿe soye séntsebomna tšëngaftanga jatjayama, y quešmojojuase, átšnaca chochjáuyana ndaye deréchoca atše chca stsama. 25 ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanëyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojouase, cha šochanjáuyana: ‘As, ¿ndáyeca chë tcmojanabuayená soyënguiñe ndoñe šmonjanošbuaché ca?’ 26 Pero ndoñe quemuátobena jayanana ‘entšanga ca’; muentša entšangbiamana bënga montsautja, er

n̄yetscanga mondējuabná Juan ndegombre Bēngbe Bētsabe juabna oyebuamb-nayá yomna ca.” ²⁷ Chcasna chēnga Jesús tmojanjuá: —Bēnga ndoñe queftsátstatšēmba ca.

Y as Jesús tojanēyana: —Atše cach ndoñe quebochatēyana ndaye deréchoca chca stsama ca.

Chē uta uaquiñátbima cuento

²⁸ Chora Jesús entsānga tojanatjá: —¿Ntšamo tšēngaftanga quem soyama šmatjayana? Can̄ye boyabása uta uaquiñata yojánabamna, y cán̄yabioye ibojauyana: “Uaquiñá, mēnté motsa atšbe uvas betiyēnga jajoye jatrabájama ca.”

²⁹ Chē uaquiñá ibojojuá: “¡jama ndoñe quetsátsoše ca!” Pero botamana yojenójuaboye y pronto choye yojá. ³⁰ Chentšana chē taitá chē in̄ye uaquiñábioye cachcá ibojauyana. As cha ibojojuá: “Arseñor, aín̄e chanjá ca.” Pero ndoñe yonjá. ³¹ ¿Chē útatentšana ndēmuan̄yá tojanma ntšamo chē taitá yojabošcá ca? —Jesús tojanatjá.

Y chēnga tmojanjuá: —Chē natsaná ca.

Chora Jesús tojanēyana: —Ndegombre cbēyana, chē Romocama entsāngbioye impuesto atjanayēnga y chē bacna vida bomna shembásenga, tšēngaftangbima más montseprontana Bēngbe Bētsabe amēndayoye jamashēnguama. ³² Juan chē Ubayaná tonjánabo tšēngaftanga jábuayenama ntšamo jtsiyenana cmannama, ntšamo Bēngbe Bētsá yobošcá, y tšēngaftanga chē tcmojanabuayená soyēnguiñe ndoñe chešmatanošbuaché; y chē cuenta, chē Romocama entsāngbioye impuesto atjanayēnga y bacna vida bomna shembásengna aín̄e chábeñe montsanošbuaché. Y tšēngaftanga, masque ntšamo chēnga Bēngbe Bētsábeñe imojtsošbuáchema lempe šmojin̄yēse, chē juabnayana ndoñe šmonjatrocá, chábeñe jtsošbuáchiyama ca —cha tojanēyana.

Chē puerta bacna trabájayēngbima cuento

(Mc 12.1-12; Lc 20.9-19)

³³ Mēntšánaca Jesús tojánayana: “In̄ye cuento šmochjatuena chašmuatsjín̄yama: Can̄ye jajañe nduiño uvas betiyēnga yojáe y chē shēconana yojajétja. Chē uvasēsangá juantsētetjiamna can̄ye base luare yojajutjo y can̄ye tshanana jebna soye yojapórma chentše jtšaišhan̄yama. Chentšana, in̄ye trabájayēnga chē jajañe yojárrendaye y chana in̄ye luaroye yojtsoñe. ³⁴ Chē uvasēsangá juashacama tempo yojobuache orna, chē jajañe nduiño básefta oservénēnga yojichamuá chē arréndayēnga jáuyanama ntsachetsá chē nduiño ibojtsoťocánama. ³⁵ Pero chē arréndayēngna chē oservénēnga imojishēche: in̄yēngbioyna imojtsajantšetaye, in̄yēngbioye imojtsēbaye y chē in̄yēngbioyna ndētsbēngaca imojtsatēchēnganja. ³⁶ As chē jajañe nduiño chē natsanama más ba oservénēnga yojichamuá. Pero chē arréndayēngna, ntšamo chē natsanēngaftaca imojamcá, cachcá chora imojama.

³⁷ “Cabana, chē jajañe nduiño cachabe uaquiñá ibojíchmuá; as mēntšá yojtsejuabnaye: ‘Atšbe uaquiñá cocayé mochanjójeyunaye ca.’ ³⁸ Pero chē arréndayēnga chē uaquiñá imojin̄ye orna, imojeniyana: ‘Mua chē fshantse nduiñe uaquiñá entsemna. Lempe chabe soyēnga mua echanjójēngacñe. Cuajna, motsóbanga y lempe chabe otocana soyēnga bēngbima echanjoquédá ca.’ ³⁹ As chē uaquiñá imojishache, chē uvas betiyēnga jajañentšana imojtsábocna y imojtsóba.”

40 Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

41 Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe ínÿenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

42 Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtsbé, mora chë más bëts uashacuanëšentše entsejájona. Chë soye Bëngbe Utabná, Bëngbe Bëtsá chca tojama, y bënga chama ojnánënga fsëntsemna ca.

43 Ntšamo chë nduiño chë arrëndayënga chë fshantse echántsabaca y ínÿenga echantsatšataye y chënga chabiama bëts cá shajuana mochanjatbanacá, cachcá, Bëngbe Bëtsabe amëndayana tšëngaftangbentšana mochantsejuána y ínÿengbioye mochántsatšataye. Chënga Bëngbe Bëtsabe soyëngama mochanjouena y chë soyëngama ínÿengbioye mochanjabuayená, Bëngbe Bëtsabe amëndayoye jamashënguama. 44 Ndánaca chë ndëtsbéñe chaojotsatšá, chëbé bochántsatcacaye; y chë ndëtsbé ndábeñnaca chaojótšatše, polvëshe bochántsebema ca —Jesús tojánayana.

45 Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatšëmbona chëngbiana chca yojtsóyebuambnama. 46 Chora chënga tmojánbošena Jesús jishachana, pero entšangbiana imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiestama cuento (Lc 14.15-24)

1 Chentšana Jesús tojanontšé cachiñe cuentëngaca chënga jabuátambana. Mëntšá tojánayana: 2 “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canÿe réyefacta tojanopasacá. Chë rey yojamánda canÿe bëts fiesta jamama, chabe uaquiñabe casamentama. 3 Chora chë rey chabe oservënënga yojichamuá chë ófjanënga jobiatšama, pero chë ófjanëngna ndoñe imonjouena jama. 4 As chë rey ínÿe oservënënga yojichamuá y mëntšá yojámëndaye: ‘Chë ófjanënga šmochjáuyana, ya saná sseboprontana ca. Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

5 “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe; 6 y ínÿengna, chë reybe oservënënga imojishëche, jabuache imojtsatsetšenaye y imojtsëbaye. 7 Y chë rey chë soyama yojouena ora, corente ibojtsetna. As chabe soldadënga yojichamuá chë oservënënga obánayënga chamuetsëbáyama y chëngbe bëts pueblo jetsángbotjuama. 8 Chora chabe oservënënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerezecna moye jabama. 9 Motsajna tsashenangoye y ndëmuanÿëngnaca chašmojánÿenënga, chë casamento fiestama šmochjúbuaja ca.’ 10 As chë oservënënga tsashenangoye imojábocana

y n̄yetscanga imoján̄yēn̄ga imojáchembo, cán̄yīñe t̄šabe y bacna ent̄šanga, y chca, ch̄e tsobcnanoica jút̄jena yojtsemna ent̄šángaca.

11 “Ch̄e ófan̄ga ján̄yama ch̄e rey yojámashēngo ora, chent̄še cán̄yabioye ibojin̄ye y chana ndoñe yontsemna nt̄šamo can̄ye casamento fiestama endbetsemncá uich̄etjoná. 12 As ch̄e rey ibojauyana: ‘Sobreno, nt̄šamo can̄ye casamento fiestama endbetsemncá ndoñe quecatich̄etjona. ¿Nt̄šamo chca moye tcojamáshēngo ca?’ Pero ch̄e boyabásana n̄ye iyt̄ca yojtsemna. 13 As ch̄e rey ch̄e fiestent̄še ujuat̄šnayēnga yojámēndaye: ‘Shecuat̄še y cucuat̄še motsebatsēca y ch̄e ndēbin̄ȳna luaroye, infiernoye motsábocna. Chent̄še puerte echanjenóbošachna y ch̄e tsetšanama juatsašēnga echantsenoft̄šojnaye ca’ —cha yojayana.”

14 Jesús chca jacuéntama tojanpochocá ora, mēnt̄sá tojánayana: “Ch̄e fiestama ófan̄ga banga montsemna, pero ch̄e bocacān̄ga choca jtsemnama n̄ye báseftanga. Er Bēngbe Bētsá banga jáchembuana chabe amēndayoye jamashēnguama, pero n̄ye báseftanga choca mochántsemna ca.”

Ch̄e Romoca bēts mandadbiama impuesto jtsatsquēc̄jnayama

(Mc 12.13-17; Lc 20.20-26)

15 Chent̄šana ch̄e fariseunga tmojtsatanoñe y tmojanenoyeuná nt̄šamo Jesús tojayaniñe cha jisháchichiyana, as chca, mandadēngbeñe cha mal jaquédama. 16 Chama chēnga tmojanichamó básefta cachēngbe usetonēnga y in̄yēnga Heródesbe ústonēnga, Jesús jauyanama: —Buatēmbayá, bēnga fsēndēt̄at̄sēmo aca ndegombre soyēnga cnefsabuátambama y contsbu-atambá ndegombre t̄šabe vida jtsebonnama, nt̄šamo Bēngbe Bētsá yomandacá, y ndoñe jatuenanana n̄ye nt̄šamo ent̄šanga tmojatichamcá, er acbiama tondaye quenatámana nda más uamaná o nduamaná tomnana. 17 Chcasna, ¿nt̄šamo catjájuaoye? ¿T̄šabá tayojtsemna, César, ch̄e Romoca bēts mandadbiama, bēnga impuesto jtsatsquēc̄jnayana o ndoñe ca?

18 Jesús yojtsetátsēmo chēngbe bacna juabnēngama; chíyeca tojanēyana: —Bacna ent̄šanga, nt̄šamo ndegombre šmojuabnacá ndin̄yin̄yayēnga. ¿Ndáyeca t̄šēngaftanga šmojtseboše ch̄e sóyeca at̄še jisháchichiyama? 19 Ch̄e šmatsquēc̄jná crocénana šmin̄yin̄yé ca.

As can̄ye crocénana tmojanoyé. 20 Jesús tojanatjá: —¿Ndabe jubíá quem crocénaniñe yojtsemna, y nt̄šamo muent̄še entsabemancá nda chca iuabaina ca?

21 Y chēnga tmojanjuá: —Césarbe jubíá; cha chca enduabaina ca.

As Jesús tojanēyana: —Césarbioye šmoctoyiye cha ibotocana soye; y Bēngbe Bētsana cha ibotocana soye ca.

22 Chēnga chca tmojanuena ora, ojanánēnga imojtsemna. As chēnga cachcá Jesús tmojanon̄yá y tmojtsatanoñe.

Obanēnga jtayenama Jesús tmojantjá

(Mc 12.18-27; Lc 20.27-40)

23 Báseftanga judiēngbe amēndayēnga, saduceos ca uabáinēnga, imojan juabná ch̄e obanēnga ndocna te ntayenana ca. Cach te, ch̄e impuestama Jesús tojanoyebuambá te, básefta saduceunga tmojána y mēnt̄sá tmojantjá:

24 —Buatēmbayá, Moisés tojánayana n̄derado can̄ye boyá tojóbana básenga ntjētsabashejuancá, ana chabe uabentsá jtsemnana ch̄e sh̄émaftaca jtobouamayana, chca, chabe uabochená obanabiama básenga jtsabamnama ca.

25 Chcase, can̄ye bēngbent̄še can̄ysēfta cat̄sátanga monjamna. Ch̄e natsaná

tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶Y cháftaca cachcá tonjanopasá, chë inye uabentsáftaca cachcá, y cachcá chë ínÿengaftaca y chë ústonoca uabentsáftacnaca. ²⁷Y chentsana chë shembásanaca tontsanóbana. ²⁸Y morna, chë obanënga chamojtayena ora, ¿ndabe chë canÿséfta catsatanguentsabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁹ As Jesús tojanëjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quemátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. ³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrënguifne tojánayanama? Cha tonjánayana: ³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entsanga chca tmojanuena ora, ojnánanënga imojtsemna ntšamo Jesús yojtsabuátambama.

Chë más bëts uámana mando (Mc 12.28-34)

³⁴ Jesús chë saduceúngbioye iytëca tojánabiamama fariseunga tmojantatsëmbona ora, chënga tmojánenefjna, ³⁵ y canÿa chënguentsá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe leyiñe ndayá chë más bëts uámana mando yomna ca?

³⁷ As Jesús tbojanjúá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.” ³⁸ Chë soye endmëna chë más bëts uámana mando y nÿetsca mandëngama chë natsanoca entsemna. ³⁹ Y quem inye soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” ⁴⁰ Chë uta mandentsana endóbocana lempe ntšamo Moisesbe leyiñe endayancá y ntšamo chë Bëngbe Bëtsabe juabna oyebuambnayënga mond-betsabuatabacá ca —Jesús tbojanianya.

¿Cristo, ndabe entsábentsana yomna? (Mc 12.35-37; Lc 20.41-44)

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamna, chë Cristo? ¿Ndábentsana cha iuabó ca?

Y chënga tmojanjúá: —Davídbentsana ca.

⁴³ As Jesús tojanéyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

⁴⁴ Bëngbe Bëtsá, atšbe Utabná Crístbioye tbojanianya:

atšbe catšbioica mótbema,

atšbe obenánaca acbe uayayënga acbe cucuatšifne chamoquedama chjamëntscuana ca.

⁴⁵ ¿Ntšámose Cristo, Davídbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canye palabra jojuana. Y chë tescana ndocná yonjenñemua Jesús más jatstjanayama.

23

Jesús chë fariseungbiana y ley abuatambayëngbiana tojánayana, chënga ndoñe tsábá montsama ca

(Mc 12.38-40; Lc 11.37-54; 20.45-47)

¹ Chora Jesús, entšanga y chabe uatsjëndayënga mëntšá tojanëyana: ² “Chë fariseunga y chë ley abuatambayënga cmondbétsabuatambaye ntšamo Moisesbe leyënguiñe iuayancá. ³ Chcasna, tšëngaftanga cmontsamna chënga joyaunayana y ntšamo tcmojauyancá, cachá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. ⁴ Mo canye entšá, couáybioye uauta uasmanëshu juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵ Chënga lempe jtsamana nye entšanga chamotsënyama. Chënga chë inyëngbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatsiñe chëjënga jenábatšëcana y sibiajana nya tëntša uasebtotonanëjuangá jtsichëtjonana. ⁶ Chënga jtsebošana chë fiestënguiñe nya quëfseroca jtsëtbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entšanga nya respétoca chamotsacheuanama, y ‘abuatambayënga ca’ chamotsachembuanamnaca chënga jtsebošana.

⁸ “Pero tšëngaftangna ndoñe šmattseboše entšanga ‘abuatambayënga ca’ chacmotsachembuanama, er nyetsca tšëngaftanga mo catšatangcá šmondmëna, Bëngbe Bëtsábeñe betsošbuachëyeca, y nye canya endmëna tšëngaftangbe Buatëmbayá. ⁹ Tšëngaftanga ‘taitá ca’ chë ley abuatambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmondmëna, chë celoca endmëna. ¹⁰ Ndoñe šmattseboše entšanga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. ¹¹ Nda tšëngaftangbeñe chë más uamaná tojtsemná bontsemna chë inyënga jtsaservëna. ¹² Nda cachá bëtsá tojtšenobiamná, nduamaná mochántsebema; y nda cachá nduamaná tojtšenobiamnana, más bëtsá mochanjábema.

¹³ “¡Tša lastema tšëngaftangbiana, bacna entšanga ntšamo ndegombre šmojuabnacá ndinjinynayënga fariseunga y ley abuatambayënga! Tšëngaftanga šmontsana entšangbiana puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni inyënga choye jamashënguama bošëngbiyoye chama quešmátaleściana. ¹⁴ ¡Tša lastema tšëngaftangbiana, ntšamo ndegombre šmojuabnacá ndinjinynayënga fariseunga y ley abuatambayënga! Tšëngaftanga chë viuđangbiyoye chë tmobomna soyënga jtsabacayana, y entšangbe delante tsábá chacmotsënyama y chënga šmojtsaingñayama ndoñe chamondëtsetatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá tšëngaftanga más jabuache inyëngbiana cmochanjácastigaye.

15 “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga ba luarënguenache jtsajnana canya tsëngaftangbe ustoná onguayíñe, y šmojinýena ora, tsëngaftanga jamana cha chaotsemna tsëngaftangbiana uta soye más mercedo buajona infiernoye chaotsama.

16 “¡Tša lastema tsëngaftangbiana; tsëngaftanga šmondmëna mo jtanënga entsanga unachayëngcá! Tsëngaftanga šmondbétsichamo: ‘Nda inýabioye tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aña jtsemnana chë tbojašbuachená soye jamama ca.’ 17 ¡obëjëmënga y nduabínýënga! ¿Ndayá más uamana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiana josérviana jtsemnana, nýe Bëngbe Bëtsabe bëts yebnocca chë castellano tojtsemnayeca. 18 Tsëngaftanga mëntšánaca šmondbétsichamo: ‘Nda inýabioye tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, aña jtsemnana chë tbojašbuachená soye jamama ca.’ 19 ¡Nduabínýënga! ¿Ndayá más uamana soye yomna, chë Bëngbe Bëtsabiana tmojacjá soyënga o chë altar? Chë tmojacjá soyënga Bëngbe Bëtsabiana josérviana jtsemnana, nýe chë altaroca chë soyënga tmojacjáyeca. 20 Nda chë altarama tojajurá, ndoñe nýe chë altarama ntsejúraryana. Lempe chë altar juatsboca tojtsemnánaccca cha jtsejúraryana. 21 Nda Bëngbe Bëtsabe bëts yebnama tojajurá, ndoñe nýe Bëngbe Bëtsabe bëts yebnama ntsejúraryana. Bëngbe Bëtsabiana cha jtsejúraryana, cha chë chentše oyená. 22 Y nda celocama tojajurá, chentše reyccá Bëngbe Bëtsabe tbemaniñama cha jtsejúraryana y cacha Bëngbe Bëtsabiánaccca, chentše yotbemanabiana.

23 “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga Bëngbe Bëtsabiana jtsequëcñayana chë jajañentša sananga bnëtsanentšana canye soye; chë binche matatëmënga menta, anis y chë comintša sanánaccca. Pero tsëngaftanga nýe batsá jtsamana chë leyentša más uamana soyënga, mo chë nýetsca entsanga cachca derechënga chamotsebomnama, inýënga jtsalastemánana y chë tsabe soyënguiñe jtseyenana, chca, entsanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inye tsabe soyënga amana ntjajbanacá. 24 ¡Jtanënga entsanga unachayënga! Tsëngaftanga chë base soyënga jamama puerte jtsenócochinýenana, pero jtsebnëtjombana uamana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canye entsá ndayá tojtsabuchetjá bayëfja jtsejuánama, ndoñe ntjasama, jasama ndoñe yondëlesenciana ca chë leyíñe iuayana causa. Pero šmondmëna mo entsangcá ndëmuanyënga camellbe mëntšëna jasana, y chë leyíñe endayana chcana jasama ndoñe yondëlesenciana ca.

25 “¡Tša lastema tsëngaftangbiana, bacna entsanga ntšamo ndegombre šmojuabnacá ndinýinýayënga fariseunga y ley abuátambayënga! Tsëngaftanga šmondmëna mo entsangcá ndëmuanyënga platillëjenga y tazëšënga shjoicajana jtsóbojabiana, pero tsoyna nýe cachcá jonýayana. Tsëngaftanga tša jtsentšënanca entsangbiana mo tsabengcá jtsinýnama, pero tsëngaftangbe ainanentše jútjena entsemna nýe jtsatbëbanama y nýe bëtscá

soyënga jése bomnana juabnëngaca. ²⁶ ¡Nduabinýna fariseo! Cochshetsajbaná ainaniñe bacna soyënga bomnana. Chamna nýe tsabe juabnënga chentse cochsebomna, y lempe ntšamo chacojtsamcá y entsanga chamojtsonýacá tsábá echántsemna.

²⁷ “¡Tsá lastema tsëngaftangiama, bacna entsanga ntšamo ndegombre šmojuabnacá ndinýinýnayënga fariseunga y ley abuatambayënga! Tsëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tsëngaftanga chca šmondmëna: entsangbe delante tsëngaftanga jtsinýnana mo nýetsca soyënguiñe tsábá amëngcá, pero ndoñe chca quešmátsmëna. Tsëngaftangbe ainanentsna chë bacna entsanga ntšamo ndegombre tmojuabnacá ndinýinýnayëngcá y chë bacna soye amëngcá šmontsejuabná.

²⁹ “¡Tsá lastema tsëngaftangiama, bacna entsanga ntšamo ndegombre šmojuabnacá ndinýinýnayënga fariseunga y ley abuatambayënga! Tsëngaftanga jtsamana chë Bëngbe Bëtsabe juabna oyebuambnayënga tpsquënga bëtsësa entsanga chamotsemnana, chëngbe cuevëshënga jtsatpórmayëse. Tsëngaftanga cachcá jtsamana chë nýetsca soyënguiñe tsábá amëngaftaca, chë chëngbiana jtenójuaboyama pormániñe jtsatsbótamnyëse; ³⁰ y chentšana šmondbëtsichamo: ‘Bënga chë bëngbe bëtsëjémëngbe tempo maftsjanienëse, chëngbioye ndoñe matmënjánëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canýe buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tsëngaftanga šmontsinýanýná ndegombre chë Bëngbe Bëtsabe juabna oyebuambnayëngbioye tmojanëbayëngbe entsanguentsana šmonnana. Y mora cach tsëngaftangbe bëts taitangcá tsëngaftanga šmontsama. ³² ¡Mopochocanga jamama chë bacna soyënga, chë tsëngaftangbe bëts taitanga tmojanbojatsé jamama soyënga!

³³ “¡Mëtšcuayënga, mëtšcuaye entsanga! ¿Ndayá šmochjama chë infiernoca uabouana castigüentsana jótsbocama? ³⁴ Chíyeca atše tsëngaftangbioye chanjichamuá Bëngbe Bëtsabe juabna oyebuambnayënga, tsabe soye tatsëmbënga y abuatambayënga. Pero tsëngaftangna, ínýengbioye šmochantsëbaye y šmochanjácrucificaye; ínýengbioyna chë enefjuana yebnënguenache šmochanjátsetšenaye y nýetsca bëts pueblënguenache chënga šmochandúcamena. ³⁵ Chíyeca, tsëngaftangiama nýets castigo echántsemna chë nýetsca soyënguiñe tsábá amënga tmojëftsóbanama; Abel, chë jóbanama chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquíñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. ³⁶ Ndegombre cbéyana, lempe chë soyëngama castigo morsca entsangbiama echántsemna ca” —Jesús tojánayana.

*Jesús tojanošachna Jerusalenoca entsangbiama
(Lc 13.34-35)*

³⁷ Mëntsánaca Jesús tojánayana: “Jerusalenentsa entsanga, Jerusalenentsa entsanga! Tsëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtšbëngaca jtsatëchënganana jtsëbáyama. Bueta soye atše sënjábošena tsëngaftanga átsbíoie júbuajana, mo canýe tuamba chabe bolletotëmënga chabe juatëngmiáša tajsoye cuaftajayecá, pero tsëngaftanga ndoñe chešmátsbošena. ³⁸ Y šmochjinýe, atše mora

cachcá cbochanjesēñyaye, y chca, atšna enánanga cbochanjésabashejuana, mo canye yebna cachcá tcojesonyá y énañe tcojeseboshjoncá. ³⁹ Y atše cbéyana, ndegombre tšēngaftanga morscana atše ndoñe más quešmochátinye; y atše šmochátinye mēntšá chašmojtsichamo ora: ‘¡Corente bendición bomná, Bēngbe Utabnabe obenánaca tojabá ca!’ ”

24

Jesús tojánayana chē Bēngbe Bētsabe bēts yebna lempe mochjánpochocama
(Mc 13.1-2; Lc 21.5-6)

¹ Jesús Bēngbe Bētsabe bēts yebnentšana tojēftsanbocna y ya yojtsaye. Chorna chē uatsjēndayēnga chábioye tmojanobeconá y tmojanontšé nyētsca chentša bēts yebnēnga cha jinñinñiyana. ² Chora Jesús tojánayana: “Tšēngaftanga lempe šmontsonyá. Ndegombre šcuayana, quem Bēngbe Bētsabe bēts yebnentše ndoñe queochaisoquéda ni mo canye ndētšbé inye ndētšbé juatsboye. Lempe mochantsepochoća ca.”

Ntšamo yochtsemna quem luare jopochócama tempo chaojtsobeco ora
(Mc 13.3-23; Lc 21.7-24; 17.22-24)

³ Chentšana chēnga Olivos tjashoye tmojána. Jesús choca yojtsetbemana; as, chē uatsjēndayēnga tmojanobobeconá nye chēngbiana jatjayama, mēntšá: —Smēyana. ¿Mocna ora chē soyēnga Bēngbe Bētsabe bēts yebnoca yochjochnēngo ca? ¿Ndayá yochjochnēngo bēnga jinñanñiyama aca jésabama ora ya yojtsemnama y quem luare jopochócama tempo yojtsobecuama ca?

⁴ As Jesús tojanjuá: —Cuedado šmochtsebomna ndocná chacmondáingñema. ⁵ Banga mochanjabo y mochantsabíchamo chēnga atše imomna ca. Mochántsicamo: “Atše chē Cristo sēndmēna ca” y chca, ba entšāngbioye mochanjáingñaye. ⁶ Tšēngaftanga šmochanjouena canye luarentša entšanga inye luaroca entšāngaftaca imojtsentsjanama y nderado mochjentsjámna. Ndoñe matauatjēngana, er chca jochnēnguama endmēna; pero masque chcase, quem luare jopochócama cabá ndoñe queochátsmēna. ⁷ Canye luarentša entšanga inye luaroca entšāngaftaca mochántsensjanaye, y canye amēndayábentša entšanga inye amēndayábioca entšāngaftácnaca; y ba luarēnguiñe shēntsana echanjóshjango y chentša fshantsēnga echanjuangmēmana. ⁸ Masque chca jasúfriase, más chcoye cabá más mochanjatssúfria.

⁹ “Chora, entšanga ínñyēngbe cucuatšīne cmochanjábashejuana chacmatsetšenama y cmochantsēbaye; y atšbe ústonēnga bētsemnayeca nyētsca luarēnguentša entšanga cmochantsēbuayēnja. ¹⁰ Chē tempo, banga mora átšbeñe ošbuáchiyēnga, ošbuáchiyana mochantsajbaná y mochantsanáboyēnja y jóbanama ínñyēngbe cucuatšīne mochántsenboshjuana. ¹¹ Banga Bēngbe Bētsabe ndoñe ndegombre juabna oyebuambnayēnga mochanjábocana y ba entšanga mochanjáingñaye. ¹² Nyētsá bacna juabnēnga entšāngbe ainaniñe echanjésemma, y chē causa banga ndoñe quemochátēnbobonshana. ¹³ Pero nda nyēts tempo átšbeñe ošbuachiyá totsomñe, atsbocaná echántsemna. ¹⁴ Y quem tšabe noticiēnga Bēngbe Bētsabe amēndayama nyēts quem luarīñe entšāngbioye mochántsabuyayinaye, chca, chē ndegombre soyēnga Bēngbe Bētsabiana chēnga chamotsetatšēmbuama. Chentšana cocayé quem luare jopochócama tempo echántsemna.

¹⁵ “Chê Bêngbe Bêtsabe juabna oyebuambnayá Daniel chê puerte uabouana soye tojéftsanabema chê pochócaye soyama. Tšêngaftanga chê puerte uabouana soye chê uámána ca uabaina luarentše chašmojinýe ora (nda tojtsalía, chabosertá), šmochántsetatšëmbo chê puerte ngménana tempo tojóshjanguama; ¹⁶ entsanga Judeoca chamojtsemnënga, batsjabengoye chamotsacheta. ¹⁷ Y nda cachabe yebnentsá tsbanánoca chaojtsemna, chaotsachá chocana ntjastjangcá ndayá tsoicana jéftsábocnama. ¹⁸ Y nda jajoca chaojtsemna, yebnoye ndoñe chaondéta ni mo chabe quëfsáiya jesácñama. ¹⁹ ¡Tša lastema chê tempo ngomámanënga chamojtsemnëngbiana o ochóchaye šešonga chamojtsabamnëngbiana! ²⁰ Bêngbe Bêtsá šmochtseimpadana chê tšêngaftanga jachetama, uaftena tempo ora o canýe ochnayté ndoñe chaondétsemnama. ²¹ Chca, chora puerte ngménana echántsemna. Tša jabuache ngmenancá, quem luare jabojátšama orscana y méntsoñama y más chcoye, cachcá ngménana ndoñe ntjamnana. ²² Chê puerte ngménana tempo yapa bën ndoñe chaondétsemnama Bêngbe Bêtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanýeshanayeca, echanjama yapa bën tempo ndoñe chaondétsemnama.

²³ “Chora nderado nda cmochanjáuyana: ‘Minýënga, muentše chê Cristo entsemna’, o ‘Choca cha entsemna ca’, chê soyëngama ndoñe šmattsayaunana. ²⁴ Chora mochanjábocana ndoñe ndegombre uámána ubuáyanënga, chënga Cristo imomna ca jtsichámëse, y Bêngbe Bêtsabe ndoñe ndegombre juabna oyebuambnayëngnaca; y chënga mochanjama bêts soyënga chëngbe obenana jinýanýiyama, entsanga jáingñama, y tmojobenase, chê Bêngbe Bêtsabe bocacánëngnaca. ²⁵ Atše ya chama tcbonjabuayená chê tempo cabá ndóshjango ora. ²⁶ Chíyeca, nderado chënga chacmojáuyana: ‘Minýënga, chentše chê Cristo entsemna, entsanga ndoyenoca ca’, choye ndoñe šmatjá; o chacmojáuyana: ‘Cha canýe tsoca entsemna ca’, chama ndoñe šmattsayaunana. ²⁷ Er ntšamo chê tojatcuinýe ora, shinýe bocanoicana y shinýe uenatjëmbambanëntsoñe jabuashinýinýenancá y ba luarënguenache entsanga jobenayana jinýama, cachcá, Bêngbe Bêtsá Entsó tbojanbemá quem luaroye chaojésabo te, entsanga nyets luarentše mochanjobenaye cha jinýama. ²⁸ Canýe obanabe cuerpo tojtsemnama chê gallinacënga tmojátatšëmbona y cachora chê béconana jojotana. Cachcá, chê castigo echántsemna nýa chama chê tempo chaojtsemna ora ca” —Jesús tojánayana.

Bêngbe Bêtsá Entsó tbojanbemá quem luaroye echanjésabo
(Mc 13.24-37; Lc 21.25-33; 17.26-30, 34-36)

²⁹ Méntšánaca Jesús tojánayana: “Chê puerte ngménana tempo chaojchëngüentšána, shinýe ndoñe queochátšbuashinýinýana, juashcona ndoñe queochátšbinýenaye, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmana. ³⁰ Chora canýe soye celoca echanjónýna entsanga jinýanýiyama Bêngbe Bêtsá Entsó tbojanbemá ya iuaisaboma, y nyets luarenache entsanga mochanjenóbošachna, y Bêngbe Bêtsá Entsó tbojanbemábioye mochanjinýe celoca jantšetëshiñe echántsaboye, puerte obenánaca y corente buashinýinýaniñe. ³¹ Y canýe trompetëfjua jabuache chaojuénana ora, cha chabe angelotëmënga echanjichamuá Bêngbe Bêtsabe ubuáyanënga júbuajama, nyets luarëngocana, celoca cánýoica juachoicana y chê inýoica juachóntsoñe.

³² “Ntšamo higo betíyeca endbétsopasanama šmochjuatsjinýe: Tojtsais-abuacuana y tojtsaiséjotsana ora, chë tšabe tempo ya tojtsaisobecuama jtsotatsëmbuana. ³³ Cachcá, lempe chë ndayama tšëngaftanga tcbonjauyancá chašmojinýe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnana. ³⁴ Ndegombre cbëyana, lempe chca echanjochnëngo, morsa entsanga cabá ndóbana ora. ³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ “Pero ndayté y ntseco te Bëngbe Bëtsá Entšá tbojanbemá yochjésabama, ndocná quenátstatšëmbo, ni chë celoca angelotémënga, ni Bëngbe Bëtsabe Uaquiná. Nýe chë Taitá chama yotátšëmbo.

³⁷ “Ntšamo Noé yojétsiyena ora tojanopasacá, cachcá echanjopása chë Bëngbe Bëtsá Entšá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entsanga imnasaye, imnofšëšnaye y imnóbouamnaye; natjëmbana imojtsiyëne, y chca imojtsomñe Noé chë barquëshoye tojánamashënguentscuana. ³⁹ Chënga tondaye imonjántatsëmbo, nýe chë uabouana uaftena tojánashjango y nyetscanga tojtsanéyamba ora cocayé. Cachca echántsemna Bëngbe Bëtsá Entšá tbojanbemá chaojésabo ora; ya chaojochnëngo ora, entsanga chama mochanjátatsëmbona. ⁴⁰ Chora uta boyabásata jajoca bochántsemna; canýa mochanjesbetše y chë ínýana ndoñe. ⁴¹ Uta shembásata bochántsejanýcoye; canýa mochanjesbetše y chë ínýana ndoñe.

⁴² “Chíyeca cuedado šmochtsebomna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. ⁴³ Pero quem soye tšabá chacmësertá: Chë yebnentsënga nduiño, ntseco ora ibeta atbëbaná yochjabama tojtsatatsëmbëse, cha nantšefšna y ndocnábioye buan-jaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tšëngaftángnaca šmochtseprontana, er Bëngbe Bëtsá Entšá tbojanbemá echanjésabo, entsanga chama tondaye chamontsejuabná ora ca” — Jesús tojánayana.

Chë tšabe oservená y chë ndoñe tšabe oservená (Lc 12.41-48)

⁴⁵ “¿Nda yomna chë oservená ntšamo chë nduiño tojtsebošcá amá y nyets juábnaca amá? Cha jtemnana nda chë nduiño bochjëftsebošhona chë yebnentsënga chaotsanýenama y jasama tojtsemna ora chaujuatšëma. ⁴⁶ Chë nduiño tojtashjango ora, chë oservenábioye tbojínýena ntšamo ibomncá jtsamëse, chë oservená puerte oyejuayá echántsemna. ⁴⁷ Ndegombre cbëyana, chë nduiño chábioye bochanjaimpáda lempe chabe soyënga chabotsinýeñama. ⁴⁸ Pero chë oservená bacna entšá tomnëšna, jajuaboyana chë nduiño ndoñe betsco yochantabo ca, ⁴⁹ y as, cha jóntšana chë ínýe oservénënga jtsajantšetayana, becá jtsesana y jtsetmuana ínýe tēmiëngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetatsëmbo ora, cha echántashjango. ⁵¹ Chora chë nduiño jabuache bochantšecástiga, y ntšamo chë bacna entsanga ndayá ndegombre tmojuabnacá ndinýinýayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsašënga echantsenoftšëjnjaye ca” — Jesús tojánayana.

25

Chë bnëtsana tobiasëngbiana cuento

1 Mëntsánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canye casamento fiestentše tojanopasacá. Mëntsá yojopása: Bnëtsana tobiasënga chëngbe querosine uajuinñanëshangá imojëftsájaca y imojábocana chë casamentero boyabása jajëbenguama. 2 Chë bnëtsana tobiasënguentšana, shachnënga sempre enójuabnayënga immamna, y chë inye shachnëngna, ndenójuabnayënga. 3 Chë ndenójuabnayënga chëngbe uajuinñanëshangá imojëftsájaca, pero querosine ndoñe imonjuabuyamba chë uajuinñanëshangañe cachiñe jtaftsuaámama. 4 Pero chë sempre enójuabnayënga chëngbe uajuinñanëshangá imojëftsájaca y querosinënaca botellësënguiñe imojuabuyamba. 5 Chë casamentero boyabásana ndoñe betscó yonjabo, chíyeca nyetsca tobiasënga ocayana yojubuache y imojtsomaná. 6 Mo tsëntseto orna, chënga imojouena mëntsá uayebuáchana: ‘¡Chë casamentero boyabása ya endabó! ¡Jajëbenguama mobocana ca!’ 7 Asna, nyetsca tobiasënga imojotšbaná y imojóntša chë uajuinñanëshangá juabopróntana. 8 Chorna, chë shachna ndenójuabnaye tobiasënga chë inye shachnënga sempre enójuabnayëngbiöye imojáuyana: ‘Dios-manda tsëngaftangbe querosinentšana baseytema šmëbuatšatá, bëngbe uajuinñanëshangá tojontšé jtsafsánana ca.’ 9 Pero chë sempre enójuabnayëngna imojayana: ‘Ndoñe. Tcojubuatšatase, tsëngaftangbiana y bëngbiámna querosine echántšashbe. Más tsábá entsemna, chë querosine mondbétsenoye chašma y tsëngaftangbiana chašmauábuamiñe ca.’

10 “Chorna, chë shachna ndenójuabnaye tobiasënga imojá chë querosine jauabuámiyama; pero chëntscuana chë casamentero boyabása yojáshjango y chë sempre enójuabnayënga cháftaca chë casamento fiestoye imojámashjna, y chentša bëshása imojtatame. 11 Chentšana chë inye tobiasënga imojáshjajna y mëntsá imojtsichamo: ‘¡Taita, Taita, šmëbëtafjo ca!’ 12 Pero chë casamentero boyabása yojójua: ‘Ndegombre cbëyana, tsëngaftanga ndoñe quecbatëbueatma ca.’

13 “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tsëngaftanga ndoñe quešmátstštšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento
(Lc 19.11-27)

14 “Bëngbe Bëtsabe amëndayana endmëna mo ntšamo canye boyabásaftaca tojanopasacá. Cha ibojtsemna inye luaroye jtošñama; as chabe oservénënga yojáchembo y yojaimpádaye chabe crocénana chamotsinñenama. 15 Cányabiöye ibojántšabuachiye shachna uaranga uaranga crocénana, ínñabiöyna uta uaranga y ínñabiöyna canye uaranga. Chca yojamna ntšamo cada ona ibojobiashjachcá. Y as chë boyabása yojtsoñe. 16 Cachora chë shachna uaranga yojoyëngacñá yojá trato jabemama, y chca, inye shachna uaranga crocénana yojábotiye. 17 Chë uta uaranga yojoyëngacñá cachcá yojama y inye uta uaranga yojábotiye. 18 Pero chë canye uaranga yojoyëngacñana, yojá, fshantsiñe yojajutoj y chabe mandayabe crocénana chentšë yojtseitëme.

19 “Chentšana baytесе chë oservénëngbe amëndayá yojtashjango y yojóntša chë crocenánama chënga jatjayana. 20 Natsana yojáshjango chë shachna uaranga yojoyëngacñá y chabe mandayábioye inye shachna uaranga

crocénana ibojántšabuachiye y mēntśá ibojauyana: ‘Taita, aca shachna uaranga šconjanoyé y muentše entsemna inýe shachna uaranga sēnjaboté ca.’ ²¹ As chē mandayá ibojauyana: ‘Tša tšabá, tšabe oservená y ntšamo tšboščá amá. Aca quem base soyiñe lempe ntšamo tčojamandacá tcojámayeca, atše cbochanjaimpáda más bētscá chašcotsinýeñama. Mamáshēngo y átšeftaca cochjóyeuaye ca.’ ²² Chentšana chē uta uaranga yojoyēngacná yojáshjango y chē mandayábioye ibojauyana: ‘Taita, aca uta uaranga šconjanoyé y muentše entsemna inýe uta uaranga sēnjaboté ca.’ ²³ As chē mandayá ibojauyana: ‘Tša tšabá, tšabe oservená y ntšamo tšboščá amá. Aca quem base soyiñe lempe ntšamo tčojamandacá tcojámayeca, atše cbochanjaimpáda más bētscá chašcotsinýeñama. Mamáshēngo y átšeftaca cochjóyeuaye ca.’

²⁴ “Pero chē canýe uaranga yojoyēngacñe oservená yojáshjango orna, chabe mandayábioye ibojauyana: ‘Taita, atše sēndētatsēmbo aca canýe tšátjaye entśá comnama; acna chē ndoñe tconjajé chentše saná jocñana y chē ndoñe tconjujquēshe luarentše jobuátbanana. ²⁵ Chama atše uatjana šjuábuache, chíyeca atše sēnjá y fshantsiñe chē crocénana sēnjsetitēme. Pero muentše acbe crocénana entsatsmēna ca.’ ²⁶ As chē mandayá ibojuá: ‘¡Bacna oservená y oyēnjayá! Chē ndayentše ndoñe tijajé chentše saná jocñana y chē ndoñe tijujuēshe luarentše jobuátbanana atše tsuamanama icójátatsēmbēse, ²⁷ aca cmonjamna atšbe crocénana bancoca jetsobuájua y atše matijtabo ora, atšbe crocénana matijtóyēngacñe y chē chentšana tojoboté crocénanēnaca ca.’ ²⁸ Y as yojamēnda: ‘Chē uaranga motseboca y chē bnētsana uaranga entsebo mnábioye chana motsatšetá ca. ²⁹ Er nda tojtsebo mnábioye, más jatšetayana, y chca cha corente bētscá jtsebo mnana; pero tondaye tondbo mnábioyna, chē batšatema tobomna sóynaca jtsebocana ca.’

³⁰ “Y chora cha yojayana: ‘Quem ndoserverna trabajaya šhjoca ibetoye matábocna; choca puerte echanjenóbošachna y chē tsetšanama juatsašēnga echantsenoftěšjojnaye ca’ —Jesús tojanéyana.

Ntšamo chē quem luare jopochócama ora, nýetsca entšangbiama mochjayana

³¹ Mēntśánaca Jesús tojánayana: “Chē Bēngbe Bētsá Entśá tbojanbemá chabe obenánaca, buashinýinýaniñe y nýetsca chabe angelotémēngaftaca chaojésabo ora, chē reybiama puerte buashinýinýana tbemaniñe echanjót bema. ³² Chora nýets luarēngoca entšanga chabe natsanoica mochanjēnefña, y cha, entšanguentšana inýenga echanjábacacaye, mo chē oveshēnga abujājēñya oveshēnga chivēngbentšana endbetsabacacnycá. ³³ Chē abujājēñya, oveshēnga chabe catšbioica echanjáchembo y chivēngna chabe uañicuayoica. Bēngbe Bētsá Entśá tbojanbemá cachcá echanjama: chē ubuáyanēnga chabe catšbioica echanjúbuaja y chē bacna entšangna chabe uañicuayoica echanjatsaye.

³⁴ “Chorna chē Rey, Bēngbe Utabná, chabe catšbioica chamojtsemna entšanga echanjáuyana: ‘Tšēngaftanga, Atšbe Taitá tšábeñe cmētabna, mabēnga ca; atšbe amēndaye luare mo tšēngaftangbiama otocana soyá mōháchiñēnga; tšēngaftangbiama endēprontana, Bēngbe Bētsá quem luare tonjanma orscana. ³⁵ Er atše šonjanishēntsana y tšēngaftanga saná šmonjancaredadó; šonjanajuendá y tšēngaftanga šmonjanafšé; inýe luarocana ashjangonacá sēnjánana y posada šmonjanántšame. ³⁶ Enaśá

sēnjánana y entšayá šmonjanētšetá jtichētjuama; šocá sēnjanjájona y šmonjanatsētsaye; cárceloca sēnjanētámēna y jabēuatsētsayama šmonjánabo ca.’

³⁷ “As chē Bēngbe Bētsá chabe bominýiñe tšábēnga tojábiámēnga mochanjatjaye: ‘Bēngbe Utabná, ¿ntseco shēntseca tcbēnjáninýe y tcbēnjanajuatšé? ¿Ntseco uajuendayá tcbēnjáninýe y tcbēnjanafšé? ³⁸ ¿O ntseco inýe luarocana ashjangonacá tcbēnjáninýe y posada tcbēnjanántšame, o enasá y entšayá jtichētjuama tcbēnjanētšetá? ³⁹ ¿O ntseco šocá o cárceloca utamená tcbēnjáninýe y jauatsētsayama tifjána ca?’

⁴⁰ “As chē Utabná echanjójua: ‘Ndegombre cbēyana, lempe ntšamo chē atšbe catšátanguentšana chē más batšá uámanēngaftaca šmojamcá, cach átšeftaca šmonjanma ca.’

⁴¹ “Chentšana chē Utabná chabe uañicuayoica chamojtsemna entšanga echanjáuyana: ‘Atšbentšana mojuánanga atšbe Bētsabe uaboténēnga. Infiernoye motsajna, chē ndocna te queochátšfsana íñeshoye; choca endēprontana Satanás y chabe ustonēngbiama. ⁴² Er atšbe shēntseca sēnjánana y tšēngaftanga saná ndoñe chešmatancaredadó; šonjanajuendá y ndoñe chešmatanafšé; ⁴³ inýe luarocana ashjangonacá sēnjánana y ndoñe posada chešmatanántšame. Enasá sēnjánana y ndoñe entšayá chešmatanētšetá; šocá sēnjanájona y cárceloca sēnjanētámēna y ndoñe chešmatanatsētsá ca.’

⁴⁴ “As chēnga mochanjatjaye: ‘Bēngbe Utabná, ¿ntseco tcbēnjáninýe shēntseca o uajuendayá, o inýe luarocana ashjangonacá, o enasá, o šocá o cárceloca utamená y ndoñe tcbēnjanajabuache ca?’

⁴⁵ “Y chē Utabná echanjójua: ‘Ndegombre cbēyana, tšēngaftanga ntšamo chē atšbe catšátanguentšana chē más batšá uámanēngaftaca, ndoñe šmonjanmcá, átšeftaca cach ndoñe chešmatna ca.’

⁴⁶ “Chēngna infiernoye nyētsca tescama mochantsēsetjango, y chē Bēngbe Bētsá chabe bominýiñe tšábēnga tojábiámēngna chē nyētsca tescama yomna tšabe vida mochántsebomna ca” —Jesús tojánayana.

26

Entšanga tmojanjuabó ntšamo jamēse Jesús jishachama

(Mc 14.1-2; Lc 22.1-2; Jn 11.45-53)

¹ Lempe chca tojánayanentšana, Jesús chabe uatsjéndayēnga tojanēyana: ² “Tšēngaftanga šmondétatšēmbo, uta te y chē Bashco fiesta echántsemna y Bēngbe Bētsá Entšá tbojanbemá ínýēngbe cucuatšīñe mochanjáboshjona chamocrucificama ca.” Chē fiesta inamna jtenójua boyama Bēngbe Bētsá chē judiēngbe bēts taitanga Egiptocana tojánatšebacama.

³ Chēntscuana, chē bachnangbe amēndayēnga y chē judiēngbeñe bētsējemēngcá mándayēnga tmojánenefjna, Caifás, chē bachnangbe más uámāna amēndayabe bēts yebnentše. ⁴ Tmojanenuabó y tmojanenoyeuná jtšēngñase Jesús jishachama, y jtšóbama. ⁵ Pero imojtsichamo: “Quem fiestēntscuana ndoñe, entšanga yapa muanjóntša enbouenanana ca.”

Canýe shembása botamana uanguētše béjaye Jesusbe bestšasiñe tbojanbuešcja

(Mc 14.3-9; Jn 12.1-8)

⁶ Jesús Betania pueblentše yojtsemna, Simón chē bacna nguayanánaca šocá ca uabobuatmabe yebnentše. ⁷ Chēntscuana canýe shembása Jesúsbiye

tojanabeconá. Chê shembásana tojanamba canye alabastro jarrëtema, jútjena canye puerte uámana botamana uanguëtse béjaye. Jesús mesëshentse yojtsemnentscuana, chê shembása chabe bestsašine chê botamana uanguëtse béjaye tbojanbuešca.

⁸ Chê uatsjéndayënga chca tmojaninÿe orna, tmojanotjayaná y tmojanontsé ichámuana: —¿Ndáyeca nÿe bonamente chê soye chca yojtsemna ca? ⁹ Chamna, matmënjobenanga chê béjaye beca crocenánama juiyana y chánaca ndbomnjémënga matmënjújabuache ca.

¹⁰ Jesús chê soye tojanuena; as tojanëyana: —¿Ndáyeca ndoñe cachá quem shembása šmochanjonÿaye ca? Ntšamo tonjamcá tšabá entsemna. ¹¹ Er chê ndbomnjémëngna nÿets tempo tšëngaftangbeñe mochanjëftsemna, pero atše tšëngaftangaftaca ndoñe nÿets tempo quichásemna. ¹² Ntšamo chê shembása tojamcá, chê botamana uanguëtse béjaye atšbe cuerpiñe jabuéšcÿe, cha šontseprónta atše juatbontsa tescama. ¹³ Ndegombre chëyana, quem luriñe ndayéntšnaca Bëngbe Bëtsabe soyëngama chamojtsabuayiyiná chentše, ntšamo quem shembása tojamámncaca beca mochanjëftsoyebuambaye, chca, entšanga chabiamá chamotsenójuabnama ca —Jesús tojanëyana.

Judas tojána bachnangbe amëndayëngbioye, Jesús chamuishachama
(Mc 14.10-11; Lc 22.3-6)

¹⁴ Canÿa chê bnëtsana uta uatsjéndayënguentsá, Judas Iscariote ca uabainá, tojána bachnangbe amëndayëngaftaca jencuéntama. ¹⁵ Y tojanatjá: “¿Ntsachetsá šmatjtabuénaye y Jesús tšëngaftangbe cucuatšine choch-jayentšbashejuana ca?”

As chëngna, unga bnëtsana ralbenga tmojtanabuená. ¹⁶ Y cach orscana Judas yojtsenguaye ntšamose y ntseco ora, Jesús chëngbe cucuatšine jayentšbáshejuana.

Jesús chabe uatsjéndayëngaftaca Bashco saná tojanse
(Mc 14.12-25; Lc 22.7-23; Jn 13.21-30; 1 Co 11.23-26)

¹⁷ Chê Bashco fiesta bojatšenté, chê levadúraca ndëpormana tandëse jasama fiestëntscuana, chê uatsjéndayënga Jesúsbioye tmojanobeconá y tmojantjá: —¿Ndémoca aca cojtseboše bënga fchaiprontama Bashco saná chacosama ca?

¹⁸ Y Jesús tojanëyana: —Chê bëts puebloye motsajna canye bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjéndayëngaftaca ca.’ ”

¹⁹ As chê uatsjéndayënga tmojanma ntšamo Jesús tojanamëndacá y chê Bashco fiesta saná tmojanprontá.

²⁰ Y tojanibétata orna, Jesús chê bnëtsana uta uatsjéndayëngaftaca mesëshentse yojtsemna. ²¹ Y imojtsesantscuana, Jesús tojanëyana: —Ndegombre chëyana, canÿa tšëngaftanguentsá uayayëngbe cucuatšine šochanjáboshjona ca.

²² Chora chê uatsjéndayënga puerte ngménaca imojtsemna y tmojanontsé canÿánÿa Jesús jatjayama: —Bëngbe Utabná, ¿nderado atše cha chtsemna ca?

²³ As Jesús tojanëjua: —Canÿa nda chabe tandëse entsefchecucaná cach atše sëntsefchecucaná šnenentše, cha uayayëngbe cucuatšine šochanjáboshjona. ²⁴ Ndegombre, Bëngbe Bëtsá Entšá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamá

iuayancá; pero, ¡tsa lastema chë bochjáboshjonabiam! Más tsábá chabiam manjamna ndoñe ntjónynana ca.

²⁵ As Judas, chë boshjuaná, Jesúsbioye tbojantjá: —Buatëmbayá, ¿nderado atse chtsemna ca?

Y Jesús tbojanjuá: —Ndegombre tcjayana ca.

²⁶ Imojtsesantscuana, Jesús tandëse tojana, Bëngbe Bëtsábioye chama tbojtanchuá, tojanjatá y chë uatsjédayënga tojanatsatá. Y mëntśá tojánayana: “Mocñënga, mosënga. Atšbe cuerpo entsemna ca.”

²⁷ Chentšana, canye coptema vínoyeca tojanaca, Bëngbe Bëtsábioye tbojtanchuá y chë uatsjédayënga tojanëfsašé. Y mëntśá tojánayana: “Nÿetscanga quem coptémentšana mofšënga. ²⁸ Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aiñe yochjochñënguama. Chë buiñe bëtsá entšangbiam echanjuábuashana, chëngbe bacna soyëngama perdonánënga chamotsemna. ²⁹ Y ndegombre cbëyana, morscana atse ya ndoñe más chë uvasentšana obocniye quichaisofsiye. Chë tsëm vínoye tšëngaftangaftaca chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentšana, Olivos tjashoye tmojëftsanbocana. ³¹ Choca Jesús tojanëyana: —Tšëngaftanga nÿetscanga quem ibeta átšbeñe ošbuáchiyana šmochantsobuetše y šmochantsacheta, er Bëngbe Bëtsabe uabemana palabrenguiñe, cha mëntśá tojánayana: “Chë oveshëngbe abuajëñya chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. ³² Pero obanënguentšana chaitayenentšana, tšëngaftangbe natsana Galileoye chanjá ca —cha tojanëyana.

³³ Chora Pedro tbojanjuá: —Masque nÿetscanga áceñe ošbuáchiyana chamotsobuetše y chamotsacheta, ntšamo ácaftaca yochjopása causa, atse ndocna te ca.

³⁴ As Jesús tbojanayana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

³⁵ Pero Pedro tbojanayana: —Masque chašotsemna ácaftaca jóbanama, atse ndoñe quichátayana ndoñe cbonduabuatma ca.

Y nÿetsca uatsjédayëgnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá (Mc 14.32-42; Lc 22.39-46)

³⁶ Chentšana, Jesús chabe uatsjédayëngaftaca canye luare Getsemaní ca uabáinoye tojána. Choca tojanëyana: “Muentše motbiama, chëntscuana atse choye chanjá Bëngbe Bëtsáftaca jencuëntama ca.”

³⁷ Y Pedro y chë Zebedeobe uta uaquiñata tojëftsanébiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanëyana: “Atšbe ainana puerte ngménaca entsemna, mo jobanamcá. Muentše moquedanga y átšëftaca šmochtsefšna ca.”

³⁹ Chora Jesús más natsanoye tojána, tojanoshamentśé y fshantsóntscoca yojotsejbéna, y mëntśá Bëngbe Bëtsáftaca tbojanencuentá: “Atšbe Taitá,

jopódianése moma atše japadésama ndoñe chašondětsemnama. Pero ntšamo atše stsebošcá ndoñe chaondětsemna, sinó ntšamo aca cojtsebošcá ca.”

⁴⁰ Chentšana, Jesús chabe unga uatsjéndayëngbioye tojtanabo y chëngna inmésomañe. Chca tojánanÿena ora, Pédrëbioye tbojanianyana: “¿Ni mo canÿe horatema tšëngaftanga šmonjobená átšeftaca jtsefšnana ca? ⁴¹ Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mëntšá Bëngbe Bëtsáftaca tbojanencuénta: “Atšbe Taitá, atše japadésama ndoñe chašondětsemnama jamama ndoñe jopódianësna, nÿe ntšamo aca cojtsebošcá chaotsemna ca.”

⁴³ Y tojtanabo ora, chë uatsjéndayënga cachiñe inmésomañe; yapa ocnaye causa nÿe imojtsefšhétana. ⁴⁴ As Jesús cachcá yojétsënÿaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

⁴⁵ Chora chë uatsjéndayëngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá Entšá tbojanbemá bacna soye amëngbe cucuatšifñe mochanjábošhjona. ⁴⁶ Motsbananga, cuajna. Minÿënga, chë boshjuaná ya entsebeconá ca.”

Uayayënga Jesús tmojánishache
(Mc 14.43-50; Lc 22.47-53; Jn 18.2-11)

⁴⁷ Jesús cabá yojtsóyebuambnantscuana, Judas, canÿe chë bnëtsana uta uatsjéndayënguentsá, tojánashjango, y cháftaca imojtsemna ba entsanga espadëjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. ⁴⁸ Judas, chë boshjuaná, tojanjuabó ntšamo jamana entsanga jinÿanÿiyama ndëmua Jesús hétsemnana. Chíyeca yojáuyana: “Nda chajauámocho, cha echántsemna. Smochjishache ca.” ⁴⁹ Cachora Judas Jesúsbioye tojanobeconá y tbojanчуá: —Buajtana, Buatëmbayá ca.

Y tbojtanámocho.

⁵⁰ Jesús tbojanianyana: —Enutá, moma chë ndayá jabomama tojabo ca.

Chorna, chë entsanga tmojanobeconá, Jesús tmojánishache y tmojanánatse.

⁵¹ Chca orna, canÿe enutá Jesúseftaca yojtsemná, chabe espadëja tojanenósngbotëntšena, y chë bachnangbe más uamana amëndayabe oservenábioye canÿe matscuase tbojtsanëštjango.

⁵² As Jesús tbojanianyana: “Espadëja matosëngbuajonÿá. Nda espadëjaca tbojóba chana, cach espadëjaca echanjóbana. ⁵³ ¿Aca ndoñe condëtatsëmbo, atše atšbe Taitábioye stjaimpádase, cha cachora atšbiama nanjichamuá bnëtsana utama más ejércitënga angelotémëngaca? ⁵⁴ Pero chcasna, ¿ndayá Bëngbe Bëtsabe uabemana palabrënguiñe endayancá ntšamo nanjochnëngo? Chñe endayana ntšamo entsopasancá jochnënguama canmëna ca.”

⁵⁵ Cachora Jesús entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canÿe bacá uamana entšá cuaftsemncá ca? Atše cada te Bëngbe Bëtsabe bëts yebnoca tšëngaftangaftaca sënjántbemana abuátambaye, y choca ndoñe chešmátanishache. ⁵⁶ Pero lempe quem soyënga chca entsopasana, cachcá chaotsemnama ntšamo Bëngbe

Bëtsabe uabemana palabrenguiñe chë Bëngbe Bëtsabe juabna oyebuambnaye tmojanayancá ca” —Jesús tojánayana.

Cachora nyetsca uatsjédayënga tmojtsanéuatjaná y tmojtsanacheta, y Jesús chë uayayëngaftaca cachcá tmojesanonýa.

*Jesús tmojanánatse chë judiëngbe más uámana amëndayëngbiye
(Mc 14.53-65; Lc 22.54-55, 63-71; Jn 18.12-14, 19-24)*

⁵⁷ Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentse chë ley abuátambayënga y chë judiëngbeñe bëtsëjemëngcá amëndayënga tmojánenefjna. ⁵⁸ Pedro bënëcana Jesús tbojanasto, chë bachnangbe más uámana amëndayabe chashjónscoñe; choye tojánamashënga y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

⁵⁹ Chë bachnangbe amëndayënga, chë bëtsëjemëngcá amëndayënga y ínÿenga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, ⁶⁰ pero ndoñe tmonjáninÿena, masque banga tmojánashjajna Jesusbe contra uayátsenaye soyënga jayanama. Cabana, útata tbojánashjango, ⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtsenásatajchcana y nÿe unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbiye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús nÿe iytëca yojtsemna. Chiyeca chë bachnangbe más uámana amëndayá tbojanayana: —Bëngbe Bëtsá Ainabe mándoca cbomandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjá: —Aca ndegombre yomncá tcjayana. Y quem sóynaca cbéyana: Tšëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catšbioica jtsetbemanana y celoca jantšetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiamá entsemna mo cha cuafoyenguangcá, chë chabe Uaquiñá yomna ca cha tonjayana ora! ¿Ndayama más entšanga šochjátëjáboto Jesusbe contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entšanga tmojanjá: —Ndegombre cha bëts bacna soye entsebmoma; jóbanama bontsemna ca.

⁶⁷ Chora tmojanontsé Jesús juebëbuashëtjnayana, jabuache jantšetayana y ínÿengna imojtsejuëbjantšetaye, ⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, imomalisiá nda tcmënjantšetá ca!”

*Pedro tojánayana Jesúsbiye ndoñe bonjanabuátma ca
(Mc 14.66-72; Lc 22.55-62; Jn 18.16-18, 25-27)*

⁶⁹ Chëntscuana Pédrëna shjoca yojtsemna, chashjoca yojtsetbemaná. Chora, canÿe shembása chentša oservená tbojanobobeconá y tbojanayana: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntśá jayanëse: —Ntśamo contsichamcá, ndoñe queśnátësertana ca.

⁷¹ Chora Pedro bëşoye yojábocna. Chentśna, inÿe shembása oservená chábioye tbojáninÿe y chë inÿe entśanga tojanëyana: —Cha, Jesús chë Nazarec-
toçáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntśá yojt-
sejúraye: —¡Chë boyabása ndoñe quetsatabuatma ca!

⁷³ Chentśana, chë chentşe imojtsemnënga Pédrëbioye tmojanobeconá y
tmojanianyana: —Ndegombre, ácnaca chë uatsjendayënguentsá condmëna. Chë
contsoyebuambnacá contsoyátëmbana ca.

⁷⁴ Chora Pedro tojanontśé ichámuana, Bëngbe Bëtsá chaşotsecastigá ndoñe
ndegombre soye stsichámëse ca; yojtsejúraye y yojtsichamo: —¡Chë boyabása
ndoñe quetsatabuatma ca!

Y cachora canÿe ngallo yojacánta. ⁷⁵ Y Pedro yojenójuaboje ntśamo
Jesús tbojanianama. Cha mëntśá tbojanianyana: “Cabá ngallo ndëcánta ora,
aca unga soye cochanjayana ndoñe şconduabuatma ca.” Y chentśana
tojéşanbocna y corente ngmënaca yojtsenóboşachna.

27

Jesús, Pilátbioye tmojanánatse

(Mc 15.1; Lc 23.1; Jn 18.28-32)

¹ Tojanbinÿna ora, nÿetsca chë bachnangbe amëndayënga y judiëngbeñe
bëtsëjemëngcá amëndayënga tmojánenëfjna jenóyeunayama ntśamo jamëse
Jesús chaóbanama. ² As, Jesús tmojanëcuébatsëca y tmojanánatse, y chca, Pilato,
chë Judeoca Romano mandadbe cucuatşiñe tmojánboshjona.

Ntśamo Judas tojanóbana

³ Judas, chë boshjuaná, Jesús jóbanama ibojtsemnana tojanuena ora,
puerte yojtsenócochinÿena ntśamo tojánchjanguama, y chë unga bnëtsana
ralbenga chë bachnangbe amëndayënga y bëtsëjemëngbioye tojtanamba, ⁴ y
mëntśá tojanëyana: —Puerte bacna soye tijama. Atşe canÿe bacna soye
ndbomná tşëngaftangbe cucuatşiñe tijáboshjona chaóbanama ca.

Pero chënga tmojanjuá: —¿Chë soye ndayá bëngbiana? Cach aca
cochótatşëmbiñe ca.

⁵ As Judas chë ralbenga Bëngbe Bëtsabe bëts yebnentşe yojesëtşana, y yojá
y yojëtsentşeşaye.

⁶ Chë bachnangbe amëndayëngna chë ralbenga tmojtanatbaná y
tmojánayana: —Quem crocenánama buiñe echanjuábuashana; ntśamo leyiñe
endayancá, bënga ndoñe quemuátobena chë Bëngbe Bëtsabiama soyënga
quëcjnyëtëmiñe chana jasegórana ca.

⁷ Chcasna, chënga tmojanenoyeuná, chë crocenánacna chë Alfarerbe
Luare ca uabaina fshantşe jabuámiyana, y chca, canÿe luare jtsebom-
nama ndayentşe chë inÿe luarëngocana entśanga áşhajnënga jutabuantsama.
⁸ Chíyeca, chë fshantşe mëntscoñama Buiñe Luare ca iuabaina. ⁹ Chca,
tojanochnëngo ntśamo Jeremías, chë Bëngbe Bëtsabe juabna oyebuamb-
nayá, tempścá tojanayancá, ndayá yochjanchnënguama. Chana mëntśá

tojánayana: “Y chë unga bnëtsana ralbenga tmonjanca, ntsachetsá chë Israeloca entsanga cha tmojanamananacá,¹⁰ y chánaca chë Alfarerbe Luare tmonjanbuamé, ntšamo Bëngbe Bëtsá šonjanmandacá ca.”

Jesús Pilatbe delante
(Mc 15.2-5; Lc 23.2-5; Jn 18.33-38)

¹¹ Chentšana Jesús, chë mandado Pilátbïoye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹² Chë bachnangbe amëndayënga y chë bëtsëjëmënga Jesús mal imojtse-quédantscuana, cha ndocá ntjojuana. ¹³ Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴ Pero Jesús ni canyë palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana
(Mc 15.6-20; Lc 23.13-25; Jn 18.38–19.16)

¹⁵ Bashco fiesta ora, chë mandado yojanamana canyë utamená jëtsboshjonana, nda entsanga tmojuabuayaná. ¹⁶ Chë tempo canyë uachuana utamená inamna, Jesús Barrabás ca uabainá. ¹⁷ Nyetsca entsanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetátšëmbo, entsangna envidia causa Jesús chabe cucuatšinë tmojánboshjonama.

¹⁹ Pilato chë tribunal ca uabáinentše yojtsetbemanëntscuana, chabe shema canya tbojanichmó mëntšá cha jauyanama: “Chë nyetsca soyënguiñe tšabá ama entšábïoye ndocá matsborlánana; chabe causa íbeta otjénayoca puerte sënjasufrí ca.”

²⁰ Pero chë bachnangbe amëndayënga y chë bëtsëjëmënga entsanga tmojanayëñaná, Barrabás jëtsboshjonama y Jesús chaóbana ca chamuayanama. ²¹ Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nyetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entsanga más jabuache enbouenanama tmojanontšema Pilato tojáninýe ora, cha tojanmandá býyeshe juabuiyëboñana y nyetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nyetsca entsanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entsangbe cucuatšinë tbojánboshjona chamocrucificama.

27 Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nyëtsca soldadënga chabe shëconana tmojanójoto. 28 Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo. 29 Canýe coronësha tmojanapormá uchmašëfjangaca y tmojanabestšajó, y catšbioica cucuatšinë canýe niñëfja. Chorna, chabe shecuatšentše imojtsofshëntsaméntšenaye y imojtsáboyejuana. Mëntšá imojtsichamo: “¡Baytë judiëngbe Rey cochtsemna ca!”

30 Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye. 31 Y chca imnaftšáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

32 Chë entšanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblóca. As, cha tmojanmandá Jesusbe cruz chauetsocutsama.

33 Canýe luare Gólgota ca uabáinoca tmojánashjaina ora (hebreo biyañe chca endayana “Obanabe Bestšashe Luare ca”), 34 Jesúsbioye vínoye hiëloyeca enájubniye tmojanabuiyé chaofšema; pero yojaftántia y ndoñe yonjábóšena chiye jofšiyama.

35 Ya tmojanrucificá orna, chë soldadënga Jesusbe entšayamna, tsbanánoye tmojanëtšena, chca, jtsetatšëmbuama ndabiamama yochjanáquedama. 36 Y chora chënga chentše tmojanotbiamama Jesús jtsebojanýama. 37 Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

38 Utata bacna soye ochjajnayátnaca chënga chentše tmojanrucificá, canýa Jesusbe catšbioica y chë ínýana chabe uañicuayoica. 39 Y chëjána imojtsachnëjuana entšangna, Jesús imojtsóyenguaye, imojtsobestšfshanenaye 40 y imojtsatsaye: “¡Aca chë icobena Bëngbe Bëtsabe bëts yebna jtšenásatajchcana y nýe unga tese jëtšjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

41 Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: 42 “Cha ínýenga tojëftsatsëbacá, pero cachá jëntsbocama ndoñe quemátobena. Cha Israeloca entšangbe Rey tojtsemnëse, chë cruzocana chauatastjango, y chca, bënga chábeñe fchtsošbuáchiye. 43 Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

44 Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

45 Nyëtssto orscana las tresëntscoñe, nyëts quem luare yojtseibëtata. 46 Chca orna, Jesús chabe biyañe tojanáyebuachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

⁴⁷ Chca tmojanuena ora, báseftanga chentše imojtsemna entsanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canya tojéftsanótjajo canye esponjëshe janguanguama, untja vínoyeca chëshe tojanfchecuacúa, canye niñëfjiñe tojananguësëtjo y Jesúsbioye tojanbeconá chaofsema. ⁴⁹ Pero ínÿengna tmojánayana: “Cachcá mochjonÿaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnoca yojújonÿana entséjua tséntsaca yojt-senájataye, tsbanánocana fshantsoye. Chëjua bënëjua inauamna y chë tsatséntsaca inaújonÿana. Fshantse yojuangmëmmana, ndëtsbenga yojt-sashtëtšana, ⁵² y chë cuevëshënga obanëngaca yojtsëtëfjo y banga Bëngbe Bëtsabe entsànga tmojtanyena. ⁵³ Y chënga, Jesús tojtanyenentšana, chë cuevëshënguentshana tmojánbocana, y Jerusalén, chë uámána bëts pueblo ca uabáinoye tmojánamashjna y ba entsàngbioye tmojánëbëbuacana.

⁵⁴ Chë soldadëngbe amëndayá y chë ínÿenga, Jesús jtsebojanÿama cháftaca tmojanoquedanga, chë fshantse yojuangmëmanama tmojáninÿe ora, y nÿetsca chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁵⁵ Ba shembásengnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. ⁵⁶ Chë shembásengbeñe imojtsemna María Magdalena; María, Santiago y Josebe mamá; y Zebedeobe uaqiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canye bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinÿama, Jesusbe cuerpo jotjañama. As Pilato tojanmandá chë cuerpo chamontsabuáchema. ⁵⁹ José chë cuerpo tojanca y canye nduatsenga lino entséjuaca tbojanandmaná. ⁶⁰ Y canye chabe tsëm cuevëshiñe tbojanajó. Tempo cha inamánda chë cuevëshna ndëtsbenguíñe chamopormama. Canye bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. ⁶¹ Pero María Magdalena y chë ínÿe Mariyna chentše tbojtanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jtsebojanÿama

⁶² Yëfsana, chë ochnayté, chë bachnangbe amëndayënga y chë farise-unga cánÿiñe tmojána Pilato jinÿama. ⁶³ Tmojaniana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entsànga chamúyana, Jesús tojtayena ca. Y chca, chabiamama quem ústonoye bostero soye, chë cachabiamama tojánayana soyëngama puerte más bacá nántsemna ca —chënga tmojaniana.

⁶⁵ As Pilato tojanëyana: —Tsëngaftanga cach tsëngaftangbiamama soldadënga šmondábamna. Motsajna y chë cuevëshe cuedádoca šmochtsashanÿá, ntšamo šmondëtatšëmbcá ca.

66 Chora chënga tmojána chë cuevëshe jtsashanjama; chë ndëtšbena, tsengájašeca imojuinýnaná, ntsotatsëmbcá ndocná choye chaondámashënguama, y soldadënga chentše tmojëftsanabashejuana.

28

Jesús tojtanayena

(Mc 16.1-8; Lc 24.1-12; Jn 20.1-10)

¹ Ochnayté chentšana, chë inýe semana bojatsënté yojtsebínýana ora, María Magdalena y chë inýe María tbojána cuevëshoye jarrepárama. ² Ndeolpe fshantse tojanangmëmmana, er Bëngbe Bëtsabe canýe ángel celocana tojántšma, chë cuevëshoye tojanobconá, chë atamiana ndëtšbé tojšanjuaná y chiñe tojanótbema. ³ Chë ángelna mo canýe tcuinýejcá yojtseuashinýinýana, y chabe uichëtjonëjuangá uafjantsëjuangá mo jantšetëšhcá yojtsamna. ⁴ Chë soldadënga chca tmojáninýe ora, de auatja yojtsangmëmnye y mo obanëngcá imojtsemna.

⁵ Chora chë ángel chë shembásatbioye tojanéyana: “Ndoñe batauatjana. Atše sëntsetatsëmbo tsëngaftanga Jesús, chë tmonjancrucificá cha šmojtseguama. ⁶ Cha muentše ndoñe quenátmëna; cha tontayena, ntšamo cachá tonjanayancá. Mabata y šochjinýe cha endëtšesegoranentše. ⁷ Betsco motsata y chë uatsjéndayënga šochjáuyana: ‘Jesús tontayena y tsëngaftangbe natsana Galileoye echanjá; choca šmochanjinýe ca.’ ” Y chora cha tojánayana: “Chca šondmëna tsëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojëftsanotjajo chë soye chë uatsjéndayëngbeñe jobuambayama. ⁹ Y ndeolpe Jesús chata tojánëbëbuacna y tojanacheuá. Chatna, chábioye tbojanobëconata, tbojtánadorata y chabe shecuatše šheconana imojtbojcuá. ¹⁰ Y Jesús tojanéyana: “Ndoñe batauatjana. Motsata atšbe uatsjéndayënga, atšbe catšátanga jáuyanama Galileoye chamotsá y choca atše šmochjinýe ca.”

Ntsamo chë soldadënga tmojánayana ndayá tojanochnënguama

¹¹ Chë shembásata ibojtsayëntscuana, básefta soldadënga chë bëts puebløye tmojána y ntšamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefjna jenóyeunayama. Chëngna chë soldadëngbioye bëtscá crocénana tmojtánatsatá, ¹³ y mëntšá tmojanabuayená: “Tsëngaftanga šmochjayana, ibeta šmotsomáñëntscuana, Jesusbhe uatsjéndayënga tmojabo y chabe cuerpo tmojabétsatbëba ca. ¹⁴ Y chë mandado chë soyama chaojátatsëmbonëse, bënga lempe cháftaca fchjenóyeunaye, chca, tsëngaftangtaftaca ndocá chaondopasama ca” —chënga tmojanéyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntšcoñama judiënga cachá mondbëtsichamo.

Jesús chë uatsjéndayënga tojanichamó, Bëngbe Bëtsabe soyëngama nýetsquénache jábuayenama

(Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canýe uatsjéndayënga Galileoye tmojána, chë ndëmua tjoye Jesús chënga tojanabuayená choye. ¹⁷ Y Jesús tmojáninýe ora,

tmojtandorá. Pero báseftangna imojétsejuabnaye nderado cha ndoñe Jesús yontsemna ca. ¹⁸ Jesús chëngbioye tojanobeconá y tojanëyana: “Bëngbe Bëtsá nÿets mando atše šonjatšetá celoca y quem luarentše. ¹⁹ Chcasna, motsajna, nÿets luarënguenache oyenënga atšbe uatsjéndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espíritbe uabaina jayanëse, átšbeñe šmošbuachéyeca, ²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nÿets tempo tšëngaftangaftaca chanjëftsemna, quem luare jopochócantscuana ca” —Jesús tojanëyana.

San Marcos

*Juan chë Ubayaná entšanga yojanabuayiyá
(Mt 3.1-12; Lc 3.1-9, 15-17; Jn 1.19-28)*

¹ Měntšá tojanobojatšé chë tšabe noticiēnga Bēngbe Bětsabe Uaquiñá Jesu-cristbiamá.

² Ntsamo bayté entsemna, chë Bēngbe Bětsabe juabna oyebuambnayá Isaías chabe librěšañe yojěftsayancá, ntsamo Bēngbe Bětsá chabe Uaquiñábioye ibojauyanama cha tojanábema ora:

Minýe, atšbe abuayiyayá acbe natsana sěntsichamná,
chë aca jabama lempe echanjaprónta cha.

³ Entšanga ndoyena luaroca cha enduáyebuache mēntšá:

“Bēngbe Utabná echanjabo ca;

mo nda canýe benache tojtseprontacá canýe uámana entšá jashjanguama,
cachcá tšēngaftanga, cha jabama ainaniñe tšabe juabnēngaca
šmochtseprontana ca” —cha tojanábema.

⁴ Chcase, Bēngbe Bětsá Juan tbojanichmó, y cha tojánbocna entšanga ndoyena luaroca, Bēngbe Bětsabe soyēngama abuayiyayé y entšanga ubáyana. Cha entšanga yojanětsětsnaye: “Tšēngaftangbe bacna soyēngama ngménaca šmochtenójuaboye, chca amana šochtsajbaná, y Bēngbe Bětsabe benache šmochtishache. Chora chochjúbaye, y Bēngbe Bětsá tšēngaftangbe bacna soyēngama cmochanjáperdonaye ca.” ⁵ Nýets Judea luarocana chábioye entšanga imojánbocana, y Jerusalenentšana nýetsca entšángnaca, y Bēngbe Bětsábioye chēngbe bacna soyēngama jaimpáda chentšana, Juan Jordán ca uabaina bėjayıñe chēnga yojaněbáyana.

⁶ Juanbe entšayá inauapormana camellbe stjēnasheca y bobache yojanasnana; chapulinatémēnga y tjañe méloye inasaye. ⁷ Y mēntšá entšanga yojanětsětsnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitsatobuajoñe, ni mo jotsejbiyana chabe shecochětjoněshentša corriēja jajafjonama. ⁸ Atšna búyeshca cbonděubáyana, pero chë echanjabábeyecna, Bēngbe Bětsá bochanjíchmuá chë Uámana Espíritu tšēngaftangbe ainaniñe cháuamashēnguama ca.”

*Juan, Jesúsbioye tbojanabaye
(Mt 3.13-17; Lc 3.21-22)*

⁹ Chë tempo, Galilea luarocana Nazaret pueblentšana Jesús yojěftsebocna, y Juan yojtsemnoye tojána; y Jordán bėjayıñe Jesúsbioye cha tbojanabaye.

¹⁰ Bejayoicana yojtashébēbocna orna, tojáninýe celoca atěfjñe, y chë Uámana Espíritu chábioye mo palomatemcá yojtsastajuana. ¹¹ Y celocana Bēngbe Bětsá mēntšá tbojaniyana: “Acna atšbe bonshana Uaquiñá condmēna; acbiamá corente sěntsoyejuá ca.”

*Jesús tojanobená Satanás jayēnjanama
(Mt 4.1-11; Lc 4.1-13)*

¹² Chentšana chë Uámana Espíritu Jesúsbioye entšanga ndoyena luaroye tbojanánatse. ¹³ Canta bnětsana te chë entšanga ndoyena luaroca tbojanjétana, y Satanasma yojanabó jisháchichiyama. Chë luarentše tšátjaye bayēnga imnana; chentšana, Bēngbe Bětsabe angelēnga cha imojtseservena.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

¹⁴ Juan cárceloye tmojanétamentšana, Jesús Galileoye tojesaná; y chiñe cha yojanabuayiyá chë tsabe noticiënga Bëngbe Bëtsabiamá. ¹⁵ Jesús entšanga yojanëtsëtšnaye: “Ora toçjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngmënaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiamá šmochjójyëngacñe ca.”

Jesús tojánachembo canta boyabásenga beonga ashebuánayënga cha chamuas-tama

(Mt 4.18-22; Lc 5.1-11)

¹⁶ Galilea uafjajónaye tsachajana Jesús yojtsaye ora, cha tojánanye Simón y chabe uabentsá Andrés; chatna atarraiëshangá ibnestsashbuëtsetšañe, er beonga ashebuánayata chata ibnamna. ¹⁷ Chora Jesús tojanëyana: “Atšeftaca mabata. Atše chochanjábiamá Bëngbe Bëtsabiamá entšanga anguayata; y morscana, nýe beonga ashebuánayata ndoñe quešochátsmëna ca.”

¹⁸ Y cachora chatbe atarraiëshangá cachcá tbojésanaboshjuana y Jesús tmojanasto.

¹⁹ Más chcoye yojátaye orna, Jesús tojánanye Santiago y chabe uabentsá Juan, Zebedeobe uaqüñata; chatna barquëshañe ibnetsotbemañe, chatbe atarraiëshangá atapórmayíñe. ²⁰ Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

Jesús, bacna bayëjbe juabna cánýabioye tbojanbojuaná

(Lc 4.31-37)

²¹ Chentšana, Jesús y chabe uatsjëndayënga Capernaum ca uabaina puebloca tmojánashajjana. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. ²² Entšanga imojtsenjananaye ntšamo Jesús yojtsabatambacá, er chama mo canýe mando bomnacá yojtsóyebuambnaye, ndoñe nýe ntšamo Moisesbe ley abuátambayënga imojanabatambacá. ²³ Chë pueblentše judiëngbe enefjuana yebnentše yojtsemna canýe entšá bacna bayëja uambayá, y chábeyeca chë boyabása yojóntša mëntšá uayebuáchana: ²⁴ —¿Ndayama bëngbioye tëçjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojaniyana: —¡lytëca móbema y chábertšana maisebocna ca!

²⁶ Chora chë bacna bayëjna tojanma chë boyabása ataque chaboshachama, jabuache tojanoyó y chábertšana tojésanbocna. ²⁷ Chama, nýetsca entšanga ojnanënga imojtsemna, y mëntšá imojtsentjanaye: “¿Ndayá chca yojtsemna? ¿Canýe tsëm buatëmbana soye? ¡Quem boyabása mando bomnacá y obenacá entsabatambá, y chca, chë bayëjënga cha jtsamëndayana y chëngnaca joyeunayana ca!”

²⁸ Y betesco nýets Galilea luarentša pueblënguenache Jesusbiamá yojtsótatšëmbo.

Jesús, Simón Pédrëbe uambén mamábioye tbojanshná

(Mt 8.14-15; Lc 4.38-39)

29 Chentsana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. 30 Simonbe uambén mamá šocá inajájona, jabuache calentóracá, y Jesúsbióye chë šocábiamá tmojaníyana. 31 As chora, Jesús tojanobeconá, chë šocábíoye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná
(Mt 8.16-17; Lc 4.40-41)

32 Chë te jetiñe, shinÿe ya yojuenatjëmba ora, chë luarentša nÿetsca šoquënga y bacna bayëjënga uambayënga Jesúsbióye tmojanënatse; 33 y nÿetsca entšanga bëšoye imojobeconá. 34 Jesús banga tojanashná, nÿetsca šocana bomnënga, y ba bacna bayëjënga entšanguentsana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

Chë judiëngbe enefjuana yebnënguenache Bëngbe Bëtsabe soyëngama Jesús yojanabuayíyná
(Lc 4.42-44)

35 Yëfsana cabá cachëse, cabá ibetcá, Jesús tojëftsantsbaná, chë pueblentšana tojëftsanbocna y entšanga ndoyena luaroye tojtsanoñe, choca Bëngbe Bëtsáftaca jencuëntama. 36 Pero Simón y chabe enutëngna tmojána jetsenguan-guama; 37 y tmojtsaninÿena ora tmojaníyana: —Nÿetscanga cmontsenguá ca.

38 Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

39 Y chentsana, Jesús yojánana Bëngbe Bëtsábiamá entšanga abuyayíynaye chë judiëngbe enefjuana yebnënguenache, nÿets Galileíne, y entšangbentšana bacna bayëjënga yojtëbuacana.

Jesús, canÿa bacna nguayanánaca šocábíoye tbojanshná
(Mt 8.1-4; Lc 5.12-16)

40 Chentsana, canÿe boyabása bacna nguayanánaca šocá Jesúsbióye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

41 Jesús chábiamá tbojanongmé; cucuátšeca tbojánbojajo y tbojaníyana: —Aíne sëntseboše. ¡šocana cbotsebojuaná ca!

42 Y cachora chë šocana tbojtsanóbojuanañe y tšabá yojtsatsmëna. 43 Chora Jesús chábíoye tbojtanicmó, pero puerte mëntšá tbojanmandá: 44 —Mouena; ndocnábeñe quem soye cattsecuëntaye; nÿe Jerusalenoca báchnëbióye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyíne tojanmandacá, Bëngbe Bëtsábíoye chama jëtschuayama, chca, nÿetsca entšanga chamotatšëmbona mora ya tšabá cojtsatsmënama ca.

45 Pero chë boyabásana, chentsana tojëftsanbocna y cachora yojóntša nÿetsquënache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena luarënguiñe yojánana; pero nÿets luarëngocana chábióye entšanga imojánashajuana.

2

*Jesús, can'ye jama ndobenábioye tbojanshná**(Mt 9.1-8; Lc 5.17-26)*

¹ Chentšana, Jesús Capernaumoye tojtanashjango; y entšanga imojátatšëmbona, Jesús yebnentše yojtsatsmënama. ² Mallajta entšanga chentše tmojanóoto; chë causa chë yebnentše ya tondaye más luare entšangbiamá yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiyenaye. ³ Chora tojanopasá, canta boyabásenga tmojánashjango, can'ye entšá jama ndobená imojtsaismana. ⁴ Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango. ⁵ Jesús tojánin'ye chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: ⁷ “¿Ntšámoyeca quem boyabása chca yojt-sichamo? Jesús ndoñe tšabá Bëngbe Bëtsabiamá quenátichamo; mo chábioye cuafjyenguangcá entsemna. Ndocna entšá quenátobena ín'yabioye bacna soyëngama japerdónana; n'ye Bëngbe Bëtsana aññe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndayeca chca tšëngaftanga ainaniñe šmojtsejuabná? ⁹ ¿Tšëngaftangbiamá ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? ¹⁰ Y chca, mora atše cbochanjín'yán'yie Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana: ¹¹ “Atše chëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojësebocna. Chama n'yetsca entšanga imojenjananá y Bëngbe Bëtsábioye imojtsatschuanaye, y mëntšá imojtsichamo: “N'ya ndocna te tša bëts soye chemuáisin'ye ca.”

*Jesús, Levíbioye tbojanchembo chabuastama**(Mt 9.9-13; Lc 5.27-32)*

¹³ Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. ¹⁴ Chentšana yojtsataye orna, Jesús tbojánin'ye Levíbioye, Alfeobe uaquiñá, yojtsanotbemañe, entšanga impuesto atjanayacá inëtsotrabajañe. Chora Jesús tbojaniyana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtseyaye, y banga Romocama entšanga impuesto atjanayënga y in'ye bacna entšanga, mesëshentše cán'yíñe imojtsetbiámana, Jesús y chabe uatsjëndayëngaftaca; er ba entšanga cha imojústona. ¹⁶ Chë fariseunga y chë ley abuátambayënga, chë entšangaftaca

Jesús yojtsesama tmojáninÿe ora, chabe uatsjéndaÿengbioye tmojanatjá: — ¿Ndáyeca tséngaftange buatëmbayá, entsanga impuesto atjanayéngaftaca y bacna soye améngaftaca yojtsesá ca?

¹⁷ Jesús chca tojanuena; as mëntśá tojanéjua: —Chë salud tmtsobomñënga, ashnayá ndoñe ntsëjabótana, pero chë šoquëngna aiñe. Y atše ndoñe chiyátabo chë Bëngbe Bëtsabe bominiñe tsábá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama
(Mt 9.14-17; Lc 5.33-39)

¹⁸ Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entsanga Jesúsbioye tmojanobeconá y mëntśá tmojanianya: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndaÿënga ndoñe chca ca?

¹⁹ As Jesús tojanéjua: —Chë casamento fiestentše, chë ófanënga saná ndoñe ntsabuáshebenana. ¿Ntsámo chca ndoñe nántsemna? Chë tojobouamá entsá chëngaftaca tojtsemnëntscuana, chë ófanënga bëtsá jasana y cháftaca oyejuayënga jtsemnana. ²⁰ Pero ora echanjobuache y chë boyabása chëngbentśana mochantsánatseñe; chora cocayé chë ófanënga echántsamna tondaye ntjascá jtsemnana. Ntsámo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjéndaÿëngaftacnaca.

²¹ “Ndocná, canÿe tanguá entsáyá, base tsëm entsëjuaca jtarmëndana; chca tcojamëse, chë tsëm entsëjua jtsabëconana y chë tanguá entsáyá más jtsatanëcanana, y chca, chë uátanëcniñe más bëtsiñe jtsabemana. ²² Y cach ndoñe, chë tojtseshayana vínoye tanguá jasabenguiñe ntjafaftsuámamana; er chë jasabenga jtseshëbëfjuana y chë vínoye jtsabuáshana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámamana; chca, chë jasabenga y chë vínoye josérviana ca” —Jesús tojánayana.

Jesube uatsjéndaÿënga canÿe ochnayté trigo tmojanátabebe
(Mt 12.1-8; Lc 6.1-5)

²³ Canÿe ochnayté, Jesús canÿe jajajana yojtsaye; y chabe uatsjéndaÿënga chëjana imojtsachñëjuana ora, tmojanontśé trigo juatabebiana. ²⁴ Chë fariseungbe chca imojinÿe ora, Jesúsbioye tmojanianya: —Minÿe. ¿Ntsámo acbe uatsjéndaÿënga montsamcá, ndoñe quenátslesenciana ochnayté jtsamama ca?

²⁵ Pero cha tojanéjua: —¿Ndoñe šmëndualía y šmondétatšëmbo ntsámo Rey David y chabe enutënga tmojanmama shëntseca imojtsemna ora y jasama yojtsëjaboto ora? ²⁶ Chca ora, Abiatar chë judiëngbe bachnangbe más uámama amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnana inÿinÿnaye tandëšënga yojase; y chë cháftaca imojánajna entsángnaca yojátsataye. Y chë tandëšna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entsabiama tojama y entsá ndoñe tbonjábema nÿe chë ochnayté ndoñe chaondëtrabajama.

28 Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

3

Chë buashana cucuatše bomna entšá

(Mt 12.9-14; Lc 6.6-11)

1 Chentsana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná. 2 Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. 3 Chora Jesús chë buashana cucuatše bomnábioye tbojaniana: —Chentše, entsangbe delante motsa ca.

4 Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

5 Pero chënga ndocá tmonjanjuá, nýe iytëca imojjobiama. 5 Chora Jesús rábiaca y ngménaca chë fariseunga tojanënyañé, chënga ainaniñe josértama ndoñe montseboše causa; y chë buashana cucuatše bomnábioye tbojaniana: —Macuenýañejaná ca.

6 As chë boyabása tojanacuenýañejaná, y chora tšabá chëtša yojtsatamna cach inýetsacá. 6 Pero chë fariseungna, chentsana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

Mallajta entsanga Jesúsbioye tmojanobeconá

7 Chentsana, Jesús chabe uatsjëndayëngaftaca tojanoluare mar béjaye tsa-choye, y Galileocana bëtsá entsanga tmojanasto. 8 Inýe entsángnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanocana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. 9 Jesús chabe uatsjëndayënga tojanëyana: “Motsajna y canye barquësha atšbiama smochjuapróna, tša entsanga ndoñe chašmondëtsatsëntšnama ca.” 10 Er cha banga tojanashná, y chë causa, nýetscanga šocana bomnënga chábioye tmojanojuatsëntšená cha jabojuama.

11 Y chë bacna bayëjënga uambayëngna, Jesús tmojinýe ora, betscó chabe shecuatsëntše imojtsofshëntsaméntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

12 Pero Jesús puerte tojanamëndá, nda cha bëtsemnama entsangbe delante ndoñe chamondëtsichámuama.

Jesús chë bnëtsana uta uatsjëndayënga tojanabacacá

(Mt 10.1-4; Lc 6.12-16)

13 Chentsana, Jesús canye batsjoye tojántsjua, y ndëmuanýënga tšabá tbojaninýnanënga tojánachembo. Y chëngna chábioye tmojanobeconá. 14 Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entsanga chámabuayenama; 15 y chënga obenana tojanatšatá entsangbentšana bacna bayëjënga jtëbuacanama. 16 Mënga mondména chë bnëtsana uta bocacánënga: Simón, chë ndábioye Pedro ca Jesús tbojanabaye; 17 Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; 18 Andrés, Felipe, Bartolomé, Mateo, Tomás, Santiago, Alfeobe uaquiñá;

Tadeo, Simón chë celote ca uabobainá; ¹⁹ y Judas Iscariote, chë chentšana ndoñe baytesna, Jesús uayayëngbe cucuatšišne bochjanboshjoná.

Ley abuátambayënga tmojánayana, Jesús Satanásbentšana obenana tojanóyëngacñe ca

(Mt 12.22-32; Lc 11.14-23; 12.10)

²⁰ Chentšana, Jesús yebnoye tojtanamáshëngo, y tša entsanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebmna. ²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsen-cuéntaye cha opá tojtsanóbema ca.

²² Y chë ley abuátambayënga Jerusalenocana tmojánashjajnënga Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbiolye obenana tbojatšetá entsángbentšana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontšë jáuyanana, jinýanýiyama chënga canýe ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenáocnama ca? ²⁴ Canýe amëndayábentše entsanga tmojtsenójatá y tmojtsenáyase, chë amëndayana ndoñe ntjatotonana. ²⁵ Cachcá, canýe yebnentše pamíllanga tmojtsenójatá y tmojtsenáyase, chë pamíllanga ndoñe tšabá nyets tempo quemochátmëna. ²⁶ Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátotona; y cha ya ndoñe más chëngbe amëndayá queochátmëna.

²⁷ “Ndocná quenátobena canýe corente añemo bomna entsabe yebnoye jamashënguana y chabe soyënga jtsebocana, ndoñe natsana tconjshëtsebatsëquëse. Nýe tcojshëtsebatsëquëse cocayé cuanjobenaye cha jefcana.

²⁸ “Ndegombre cbéyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiana y inýengbiana ndoñe tšabá tmontsichamo soyëngnaca; ²⁹ pero chë Uámana Espiritibiana ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

³⁰ Jesús chca tojanéyana, er chënga imojtsichamo cha bacna bayëja ibojtsambá ca.

Chë Jesusbe ndegombre pamíllanguentsënga

(Mt 12.46-50; Lc 8.19-21)

³¹ Chëntscuana, Jesusbe mamá y catšátanga choye tmojánashjajna, pero nýe shjoca imojtsemna; y canýa tmojanichmó cha jachembuama. ³² Chë ba entsanga chentše chabe shëconana imojtsetbiámánënga, chora tmojanianya: —Acbe mamá, acbe catšátanga y uabëngana shjoca montsemna; aca cmontsenguá ca.

³³ Chora cha tojanëjua: —¿Nda atšbe mamá yomna, y ndëmuanýënga atšbe catšátanga ca?

³⁴ Chentšana, chë chabe shëconanana tbiámánëngbiolye jarrepárase, tojánayana: —Quemënga mondmëna atšbe mamá y atšbe catšátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamíllanguentsá ca.

4

Chë jenabe cuento
(Mt 13.1-9; Lc 8.4-8)

1 Chentsana, uafjajónaye tsachoca Jesús tojtétanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjajónayentše yojanamna canÿe barquëshoye Jesús tojánasëngo y tojanótbema; y chë entsanga tsachoca imojtsemna. 2 Chora cuentëngaca ba soyëngama tojanabuatambá.

Mëntsá tojanëyana: 3 “Smochjouena; canÿe jená chë jénaye jaujuëshama yojéftsebocna. 4 Yojsëjquëshaye orna, básefta jénaye benache juachañe yojatquëcjana; pero jaja shloftšënga imojástjajna y lempe imojtsósañe. 5 Inÿe meshëngna ndëtsbenguiñe yojuatquëcjana, ndoñe yapa fshantse binÿnentše. Chiñna betso yojuábocna, ndoñe yapa jashenocana fshantse yojanmëna causa; 6 pero yojuábocna orna, puerte yojojëñyána y yojsantca; y yojsábojo yapa tbëtëjënga tondaye causa. 7 Inÿe meshëngna uhmëshangañe yojuatquëcjana; chë uhmashá yojuájua ora, lempe yojsatscué, y chca, chë jénayentsana tondaye yonjuashájona. 8 Pero inÿe meshëngna, uanguaniñe yojuatquëcjana, y bëtsá tsabe shajuanënga chiñe yojóbozna: inÿenache, canÿe meshentsana unga bnëtsana meshënga yojóbozna; inÿenachna, chnënguana bnëtsana meshënga; y inÿenachna patse meshënga ca” —cha tojánayana.

9 Y chentsana, Jesús más tojánayana: “Chë jouenama tmojtsobenënga, smochjouena ca.”

Ndáyeca Jesús cuentëngaca yojánabuatambaye
(Mt 13.10-17; Lc 8.9-10)

10 Chentsana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bëtsayanama. 11 As Jesús tojanëjúa: “Bëngbe Bëtsá tsëngaftanga cmontsinÿanÿná nÿetsca chë mo iytëmcá yomna soyënga chabe amëndayama, pero chë inÿengbioye ndoñe; chë soyëngama chënga lempe cuentëngaca sentsëtsná. 12 Chca, masque becá chamotsafšna, ndoñe chamondobená chë Bëngbe Bëtsabe soyënga jinÿyama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

Jesús chë jenabe cuentama tojanabuayená
(Mt 13.18-23; Lc 8.11-15)

13 Chentsana, Jesús tojanëyana: “¿Quem cuentama ndoñe tmonjósertase, ntšamo chcase nÿetsca cuentëngama cmochjóserta ca? 14 Chë jená endmëna chë tsabe noticiëngama abuayinayá. 15 Básefta entsanga mondmëna mo chë benache juachañe yojuatquëcjana jenaycá. Chëngna Bëngbe Bëtsabiama soyënga jouenana; pero chora Satanás betso jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. 16 Inÿe entsanga mondmëna mo chë ndëtsbenguiñe yojuatquëcjana jenaycá; chëngna Bëngbe Bëtsabe palabra jouenana y oyejuayënga jtsemnana; 17 pero ndoñe nÿets tempo chana jocochájuana; y chca, ndoñe baytë Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿyënga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. 18 Inÿyënga mondmëna mo chë uhmëshangañe

yojuatquécjána jenaycá. Chënga Bëngbe Bëtsabe palabra mochanjouena, ¹⁹ pero quem luarentša soyëngaca oyejuayënga jtsemnana yapa mochántseboše, y nÿe bomnana jëftsebomnana yapa mochanjësenojuabnaye. Chë soyama y inÿe ba soyëngama yapa enócochinÿena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojanancá. ²⁰ Pero inÿenga mondmëna mo chë uanguaniñe yojuatquécjána jenaycá. Chëngna Bëngbe Bëtsabe palabra botamana mochanjouena; nÿets ainánaca mochántseprontana chiñe jtsošbuáchiyama. Mo canÿe betiye becá tsabá tojtseshajuancá, chënga bëtscá tsabe soyënga Bëngbe Bëtsabiama mochántsama. Inÿenga inÿengbiama más bëtscá soyënga mochanjama; y chca, inÿenga mochántsemna mo chë unga bnëtsana meshe tojanshajo jenaycá, inÿenga mo chë chnënguana bnëtsancá, y inÿengna mo chë patse meshënga tojanboté jenaycá ca” —Jesús tojánayana.

Chë uajuinÿanëshama cuento (Lc 8.16-18)

²¹ Mëntšánaca Jesús tojánayana: “Ndocná juiyëbana canÿe uajuinÿanëshama cajonëshe o jutsnëshama tajsoye juajajuama. Ndoñe; uajuinÿanëshama juiyëbana tsbanánaca juajajuama, lempe chaotsebinÿnana. ²² Ndocna yoiytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda. ²³ Chë jouenama tmojtsobenënga, šmochjouena ca.”

²⁴ Y mëntšánaca Jesús tojanëyana: “Tsabá šmochjajuaboye ntšamo šmojtsuenanama. Nÿe batšatema šmojouenëse, nÿe batšatema cmochanjósertaye; pero aiñe tsabá šmojouenëse, chama corente cmochanjósertaye; y Bëngbe Bëtsá echanjama tsëngaftanga más soyëngama chachósertama. ²⁵ Er nda Bëngbe Bëtsabe soyëngama tsabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nÿe batšá ibosertana soyëngama bochantsebnatjëmba ca” —cha tojánayana.

Chë ojuajna jenayama cuento

²⁶ Jesús mëntšánaca tojanëyana: “Bëngbe Bëtsabe amëndayana endmëna mo ntšamo canÿe boyabása jénaye tojuatbontsá ora echandbopasacá: ²⁷ masque cha cada ibeta jtsojajuana y bnëté jotsbanama, ibeta o bnëté, chë jénayentšana juabocnana y juajuana, ntšamo chca yojtsajuajnama chë boyabása ntjatstatsëmbcá. ²⁸ Chë fshantse cachabe ponto jamana ndayánaca chiñe chaójuama; natsana tsuanachëtema jóbocnana, chentšana chë espiga, y chentšana chë meshënga jashájonana. ²⁹ Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

Chë mostaztiye jenayama cuento (Mt 13.31-32; Lc 13.18-19)

³⁰ Jesús mëntšánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? ³¹ Endmëna mo canÿe mostaza jénaye jajoca tojajecá. Ndegombre, nÿetsca quem luarentša jenayëngama, mostaza jénaye chë más básetema endmëna; ³² pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

*Ndáyeca Jesús cuentëngaca entsanga yojanabuayiyná
(Mt 13.34-35)*

³³ Chca Jesús Bëngbe Bëtsabe soyëngama entsanga yojanabuatambá, ba cuentënguentšana, mo chë tmonjouena cuentcá, ntsachetsá chë entsanga josértama tmojobenacá. ³⁴ Tondaye yonjanabuatambá ndoñe cuentëngaca ntsemná; pero chabe uatsjëndayëngna lempe yojanabuayiyná, cányenga tmojtsemna ora.

*Jesús chë binýia y chë béjaye bonguana yojëtsbema
(Mt 8.23-27; Lc 8.22-25)*

³⁵ Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

³⁶ Chorna, chë entsanga jesabáshejuanëse, chë uatsjëndayënga Jesús tmojsanánatsëne, cach yojánenjaquena barquëshañe; y inýe entságnaca inýe barquëshangañe tmojanasto. ³⁷ Chentsana, chë uafjajónaye béjayiñe tša jabuache binýia yojóshjango; olëshënga chë barquëshá imojtsëtsbotsana, y chë causa chë barquëshá yojóntša búyeshéca jtsobuajújtjana. ³⁸ Y chëntscuana, barquëshá stëtsoica, tsëntsenëshañe Jesús yojtsomañe. Chora chë uatsjëndayënga tmojtsanfšená y tmojaniana: —¡Buatëmbayá! ¿Tondayana cmontsentšamna bënga chašotsënatjëmbama ca?

³⁹ As Jesús tojantsbaná, chë binýia tbojanácacana, y chë bëts uafjajónayoye tojánayana: —¡Natjëmbana cochtsemna! ¡Bonguana ca!

Y cachora chë binýia yojëstëtçja, y lempe bonguana yojtsatsmëna. ⁴⁰ Chora chabe uatsjëndayënga tojanëyana: —¿Ndáyeca tša šmojtsauatja? ¿Bëngbe Bëtsá tsëngaftanga jujabuáchama yobenama cabá ndoñe šmontsošbuaché ca?

⁴¹ Chama, chënga puerte auatjanánënga imojtsemna y mëntšá imojtsentšëtsnaye: “¿Nda quem boyabása yomna? Cha tonjayana y chë binýia y chë béjaye tmonjoyeuná ca.”

5

*Chë Gerasa luaroca bacna bayëja uambayá
(Mt 8.28-34; Lc 8.26-39)*

¹ Chentsana, uafjajónaye chenguánoica tmojánashjajna, Geraseno ca uabaina entsangbe luaroye. ² Jesús barquëshoicana tojánastjango, y cachora, chë obanëngbe cuevëshënguentšana canýe entsá, bacna bayëjbe juabna uambayá, tojánbocna y tbojanjëbengo. ³ Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; ⁴ er ba soye cadenëjuangaca y inýe soyëngaca cha nýetsá tmojanbatsëca, pero cha nýetsca soye yojtsátabebe y yojtsenájaca, y ndocná yonjobenaye cha bonguana chaotsemnama. ⁵ Nýets tempo, bnëté y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye. ⁶ Jesúsbioye bënocana tbojáninýe ora, chábioye tojanótjajo y chabe natsanoica yojshëntsamentsiye; ⁷ y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante choimpadá, ndoñe scatjatsetšená ca!

⁸ Chca tbojaniana, er Jesús chábioye tbojaniana: —¡Bacna bayëjbe juabna, chábentšana maisebocna ca!

⁹ Chentsana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtsçanga fsëndmëna causa ca.

¹⁰ Y tša Jesús ibojtserruana chë luarentšana ndoñe chaondëtëbuacanama. ¹¹ Chentša bëconana ba cotšënga imnajena, batsjoca immëtsošañe; ¹² as chë bacna bayëjënga Jesúsbiøye tmojanimpadá: —Chë cotšëngbiøye šmichamó, chëngbeñe fchayamashjna ca.

¹³ Y Jesús añe tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayøye imojtsoshbuetše y yojtsatajo.

¹⁴ Chora, chë cotšënga anyëñënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinýama. ¹⁵ Jesús yojtsemnoye chë entšanga tmojánashjajna ora, tmojáninýe chë tempo bacna bayëjënga uambayá, inëtsothemañe, entsáyá uichëtjoná y chabe nyets juábnaca. Y chë entšanga chama imojtsëuatjaná. ¹⁶ Chë tmojáninýënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. ¹⁷ Chora chë entšanga tmojanontsé Jesús impadánana chë luarentšana chaotsatoñama.

¹⁸ Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. ¹⁹ Pero ndoñe tbojanlesenciá, sinó mëntšá tbojanianyana: “Acbe yebnoye motsatoñe, acbe pamílangbiøye, y cochjácuntaye ndayá Bëngbe Utabná ácaftaca tojamama, y ntšamo cha ácbiøye tmojalastemama ca.”

²⁰ Chentšana, chë entšá yojtsatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyetsçanga imojtsenjanaye.

Jesús canýe shembásabiøye tbojanshná y Jairëbe bembetëmbiøye tbojtanayená (Mt 9.18-26; Lc 8.40-56)

²¹ Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna. ²² Chorna, tojánashjango chë judiëngbe enefjuana yebnentša canýe mandayá, jairo ca uabainá. Jesúsbiøye tbojáninýe ora, chábertše tojanoshëntsamentésé, ²³ y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajájua, salud chauatinyënama y cháuatayenama ca.

²⁴ As Jesús cháftaca tojána; pero bëtscá entšanga imojtséstona, chábiøye imojtsenatsëntšenaye. ²⁵ Chë entšanguentše yojtsaye canýe shembása šocá; cha ya bnëtsana uta uata oboftjajuanánaca inapadecena. ²⁶ Cha puerte tojansufrí, ba ashnayëngbe cucuatšinë, y lempe ntsachetšá inabomncá tojanpochocá jenóshnama; pero ndoñe ibontsatstëcacija, nýe más peor ibojtsobiamnaye. ²⁷ Chë shembása vojouena ntšamo Jesús ba šoquënga tojánashnama, y as stëtšoicana entšangbe tsëntsajana yojobeconá, y Jesusbe entsáyá yo-jauábojajo. ²⁸ Cha chca tojanma, er yojtsejuabnaye: “Masque nýe mo chabe entšáyá sibiájua chaijuábojajo, y salud chantsatsbomna ca.” ²⁹ Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. ³⁰ Chora Jesús yojaséntia chábertšana obenana yojobocnama,

mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

³¹ Chabe uatsjéndayënga tmojanjuá: —Aca contsonyá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

³² Pero Jesús cátoye yojtserreparana jinýama nda tbojánbojuama. ³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojanianyana. ³⁴ Chora Jesús tbojanianyana: —Bembe, Bëngbe Bëtsábeñe icošbuachéyeca shnaná contsasmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetema taitá tmojanianyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsíchamcá ntjatuenancá chë judiëngbe enefjuana yebnentša mandayábioye tbojanianyana: —Ndoñe matauatjana. Nýe Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nýe Pedro, Santiago y Juan, Santiagbe uabentsana, aiñe. ³⁸ Chentsana, chë mandayabe yebnoye tmojánashjajna ora, Jesús tojánanyë entšanga tša imojtsenbouenana, entšanga imojtsošachiye y puerte ngmënaca imojtseyoye.

³⁹ As chë yebnoye tojánamashëngo y chë entšanga tojanëyana: “¿Ndayama tša šmojtzenbouenana y tša šmojtšendëntjana? Chë shembásetema ndoñe chenatóbana, nýe endëtsomañe ca.”

⁴⁰ Pero entšanga nýe imojtsáfchaye. As Jesús nýetsca entšanga shjoye tojtanëbuacna, y tojëftsanëbiatšë chë basetema bëtsëtsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tojanábuacueshache y cachëngbe biyañe tbojanianyana: “Talita, cum ca.” (Chca endayana “Shembásetema, matëtsbaná ca.”)

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entšanga chama imojtsenjnanaye. ⁴³ Pero Jesús corente tojanamëndá ndocnábeñe chama ntsecuëntayana ca, y tojanamëndá chë básetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentsana Jesús tojëftsanbocna y cachabe luaroye tojtanashjango, y chabe uatsjéndayënga cháftaca tmojána. ² Ochnayté tojanobuache ora, Jesús tojanontšé chë judiëngbe enefjuana yebnentšë entšanga jabuátambana.

Chë ba entšanga cha jóyebuambayama tmojanuenënga, imojenjnaná y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatšetà, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabënanagca muentše ndoñe bëngaftaca mondoyena ca?” —chënga imojtsíchamo.

Chë causa chënga tmojanotjayaná, y ndoñe montseboše joyeunayana.

⁴ As Jesús tojanëyana: “Nýetsca luarënguenache canýe Bëngbe Bëtsabe juabna

oyebuambnáyábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canye bëts soye Bëngbe Bëtsabe obenánaca chentše jëftsemana; nye básieta šoquëngbeñe cucuatšënga tojanajó y tojanashná. ⁶ Jesús ojnana yojtsemna cachábentša entsanga chábeñe ndoñe montsanošbuaché causa.

Jesús, chabe uatsjédayënga tojanichamó Bëngbe Bëtsabe amëndayama jábuayenama

(Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. ⁷ Y chë bnëtsana uta uatsjédayënga Jesús tojánachembo, y utáta ínÿoye tojanichamó, entsángbentšana bacna bayëjënga jtëbuacnama obenana jatšatayëse; ⁸ y mëntšá yojáuyana: “Benachiñama tondaye šmattsambaye, nye canye jatjonéjja; ndoñe šmattsambaye saná, ni shecnaja, ni crocénana uasnáncheziñe. ⁹ Nduámanëshche šmochjesóshecohëtjo, y nye canyájua šmochjesíchëtjo ca.”

¹⁰ Mëntšánaca tojanéyana: “Posada chacmojúyentsame yebnentše šmochtsoquedañe inye puebløye játantscuana. ¹¹ Canye luaroye chašmojáshjajna y ndocná posada chacmonjúyentsame, y joyeunayama ndoñe chamontsebošëse, chentšana šmochjésebocana, y shecuatšentša polvëshe šmochjësstoto, chca, chëngbioye jinÿanyiyama chënga ndoñe tšabá tšëngaftangaftaca tmonjamama ca.”

¹² Chentšana, chë uatsjédayënga tmojëftsanbocana y entsanga imojánabuayiyayey, chë tšabe benache chámuatishachama, bacna soyënga amana jtsajbanase. ¹³ Entšángbentšana ba bacna bayëjënga tmojtanebuacna, y ba šoquënga aceitíyeca tmojananëtotjo y tmojanashná.

Ntšamo Juan chë Ubayaná tojanóbana

(Mt 14.1-12; Lc 9.7-9)

¹⁴ Rey Herodes Jesusbiamá yojátatšëmbona, er nyëtsquénache nyëtsca entsanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵ Inÿengna imojtsichamo: “Cha entsemna chë Bëngbe Bëtsabe juabna oyebuambnáyá Elías ca.”

Y inÿengna: “Muana canyá Bëngbe Bëtsabe juabna oyebuambnáyá, mo chë tempsquëngcá ca.”

¹⁶ Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

¹⁷ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentšá Felipe shema. Herodes chë shëmaftaca tojanobouamá, Felipe cabá ainá ora. ¹⁸ Y chama, Heródesbioye Juan ibojánabuayiyayey: “Ndoñe quenátlesenciana acbe uabentsabe shema acbe shema chaotsemnana ca.”

¹⁹ Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, ²⁰ er Herodes yojántatšëmbo, Juan canye nyëtsca

soyënguiñe tšabá amá, nje Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiyiná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. ²¹ Pero Herodías tojáninyëna mocna ora Juan chamóbama. Heródesbe cumpleañ oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entsanga. ²² Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyetsca ófanënga chama tša imojtsóyejuaye. As chë rey, chë tobiášbioye tbojanianyana: —Ndayánaca šmotjañe y atše chochjátšetaye ca.

²³ Y jajúrase, mëntšá tbojanšbuachená: —Ntšamo chašcojotjañcá chochjátšetaye, masque atšbe amëndayentša bomnantšana tsëntsafñaca ca.

²⁴ Chentšana, chë tobiaše yojëftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojujá: —Juan chë Ubayanabe bestšaše ca.

²⁵ Cachora chë tobiaše betso chë rey yojtsemnoye tojtanamáshëngo, y tbojanianyana: —Atše sëntseboše, cam ora Juan chë Ubayanabe bestšaše canye šcnenëšñe chašcuatšeté ca.

²⁶ Herodes chama corente tbojanongmé, pero chë entsangbe delante y jajúrase tbojanšbuachená causa, ndoñe yonjobenaye ntšamo tbojanianyancá jebëuetámenana. ²⁷ Cachora chë rey canye soldado ibojíchmuá, Juanbe bestšaše chauiyëbama. ²⁸ As chë soldado cárceloye tojána, Juánbioye bestšaše tbojšanëštjango, y canye šcnenëšñe tojanamba. Chë tobiášbioye tbojanëntšabuaché, y chana, chabe mamábioye.

²⁹ Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó
(Mt 14.13-21; Lc 9.10-17; Jn 6.1-14)*

³⁰ Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuatambama cha tmojançantá. ³¹ Chora Jesús tojanëyana: “Cuajna ínjoye, entsanga ndoyena luaroye, batsatema jóchnama ca.” Cha chca tojánayana, er tša entsanga imojtsaye y imojtsabëbana; ni mo jasama ndoñe luare imontsebozna.

³² As cányënga barquëshañe tmojtsanoñe, entsanga ndëbínynoye. ³³ Pero chënga imojtsoñama entsanga tmojánanye, y ndëmuanyënga imojamnama imojtsetátšëmbo; chcasna, chë entsanga shecuátšeca betso tmojána, nyetsca pueblënguentšana, y chëngbe natsana choye tmojánashjajna. ³⁴ Chentšana, chë barquëshoicana tojánastjango ora, Jesús ba entsanga tojánanye; chëngbiana tbojanongmé, er imojtsemna mo abuajënña ndbomna oveshëngcá; y tojanontsé ba soyëngama jabuátambana.

³⁵ Ya jetiñe yojtsemna orna, chabe uatsjëndayënga tmojanobobeconá y tmojanianyana: —Ya jetiñe entsemna, y quem luariñe ndocná quenatiyena. ³⁶ Entšanga cuantichamuá, pueblotëmëngoye y inyë luarëngoye chamotsoñama, ndayánaca jasama chamobuámiñama ca.

³⁷ Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojanianya: —Crocénana queftsátsbomna, uta patse denario nÿetsá, chëfta entsangbiamana saná jabuámiyama ca.

³⁸ As Jesús tojanéyana: —¿Bueta tandëse šmojtsebomna? Marrepáraga ca.

Ya imojtsetátsšëmo ora, tmojanianya: —Shachna tandëse y uta beónata fšëntsebomna ca.

³⁹ Chora Jesús entsanga tojanamëndá ínÿoca ínÿoca chamoshëntsjatbiamama. ⁴⁰ As chënga tmojanotbiamana patse patsënga y shachna bnëtsátsanënga. ⁴¹ Chora Jesús chë shachna tandëse y chë uta beónata tojanca, y celoye jontjeshiyëse, Bëngbe Bëtsábioye chama tbojtanchuá. Chentšana chë tandëšënga tojanjatá y chabe uatsjëndayënga tojanayentsbuaché chë entsanga jatsatayama. Y chë uta beónatnaca nÿetscanga tojanëjátaye. ⁴² Nÿetscanga tmojanse jtoshachaye nÿetsá. ⁴³ Y chentšana, chë tandëse y chë beonentsana ojamnëtemënga tmojanatbaná, y bnëtsana uta sbarëcua tmojanajutjé. ⁴⁴ Chë saná tmojansënga imojamna shachna uaranga boyabásënga, shembásënga y básënga ntjacuntacá.

Jesús bėjaye juatsbuacá yojtsaye
(Mt 14.22-27; Jn 6.16-21)

⁴⁵ Chentšana, Jesús chabe uatsjëndayënga tojanamëndá chë barquëshoye jtasjnana, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entsanga yojtichamuá. ⁴⁶ Nÿetscanga tojtanadiošoftá ora, tjoye cha tojt-sanoñe Bëngbe Bëtsáftaca jencuëntama.

⁴⁷ Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca. ⁴⁸ Jesús tojáninÿe chëngbiamana totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, bėjaye juatsbuacá yojtsaye, y ya chëngbiajana nÿe ndericho jachnënguama yojtsemna. ⁴⁹ Y chënga, chë bėjaye juatsbuacá cha yojtsayama tmojáninÿe ora, tmojanjuabó cha canÿe añemëse yojtsemna ca, y tmojanontsé yoyana; ⁵⁰ er nÿetscanga chca tmojáninÿe y cohauatjanánënga imojtsemna. Pero Jesús cachora tojanéyana: “¡Añemo šmochtsebomna; atše Jesús sëndmëna; ndoñe matauatjëngana ca!”

⁵¹ Chorna, chënga imojtsemna barquëshoye cha tojánasëngo, y chë jabuache binÿia tojanëjbana, y nÿetscanga puerte auatjanánënga y ojnánánënga imojtsemna. ⁵² Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnana.

Genesaret ca uabáinoca Jesús ba šoquënga tojanashná
(Mt 14.34-36)

⁵³ Chë uafjajónaye tmojánenashbuachëngo ora, Genesaret ca uabaina lu-aroje tmojánashjajna, y chë uafjajónaye tsachoca chë barquëshu tmojanëtsbua. ⁵⁴ Chë barquëshoicana tmojánastjajna y cachora entsanga Jesús tmojantëmbá. ⁵⁵ Chÿeyca, chë luariñe yebnënguenache betso chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye. ⁵⁶ Y ndayentše cha tojámashëngüentše, puelënguiñe, bëtse puelënguiñe y base puelotëmënguiñana, chë šoquënga benachoye imojtsëbuacana, y Jesús corente imojtseimpadana chë šoquënga chaualesenciá, nÿe mo chabe entsáyá sibuájua juabojajuana. Y nÿetscanga tmojuábojajënga tšabá imojtsatsmëna.

7

*Ndáyeca canýe entsá Bèngbe Bètsabe delante ndoñe tšabia nántsemna
(Mt 15.1-20)*

1 Chentšana, fariseunga Jesúsbioye tmojanobeconá y báseftanga ley abuátambayèngnaca, Jerusalenocana áshjajnénga. 2 Chènga tmojáninýe básefta Jesusbe uatsjéundayènga, cabá ndase ora, ndoñe montsacuentšabiá ntšamo chè judiènga imojanamancá. 3 Er chè fariseunga y nyètsca judiènga imojanamana jtsacuéntšabiana ba soye, ndayá jasama ora, ntšamo chèngbe bèts taitanga imojanamancá. Chènga imojanjuabná, chca jtsamése Bèngbe Bètsabe delante tšábenga jtsatsmènama ca. 4 Chè sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyèngnaca imojánama, pero nýe chèngbe bèts taitanga chca jamana imojanamánayeca, mo chè béjayeca juabáyana tazèsènga, matbajènga, calderèshènga y jutsnèshangá. 5 Chè causa, chè fariseunga y chè ley abuátambayènga Jesú tmojantjá: —¿Ndáyeca acbe uatsjéundayènga ndoñe montsama ntšamo bèngbe bèts taitanga monjanamancá, y montsesá ntsacuéntšabiase, ndoñe ntšamo bènga judiènga fsènduamancá, Bèngbe Bètsabe delante tšabá jtsatsmènama ca?

6 Chora Jesús tojanéyana: —Nýe tšabá chè Bèngbe Bètsabe juabna oye-buambnayá Isaías tšèngaftangbiana tojánayana, bacna entsanga chè ntšamo ndegombre šmojuabnacá ndinýinýnayènga ca, mèntšá enduabemanentše: Quem entsanga mondbètsichamo Bèngbe Bètsá tša tšabia yomna ca; chca nýe

uayášaca,

pero chèngbe ainamentše ndocna tšabe juabnèngaca.

7 Pero chènga nýe bonamente mondbètsichamo Bèngbe Bètsá tša tšabia yomna ca;

chènga nýe entsangbe mandènga jtsabuátambayana, y Bèngbe Bètsabe mandènga ndoñe ca —cha tojánayana.

8 Chora Jesús tojanéyana: —Ntšamo Bèngbe Bètsá tojanmandacá stètsoye tšèngaftanga šmojtsequedá, nýe ntšamo entsanga monduamancá jtsamama ca.

9 Y mèntšanaca tojanéyana: “Tšèngaftanga ntšamo Bèngbe Bètsá tojanmandacá stètsoye jtsequédana, nýe ntšamo tšèngaftangbe anteunga imojanamancá jtsamama. Tšèngaftanga jtsejuabnayana tšabá šmojtsama ca chca šmojtsama ora. 10 Moisés tonjánayana: ‘Acbe bètsètsata ndoñe stètsoye catjáquedaye’, y ‘nda chabe bètsètsatbiana ndoñe tšabá tonjoyebuambá chana, jóbana jtsemnana ca.’ 11 Pero tšèngaftanga šmondbètsichamo, canýe entsá yobena chabe taitá o chabe mamá jáuyanana: ‘Lempe sèndbomna soyènga corbán entsemna, chíyeca ndoñe quetsátobena juajabuáchana ca’ (corbán endayana “Bèngbe Bètsabiana uátšèmbona soyènga ca”). 12 Tšèngaftanga šmondbètsichamo, nda chca tojayanése, ya ndoñe obligacionaca ntsemnana chabe taitá o mamabiana ndayánaca jamama ca.

13 Chca, tšèngaftanga šmontsama entsanga Bèngbe Bètsabe palabra stètsoye chamoquedama, mo tondaye tontsamancá, chè cuenta jtsamama ntšamo anteunga imojanamancá, ntšamo entsángbeñe tempscana y mèntsoñama yochnéjuancá. Y ba soyènga tšèngaftanga cachcá šmontsama ca” —Jesús tojánayana.

14 Chora Jesús, cachiñe entsanga tojtanachembo y tojanéyana: “Nýetscanga smochjouena y chacmèsertá. 15 Ndayá entsá tojtsesacá, ndoñe ntjábemana

ndoñe tšabia Běngbe Bětsabe delante. Inyetsá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Běngbe Bětsabe delante. ¹⁶ Chě jouenama tmojtsobeněnga, šmochjouena ca” —cha tojánayana.

¹⁷ Jesús entšanga tojěftsanabashejuana y yebnoye tojtanamáshěngo ora, chabe uatsjédayěnga tmojantjá ntšamo cha tojánayanama. ¹⁸ As cha tojanéyana: “¿Tšěngaftágnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntsobenana chábioye jabemana ndoñe tšabia Běngbe Bětsabe delante; ¹⁹ er ainanoye ndoñe ntjómashěnguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chě saná ndoñe ntjamana canye entšá bacna soye chaotsamama ca. ²⁰ Y mēntšánaca tojánayana: “Ntšamo chě entšá tojtsejuabná y tojtsoyebuambnacá, chě soye cocayé endobena entšá jabemana ndoñe tšabia Běngbe Bětsabe delante. ²¹ Er ainanocana jtsóbocanana bacna juabněnga: shembásaftaca o boyabásaftaca bacna soye jamama, jatbėbama, jóbama, ²² bacna juabněnga boyá o shėmbioye inyáftaca jáingñama, jtsatbomnayama, nyetsca bacna soyěnga jamama, inyěnga jáingñama, nye cachá jenomándama ntsobencá jtsiyenama, inyábioye jtsántšabošama, inyábiana jtsayátsenayama, jtsenábotamnayama y nye opěnga jtsobiannayama. ²³ Nyetsca quem bacna soyěnga entšabe ainanocana jóbocnana, y cha jabemana ndoñe tšabia Běngbe Bětsabe delante ca” —cha tojánayana.

Canye shembása inye luarocana ashjagoná Jesúsbeñe yojtsošbuaché (Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canye yebnentše tojánamashěngo. Cha yojtseboše ndocná chama chaondětsetatšėmbuama; pero ndoñe yonjobenaye iytėmenana jatsmėnana. ²⁵ Y betesco, canye shembása, canye beme bacna bayějbe juabna uambayá ibnabomná, Jesusbiana oye-buambnayana yojouena ora, chábioye tojánabo y chabe shecuatšentše tojanoshėntsamentšė. ²⁶ Chě shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetėmbentšana bacna bayěja chabuátábocnama. ²⁷ Pero Jesús tbojaniana: —Atše šondmėna natsana judío entšangbiana chě soyěnga jamana; chentšana cocayé chanjobenaye chca inye entšangbiana jamana. Atše acbiana, canye ndoñe judiá, soyěnga stjaměse, nántsemna mo chě básengbe saná quešěnga cuaftšėbuajocá ca.

²⁸ Y cha tbojanjuá: —Arseñor, chca jtsemnana. Pero chě quešěgnaca mondbase chě básenga tmojtsesá ora tmojatquécjanateměnga. Chcasna, Diosmanda átšnacá šmotsajabuache ca.

²⁹ As Jesús tbojaniana: —Tšabá tcjayana; chcasna, acbe yebnoye motatoñe. Chě bacna bayěja acbe bembetėmbentšana tonjėsebocna ca.

³⁰ Chentšana, chě shembása chabe yebnoye tojtaná, y tbojáninýena chě bembetema jutsněshentše yojtsojajoñe, y chě bacna bayěja ya ndoñe chábeñe yontsemna.

Jesús, canye boyabása těsmá y ndėbiábioye tbojanshná

³¹ Tiro pueblentšana Jesús tojěftsanbocna, y Sidón y Decápolis luarentša pueblėnguějiana jachněnguse, Galilea uafjajónayoye tojánashjango. ³² Cha chentše yojtsemna ora, chábioye tmojanánatse canye entšá těsmá y ndėbiá, y

tmojanimpadá chabe cucuatšënga chë šocábeñe chaojájoma, chaboshnama. ³³ Chorna Jesús entšángbentšana luaroye tbojanánatse, cánŷata. Chora chë šocabe matscuašoye ntšabuafjënga yojajué, cucuatšifne yojabuashëtjo, y chë šocabe bichtaja yojábojajo. ³⁴ Chentšana, Jesús celoye tojanontješé, jabuache yojáshachna, y hebreo palabriñe tbojanianyana: “¡Efa ta ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. ³⁶ Y Jesús chë entšanga tojanamëndá chama ndocnábeñe ntsecuéntayana. Pero masque tša chama yojtsamëndaye, entšanga más chabiama imojtsencuéntaye. ³⁷ Chama chë entšanga puerte imojtsenjnanaye, y mëntšá imojtsichamo: “¡Lempe tšabá entsama! Chë tšëmënga chamouenama, y chë ndëbianga chamóyebuambama entsama ca.”

8

Jesús canta uaranga entšanga saná tojanacaredadó (Mt 15.32-39)

¹ Chë tempo, ba entšanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjëndayënga tojánachembo y tojanëyana: ² —Quem entšangbiama šontsengmena, er ya unga te átšeftaca montsemna y mora jasama tondaye quemátsbmoma. ³ Cachënge yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

⁴ As chabe uatsjëndayënga tmojanianyana: —¿Ntšamo nda nanjobenaye quem laurentše, ndocna entšá ndoyenentše, chëfta entšangbiama saná jinŷenama ca?

⁵ Chora cha tojanatjá: —¿Bueta tandëse šmojtsebmoma ca?

Y chënga tmojanjuá: —Canŷšëftaše ca.

⁶ Chentšana, Jesús tojanamëndá entšanga chamoshëntsjatbiamama. Chorna, chë canŷšëfta tandëse tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chëngna chë entšángbioye. ⁷ Básefta beonatémëngnaca innabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entšanga jujátayama. ⁸ Nyëtscanga tmojanse jtoshachaye nyëtšá. Chentšana cabá canŷšëfta bëts sbarëca tmojanajutjë chë ojamnëtemëngaca. ⁹ Chë tmojansënga imojamna mo canta uaranga nyëtšá. Chentšana Jesús chë entšanga tojtanadiošoftá. ¹⁰ Chora Jesús barquëshañe tojánenojayiye chabe uatsjëndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canŷe bëts soye, chabe ndegombre obenana jinŷama (Mt 16.1-4; Lc 12.54-56)

¹¹ Chentšana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canŷe bëts soye chaoma, as jtsetatšëmbuama Jesusbe obenana Bëngbe Bëtsábioyana ndegombre tainóbocanama. ¹² Y Jesús ngmënaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canŷe bëts soye chaimama tšëngaftanga atšbe obenana jinŷanŷiyama ca? Ndegombre chëyana, quem entšanga ndocna chca soye quemochátinŷe ca.”

13 Chorna chë entsanga cachcá tojesanënyá, chë barquëshoye yojtamáshëngo, y uafjájónaye chenguana yojtsoñe.

Jesús tojanabuayená fariseungbe buatëmbana soyëngama
(Mt 16.5-12)

14 Chë uatsjëndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna. 15 Jesús tojanëyana: — Smochtsantjesna; cuedado smochtsebomna fariseunga y Heródesbe levadurama ca.

16 Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

17 Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanëyana: —¿Ndáyeca tandëšama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama? 18 Bominÿe šmondobomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. 19 Chë shachna uaranga entsanga shachna tandëšentsana sënjanëjatá chentsana, ¿bueta sbarëcua chë ojamnëtémëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácia ca.

20 —Y chë canÿsëfta tandëšentsana canta uaranga entsanga sënjanëjatá chentsana, ¿bueta bëts sbarëcua chë ojamnëtémëngaca šmënjanajutjé ca?

Y chënga tmojanjuá: —Canÿsëftácia ca.

21 As Jesús tojanëyana: —¿Y cabá ndoñe cmontsësertana ca?

Jesús canÿe jtanábioye tbojanshná, Betsaida puebloca

22 Chentsana tmojánashhajna Betsaida puebloca; y chora, entsanga canÿe boyabása jtaná Jesúsbioye tmojanánatse, y tmojanimpadá cha jabojuana chabotseshnama. 23 As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojtsanobena ca. 24 As chë jtaná yojontješiyey tojánayana: —Boyabásenga sentsënÿa; mo betiyëngcá montsemna, pero montsobonjná ca.

25 Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyënga botamana jinÿana. 26 Chentsana, Jesús cachabe yebnoye tbojtanichmó y mëntšá tbojaniyana: —Chë puebloye ndoñe catjëftsamashëngo ca.

Pedro tojánayana, Jesús chë Cristo bétsemnama
(Mt 16.13-20; Lc 9.18-21)

27 Chentsana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atšë bétsemnama ca entsanga imojtsichamo ca?

28 Y chënga tmojaniyana: —Inÿenga montsichamo Juan chë Ubayaná ca, ínÿengna Elias ca, y ínÿengna, canÿe Bëngbe Bëtsabe juabna oyebuambnayá ca.

29 As Jesús tojanatjá: —Y tšëngaftangna, ¿nda atšë bétsemnama ntšamo smochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

³⁰ Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

Jesús tojánayana cha ibojamna jóbanana y jtsayenana ca
(Mt 16.21-28; Lc 9.22-27)

³¹ Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entsó tbojanbemá, ibojamna puerté jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Nyëtsanga catafjoser-taycá chama yojtšoyëbuambnaye. As Pedro, Jesúsbioye luaroye tbojanánatse, y tojanontsé jtsáuyanana. ³³ Pero Jesús yojobuértana, chabe uatsjéndayënga tojanëñyanýé, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entsángbentšana ca.”

³⁴ Chentšana, Jesús chabe uatsjéndayënga y chë inýe entsánga tojánachembo chamouenama, y tojanëyana: “Nda atšbe uatsjendayá jtsemnana tojtseboše, cháuyana nýe Bëngbe Bëtsá yobena sempre chabe vidiñe tojmándayana ca, chabe quem luarentša soyënga cachcá chauesonýá atše juastama, y atšbiama jasúfriama chaotseprontana y cruciñe jobanámnaca. ³⁵ Nda tojt-sama quem luarentše bëtscá soyënga jtsebomnana y atšbiama jasúfriama ndoñe tontseprontana, chë nyëtsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe notiçiënga atšbiama abuátambaye causa, masque chaóbana, chë nyëtsca tescama yomna tšabe vida echántsebomna. ³⁶ ¿Ndayama entšá buanjosérvia nyëtsca quem luarentša soyënga jtsebomnana, chë nyëtsca tescama yomna tšabe vida tojtsoperdese? ³⁷ Er canýe entšá chë nyëtsca tescama yomna tšabe vida tojtsoperdese, ndocna soye quenátmëna cha chaobená joyiyama, chë nyëtsca tescama yomna tšabe vida jtsebomnana. ³⁸ Chcasna, nda mora atšbiama y atšbe buayenana soyëngama tojtsëuatja entsángbeñe, chënga chë Bëngbe Bëtsabiamana nduauenanënga y bacna soye amënga, chë Bëngbe Bëtsá Entsó tbojanbemánaca chabiamana echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanëyana.

9

¹ Mëntšanaca Jesús tojanëyana: “Ndegombre chëyana, báseftanga muentše montsemnënga ndoñe quemochatóbana, Bëngbe Bëtsá entsángbeñe chabe obenánaca jabomándama jabana ntjëftsinýcá ca.”

Jesús inýetsá tojanobinýná
(Mt 17.1-13; Lc 9.28-36)

² Chentšana chnénguana tianoye, Jesús tojëftsanëbiatše Pedro, Santiago y Juan, y inýoye tojanënatse nýe chënga, canýe bëts tjoye. Y chëngbe delante Jesús inýetsá tojanobinýná; ³ chabe uichëtjonëjuangá tša yojtšabuashinýinýana; corente uafjantsëjuangá yojtšamna; nýa chca juafjantsama ndocná quem luarentše quentatobenaye. ⁴ Chca orna, chë uatsjéndayënga tmojáninýe, Moisés y Elías tbojanobinýná Jesúseftaca encuéntaye.

⁵ Chora Pedro, Jesúsbiowe tbojaniana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotëmënga: cânÿetema acbiama, ínÿetema Moisesbiama y ínÿetema Elíasbiama ca.”

⁶ Chca tojánayana, chë uatsjëndayënga yapa auatjanánënga imojtsemna causa, y Pedro ndoñe yontsetátësëmbo ntšamo jayanana. ⁷ Chora canÿe jantšetëshe yojóbema, y chëngbiowe yojáutsbotse; y chë jantšetëshoicana canÿe oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeunana ca.”

⁸ Y ndeolpe, chëngbe shëconana tmojanrrepará ora, ya ndocná más tmonjáninÿe; nÿe Jesús canÿa chëngaftaca yojtsemna.

⁹ Chë tjocana imojtsatstsmaye ora, Jesús chë uatsjëndayënga tojanamëndá: —Bëngbe Bëtsá Entšá tbojanbemá obanënguentšana candétayenëntscuana, chë mënté tjoca šmonjinÿe soyama ndocnábeñe šmattsecuëntaye ca.

¹⁰ Chë uatsjëndayënga aiñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. ¹¹ Y Jesúsbiowe imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

¹² As cha tojanëjua: —Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrénguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca. ¹³ Ndegombre chëyana, canÿa Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaohnënguama Bëngbe Bëtsabe uabemana palabrénguiñe endayancá.

*Jesús, canÿe basa bayëjbe juabna uambayábiowe tbojanshná
(Mt 17.14-21; Lc 9.37-43)*

¹⁴ Chentšana, chënga tmojaná chë inÿe uatsjëndayëngbiowe. Chora, Jesús tojáninÿe ba entšanga chë uatsjëndayëngbe shëconana imojtsemnama, y básefta ley abuátambayëngna chëngaftaca imojtsenatsëtsnaye. ¹⁵ Nÿetsca entšanga cha tmojáninÿe ora, imojenjnaná y tmojanótjajo cha jachuyama.

¹⁶ Chora Jesús chënga tojanatjá: —¿Ndayama chëngaftaca šmenatsëtsná ca?

¹⁷ Y canÿa entsanguentsá tbojanjúá: —Buatëmbayá, muentše ácbiowe sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena. ¹⁸ Nÿe ndayéntšnaca cha tojtsemnentše, chë bayëja chábiowe jishachana y jtsenajuáchesënjana; chentše uayoicana shashiye jtsabocanana, jtsenofhtëšfjojnayana y obanacá jtsatsájonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniana.

¹⁹ As Jesús tojánayana: —¡Nÿetšá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

²⁰ Chora chë básetema chábiowe tmojanánatse; y chë bayëja Jesúsbiowe tbojáninÿe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. ²¹ As Jesús chë básabe taitábiowe tbojantjá: —¿Buetayté chca yojtsepása ca?

Y cha tbojanjúa: —Básetema orscana chca; ²² ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabíama jamama tcojtsobenëse, bënga šmotsalastemá y šmotsëjabuache ca.

²³ Chora Jesús tbojaníyana: —¿Ndáyeca “ndayá jamama tcojtsobenëse ca” šcjayuana? Nda Bëngbe Bëtsábeñe tojtsóšbuáchebíama lempe endopodena ca.

²⁴ Y chachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ímá jtošbuáchiyama šmajabuache ca!

²⁵ Y bëtská entšanga imojtsótotoma Jesús tojáninýe ora, chë bacna bayëja tbojtsanbochembo mëntšá: —¡Bacna bayëja, chë básetema tësmá y ndëbiá bi-amnyá; chábentšana maisebocna y ndocna te más chábeñe catjésamashëngo ca!

²⁶ Y chë bayëja chábentšana yojësebocna, yojtseyoye y chë básabioye jabuache ibojeseshatíyíyë; y chë básana mo obanáca tojanoquedá, y chë causa banga imojtsichamo cha obanáca yojtsemna ca. ²⁷ Pero Jesús tbojanábuacushache y tbojtanatsbaná; y chë básana yojtëtsaye.

²⁸ Chentšana, Jesús canýe yebnoye tojánamashëngo, y chabe uatsjëndayënga luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹ Y Jesús tojanjúa: —Chca bayëjenga jtëbuacanamna jobenayana nýe Bëngbe Bëtsáftaca jencuëntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca

(Mt 17.22-23; Lc 9.43-45)

³⁰ Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, ³¹ er cha chabe uatsjëndayënga yojtsabuátambaye. Mëntšá cachabíama yojanëtsëtsnaye: “Bëngbe Bëtsá Entšá tbojanbemá entšangbe cucuatšíñe mochanjáboshjona; mochanjóba, pero chentšana unga tianoye echántayena ca.”

³² Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

¿Nda chë más uamaná yomna?

(Mt 18.1-5; Lc 9.46-48)

³³ Chora Capernaum puebloye chënga tmojánashajna; y cach yebnentše imojtsemna ora, Jesús chë uatsjëndayënga tojanatjá: “¿Ndayama benachiñe šmabáyenatsëtsnaye ca?” ³⁴ Chëngna nýe iytëca tmojanobíama, er benachëjana chënga imnyénatsëtsnaye, chënguentšá nda chë más uamaná bëtsemnana.

³⁵ As Jesús tojanótbema, chabe bnëtsana uta uatsjëndayënga tojánachembo y tojanéyana: “Ndánaca nýetscangbíama chë más uamaná jtsemnana tojtsebošëse, cha chë más nduamaná chaóbema y nýetscanga chaotsaserverna ca.”

³⁶ Chora Jesús canýe básetema tbojánishache, chëngbe tsëntsaca tbojanatsá, tbojantbá y chënga tojanéyana: ³⁷ “Ndánaca, átšbeñe ošbuachiyá bëtsemnayeca, tbojofja canýa mo quem basetemcá, chana atše jofjana; y nda atše šojofja, chora cha nýe atše ndoñe ntjofjana, sinó chë šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana

(Mt 10.42; Lc 9.49-50)

³⁸ Juan, Jesúsbioye tbojaníyana: —Buatëmbayá, bënga fsënjinýe canýe boyabása, y cha aca jótsëmbonëse, bacna bayëjbe juabna entšangbentšana

endëtëbuacana; pero cha bëngaftaca ndoñe quenátsmëna causa, chama fsënjesauyaná ca.

³⁹ As Jesús tbojanjuá: —Ndoñe šmatjuauyaná; er ndocná quenátobena canye bëts soye jamana Bëngbe Bëtsabe obenánaca, atše jótšëmbonëse, y chentšana atšbe contra jatóyebuambnayana. ⁴⁰ Ndegombre, nda ndoñe bëngbe contra tontsemná, bëngaftaca jtsemnana. ⁴¹ Y ndánaca, masque nye býeshtema tšëngaftanga tcmojubuatšatá, tšëngaftanga átšbenga bëtsemnayeca, chábioye Bëngbe Bëtsá canye uacanana soye hochántatšetaye, cha chë tšabe soye tojamama ca.

Resjo yomna, nderado bacna soyënga cuanjama
(Mt 18.6-9; Lc 17.1-2)

⁴² Chentšana Jesús tojánayana: “Canyä átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiamana nántsemna canye bëts nantsnëbé chamotsetamošëntsbua y mar bëjayoye asentoye chamotsashbuetše chabotsenatjëmbama. ⁴³ Nderado acbe cucuatšeca bacna soye tcojama, más tšabá nántsemna chë cucuatše chacotsenacuéstjango. Acbiamana más tšabá endmëna celoye jamashënguana nýetsca tescama vida jtsebojnana, nye canye cucuatše bomná, y ndoñe nýets útátšeca infiernoye chacmotocá jama, chë ndocna te yochanjáfsana iñeshoye; ⁴⁴ chocha útšënënga puerte nýetsca tescama mochanjasúfria. Chëngbioye mochtsasaye mamanga ndocna te quemochatóbana, y chë iñeshe ndocna te queochátšfsana.

⁴⁵ “Nderado acbe shecuaštšeca bacna soye tcojama, acbiamana más tšabá nántsemna chë shecuaštše chacotsenashecuástjango. Acbiamana más tšabá endmëna cosheto celoye jamashënguana nýetsca tescama vida jtsebojnana, y ndoñe nýets útátšeca infiernoye chacmotsëtšena; ⁴⁶ chocha útšënënga puerte nýetsca tescama mochanjasúfria. Chëngbioye mochtsasaye mamanga ndocna te quemochatóbana, y chë iñeshe ndocna te queochátšfsana.

⁴⁷ “Nderado acbe bomínýeca bacna soye tcojinýe y cachca soye tcojama, más tšabá nántsemna chë bomínýe chacotsenobuchjatséca. Acbiamana más tšabá endmëna Bëngbe Bëtsabe amëndayoye jamashënguana nye canye bomínýe bomná, y ndoñe nýets útabeca infiernoye chacmotsëtšena; ⁴⁸ chocha útšënënga puerte nýetsca tescama mochanjasúfria. Chëngbioye mochtsasaye mamanga ndocna te quemochatóbana, y chë iñeshe ndocna te queochátšfsana.

⁴⁹ “Tamó tšabe soye endmëna. Ntšamo chë tamó canye tšabe soye endmëncá, Bëngbe Bëtsá echanjama nýetsca tšëngaftangbiamana tšábenga chašmotsemnana, chë átšbeñe betsošbuáchemana šmojtsepadecena ora šmojuantase. ⁵⁰ Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbojnana, ni saná jatamuama. Mo tšabe tamocá entšangbiamana šmochtsemna, chëngbeñe jtsiyenëse ntšamo Bëngbe Bëtsá yobošcá, y nýetscángaftaca natjëmbana šmochtsiyena ca” —cha tojánayana.

10

Ndayá Jesús tojanabuatambá bouamnënga tmojtšenëtšenama
(Mt 19.1-12; Lc 16.18)

¹ Chentšana, Jesús chë luarentšana tojëtšsanbocna y tojána Judea luaroje y Jordán chenguana. Entšanga cachiñe chábioye tmojánabo, y cha

chënga yojtsabuátambaye, chë ntšamo jamana yojanamancá. ² Básipta farise-unga chábiye tmojanobeconá, y jisháchichiyama mëntšá imojtsetjanaye: —¿Queojtselesenciana canýe boyá chabe shémbiye cachcá jesonýayama ca?

³ Chora cha tojanéjua: —¿Ntšamo Moisés chë soyëngama tcmënjanamëndaye ca?

⁴ Y chënga tmojánayana: —Moisés tojanalesenciá chë boyá chabe shémbiye chabuiyé canýe tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonyá ca.

⁵ Chora Jesús tojanéyana: —Tšëngaftanga Bëngbe Bëtsabe mandënga ainaniñe jýëngacñama ndoñe quešmátsboše causa, Moisés chca tšëngaftanga tcmojéftsanamëndá. ⁶ Pero quem luare jobojátšama orna, “Bëngbe Bëtsá canýe boyabása y canýe shembása tonjánabiamá. ⁷ Chiyeca, chë boyabása chabe taitá y chabe mamá echanjésabashejuana, chabe shémaftaca jenútanama, ⁸ y chë útatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá. ⁹ Chcasna, entšá ndoñe chaondënbema ndayá Bëngbe Bëtsá mo canýiñcá tojéftsema soye ca —cha tojánayana.

¹⁰ Ya cach yebnoca imojtsatsmëna ora, chabe uatsjédayënga cach soyama imojtétstjaye. ¹¹ Y Jesús tojanéyana: “Nda chabe shémbiye cachcá tbojesonyá y ínýaftaca tojtóbouamase, cha chë natsana shémbiye inýe shembásaftaca jtseíngñayana; chana canýe uabuatmá jtsebmomnana. ¹² Y chë shema chabe boyábíoye cachcá tbojesonyá, y ínýaftaca tojtóbouamase, chánaca chë natsana boyábíoye ínýaftaca jtseíngñayana; canýe uabuatmá jtsebmomnana ca” —Jesús tojánayana.

Jesús, basetëmëngbiamá Bëngbe Bëtsábíoye tbojanimpadá

(Mt 19.13-15; Lc 18.15-17)

¹³ Entšanga, basetëmënga Jesúsbiye tmojanënatse, chauabájajuama y Bëngbe Bëtsábíoye chëngbiamá chaboimpadama; pero chabe uatsjédayëngna tmojanontsé chë basetëmënga unachayënga jtsécácanana. ¹⁴ Jesús chca tojáninýe ora, tbojánetna y chë uatsjédayënga tojanéyana: “Cachcá mónýaye chë basetëmënga átšbiye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetemëngcá imomnëngbiamá. ¹⁵ Ndegombre cbéyana, nda Bëngbe Bëtsabe soyënga ndoñe tonjýëngacñe mo canýe basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

¹⁶ Y chë basetëmënga tojanchebá, y chëngbeñe cucuatšënga jajájuase, Bëngbe Bëtsábíoye tbojanimpadá tšabe bendicionënga chëngbeñe chaotsemnama.

Canýe bomna entšá Jesúsbiye tojána

(Mt 19.16-30; Lc 18.18-30)

¹⁷ Jesús jama tojtëtanontsé ora, canýe boyabása chábiye tojanótjajo, chabe shecuatšentse tojanoshëntsamentšé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebmomnana ca?

¹⁸ Y Jesús tbojanjúá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá. ¹⁹ Áca icotátšëmbo Bëngbe Bëtsá tojanmandacá: “Ndoñe catjóba, acbe shema ínýaftaca ndoñe cattseíngñaye, ndoñe catjatbëba, ndoñe catjuaboínýena, ínýengbiye ndoñe catjáingñaye ndayánaca jabacama, y acbe bëtsétsata ndoñe stëtsoye catjáquedaye ca.”

20 Chora chë boyabása tbojanjá: —Buatëmbayá, atše lempe chë mandënga básetema orscana sëndocumplina ca.

21 Jesús bonshanánaca tbojanonýinýe y mëntsá tbojaniana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnëjëmënga cochtsatsataye; chca, celoca canýe bëts bomnana cochántsebomna. Chentsana, cochjabo y šochjuasto ca.

22 Pero chë bobóntsbioye inýetsá ibojtsinýnana Jesús chca tbojanianama; y puerte ngménaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjëndayënga tojanéyana: —¡Puerte totcá entsemna bomnëngbiama Bëngbe Bëtsabe amëndayoye jamashënguama ca!

24 Chca imojouena ora, chë uatsjëndayënga ojnánánënga imojtsemna, pero Jesús cachiñe tojanoyebuambá y mëntsá tojanéyana: —Atšbe básenga; ¡puerte totcá entsemna Bëngbe Bëtsabe amëndayoye jamashënguama!

25 Ndegombre, más paselo endmëna chë coshuffentša atëfñëjana canýe camello chauachnëngo, y ndoñe canýe bomná Bëngbe Bëtsabe amëndayoye jamashënguana ca.

26 Pero chë uatsjëndayënga nýe más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

27 Chora Jesús tojanënyánýe y tojanéyana: —Entšanga ndoñe quemátobena jamana canýa atsbocaná chaotsemnana, pero Bëngbe Bëtsá añe; er Bëngbe Bëtsá lempe jamama endobena ca.

28 Chora Pedro tbojaniana: —Aca contsonýá, bënga lempe chë fsëndbomna soyënga fsënjëseboshjona y ácaftaca fsëntsajna ca.

29 As Jesús tojánayana: —Ndegombre cbëyana, ndánaca átšbioye jasérviana y chë tšabe noticiënga jábuayenama, tojéseboshjona chabe yebna, catšátanga o uabénanga, bebmá o befta, o básenga, o fshantsënga, ³⁰ cha mora quem luarentše echanjóyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínýënga mochántsama; y chë inýe luarocna, chë nýetsca tescama yomna tšabe vida echanjónýëna. ³¹ Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

Jesús cachiñe tojánayana cha jóbana y jtayenama

(Mt 20.17-19; Lc 18.31-34)

32 Chentsana Jerusalenoye imojtsaye, y Jesús yojtsebñatsana. Chë uatsjëndayënga puerte ojnánánënga imojtsemna, Jesús ndauatjá choye yojtsayama; y inýe becá entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjëndayënga barie tojánachembo y tojanontsé jáuyanana ntšamo cháftaca jopásama yojtsemnana. ³³ Mëntsá tojanéyana: “Tšëngaftanga šmontsonýá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšñe mochanjáboshjona, y chënga mochanjayana cha chaóbana ca; y ndoñe judiëngbe cucuatšñe mochanjáboshjona. ³⁴ Chënga mochantsáboyejuana, mochántsebuashëtto, mochántsetjanja y mochanjóba, pero chentsana unga tianoye cha echántayena ca.”

Santiago y Juan, Jesús tmojanimpadá canýe pavor cháubiamama
(Mt 20.20-28)

³⁵ Chora, Santiago y Juan, Zebedeobe uaquiñata, Jesúsbioye tbojanobeconá y tmojanianyana: —Buatëmbayá, bëndata fsëntseboše pavor chaščuabiamama ntšamo chacbojaimpadacá ca.

³⁶ Y Jesús tojanatjá: —¿Ndayá šojtseboše atše tsëndatbiamá chjamama ca?

³⁷ Y chata tbojanianyana: —Aca reycá chacojsemánda ora, cochjaleséncia bëndata fchayobená jótbemana, canýa acbe catsbioica y inýa acbe uañicuayoica ca.

³⁸ As Jesús tojanéjua: —Ntšamo šmontsotjanañama tsëndata ndoñe quešnátstatšëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

³⁹ Y chata tbojanianyana: —Aíñe fchanjobenaye ca.

Y Jesús tojanéyana: —Ndegombre tsëndátnaca atšcá šochanjasúfria, y atšbe causa cmochántsamna bëtscá soyëngama jasúfria. ⁴⁰ Pero atše ndoñe quetsátobena jamándana nda atšbe catsbioica y atšbe uañicuayoica chaótbemama. Chë útentše entsemna ndëmuanyëngbiamá atšbe Taitá tojaprontacá ca.

⁴¹ Chë inýe bnëtsana uatsjëndayënga chca tmojanuena ora, tmojanontšé Santiago y Juánoftaca jotjáyanana. ⁴² Pero Jesús nyetsca uatsjëndayënga tojánachembo y tojanéyana: “Tsëngaftanga šmondétatšëmbo, quem luarentša amëndayënga lempe jtsemándayana, nýa mo nduiñënga cuaftsemncá; y chë bëtsetsa entšanga chëngbe obenánaca jtsemándayana, ntšámnaca jtsamëse, chë inýe entšanga sempre chamotsayaunanama. ⁴³ Pero tsëngaftangbeñe ndoñe chca chaondëtsemna. Inýetšá; masna, nda tsëngaftangbeñe chë más uamaná jtsemnama tojtseboše, cha bontsemna chë ínýenga jtsaservénana; ⁴⁴ y ndánaca tsëngaftanguentšá chë más uamaná jtsemnama tojtsebošá, bontsemna jtsemnana nyetscangbiamá, mo nýe ínýabiamá nyets tempo oservenacá. ⁴⁵ Cachcá, Bëngbe Bëtšá Entšá tbojanbemá ndoñe chenátabo cha chamotseservénama, ndayá ínýenga jabáserviama. Y mo nda, ínýenga játsebacama cuafjopagacá, cha echanjóvana ba entšanga atsebácanënga chamotsemnama ca” —cha tojánayana.

Jesús canýe jtanábioye tbojanshná
(Mt 20.29-34; Lc 18.35-43)

⁴⁶ Chentšana, Jesús y chabe uatsjëndayënga Jericó uabaina pueblöye tmojánashjajna. Y Jesús chabe uatsjëndayëngaftaca y bëtscá entšangaftaca Jericó pueblentšana yojtšaisebocana ora, Timeobe uaquiñá, Bartimeo ca uabainá, canýe jtaná lemošna otjanañá, benache juachañe yojtsetbemana. ⁴⁷ Y Jesús Nazaretocá chëjana yojtšachñëjuanama cha yojátatšëmbona ora, tojanontšé mëntšá uayebuáchana: —¡Jesús, Davídbentšana Entšá, šmotselastemá ca!

⁴⁸ Chorna, banga chë jtaná imojtsácacana iytëca chaótbemama. Pero cha más yojtšáyebuache: —¡Davídbentšana Entšá, šmotselastemá ca!

⁴⁹ Chora Jesús tojantsá y chë ínýenga tojanéyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebonna; motsbaná! Jesús cmontsechembuana ca.

⁵⁰ Y chë jtaná, quefsaíya jtseñatsejquëse, yojontsënja y betscó Jesúsbioye vojobeconá. ⁵¹ Chora, Jesús chë jtanábioye tbojantjá: —¿Ndayá cojtseboše atšbe acbiamá chjamama ca?

Y chë jtaná tbojanjuá: —¡Buatëmbayá, šmoleseñciá atše chašuatábínÿnama ca!

⁵² As Jesús tbojanijana: —Motsatoñe. Tšabá jtsatsmënema Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

11

Jesús Jerusalenoye tojánashjango

(Mt 21.1-11; Lc 19.28-40; Jn 12.12-19)

¹ Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó, ² y mëntšá tojanëyana: “Tsëndatbe natsana entsemna base pueplotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenojayé. Sochjuajafjoná y sochjuánatse. ³ Nderado nda, ¿ndáyeca šmojtsanachá ca? chacmojáltjase, sochjojuá: ‘Bëngbe Utabná bontsájaboto y chora bochantabáiseboshjona ca.’ ”

⁴ As chata tbojána, y tbojáninÿena chë burrotema tsáshenañe, canÿe bësásañe utsbuaná, y imojuajafjoná.

⁵ Y básefta entšanga chiñe imojtsemnënga, chátbioye tmojanëyana: “¿Ndayá šojtsama? ¿Ndayeca chë burrotema šojtsajafná ca?”

⁶ As chata tbojanjuá ntšamo Jesús tojanëyancá; y chë entšanga tmojanalesenciá chë burrotema chamuánatsama. ⁷ Chentšana, chë burrotema Jesúsbioye tmojanánatse; chë burrotëmbeñe chatbe entšayá tbojanájtse, y Jesús chábeñe tojanennojayé. ⁸ Bëtsá entšanga chëngbe entšayá chë benachëjana imojtsanëtëtsatsana, y ínÿengna chë jajoca imojuatëtsetse buacuashangá chiñe imojuacjaye. ⁹ Y chë natsana imojtsajnënga y chë ústonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania pueblöye.

Jesús tojánayana canÿe betiye ndoñe más chaondëshájona ca

(Mt 21.18-19)

¹² Yëfsana, Betaniocana Jerusalenoye chënga imojtšejajna ora, Jesús tbojánishëntsena. ¹³ Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuanáchënga chiñe yojinÿena, chora ndoñe shajo tempo bëtsemna causa. ¹⁴ As Jesús chë higo betiyoye tojánayana: “¡Ndocna te más chacondëshájona entšanga chamosama ca!”

Y chabe uatsjëndayënga imojouena ntšamo cha tojanayancá.

Jesús, Bëngbe Bëtsabe bëts yebnentšana enënga y obuámnyënga tojtanébuacna

(Mt 21.12-17; Lc 19.45-48; Jn 2.13-22)

¹⁵ Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontšé chentšana jtëbuacnana chë chentše imojtsena y imojtsobuámnañënga. Chéntšnaca imojtsemna entšanga canÿe crocénana enënga, y chë crocénana nÿe Bëngbe Bëtsabe bëts yebnentšama inoservena.

Chë entsanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëshëngnaca; ¹⁶ y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. ¹⁷ Y tojanontsé entsanga mëntšá jabuátambana: “Ndegombre, Bëngbe Bëtsabe uabemana palabrënguiñe cha mëntšá tojánayana: ‘Atšbe bëts yebna echantsabaina nyëtsca luarentša entsangbiana átšeftaca encuëntaye yebna ca’; pero tšëngaftagna atbëbanëngbe oyeniñe chë yebna šmojtsebema ca” — Jesús tojanëyana.

¹⁸ Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nyëtsca entsanga imojtsenjanayey ntšamo cha yojanabuátambama. ¹⁹ Pero yojtseibétatana ora, Jesús chabe uatsjëndayëngaftaca chë bëts pueblentsana yosëóbocñe.

Chë higo betiye tojtsanbuashá (Mt 21.20-22)

²⁰ Yëfsana cachëse, cachëjana imojtésachnëjuana ora, tmojáninýe chë higo betiye parejo tbëtëjëngaca yojtsebuashá. ²¹ Chora Pedro yojenójuaboye ntšamo yojopásama; as Jesúsbioye tbojanayana: —¡Buatëmbayá, minýe; chë tconjayana ndocna te más tšabe betiye chaotsemnana betiye tojtsebuashá ca!

²² Y Jesús tbojanayana: —Bëngbe Bëtsabeñe šmochtsošbuáchiye. ²³ Ndegombre cbëyana, nderado nda quem tjoye tojayana, “¡chentsana mojuaná y bëts uafjajónayoye motsëshbuetše ca!” y chca tojayana ainaniñe inýetšá juabna ntjatsbomncá, y ainaniñe puerte tojtsošbuaché ntšamo tojayancá añe yochjochnënguama, ndegombre chca echanjochnëngo. ²⁴ Chíyeca chochanjáuyana, lempe ntšamo Bëngbe Bëtsáftaca chašmojtscuënta ora chašmojtsojtjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmoma. ²⁵ Y Bëngbe Bëtsáftaca chašmojtscuënta ora, šmochjenójuaboye nderado nda ndaye bacna soye tšëngaftangbiana tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. ²⁶ Pero inýa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaaperdonaye ca —cha tojánayana.

Jesube obenana (Mt 21.23-27; Lc 20.1-8)

²⁷ Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobecóna bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, ²⁸ y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšétá ca?

²⁹ As Jesús tojanëyana: —Atšnaca sëntsebmoma canýe soye tšëngaftanga jatjayama. Chašmojojuase, átšnaca chochjáuyana ndaye deréchoca atše chca stsama. ³⁰ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

³¹ Chora chënga tmojanontsé mëntśá enatsëtsnayana: “ ‘Bëngbe Bëtsá ca’ chamojuuase, cha šochanjáuyana: ‘As ĩndáyeca chë cha tmojanabuayená soyënguifne ndoñe šmonjanošbuaché ca?’ ³² Pero ndoñe quemuátobena jayanana ‘entsanga ca’.” Chca tmojánayana, er chënga entsangbiama imojánauatja, er nyëtscanga imojanjuabná, Juan ndegombre Bëngbe Bëtsabe juabna oyebuambnayá yojannama. ³³ Chcasna, chënga tmojanjuá: —Bënga ndoñe queftsátstášëmbo ca.

Y Jesús tojanëyana: —As atše cach ndoñe quebochatëyana ndaye deréchoca atše chca stsama ca.

12

Chë puerte bacna trabájayëngbiama cuento (Mt 21.33-46; Lc 20.9-19)

¹ Chora Jesús tojanontsé cuentëngaca jabuátambana. Mëntśá tojanëyana: “Canýe entsá bëtsá uvas betiyënga yojáje, y chë shëconana yojajëtja. Chë uvasësangá juantsëtetjamna canýe base luare yojajutjo; y canýe tsbanana jebna soye yojapórma chiñe jtsashanýama. Chentšana, inýe trabájayënga chë jajañe yojúyentsame, y chana inýe luaroye yojtsoñe. ² Chë uvasësangá juashacama tempo yojobuache orna, chë jajañe nduiño canýe oservená ibojíchmua chë arrëndayënga jáuyanama ntsachetśá chë nduiño ibojtsotocánama. ³ Pero chëngna, cha imojishache, imojtsejantsetaye, y tondaye ntajatacá imojtichmuá. ⁴ Chentšana, chë nduiño inýe oservená ibojíchmua; pero chana, bestšaše imojtselśia y podesca imojtsóyenguango. ⁵ Chentšana inýa ibojatichmuá, y chana chë arrëndayënga imojtsóba. Y bángnaca yojichamuá; pero chëngna, inýengna imojtsajantsetaye y inýengna imojtsëbaye.

⁶ “Chë nduiño cabá canýa ibojtsábojamna jíchmuama: cachabe bonshana uaquiñá. Cabana, cha ibojíchmua y mëntśá yojtsejuabnaye: ‘Atšbe uaquiñá cocayé mochanjóyeunaye ca.’ ⁷ Pero chë arrëndayënga cha imojinýe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’ ⁸ Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojancuentá.

⁹ Jesús chca jacuéntama tojanpochocá ora, tojánayana: “Y asna, ĩndáyá chë fshantse nduiño yochjama ca? Cha co echanjá y chë trabájayënga echanjetsëbaye, y inýe trabájayënga chë uvas betiyënga jajañe echanjárrendaye.

¹⁰ “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntśá endayana:

Chë yebna jebuanënga tmojtsanaboté ndëtsbé,
mora chë más bëts uashacuanëšentše entsejájona.

¹¹ Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

¹² Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatsëmbona cha chca tojancuentá jinýariñyama chënga mo chë puerte bacna trabájayëngcá imojanmënema. Pero entsangbiama imojtsauatja, chíyeca cachcá tmojanonýa y chentšana imojtsóñenga.

Chë Romoca bëts mandadbiama impuesto jtsatsquécjnayama
(Mt 22.15-22; Lc 20.20-26)

¹³ Chentšana chënga, básefta fariseunga y Heródesbe ústonënga Jesúsbiöye tmojanichamó, ndayá cha tojayaníne jisháchichiyama, as chca jtsebomnama ndaye sóyeca mandadëngbeñe cha mal jaquédana. ¹⁴ Chënga tmojána y Jesús tmojaniana: —Buatëmbayá, bënga fsëndëtatsëmbo aca ndegombre soyënga cnetsabuátambama, y ndoñe jatuenanana nýe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana; y consabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, çtšabá tanántsemana, César, chë Romoca bëts mandadbiama bënga impuesto jtsatsquécjnayana? ¿Fchtsatsquécjnaye o ndoñe ca? —chënga tmojantjá.

¹⁵ Jesús yojtsetátsëmbo, chënga bacna entsanga ntšamo ndegombre tmojuabnacá ndinýinýnayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canýe denario crocénana šmiyëboñe, atše chayobená jinýama ca.

¹⁶ As canýe crocénana tmojanoyé y Jesús tojanëyana: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjúá: —Césarbe jubiá; cha chca enduabaina ca.

¹⁷ Chora Jesús tojanëyana: —Chcasna, César šmoctoyiye cha ibotocana soye; y Bëngbe Bëtsana cha ibotocana soye ca.

Y nýetscanga chama imojenjaná.

Obanënga jtayenama Jesús tmojantjá
(Mt 22.23-33; Lc 20.27-40)

¹⁸ Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniana: ¹⁹ —Buatëmbayá, Moisés tojëftsanabema, nderado canýe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiana básenga jtsabamnama ca. ²⁰ Y chcasna, canýe, canýsëfta catšátanga monjamna. Chë natsaná tonjanobouamá y tontsanóbana básenga ntjëftsabashejuancá. ²¹ Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inýe uabentsáftaca cachcá tonjanopasá. ²² Chca, nýetsca canýsëfta catšátangaftaca cha tonjanobouamá, pero ndocná básenga ntjëftsabáshejuananana. Y chentšana chë shembásanaca tontsanóbana. ²³ Y morna, chë obanënga chamojtayena ora, çndabe chë canýsëfta catšatanguentšabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

²⁴ As Jesús tojanëyana: —Ntšamo Bëngbe Bëtsabe uabemana palabrenguñe endayancá ndoñe tmonjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. ²⁵ Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. ²⁶ Y chë obanënga jtayenama, çMoisesbe librësañe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.” ²⁷ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá

Bëngbe Bëtsáftaca mondoyena. Tšëngaftanga canýe ndoñe ndegombre soyiñe šmontsemna ca —tojanéyana.

Chë más bëts uámana mando
(Mt 22.34-40)

²⁸ Chentše yojtsemna canýe ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

²⁹ Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nýe canýe Bëngbe Utabná endmëna, ndocná más. ³⁰ Utabná Bëngbe Bëtsá cochtsebobonshana nýets acbe ainánaca, nýets espíritoca, nýets juábnaca y nýets añémoca.” ³¹ Y chentšana quem inýe mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbioye tbojanianyana: —Buatëmbayá, puerte tšabá tcjayana. Ndegombre yomncá contsichamo, nýe canýe Utabná endmëna y ndocná más. ³³ Y cha jtsebobonshánana nýets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nýetšá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuyama ca.

³⁴ Cha nýets juábnaca tbojanjuama Jesús tojáninýe ora, tbojanianyana: —Batšatema cmontsebuáshbena jtseprontánama, Bëngbe Bëtsá chacolesseniamaca acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

¿Cristo ndabe entsábentšana yomna?
(Mt 22.41-46; Lc 20.41-44)

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndayeca chë ley abuátambayënga mondbëtsichamo chë Uámana Uabuayaná Davidbentšana iuabó ca?” ³⁶ Cach David, chë Uámana Espiritbe mándoca mëntšá tojánayana:

Bëngbe Bëtsá, atšbe Utabná Crístbioye tbojanianyana:

atšbe catšbioica mótbema,

atšbe obenánaca, acbe uayayënga acbe cucuatšifne chamoquedama ch-jamëntscuana ca.

³⁷ ¿Ntšámose Cristo Davidbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanéyana.

Y chë bëtsá entsanga, oyejuayënga imojtsuenana.

Jesús chë ley abuátambayëngbiana tojánayana, chënga ndoñe tšabá montsama
ca

(Mt 23.1-36; Lc 11.37-54; 20.45-47)

³⁸ Mëntšánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogetánana bënëna entsayangaca jtsajnana y jtsebošana tsáshenañe entsanga nýa respétoca chamotsacheuanama. ³⁹ Chë judiëngbe enefjuana yebnënguenache, chë más uámana luarënguifne jtsetbiámanana, y chë fiestënguenache nýa

quëfseroca. ⁴⁰ Pero chënga, viudángbioye chë tmobomna soyënga jtsabacayana, y entsangbe delante tšabá chamotsénÿama, y chëngbioye imojsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiana más chënga echanjácastigaye ca” —Jesús tojánayana.

Jesús yojsésñÿaye chë crocénana quëcñayënga
(Lc 21.1-4)

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentšë, chë crocénana quëcñayëta ndirichiñe; y chë crocénana quëcñayënga yojsésñÿaye. Bëtsá bomnënga becá crocénana imojtsequëcñaye. ⁴² Chora, canÿe viudá ndbomnjëmnaca vojobeconá y nÿe uta crocénana chëtémiñe yojaftsesegóra. ⁴³ Chora Jesús chabe uatsjëndayënga tojánachembo chamobëconama, y mëntšá tojanëyana: “Ndegombre chëyana, quem viudá ndbomnjëma, Bëngbe Bëtsabiana nÿetscangbiana más tonjëftsesegóra. ⁴⁴ Chë bomnënga chë yojsóyentsjamentšana tmonjëftsesegorá, y cabá bomnana imotsóbomñe; y chë viudana tonjëftsesegorá lempe ntsachetšá yobomncá; masque tša ndbomnjëma, chë vida jtsebomnama lempe ntsachetšá yobomncá tonjëftsesegorá ca.”

13

Jesús tojánayana chë Bëngbe Bëtsabe bëts yebna lempe mochjánpochocama
(Mt 24.1-2; Lc 21.5-6)

¹ Jesús Bëngbe Bëtsabe bëts yebnentšana tojëftsanbozna ora, canÿe chabe uatsjendayá tbojanayana: —Buatëmbayá, minÿe, tša bëts ndëtsbenga, y tša botamana bëts yebnënga ca!

² Chora Jesús tbojanayana: —Tšabá cochjinÿe tša botamana bëts yebnënga. Pero muentše ndoñe queochaisoquéda ni mo canÿe ndëtsbé inÿebé juatsboye. Lempe mochantsepochóca ca.

Ntšamo yochtsemna quem luare jopochócama te chaojtsobeco ora
(Mt 24.3-28; Lc 21.7-24; 17.22-24)

³ Chentšana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, ⁴ ntšamo cha tojanayancá ntseco yochjanopásama, y chca jopásama ya tojtsobecuama entsanga chamotsetatšëmbuama, ndayá Bëngbe Bëtsá yochjanma ca.

⁵ Chora Jesús tojanëjua: “Cuedado šmochtsebomna ndocná chacmondáingñema. ⁶ Banga mochanjabo y mochantsabíchamo chënga Jesús imomna ca. Mochántschamo: ‘Atše chë Cristo sëndmëna ca’, y chca, ba entsanga mochanjáingñaye.

⁷ “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna. ⁸ Canÿe luarentša entsanga inÿe luaroca entsángaftaca mochántentsjanaye, y canÿe amëndayábentša entsanga inÿe amëndayábica entsángaftácnaca; ba luarënguenache fshantse echanjuangmëmëna y bëts shëntsana echanjóshjango. Masque chca jasúfriase, más chcoye cabá más mochanjatssúfia.

⁹ “Pero tšëngaftangna cach tšëngaftangbiama šmochtsantješna; entšanga cmochanjíshêche y amëndayëngbe cucuatšíne cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntšamo átšbiana šmotatšëmbcá chašmuayanama. ¹⁰ Er entseyta, quem luare cabá ndopochóca ora, Bëngbe Bëtsabe tšabe noticiënga nÿetsca luarënguentša entšangbioye chaóshjanguama. ¹¹ Y inÿëngbe cucuatšíne jabáshejuanama chacmojtšënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cânÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

¹² “Canÿe catšata cachabe catšata inÿëngbe cucuatšíne bochanjáboshjona chamotsóbama, y bëtšetsanga cachëngbe básenga mochanjábashhejuana chamotsébáyama; y chë básengna chëngbe bëtšetsangbe contra mochántsemna y chamotsébáyama mochanjábashhejuana. ¹³ Atšbe ústonënga bétsemna causa, nÿetsca luarënguentša entšanga cmochantsëbuayëñja; pero nda nÿets tempo átšbeñe ošbuachiyá totsomñe, atsbočaná echántsemna.

¹⁴ “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnana inÿoca tšëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta; ¹⁵ chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; ¹⁶ y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. ¹⁷ ¡Tša lastema chë tempo ngomámanënga o ochóchaye šesonga chamojtsabamna shembásëngbiama! ¹⁸ Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, ¹⁹ er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngménana ndoñe ntjamnana. ²⁰ Chë puerte ngménana tempo, yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondëtsemnama.

²¹ “Chora nderado nda chacmojáuyana: ‘Minÿe, muentse chë Cristo entsemna’, o ‘Choca cha entsemna ca’, chë soyëngama ndoñe šmattsayaanana. ²² Er mochanjábocana ndoñe ndegombre uámana ubuáyanënga, chënga Cristo imonna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëtš soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca. ²³ ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanëyana.

*Bëngbe Bëtsá Entšá tbojanbemá quem luaroye echanjésabo
(Mt 24.29-44; Lc 21.25-36)*

²⁴ Mëntsánaca Jesús tojanëyana: “Pero chë tempo, entšanga puerte chamo-
jasufrí chentsana, shinÿe ndoñe queochátšbuashinÿinÿyana, juashcona ndoñe

queochátsbinÿnaye, ²⁵ celocana estrellënga echanjatquécjana, y quem luar-entša tsbanánoca espíritënga obenana bomnënga echanjángmëmana. ²⁶ Y chora, entsanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe. ²⁷ Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyëts luarëngocana, quem fshantsoca cánÿoica juachoicana, celoca inÿoica juachóntscofië.

²⁸ “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaisëjotsana, jtsotatsëmbuana chë tšabe tempo ya tojtsaisobecuama. ²⁹ Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama yojtsemnama. ³⁰ Ndegombre cbëyana, lempe chca echanjochnëngo, morsca entsanga cabá ndóbana ora. ³¹ Celoca y quem luare echanjopochóca, pero atšbe palabra ndocna te queochaisopochóca.

³² “Pero Bëngbe Bëtsá Entšá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³³ “Chíyeca, cuedado šmochtsebomna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entšá tbojanbemá jésabama tempo. ³⁴ Echántsemna mo canÿe entšacá; chana inÿe luaroye ya jëftseboचना ora, chabe oservënga jëftsamëndana chabe yebna chamotsinÿenama. Cada ona canÿe trabajo jëftsebónÿiyana, y chë shanÿá jëftsemándana botamana chaotsantješnama. ³⁵ Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tséntseto ora, bínÿanoye o cachëse, tšëngaftanga cachcá, Bëngbe Bëtsá Entšá tbojanbemá ntseco jésabama ndoñe quešmátstatšëmbo; ³⁶ ndoñe cuedado šmontsebomnëse, nderado cha nÿe ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta. ³⁷ Chíyeca, ntšamo tšëngaftanga cbochanjauyancá, nyëtscanga chanjáuyana: ¡Puerte cuedado šmochtsebomna ca!” —Jesús tojánayana.

14

Entšanga imojtsejuabnaye ntšamo jamëse Jesús jishachama (Mt 26.1-5; Lc 22.1-2; Jn 11.45-53)

¹ Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseingñase, y jtsóbama. ² Báseftanga imojtsichamo: “Quem fiestëntscuana ndoñe, er nderado entsanga yapa muanjónťša enbouenanana ca.”

Canÿe shembása botamana uanguëře béjaye Jesusbe bestšašniñe tbojan-buešcja

(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása vojúshjango canÿe alabastro jarrëtema jútjena canÿe becá uamana y botamana uanguëtše béjayeca, ena nardana

uanguëtsiye; chana chë jarrëtema yojátsba y chë béjaye Jesusbe bestšašīne tbojanbuešcja. ⁴ Chca tmojáninýe ora, báseftanga chentše imojtsemnënga tmojanotjayaná y mēntsá imojtsenatsëtsnaye: —¿Ndáyeca nýe bonamente chë soye yojtsemna ca? ⁵ Chamna, matmēnjobenanga chë béjaye unga patse denario crocenánama juiyana, y chánaca ndbomnjémënga matmēnjúabuache ca.

Y chë shembásabíama podesca imojtsichamo.

⁶ Chora Jesús tojanéyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbíama tšabe soye tonjama. ⁷ Er ndbomnjémënga nýets tempo tšëngaftangbeñe mochanjëftsemna, ndayténaca šmojábošëna ora, šmatjobenaye tšabe soye chëngbíama jamana; er atše tšëngaftangaftaca ndoñe nýets tempo quichásemna. ⁸ Quem shembása lempe ntšamo tojobenacá atšbíama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora. ⁹ Ndegombre cbéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyiná chentše, ntšamo quem shembása tojamámnaca becá mochanjëftšóyebuambaye, chca, entšanga chabíama chamotšenójuabnama ca —cha tojanéyana.

Judas tojána bachnangbe amëndayëngbiøye, Jesús chamuishachama
(Mt 26.14-16; Lc 22.3-6)

¹⁰ Chentšana, Judas Iscariote, canýe chë bnëtsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšīne jaboshjonama. ¹¹ Chca tmojanuena ora, chënga imojóyejuaye y tmojanšbuachená crocénana jtabuényana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšīne jaboshjonana.

Jesús chabe uatsjëndayëngaftaca Bashco saná tojanse
(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatšenté, chë levadúraca ndëpormana tandëse sayté, chë uatsjëndayënga Jesús tmojantjá: —¿Ndémoca cojtseboše bënga fchajprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canýe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

¹³ As Jesús uta chabe uatsjëndayata tojanichamó y mēntsá tojanéyana: —Chë bëts puebloye motsata. Chašojáshjango ora, canýe bacó cmochanjóbiatše, matbajiñe búyeshe echantsabuymbaye; cha sochjuasto y sochtserparana ndëmuanýe yebnentše yochjámashënguama; ¹⁴ y chë yebna nduiño sochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?” ¹⁵ As cha cmochanjínýanýiye canýe bëts tsañe, tšbanana pisoca, lempe prontániñe; chentše sochjapronta bënga mochjasama ca.

¹⁶ As chë uatsjëndayata tojána y tbojáninýena lempe ntšamo Jesús tojanéyancá; y chentše chë Bashco saná tbojanprontata.

¹⁷ Tojanibétata ora, Jesús chë yebnoca tojánashjango, chabe bnëtsana uta uatsjëndayëngaftaca. ¹⁸ Y mesëshentše imojtsesaye ora, Jesús tojanéyana: —Ndegombre cbéyana, canýa tšëngaftanguentsá, átšëftaca entsesá cha, uayayëngbe cucuatšīne sochanjáboshjona ca.

19 Chorna chë uatsjédayënga ngménaca imojtsemna, y tmojanontsé canjányä cha jatjayana: —¿Atše chtsemna ca?

20 Y Jesús tojanëjua: —Canýa chë bnëtsana utatentsá entsemna. Chabe tandëse cach atše sëntsefchecuacná šcnenentše cha entsefchecuacná. 21 Ndegombre, Bëngbe Bëtsá Entsá tbojanbemáftaca echanjopása ntšamo chabiana Bëngbe Bëtsabe uabemana palabrënguiñe endayanca. Pero, jtša lastema chë bochjáboshjonabiana! Chabiana más tsabá manjamna ndoñe ntjónýnana ca —Jesús tojánayana.

22 Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjédayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

23 Chentšana, canýe coptema vínoyeca tojanaca, Bëngbe Bëtsábioye tbojtanchuá, chabe uatsjédayënga tojanëšasé, y nýetscanga tmojanofsé. 24 Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamotsetatšëmbuama ntšamo Bëngbe Bëtsá entsanga tojašebuachenacá ndegombre yochjochnënguama. Chë buiñe bëtscá entsangbe tsabiana echanjuábuashana. 25 Y ndegombre cbëyana, morscana ya ndoñe más chë uvasësentšana obocniye quichaisofsiye. Chë tsëm vínoye tsëngaftangaftaca chanjofsiye, Bëngbe Bëtsabe amëndayoca chamojtsemna ora ca” —tojánayana.

Jesús tojánayana, chábioye ndoñe bonjanabuátma ca Pedro yochjányanama (Mt 26.30-35; Lc 22.31-34; Jn 13.36-38)

26 Bëngbe Bëtsábioye jëtschuayama tmojancantá chentšana, Olivos tjashoye tmojëtsanbocana. 27 Jesús tojanëyana: —Nýetsca tsëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguiñe, cha mëntsá tojánayana: “Chë oveshënga abujajënyä chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chašmojishache ora. 28 Pero obanënguentsana chaitayenentsana, tsëngaftangbe natsana Galileoye chanjá ca —cha tojanëyana.

29 Chora Pedro tbojanayana: —Masque nýetscanga áceñe ošbuáchiyana chamotsobuetše y chamotsacheta, atše nýa ndocna te ca.

30 Chora Jesús tbojanayana: —Ndegombre cbëyana, cam ibeta, ngallo cabá uta soye ndécánta ora, aba unga soye cochanjayana ndoñe šconduabatma ca.

31 Pero Pedro más vojtsichamo: —Masque chašotsemna ácaftaca jóbanama, atše ndoñe quichátayana ndoñe chonduabatma ca.

Y nýetscanga cachcá imojtsichamo.

Getsemaní luarentše Jesús, Bëngbe Bëtsáftaca tbojanencuentá (Mt 26.36-46; Lc 22.39-46)

32 Chentšana, canýe luare Getsemaní ca uabáinoye tmojána. Chocna Jesús tojanëyana: “Muentše motbiana, chëntscuana atše choye chanjá, Bëngbe Bëtsáftaca jencuéntama ca.”

33 Y tojëtsanëbiatše Pedro, Santiago y Juan. Choca cha vojóntša puerte ngménaca jtsemnana y corente cochtsetšenaná. 34 Chëngbioye tojanëyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefsna ca.”

³⁵ Chentšana, Jesús más natsanoye tojana, tojanoshentsamentse y fshantsontsoca tojanotsejbena y Benge Betsabioye tbojanimpada, jopodianese, che tsa japadesa ora ndoñe chaondoshjanguama. ³⁶ Mentsa yojsichamo: “Atshe Taita, aca lempe jamama condobena; tojopodese, cochjama atse japadesama ndoñe chaondetsemnama. Pero ntšamo atse stebošca ndoñe chaondetsemna, sino ntšamo aca cojtsebošca ca.”

³⁷ Chentšana, chabe unga uatsjendayengbioye tojtanabo, y chengna imnetsomañe. Chca tojananyena ora, Pedrebioye tbojaniana: “Simón, ¿cotsomañe? ¿Ni mo nye canye hora jtsefšnama ndoñe tconjobena?”

³⁸ Smochtsefšna y Benge Betsaftaca smochtsencuentaye, bacna soye jamama ndoñe chacmondocohenguama. Tšengaftanga ndegombre smontseboše espíritu Benge Betsa joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Benge Betsaftaca tbojanencuenta, cach palabranga jayanese. ⁴⁰ Yojtabo orna, che uatsjendayenga cachiñe imnetsomañe; chenga imojtsefshetana ocñaye causa, y ndoñe imontsobena ntšamo jojuana.

⁴¹ Chentšana, tojtesaná y tojtanabo ora tojaneyana: “¿Cabá šmotsomañe y šmotsochnañe? Nye nyetsá; hora tojjobuache, Benge Betsa Entsa tbojanbemá bacna soye amenge cucuatšine mochanjáboshjona.

⁴² Motsbananga, cuajna. Minyenga, atse boshjuaná ya entebeconá ca.”

Uayayenga Jesús tmojánishache
(Mt 26.47-56; Lc 22.47-53; Jn 18.2-11)

⁴³ Jesús cabá yojsóyebuambnantsuana, Judas, canye che bnetsana uta uatsjendayenguentsá, tojánashjango y cháftaca ba entsanga espadéjagaca y ngarotbéngaca prontánenga. Chenga imojamna che bachnangbe améndayenga, ley abuátambayenga y judiengbeñe betséjemengca mándayengbe ichmónenga. ⁴⁴ Judas, che boshjuaná, tojanjuabó ntšamo jamana entsanga jinyaniyama ndémua Jesús betsemnana. Chiyeca, yojáuyana: “Nda chajjauámocho, cha echántsemna; smochjishache y cuedáoca smochjuánatse ca.” ⁴⁵ Chcasna, Judas Jesúsbioye tojanobeconá y tbojaniana: “¿Buatémbayá ca!”

Y tbojanámocho. ⁴⁶ Chora che entsanga tmojánishache y tmojanánatse.

⁴⁷ Pero canya chentše Jesúseftaca yojtsemná, chabe espadéja yojosenngboténtšena, y che bachnangbe más uamana améndayabe oservená canye matscaše tbojtsanéstjango.

⁴⁸ Y Jesús che entsanga tojanatjá: “¿Ndáyeca šmojabo espadéjagaca y ngarotbéngaca atse jishachama, mo atse canye bacá uamana entsá cuaftsemncá ca? ⁴⁹ Atše cada te tšengaftangbeñe séndetsemna Benge Betsabe bets yebnocha abuátambaye, y ndocna te choca chešmánishache. Pero tšengaftanga chca átseftaca smontsama, cachcá ntšamo Benge Betsabe uabemana palabranguine endayanca chaotsemnama ca” —tojanayana.

⁵⁰ Chorna, nyetsca uatsjendayenga tmojtsanéuatjaná y tmojtsanacheta, y Jesús cachcá che uayayengaftaca tmojesanonýa. ⁵¹ Canye bobontse Jesúsbioye ibojtséstona, nye canye uafjantse entséjua uichétjoná. Cha che entsanga tmojánishache, ⁵² pero chengbe cucuatšine che entséjua jesáboshjonese, che bobontsna enasá yojsachá.

Jesús tmojanánatse che judiengbe uamana améndayengbioye
(Mt 26.57-68; Lc 22.54-55, 63-71; Jn 18.12-14, 19-24)

⁵³ Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna. ⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanokedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canÿa, nda ndayánaca Jesusbe contra cháuyayana, as jobenayama cha chaóbana ca jayanama; pero ndoñe montsaninÿana. ⁵⁶ Er masque banga Jesusbe contra uayátsenaye soyënga imojtsichamo, nÿetscanga ndoñe cachca soye montsanichamo.

⁵⁷ Báseftanga imojtsaye y mëntšá Jesusbe contra, ndoñe ndegombre betsemncá tmojánayana: ⁵⁸ “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entšangbe pormana yebna, chantsepochoça; y unga tese inÿe Bëngbe Bëtsabe bëts yebna, entšángbeyeca ndëpormana yebna chanjëtšjebocá.’”

⁵⁹ Pero masque chca imojtsichamo, nÿetscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojotsbaná, nÿetscangbe tsëntsaca yojtsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë ache contra montsichamo soye ca?

⁶¹ Pero cha nÿe iyteca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nÿets obenana bomnabe catšbioica chantsetbemana, y celoca jantšetëshiñe chántsaboje ca.

⁶³ Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entšanga šochjátëjeboto Jesusbe contra chamuayanama ca? ⁶⁴ Tsëngaftanga šmonjouena ntšamo chë entšá entsichamcá, y chca Bëngbe Bëtsabiama entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nÿetscanga tmojánayana, cha ndegombre bacna soye yojtsebomna y jóbana ibojtsemna ca.

⁶⁵ Chorna báseftanga tmojanontšé Jesús buashëtjnayana; jubiá imojútsbotse, imojtsejantšetaye y imojtsetjanaye: “¡Momalisiá nda tcmënajantšetá ca!” Y chë Bëngbe Bëtsabe bëts yebnoca josticiëngna imojtsajuebantšetaye.

*Pedro tojánayana Jesúsbioye ndoñe bonjanabuátma ca
(Mt 26.69-75; Lc 22.56-62; Jn 18.15-18, 25-29)*

⁶⁶ Pédrëna, tsmanoca yojtsemna chashjoca. Chora, canÿe shembása, chë bachnangbe más uámana amëndayabe oservená yojáshjango; ⁶⁷ y Pédrëbioye tbojáninÿe ora, cha iñe juachaca yojtsanšbonena, yejuana ibojonÿinÿiye y tbojaninyana: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnatëšertana ca.

Y shjoye, amashjuanóntscoñe yojábocna; y chora canye ngallo yojacánta. ⁶⁹ Chë oservená cachiñe Pédrëbioye tbojáninye y tojanontsé chë ínÿenga jauyanana: —Muánaca Jesusbe uatsjendayënguentsá entsemna ca.

⁷⁰ Pero chana cachiñe tojánayana Jesúsbioye ndoñe bonjanabuátma ca. Chentšana, chë chentše imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntša júrayana— ¡Atse chë entsá ndoñe quetsatabuatma, ndabiamama tšëngaftanga šmonsatsëtsná ca!

⁷² Y cachora chë ngallo uta soyama yojacánta, y Pedro yojenójuaboje ntšamo Jesús tbojaniyanama: “Ngallo cabá uta soye ndëcánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánÿentše tmojánenefjna, nÿetsca chë luarentša más uámama mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšine tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo; ⁴ chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38-19.16)

⁶ Cada Bashco fiesta ora, Pilato yojanamana canye utamená jëtsboshjonana, ndánaca entšanga tmojuabuayaná. ⁷ Chë tempo yojamna canya Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. ⁸ Chora, entšanga tmojánashhajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. ⁹ Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšine tmojánboshjonama. ¹¹ Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiamama Barrabás chabuatsboshjona ca. ¹² Y Pilato tojanatjá: —¿Y ntšamo chjama chë “judiëngbe Rey ca” šmondubobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entšanga tojanëyana: —¿Ndáyeca? ¿Ntšamo cha tojobuachjanuá ca?

Pero chëngna más añëmoca tmojtëtanayebuachena: —¡Motsecrucificá ca!

15 As Pilato, entsángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentsana soldadëngbe cucuatsiñe tbojtánboshjona, chamocrucificama.

16 Chentsana, chë soldadënga Jesús tmojanánatse chë mandadbe bëtse yebnentša chashjoye, y nyetsca soldadënga tmojánachembo chamobéconama. 17 Shbuenda uafjatsenga uinýna entsáyá mo reyca tmojanichëtjo; canýe coronésha tmojanapormá uchmašéfjangaca y tmojanabestšajó. 18 Y chentsana tmojanontsé jachuayana: “¡Bayté judiëngbe Rey cochtsemna ca!”

19 Canýe niñëfjaca Jesús bestšašñe imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. 20 Y chca imnaftsáboyejuanentšana, chë shbuenda uafjatsenga entsáyá tmojtсанabotsca y cachabe entsáyá tmojtanichëtjo, y pueblo chaboye tmojanánatse jacrucificama.

Jesús tmojancrucificá

(Mt 27.32-44; Lc 23.26-43; Jn 19.17-27)

21 Chora, canýe entsá chëjana yojsatashjajuana, Simón ca uabainá, Cirene pueblócá, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); 23 y tmojanabuiyé vínoye mírraca enájubniye, pero Jesús ndoñe yonjuáyëngacñe. 24 Y chentsana tmojancrucificá; y chabe entsayangamna, tsbanánoye tmojanëtšena jinýama ndayá cada ona yochjëtsanácñama.

25 Cachëse, base mošenana ora Jesús tmojancrucificá. 26 Y chabe bestšaše juatsboicna canýe uabemana soye tmojananjo. Chiñe yojëtsayana ndáyeca cha tmojancrucificama, mëntsá: MUA CHË JUDIËNGBE REY ENDMËNA ca.

27 Y cháftaca útata bacna soye ochjajnayátnaca tmojanacrucificá, canýa chabe catšbioica, y inýana chabe uañicuayoica. 28 Chca cháftaca tmojanma, chaochnënguama ntšamo Bëngbe Bëtsabe uabemana palabrenguiñe chabiama iuayancá, mëntsá: “Y chábioye tmonjáninýe mo chë puerte bacna soye amënguentšá canýa cuaftsemncá ca.”

29 Y chëjana imojtsachnëjuana entsanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtsabe bëtse yebna cochtsánenasatajchca y nýe unga tese cochtanjebo, 30 cach aca mentsbocá y cruzocana matastjango ca!”

31 Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha inýenga tojëtsatsebacá, pero cachá jëntsabocama ndoñe quenátobena. 32 ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

33 Nýetsto orscana y las tresëntscoñe, nyets quem luare yojtseibétata. 34 Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

³⁵ Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

³⁶ As chora, canya tojanótjajo, untja vínoyeca canye esponjëshe tojanfchecuacua, canye niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

³⁷ Pero Jesusna, jahuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonýana entsëjua tsëntsaca yojtsenájataye, tsbanánocana fshantoye. Chëjua bënëjua inauamna y chë tsatsëntsaca inaújonýana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentše imojtsemna, bënëcana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé. ⁴¹ Chë shembásengna Jesús tmojanasto y tmojanájahuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

⁴² Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, ⁴³ Pilato yojtsemnoye tojána canye boyabása, José ca uabainá, Arimatea pueblócá; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjcá Pilátbioye Jesusbe cuerpo tbojanotjañe. ⁴⁴ Pilato yojenjnaná Jesús tša betesco yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnana. ⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámabañama. ⁴⁶ Chora, José canye uafjantse lino entsëjua tojanabuamé, Jesusbe cuerpo cruzocana tbojanëstjango, chë lino entsëjuaca tbojanandmaná, y canye cuevëshiñe ndëtsbéñe pormánëshiñe tbojanjájó; chentšana canye ndëtsbé tojansjoná, y chë cuevëshoye amashjuantše tojánachto. ⁴⁷ María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanjájoma.

16

Jesús tojtanayena

(Mt 28.1-10; Lc 24.1-12; Jn 20.1-10)

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtse bėjaye tmojanabuamé, chíyeca jama Jesusbe cuerpo janëtjuama; ² y tmenguse, chë semana bojatséntena, cabá cachëse, shinýe yojábocna ora, chë cuevëshoye tmojána. ³ Imojtsaye ora imojtsayënatšësnaye: “¿Chë cuevëshoye amashjuanentša ndëtsbé nda bochtsabuajuana ca?”

⁴ Pero imojtjësíyey ora, tmojáninýe chë cuevëshoye amashjuanentša bëts ndëtsbé, chentšana juanániñe. ⁵ As chënga choye tmojánamashjna y choye tmojáninýe canye bobontse bën uafjantse entsëjua uichëtjoná, chë

cuevëshentša catšbioica inétsotbemañe; y chë shembásenga imojouatjaná. ⁶ Pero chë bobontse tojanéyana: “Ndoñe matauatjéngana; tšéngaftanga šmondénguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minýenga cha enjëftsejajonentše. ⁷ Motsajna, y Pedro y chë inýe uatsjéndayënga šmochojáuyana: ‘Jesús tšéngaftangbe natsana Galileoye echanjá. Choca cha šmochanjinýe, ntšamo cachá tmojanéyancá ca.’”

⁸ As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaníyana.

Jesús, María Magdalénbioye tbojánëbëbocna
(Jn 20.11-18)

⁹ Jesús tojtanayenentsana, chë semana bojatšenté, Jesús natsana María Magdalénbioye tbojánëbëbocna. Tempo Jesús chábtentsana canýsëfta bacna bayëjénga tojtanébuacana. ¹⁰ Cha Jesúsbioye ainá tbojáninýentšana, tojána Jesúseftaca imojánajnënga chama jaúnayama; chëngna ngmënaca y sachénaca imojtsemna. ¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

Uta ustonata Jesúsbioye tbojáninýe
(Lc 24.13-35)

¹² Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inýa cuaftsemncá. ¹³ Chora chata tbojésanshëcona chë inýenga chama jacúntama; pero chëngna cach ndoñe ndegombre ca tmojanjuabó.

Jesús chë uatsjéndayënga tojanichamó, Bëngbe Bëtsabe soyëngama nýetsquénache jábuayenama
(Mt 28.16-20; Lc 24.36-49; Jn 20.19-23)

¹⁴ Cabana, Jesús chë bnétsana canýe uatsjéndayënga tojánëbëbuacna, chënga imojtsesaye ora; y tojanécácana chë cha ainá yojtsemnana ndoñe ndegombre yontsemna ca tmojánjuaboma y nýets ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

¹⁵ Chentšana Jesús tojanéyana: “Nýets luarëngoye motsajna, y nýetsca entšanga chë tšabe noticiëngama šmochtsabuayiynaye. ¹⁶ Nda chiñe chaojtsóšbuaché y tšéngaftanga chašmojuabaye, cha atsbocaná echántsemna; pero nda ndoñe tontsošbuaché, cha nýets tempo castiganá echántsemna. ¹⁷ Chë átsbeñe ošbuáchiyënga ndegombre soyënga imojtsabuayiynama, entšanga mëntšá mochántsetatšëmbo: atše jótšëmbonëse, átsbeñe betsošbuachéyeca, entšángbentsana bacna bayëjéngbe juabna mochántábocna; tempo chënga ndmabiyañe mochantsóyebuambnaye. ¹⁸ Masque nderado cucuatšinë mëtšcuayënga tmojishache o veneno tmojofšenga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántatsmëna ca” —Jesús tojanéyana.

Jesús Bëngbe Bëtsábioye tojtaná
(Lc 24.50-53)

¹⁹ Běngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Běngbe Bětsabe catšbioica yojtóbema jtsemándayama. ²⁰ Y chě uatsjédayěngna tmojánbocana y Běngbe Bětsabe soyěngama n̄yetsquénache entšanga tmojanabuayená. Cach Běngbe Utabná chěnga yojanějabuáchana, y yojánama entšanga chamotsetatšěmbuama chě buayenana soye ndegombre Běngbe Bětsabe soyěnga bétsemnama, chě uatsjédayěnga běts soyěnga jamama obenana chamotsebonnama cha jtsaměse.

San Lucas

Jabojátsama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá. ² Chē historia juabemamna, chēnga tmojanuena ntšamo Jesusbe uatsjēndayēnga y inye entšanga chabiamna innencuentaycá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšāngbioye tmojanabuayená. ³ As, átsnaca sēnjontsé cuedádoca juanotíciana lempe ntšamo Jesusbiamna imojtsichamcá, tojanobojatšentšana mēntscoñe. Mora šontsinýana tšabá yojsemna acbiamna juabemana ntšamo ndegombre yomncá, uamana taitá Teófilo, chē tijuannoticiá soyēngama, ntšamo ndegombre bēngbeñe tojopasacá. ⁴ Ba soyēnga Jesusbiamna tcmojabuátēmbanga, y atše sēntseboše aca chacotsetátsēmo, ntšamo tcojouencá ndegombre yomnana.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uamana bachnangbe natsana amēndayá). ⁶ Chatna tšabá amata ibnamna Bēngbe Bētsabe bominiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjána ca. ⁷ Básenga tondaye ibonjánabamna, Isabel šešona jtsebomnana ndobena causa, y chatna ya bētsánánata ibojsemna.

⁸⁻⁹ Chē bachnanga Bēngbe Bētsabe bēts yebnentše tmojtsoservena ora, sempre imojanamana jabocacayana, nda tšabá tbojtsonyēná, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnocá, Bēngbe Bētsábentše imojtsoservena orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰ Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye. ¹¹ Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catšbioica. ¹² Zacarías chábioye tbojáninye ora, tojanenjaná y corente uatjana tbojánábuache.

¹³ Chora chē ángel tbojanianyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acbe shema Isabel canye šešona bochántsebomna, boyabásetema, y chana Juan ca cochjuabaye. ¹⁴ Chama aca corente oyejuayá cochántsemna, y bētscá entšanga mochanjóyejuaye acbe uaquiná tojonýnama. ¹⁵ Er cha, Bēngbe Bētsabiamna canye uamana entšá echántsemna. Ndocna te queochaisofsiye vínoye, ni jabuáchiye. Chē Uamana Espiritu chabe ainaniñe echantsemádaye, cha cabá ndonýna orscana. ¹⁶ Banga Israeloca entšanga, ntšamo cha chaojayanama mochanjontsé joye-unayana Bēngbe Bētsá, chēngbe Utabná. ¹⁷ Cha echanjášhango chē Bēngbe Bētsabe Uamana Uabuayanabe natsana, y echántsebomna obenana y canye espíritu ntšamo chē Bēngbe Bētsabe juabna oyebuambnayá Elías inabomncá. Chabe natsana echanjášhango, bētsétsanga chēngbe básengaftaca ndoñe chamondétsentsjanama, y chē nduauenanēnga cachiñe chamotsatsjuabnama

ntšamo chë Bëngbe Bëtsabe bominÿiñe tšabá amënga mondbetsejuabnaycá. Y chca, entsanga cha echantsapróntaye Bëngbe Utabná jabama orscama ca —chë ángel tbojaniana.

18 As Zacarías chë ángelbiöye tbojantjá: —¿Ntšamo atše stjobenaye jtsetatšëmbuana chë scontsatsá soye ndegombre bëtsemnama? Er atše ya bëtšëjema sëntsemna y atše shémnaca cachcá ca.

19 Chora chë ángel tbojanjá: —Zacarías, atše ángel Gabriel sëndmëna; atše Bëngbe Bëtsábíoca sëndoserverna. Cha šonjichmó chë tšabe noticiënga aca jauyanama y juenayama. 20 Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopásá ora, chama tempo chaojtsemna ora, chora jóyebuambayama cochantobene ca.

21 Chë ángel Zacaríaseftaca yojtsóyebuambnantscuana, entsanga shjoca Zacaríasbiana imojtsobátmana, y mëntšá imojtsejuabnaye: “¿Ndáyeca tša bën Bëngbe Bëtsabe bëtš yebnentše ibojtsobiamná ca?” 22 Zacarías tojtanbocna ora, ndoñe yontsobena chë entsángaftaca jóyebuambayana. Chënga tmojántatšëmbona, chë Bëngbe Bëtsábíöye atschuanayentše Zacarías mo otjenayoquécá Bëngbe Bëtsábíocana canÿe soye tojáninÿyama, er chëngbiöye jatšëmbombonana yojáuyana, ndëbiá yojoquéda causa.

23 Chabe tempo, chë Bëngbe Bëtsabe bëtš yebnentše jtsetrabájayama tojanpochocá ora, Zacarías cachabe yebnoye tojtaná. 24 Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinÿe cach tsoca yebnentše totanoquéda. 25 Cha mëntšá yojsichamo: “Bëngbe Utabná mora atšbiana tojtenojuabó, entsángbentše atšbe ngmënana jtsebojuánama, básenga tondaye béntsabamna causa ca.”

Canÿe ángel tojanabuayená Jesús jónÿyama

26 Isabel chnënguana ishinÿe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, 27 canÿe shembása María ca uabainá jauatsëtsayama. Mariyna cabá boyabása nduabuamná inamna, pero Joséftaca jobouamayama tbojansbuachená. Y Josena, rey Davidbentšana entšá inamna. 28 Chë ángel Mariÿbiöye tojána y mëntšá tbojanчуá: —¡Mouena. Bëngbe Bëtsá tšabe bendición acbiana tonjama! ¡Bëngbe Utabná ácaftaca entsemna ca!

29 Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

30 Chora chë ángel tbojaniana: —María, ndoñe matauatjana, Bëngbe Bëtsá entsama tšabe bendicionënga chacotsebomnama. 31 Aca ngomamaná cochanjoquéda y canÿe šešona boyabásetema cochántsebomna, y chana Jesús ca cochjuabaye. 32 Cha puerta echantsámama, y entsangna Bëngbe Bëtsabe Uaquiñá ca chábíöye mochantsábobuatma. Y Bëngbe Bëtsá chë Utabná, chábíöye canÿe rey bochanjábema, ntšamo David yojamncá, 33 y Jacóbëbentšana entsanga nÿetsca tescama echántsamëndaye, y chabe mándayana ndocna te queochaisopochóca ca —chë ángel tbojaniana.

34 Chentšana María chë ángelbiöye tbojantjá: —¿Ntšamo chca yochjopása, cabá ndoñe boyá sëntsebomñese ca?

35 Y chë ángel tbojanjá: —Chë Uámama Espíritu echanjabo nÿets ácebeñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetëšhcá cmochanjaboušbotse; chíyeca chë echanjónÿna šešona Uamaná

echántsemna, y chábioye Bèngbe Bètsabe Uaquiniá ca mochantsábobuatma.
 36 Mouena, Isabel, acbe primá, canye šešona bochántsebomna, masque ya
 bètsananá cha entsemna; chë “šešona ndbomná ca” monjanabobuatmá,
 mora ya chnënguana ishinýe ngomamaná entsemna, 37 er Bèngbe Bètsá
 lempe jamama endobena ca —cha tojánayana.

38 Chora María chë ángelbioye tbojaniana: —Bèngbe Bètsabe oservená atše
 séntsemna. Bèngbe Bètsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

María tojána Isabel jabuáchama

39 Chentšana, María tojanoprontá y tojanochëmo canye pueblöye, Judeoca
 tjañenache luariñe. 40 Chocna cha, Zacaríasbe yebnentše tojánamashëngo y
 Isabélbioye tbojanchuá. 41 Isabel ntšamo María tbojanchuama tojanuena
 ora, Isabelbe šešona chabe uafsbioye tojanobonjó, y chë Uámana Espiritu
 Isabélbeñe tojánamashëngo chabe ainaniñe jtsemándayama. 42 Chcasna, Isabel
 jabuache tojánayana: —¡Bèngbe Bètsá acbiamá más tšabe bendicionënga
 entsama nýetsca shembásengbiamá, y chë cochántsebomna šešonbiámna
 cachcá! 43 Atše mercedo taitatobuajoñe, atšbe Utabnabe mamá
 chašubobuáchama; 44 er atše sënjouena ntšamo šconjachuá, y cachora
 atšbe šešona oyejuayá atšbe uafsbioye tonjobonjó. 45 ¡Aca Bèngbe Bètsábeñe
 tcojošbuaché; cojtsetátšëmbo Bèngbe Bètsá ntšamo tcmojašbuachenacá
 yochjamama; chíyeca puerte oyejuayá cochántsemna ca!

46 Chora María tojánayana:

“Nýets ainánaca Bèngbe Utabná chantsadorana,

47 y Bèngbe Bètsá, atšbe Atsbocayabiamá corente chanjóyejuaye.

48 Bèngbe Bètsá atšbiamá tojtenojuabó, atše chabe oservenëjema.

Er morscana muentša entšanga nýetscanga puerte oyejuayá ca
 šmochantsábobuatma.

49 Bèngbe Bètsá, chë nýets obenana bomná, chabe obenánaca bèts soyënga
 atšbiamá tonjama.

¡Bèngbe Bètsá puerte Uamaná ca entsabaina!

50 ¡Morsca entšanga y más chcoyënga, chábioye yeunanëngbiamá, cha sempre
 bochántsengmena!

51 Cha, chabe obenánaca bèts soyënga tojama,

y chë nýe cachënga bètsëtsanga enobiamnayëngbe juabna tojtsepochojá;

52 reyëngbioye chëngbe mándayentšana tojtsatsatše;

pero chë nýe cachënga bètsëtsanga ndenobiamnayëngbioye, uámanënga
 tojábiamá.

53 Chë shëntseca imomnëngbioye, chamosama bètsá cha tojatšatá,

pero chë bomnëngbioyna tondaye tonjatšatá.

54 Cha tojanëjabuache chabe entšanga Israeloca, chabe oservenënga,

y ndoñe tbonjánebnatjëmbe jtsalastemánana,

55 nýetsca tescama chë Abraham y chábentšana entšángbioye,

ntšamo bèngbe bèts taitanga Bèngbe Bètsá tojanašebuachenacá ca” —cha
 tojánayana.

56 Mariyna unga ishinýe Isabélaftaca tojanoquedá, y chentšana cachabe
 yebnoye tojtaná.

Juan chë Ubayaná tojanonýná

⁵⁷ Isabel jtsešócanama tojanóntšabuache ora, canye šešona boyabásetema tojanonýná. ⁵⁸ Isabelbe juachañe oyenenga y chabe pamíllanga tmojántatsëmbona ntšamo Bëngbe Bëtsá chábiye ibojalastemama, y chama corente Isabelaftaca tmojanoyeuanga. ⁵⁹ Chë šešona posuftayté yojtsebomna ora, tmojánashjango y chëtëmbiye chë más delicadentse base bobachtema tmojantëtse, ntšamo chë judienga imojanamancá. Chënga imojétseboše chë šešónbiye Zacarías ca juabáyana, cach beftcá; ⁶⁰ pero chabe mamá tojanéyana: —Ndoñe. Quem šešona echantsabaina Juan ca.

⁶¹ As chënga Isabélbiye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbiye tmojantjá, ntšamo chë šešona chaotsabainama cha yojtseboše ca. ⁶³ Zacaríasna jatšëmbombonana canye tablëbé tojanéyá y chiñe tojanábema: “Cha entsabaina Juan ca”. Y chë causa, nyetscanga ojnánënga imojtsemna. ⁶⁴ Y cachora Zacarías jóyebuambayama yojtobenaye, y yojontsé Bëngbe Bëtsábiye jëtschuayana. ⁶⁵ Chë juachañe oyenenga nyetscanga tmojanëuatjaná, y Judeoca nyetsca chë tjañenache luariñe entsanga chë soyëngama imojtsencuëntaye. ⁶⁶ Nyetscanga chë soyëngama tmojántatsëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábiye jëtschuayama

⁶⁷ Chë Uámana Espiritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

⁶⁸ “¡Chë Utabná, chë Israeloca entsangbe Bëtsá matschuanga, er cha tonjabo chabe entsanga jabújabuachama y jabátsebacamal

⁶⁹ Cha bochanjíchmuá canye atsebacayá puerte obenana bomná, y cha echántsemna Bëngbe Bëtsabe oservená Davídbentšana entsá;

⁷⁰ ntšamo Bëngbe Bëtsá bayté entsemna, chë chabe juabna oyebuambnayeñgbiajana,

chë chábenga imomñëngbiajana bënga šojanašebuachenacá, mëntšá:

⁷¹ Cha canya bochjanichmuá bëngbe uayayënga y nyetsca uaboyëñjëngbiamá bënga jabátsebacama;

⁷² bëngbe bëtsëtsangbiye jálastemama,

y jenójuaboyama y jamama chabe uámana trato,

⁷³ ntšamo Bëngbe Bëtsá, bëts taitá Abrahámbye tbojanšbuachenacá.

⁷⁴ Cha tbojanšbuachená bëngbe uayayëngbiamá bënga jabátsebacama,

chca, bënga ndauatjácá Bëngbe Bëtsá jaserviama,

⁷⁵ y chabe entsangcá, nyetsca soyënguiñe tšabá amënga, Bëngbe Bëtsabe delante nyetsca te bëngbe vidënguiñe jëftsiyenama.

⁷⁶⁻⁷⁷ Y aca, atšbe básetema, Bëngbe Bëtsabe juabna oyebuambnayá ca cmochantsábobuatma,

entšángbiye Bëngbe Bëtsabe soyëngama cochtsabuayiyinama,

Bëngbe Utabná cabá ndáshjango ora, bacna soyënga amana chamuajbanama; as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

⁷⁸⁻⁷⁹ Bëngbe Bëtsá bënga puerte šualastemánayeca, canya bëngbe juabnënga binýnayá bochanjíchmuá,

bënga chë bacna soyënga causa mo ibetiñcá y obanëngbe luarentšcá vida bomnëngbiöye jabátsebacama, y jabuátambama ntšamo natjëmbana jtsiyenana ca” —cha tojánayana.

⁸⁰ Chë básetema yojontsé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbiöye cha tojáninñanñentscuana. Chentšana, chamuábuatmanamna tojanontsé Israeloca entsángbeñe jóyebuambayana.

2

Jesucristo tojanonñná (Mt 1.18-25)

¹ Chë tempo yojamna canñe Romoca bëts mandado, Augusto ca uabainá; y cha, chë natsanama tojanmandá nñetsca entsanga chamuenábemama. ² Chë soye tojanochnëngo Cirenio ca uabainá Siroca mandado yojamna ora. ³ Chamna, nñetscanga tojanotocá jtangana jenábemëngama, cada ona ndëmoca chëngbe bëts taitanga imojëftsiyena pueblöye.

⁴ As, Joséna Galilea luarentšana Nazaretocana yojëftsebcna y Judeoye, Belén pueblöye, tojtaná. Tempo, Josebe bëts taitá rey David, Belenoca inoyena. Y José, Davidbentšana entsá inámmayecna, choye jenábemama tojtaná.

⁵ Mariäftaca tojána jenábemama, y muana tbojanšbuachená Joséftaca jobouamayama. María ngomamaná yojtsemna, ⁶ y Belenoca ibojtsemnëntscuana, chë ora tbojanóntšabuache jtsešocanama. ⁷ Y chentše María ibojtsebmna chabe natsana šešona, canñe boyabássetema. Posadoca tondaye luare yontsemna causna, chata nñe uacnëngbe átana tambuentše tbojanoquedá. Y Jesús tojanonñná orna, María tbojtanëntsacjuá y canñe bachetémiñe tbojanjáj.

Chë angelotëmënga y chë oveshënga abujëñyanga

⁸ Belén béconana, chë ibeta, oveshënga abujëñyanga shëntsjoa cachëngbe oveshëngaftaca imojtsemna. ⁹ Nñe ndeolpe, Bëngbe Bëtsábíocana canñe ángel tojánëbëbuacna, y Bëngbe Bëtsábentšana corente yojtsebuashinñyana chëngbe shëconániñe. Chama chënga puerte imojochauatjaná.

¹⁰ Chora chë ángel tojanëyana: “Ndoñe matauatjëngana. Sënjabo tšabe soyënga tonjopasama jábuayenama, nñetscanga chamóyejuama. ¹¹ Mora chë David tonjanonñná pueblentše canñe šešona tonjonñná. Cha tšëngaftangbe atsebacayá echántsemna y tšëngaftangbe entsángbiámnaca. Cha endmëna chë Bëngbe Bëtsabe Uámama Uabuayaná, Cristo ca uabainá, y Bëngbe Uabná. ¹² Ndegombre chca entsemnama mëntšá šmochanjátatsëmbona: canñe šešona ntsacjuaná y uacnëngbe bachetémiñe jajoná šmochanjñyena ca” —cha tojanëyana.

¹³ Cachora, celocana mallajta angelënga chë natsana ángelbentše tmojánbocana y Bëngbe Bëtsábíoye mëntšá imojtsatschuanaye:

¹⁴ “¡Bëngbe Bëtsá, celoca entsemná matschuanga!

Bëngbe Bëtsábíoye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

¹⁵ Chentšana chë angelënga celoye tomjësanshëcuana. Y chora chë oveshënga abujëñyanga tmojanontsé jeniyanana: “Belenoye cuajna, chë quem tonjopasá soye jinñama. Ndegombre, Bëngbe Bëtsá chë soye šojanñanñé ca.”

16 As betsko tmojána y tmojánanýena María, José y chë šešonatema ba-
chetémiñe jajoná. 17 Chë šešona tmojáninýe ora, chënga tmojanacuntá
Jesusbe bëtšétsata y chë Inýengbioye, ntšamo chë šešonbiama chë ángel
tojanëyancá. 18 Nýetscanga chë tmojanuenënga tmojanenjaná ndayá chë
oveshënga abuañëýanga imojtsacúntama. 19 Pero Mariyna nýe cachabe
ainanoca quem soyëngama más bën inétsenojuabnañe.

20 Chentsana, chë oveshënga abuañëýanga tmojtaná Bëngbe Bëtšá atschua-
naye, ndayá tmojáninýama y tmojanuena. Nýetsá tojanopasá lempe
ntšamo chë ángel tojanëyancá.

Bëngbe Bëtšabe bëtš yebnoye Jesús tmojanamba

21 Posufta te tojánashjache ora, chë basetémbioye chë más delicadentše base
bobachtema tmojantëtše, Bëngbe Bëtšabe entšá bétsemnama chaotsinýnama,
ntšamo judiënga imojanamancá; y Jesús ca tmojanabaye, ntšamo chë ángel
tbojanianyancá, María cabá ndoñe ngomamaná yontsemna ora.

22 Y chë tempo tojanóshjango, ndaye ora José y María yojtsamna ja-
mana ntšamo Moisesbe leyíñe iuayancá, ndayá jamama yojanmëncá, canýe
shembása Bëngbe Bëtšabe delante tšabia jtsatsmënama, canýe šešona tbojtse-
bomnentšana. Asna, Jerusalenoye tbojánata y chë básetema tmojanamba,
Bëngbe Bëtšabe bëtš yebnoca jinýinýiyama, 23 ntšamo chë Bëngbe Utabná
Moisésbioye tbojaniyé leyënguiñe iuayancá, mëntšá: “Canýe yebnentše chë
natsana šešona boyabása tojtsemnëna, Bëngbe Bëtšábioye cha jinýinýiyana
chábioye chabotseeservénama ca.” Chcasna, chë básetema Bëngbe Bëtšabe
bëtš yebnoye tmojanamba. 24 Y tmojanamba janshana uta shloftše, Bëngbe
Bëtšá jëtšchuayama, ntšamo Bëngbe Utabnabe leyíñe yomandancá. Chiñe
mëntšá endayana: “Chë natsana šešona chaojonýná ora, boyabássetema to-
jtsemnëse, janshana šmochjuamba uta fchetnatémata o uta šešona palo-
matémata, Bëngbe Bëtšá jëtšchuayama ca.”

25 Jerusalenoca inamna canýe bacó, Simeón ca uabainá; cha inamna
nýetsca soyënguiñe tšabá amá, y yojaniyena ntšamo Bëngbe Bëtšá yomandacá.
Cha yojanobátmána chë tempo ndaye ora, Bëngbe Bëtšá bochjanichmuá canýa
Israeloca entšanga cháuatsebacama. Y chë Uámana Espiritu chabe ainaniñe
yojtsemna; 26 chíyeca, cabá lempe chca ndopása ora, cha yojtsetátšëmbo cha
ndoñe yochjanóbanama, chë Bëngbe Bëtšabe Uámana Uabuayaná ntjéftsinýcá.
27 Chë Uámana Espiritu tbojanmandáyeca, Simeón Bëngbe Bëtšabe bëtš yebnoye
tojána; y Jesusbe bëtšétsata chë básetema tmojanamba ora, ntšamo Moisesbe
leyíñe iuayancá chabíama jamama ora, 28 Simeón tbojanocutsá y Bëngbe
Bëtšábioye tbojtanchuá. Cha mëntšá tojánayana:

29 “Bëngbe Utabná, mora šmoleenciá, atše acbe oservená natjëmbana
jóbanana,

er ya tconjama ntšamo šconjansbuachenacá;

30 atše chë entšangbe Atsebacayá sënjinýe.

31 Aca cha tcojichmó nýets luarenache entšangbiama.

32 Cha chë ndoñe judiëngbe juabnënga binýnaya echántsemna;

y chábeyeca, nýets quem luarentše mochanjátatšëmbona, chë acbe
entšangbiama, Israeloquëngbiama ca” —cha tojánayana.

33 José y María ibojenjanata ntšamo Simeón Jesusbiama yojtsichámuama.
34-35 Chentsana, Simeón Bëngbe Bëtšábioye tbojanimpadá tšabe
bendicionënga chata chabotsebomnama chaomama; y María, chë Jesusbe

mamábioye tbojaniana: “Quem soyënga corente cmochanjacochtsetšenaná, mo ainana espadëjaca cuafjenëchnëngcá. Cha Israeloca banga echanjápochocaye y banga echanjãtsebacye; y chca, ntšamo banga ainaniñe imojuabnacá echantsótatsëmbo. Israeloca banga quem básetema mochantsábotena y chabe palabrëngnaca ca” —cha tbojaniana.

³⁶ Chëntsñaca yojtsemna canÿe shembása Bëngbe Bëtsabe juabna oye-buambnaya, Ana ca uabainá; cha yojamna Fanuelbe bembe y Aserbe pamillentsá; ya bëtsananá cha inamna. Nÿe canÿsëfta uata cha yojëftsebouamna; ³⁷ y chabe boyá tojanóbanentsana, cha posufta bnëtsana y canta uata vidá inamna. Ndocna te Bëngbe Bëtsabe bëts yebnentšana yonjábocana, y chentše tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana. ³⁸ Simeón, María y Josébioye yojtsëtsësnaye ora, Ana chëngbioye yojbeconá, y chë Atsebacayá tojanonÿnana Bëngbe Bëtsábioye tbojtanchuá chentsana, Jerusalenoca entšangbioye, chë canÿe atsebacayá Israeloca entšangbiana imojanobatmanëngbioye tojanëyana, chana Jesús yojëtsemna ca.

Jesús Nazaret puebloca

³⁹ José y María lempe ntšamo chë Utabnabe leyënguife iuayancá tbojanma ora, Galilea luaroye tbojtanata, cachëngbe puebloye, Nazaretoye. ⁴⁰ Y chë básetema yojtsobóchaye, y más añemo yojtsejacana y más osertánana yojtsebomna. Y Bëngbe Bëtsá yojánama cha bëtscá tšabe bendicionënga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsëtsata ibojanamana cada uata Jerusalenoye jana Bashco fiestama, chë Bëngbe Bëtsá chë judiëngbe bëts taitangbioye Egiptocana tojánatsebacama jtenójuaboyama fiesta. ⁴² Jesús bnëtsana uta uata tojánashjache ora, Jerusalenoye tmojána, ntšamo imojanamancá. ⁴³ Chë fiesta tojanopochacá chentsana, chabe bëtsëtsata yebnoye ibojtsataye, y chata ntse-tatšëmbcá, Jesusna Jerusalenoca yojtsoquedañe. ⁴⁴ Chata ibojëtsejuabnaye Jesús chë inÿe entšangtaftaca yojtsataboye ca; chcasna, canÿe te nÿetsá benachëjana tbojánata ora, tbojanontsé chabe pamillangbeñe y ubuatmëngbeñe jtsenguanguana, ⁴⁵ pero ndoñe ibonjobenaye jtsinÿenana. As, chata chora Jerusalenoye tbojësanshëcona choca cha jetsenguanguama.

⁴⁶ Unga tianoye chata tbojanobená Bëngbe Bëtsabe bëts yebnentše cha jetsinÿenana. Chana chë Moisesbe ley abuatambayëngbe tsëntsaca inëtsofbemañe, chëngbioye inayaunana, inatjanaye. ⁴⁷ Nÿetsca ouenanënga imojtsenjnanaye Jesús tša osertaná inamnana, y tša tšabá jojuama cha yojtsobenama. ⁴⁸ Chabe bëtsëtsata chca tbojáninÿe ora, chátnaca ibojenjnaná. Chora, chabe mamá tbojaniana: —Uaquifná, ¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

⁴⁹ As Jesús tojanëyana: —¿Ndáyeca atše šmonguá? ¿Ndoñe šondëtatsëmbo atše šomma atšbe Taitabe yebnentše jtsemnana ca?

⁵⁰ Pero chë bëtsëtsata ndoñe tonjanësertá ntšamo cha tojanëyancá.

⁵¹ Chentsana Jesús chë bëtsëtsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inëtseñojuabnañe. ⁵² Jesús yojtsobóchaye y más juabna yojtsebomna; y Bëngbe Bëtsá y nÿetsca entšanga corente oyejuayënga chabiana imojtsemna.

3

*Juan chë Ubayaná entsanga yojanabuayiyiná
(Mt 3.1-12; Mc 1.1-8; Jn 1.19-28)*

¹ Bnëtsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catsata Felipe Iturea y Traconitoca rey, y Lisániasna Abilinioca rey. ² Anás y Caifás chë bachnangbe más uámana amëndayata ibojamna. Cach tempo, canýe luare entsanga ndoyentse Bëngbe Bëtsá tbojanatsëtsá Juánbioye; Juan, Zacaríasbe uaquíñá. ³ As Juan nyetsca luarënguëjana Jordán béjaye béconana tojánachnëngo, entsanga mëntsá utsëtsnaye: “Tšëngaftangbe bacna soyëngama ngménaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojëftsabemcá. Cha mëntsá tojanábema:

Entsanga ndoyena luaroca canýa enduáyebuache:
“Bëngbe Utabná echanjabo ca; mo nda canýe benache tojtseprontacá canýe uámana entšá jashjanguama, cachcá, tšëngaftángraca, Bëngbe Utabná jabama ainanentse tšabe juabnëngaca šmochtseprontana.

⁵ Nyetsca jachañe echantójtjia, y tjañe y batsjabenga mochantenájachibiaye. Chë scundma benachënga ndirichëjënga echantsatsmëna, y chë bacá mana benachënga mochantenájachibiaye.

Mo chë chca tmojtsamëngcá, canýe benache japróntana canýe rey cháuashjanguama, tšëngaftángraca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nyetsca entsanga mochanjinýe chë Atsebacayá Bëngbe Bëtsábentšana jabana ca” —cha tojanábema.

⁷ Chë entsanga Juan chaubáyama imojánbocana ora, Juan yojanëtsëtsnaye: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinýna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiana jayanama: ‘Bëngna Abrahábentšana entsanga, Bëngbe Bëtsabe entsanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahábentšana entsanga nanjábiana. ⁹ Tatšniá ya entsaprontana chë betiyeshënga tbëtëjëngocana jtseshatëtsetšana; Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

¹⁰ —¿Y as, ndayá jamama šojtsamna ca? —chora chë entsanga tmojantjá.

¹¹ Y Juan tojanéjua: —Chë uta quëfsaíya uabomná bontsemna canýiyá jutstayana chë tondaye tonduabomná. Saná bomná bontsemna juajatayana chë tondaye saná tondbomnábioye ca.

¹² Romocama entsángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

13 Y Juan tojanëyana: —Nÿe ntšamo chë leyiñe yomandancá entšángbiöye crocénana šmochtsayëngacaye ca.

14 Básefta soldadëngnaca chábiöye tmojantjá: —¿Ndayá jamama šojtsamna ca?

Y Juan tojanëyana: —Ndocnábiöye tondaye šmatjáboca, ni jauátjanase, ni nÿe ndayámnaca bonamente jobuáchese; y nÿe ntsachetšá šmacaná crocénanaca oyejuayënga šmochtsomñe ca.

15 Entšanga chë Bëngbe Bëtsabe Uámana Uabuayanabiana imojtsobátmana, y chëngna Juanbiana imojtsejuabnaye nderado cha chë Bëngbe Bëtsabe Uámana Uabuayaná nanjamna ca; 16 pero Juan tojanëyana: “Ndegombre, atše béjayeca chondubáyana. Pero chë echanjabá atšbiana corente más obe-nana endbomna, y atše mercedo taitsatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiama, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháuamashënguama. Pero chë ndoñe chamontishachëngbiama, Bëngbe Bëtsá echanjama chë echanjabábeyeca, chëngna corente castigánënga chamotsemnana, mo iñeshequécá. 17 Canÿe entšá chabe mëtštá cucuatšifne jiyëbana, chabe trigo jtsóbobemama, y chë ndoservenana shácuanënga jtsejashtsëtsana. Chabe trigo chë grano uauqëcjnaye tsañe jtsabuájuaana, y chë ndoservenana shácuanëngna iñeshoye jtsatmetšana. Cachcá, chë átšbentšana echanjabá, chë tšabe entšanga echanjúbuaja, y chë bacna entšangna iñeshiñe echantsacastigaye, y chë iñe ndocna te queochátšfsana ca” —cha tojanëyana.

18 Chca y inÿe palabréngaca Juan chë tšabe noticiëngama yojanabuayiyná. 19 Tempo, Juan Heródesbiöye tbojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nÿetsca bacna soyënga Herodes tojanmámnaca. 20 Pero Herodes Juánbiöye joyeunaye luariñna, cabá inÿe más bëts bacna soye tojatanma: Juánbiöye cárceloye tbojtsanëtame.

Juan, Jesúsbiöye tbojanabaye (Mt 3.13-17; Mc 1.9-11)

21 Pero Herodes Juánbiöye cabá ndutame ora, Juan ba entšanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, 22 y chë Uámana Espiritu mo canÿe palomatmcá Jesúsbiöye yojtsastjuaana; y celocana Bëngbe Bëtsá tbojaniyana: “Acna atšbe bonshana Uaquiñá condmëna. Achiana corente sëntsoyejuá ca.”

Jesusbe bëts taitanga (Mt 1.1-17)

23-38 Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontšë ora. Entšanga imojanjuabná Jesús Josebe uaqiñá yojamna ca.

José yojamna Elibe uaqiñá.

Elí Matatbe uaqiñá

y Matatna Levibe uaqiñá.

Leví yojamna Melquibe uaqiñá,

Melqui Janabe uaqiñá

y Jana Josebe uaqiñá.

José yojamna Matatíasbe uaquiñá,
Matatíasna Amosbe uaquiñá.
Amós Nahumbe uaquiñá,
Nahúm Eslibe uaquiñá
y Esli yojamna Nagaibe uaquiñá.
Nagai yojamna Maatbe uaquiñá,
Maatna Matatíasbe uaquiñá.
Matatías Semeibe uaquiñá,
Semei Joseche uaquiñá
y Josec yojamna Judabe uaquiñá.
Judá yojamna Joananbe uaquiñá
y Joanán Resabe uaquiñá.
Resa Zorobabelbe uaquiñá,
Zorobabel Salatielbe uaquiñá,
y Salatielna Neribe uaquiñá yojamna.
Neri yojamna Melquibe uaquiñá,
Melqui Adibe uaquiñá.
Adi Cosambe uaquiñá,
Cosam Elmadambe uaquiñá,
y Elmadamna yojamna Erbe uaquiñá.
Er yojamna Jesusbe uaquiñá
y Jesús Eliezerbe uaquiñá.
Eliezer Jorimbe uaquiñá
y Jorimna Matatbe uaquiñá.
Matat yojamna Levibe uaquiñá,
Leví Simeonbe uaquiñá
y Simeón Judabe uaquiñá.
Judá Josebe uaquiñá,
José Jonambe uaquiñá,
y Jonamna yojamna Eliaquimbe uaquiñá.
Eliaquim yojamna Meleabe uaquiñá,
Melea Menabe uaquiñá.
Mena Matatbe uaquiñá,
y Matata yojamna Natanbe uaquiñá.
Natán yojamna Davidbe uaquiñá,
David Isaibe uaquiñá
y Isaína Obedbe uaquiñá.
Obed Boozbe uaquiñá,
Booz Salabe uaquiñá
y Sala yojamna Naasonbe uaquiñá.
Naasón yojamna Aminadabēbe uaquiñá,
Aminadab Adminbe uaquiñá
y Admin Arnibe uaquiñá.
Arni Esrombe uaquiñá,
Esrom Fáresbe uaquiñá
y Fáresna yojamna Judabe uaquiñá.
Judá yojamna Jacobēbe uaquiñá,
Jacob Isaacbe uaquiñá
y Isaacna Abrahambe uaquiñá.

Abraham Tarebe uaquiñá
 y Taré yojamna Nacorbe uaquiñá.
 Nacor yojamna Serugbe uaquiñá,
 Serug Ragaube uaquiñá
 y Ragauna Pelegbe uaquiñá.
 Peleg Heberbe uaquiñá,
 y Heber yojamna Salabe uaquiñá.
 Sala yojamna Cainanbe uaquiñá,
 Cainán Arfaxadbe uaquiñá
 y Arfaxadna Sembe uaquiñá.
 Sem Noebe uaquiñá
 y Noé yojamna Lameche uaquiñá.
 Lamec yojamna Matusalenbe uaquiñá,
 Musalén Enoche uaquiñá
 y Enocna Jaredbe uaquiñá.
 Jared Mahalaleelbe uaquiñá,
 y Mahalaleelna yojamna Cainanbe uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama (Mt 4.1-11; Mc 1.12-13)

¹ Juan, Jesúsbioye tbojanabáyentsana, chë Uámana Espíritu Jesusbe ainaniñe yojtsemándaye. Jesús Jordán bejajoicana tojtaná y chë Uámana Espíritna entsanga ndoyena luaroye tbojanánatse. ² Chentše canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibojeshëntsena.

³ Chora Satanás tojésanabo y tbojaniana: —Aca ndegombre Bëngbe Bëtsabe Uaquiñá tcomñése, momandá quem ndëtsbenga tandëse chaobiama ca.

⁴ As Jesús tbojanjuá: —Bëngbe Bëtsabe uabemana palabrënguiñe mëntšá endayana: “Entšá nÿe tandëšeca ndoñe vida ntsebomnana ca.”

⁵ Chentšana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿe. ⁶ Chora Satanás tbojaniana: —Atše nÿets obenana cbochjátsetaye y lempe quem amëndayëngbenache yobinÿna soyëgnaca. Atše lempe chca sënjóyëngacñe y sëntsobena jatšetayama nda stsebošábioye. ⁷ Aca chacojoshëntsamentšé y chašcojadorase, lempe nÿetšá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrënguiñe mëntšá endayana: “Acbe Bëtsá, chë Utabná cochtsadorana y nÿe cha cochtseservena ca.”

⁹ Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniana: —Aca ndegombre Bëngbe Bëtsabe Uaquiñá tcomñése, muentšana fshantsoye montsënja, ¹⁰ er Bëngbe Bëtsabe uabemana palabrënguiñe endayana:
 Bëngbe Bëtsá chabe angelënga echanjichamuá, chacmotsinÿenama.

11 Chënga buacuatšëngaca cmochanjishache, shecuatše ndocá ndëtšbeñe chacondomama ca —cha tbojaniana.

12 Chora Jesús tbojanjá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacocheñguama ca.”

13 Cabana, Satanás tojanjbaná bošana Jesúsbioye bacna soyëngama jacocheñguama, y bënama Jesús bentsána tojtsanojuánañe.

Jesús tojanontsé Galileoca chabe trabajo jamana

(Mt 4.12-17; Mc 1.14-15)

14 Chentšana, Jesús Galileoye tojesaná chë Uámana Espiritbe obenánaca, y nyetsca entšanga chë luariñe chabiamama imojtsencuëntaye. 15 Jesús yojtsabuátambaye chë judiëngbe enefjuana yebnënguenache, y nyetscanga cha imojtsatschuanaye.

Jesús Nazaret puebloca

(Mt 13.53-58; Mc 6.1-6)

16 Chentšana Jesús Nazaretoye tojtashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualiama. 17 Chë Bëngbe Bëtsabe juabna oyebuambnayá Isaíasbe librëša tmojaníyë chaualiama. Chë librëša yojutëfjona orna, tojáninýena mëntšá uábemanentše:

18 “Chë Utabnabe Espiritu átšeftaca entsemna,

er atše uabuayaná stsemna chë Bëngbe Bëtsabe tšabe noticiënga chë nd-bomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínýnama;

jamama chë inýengbe causa imosufrínënga, tempcá cachcá tšabá chamot-satsmënama;

19 y entšanga jáuyanama ndëmua ora chë Utabná chabe entšanga yochjatsebacye ca.”

20 Jesús jualiama tojanpochocá y chora chë uajabuachanábioye chëša tbojtaniyé y tojtánóbema. Nyetsca entšanga chë enefjuana yebnentše imojtsemnënga Jesúsbioye imojtsobuáuatja. 21 Chora Jesús tojanontsé mëntšá jayanana: —Camënté tšëngaftangeñe tonjopasá ntšamo quem librëšañe iuabemancá ca.

22 Nyetscanga Jesusbiamama tšabá imojtsencuëntaye y ojnanánënga imojtsemna tša botamana cha yojtsóyebuambnama. Y chënga imojtsentjanaye: —¿Quem boyabása ndoñe Josebe uaquiñá yondmëna ca?

23 Jesús yojtsetátšëmbo ntšamo cha tojánayaniñe chënga ndoñe tmonjanósbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo cotsichamcá ndegombre tojtsemnëse, cach acbe pueblëntšnaca cachcá moma ca”.

24 Y cachora Jesús más tojanoyebuambá, mëntšá: “Ndegombre cbëyana, ni canýe Bëngbe Bëtsabe juabna oyebuambnayábioye cachabe pueblentše tšabá quematonýá. 25 Ndegombre cbëyana, Elías, chë Bëngbe Bëtsabe juabna

oyebuambnayá, Israeloca inamna ora, ba viudanga chentše imojamna. Chë tempo, unga uata y tsëntsáñe nÿetsá ndoñe tonjanafté y bëts shëntsana chë luariñe yojtsebinÿna. ²⁶ Pero Bëngbe Bëtsá, Elíasbioye ndoñe tbonjanichmó ni mo canÿe Israelentša viudábioye, y aiñe tbojanichmó ínÿoye, Sarepta ca uabáinoye, Sidón béconana, canÿe chentša viudábioye. ²⁷ Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canÿa chentša šocábioye tbonjanshná, pero aiñe canÿe šocábioye, Naamán ca uabainá, cach bacna nguayanánaca, Sirocá ca” —cha tojánayana.

²⁸ Chë judiëngbe enefjuana yebnentše imojtsemna entšanga chca tmojanuena ora, puerte tojánetëna. ²⁹ As, chora chënga tmojantsbaná, chë pueblentsana Jesús imojtábocna y más tsjuanoye canÿe peñësëjana imojúanatse. Chënga imojanajebna cach peñëšñe, y chë entšanga imojtseboše Jesús chocana jtsajuatšëntšana. ³⁰ Pero Jesusna chëngbe tsëntsajana tojánachnëngo y ínÿoye tojtsanoñe.

Jesús, bayëjbe juabna cánÿabioye tbojanbojuaná
(Mc 1.21-28)

³¹ Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana. ³² Entšanga imojtsenjnanaye ntšamo Jesús yojtsabuátambama, er chamna mo canÿe mando bomnacá yojtsóyebuambnaye.

³³ Chë enefjuana yebnentše, canÿe boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: ³⁴ — ¡Cachcá šmonÿá! ¿Ndayama bëngbioye təcjabo, Jesús Nazaretocá? ¿Tcojabo bënga jabëtsapochocamá? Atše sëndëtatšëmbo nda aca comnama, aca chë Bëngbe Bëtsabe Uamaná ca.

³⁵ Chora Jesús chë bacna bayëjbioye tbojtsanácacana y tbojaniyana: — ¡Iytëca móbema y chábertšana maisebocna ca!

As chora chë bayëja entšanguentše chë boyabásabioye tbojanshajayé, y ndocá ntjëftsemcá chábertšana yojésebocna. ³⁶ Chë soyama nÿetsca entšanga imojénjnanaye y mëntšá imojtsenatsëtsnaye: “¡Tša chca palabrénga! ¡Quem entšá mandayacá y obenacá chë bayëjënga entsamënda, y chënga montsaisebocana ca!”

³⁷ Y Galileoca nÿetsca pueblënguiñe Jesusbiana yojtsótatšëmbo.

Jesús, Simón Pédrëbe uambén mamábioye tbojanshná
(Mt 8.14-15; Mc 1.29-31)

³⁸ Chentšana, Jesús chë judiëngbe enefjuana yebnentšana tojëftsanbocna y Simonbe yebnentše tojánamashëngo. Simonbe uambén mamá šocá inajájona jabuache calentóraca, y chë chentše imojtsemna entšanga chabiama Jesúsbioye tmojanimpadá. ³⁹ Chora Jesús chë šocábioye yojotsejbëna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

Jesús ba šoquënga tojanashná
(Mt 8.16-17; Mc 1.32-34)

⁴⁰ Shinÿe yojuenatjëmbe ora, banga inÿe y inÿe šocana bomnënga Jesúsbioye tmojanënatse, y cha nÿetsca šoquëngbeñe cucuatšënga tojanajájó y tojanashná.

⁴¹ Chora, ba šoquëngbentšana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!”

Pero Jesusna yojtsécacana y ndoñe tonjanalesenciá chamóyebuambama, er chë bayëjenga imnatátsëmbo cha chë Cristo bëtsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayiyá
(Mc 1.35-39)

⁴² Yëfsana tojanbinÿna ora, Jesús chë pueblentsana tojëftsanbocna, y canÿe luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnoye tmojánashjajna. Chënga imojëtseboşe Jesús cach pueblentşe chaotsoquedáñama, ⁴³ pero Jesús tojanëyana: “Atşe sontsemna chë tšabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá šonjichmó ca.”

⁴⁴ Y chentsana, Jesús yojánana Bëngbe Bëtsabiama entsángbioye abuayiyinaye, chë judiëngbe enefjuana yebnënguenache Judeoca.

5

Canÿe te mallajta beonga ashebuánaye te
(Mt 4.18-22; Mc 1.16-20)

¹ Canÿe te, Jesús, Genesaret ca uabaina uafjónaye tsachañe yojtsemna ora, ba entsanga tmojánashjajna, y chënga tša imojtsenajuatsëntsnaye Bëngbe Bëtsabe palabra jouenama. ² Jesús, chë uafjónaye tsachañe bécoñe tojáninÿe uta ena barquëshá; chë beonga ashebuánayëngna barquëshanguentsana tmojëftsanbocna atarraiešhangá jetsáboshabiama. ³ Jesús canÿe barquëshañe tojánamashëngo; chësha Simónbeshá inauamna. Chora Simónbioye mëntšá tbojaniyana: “Quem tsachañentsana chcoye mëyamba ca.”

⁴ Tojanótbema ora, Jesús chë barquëshoicana tojanontsé entsanga jabuátambama. Jabuátambama tojanpochocá orna, Simónbioye tbojaniyana: —Shbuatsëntsoye barquëshá mëyamba y tšëngafangbe atarraiešhangá šmochjushbuetše, beonga jashebuáyama ca.

⁵ Pero Simón tbojanjuá: —Buatëmbayá, nÿets ibeta fsëndanguá y tondaye chibiátashebuaye. Pero aca chca tcjayánayecna, cachiñe atarraiešha chantëtëshbuetše ca.

⁶ Tmojanëshbuetše orna, bëtsá beonga tmojánishëche y chëngbe atarraiešhangá tojanontsé jtsatanëcanana. ⁷ As, chë inÿe barquëshañe imojtsemna enutëngbioye tmojánëfjatsëmbo, jabújabuachama chamuábama. Chora chënga tmojánabo, y nÿets uta barquëshá beóngaca tmojanajutjé. Tša chëftanga causa, tojanontsé chë uta barquëshá jtsenatjëmbambana. ⁸ Simón Pedro chca tojáninÿe ora, Jesús bëntşe tojanoshëntsamenté y tbojaniyana: —¡Bëngbe Utabná, atşe bacna soye amá sëndmëna, chíyeca átšbentsana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. ¹⁰ Santiago y Juan, chë Zebedeobe uaqüñata y Simonbe enutata, chátnaca auatjanánata ibojtsemna. Chora Jesús Simónbioye tbojaniyana: —Ndoñe matauatjana. Morscana, entsanga Bëngbe Bëtsabiama cochántanguaye, y nÿe beonga ashebuanayá ndoñe quecochátsmëna ca.

¹¹ As chora chë barquëshangá tsachoye tmojtanéyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná
(Mt 8.1-4; Mc 1.40-45)

¹² Jesús canye pueblentše yojtsemna ora, chentše tojánashjango canye entśá bacna nguayanánaca šocá. Chè šocá Jesúsbiocyte tbojáninýe ora, tojanoshentsamentśé y jubiaca fshantsóntscoñe yojtsejbéna y tbojanimpadá: —Bèngbe Utabná, aca tcojtsebošése, aca catjobenaye atśbe šocana jtsebojuánana ca.

¹³ As Jesús cucuátšeca tbojánbojajo y tbojanaryana: —Aíñe, sèntseboše. ¡Šocana cbotsebojuaná ca!

Y cachora chè šocana tbojtšanóbojuanañe. ¹⁴ Chora Jesús tbojanmandá: —Ndocnábeñe chè soye cattsecuéntaye; nýe Jerusalenoca báchnèbiocyte motsa, y cha cochjinýinýiye aca mora ya tśabá cojtsatsmènama; y chora cochjuátšèmbona ntśamo Moisés chabe leyiñe tojanmandacá, Bèngbe Bètsábiocyte chama jtšchuyayama, chca, nýetsca entśanga chamotatšèmbona mora ya tśabá cojtsatsmènama ca.

¹⁵ Pero ndayá Jesús yojtsamama más entśanga imojátatšèmbona, y ba entśanga imojtsójoye chábíoye joyeunayama y chèngbe šocanèngama chauashnama. ¹⁶ Pero Jesús yojanamana jtsoñana entśanga ndoyena luarèngoye y chocha Bèngbe Bètsáftaca ibnécuentaye.

Jesús, canye jama ndobenábíoye tbojanshná
(Mt 9.1-8; Mc 2.1-12)

¹⁷ Canye te, Jesús yojtsabatambá ora, chentše básefta fariseunga y ley abuátambayènga imojtsetbíamana, Galileoca nýetsca pueblènguentšana áshjajnènga, Judeoquènga y Jerusalenoquènga. Y chora Jesús šoquènga yojtsashnaye, Bèngbe Bètsabe obenánaca. ¹⁸ Chora tojanopasá, básefta boyabásenga canye šocá, jama ndobená, tjuashiñe choye imojuamba. Chènga imojétseboše tsoye cha juambana, Jesús yojtsemnoye, ¹⁹ pero jamashjnama ndoñe tmonjanobená, tša entśanga causa. Chcasna, gradasèšènguèjana chè yebnentśa tsbanánoye tmojánášèngo y batśá tejèshe tmojtšanjuaná. Chorna, chè atèfjnèjana chè šocá tjuashiñe tmojanèštjango, entśangbe tsèntsaca, Jesusbe natsanoica. ²⁰ Jesús tojáninýe cha chè šocá jáshnama bètsobenama chènga puerte imojtsošbuáchema. As, chè jama ndobenábíoye tbojanaryana: “Bacó, acbe bacna soyènga tcbontsebojperdoná ca.”

²¹ Chora chè ley abuátambayènga y chè fariseunga mèntśá tmojanontśé juabnyana: “Quem boyabása ndoñe tśabá Bèngbe Bètsabíama quenátichamo; mo chábíoye cuafjoyenguangcá entsemna. Ndocna entśá quenátobena bacna soyèngama inýa japerdónana; nýe Bèngbe Bètsá añe ca.”

²² Pero Jesús yojtsetátšèmbó ntśamo chènga imojtsejuabnyama; as tojanèyana: “¿Ndáyeca tšèngaftangbe ainaniñe chca šmojtsejuabná? ²³ ¿Tšèngaftangbíama ndayá más paselo nántsemna tšèngaftangbe delante jayanama: ‘Acbe bacna soyènga tcbontsebojperdoná’, o jayanana: ‘Matètsbaná y motsa ca’? ²⁴ Y chca, morna atśe chochanjínýanýiye, chè Bèngbe Bètsá Entśá tbojanbemá quem luariñe obenana yobomnama, entśanga bacna soyèngama jáperdonama ca” —Jesús tojánayana.

As Jesús chè jama ndobenábíoye tbojanaryana: “Atśe cbèyana, matètsbaná, tjuashe mesocñe y acbe yebnoye motsatoñe ca.”

²⁵ Cachora chë jama ndobená tojtantsbaná entsangbe delante, chë cha inajájona tjuashe yojesocñe y Bëngbe Bëtsábioye atschuanaye chentsana yojtsatoñe. ²⁶ Chama nyetsca entsanga imojénjnayaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinje ca.”

Jesús, Levíbioye tbojanchembo chabuastama
(Mt 9.9-13; Mc 2.13-17)

²⁷ Chca yojochnëngüentšana, Jesús chentsana tojëftsanbocna y canje entsábioye tbojáninje, Leví ca uabainá, chë entsángbioye impuesto Romocama atjanayentše inétsotbemañe. Chora Jesús tbojaniana: “Smasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentsana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inje entsángnaca mesëshentše imojtsetbiámána. ³⁰ Chora, chë fariseunga y chë ley abuátambayënga tmojanontsé chë Jesube uatsjëndayëngbiana podesca oyebuambnayana; y chëngbioye mëntšá tmojanëyana: —¿Ndáyeca tsëngaftanga impuesto atjanayëngaftaca y bacna soye amëngaftaca šmojtsesá y šmojtsosfšësná ca?

³¹ Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe. ³² Y atše ndoñe chiyátabo chë Bëngbe Bëtsabe bominiñe tsábá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama
(Mt 9.14-17; Mc 2.18-22)

³³ Chora chënga Jesúsbioye tmojaniana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nye nyets tempo jesosañana y jesofšëснаñana ca.

³⁴⁻³⁵ Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntsámo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtsá jasana y cháftaca oyejuayënga jtsemnana. Pero ora echanjóshjango y chë boyabása chëngbentsana mochantsánatseñe; chora cocayé chë ofjanënga echántsamna tondaye ntjascá jtsemnana. Ntsámo chë tojobouamá cha y chë ofjanëngaftaca endmëncá, cachcá endmëna atše, atšbe uatsjëndayëngaftacnaca ca —cha tojanëjua.

³⁶ Jesús mëntšánaca tojanacuntá jabuátambama: “Ndocná queonýbatatëtše basájua tsëm entsayañe, tanguá entsáyá jtarmëndama. Chca tcojamëse, chë tsëm entsáyá jtsandbemana, y chë tcojuatëtše entsëjua chë tanguájuañe ndoñe tsábá ntsinñana. ³⁷ Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtse-shëbëfjuana y chë vínoye jtsabuáshana; y chca, chë vínoye y chë jasabenga tondayama ntjatoservëna. ³⁸ Chiyeca co, chë tojtseshayana vínoyna tsëm jasabenguiñe juaftsuámána. ³⁹ Ndocná, chë bóchena vínoye tojatëmo y chentsana játsbošana chë tojtseshayana vínoye jatofšiyana; cha jayanana: ‘Chë bóchena vínoye tsá tsabeye ca’.”

6

*Jesusbe uatsjéndayënga ochnayté trigo tmojanátabebe**(Mt 12.1-8; Mc 2.23-28)*

1 Canÿe ochnayté, Jesús canÿe jajajana yojtsaye; chabe uatsjéndayënga trigo imojtsaiuatabnaye, imojtsaiúshenëcaye, y imojtsaiuasaye. ² Chë causa, básefta fariseunga tmojanatjaye: —¿Ndayeca šmojtsama chë ochnayté jamama ndoñe quenátslesenciana soye ca?

³ Y Jesús tojanëjua: —¿Ndoñe šmëndualía y šmondëtatšëmbo, ntšamo rey David y chabe enutënga tmojanmama shëntseca imojtsemna ora y jasama yojtsëjaboto ora? ⁴ Chca orna, David Bëngbe Bëtsabe bëts yebnentše yojámashëngo y chë Bëngbe Bëtsá chentše yojamnama inÿinÿnaye tandëšënga yojase, y chë cháftaca imojánajna entságnaca yojátšataye. Y chë tandëšna nÿe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canÿe bacna soye tojanma ca —Jesús tojanëjua.

⁵ Y Jesús más tojanëyana: “Chë Bëngbe Bëtsá Entšá tbojanbemá, chë entsá ochnayté tojtsama sóynaca jtsemándayana ca.”

*Chë buashana cucuatše bomna entsá**(Mt 12.9-14; Mc 3.1-6)*

⁶ Inÿe ochnayté, chë judiëngbe enefjuana yebnoye Jesús tojánamashëngo y tojanontšë jabuátambana. Y chentše yojtsemna canÿe entsá, catšbioica cucuatše buashanëtše bomná; ⁷ y chë ley abuátambayënga y fariseunga chiñe imojtserrondana jinÿama nderado Jesús chë ochnayté chábioye tabuanjashna, as chca chënga jtsebmnama ndaye sóyeca Jesús mal jaquédana. ⁸ Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “¡Motsbaná y chentše tsëntsaca motsa ca!” Y chë entsá yojotsbaná y entsangbe tsëntsaca yojotsaye. ⁹ Chora Jesús chë inÿengbioye tojanëyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochócana ca?”

¹⁰ Y nÿetscanga chabe chabujana imojtsemnënga tojanëñyanÿé, y chë buashana cucuatše bomnábioye tbojanianyana: “Macuenyanëjaná ca.” Y chë boyabása tojanacuenyanëjaná, y tšabá chëtša yojtsatamna. ¹¹ Pero chë inÿengna puerte tmojanotjayaná, y tmojanontšë enatsëtsnayana ndayá muanjobenaye Jesusbe contra jamana ca.

*Jesús chë bnëtsana uta uatsjéndayënga tojanabacacá**(Mt 10.1-4; Mc 3.13-19)*

¹² Chë tempo, Jesús tjoye tojána Bëngbe Bëtsáftaca jencuëntama; y nÿets ibeta cháftaca tbojanencuentá. ¹³ Tojanbinÿna ora, chabe ústonënga tojánachembo, y chënguentsana tojanëbuáyana bnëtsana uta uatsjéndayënga, chë ndëmuanÿënga “chabe ichmónënga cánaca” tojanëbobaye. ¹⁴ Chënga imojamna: Simón, chë Pedro cánaca Jesús tbojanabobayá; Andrés, Simonbe catsata; Santiago y Juan, Felipe y Bartolomé, ¹⁵ Mateo y Tomás, Santiago, Alfeobe uaquiñá; Simón, chë celote ca uabobainá; ¹⁶ Judas, Santiagbe uaquiñá; y Judas Iscariote, chë más chcoye, Jesús uayayëngbe cucuatšifne bochjanboshjoná.

*Jesús ba entsanga yojanabuatambá y yojánashnaye**(Mt 4.23-25)*

17 Chentšana, Jesús chëngaftaca chë tjocana tojtantsmä y canye jachañe tojanoquedá ba chabe ustonëngaftaca y ba inye entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentšana, Jesúsbioye oído jabuájua y chëngbe uocanëngama chauashnama. 18 Y chábeyeca chë bacna bayëbe juabna uambayënga tsábá imojtsatsmäna. 19 Nyetsca entsanga tša imojtseboše y ndayanaca tsábit sama Jesús jabojuama, er chábentsana bëts obenana yo-tsóbocana y nyetscanga yojtsashnaye.

Chë ndegombre oyejuayana bomnënga y ndëmuanyëngbiana tša lastema yochtsemna

(Mt 5.1-12)

20 Jesús chabe uatsjëndayëngbioye tojanontjëse y tojanëyana: “Puerte oyejuayënga tsëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tsëngaftangbiana entsemna ca.

21 “Puerte oyejuayënga tsëngaftanga chë mora oshëntsiyënga, er becá šmochantóshachaye ca.

“Puerte oyejuayënga tsëngaftanga chë mora šmošachenga, er chentšana šmochantsatenbiajuaye ca.

22 “Puerte oyejuayënga šmochtsemna, entsanga chacmojtsëbuayënja ora, chacmojtsatëbuacana ora, chacmojtsëyanguá ora, y tsëngaftanga ndoñe tsábá šmontsama ca chënga chamojtsichamo ora, tsëngaftanga atšbe ústonënga bëtsemnama. 23 Chë te puerte šmochjóyejuaye, er celoca canye bëts uacanánana šmochántsebomna. Chëngbe bëts taitanga, cachcá chë Bëngbe Bëtsabe juabna oyeuambnayëngaftaca tmonjanma ca.

24 “Pero itša lastema tsëngaftanga bomnëngbiana, er mora oyejuayënga jtsemnama ya bëtscá šmojóyëngacñe ca!

25 “Itša lastema tsëngaftanga chë mora shachanëngbiana, er shëntsana šmochántsebomna ca!

“Itša lastema tsëngaftanga chë mora oyejuayëngbiana, er ngmënama šmochanjenóbošachna ca!

26 “Itša lastema tsëngaftangbiana nyetsca entsanga tsábá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyeuambnayëngaftaca ca!” —Jesús tojanëyana.

Chë uayayëngbiana bonshánana jtsebomnana

(Mt 5.38-48; 7.12)

27 “Pero tsëngaftanga, átšbioye ouenanënga cbëyana: Tsëngaftangbe uayayënga šmochtsababuányëshana; chë tcmojtsëbuayënjëngbiana tsabe soyënga šmochtsama; 28 chë tsëngaftangbiana bacna soyënga bošëngbiana, Bëngbe Bëtsá šmochtseimpadana tsabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana. 29 Nderado ndánaca cányoica tcmojajuebjantsetase, cochjomiye chë inyoica cachcá chacmomama; nderado ndánaca quëfsaíya tcmojuábocana, cachcá cochjonýaye acbe shabuanganëjuanaca chauetsácñama. 30 Ndánaca chacmojtjañabioyna, jatsetayana; y nda ndayánaca chacmojefcábioyna, ndoñe catjontšínýena chatmatoyema. 31 Inyëngaftaca šmochtsama, ntšamo chë inyënga tsëngaftangftaca chamotsamama šmojtsebošcá.

32 “Tsëngaftanga, nýe chë tcmojtsababuányëshanënga šmojtsababuányëshanëse, ¿ndaye tsabe soye chca šmattsama?; er chë bacna

entságnaca chca mondbétsama. ³³ O nderado, nye chë tsëngaftangbiana tšabe soyënga tmojtsamëngbiana tšabe soyënga šmojtsamëse, ¿ndaye tšabe soye chca šmattsama?; er bacna entságnaca chca mondbétsama. ³⁴ O nye chë cmochtëchenanguama šmojtsejuabnángbiyoe šmojúyentsámëse, ¿ndaye tšabe soye chca šmattsama?; er chë bacna entságnaca mondbetsenántšamiana, chëngbentsana cachá jtóyëngacñama jtsobátmanëse. ³⁵ Pero tsëngaftangna cmontsamna chë uayayënga jtsababuányëshanana; y tšabe soyënga chëngbiana jtsamana y júyentsámiana, chëngbentsana ndayánaca jtóyëngacñama ntjatobatmancá. Chca, tsëngaftanga uacanána cuenta canye bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayëngaftaca y bacna entsangaftácnaca tšabia comna. ³⁶ Inyëngbiana lastemadënga šmochtsemna, ntšamo tsëngaftangbe Taitá yomncá ca” —Jesús tojánayana.

Ndoñe ntsichámuana chë inyënga tšabá o ndoñe tšabá tmonjamama (Mt 7.1-5)

³⁷ “Ndocá Inyëngbiana šmattsichamo chë ndoñe tšabá tmonsamama, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inyëngbiana ndoñe šmattsichamo ndoñe tšabá tmonjama ca, y Bëngbe Bëtsá ndoñe queochátichamo tsëngaftanga ndoñe tšabá šmonjama ca. Inyënga šmochjáperdonaye y Bëngbe Bëtsá cmochanjáperdonaye. ³⁸ Inyëngbiyoe šmochjatsataye y Bëngbe Bëtsá cmochántatsataye. Mo nda canye biaco medidiñe bëtscá tojajutjë, uashëshe y cmojtiyecá, Bëngbe Bëtsá cachá cmochántatsataye. Ntšamo tsëngaftanga inyëngbiyoe chašmojábiana, uabouana o ndoñe jabuache soyënga, Bëngbe Bëtsá cachá tsëngaftangbiyoe cmochanjábiana ca” —Jesús tojánayana.

³⁹ Jesús quem cuétnaca tojánayana jabuátambama: “¿Canye jtaná nantsobena inye jtaná jtsanachayama? ¿Chca ndoñe nyets útata ndaye tšuabentse buanjótsatse? ⁴⁰ Chë uatsjendayá ndoñe ntsemnana chë buatëmbayabiana más bëtscá. Pero chabe uatsjëndayana chaojapochocá ora, cach buatëmbayacá jtsemnana.

⁴¹⁻⁴² “Canya chabe bominýiñe canye niñëfja tojtsebomnëse, cha ndoñe ntsobenana chabe catšátbiyoe jauyanana: ‘Acbe bominýentsana canye polvështema jtsebujátsëcama šmolesenciá ca’. Natsana cha bontsemna cachabe bominýentsana chë niñëfja jtsenobuchjátsëcana, tšabá jinýama jobenayama, chabe catšatbe bominýentsana chë polvotema jtsebujátsëcama. ¡Cachá entsemna acbiana, bacna entsá chë ntšamo ndegombre tcojubanacá ndinýinýayá! Chë tša bacna soye cojtsama ca acbe catšátbiyoe tcojauyana ora, cach aca tša bëtsc bacna soyënga cojtsamama ntjenjuaboycá; y chca, aca jamana canye bacna soye. Natsana cmontsemna chë cach aca ndoñe tšabe soyënga cojtsamama ngmënaca jshatenójuaboyana y chca amana jshétsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama ca” —Jesús tojánayana.

Tšabe betiye o ndoñe tšabe betiye tondmënama, jtsotatšëmbuana ntšamo tojahajoncá

(Mt 7.17-20; 12.34-35)

⁴³ “Ndoñe queonyëbatsmëna, chë canye tšabe betiýiñe podësca soye jashájonana; ni canye ndoñe tšabe betiýiñe tšabe soye jashájonana.

⁴⁴ Betiýënga jtsabuatmana ntšamo cada betiye tojtseshajcá.

Uchmašeshentsana quenátopodena higuëbé jocñana; ni uvasëša, shëshëntša betiyentsana. ⁴⁵ Chë tsabe entsana, chabe ainanoca tsabe juabnënga bomnentsana jtsóyebuambnayana; y chë bacna entsana, chabe ainanoca ndoñe tsabe juabnënga bomnentsana jtsóyebuambnayana. Er ndayá becá ainanoca tomnama entsá jtsóyebuambnayana ca” —Jesús tojánayana.

Chë uta ucuatjoniñe
(Mt 7.24-27)

⁴⁶ “¿Ndáyeca tsëngaftanga atše šmnétsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷ Cbochanjáuyana ndacá yomna nda átsbiroye tojabo, atšbe palabra tojouena y ntšamo stsichamcá tojtsama: ⁴⁸ Cha endmëna mo canye entsacá, nda canye yebna jajebuamna becá fshantse jashenoye yojajutjo y ndëtsbenguiñe yojúcuatjoye. Béjayënga yojtsóftajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguiñe jabuache yojaúcuatjona. ⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canye entsacá, nda canye yebna yojajebo nye fshantsiñe, tondayiñe ntjucuatjoycá. Béjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canye Romano soldadëngbe amëndayabe bochichnayábioye tbojanshná
(Mt 8.5-13)

¹ Entšángbioye chca jáuyanana tojanpochocá ora, Jesús Capernaum puebloye tojána. ² Chentše yojoyena canye romano soldadëngbe amëndayá. Cha ibnabomma canye bochichnayá puerta bonshaná, y chora cha šocá yojtsemna, ya jtsóbanama. ³ Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. ⁴ Chënga Jesúsbioye tmojánashjango y tša imojtseimpadana, mëntsá: “Quem soldadëngbe amëndayá mercedo entsebuájona chacotsájabuachama; ⁵ er cha bëngbe luarentša entsángbioye corente endábabuanyëshana, y cachá chë bëngbe enefjuana posada šonjayentsjebno ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atšbe Utabná, ndoñe yapa matenócochinñenana átsbioye jabama. Atše mercedo taitsatobuajoñe aca atšbe yebnoye chacuamashënguama; ⁷ chiyeca ni mo añemo chiyatentsétá jama aca jajëbenguama. Morna nye cochjayana y atšbe bochichnayá tsabá echántsatsmëna. ⁸ Er atše sëndábamna átsbioye mándayënga y átsnaca soldadëngbe amëndayá sëndmëna. Atše canye soldádbioye stjauyana ‘motsa ca’, cha cachora jana; y ínñabioye stjauyana ‘mabo ca’, cha cachora jabana; y nderado atšbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiama yojenñaná, y jobuértanëse chë ba entsanga cha ustonëngbioye tojanëyana: “Ndegombre chëyana, ni mo nyets Israelentše, ni canya quem boyabasacá tša ošbuachiyá chiyátinñena ca.”

10 Y chë ichmónënga yebnoye tmojtaná orna, tmojáninÿena chë bochich-nayá ya tšabá yojtsatsmëna.

Jesús tojanma canÿe viudabe uaquiñá cháuatayenama

11 Chca tojanopasá chentšana, Jesús yojétsaye Naín ca uabaina puebløye, y cháftaca chabe uatsjédayënga y ba entšanga imojtsaye. 12 Chë pueblo amashjuanoye yojtsebeconá orna, entšanga chë pueblentsana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëtscá entšanga chë obanabe mamá imojtsetjëmbambnaye. 13 Bëngbe Utabná chë viudábøye tbojáninÿe ora, chabiamá tbojanongmé y tbojaniana: “Ndoñe matošachena ca.”

14 Y jobéconase, chë ataúše tojánbojajo, y chë obaná atambayënga tmojantsá. Y Jesús chë obanábioye tbojaniana: “Bobontse, atše chëyana: ¡Matétsbaná ca!”

15 Chora chë obaná tojtantsbaná y tojanontsé oyeuambnayana; y chabe mamábioye Jesús chë bobontse tbojtánanatse. 16 Nÿetsca entšanga tša uatjana yojubuache chca tmojáninÿe ora, y Bëngbe Bëtsá imojtsatschuanaye, mëntsá jayanëse: “Bëngbentše canÿe Bëngbe Bëtsabe juabna oyeuambnayá cuatënjonÿná ca.” Y mëntsánaca: “Bëngbe Bëtsá tojabo chabe entšanga jabújabuachama ca.”

17 Y nÿets Judea luarëjana y chë chábuañe luarenache entšanga imojátatšëmbona ndayá Jesús tojanmama.

Juan chë Ubayanabe ichmónënga

(Mt 11.2-19)

18 Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentšana úata tojánachembo, 19 y Jesúsbioye yojichamuá jatjayama cha tayoamna chë Cristo, chë jabama ibojanmëná, chë Uámana Uabuayaná, o ínÿabiamá jatobátmama tayoétsamna ca. 20 As chë Juanbe ichmónënga Jesúsbioye tmojanobeconá y tmojaniana: —Juan chë Ubayaná šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínÿabiamá jatobátmama ca.

21 Chë ichmónata tbojánashjango ora, Jesús banga yojtsashnaye, socanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinÿna. 22 Chora Jesús mëntsá tojanëjua: —Motsata y Juánbioye šochjauyana ntšamo šojinÿe y šojuencá: Chë jtanënga tšabá entsatëbinÿna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjëmëngbioye chë tšabe noticiënga montsabuayiná. 23 ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

24 Chë Juanbe ichmónata chentšana tbojésanbocnentšana, Jesús tojanontsé Juanbiamá entšanga jáuyanana, mëntsá: “Juan jinÿama šmojánbocna ora, ¿ndayá jinÿama šmojánbocana entšanga ndoyena luaroye? ¿Canÿe entšá ainaniñe tondaye añemo ndbomná, mo canÿe šëše bínÿiaca shatiyeynëscá?

25 Y ndoñese, ¿ndayá jinÿama choye šmojánbocana? ¿Canÿe boyabása uámana entšayaca bopormaná? Ndoñe. Tšëngaftanga šmondétatšëmbo chë uámana entšayaca bopormanënga y chë bëtscá bomnánaca nÿe tondayama ntsecochinÿencá vida bomnëngna, reyëngbe yebnënguiñe mondbétsiyenama.

26 Asna, ¿ndayá jinÿama choye šmojánbocana? ¿Canÿa Bëngbe Bëtsabe juabna

oyebuambnayá? Ndegombre; y cbéyana, canya Bëngbe Bëtsabe juabna oye-
 buambnayabiama más bëtsá. ²⁷ Cha, Juan, endmëna ndabiama Bëngbe Bëtsá
 chabe uabemana palabrënguifë tojánayana mo chabe ichmonacá, mëntšá
 tojánayana ora:

Cristo, atšbe entšá natsana sënjichmó acbiama chaóyebuambama,
 entšanga jábuayenama aca jabama ainaniñe tšabe juabnëngaca chamotse-
 prontánama ca.

²⁸ Ndegombre cbéyana: Nýets tempo entšángbeñe, ndocná quenátsmëna Juan
 chë Ubayanabiama más bëtsá; masque chca, Bëngbe Bëtsabe amëndayoca chë
 más batšá uamaná, cha más bëtsá echántsemna ntšamo mora Juan yomnama
 ca” —Jesús tojánayana.

²⁹ “Nýetsca entšanga chca Juánbioye tmojanóyeunanga y chë Romocama
 entšángbioye impuesto atjanayëngnaca, nýets ainánaca tmojánayana Bëngbe
 Bëtsá nýetsca soyënguifë tšabá amá yomna ca; er tmojánenabaye ntšamo
 jubáyama Juan yojanamancá. ³⁰ Pero chë fariseunga y ley abuatmbayënga,
 ntšamo jubáyama Juan yojanamancá jóyëngacñama ndoñe tmojánbošëna
 ora, tmojtsanaboté ndayá Bëngbe Bëtsá chëngbiama jamama yojanjuabnacá.”

³¹ Jesús mëntšánaca tojánayana: “Cbochanjáuyana ndayacá morsca entšanga
 imomna, y ndayëngcá chënga imomna. ³² Chënga mondmëna mo chë
 plazëngoca mondbetsetbiámama basetemëngcá; chëngna mëntšá jabuache jtse-
 natsayana: ‘Tšëngaftangbiama fsënjaflautá y ndoñe chešmatslantsá; ngmënaca
 fsënjaversiá y ndoñe chešmatenóbošachna ca.’ ³³ Juan chë Ubyaná tonjánabo
 y ndoñe quenjatamana bëtscá entšángbeñe jtsemnana, ni tandëse jasana, ni
 vínoye jofšiyana; y tšëngaftanga šmontsichamo chana bacna bayëjbe juabna
 uambayá inamna ca. ³⁴ Morna, chë Bëngbe Bëtsá Entšá tbojanbemá tonjabo
 y chana aiñe entsamana bëtscá entšángbeñe jtseyayana y jtsofšësnayana, y
 tšëngaftanga chabiama šmontsichamo: ‘Chana yapa uasayá y vínoye tmoyá
 entsemna y Romocama entšángbioye impuesto atjanayënga y bacna soyënga
 amëngbe amigo ca’. ³⁵ Pero Bëngbe Bëtsá endbëtsinjinýnaye cha nýets os-
 erótána bomná yomnama, chë ndayá cha tojama ora ndayá chentšana
 inobocna soyëngaca ca” —cha tojánayana.

Jesús, chë fariseo Simonbe yebnentse

³⁶ Canye fariseo Jesúsbioye tbojanofja saná jauasama, y Jesús chabe yeb-
 noye tojána y mesëshentse yojótbema. ³⁷ Chë pueblentse yojamna canye
 shembása, bacna vida bomná. Jesús chë fariseobe yebnentse yojtsesama
 chë shembása yojátatšëmbona; as cha chë yebnoye tojánashjongo y tojanamba
 canye alabastro botellëse, jútjena canye botamana uanguëtse béjayecca.
³⁸ Jesusbe shecuatšëntse yojoshëntsamentsiye, šachénaca; shëchbuíyeca chabe
 shecuatšënga yojtsefchecucacná y cachabe stjënashaca ibojtsatššhëcbojuaye.
 Chabe shecuatšënga yojtonguëtšëntsiye y chë botamana uanguëtse béjaye
 ibojtashecbuëscacja. ³⁹ Chë fariseo Jesúsbioye ofjaná chca tojáninýe ora,
 mëntšá Jesusbiamá yojtsejuabnaye: “Cha ndegombre canye Bëngbe Bëtsabe
 juabna oyebuambnayá tojsemnëse, nantsetátšëmbo nda y mocna shembása
 yomna chë bontsebana shembása: canye bacna vida bomna shembása
 ca.” ⁴⁰ As Jesús chë fariséobioye tbojaniyana: —Simón, cuentado palabra
 šmotsoyeuná ca.

Y chë fariseo tbojanjúá: —Arseñor, Buatëmbayá ca.

⁴¹ Y Jesús tojánayana: —Canÿe entśá crocénana uyentšamianá, uta ndebénata yojánabamna. Canÿa shachna patse denario crocénana ibojan-debena, y chë inÿana, shachna bnëtsana. ⁴² Pero chë útata tondaye ibontse-bomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojaniana: —Mora šmëyana, ¿chë útatentšana nda más chë uyentšamianábioye buantsebobonshana ca?

⁴³ Y Simón tbojanjuá: —Atše šontsinÿana chë más bëtscă ndebená ca.

Y Jesús tbojaniana: —Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëse, Simónbioye tbojaniana: —Minÿe quem shembása. Atše acbe yebnoye sënjamashëngo y aca búyeshe ndoñe chešcatabuatsëtá atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó. ⁴⁵ Ndoñe chešcatámocho, pero cha tonjamashëngo orscana ndoñe ntjájbanana atšbe shecuatšënga onguëtsëntšayae.

⁴⁶ “Aca bestšašine aceitiye ndoñe chešcatsbuešcja, y chana aífne botamana uanguëtše béjaye šonjashecbuešcja. ⁴⁷ Chcasna atše cbëyana, cha šonjinÿanÿé atšbiama corente bonshánana yojtsebomna, er atše chabe bëtscă bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

⁴⁸ Y chora Jesús chë shembásabioye tbojaniana: “Acbe bacna soyëngama perdonaná contsemna ca.”

⁴⁹ Chora chë ófjanënga chentše imnatbiámanëngna tmojanontšë enatsëtsnayana: “¿Nda quem entśá yojtsemna, chë bacna soyëngámnaca entśángbioye jtsaperdónayana ca?”

⁵⁰ Y Jesús más chë shembásabioye tbojaniana: “Aca átšbeñe icošbuachëyeca, atsbocaná cochántsemna; natjëmbana motsatoñe ca.”

8

Chë Jesúsbioye imojánájabuachana shembásenga

¹ Chca tojanopasá chentšana, Jesús bëts y base pueblënguëjana yojánana, tšabe notiçënga Bëngbe Bëtsabe amëndayama entśanga abuátambaye y abuayinayae. Chë bnëtsana uta uatsjëndayëngna cháftaca imojtsajna. ² Básefta shembásëngnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿšëfta bacna bayëjënga tojtanëbuacna; ³ Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

⁴ Ba pueblënguëntšana mallajta entśanga tmojánbocana Jesús jinÿama. Ba entśanga jouenama tmojanobeconá ora, Jesús mëntśá tojanacuntá: ⁵ “Canÿe, canÿe jená jénaye jaujquëshama yojëftsebozna. Yojsëjquëshaye orna, básefta jénaye benache juachañe yojuatquëcjana; chiñna entśanga imojtsebotájaye, y jaja shloftšënga imojástjajna y imojtsósañe. ⁶ Inÿe meshëngna ndëtšbenguíñe yojuatquëcjana. Yojuábocna orna, betscó yojtsábojo, chë fshantsiñe ndoñe

yapa búyeshe yonjamna causa. ⁷ Inye meshëngna uchwëshangañe yojuatquécjana y chë uchwëshangá lempe yojtsatscué, chë jénayeca cánýiñe yojuábocna ora. ⁸ Inye meshëngna, uanguaniñe yojuatquécjana. Yojuájua orna, bëtsca yojuashájona; canýe jénayentšana nýa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë joudenama tmojtsobenënga, smochjouena ca.”

Ndáyeca Jesús cuentëngaca yojánabuatambaye

(Mt 13.10-17; Mc 4.10-12)

⁹ As chora chabe uatsjëndayënga tmojantjá: —¿Ntsamo chë cuento yojtsayana ca?

¹⁰ Y Jesús tojanëyana: —Bëngbe Bëtsá tsëngaftanga cmontsinýanýná nýetsca chë mo iytemëncá yomna soyënga chabe amëndayama, pero chë ínýngbioyna ndoñe; chë soyëngama chënga lempe cuentëngaca sentsëtsëtsná. Chca, masque corente chamotsafsna, ndoñe chamondobená Bëngbe Bëtsabe soyënga jinýama; y masque becá quem soyënga chamouena, ndoñe queochátësertana ca.

Jesús chë jenabe cuentama tojanabuayená

(Mt 13.18-23; Mc 4.13-20)

¹¹ “Chë cuento mëntsá endayana: Chë jénaye Bëngbe Bëtsabe palabra entsemna. ¹² Chë benache juachañe yojuatquécjana básefta jénaye endayana chë básefta entšanga Bëngbe Bëtsabiamá soyënga tmojouenënga; pero chora Satanás betesco jabana chënga Bëngbe Bëtsabe palabra jabëtsabujauanama, chca, chënga ndoñe chamondëtsošbuáchemá y bacna soyënguentšana ndatsebácánënga chamotsemnama. ¹³ Inye entšanga mondmëna mo chë ndëtšbenguiñe yojuatquécjana jenaycá. Chë entšangna Bëngbe Bëtsabe palabra joudenana y oyejuayënga jtsemnana. Pero ndoñe nýets tempo chana jocochájua; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmonsasbuaché causa. Inýënga mochantsëbuayënja y Bëngbe Bëtsabeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. ¹⁴ Inye entšanga mondmëna mo chë uchwëshangañe yojuatquécjana jenaycá. Chëngna Bëngbe Bëtsabe palabra joudenana, pero quem luarentša soyëngaca oyejuayënga jtsemnama yapa jesenójuabnayana, y mallajta crocénana y ba soyënga jtsebomnama yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnëtjomba y ndoñe quemochátama ntsamo Bëngbe Bëtsá tojayancá. ¹⁵ Inye entšangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tsabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerte tsabá tojtseshajuancá, chënga bëtsca tsabe soyënga Bëngbe Bëtsabiamá mochántsama. Chca mochántsama, Bëngbe Bëtsabeñe jtsošbuáchiyëse y nýetsca soyënguiñe puerte uantadënga jtsemnëse ca” —Jesús tojanabuayená.

Chë uajuinýanëshama cuento

(Mc 4.21-25)

¹⁶ “Ndocná canýe uajuinýanëshá juajuinýenana, chentšana ndaye sóyeca chësha jtsëstama o jutsnëshá tajsoye jtsajájua; juajuinýenana ndayá tsbanánoca juajájua, chë luarentše amashjuanëngbiamá chaotsebinýnama.

17 Er ndocna yoiytēmena soye, ntjinýcá queochaisoquéda, y chē entsāngbiama ndótatšēmba soye, ntsotatšēmbcá queochaisoquéda.

18 “Chcasna, botamana šmochjouena, er nda Bēngbe Bētsabe soyēngama tšabá tbojosertá, Bēngbe Bētsá echanjama cha más ba soyēngama chaboser-tama; pero nda chē soyēngama ndoñe tontsebošá, chē nýe batšá ibosertana soyēngama bochántsebnatjēmba ca” —Jesús tojánayana.

Chē Jesusbe ndegombre pamíllanguentsēnga

(Mt 12.46-50; Mc 3.31-35)

19 Chora, chabe mamá y chabe catšátanga chē Jesús yojtsemnntšē tmojánashjajna, pero ndoñe imontsobena chábioye jobéconana, yapa entsānga causa. 20 As canýa Jesúsbioye mēntšá tbojanianyana: —Acbe mamá y acbe catšátanga shjoca montsemna y montseboše aca jinýama ca.

21 As Jesús tojánayana: —Chē Bēngbe Bētsabe palabra tmojouenēnga y ntšamo tmojouencá tmojtsamēnga jtsemnana atšbe mamá y atšbe catšátanga, atšbe ndegombre pamíllanguentsēnga ca.

Jesús chē binýia y chē bėjaye bonguana yojētsbema

(Mt 8.23-27; Mc 4.35-41)

22 Canýe te, Jesús chabe uatsjéndayēngaftaca canýe barqueshoye tojánamashēngo y chēnga tojanéyana: “Uafjónayē chenguana cuajna ca.”

As tmojána; 23 y imojtsenachnējuanēntscuana Jesús yojtsomaná. Ndeolpe, chē bėjayiñe corente jabuache binýia yojóshjango y yojontšé bėjaye chē barqueshoye jtsobuajújtjana. Y chca, chēngbiama puerte resjo yojtsemna.

24 Chora chē uatsjéndayēnga tmojána Jesús jetsefsenama y mēntšá tmojanianyana: —¡Buatēmbayá! ¡Buatēmbayá! ¡Montsenatjēmbambana ca!

Chora Jesús tojantsbaná y chē binýia y chē bēts olēshēngoye tojanmandá: “Bonguana šochtsemna ca.” Y chē binýiayana tojanéjbana y lempe bonguana yojtsatsmēna.

25 Chentšana Jesús chabe uatsjéndayēnga tojanéyana: —¿Bēngbe Bētsá tšēngaftanga jujabuáchama yobenama, cabá ndoñe šmontsošbuaché ca?

Y chēnga auatjanánēnga y ojanánēnga mēntšá imojtsenatsētsnaye: —¿Nda quem boyabása yomna? ¡Cha tojamandá ora, masque chē binýia y chē bėjaynaca joyeunayana ca!

Chē Gerasa luaroca bacna bayēja uambayá

(Mc 8.28-34; Mc 5.1-20)

26 Chentšana Gerasa ca uabaina luaroye tmojánashjajna, Galilea ndirichiñe. 27 Jesús fshantsoye tojánastjango ora, chē pueblócana canýe entsá chábioye tojánabo. Cha ya bayté bayējbe juabna yojtsebmna, ndocna entsáyá yonjanichétjona; y yebniñe ndoñe yonjanियena, sinó obanēngbe cuevēshēnguenache. 28 Chē entsá, Jesúsbioye tbojaninýe ora, chabe natsanoica yojshētsamentsiye y mēntšá yojtsáyebuache: —¿Ndayá átšeftaca cojtseboše, Jesús chē celoca Bēngbe Bētsabe Uaquiñá? ¡Diosmanda ndoñe šcatjatsetšená ca!

29 Chca tbojanianyana, er Jesús tojanmandá chē bacna bayējbe juabna chábensana chaueseocnama. Ba soye chē bayēja yojánama chē entsá ndoñe tšabá chaotsemnana. Chē entsānga imojuamana cucuatšentšana y shecuatšentšana cha jtsētsbuayana bonguana chaotsemnana, pero chana jtsatabebiana, y chē bacna bayējbe mándoca entsānga ndoyena luarēngoye yojánachana. 30 Jesús chē boyabásabioye tbojantjá: —¿Ntšamo cabaina ca?

Y cha tbojanjuá: —Atše sēnduabaina Legiōn ca.

Cha chca tojánayana, er chábēñe ba bacna bayējēnga tmojánamashjna. ³¹ Y chē bayējēnga Jesús tmojanimpadá, chē corente uabouana tboye ndoñe chaondíchamuama. ³² Chentša béconana ba cotsēnga imnajena, tjoca imnétsosañe; as chē bayējēnga Jesús tmojanimpadá chē cotsēngbeñe jamashjnama chaualesenciama, y Jesús aīñe chca tojanalesenciá. ³³ As chē bayējēnga chē entsábentšana tmojésanbocana y chē cotsēngbeñe tmojánamashjna; y chentsana, chē cotsēnga batsjocana peñēsējana uafjajónayoye imojtsoshbuetše y yojtsatajo.

³⁴ Chē cotsēnga anjēnēnga chca yojopásama tmojáninje ora, chentšana tmojtsanacheta y tmojána chē soye jacuéntama chē puebloca y chiñe luarenache. ³⁵ Entšanga tmojánbocana ndayá tojanopasacá jinýama, y Jesús yojtsemnoye tmojánashjajna ora, tmojáninje chē entsá chē ndábentšana bayējēnga tmojtanbocna, Jesusbe shecuatšentše yojtsótbemañe, entsáyá uichētjoná y chabe nýets juábnaca. Y chē entsanga chama corente imojuatjaná. ³⁶ Ntšamo yojopasacá tmojáninjēngna entsángbioye tmojanacuntá ntšamo chca chē bacna bayējbe juabna uambayá chora ya tšabá yojtsatsmēnana. ³⁷ Chentšana, nýetscanga chē Gerasa luarentše oyenēnga Jesúsbioye imojtseimpadana chē luarentšana inýoye chaotsoñama, er chēnga corente imojtsauatja. As Jesús chē barquēshoye tojtanamáshēngo y chentšana tojtsanoñe. ³⁸ Chē entsá chē ndábentšana bacna bayējēnga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mēntšá tbojaniyana: ³⁹ “Acbe yebnoye motsatoñe y cochjácuntaye lempe ntšamo Bēngbe Bētsá acbiama tojamcá ca.”

Chentšana chē boyabása yojtsatoñe, y nýets pueblējana tojanacuntá ntšamo Jesús chabiamama tojanmcá

Jesús canye shembásabioye tbojanshná y tojanma Jairēbe bembetema cháuatayenama

(Mt 9.18-26; Mc 5.21-43)

⁴⁰ Jesús chē uafjajónaye chenguánoica tojtanashjango ora, nýetsca entsanga oyejuayēnga tmojtanofja, er nýetscanga chabiamama imojanobátmana. ⁴¹ Chora tojánashjango canye entsá, Jairo ca uabainá. Cha inamna chē pueblentše chē judiēngbe enefjuana yebnentša mandayá. Jesusbe shecuatšentše yojshēntsamentsiye y ibojtseimpadana chabe yebnoye cháuama; ⁴² er chē nje canye beme cha ibnabomná, bnétsana uta uata bomná, chora ya jóbánama yojtsemna.

Y Jesús yojtsayēntscuana, chē entsanga chábioye imojtsojuatsēntšenaye. ⁴³ Chē entsanguentše yojtsaye canye shembása, oboftjajuanánaca šocá; cha ya bnétsana uta uata chca inapadecena. Lempe ntšamo yojanbomncá ashnayēngbioye atóbocayīñe yojtsepochóca, y ndocná yonjobenaye cha jáshnana. ⁴⁴ Chē shembásana stētšoicana Jesúsbioye yojobeconá y chabe entsáyá sibuájua tojanábojajo. Y cachora chē oboftjajuanana ibojtsobojuána.

⁴⁵ Chora Jesús tojanatjá: —¿Nda šjabojajo ca?

Nýetscanga imojtsichamo ndoñe ca; as Pedro tojánayana: —Buatēmbayá, entsanga cmontsatsēntšená y cmontsayájuatsēntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sēnjaseté obenana átsbentšana jóbocnana, mo nda stjashna orcá ca.

⁴⁷ Chë shembása tojáninÿe Jesús yojtsetátšëmbo cha tbojánbojajuama. As chora, ngmëmnyá tojána y Jesusbe shecuatšentše yojshëntsamentsiye; y nÿetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. ⁴⁸ Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatšmëna. Natjëmbana motsatoñe ca.

⁴⁹ Jesús cabá yojtsóyeuambnantscuana, chë judiëngbe enefjuana yebnentsa mandayábiocana canÿa tojánashjango, y chë mandayábioye tbojaniyana: —Ache bembe ya tontsóbana; ndoñe más chë Buatëmbayábioye matëbéyabomana ca.

⁵⁰ Pero Jesús chë soye tojanuena; as chë mandayábioye tbojaniyana: —Ndoñe matauatjana. Nÿe Bëngbe Bëtsábeñe cochtsošbuáchiye y acbe bembe tšabá echántsatšmëna ca.

⁵¹ Chë yebnoye tmojánashajna ora, Jesús ndoñe tonjanalesenciá banga choye jamashjnama, nÿe Pedro, Juan y Santiago y chë shembásetembe bëtsëtsatna aiñe. ⁵² Nÿetscanga imojtsenóbošachiye y ngménaca imojtsóyeuambnaye, pero Jesús tojanéyana: “Ndoñe matenóbošachengana. Cha ndoñe chenaatóbana; cha nÿe endëtsomañe ca.”

⁵³ Chë entšanga Jesúsbioye nÿe imojtsáfchaye, er chënga imojtsetátšëmbo chë shembásetema obaná yojëtsemnana. ⁵⁴ Chora Jesús chábioye tbojanábuacueshache y jabuache tbojaniyana: “;Shembásetema, matëtsbaná ca!”

⁵⁵ Y cha tojtanayena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bëtsëtsata puerte ojnanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

9

Jesús, chabe uatsjëndayënga tojanichamó, Bëngbe Bëtsabe amëndayama jábuayenama

(Mt 10.5-15; Mc 6.7-13)

¹ Chentšana, Jesús chabe bnëtsana uta uatsjëndayënga tojánachembo, y mando y obenana tojanatšatá bacna bayëjënga entšángbentšana jtëbuacanama y šocanëngama jashnayama. ² Tojanichamó Bëngbe Bëtsabe amëndayama jábuayenama y entšángbioye jashnayama. ³ Y mëntsá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inÿe entšëjua jenotrócama cach ndoñe. ⁴ Canÿe yebnentše posada chacmojúyentšame ora, chentše šmochjoquéda inÿe puebløye játantscuana. ⁵ Nderado ndayentše posada ndoñe chacmonjuyentšame, chentšana šmochjësebocana y shecuatšentša polvëshe šmochjësenstoto, chca, chëngbioye jinÿanjÿiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjëndayënga tmojëftsanbocana y tmojána, nÿetsca chë base pueblotëmënguenache chë tšabe noticiënga abuayiyayena y entšanga šocanëngama áshnaye.

Herodes y Jesús

(Mt 14.1-12; Mc 6.14-29)

⁷ Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, ⁸ inÿenga imojtsanichamo chë Bëngbe Bëtsabe juabna oyeuambnyá Elías

cachiñe tojánbocna ca, y ínÿengna canÿa chë tempo imojanmëna Bëngbe Bëtsabe juabna oyebuambnayënguentšá obanënguentšana tojtanayena ca. ⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtšóyeuambnayana sëntsuenana ca?”

Chíyeca Herodes yojtseguaye ntšamo jamëse Jesús jinÿama.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nÿe chënga jëftsëbiatšese ínÿoye tojtšanoñe, Betsaida ca uabaina pueblöye. ¹¹ Pero chë entsanga chë soye tmojántatsëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtšëtsësnaye, y chë šoquënga imojtsemnëngbioye tojanashná.

¹² Ya jетиñe yojtšobiamná orna, chë bnëtsana uta uatsjëndayënga Jesúsbioye tmojanobeconá y mëntšá tmojaniana: —Chë entsanga cuantichamuá, jóchnama y saná jonguangoñama chamotsama chë béconana pueblotëmënguenache y luarënguenache; er quem luariñe ndocná quenatiyena ca.

¹³ Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nÿe shachna tandëse y uta beónata fsëntsebomna; nÿetscangbiana saná jabuámíyama nderado nda tojasna, aiñe cuanjacaredádaye ca.

¹⁴ Er mo shachna uaranga boyabásenga immamna. Pero Jesusna chabe uatsjëndayënga tojanëyana: —Mamëndá nÿetscanga chamotbiamama shachna bnëtsásanënga ca.

¹⁵ As chënga chca tmojanma y nÿetsca entsanga tmojanotbiana. ¹⁶ Chora, Jesús chë shachna tandëse y chë uta beónata tojanca, y celoye tojanontješë, Bëngbe Bëtsábioye chama tbojtanchuá, tojanjatá y chabe uatsjëndayënga tojanantregá entsángbioye chamuatšatama. ¹⁷ Nÿetsca entsanga tmojanse jtoshachaye nÿetsá, y cabá bnëtsana uta sbarëco tmojanajutjé chë ojamnëtmëngaca.

Pedro tojánayana, Jesús chë Cristo bëtsemnama

(Mt 16.13-19; Mc 8.27-29)

¹⁸ Canÿe te, Jesús canÿa Bëngbe Bëtsáftaca ibojtsencuentaye ora, chabe uatsjëndayënga cháftaca imojtsemna. Chora tojanatjá: —¿Nda atše bëtsemnama entsanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canÿe Bëngbe Bëtsabe juabna oyebuambnayá tempšcá mora tojtayena ca.

²⁰ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

Jesús tojánayana cha ibojamna jóbanana y jtayenana

(Mt 16.20-28; Mc 8.30–9.1)

21 Pero Jesús corente chënga tojanamëndá ndocnábeñe chama ntse-cuéntayana. 22 Y mëntšá cachabiamá tojánayana: —Chë Bëngbe Bëtsá Entšá tbojanbemá bontsemna puerte jasúfria, chë judiëngbeñe bëtsëjemëngcá amëndayëngbiama, chë judiëngbe bachnangbe más uámana amëndayëngbiama y ley abuatambayëngbiama uabotená jtsemnana. Entšanga mochanjóba, pero unga tianoye cha echántayana.

23 Chentšana nýetsca entšanga tojanéyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfria, y cruciñe jobanámnaca. 24 Nda tojtsama quem luarentše bëtscá soyënga jtsebomnama y atšbiamá jasúfria ndoñe tontseprontana, chë nýetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. 25 Er çndayama entšá buanjóservia nýetsca quem luarentša soyënga jtsebomnana, cha pochocaná jtsemnama tojtsá y chë nýetsca tescama yomna tšabe vida tojtsoperdese? 26 Er ndëmuanyë entšá, atšbiamá o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiamá echantsëuatja, cha chabe bëts buashinýinýañiñe chajóesabo ora, chabe Taitabe bëts obenánaca y chabe angelotëmëngaftaca adoraná. 27 Ndegombre cbëyana, báseftanga muentše montsemñënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinýcá ca” —cha tojánayana.

Jesús inýetsá tojanobinýná
(Mt 17.1-8; Mc 9.2-8)

28 Mëntšá tojanopasá: Chca palabrenga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canýe tjoye tojántsua, Bëngbe Bëtsáftaca jencuéntama. 29 Bëngbe Bëtsáftaca ibojtsencuéntantscuana, chabe jubiá inýetsá yojtsinýna, y chabe uichëtjonëjuangá tša uafjantsëjuangá yojtsamna y tša yojtsabuashinýinýana. 30 Chora uta boyabásata tbojanonýná, Jesúsëftaca ibojtsencuéntaye. Chata ibojama Moisés y Elías; 31 corente buashinýinýañiñe ibojtsemna, y chënga imojtsencuéntaye ntšamo Jesús Jerusalenoca jasúfria y jóbanana. 32 Masque Pedro y chabe enutata tša ocnayënga imojtsemna, nýe imojtsefšna y tmojáninýe Jesusbe juachañe tša yojtsebuashinýinýana y chë uta boyabásata cháftaca ibojtsemna. 33 Chë uta boyabásata Jesús bentšana ibojoluára ora, Pedro, Jesúsbioye tbojanayana: “Buatëmbayá, itša tšabá bëngbiama cuanmëna muentše jtsemnana ca! Mora fchanjapórma unga tambotëmënga: cánýetema acbiamá, inýetema Moisesbiamá y inýetemna Elíasbiamá ca.”

Pero Pedro ndoñe yontsetátšëmbo ntšamo yojtsichámuama. 34 Y chca yotšoyebuambnantscuana, canýe jantšetëshe yojóbema, y chëngbioye yojáutsbotse, y chënga chë tsoye imojtsemnama tmojáninýe ora, chë uatsjëndayënga chama imojtsauatja. 35 Chora chë jantšetëshoicana canýe oyeambuambnayana tojanóbcna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

36 Chë oyeambuambnayana tmojanuenentšana, tmojáninýe Jesús canýa yojtsemna. Chë uatsjëndayënga iytëca imojtsemna, y chë tempo ndocnábioye chama imonjuenaye.

Jesús, canye basa bacna bayêjbe juabna uambayábioye tbojanshná
(Mt 17.14-21; Mc 9.14-29)

³⁷ Yêfsana, chê tjocana tmojtantsmá ora, ba entšanga tmojánbocana Jesús jajébenguama. ³⁸ Chora, chê entšanguentšana canye boyabása tojanontsé méntšá uayebuáchana: —Buatêmbayá, Diosmanda atšbe uaquihá minyê. Nye cha atšbe uaquihá endmêna; ³⁹ y mora, bayêjbe juabna chábioye bontsêsháchichana, y nye ndeolpe jóntšana yoyana, ataque joshachana y uayoicana shashiye jtsabocanana. Y chábentšana chê bayêja ndoñe betscó ntjésebcnana, y cuerpiñe corente maltrataná jeseboshjonana. ⁴⁰ Acbe uatsjéndayênga sênjaimpadá chê bayêja chábentšana chamuatábocnama, pero ndoñe chematobená ca.

⁴¹ As Jesús tojánayana: —¡Nyetsá ndošbuáchiyênga y bacna entšanga! ¿Bue-taytê šojtsemna tšêngaftangaftaca jêftsemnana y jtséuantánana ca?

Chora chê boyabásabioye tbojanianyana: —Moye chê uaquihá mánatse ca.

⁴² Chê basa yojtsebeconá ora, chê bacna bayêja chábioye tbojanshajayé y inye ataque tbojanêshache. Pero Jesús chê bayêjbioye tbojanácacana, chê basetémbioye tbojanshná y chabe taitábioye tbojtánêntregá. ⁴³ Y nyetscanga puerte ojnánênge imojtsemna, Bêngbe Bêtsá tša obenana bomná inam-nama.

Jesús cachíñe tojánayana cha ibojamna jóbana y jtayanana ca
(Mt 17.22-23; Mc 9.30-32)

Nyetsca entšanga, ndayá Jesús yojtsamama ojnánênge imojt-semnêntscuana, chabe uatsjéndayênga cha tojanéyana: ⁴⁴ “Quem soye tšabá šmochjouena y ndoñe chacmondébnêjtomba: Chê Bêngbe Bêtsá Entšá tbojanbemá entšangbe cucuatšíñe mochanjáboshjona ca.”

⁴⁵ Pero chênga ndoñe yontsósertana ntšamo Jesús yojtsêtsêtsnacá, er Bêngbe Bêtsá ndoñe tonjanalesenciá chama chaósertama; y imojtsauatja Jesús jaimpadana chama chauabuayenama.

¿Nda chê más uamaná yomna?
(Mt 18.1-5; Mc 9.33-37)

⁴⁶ Chê tempo, chê uatsjéndayênga tmojanontsé enatsêtsnayana, nda chê más uamaná bêtsemnana. ⁴⁷ Jesús yojtsetátšêmbo ntšamo chênga imojtsejuab-nayama; asna, canye bâsetema tbojánishache, chabe juachaca tbojántbema, ⁴⁸ y chêngbioye tojanéyana: “Nda átšbeñe ošbuachiyá bêtsemnana, quem basetémbioye tbojofja, chana atse jofjana; y nda atše šojofja, chana chê nda šojichmó chábioynaca jofjana. Chíyeca, tšêngaftanguentše chê más nduamaná, cha chê más uamaná entsemna ca.”

Nda bêngbe contra ndoñe tontsemná, bêngaftaca jtsemnana
(Mc 9.38-40)

⁴⁹ Juan, Jesúsbioye tbojanianyana: —Buatêmbayá, bênga fsênjinye canye boyabása y cha aca jótšêmbonêse, entšángbentšana bacna bayêjbe juabna endêtêbuacana; pero cha bêngaftaca ndoñe quenátsmêna causa, chama fsênjesauyaná ca.

⁵⁰ As Jesús tbojanjuá: —Ndoñe šmatjuauyaná; er nda bêngbe contra ndoñe tontsemná, bêngaftaca jtsemnana ca.

Santiago y Juánbioye Jesús tojanécacana

⁵¹ Jesús celoye jtama yojtsobeco ora, nyets añémoca cha yojtsejuab-naye Jerusalenoye jama. ⁵² Natsana báseftanga tojanichamó, y chênga

tmojána canÿe base pueblotémoye Samaria luaroca, posada chabiama janguangoñama; ⁵³ pero chë luarentša entsanga ndoñe tmonjánbošena posada juantsamiana, er tmojántatsëmbona cha Jerusalenoye yojétsayama, chë chëngbe uayayëngbe uámana puebloye. ⁵⁴ Chabe uatsjëndayata, Santiago y Juan, chë soye tbojáninye ora, Jesús tmojaninyana: “Bëngbe Utabná, ¿quectseboše bëndata fchaimandá celocana íñeshe chaótsatse y quem entsanga chaotsapochócate ca?”

⁵⁵ Pero Jesús yobuórtana y chátbioye tojtsanëcácana, chca juabna bomna causa. ⁵⁶ Chentšana chënga inÿe pueblotémoye tmojtsanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canÿe boyabása Jesúsbioye tbojaninyana: — Atšbe Utabná, atše sëntseboše aca juastana ndëmoye chacojtsá choye ca.

⁵⁸ Y Jesús tbojanjúa: — Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

⁵⁹ Jesús inÿe entsábioye tbojaninyana: — Smasto ca.

Pero cha tbojanjúa: — Atšbe Utabná, šmoleseñciá atšbe taitá chjšhesabot-bontsañe ca.

⁶⁰ As Jesús tbojaninyana: — Chë Bëngbe Bëtsabiana mo obanëngcá imomnënga, ntšamo Bëngbe Bëtsá yomandacá ndoñe tmonsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entsanga cochjabuayená ca.

⁶¹ Inÿana Jesúsbioye tbojaninyana: — Atšbe Utabná, atše sëntseboše aca juastama, pero šmoleseñciá natsana atšbe pamíllangbiana jaisodiósoftama ca.

⁶² As Jesús tbojaninyana: — Nda cachabe soyëngama tbojtsengmena, Bëngbe Bëtsabe amëndayocama ndoñe ntsoservénana; er cha jtsemnana mo canÿe arayacá, chë tojtsetrabája ora, stëtsoye tojtsaisantješncá ca.

10

Jesús canÿsëfta bnëtsana y uta entsanga tojanichamó Bëngbe Bëtsabe soyëngama jábuayenama

¹ Chë soyënga chentšana, Bëngbe Utabná Jesús inÿe canÿsëfta bnëtsana y útatnaca tojanabacacá, y utáta chabe natsana tojanichamó, chë cha ibojtsemna jama publëngoye y luarëngoye.

² Mëntšá chënga tojanëyana: “Canÿe bëts jajañe bëtscá játbanama entsemna, pero peonga báseftanga; chíyeca, chentša nduññbioye jaimpádana ba peonga chauichamó chë jaja saná játbanama. Cachcá, quem luarentše bëtscá entsanga montsemna Bëngbe Bëtsábioye nduabuátmënga, y chëngbioye chabiama abuayinyayënga nÿe báseftanga. Chíyeca, Bëngbe Bëtsá moimpadanga ba abuayinyayënga chauichamó quem entsanga chábioye júbuajama.

³ Motsajna; smochjinÿe, atše tšëngaftanga chontsichemná mo oveshënga cuenta, tjañe quešëngbeñe. ⁴ Ndoñe šmattsambaye shecnaja, ni crocénana šmattsaiuábuenana, ni shecohëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

⁵ “Ndaye yebnentše chašmojámarshna ora, natsana smochjayana: ‘Lempe tšabá quem yebnentše chaotsomñe ca’. ⁶ Y chë yebnentše chca juabna bomna entsanga tmomnëšna, chë tšabiana ndegombre chentše echántsemna;

pero ndóñese, chca tsabiana chentse ndoñe queochátsmëna. ⁷ Canye yebnentse smochjoquéda, y smochjase y smochjofsiye ntšamo chentse chacmojacaredadaycá; er chë trabajayá merecido jtsebuájónana chca juácanama. Canye pueblentse nye inye y inye yebnënguenache ndoñe matajnana.

⁸ “Ndaye pueblentse chašmojásmashjna y tsábá chacmojúbuajentse, smochjase ntšamo chentse chacmojacaredadaycá; ⁹ chentša soquënga smochjáshnaye y smochjáuyana: ‘Bëngbe Bëtsabe amëndayana tsëngaftangbeñe entsemna ca’.” ¹⁰ Pero canye pueblentse chašmojáshjango y ndoñe chacmonjúbuaja, chentša tsashenangoye smochjábocana y mëntšá smochjayana: ¹¹ ‘¡Chë tsëngaftangbe pueblentša polvëshe, chë bëngbe shecuatsënguine tojuanjëshe, camuentse fšcuesentstëtoná, chca, tsëngaftanga chašmotsetatšëmbuama ndoñe tsábá šmonjamama! Pero masque chca, šmotsetatšëmbo chë Bëngbe Bëtsabe amëndayana tsëngaftangbeñe entsemna ca.’” ¹² Ndegombre cbëyana, quem luare jopochócama te, chë luarentša entšángbiroye Bëngbe Bëtsá puerte jabuache echantsacastígaye, y Sodoma pueblota bacna entšángbiroye ndoñe nya nyëtšá jabuache ca” —Jesús tojánayana.

Chë nduauenana entsanga

(Mt 11.20-24)

¹³ “¡Tša lastema Corazín pueblota entšángbiamama! ¡Tša lastema Betsaida pueblota entšángbiamama! Er chë muentse Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinyashiñe matmënjotbiamama. ¹⁴ Pero ntšamo entsanga tmojamama, tsábá o ndoñe tsábá bëtsemnana jayanama chaojobuache ora, tsëngaftanga más bëts castigo smochántsebomna, chë Tiro y Sidonoca bacna entšangbe castiguama. ¹⁵ Y tsëngaftanga, Capernaum pueblentša entsanga, ¿celóntscoca atsebánanënga smochtsemna ca šmojtsejuabnanga? ¡Chë uabouana infiernoye mochantsésetjango!

¹⁶ “Nda tsëngaftanga tcmojoyauná, chana atše joyeunayana; y nda tsëngaftanga tcmojtsëbaté, chana atše jtsabotena; y nda atše sojtsaboté, chana chë nda šojichmó chábiroye jtsabotena.”

Chë canyëfta bnëtsana y uta entsanga tmojtanashajna

¹⁷ Chë canyëfta bnëtsana y útatna Jesús yojtsemnoye tmojtanashajna, puerte oyejuayënga; y chábiroye mëntšá tmojanayana: —¡Bëngbe Utabná, aca jótšëmbonëse, chë bacna bayëjëgnaca šonjoyauná ca!

¹⁸ Y Jesús tojanëyana: —Ndegombre. Y tsëngaftanga Satanásbiroye chca šmontseyëñaná ora, entsemna mo Satanás celocana canye tcuinýcá jtsotsatšana stjinyá. ¹⁹ Atšna obenana tcbonjatšatá mëtscuayënga y alacranëngbeñe chašmotsajnama, y bëngbe uayayá Satanasbe nyëts obenana jáyëñjanama, tsëngaftanga ndocá ntjapasacá. ²⁰ Pero móyejuanga, ndoñe chë bacna bayëjënga chacmóyaunama obenana šmojtsebomnana, sinó tsëngaftangbe uabaina celoca ya yojtsábemanama, er tsëngaftanga chë nyëtscatescama yomna tsabe vida smochántsebomna ca —cha tojanëyana.

Jesús puerte tojanoyejúa
(Mt 11.25-27; 13.16-17)

²¹ Chora Jesús, chë Uámana Espíritbeyeca, corente oyejuayá tojánayana: “Atšë cbatschuá, Taita, celoca y quem luarentša Utabná. Aca, chë nÿe batsá tatsëmbënga tconjanÿanyé, chë tša tatsëmbënga y osertánëngbiama tcojaiytëme soyënga. Aíñe, chama cbontsadorana, Taita, aca chca chaotsemnama tojábóšenayeca.

²² “Atšbe Taitá lempe chca šonjatšetá. Chë Uaquiñábíoye ndocná corente quebnatábuatma; nÿe chë Taitá aíñe. Y chë Taitábíoye ndocná corente quebnatábuatma; nÿe chë Uaquiñá aíñe, y ndëmuanÿengbíoye chë Uaquiñá tojtseboše nda chë Taitá yomnama jinÿanÿiyama, chëngnaca chë Taitábíoye mochantsábuatma ca.”

²³ Chentsana, Jesús chabe uatsjédayëngbíoye tojanobuértana y nÿe chëngbíoye tojanéyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsobenënga! ²⁴ Er atše cbéyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entšabiama cuento

²⁵ Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

²⁶ Y Jesús tbojanjá: —¿Ntšamo leyíñe iuábemana? ¿Ndayá chiñe condétsaliaye ca?

²⁷ Chë ley abuatambayá tbojanjá: —“Chë Utabná Bëngbe Bëtsá cochtsebobonshana nÿets ainánaca, nÿets espítoaca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

²⁸ Chora Jesús tbojanijana: —Tšabá šconjojuá. Chca cochtsama y chë nÿetsca tescama yomna tšabe vida cochántsebmoma ca.

²⁹ Pero chë ley abuatambayá tšabá jenoquédamna Jesúsbiyoye tbojantjá: —Y ¿ndase chë ndëmua entšánaca yomna ca?

³⁰ As Jesús tbojanjá: —Canÿe, Jerusalenocana Jericó benache canÿe entšá yojtsetsmá, y básefta salteadorënga imojébëbocna. Lempe imojtsefca, chë entšáyánaca; imojtsejantšetaye y chentsana imojtsatónënga, y chë entšá batsá obaná imojéseboshjona. ³¹ Ndeolpe, chë benachëjana canÿe judiëngbe bachna yojtsachnëjuana. Chë entšábíoye ibojinÿe ora, nÿe chabuacá yojtsëchnëguañe. ³² Cachcá, canÿe Levita, chë canÿe Bëngbe Bëtsabe bëtsenocna trabajayá chëjana yojtsachnëjuana; y chë entšábíoye ibojinÿe orna, nÿe chabuacá yojtsëchnëguañe.

³³ “Chorna, cach benachëjana canÿe samaritano ináboye. Chë entšábíoye ibojinÿe orna, ibojóngmia. ³⁴ Chábíoye yojobeconá, aceitiye y vínoyeca ibojáshna, y lisianënguñe entšëjuaca ibojuantsacjuá. Chabe couayíñe ibojëftsensjayiye, canÿe yebnoye posada uyentsámianoye ibojuánatse, y chentše chábíoye ibojëftsinyëna. ³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduíñbíoye ibojesabuenaye, y mëntšá ibojauyana: ‘Quem boyabása cochtsinyëna, y nderado más crocénana muabiama chacojenábojafjonasna, mëjana chaitísachnëjuana ora, cbochjabáisabuenaye

ca.’ ³⁶ Y chcasna, ¿chê unganguentšana nda cmojtsinýana chê entšabiama yojtsejuabnaye cha cachacá entšá inamnama ca?”

³⁷ Y chê ley abuatambayá tbojanjuá: —Chê entšabiama tbojanongmé cha ca.

Y Jesús tbojaniana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachějana yojtsaye y canýe base pueblotémoye tojéftsanamashēngo; y canýe shembása Marta ca uabainá, chabe yebnentše tbojanofja. ³⁹ Martna canýe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; ⁴⁰ y chēntscuana Marta ba soyēnga yojtsama. Cha Jesúsbiolye tojanobeconá y tbojaniana: —Utabná, ¿tundayana cmontsentšamna, atšbe quenata nýe canýa chašonýá lempe jamama ca? Mēyana chašujabuache ca.

⁴¹ Chora Jesús tbojanjuá: —Marta, Marta, bētscá soyēngama contsenócochinýena y contsenomantšná; ⁴² pero nýe canýe soye endmēna chē yoiyta soye jamama. María chca jamama tojobuáyana, chē más tšabe soye, y ndocná queochatsma cha chaotsajbanama ca.

11

Ntšamo Bēngbe Bētsáftaca cuanjencuénta

(Mt 6.9-15; 7.7-11)

¹ Canýe, Jesús Bēngbe Bētsáftaca ibojtsencuéntaye canýe luarentše. Tojanpochocá orna, canýa chabe uatsjendayēnguentšá tbojaniana: —Bēngbe Utabná, Bēngbe Bētsáftaca jencuéntama šmabuatambá, ntšamo Juan chabe uatsjendayēngaftaca tojanmca ca.

² Y Jesús tojanéyana: —Bēngbe Bētsáftaca chašmojtsencuénta ora, šmochjayana:

Bēngbe Taitá, acbe uabaina chē más uámana uabainana chauesomñe.

Acbe amēndayana chaóshjango.

³ Mēnté šmiyatšatá, cada te šnetsējaboto tandēse.

⁴ Bacna soyēnga fsēnjama: šmotsaperdónaye;

er bēngnaca nýetscanga chē bēngbiana bacna soyēnga amēngbiolye fsēndbetsaperdónaye.

Bacna soyēnga jamama šojocohēngo ora, šcochjuyabuache chca nde-nobuíyama.

⁵ Jesús mēntšánaca tojanéyana: “Nderado aca acbe bacóbiolye tsēntseto ora tcojá y tcojauyana: ‘Bacó, Diosmanda unga tandēse šmotsemná, ⁶ er canýe atšbe amigo yebnoca tonjáshjango y tondaye quetsátsbomna cha jonánjama ca.’ ⁷ Ndegombre, cha tsocana tcmojojuá: ‘Ndoñe šmatébyabomana. Bēšása ya entsatámena y atše y atšbe básenga ya fsēntsojá; ndoñe quetsátobena mora jotsbanana y chē tandēse jámnana ca.’ ⁸ Ndegombre, chē bacó ndoñe tonjotsbaná chē tandēse jámnama, cháftaca šuenatsētsnámase, cha pronto jotsbanana chca uébēyabomana ndoñe tconjajbaná causa, y lempe ntšamo cmojtsajabotcá cha cmochanjoiye. ⁹ Chcasna, atše chéyana: Šmochjotjañe y Bēngbe Bētsá cmochanjáštaye; šmochjánguango y šmochanjínýena; šmochjachembo y cmochanjébētafjo. ¹⁰ Er ndánaca ndayá tojtsotjanañá, jóyēngacñana; y tojtsenguá cha, jónýenana; y nda tojtsechembuanábolye jebiatēfjuana ca.

11 “¿Nda tsëngaftanguentšana nantsobena, taitá tojtsemnëse, cachabe uaquinábioye canýe mëtscuaye jatštayana, beona tbojtsotjanañe ora; 12 o canýe alacránashe joyiyana, shëmnëbé tbojtsotjanañe ora? 13 Y chca, tsëngaftanga, bacna soyënga amënga, tsëngaftangbe basetemëngbioye tsabe soyënga jatštayama šmojtsamanëse, imás chë celoca Taitá, chë Uamana Espíritu echanjatsataye, chca tmojtsotjanañëngbioye ca!” —Jesús tojánayana.

Fariseunga tmojánayana Jesús Satanásbentšana obenana tojanóyëngacñe ca (Mt 12.22-30; Mc 3.20-27)

14 Jesús canýe entšábentšana canýe bacna bayëja tbojtánabocna. Chë bayëja ndëbiá chë entšábioye tbojánbema, y chábentšana tojésanbocna ora, chë ndëbiá tojtanontsé oyebuambnayana. Y chë entšanga chama imojenjnaná; 15 pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatsëtá chë bayëjënga chauatëbuacnama ca.”

16 Y inýenga, Jesús jisháchichiyamna tmojanimpadá canýe bëtš soye chaoma, jinýanýiyama cha celoca obenana inabomna o ndoñe. 17 Pero Jesús yojtsetátšëmbo ntšamo chëngbe juabna bëtsemnana. As tojanëyana: “Canýe amëndayábentše entšanga tmojtsenojatá y tmojtsenáyase, cachënga jtsenpochócana; y canýe yebnentše oyenënga tmojtsenojatá y tmojtsenáyase, chë pamillanga tsabá nyets tempo ndoñe quemochásmëna. 18 Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentše jëftsebmnnana? Chca sénttsichamo, er tsëngaftanga šmotsichamo Beelzebube obenánaca chë bayëjënga stsatëbuacana ca; 19 pero chca ndegombre tojtsemnëse, ¿ndábeyeca tsëngaftangbe usetonënga obenana imojtsebmna chë bacna bayëjënga jtëbuacnama? Chíyecna, cachënga montsinýinýná ntšamo ndegombre yomnana, y tsëngaftanga ndoñe ndegombre soye šmotsichámuama. 20 Y atšna, Bëngbe Bëtšabe obenánaca entšángbentšana chë bayëjënga sëndëtëbuacana; y chë soye entsinýinýná, Bëngbe Bëtšabe amëndayana tsëngaftangbioye tojóshjanguama.

21 “Canýe corente añemo bomna entšá, bëtscá ármangaca chabe yebna tojtsinýenëse, chë tsoca tomna soyënga ndoñe ntjotšana. 22 Pero inýa chabiama más añemo bomná tojabo y tbojabetseyëñjaná, chë cha yojanašbuaché armangá jtsabocana y chë tobomna sóynaca; y ntšamo chë inýa tojtsebošcá chë soyëngaca jamana.

23 “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

Ndayá inopása chë bacna entšángaftaca (Mt 12.43-45)

24 “Canýe bacna bayëja canýe entšábentšana tojésebmna ora, bojojo luarënguenache chë bayëja jtsanana, ndayentše jóchnama onguayíñe. Ndoñe tonjínýena ora, jenójuaboyana: ‘Atšbe oyenoye, chë ndayentšana sënjëftsebmnoye chanjesshëcona ca.’ 25 Y choye tojtashjango ora, jinýenana lempe tsabá cha jtsamashënguama, mo tsajniñe y prontániñe cuaftsemncá. 26 Chora chë bayëja jana y inýe canýséfta bayëjënga, chabiama más opëjënga jobiatšana, nyetscanga choye jamashjna, chë boyabásabeñe joyënanama. Y chca, chë boyabása tempscama más bacna entšá jtoquédana, chora chë natsanama más bayëjënga abamna causa ca” —Jesús tojánayana.

Chë ndegombre oyejuayana

²⁷ Jesús chë soyënga yojtsichamëntscuana, entšanguentše canÿe shembása yoyuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

²⁸ As Jesús tbojanियana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

Chë bacna entšanga Jesús tmojanimpadá canÿe bëts soye chaoma, chabe obenana jinÿama

(Mt 12.38-42; Mc 8.12)

²⁹ Entšanga más imojtsójoye Jesús yojtsemnentše, y Jesús tojanontsé jáuyanana: “Morsca entšanga puerte bacna entšanga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soyca. ³⁰ Er chca, ntšamo Jonás Nínive puebloca entšanga canÿe bëts soye tojaninÿanÿé Bëngbe Bëtsá obená yomnana chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entšángbioye, Bëngbe Bëtsabe amëndayana tojóshjanguama. ³¹ Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrénga jouenama, y chë mora muentše entsemnana, Salomonbiamá más uamaná endmëna. ³² Chë entšanga tšabá o ndoñe tšabá tmonjamama jayanama te, chë Nínive bëts puebloca entšángnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojtsabuayiyay ora, tmojanoyeuná y chë tšabe benache tmojtanišhache, y chë mora muentše entsemnana, Jonasbiamá más uamaná endmëna ca” — Jesús tojánayana.

Chë cuerpama uajuinÿanësha

(Mt 5.15; 6.22-23)

³³ “Ndocná canÿe uajuinÿanësha juajuinÿenana, canÿe iytëmena luaroye juajájuama, ni canÿe cajonëshe tajsoye, sinó canÿe tšbanana luaroca juajájuama, chca, chë luaroye amashjuanëngbiama chaotsebínÿnama. ³⁴ Acbe bominÿe tšabá totsomñëse, acbe cuerpama mo canÿe uajuinÿanëshacá jtsemnana; chíyeca aca jtsoobenana, ntšamo tcojtsamcá chë bominÿyeca jtsonÿayana. Chë bominÿe ndoñe tšabá tontsemnëna, chë bominÿe tondaye ntsobenana jamana, ntšamo tcojtsamcá chacobená jinÿama. Cachá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëna, lempe ntšamo chacojtsamcá ndoñe tšabá queochátsmëna. ³⁵ Cuedado smochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. ³⁶ Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanësha puerte tšabá tojtsebinÿnacá ca” — Jesús tojánayana.

Jesús chë fariseungbiamá y ley abuátambayëngbiama tojánayana, chënga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canye fariseo tbojanofja chabe yebnoye jauasama. As Jesús tojánamashéngo y mesëshentše tojanótbema. ³⁸ Chë fariseo tojanëuatjaná, Jesús ntsacuentšabiaca jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšabënga firsatsmënama. ³⁹ Pero Bëngbe Utabná tbojaniana: “Tšëngaftanga fariseunga šmondmëna mo entšangcá ndëmuanýënga chë tazëšënga y šcnenënga shjoicajana jtsóbojabiana, pero tsoyna nýe cachcá jonýayana. Tšëngaftanga becá jtsamana entšangbiama mo tšabëngcá jtsinýnama; pero tšëngaftangbe ainanentše jútjena entsemna nýe jtsatbëbanama y bacna soyënga jtsamama juabnëngaca. ⁴⁰ ¡Juabna ndbomnënga! Tšëngaftanga ndoñe šmondëtatsëmbo, chë tšëngaftangbentsana entšanga ndayá jinýama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámána ndayá tšëngaftangbe ainanoye yomna soyënga, y chë entšangbe delante šmojama soyënga. ⁴¹ Tšëngaftanga cmontsamna, chë soyënguiñe ndayá ainaniñe yomnentšana inýengbioye jatsatayana, y chca, lempe ntšamo chašmojtsamcá Bëngbe Bëtsabe delante tšabá echántsemna ca.

⁴² “¡Tša lastema tšëngaftangbiama fariseunga! Tšëngaftanga Bëngbe Bëtsabiana jtsequëcjnayana chë jajañentša sananga bnëtsanentšana canye soye nyëtsá, y chë binche matatémënguentsana menta, ruda y nyëtsca binche matatémënguentsánëncaca; pero nýe batšá jtsamana chë nyëtscanga cachca derechënga chamotsebomnama y cha jtsebobonshánama. Quem soyënga cocayé cmontsamna jtsamana, chë inýe tšabe soyënga ntjajbanacá ca.

⁴³ “¡Tša lastema tšëngaftangbiama fariseunga! Tšëngaftanga tša jtsebošana chë judiëngbe enefjuana yebnënguenache chë más uámána luarënga jtsebomnama, y benachiñe nýa puerte respëtoca entšanga chacmotsacheuanayama ca.

⁴⁴ “¡Tša lastema tšëngaftangbiama! Smondmëna mo obanënga uatbontsaniñcá, ndoñe ntsinýnana, y entšanga ntsetatsëmbcá chiñe jtsebotájayana. Chca šmondmëna, er tšëngaftangbe ainana entsemna jútjena bacna juabnëngaca, pero entšangbiama ndoñe chca quešmátinýna ca.”

⁴⁵ Jesús chca tojánayana ora, canye ley abuatambayá tbojaniana: — Buatëmbayá, chca palabrënga contsoyebuambná ora, bëngbiámncaca ndoñe tšabá quecátichamo ca.

⁴⁶ Pero Jesús tojánayana: —¡Tša lastema tšëngaftangbiámncaca, chë ley abuatambayënga! Mo canye entšá, couáybioye canye uauta uasmanësha tbojuasmá, y chësha ndoñe yapa chaondëtsautama tondaye tontsamcá, tšëngaftanga entšangbioye jtsamëndayana bëtscá mandënga chamotsocumplínama, pero cach tšëngaftanga ni mo batšatëmnaca jtsamana chë mandënga jtsocumplínama ca.

⁴⁷ “¡Tša lastema tšëngaftangbiama! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse; pero chë mo chëngcá, canye buayenana sóyeca tmojabëngbioye ndoñe ntsayaunanana. Y chë tempsquënga chca oyebuambnayëngbioye tšëngaftangbe bëts taitanga tmojtsanëbaye. ⁴⁸ Chca jtsamëse, tšëngaftanga šmontsinýanýná, ntšamo chë bëts taitanga tmojanmcá tšabá yomna ca tšëngaftanga šmojtsejuabnama, er chënga chë oyebuambnayëngbioye tmojtsanëbaye y tšëngaftangna chëngbe cuevëshënga jtsatspórmayana.

49 “Chíyeca, Bëngbe Bëtsá chabe bëts osertanánaca tojánayana: ‘Atše chëngbioye chanjichamuá atšbe juabna oyebuambnayënga y atšbiana abuyaynayënga, y báseftangbioye mochantsëbaye y ín'yëngbioyna mochantsëcamiye ca.’⁵⁰ Y chca, n'yets castigo morsca entsángbeñe echántsemna, n'yetsca Bëngbe Bëtsabe juabna oyebuambnayënga tmojóbanama, Bëngbe Bëtsá quem luare tojanma orscana;⁵¹ Abélbioye tbojanóba orscana, Zacarías tmojanóbantsoñe. Zacaríasna Bëngbe Bëtsabe bëts yebnentse tmojanóba, altar y chë entsanga Bëngbe Bëtsábioye imojánadorana luariñe. Chcasna, Bëngbe Bëtsá echanjama chë oyebuambnayënga tmojanóbanama, morsca entsángbeñe n'yets castigo chaotsemnana ca.

52 “¡Tša lastema tšëngaftangbiana, chë ley abuátambayënga! Tšëngaftanga jtsamana, Bëngbe Bëtsabe soyëngama jtsetatšëmbuama entsángbiana yapa totcá chaotsemnana. Cach tšëngaftanga ndoñe quešmatobena chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

53 Jesús chë soyënga tojánayanama, chë ley abuátambayënga y fariseunga puerte tojánétna, y cha chentšana yojtšaisebocana ora, tmojanontsé chábioye becá tjanayana, y imojtsama ba soyëngama chaóyebuambama,⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebonnama ndáyeca chábioye mal jaquédana.

12

Jesús, chë bacna entsanga ntšamo ndegombre tmojuabnacá ndin'yín'yayëngbiana tojanabuatambá

1 Chëntscuana, ba uaranga entsanga chentše tmojanójoto; tša entsanga causa, n'yetscanga imojtsenatsëntšenaye. Chora Jesús tojanontsé jóyebuambayama, y natsana chabe uatsjëndayëngbioye tojanéyana: “Chë fariseungbe बातëmbana soyëngama cuedado šmochtsebonna, chënga mondmëna bacna entsanga, ntšamo ndegombre tmojuabnacá ndin'yín'yayënga. Ntšamo chë levadura jamana n'yetsana chauábochema, cachcá chëngbe बातëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama. ² Er ndocna yoiytëmena soye, ntjin'yá queochaisoquéda; y chë ndótatšëmbo soye, ntsoatšëmbcá queochaisoquéda. ³ Chíyeca, chë mora n'ye tšëngaftangbiana šmojtšichamo soyënga, chë entsángbiana mo ibetiñcá cuaftsemna soyënga, entsanga chama botamana mochánjátatšëmbona. Y chë iytëcana šmojtšichamo soyënga, n'yetsca entsángbioye mochántsabuyayinaye, mo nda can'ye yebnentša tsbanánocana noticiënga tojtsayebuachcá ca” —cha tojanéyana.

Nda ndegombre cuantsebiauatja (Mt 10.26-31)

4 “Tšëngaftanga, atšbe amiguënga, cbochjáuyana: Ndoñe matauatjëngana n'ye chë tšëngaftangbe cuerpo japochócama imobenëngbiana, pero chentšana más jamana ndoñe ntsobenana. ⁵ Cbochanjabuayená ndábioye cmojtsama jtsabiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

6 “¿Shachna jaja shloftsetémenga ndoñe nye uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. 7 Y tšëngaftangbiana Bëngbe Bëtsá lempe endëtatsëmbo, y bueta stjënëjenga tšëngaftangbe bestšašifne yomnámna. As ndoñe matauatjêngana; tšëngaftanga ba jaja shloftšëngbiana corente más šmonduámna ca” —Jesús tojánayana.

Ndabiana Jesucristo yochjayana chabe entśá yomna ca
(Mt 10.32-33; 12.32; 10.19-20)

8 “Atše cbëyana, nda atšbe entśá yomna ca entšangbe delante tojyanabiama, chë Bëngbe Bëtsá Entśá tbojanbemánaca, Bëngbe Bëtsabe angelëngbe delante echanjayana chë entśá chabia yomna ca; 9 pero nda entšangbe delante, atšbe entśá ndoñe yondmëna ca tojyanabiama, chë Bëngbe Bëtsá Entśá tbojanbemá, Bëngbe Bëtsabe angelëngbe delante echanjayana, cha chabe entśá ndoñe yondmëna ca.

10 “Bëngbe Bëtsá bochanjaperdóna, nda chë Bëngbe Bëtsá Entśá tbojanbemabiama ndoñe tšabá tontsichamuábioye, pero chë Uámna Espíritbiana ndoñe tšabá tontsichamuábioyna ndoñe.

11 “Tšëngaftanga chë judiëngbe enefjuana yebnëngoye, ntšamo entšanga bétsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenëuyanama, o ndáyá šmochjayanama; 12 er chë Uámna Espiritu cmochanjabuayená ntšamo jayanama tojtsemncá, jóyebuambayama chacmojtšama ora ca” —Jesús tojánayana.

Entšabiama resjo yomna, nye yapa bomnana jesejuabayana

13 Chentšana, canýa entšanguentśá Jesúsbioye tbojaniyana: —Buatëmbayá, atšbe catšata momandá chë átsbioye otocana soyënga chašuatoyé ca.

14 Y Jesús tbojaniyana: —Bacó, ¿nda atše šojábema tsëndatbe ujananáy ca?

15 Y entšangbioye tojanëyana: —Šmochjinýe y cuedado šmochtsebomna chë nye yapa soyënga jtsebomnana bošama; er masque bëtscă soyënga chašmotsóbmñe, chca ndoñe quešmochátstatšëmbo aifne tšabe vida taišmochjónýenama ca.

16 Y chora mëntśá tojanacuntá: “Inamna canýe bomna entśá, y chabe fshantsënguiñe tša jaja saná yojtsopodena. 17 Chë bomná chora mëntśá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ 18 Y mëntśá yojeniyana: ‘Chë grano uaquëcnaye yebnënga chantsendbiana, y inýe más bëts yebnënga chanjëtsejebo, y chiñe nyëtca atšbe jaja saná chantsóbcjaye y nyëtca atšbe soyëngnaca. 19 Y chora atše chjeniyana: Bacó, bëtscă soyënga contsebocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’ 20 Pero Bëngbe Bëtsá chábioye ibojauyana: ‘Obëjema, cach quem ibeta cochanjóvana; y asna, chë contsebocjana soye, ¿ndabiana yochtsemna ca?’ ”

21 Y Jesús chora tojánayana: “Chca endbopása chë nye chabiana bomnana tojtsejuabá y bëtscă Bëngbe Bëtsabe soyënga ndoñe tonjëftsashjacháftaca ca.”

Bëngbe Bëtsá chabe básenga jtsanýenana
(Mt 6.25-34)

22 Chentšana, Jesús chabe uatsjëndayënga tojanëyana: “Quem soye cbëyana: Ndoñe šmattsenócochinýena ndáyá šmochjase o šmochjofšije

vida jtsebomnama, ni ndaye entsáyá šmochjuíchëtjuama cach ndoñe. ²³ Ndegombre, vida chë sanama más enduámana y cuerpo chë entsayama más. ²⁴ Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiama puerte más šmonduámana! ²⁵ Masque chca endmëna, masque canya tša tojesenócochinýena, ¿ntšamo nanjobenaye jamana, chë ntsachetšá vida yochtsebomnentšana canýe hora vida más jabotiyana? ²⁶ Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

²⁷ “Smochjuinýe chë lirio uantšëfjushangá jtsajuajnana: ndoñe ntse-trabájayana, ni ntsehabiamnayana. Pero atšë cbëyana, ndegombre ni mo rey Salomón, nýetsca chabe bomnánaca, chë lirio uantšëfjushangacá nýetsá botamana quenjatspormana. ²⁸ Bëngbe Bëtsá tša botamana shácuana tojuama, y chë shácuana mënté jajoca jtsamnana y yëfsana iñoca. Cha chë shácuana chca tojamëse, ndegombre tšëngaftangbiámna Bëngbe Bëtsá echanjama entsáyá chašmotsábomnama, jentšanga Bëngbe Bëtsábeñe nýe batšá ošbuáchiyënga! ²⁹ Chíyeca, ndoñe šmattsenócochinýena ndayá jasama o jofsiyama onguayiñe; ³⁰ er chë soyëngama quem luarentša entsanga mondbësenocochinýena, pero tšëngaftanga ndoñe. Tšëngaftanga canýe Taitá šmondobomna, y cha endëtatšëmbo ndayá cmëjabótama. ³¹ Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtšëjaboto soyënga nýe šmochanjóyëngacñe ca” — Jesús tojánayana.

Chë celoca bomnana

(Mt 6.19-21)

³² “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínýnana chabe amëndayana tšëngaftanga jatšatayama. ³³ Lempe ntšamo šmobomncá šmochtsatobuiye y chë ujabotëngbioye šmochtsatšataye. Mo ndotanguánaye shecnañiñe crocénana cuafjacacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴ er chë ndayentšë tšëngaftangbe bomnana tojtsemnentša soyëngama, ainánaca tšëngaftanga šmochántsejuabnyae ca” — Jesús tojánayana.

Bëngbe Utabná yochjésabama jtseprontánana

³⁵ “Mo chë oservëngë, chë entsáyá uichëtjonënga y uajuinýananëshangaca chëngbe nduiño yochtashjanguama cuafsobatmancá, tšëngaftanga šmochtseprontana Bëngbe Utabná yochjésabama. ³⁶ Chca, tšëngaftanga šmochántsemna mo chë oservëngë, tšabe entsáyaca bopormánënga y uajuinýananëshangaca chëngbe amëndayá casamentocana yochtashjanguama cuafsobatmancá; y chca, chë nduiño tojabochembo ora, cachora chë oservëngë jtebiatëfjuama. ³⁷ Puerte oyejuayënga chë oservëngë, chë nduiño tojtashjango ora tmojtšëfšnënga. Ndegombre cbëyana, chora chë mandayá sëndorëche echantásnyae, mesëshentšë chë oservëngë echanjábiamna, y saná echanjuuatsiye. ³⁸ Puerte oyejuayënga chënga, chë tmojtšëfšnënga cha tojtashjango ora, masque tséntseto ora o bínýanoye. ³⁹ Quem soye tšabá chacmësértá: chë yebnentša nduiño, ntseco

ora atbëbaná yochjabama tojtsetatsëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. ⁴⁰Tšëngaftàngnaca šmochtseprontana, er chë Bëngbe Bëtsá Entšá tbojanbemá echanjésabo, entšanga chama tondaye tmontsejuabná ora ca” —Jesús tojánayana.

*Chë tšabe oservená y chë bacna oservená
(Mt 24.45-51)*

⁴¹ Pedro, Jesúsbióye tbojanayana: —Utabná, ¿chë tconjayana cuento nýe bëngbiana o nýetscangbiana yochtsemna ca?

⁴² Y Bëngbe Utabná tbojanjá: —¿Nda yomna chë oservená, ntšamo chë nduiño tojtsebošcá amá y nýets juábna amá? Cha jtsemnana nda chë nduiño bochjëftsebošhona chë yebnentsënga chaotsanýenama, y jasama tojtsemna ora chaújuatšema. ⁴³ Puerte oyejuayá chë oservená, chë nduiño tojtashjongo ora, cha tbojínýena jtsamëse ntšamo tbojtsemncá. ⁴⁴ Ndegombre cbéyana, chë nduiño chábíoye bochanjaimpáda nýetsca chabe soyënga chabotsinýeñama. ⁴⁵ Pero chë oservená, chabe nduiño betscó ndoñe yochantabo ca tojtsejuabná, y tojontsé chë inýe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, ⁴⁶ cha ndoñe tontsejuabná te y tontsetátšëmbo ora, chabe nduiño echántashjongo y puerte jabuache bochantsecastíga, y echanjama cha jasúfriama chabotsemnana, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. ⁴⁸ Y chë oservená, ntsetatsëmbcá ntšámna tojabuachjuanguá, y chë causa chamotsetjanjama tbojtsemnëšna, chana más batsá mochántsetjanja. Nda bëtscá soyënga tmojatštábíoye jauyanana, bëtscá soyënga chaoma ca; y nda bëtš trabajo tmojabonýébioyna jauyanana, más bëtš trabajo chaoma ca.”

*Jesusbe causa, entšangbeñe más jtsentsjanayana
(Mt 10.34-36)*

⁴⁹ “Atše sënjabo quem luariñe jabojuinýiyama, y jtsa sëntseboše malaye ya ctsangbototjuana! ⁵⁰ Atše šontsemna puerte jasúfriana, y ipuerte ngménaca sëntsobátmana chca chaotsemnama! ⁵¹ ¿Tšëngaftanga šmojtsejuabná atše tijabo quem luarentše entšanga natjëmbana chamotsiyenama? Ndegombre ndoñe chca queochátmëna; atše sënjabo causa, entšanga más mochántsetsjaneyae. ⁵² Er mëntescana, canýe yebnentsë, shachnënga ndoñe quemochántëyeunana, únganga útatbe contra y úta úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebincuabe contra, y bebincuá uambén mamabe contra ca” —cha tojánayana.

*Ndaye tempo yochtsemnama ntšamo inétsotatšëmbo
(Mt 16.1-4; Mc 8.11-13)*

⁵⁴ Mëntšánaca Jesús entšanga tojanéyana: “Tšëngaftanga, chë jantšetëshënga shinýe uenatjëmbambanoicana tojóbochna šmojinýe ora šmondbëtsichamo ‘echanjuatë ca’, y ndegombre chca jopásana. ⁵⁵ Y tsmanoicana tojtsebinýia orna, tšëngaftanga šmondbëtsichamo ‘echanjojënýana ca’, y ndegombre chca jopásana. ⁵⁶ ¡Bacna entšanga, chë ntšamo ndegombre šmojuabnacá ndinýinýayënga! Ntšamo quem luarentše yochtsemnama, ndayá celoca

šmojinŷama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtsinŷanŷnama ca?” —Jesús tojánayana.

Chë uayayáftaca natjëmbana jtenbemana
(Mt 5.25-26)

⁵⁷ “¿Ndayeca cach tšëngaftanga ndoñe šmondbáyana ndayá tšabá bëtsemnana? ⁵⁸ Nderado nda tcmojtse demandá y cabildoye jotsánama cmojtsemna, cabá choye ndáshjango ora, betesco cháftaca cochtenoyántsia. Chca ndóñese, chë demandáyá mandádbioye cmochanjúshjango, y chënga mandadna josticiëngbe cucuatšine cmochanjáboshjona, y chënga cárceloye cmochanjutame. ⁵⁹ Ndegombre cbëyana, chentšana ndoñe quecochtëtsbocna, nŷets ndebénana candesopagantscuana ca” —Jesús tojánayana.

13

Bëngbe Bëtsabe benache jtishachana

¹ Cach ora, báseftanga tmojána Jesús jinŷama, y tmojancuentá ndayá chë mandado Pilato tojanmama; chana básefta Galileoca boyabásenga tojt-sanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buiñeca.

² Y Jesús chënga tojanëyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inŷe boyabásengbiama chënga más bacna soye amënga imojamna causa ca? ³ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴ O, ¿tšëngaftanga šmnëtsejuabnaye, chë Jerusalenentša bnëtsana posufta entšanga tmojanóbanënga, chë Jerusalenoca binche uafajónaye Siloé béconana tshanana jebna soye tojtšanáshajaye ora, chënga imojamna chë inŷenga Jerusalenentše oyenëngbiama más bacna soyënga amënga ca? ⁵ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanëyana.

Chë ndëshajona higo betiyama cuento

⁶ Jesús mëntšá tojanacuntá jabuátambama: “Canŷe entšá jajoca canŷe higo betiye inabomna, y yojá nderado nantseshájonama, pero tondaye yonjinŷena. ⁷ Chcasna, chë jajañe bojanŷábioye cha ibojauyana: ‘Mouena, ya unga uata tsabó quem higo betiyoeye jaborrepárama, nderado nantseshájonama, pero ndocna te tondaye chiyátinŷena; chíyeca, motsetëse. ¿Ndayama quem jajañe yochjátsjena ca?’ ⁸ Pero chë jajañe inŷená ibojauyana: ‘Bacó, inŷe uata cachcá monŷá, fshantse chanjáboplojua y uanganëshe chanjabotboto. ⁹ Nderado chca jamëse, nanjashájona; y ndóñesna, chora cocayé cuantsetëtse ca.’ ”

Jesús canŷe ochnayté, canŷe tsëštjona shembásabioye tbojanshná

¹⁰ Canŷe, canŷe ochnayté Jesús yojontsé entšanga jabuátambana, chë judiëngbe enefjuana yebnentse, ¹¹ y chentše yojtsemna canŷe shembása; cha ya bnëtsana posufta uata yojtsešoca. Canŷe bacna bayëja chábeñe tojánamashëngo y chca tseštjoná tbojtsanbema, y tondayama yontsobena

jtondiríchana. ¹² Jesús chábioye tbojáninýe ora, tbojanchembo y mēntšá tbojaniana: “Batá, mora ya ndoñe šocá quecátsmēna ca.”

¹³ Chora Jesús chabe cucuatšēnga chábeñe tojanjájó, y cachora chē shembása yojtondirícha, y tojanontsé Bēngbe Bētsábioye jētschuayama.

¹⁴ Pero chē enefjuana yebnentša mándayana tbojánētna, Jesús chē shembása ochnayté tbojanshnama, y entšanga tojanéyana: —Chnēngwana te comna jatrabájama; chora šmochjabo jenóshnama; ochnaytese ndoñe ca.

¹⁵ Y Bēngbe Utabná tbojanjúa: —¡Bacna entšanga, ntšamo ndegombre šmojuabnacá ndinýinýnayēnga! ¿Tšēngaftanguentšá ndocná chē ochnayté chabe uacná o chabe burrotēma buanjuajafjoná, juanatsama bėjaye chaofsema? ¹⁶ Chcasna, quem shembása, canýa Abrahámēntšana entšá, y Satanásbe causa bnētsana posufta uata šocá yojtsemna, ¿ndoñe tšabá yondmēna canýe ochnayté chē bayēja jtsebojuánana ca?

¹⁷ Jesús chca tojánayana ora, chabe uayayēnga imojtsēuatja, y nyētsca entšanga imojtsóyejuaye Jesús tša bēts soyēnga yojtsamama.

Chē mostaztiye jenayama cuento

(Mt 13.31-32; Mc 4.30-32)

¹⁸ Jesús mēntšánaca tojánayana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenana ca? ¹⁹ Endmēna mo canýe mostaza jénaye, canýe entšá jajañe tojajecá; chiyna jójuana y canýe bēts betiye jóbemana; tša bētsashe jóbemana, chíyeca chē jaja shloftšēnga chē buacuashēnguiñe uajajonētemēngá jauábopormana ca.”

Chē levadurama cuento

(Mt 13.33)

²⁰ Mēntšánaca Jesús tojánayana: “¿Ndaye sóyeca chjobenaye Bēngbe Bētsabe amēndayama jábuayenama ca? ²¹ Endmēna mo levadurcá; canýe shembása chana jenájuaana unga medida arninýañe, nyētsana chauabochama ca.”

Chē base utēntšá bēsása

(Mt 7.13-14, 21-23)

²² Jerusalenoye benache, Jesús entšanga yojtsabuátambaye bēts pueblēnguiñe y base pueblotēmēnguiñe. ²³ Canýa chábioye tbojantjá: — Bēngbe Utabná, ¿nyē báseftanga imomna chē atsebácanēnga mochtsemnēnga ca?

Y Jesús tbojanjúa: ²⁴—Puerte šmochtsentšena chē base utēntšá bēsásajana jamashnama; er ndegombre cbéyana, banga mochántseboše chējana jamashnama, pero ndoñe quemochatobenaye. ²⁵ Chē yebnentša nduíño chaojotsbaná y chē bēsása chaojtatámentšana, tšēngaftanga chē shjoca chašmojtsemnēnga, šmochántsechambuana, mēntšá jtsichámēse: “Utabná, šmēbētafjo ca.” Pero cha cmochanjáuyana, “Atše ndoñe quetsátstatsēmo ndēmoquēnga tšēngaftanga šmomnama ca.” ²⁶ Chora tšēngaftanga šmochanjontsé ichámuana: “Acaftaca cánýiñe fsēnjase y fsēnjofsé, y aca bēngbe tsáshenañe tconjabuatambá ca.” ²⁷ Pero cha cmochanjójuaye: “Ya tcbonjáuyana, ndēmoquēnga šmomnama ndoñe tstátšēmo ca. ¡Atšbentšana mojuánanga, bacna soyēnga amēnga ca!

²⁸ “Chora chentše puerte šmochanjenóbošachna y tsetšanama juatsašēnga šmochantsenofťšojnaye, Abraham, Isaac, Jacob y nyētscanga Bēngbe Bētsabe juabna oyebuambnayēnga Bēngbe Bētsabe amēndayoca imojtsemnama chašmojinýe ora, y tšēngaftanga chentšana cmochťēbuacanama. ²⁹ Y shinýe

bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiamá Bëngbe Bëtsabe amëndayentše. ³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

Jesús tbojanongmé Jerusalenentša entšangbiamá

(Mt 23.37-39)

³¹ Jesús chë soyënga tojanëyana ora, básefta fariseunga tmojánashajna y tmojanayana: —Muentšana motsatoñe; Herodes entseboše aca jtsóbama ca.

³² Y Jesús tojanëjua: —Motsajna y šmochjauyana chë corente studio bomná, mo tjañe mesetá: “Minýe, mënté y yëfse entšangbentšana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.” ³³ Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tšabá ntsemnana canýa Bëngbe Bëtsabe juabna oyebuambnayá Jerusalenentša chábuañe chaóbana ca.

³⁴ “Jerusalenentša entšanga, Jerusalenentša entšanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtsbëngaca jtsatëchénganjana jtsëbáyama! ¡Bueta soye atše sënjábošena tšëngaftanga átšbioye júbuajama, mo canýe tuamba chabe bolletotëmënga juatëngmiášha tajsoye cuaftajayecá, pero tšëngaftanga ndoñe chešmátsbošena! ³⁵ Y šmochjinýe, mora atše cachá chochanjesénýaye, y chca, atšna enánanga chochanjésabashejuana, mo canýe yebna cachá tcojesonýa y éañe tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: ‘¡Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

14

Jesús, canýe uafshachanánaca šocábioye tbojanšná

¹ Canýe ochnayté, Jesús tojána jasama fariseunge canýe amëndayabe yebnoye; y chë fariseunga yejuana imojtserreparana, er ndayá Jesús nanjama.

² Chéntšnaca, chabe delante yojtsemna canýe entšá uafshachanánaca šocá.

³ As Jesús chë ley abuátambayënga y fariseunga tojanatjá: “¿Quenlesenciana canýe ochnayté canýe šocá jáshnama o ndoñe ca?”

⁴ Chëngna ndocá tmonjanjúá. As Jesús chë šocábioye tbojánishache, tbojanšná y tbojanayana chaotsatoñe ca. ⁵ Y chë fariseunga tojanëyana: “¿Nda tšëngaftanguentšá, nderado chabe uaquiñá o uacná canýe tboye tojtsótsatše, cachora ndoñe nanjá jetsejátsëcama, masque ochnayté totsomñëse ca?”

⁶ Y chëngna ndocá tmonjanobená cha jojuana.

Chë casamentoye ófjanënga

⁷ Jesús tojáninýe ntšamo chë ófjanënga quëfseroye imojtsachnějuana jotbiamama; as mëntšá chëngna tojanabuayená: ⁸ “Canýe casamentama nda chacmojojfa ora, quëfseroca ndoñe catjótbema, er nderado inýe ofjaná acbiamá más uamaná ústonoye nandaboye; ⁹ y nderado chë tsëndatbe ofjajaná nanjabo y cmatjauyana: ‘Mua chentše chaótbema, maluaré ca’, y chora cmatjotóca ouatjentše chafjoca jana jatótbemana. ¹⁰ Chamna, nda chacmojojfa ora, chafjoca cochjótbema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentše

tmojtsetbiámanëngbiana uamaná cochántsemna. ¹¹ Er nda cachá bëtsá tojt-senobiamná, nduamaná mochántsebema; y nda cachá nduamaná tojt-senobiamná, aife bëtsá mochanjábema ca.”

¹² Y chë tbojanofja entšábioynaca Jesús mëntšá tbojaniana: “Fiesta chacojama o sananga chacojtsebomna ora, ndoñe cattšëbuájajana acbe amiguënga, catšátanga, ni pamállanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantétofja, y chca ya acbe uacanana soye cochántsebomna. ¹³ Chamna, canye fiesta chacojama ora, cochjúbuaja ndbomnjëmënga, jama ndobenënga, coshetënga y jtanënga, ¹⁴ y aca corente oyejuayá cochántsemna; er chënga ndoñe quemochatobenaye cachá aca jtëtofjana, pero acna acbe uacanana soye cochántsebomna, chë Bëngbe Bëtsabe bominiñe tšábënga imomnënga chamojtayena ora ca” —cha tbojaniana.

Chë bëts sanama cuento

(Mt 22.1-10)

¹⁵ Chca tojanuena ora, canya chë mesëshentše tbemaná tojánayana: — ¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

¹⁶ Chora Jesús tbojaniana: —Canye bacó canye bëts saná yojapróna y ba entšanga yojúbuaja. ¹⁷ Juasama ya yojobuache ora, canye oservená ibojíchmua chë ófanënga jáuyanama chamotsajna, ya lempe yojtseprontana ca. ¹⁸ Pero chorna nyëtsanga imojntšë jtsoyátšëmbuana. Canya yojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” ¹⁹ Inya yojayana: “Bnëtsana toronga sënjobuámiñe, y šontsemna jana jányama, jaárama taimochjosérvia. Chcasna, aslëpaye šmotsepacenciá ca.” ²⁰ Y inya yojayana: “Cabá mora sëntsobouamá, y chë causa, ndoñe quichatobenaye jama ca.” ²¹ Chora chë oservená yoješshëcona y lempe chabe nduiñbioye ibojauenaye. Chë nduiño tša ibojtsetna, y chë oservenábioye ibojauyana: “Cam ora motsa tsashenangoye y benachëngoye, y moye cochjunatse ndbomnjëmënga, jama ndobenënga, jtanënga y coshetënga ca.” ²² Chentša bënëntscose, chë oservená chë nduiñbioye ibojauyana: “Bacó, ya sënjama ntšamo šconjamandacá, y cabá inyëngbiana luare entsemna ca.” ²³ As chë nduiño ibojauyana: “Motsa benachëngoye y betiyetemëngaca jetjaniñëngoye, y entšanga cochjautáriaye moye chamuábama, atšbe yebna chaojtjama; ²⁴ er ndegombre cbëyana, chë natsana sënjobuajënguentšá ndocná atšbe saná queochatsse ca.”

Ntšamo yomna Cristbe ustoná jtsemnama

(Mt 10.37-38)

²⁵ Mallajta entšanga Jesús imojtsëstona; as cha tojanobuértana y tojanëyana: ²⁶ “Nderado nda átšbioye tojabo, y ntšamo chabe taitá, chabe mamá, chabe shema, chabe básënga, chabe catšátanga y uabënanga tubabuányëshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntsoybenana atšbe uatsjendayá jtsemnana. ²⁷ Y nda, atšbiana ndoñe tontseprontana jasúfria y cruciñe jobanámnaca, y nyëtsca chabe quem luare soyënga ndoñe tonjësebošhona atše juastama, cha ndoñe ntsoybenana atšbe uatsjendayá jtsemnana.

²⁸ “Nderado nda tšëngaftanguentšá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana

chentše yochjuába, y japochócama nÿetsá crocénana tajojtseboimnama?
 29 Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nÿetscanga chca tmojinÿenga, muantsáfchaye y mēntšá muantsichamo: 30 ‘Quemějema jajebuama tonjontsé, y japochócama ndoñe chenatobená ca.’

31 “O ¿ndaye rey inÿe réyefaca jéntsama tbojotocase, natsana ndoñe nanjótbema jajuaboyama, nderado nanjobenaye bnětsana uaranga soldadéngaftaca chë inÿabiøye jayénjanana, chë inÿa uta bnětsana uaranga soldadéngaftaca tojtsabose? 32 Y ndóñesna, chë inÿe rey cabá bēnoça tojtsemna ora, básefta entšanga echanjichamuá, cha jauyanama más tšabá yomna ndoñe jatentsjanayana ca.

33 “Chcasna, ndánaca tšéngaftanguentšá, lempe ntšamo tobomncá ndoñe cachcá tonjesonÿá, cha ndoñe ntsoebenana atšbe uatsjendayá jtsemnama ca” —Jesús tojánayana.

Chë tamó fténana tojtseboimna ora (Mt 5.13; Mc 9.50)

34 “Tamó tšabe soye endmēna; pero chë tamó fténana tojtsóbemēse, tšéngaftanga ndoñe quešmátobena jamana tempcá sanana cachiñe chaot-satsmēnama, ni saná jatamuama. Chë ftēna tamó tondayama ntoservénana, cachcá, chë atšbe uatsjendayēnga jtsemnama tmojtsebošēnga, pero lempe jēseboshjonama ndoñe tmontseboše, cach ndoñe chama ntoservénana. 35 Chë ftēna tamó ndoñe ntoservénana ni fshantsama, ni uanguanēshama. Nÿe jtsēšenana. Chë jouenama tmojtsobenēnga, šmochjouena ca” —Jesús tojánayana.

15

Chë ótsēna oveshabiamna cuento (Mt 18.10-14)

1 Nÿetsca chë Romocama impuesto entšángbioye atjanayēnga y inÿe bacna soyēnga amēnga, Jesúsbioye imojánajna chabe palabra jouenama; 2 y chë fariseunga y ley abuatambayēnga chama Jesusbiamna podesca imojtsoyebuambná, mēntšá: —Mua bacna soyēnga amēngaftaca entsenuta y chéngaftaca entsesá ca.

3 As Jesús mēntšá tojanacuntá, chēnga jabuátambama: 4 —¿Nda tšéngaftanguentšá, canÿe patse oveshēnga tojtsabamna, y canÿa tbojtsobuētšēse, chë inÿe esconēfta bnětsana y esconēfta oveshēnga shēntsjañe ndoñe cachcá nanjesēñÿaye, y nanjá chë otšená jetsenguanguama candētsónÿeñēntscuana? 5 Y tbojtsinÿena ora, oyejuayá chë oveshá jesotantšájuana; 6 y yebnoye tojtashango orna, chabe amiguēnga y juachañe oyenēnga jáchembuana y mēntšá jáuyanana: “Atšeftaca móyejuanga, er chë sēntsanobuetše oveshá sēntsinÿena ca.” 7 Atše cbēyana, cachcá, celócnaca más oyejuayana jtsebínÿnana, canÿe bacna soyēnga amá tšabe benache tojtsachabiamna, y ndoñe nÿa yapa, esconēfta bnětsana y esconēfta tšabe soyēnga amēngbiamna, chë ndoñe yondujaboto bacna soyēnga amana jtsajbanana ca.

Chë crocénana tojtsónÿena shembásabiamna cuento

8 “O mēntšá, ¿ndēmua shembása, bnětsana uámana crocénana tojtseboimna y canÿana tojtsobuētšēse, chora ndoñe canÿe uajuinÿanēsha nanjuajuinÿená, y

cuedádoca chë yebna nantsetsajoy y botamana chë crocénana nantsenguango candëtsónyëñëntscuana? ⁹ Y tojtsinyëna ora, chabe amiguënga y juachañe oyena shembásenga jáchembuana, y mëntsá jáuyanana: ‘Atseftaca móyejuanga, er chë sëntsano buetse crocénana sëntsinyëna ca.’ ¹⁰ Atse cbëyana, cachcá, chë Bëngbe Bëtsabe angelotémëngbeñe oyejuayana jtsebínynana, nye canye bacna soyënga amá chë tsabe benache tojtishachabiamana ca’ —Jesús tojánayana.

Chë uaquiñá bacna benachñe ayá

¹¹ Jesús mëntsánaca tojanacuntá: ‘Canye entsá uta uaquiñata yojánabamna; ¹² y canye, chë ngomënche uaquiñá chabe taitábioye ibojauyana: ‘Taita, atšbe otocana soyënga šmatatšetá ca.’ As chë befta lempe chë uta uaquiñata yojtëjáyate.

¹³ ‘Chentsana baseftaytesna, chë más bobontse uaquiñá lempe ntšamo ibojobuachcá yojtsatobuiye y chë crocénanaca bën luaroye yojtsoñe, y choca, cha nye ntšamo ibojocochëngcá, mocá yojenobuiye, y chca, lempe yojtse-pochóca. ¹⁴ Lempe crocénana yojtsoshañe orna, bëts shëntsana chë luarentse yojóshjango, y chë causa cha ibojotóca shëntseca jtsejétanana. ¹⁵ As, cha yojá trabajo jonguangoñama y yojínýena chë luarentsa canye entsábentse; chana, chabe jajoye ibojichmua cotšënga jtsanýenama. ¹⁶ Chë bobontsna yojtseboše chë cotšbe saná jtšesana, pero ndocná tondaye ibonjanájuatšnaye.

¹⁷ ‘Cabana, botamana yojinýe ntšamo yojtsepasacá, y mëntsá yojenójuaboye: ‘¡Bueta trabájayënga atšbe taitabe yebnentse bëtscá saná mondëtsóboñe, y atšbe muentse shëntsama chanjóbana ca! ¹⁸ Chantá atšbe taitabe yebnoye y mëntsá cha chanjauyana: Taita, šmotseperdoná. Atšbe tijama ndayá Bëngbe Bëtsá ndoñe yondbošcá, y ntšamo aca ndoñe condbošcá. ¹⁹ Mora ya mercedo taitatobuajoñe acbe uaquiñá jtsabánama; nye canye acbe trabajayacá Diosmanda šmatofja ca.’ ²⁰ Chca jëftsenójuaboyëse, yojontsé cachabe yebnoye jtana.

‘Cabá bënoca yojtsemna ora, chabe taitá chábioye ibojinýe, y chabe uaquiñabiamana ibojóngmia, y jajëbenguama betscó yojá; ibojajebengo, ibojtot-sejcuá y tša yojtsóyejuayayama chë uaquiñábioye ibojtámochó. ²¹ Chora chë uaquiñá ibojauyana: ‘Taita, šmotseperdoná. Atšbe tijama ndayá Bëngbe Bëtsá ndoñe yondbošcá, y ntšamo aca ndoñe condbošcá; mora ya mercedo taitatobuajoñe acbe uaquiñá jtsabánama ca.’ ²² Pero chë Taitana chabe oservénënga yojámëndaye: ‘Betsco chë más tsabe entsáyá mauaca y matspormanga, montšabuechëtjo y matšshecochëtjo. ²³ Mora chë más minýica uacná šmochjuánatse y šmochjáshbua. ¡Mochjase y mochjóboyejuaye ca! ²⁴ Quem atšbe uaquiñá mo obanacá endánmëna y mora bënga montsetátsëmbo cha ainá yotsomñama. Quem atšbe uaquiñá mo otšenacá endánmëna y mora tmontsinýena ca.’ Y chentsana imojontsé joboyejuayama.

²⁵ ‘Chë yebnoca fiesta yojtsemnëntscuana, chë mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. ²⁶ As chora cha canye oservenábioye ibojachembo y mëntsá ibojatjaye: ‘¿Ndayá bëngbe yebnentse yojtsopasana ca?’

²⁷ ‘As chë oservená ibojajuá: ‘Acbe uabentsá tontashjango y chama acbe taitá šonjutarié chë más minýica uacná jáshbuama, cha tsabá tojtashjan-guama ca.’ ²⁸ Pero chë uabóchena catšatna corente ibojtsetna y ndoñe yontseboše tsoye jtamashënguana. As cach befta yojábocna chë catšábioye

jaimpádama chauatamashënguama. ²⁹ Chora cha chë taitábíoye ibojauyana: ‘Taita, aca condétatšëmbo bueta uata cbetsajabuáchanama, nÿets tempo cbetseyeunanama, pero ndocna te ni mo canÿe chivotema chešcaisatštá atšbe amiguëngaftaca joboyeuayama. ³⁰ Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabíama tcojášbua ca’ —chë uaquiñá ibojauyana.

³¹ “Chora chë befta ibojojuá: ‘Atšbe uaquiñá, aca sempre átseftaca condétsemna y lempe ntšamo atše tsbomncá acbiámnaca endmëna. ³² Pero mora tšabá entsemna joboyeuayama y joyeuayëngama; er acbe uabentsá mo obanacá endámnëna, y mora bënga montsetátšëmbo cha ainá yot-somñama; mo otšenacá endámnëna, y mora tmonsínÿena ca.’ ”

16

Chë nduiñbe ndoñe tšabe uajabuachaná bía ma cuento

¹ Jesús mëntšánaca chabe uatsjëndayënga tojanacuntá: “Inamna canÿe bomna entšá, y cha ibnabomna canÿe uajabuachaná chabe soyënga chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama. ² Asna, chë nduiño ibojachembo y mëntšá ibojauyana: ‘¿Ntšamo acbíama šmotsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inÿená queochátsmëna ca.’ ³ Chë uajabuachaná yojontšë jenójuaboyana, y mëntšá yojeniyana: ‘¿Y mora ntšamo chtsemna, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sëntsëuatja. ⁴ Ya sëntsetatšëmbo ndayá chjama, chca, atšbe trabajuentšana chašojtábocna ora, atše jtsabamnana ndëmuanÿenga chëngbe yebnentše chašmofjama ca.’

⁵ “Chentšana, canÿánÿa chë chabe nduiñbiyoye ndebënénga yojáchembo. Cányabioye ibojatjaye: ‘¿Ntsachetšá atšbe nduiño icondebena ca?’ ⁶ Y cha ibojojuá: ‘Canÿe patse barrilëšangá aceitiye ca.’ As cha ibojauyana: ‘Muentše acbe recibëcha entsamna; mora mótbema y inÿácha nÿe shachna bnëtsana barrilëšangama matapormá ca.’ ⁷ Chentšana inÿabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canÿe patse medida trigo ca.’ As cha ibojauyana: ‘Muentše acbe recibëcha entsamna; chiñe nÿe posufta bnëtsanama mábema ca.’ ⁸ Chentšana, chë nduiño tšabá yojayana chë ndoñe tšabá ama mayordombíama, cha stúdioca yojamama. Chë nÿe quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binÿnayábenga ndoñe nÿa yapa ca.

⁹ “Atše cbabuayená, quem luarentše, chë bacna soyënga amëngbe luarentša bomnánaca amiguënga smochjábíama, inÿenga jtsëjabuáchanëse. Chca, chë bomnana tojtsopochocá ora chašmotsabamna ndëmuanÿenga chë nÿetsca tescama oyenoye chacmúbuajama ca.

¹⁰ “Nda básefta soyënguñe lempe tšabá tojama, bëtscá soyënguñnaca lempe tšabá echanjama; y nda básefta soyënguñe ndoñe tšabá tonjama, bëtscá soyënguñnaca cach ndoñe tšabá queochatsma. ¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye? ¹² Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbíama yomncá ca?

13 “Ndocná ntsobenana uta mandayata jtsaservénana; er cánÿabioye bochantsáboyénja y chë ínÿabioyna bochántsebobonshana, o cánÿabiamna tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebmomnama tcojtsebošëse ca” —Jesús tojánayana.

14 Chë fariseunga, becá crocénana jtsebmomnama bošënga inmamna, lempe chca chënga tmojanuena, y Jesúsbioye imojtsáboyejuana. 15 As Jesús tojanëyana: “Tšëngaftanga entsangbe delante mo tšábenga cuaftsemncá jtsebmomnamayana, pero Bëngbe Bëtsá endétatšëmbo ndayá tšëngaftangbe ainaniñe yomnama; er ndayá entsanga más tojtsebošcá, Bëngbe Bëtsá jtsáboyénjana ca.

Moisesbe ley y Bëngbe Bëtsabe amëndayana

16 “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuayiyná chë tšabe noticiënga Bëngbe Bëtsabe amëndayocama, y nÿetscanga tša montseboše choye jamashënguama ca.

17 “Más paselo endmëna, celoca y quem luare chaopochocá, y ndoñe chë ntšamo leyinÿe iuayancá, chë ndayá jopásama yomnama, ni mo canÿe punto ndoñe chca chaondëtsemnana ca” —Jesús tojánayana.

Ndayá Jesús tojanabuatambá chë bouamnënga tmojtseñtšenama

(Mt 19.1-12; Mc 10.1-12)

18 “Nda chabe shëmbioye cachcá tbojesonÿá y ínÿaftaca tojtóbouamase, cha chë natsana shëmbioye ínÿaftaca jtseingñayana; y nda chë útšena shëmbásaftaca tojobouamá chana, canÿe uabuatmá jtsebmomnana, y chca, chana canÿe bacna soye jtsamana ca” —Jesús tojánayana.

Chë bomná y chë ndbomnjëma Lázaro

19 “Canÿe bomna entšá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fiestënga yojánama. 20 Canÿe ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bësásëntšë fshantsiñe jótbemana. 21 Quem ndbomnjëma yojtseboše chë bomná yojtšesayentšana yojatquëcjana sanángaca jtoshachayana; y chë quešënga innaboye chabe nguaye cuerpo jajáñjuama. 22 Canÿe te Lázaro yojtsóbana, y Bëngbe Bëtsabe angelënga Abrahambioye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

23 “Chë bomná infernocá puerte ngmëniñe yojtšesufrina ora, tsbanánoye yojontješiyë y bënocá Abraham ibojinÿe, y Lázaro cháftaca yojtsemna. 24 As chë bomná yojuayebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem iñeshoca tša sëntsesufrina ca.’ 25 Pero Abraham ibojauyana: ‘Uaquiná, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënaná contsebmomna. 26 Y inÿe soye, canÿe bëts tuañe entsemna tšëngaftangbiocana mëntscoñe; chca, chë tšëngaftangbioye tuentšana jenachnënguama tmojtsebošënga ndoñe chamondëtšobena, ni chocana bëngbioye cach ndoñe ca.’

27 “Y chë bomná ibojauyana: ‘Masque chca, Taita Abraham, Dios-manda Lázaro michmó atšbe taitabe yebnoye; 28 choca sëndábamna shachna

catšátanga; as chaúyana ntšamo moca atše stsepasana y ntšamo jamëse chënga ndoñe chaondétsamna quem ngménënga luaroye jabama ca.’ ²⁹ Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsaná bema soyënga; ¡chëngbiyoye chamoyauá ca!’ ³⁰ Chë bomná ibojojuá: ‘Ndoñe, Taita Abraham; nderado obanënguentšana canya chëngbiyoye tojase, aifne chë tsabe benache muantishache ca.’ ³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbiyoye ndoñe tmonjójauyana, Bëngbe Bëtsábeñe ndoñe quemochatošbuáchiye, masque canye obaná chauatayenëse, chëngbiyoye jábuayenama ca’ ” —Jesús tojancentá.

17

Resjo yomna, nderado bacna soyënga cuanjama

(Mt 18.6-7, 21-22; Mc 9.42)

¹ Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tsa lastema chë entšabiamna ndabe causa ínënga bacna soyënga tmojama! ² Más tsabá chabiamna nántsemna canye nantsnébé chamotsetamošëntšbua y mar béjayoye chamotsashbuetsë, y ndoñe chë canya Bëngbe Bëtsábeñe ošbuachiyá bacna soye chaomama juanatsana. ³ Cuedado šmochtsebomna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴ Masque nye canye te, canyësëfta soye ntšámna tmojaborlá, y canyësëfta soye ‘chca ndoñe más quebochatsbólra ca’ tmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsábeñe jtsosbuáchiyëse, corente obenana jtsebomnana

⁵ Chë uatsjëndayënga Bëngbe Utabnábiyoye tmojanianyana: —Ošbuáchiyana šmababuaté ca.

⁶ Y chë Utabná tojanëjua: —Tšëngaftanga ošbuáchiyana, batšatema masque nye mo mostaza jenaycá šmojtsebomnëse, quem sicomoro betiyoye šmatjauyana: “quemuentšana mojashtse y mar béjayoca mojë ca”, y quem betiye chca nanjama ca.

Chë oservená ndayá ibomna jamana

⁷ “Nderado canya tšëngaftanguentšá canye bochichnayá tbojtsebomna, cha jajocana tojtashjango jajañe arayocana o uacnënga anýenocana, ¡chábíoye bochjauyana: ‘Matabo y mabose ca’? ⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jaserviama atše candëse y candofšentscuana; y chentšana aca cochjase y cochjofšiyi ca.’ ⁹ Y chë bochichnayábiyoye ndoñe quebochtëtschuaye ndayá tbojuatarieca cha tojamama. ¹⁰ Tšëngaftángnaca cachcá, lempe ntšamo Bëngbe Bëtsá tmojuatarieca chašmojama ora, cmontsamna jayanana: ‘Nduámna oservenënga fsëndmëna; er nye ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana. ¹² Y canye pueblotëmoye tojánashjango ora, bnëtsana boyabásenga bacna nguayanánaca šoquënga chábíoye tmojána; chábentšana bënoca chënga tmojanoquedá, ¹³ y mëntšá imojtsáyebuache: —¡Jesús, Buatëmbayá, šmotsalastemá ca!

14 Jesús chënga tojánanye ora, tojanéyana: —Jerusalenoca bachnángbiyoe motsajna, y chënga šmochjinyányiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. 15 Canya chënguentsá, shnaná yojtsemnama tojáninye ora, yojeshëcona Bëngbe Bëtsábioye jabuache atschuanaye; 16 y Jesusbe delante yojshëntsamentšiyë, jubiaca fshantsóntscóñe yojtsejbéna, y chábioye ibojtsatschuanaye; y chë boyabásana Samarioca entšá inamna.

17 Chora Jesús tbojaniyana: —Bnëtsanënga mondmëna chë shnánënga tmontoquedanga. ¿Ndayentšë chë inye esconëftanga imojtsemna? 18 ¿Nÿë quem boyabása, inye luarocana ashjangoná, tojeshëcona Bëngbe Bëtsá jëtschuayama? ¿Ndáyeca chë inyënga ndoñe ca?

19 Y chë entšábioye tbojaniyana: —Matëtsbaná y motsatoñe; Bëngbe Bëtsábeñe aca icošbuachëyeca shnaná contsatsmëna ca.

Ntšamo Bëngbe Bëtsabe amëndayana yochjóshjango
(Mt 24.23-28, 36-41)

20 Canye, chë fariseunga Jesús tmojantjá, mocna ora chë Bëngbe Bëtsabe amëndayana yochjanóshjanguama; y cha tojanéjua: “Bëngbe Bëtsabe amëndayana chaojóshjango ora, tšëngaftanga ndoñe quešmochatobenaye chca jinýana. 21 Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëtsabe amëndayana ya tšëngaftangbeñe entsemna ca” —cha tojánayana.

22 Jesús chabe uatsjéndayënga tojanéyana: “Canye tempo echanjóshjango, y chora tšëngaftanga šmochántseboše canye te jtsebomnana, ntšamo chë Bëngbe Bëtsá Entšá tbojanbemá tšëngaftangbeñe enjëftsemna orcá; pero chora ndoñe chca queochatóshjango. 23 Chora báseftanga mochántschiamo: ‘Muentšë entsemna’ o ‘Choca entsemna ca’; pero choye ndoñe šmatjá, ni šmatjúseto. 24 Er chë tojatcuinye ora, ntšamo celoca catoica juachoica tojabuash-inýinyenacá, chca echántsemna chë Bëngbe Bëtsá Entšá tbojanbemá quem luaroye chaojésabo te. 25 Pero natsana cha bontsemna puerte jasúfriana, y morsca entšangbiana uabotená jtsemnana.

26 “Ntšamo Noé yojaniyena ora tojanopasacá, cachcá echanjopása chë Bëngbe Bëtsá Entšá tbojanbemá quem luaroye chaojésabo ora. 27 Chë tempo, entšanga imnasaye, imnofšësnaye, imnóbouamnaye; natjëmbana imojtsiyëñe, y chca, natjëmbana imojtsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojtsanapochocá. 28 Cachcá ntšamo Lot yojaniyena ora tojanopasacá: entšanga imnasaye, imnofšësnaye, imnóbouamnaye, imojtsena, sananga imnajena y imnajebuana; 29 pero Lot Sodoma bëts pueblentsana tojëftsanbocna ora, Bëngbe Bëtsá tojanma celocana inëshe y azufre chauaftema, y chentša entšanga tojtsanapochocá. 30 Cachcá echántsemna chë Bëngbe Bëtsá Entšá tbojanbemá chaojtonýná ora.

31 “Chë tena, nda cachabe yebnentša tsbanánoca chaojtsemna, y chabe soyënga cach tsoca tojtsebomñëse, chocana ndoñe chaondëstajango chë soyënga jesabobocnama; y nda jajoca chaojtsemna, yebnoye ndoñe chaondëta. 32 Menójuabonga ntšamo Lotbe shëmaftaca tojanopasama. 33 Nda tojtsentsëna quem luarentšë bëtscá jtsebomnana y atšbiana jasúfriana ndoñe tontseprontana, chë nÿetsca tescama yomna tšabe

vida echanjobuetse. Pero nda quem luarentša soyënga cachcá tojonýa atše juastama, masque chaóbana, chë nyetsca tescama yomna tšabe vida echántsebomna.

³⁴ “Atše chëyana, chë ibeta, chë Bëngbe Bëtsá Entšá tbojanbemá chaotonýna ora, útata canýe jutsnëshañe bochántsemna; canýa mochanjesbetše y chë ínýana ndoñe. ³⁵ Uta shembásata cánýiñe bochántsejanýcoye; canýa mochanjesbetše y chë ínýana ndoñe. ³⁶ Uta boyabásata jajoca bochántsetrabajaye; canýa mochanjesbetše y chë ínýana ndoñe ca” —cha tojanéyana.

³⁷ Chora chë uatsjédayënga Jesús tmojantjá: —Utabná, ¿ndëmoca chca yochjopása ca?

Y cha tojanjúá: —Chë obanabe cuerpo tojtsemnentše chë gallinacënga jojotana ca.

18

Chë viudá y chë mandadbiama cuento

¹ Jesús mëntšá tojanacuntá, entsanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebomnama ndocna te ntjajbanacá. ² Mëntšá tojánayana: “Canýe pueblentše canýe mandado inamna; chana ni Bëngbe Bëtsábioye ndoñe bonjánebiauatja, ni entsanga yonjánayaunana. ³ Chë pueblentše canýe viudánaca inamna; chana canýe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’ ⁴ Bayté chë mandado ndoñe yonjábosena chë viudábioye joyeunayama; pero chentšana cha yojenóuaboye: ‘Masque Bëngbe Bëtsá ndoñe quetsátebiauatja, ni entsanga ndoñe quetsátayaunana, ⁵ pero quem viudá cada ora endabó causa, aiñe chanjóyeunaye, chabe uayayá chanjacastíga; ndoñesna cada te nandaboye y cabana ya šochanjanamëntša ca.’ ”

⁶ Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. ⁷ Y chca, ¿Bëngbe Bëtsá chabe bocacánënga ndoñe yochanjátsebacye? Chënga mora ínýengbe causa montsesufrina y cada te Bëngbe Bëtsá mondbëtseimpadana chaújabuachama. ¿Más chamuato-batmá ca yochjáuyana? ⁸ Atše chëyana, Bëngbe Bëtsá betesco tšëngaftanga cmochanjátsebacye, tšëngaftanga chë ínýengbe causa mora šmojtseufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entsanga yochjánýena ca?” —Jesús tojánayana.

Chë fariseo y chë Romocama impuesto atjanayabiama cuento

⁹ Báseftanga imojtsanjuabná chënga tšabe entsanga inmamna ca, pero chë ínýengbioye imojtsëbuayënja; chíyeca Jesús mëntšá tojanacuntá jabuátambama: ¹⁰ “Uta boyabásata Bëngbe Bëtsabe bëts yebnoye tbojána Bëngbe Bëtsáftaca jencuéntama: canýa yojamna fariseo, y chë ínýana, canýe Romocama entšángbioye impuesto atjanayá. ¹¹ Chocna chë fariseo, tsanana Bëngbe Bëtsábioye mëntšá ibojtsecuéntaye: ‘Bëngbe Bëtsá, chontsatschuaná atše chë ínýengcá ndoñe quetsatsmënama: atbëbanënga, puerte bacna soye amënga y shémbioye ínýaftaca íngñayënga; y ni quem Romocama impuesto atjanayacá ndoñe quetsatsmënama. ¹² Atše sënduamana, ácaftaca jencuéntamna, canýe semaniñe uta soye tondaye ntjascá jtsemnana; y lempe stjonýenentšana,

bnétsanentsana canye soye acbiama sëndëquécjná ca.' ¹³ Pero chë Romocama impuesto atjanayana, bënoca yojtsemna, ni celoye ntjontjesiycá, yojtsenócochjantsetaye y mentsá yojtsichamo: '¡Atšbe Bětsá, šmotselastemá, atšajema bacna soye amá tsměna causa ca!' "

¹⁴ Chentsana Jesús tojánayana: "Atše cběyana, quem Romocama impuesto atjanará chabe yebnoye tojtaná chabe bacna soyěngama perdónaná, pero chë fariseo ndoñe. Er nda cachá bětsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bětsá mochanjábema."

Jesús, basetémęgbiama Bęngbe Bětsábioye tbojanimpadá
(Mt 19.13-15; Mc 10.13-16)

¹⁵ Entšanga imojanamana Jesúsbioye basetémęnga junatsana chauabájajuama, y Bęngbe Bětsábioye chęngbiama chaboimpadama; pero chë uatsjėndayęga chca tmojáninýe ora, tmojanontsé chë basetémęnga unachayęga jtsēcácanana. ¹⁶ Pero Jesusna chë basetémęnga tojánachembo, y mentsá tojánayana: "Cachá mónýaye chë basetémęnga átšbioye chamuabo, y ndoñe matéuyanana; er Bęngbe Bětsabe amęndayana endmėna chë mo quem basetémęgcá imomnęgbiama. ¹⁷ Ndegombre cběyana, nda Bęngbe Bětsabe soyęnga ndoñe tonjóyęngacñe mo canye basetemcá jtsošbuáchiyěse, cha ndoñe queochatobenaye Bęngbe Bětsabe amęndayoye jamashęnguama ca."

Canye bomna entsá Jesúsbioye tojána
(Mt 19.16-30; Mc 10.17-31)

¹⁸ Canye mandayá Jesúsbioye tbojantjá: —Tšabe Buatėmbayá, ęndayá šojtsemna jamana chë nyetsca tescama yomna tšabe vida jtsebomnama ca?

¹⁹ Y Jesús tbojanjúa: —¿Ndáyeca šcjayana "tšabia ca"? Tšabia nýe canýa endmėna: Bęngbe Bětsá. ²⁰ Aca condėtatšęmbo ntšamo Bęngbe Bětsá tojanmandacá: "Acbe shema ínýaftaca ndoñe cattseingñaye, inýa ndoñe catjóba, ndoñe catjatbėba, ndoñe catjuaboínýena y acbe bětsętsata ndoñe stętsoye catjáquedaye ca."

²¹ Chora chë boyabása tbojanjúa: —Atše lempe chca básetema orscana sęndocumplina ca.

²² Jesús chca tojanuena ora, tbojanियana: —Cabá canye soye cmontsebuáshbena jamana: lempe ntšamo icobomncá cochjetsatobuiye, y chë crocėnana, ndbomnėjėmęga cochtsatsataye; chca, celoca canye bęts bomna cochántsebomna. Chentsana, cochjabo y šcochjuasto ca.

²³ Chë entsá chca tojanuena ora, puerte ngmėnaca yojtsemna, er cha corente bomná inamna. ²⁴ Chca ngmená tbojáninýe ora, Jesús tojánayana: —¡Yapa totcá bomnęngbiama entsemna Bęngbe Bětsabe amęndayoye jamashęnguama! ²⁵ Ndegombre, más paselo endmėna canye camello chë coshufjentsa atėfjnėjana chauachnęgo, y ndoñe canye bomná Bęngbe Bětsabe amęndayoye jamashęnguana ca.

²⁶ Chora, chë chca imojouenęga tmojánayana: —¿As nda yochjobenaye atsbočaná jtsemnana ca?

²⁷ Y Jesús tojanjúa: —Ndayá entsanga ndoñe mondobena jamana, Bęngbe Bětsá aíñe endobena jamana ca.

²⁸ Chora Pedro, Jesúsbioye tbojanियana: —Bęngbe Utabná, aca contsonýá, bęnga lempe chë fsęndbomna soyęnga fsęnjėseboshjona, y áaftaca fsęntsajna ca.

²⁹ Jesús chora tojanéyana: —Ndegombre cbéyana, ndánaca Bèngbe Bètsábioye jaserviama, chabe amëndayama jtsabuayiynayése, cachcá tojëftseboshjona chabe yebna, shema, catsátanga, bètsétsanga o básenga, ³⁰ cha mora quem luarentse chë soyëngama más echanjóyëngacñe, y chë inye luarocna, chë nýetsca tescama yomna tšabe vida ca.

Jesús cachñe tojánayana cha jóbanama y jtayenama

(Mt 20.17-19; Mc 10.32-34)

³¹ Jesús chabe bnétsana uta uatsjëndayënga barie tojánachembo, y mëntšá tojanéyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bèngbe Bètsabe juabna oyebuambnayënga, chë Bèngbe Bètsá Entšá tbojanbemabiama tmojanabemcá; ³² er choca cha chë ndoñe judiëngbe cucuatšñe mochanjáboshjona, y mochantšáboyejuana, mochanjóyenguango, mochantsebuashëttojo; ³³ y chamojátjanjentsana, mochanjóba, pero unga tianoye cha echántayena ca.”

³⁴ Chë uatsjëndayënga tondaye tonjanësertá, ni montsetátšëmbo ndayá bétsemnana ntšamo Jesús yojtšetsëtsnacá, er chëngbiana yojamna josértama ndopodena soyënga.

Jesús, Jericó puebloca canye jtanábioye tbojanshná

(Mt 20.29-34; Mc 10.46-52)

³⁵ Tojanopasá, Jesús Jericó puebloye yojtsebëconaye ora, canye jtaná be-nache juachañe inatbemana, lemošna otjanañe. ³⁶ Entšanga chëjana imo-jtsachñëjuanama tojanuena ora, yojanotúcia ndayá yojtšopasana ca, ³⁷ y chë entšanga tmojaniyana, —Jesús Nazaretocá entsebeconá ca.

³⁸ As cha yojtšé uayebuáchana: —¡Jesús, Davidbentsana Entšá, šmotselastemá ca!

³⁹ Chë natsana imojtsajnënga chë jtaná imojtsácacana, iytëca chaóbemama; pero cha más yojtšáyebuache: —¡Davidbentsana Entšá, šmotselastemá ca!

⁴⁰ As Jesús tojantsá y tojanmandá cha chamobetsama. Cha ya bécoñe yo-jtsemna ora, Jesús tbojantjá: ⁴¹ —¿Ndayá cojtseboše atše acbiama chjamama ca?

Y chë jtaná tbojanjuá: —Atšbe Utabná, atše sëntseboše chašuatábínýnama ca.

⁴² Chora Jesús tbojaniyana: —Matinýe, Bèngbe Bètsábeñe betsošbuachéyeca shnaná contsatšmëna ca.

⁴³ Y cachora cha tšabá ibojtabinýna, y Jesúsbioye ibojtséstona, Bèngbe Bètsá atschuanaye. Y nýetsca entšanga, chca tmojáninýe ora, Bèngbe Bètsá imojtsatschuanaye.

19

Jesús y Zaqueo

¹ Jesús Jericó puebloca tojánashjango ora, chë pubblëjana cha yojtšachñëjuana. ²⁻³ Chora, canye bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bëtscá entšanga causa y cha becuá inamna causa. ⁴ Chcasna, cha betscó natsanoye tojaftsánótjajo y canye sicomoro betiyeshoye tojánášëngo, chca, Jesús chëjana tojtšachñëjuana ora, jinýama jobenayama. ⁵ Jesús chë betiyeshoye tojánashjango ora, tsbanánoye

tojanontješe y Zaquéobioye tbojáninye. As Jesús tbojaniyana: “Betsco chocana matastjango, Zaqueo, er mēnté chanjá acbe yebnoye jatema ca.”

6 Chora Zaqueo betscó tojanastjango y chentšana puerte oyejuayá Jesúsbioye tbojanofja. 7 Entšanga chca tmojáninye ora, tmojanontsé Jesusbe contra mēntšá ichámuana: “Jesús tonjá canye bacna soyēnga amabe yebntše jatema ca.”

8 Chora Zaqueo tojantsá, Bēngbe Utabná Jesúsbentše, y mēntšá tbojaniyana: —Mouena, atšbe Utabná, atšbe homna soyēnguentshana tsēntsañe ndbomñejēmēnga chanjásataye y nda más crocénana tijēftseyēngacá, chē ntsachetšá tijēftsefcama canta soye más chantoyiye ca.

9 As Jesús tbojaniyana: —Mēnté, aca acbe bacna soyēnguentshana atsbocaná contsemna, er Zaqueo, ácnaca Abrahámbentšana entšá condmēna. 10 Er chē Bēngbe Bētsá Entšá tbojanbemá tojabo chē pochocánēnga jtsemnama imojtsajnēnga jabétsanguama y jabátsebacama ca.

Chē crocénanama cuento (Mt 25.14-30)

11 Entšanga chē soyēnga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chē Bēngbe Bētsabe amēndayana ya yochjanóshjango ca.

12 Jesús tojanéyana: “Canye luarentša uámana entšá inye bēn luaroye yojá, cachabe luarentša rey chamobemama y chentšana cachábioye jtama.

13 Cabá nda ora, chabe bnétsana oservénēnga yojáchembo y bētsca crocénana cada cánýabioye yojéftsayentšbuachiye, y mēntšá yojéftséyana: ‘Quem crocénana trato šmochjábema atše candétabēntscuana ca.’ 14 Pero cachabe luarentša entšanga cha imojuáya, as chēngna básefta entšanga imojichamuá chē inye bēn luaroca mēntšá chamuayanama: ‘bēnga ndoñe queftsátsboše cha bēngbe rey chaotsemnama ca’.

15 “Pero pronto chē luarentša rey cha imojábema. Y chē luaroye yojtá orna yojamánda chē crocénana yojéftsayentšbuáchenga chamobéconama, jtsetatšēmbuama ntsachetšá cada ona chē crocénanaca yojongánama. 16 Chē natsaná yojáshjango y yojayana: ‘Taita, acbe crocénana bnétsana soye más tonjoboté ca.’ 17 Y chē rey ibojojuá: ‘Tša tšabá, tšabe oservená. Aca quem base soyiñe ntšamo tbojamandacá tšabá tcojámayeca, bnétsana pueblentša mandado chacotsemnama cbojayé ca.’ 18 Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ 19 Y chē rey ibojauyana: ‘Acnaca shachna pueblentša mandado cochántsemna ca.’

20 “Chorna inya yojobeconá y mēntšá yojayana: ‘Taita, muentše acbe crocénana entsatsmēna; canye pañueléjuañe bonguana séntsejajo. 21 Atše acbiana uatjana šonjuábuache, er aca canye tšátjaye entšá condmēna; aca chē ndoñe condbuajonentšana jocñana y chē ndoñe tconjajé luarentšana jaja saná jobuátbanana ca.’ 22 As chē rey ibojauyana: ‘Bacna oservená, cach acbe palabrēngaca chanjñyanýiye aca ndoñe tšabá tconjamama. Atše chē ndoñe sēndbuajonentšana jocñana y chē ndoñe sēnjajé luarentšana jobuátbanana tsuamana icójatátšēmbēse, 23 ¿ndáyeca ndoñe tconjá chē crocénana bancoca jetsobuájuama, y atše camoye matjtabo ora, mašctoyé chē crocénana y chē chentšana tojoboté crocénanēnaca ca?’ 24 Y chē chentše imojtsemna entšanga yojáuyana: ‘Chē crocénana motseboca y chē bnétsana soye más tojobotébioye chana motsatsetá ca.’ 25 As chēnga imojojuá: ‘¡Pero cha ya bnétsana soye más

entsebomna ca!’ ²⁶ Y chë rey yojóju: ‘Atše cbéyana, nda tojtsebomnábiöye, más mochanjátsetaye; pero nda tondaye tondbomnábiöye, chë tojtsejuabná batšatema yobomna sóynaca mochántseboca ca. ²⁷ Y chë atše uayayënga, chë chëngbe rey atše chaitsemnana ndoñe monjánbošëngna, moye mënatsé y atšbe delante šmochtsëbaye ca’ ” —cha chora yojayana.

Jesús Jerusalenoye tojánashjango
(Mt 21.1-11; Mc 11.1-11; Jn 12.12-19)

²⁸⁻²⁹ Chca tojëftsanayana chentšana, Jerusalenoye yojétsaye ora, Jesús tojánashjango canye tjšashoye, Olivos ca uabáiniñe, Betania y Betfagé pueblënga béconana. Chora, uta chabe uatsjëndayata tojanichamó, ³⁰ mëntšá jáuayanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Sochjuajafjoná y sochjuánatsé. ³¹ Y nderado nda ndáyeca šojtsajafjná ca chacmojátjasna, sochjauyana: ‘Bëngbe Utabná bontsajaboto ca.’ ”

³² Chë uatsjëndayata tbojána y lempe ntšamo Jesús tojanëyancá tbojáninýena. ³³ Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

³⁴ Chora chata tbojánayana: —Bëngbe Utabná bontsajabótoyeca ca.

³⁵ Chentšana Jesúsbiöye chë burrotema tmojanánatsé, y chë burrotëmbeñe chatbe entšayá tbojanátjatsé, y chábeñe Jesús tmojanenjayé. ³⁶ Y cha yojtsachnëjuana ora, entšanga chëngbe entšayá benachëjana imojtsëtëtsatsana.

³⁷ Olivos tjšashe tsmanoye yojtsebeconá ora, chë bëtsá entšanga, Jesúsbeñe ošbuáchiyënga, tmojanontšé uayebuáchana y Bëngbe Bëtsá oyejuayënga jëtschuayana, Bëngbe Bëtsabe obenánaca bëts soyënga Jesús tojanmama. ³⁸ Chënga mëntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bëtsá matschuanga!”

³⁹ Chë entsänguentšé básefta fariseunga imojtsemnënga, Jesús tmojanianyana: —Buatëmbayá, acbe ústonënga mëcácana chca ndoñe chamondëtsáyebuachama ca.

⁴⁰ Pero Jesús mëntšá tojanëjua: —Ndegombre cbéyana, mënga iytëca tmojobiamëse, chë ndëšbenga muanjuayebuáchena ca.

⁴¹ Jesús Jerusalén béconana tojánashjango, y chë bëts pueblo tojáninýe ora, chentša entšangbiana tojánenobošachna. ⁴² Y mëntšá tojánayana: “¡Malaye šmëntsetátšëmbo, nýe mo mënténaca, ndayá yojtseita tšëngaftangbeñe lempe tšabá chaotsomñama! Pero mora chë soye tšëngaftangbe bom-inýama entsëitëmena. ⁴³ Er Jerusalenoca bacna tenga echanjóshjango; chora uayayënga chentša shëconánëjana canye tapiëse mochantsepórma, mochantsejëtja y nýetsca juachoicana mochanjontšé tšëngaftanga jtsatsejana, ⁴⁴ y lempe mochantsepochóca. Muentša oyenënga mochantsëbaye, y ni mo canye ndëšbé inýebé juatsboca quemochaiseboshjona, chë Bëngbe Bëtsá tšëngaftanga játsëbacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentsana enënga y obuámnayënga tojtanëbuacna
(Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontšé chë chentše imojtsenënga chentšana jtëbuacnana, ⁴⁶ y tojanëyana:

“Bëngbe Bëtsá chabe uabemana palabrënguifne tojayana: ‘Atsbe bëts yebna echántsemna átseftaca encuéntaye yebna ca’, pero tšëngaftangna, atbëbanëngbe oyeñifne chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentše Jesús entšanga joytsabuátambaye; y bachnangbe amëndayënga, ley abuátambayënga y chë pueblentsa mandayëngnaca imojtsenguaye ntšamo jamëse cha jóbana. ⁴⁸ Pero ndoñe tmoñáninýena ntšamo, er nyëtsca entšanga corente imojtseyunana ntšamo cha joytsoyebuambnacá.

20

Jesusbe obenana

(Mt 21.23-27; Mc 11.27-33)

¹ Canýe te, Bëngbe Bëtsabe bëts yebnentše Jesús joytsabuátambaye, y chë tšabe noticiëngama joytsabuayinýa ora, tmoñánashajjna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cánýifne; ² y Jesús tmojanianyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmëñjatšetá ca?

³ Chora Jesús tojanéjua: —Atšnaca canýe soye sëntsebomna tšëngaftanga jatjayama. Smochjojuanga. ⁴ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

⁵ Chora chënga tmojanontšë enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’

⁶ Y ndoñe quemuátobena jayanana ‘entšanga ca’; entšanga ndëtsbéngaca buattsëbaye, er nyëtscanga becá mondëjuabná Juan ndegombre Bëngbe Bëtsabe juabna oyebuambnayá yojamnana.” ⁷ Chcasna, chënga tmojanjuá ndoñe monjántatšëmbo nda Juan tbojanichmó entšanga jubáyama ca.

⁸ Y Jesús tojanéyana: —Asna atše cach ndoñe quechocatéyana ndaye deréchoca chca stsama ca.

Chë puerte bacna trabájayëngbiama cuento

(Mt 21.33-44; Mc 12.1-11)

⁹ Chentšana Jesús tojanontšë entšanga jáuyanana, y quem cuéntoca tojanabuatambá: “Canýe entšá uvas betiyënga yojáje y chë fshantse inýe trabájayënga yojýentšame, y baytescama bën luaroye yojtsoñe. ¹⁰ Chë uvasëšangá juashacama tempo yojobuache orna, chë jajañe nduiño canýe oservená ibojíchmua chë trabájayënga jáuyanama ntsachetsá cha ibojtso-tocánama. Pero chëngna cha imojtsejantšetaye, y tondaye ntoyiyá imojtichmuá. ¹¹ Chentšana inýa ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá. ¹² Chë nduiño inýa ibojatichmuá; pero chánaca chënga imojtsejantšetaye, imojtselisia, y chentšana imojtábocna.

¹³ “Chora chë nduiño yojenyana: ‘¿Y mora ntšamo chjama ca? Cach atšbe bonshana uaquiniá chanjíchmua; nderádose cha aíñe mochanjóyeyunaye ca.’ ¹⁴ Pero chë trabájayënga, chë uaquiniá imojinýe orna imojenyana: ‘Mua chë fshantse nduiñbe uaquiniá entsemna. Lempe chabe soyënga mua echanjóyëngacñe; motsóbangna y nyëtsca chabe otocana soyënga bëngbiama echanjoquéda ca.’ ¹⁵ Chcasna, chë uvas jajañentšana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jaña nduiño chë trabajayëngaftaca yochjama ca? ¹⁶ Cha co echanjá y chë trabájayënga echanjetsëbaye, y chë uvas betiyënga jajaña inye trabájayënga echanjárrendaye ca.

Chë entsanga chca tmojanuena ora, tmojánayana: —¡Bëngaftaca ndocna te chca chaondopasá ca!

¹⁷ Pero Jesús tojanënyanyé y tojánayana: —As ¿ndayama Bëngbe Bëtsabe uabemana palabrengüiñe iuayana?:

Chë yebna jebuanënga tmojtsanaboté ndëtsbé, mora chë más bëts uashacuanësentše entsējájona ca.

¹⁸ Ndánaca chë ndëtsbeñe chaojotsatsá, chëbé bochántsatcacaye; y chë ndëtsbé ndábeñnaca chaojotsatsše, polvëshe bochántsebema ca —Jesús tojánayana.

¹⁹ Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinñanyiyama, chënga mo chë puerte bacna trabajayëngcá imojamnama; asna tmojánbošena cachora jishachana, pero entsangbiana imojtsauatja.

Chë Romoca bëts mandadbiana impuesto jtsatsquëcñayama
(Mt 22.15-22; Mc 12.13-17)

²⁰ Chentšana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús jisháchichiyama, nderado ndayá cha tojanyiñe; y chca chënga jobenayama cha jishachana y chëngbe mandádbioye juanatsama. ²¹ As chënga tmojantjá: —Buatëmbayá, bënga fsëntsetatšëmo ntšamo aca cojtsoyebuabná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámama nda más uamaná o nduamaná tomnana. Aca consabuatambá ndegombre tšabe vida jtsebomnama, ntšamo Bëngbe Bëtsá yomandacá. ²² Chcasna, šmëyana, ¿tšabá tayojtsemna bënga, César, chë Romoca bëts mandadbiana, impuesto jtsatsquëcñayana o ndoñe ca?

²³ Jesús yojtsetatšëmo, ntšamo cha tojanyiñe jisháchichiyama chënga imojtsebošama; as tojanëyana: ²⁴ —Chë šmatsquëcñá crocénana šminñinyënga ca; ¿ndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

²⁵ Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

²⁶ Y chca, chë ichmónënga ndoñe imonjobenaye jisháchichiyana, ndayá cha entsangbe delante tojanyiñe. Masna, ntšamo tojanëjuama, ojanánënga iyteca imojbiana.

Obanënga jtayenama Jesús tmojantjá
(Mt 22.23-33; Mc 12.18-27)

²⁷ Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntsá tmojantjá: ²⁸ —Buatëmbayá, Moisés bëngbe leyëngüiñe tojëftsanabema, nderado canye boyá tojtsóbana y básenga ndoñe tonjëftsabáshejuanësna, canmëna chë uabentsá chë shëmaftaca jtobouamayana, chca, chë chabe uabochená obanabiana básenga jtsabamnama ca. ²⁹ Chcase, canye bëngbentše canyëšëfta catšátanga monjamna. Chë natsaná tonjanobouamá y tontsanóbana, básenga

ntjéftsabashejuancá; ³⁰ chentšana chë inya chë shémaftaca tonjanobouamá, y cachcá tonjanopasá. ³¹ Chë inye uabentsá chora cháftaca tonjanobouamá, pero tontsanóbana básenga ntjéftsabashejuancá; y cachcá, chë inye uabentséngnaca cháftaca tmonjanobouamá, pero nyetscanga tmonjanóbana básenga ntjéftsabashejuancá. ³² Cabana, chë shembásanaca tontsanóbana. ³³ Y chcasna, chë obanëga chamojtayena ora, ¿ndabe chë canýsëfta catsatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

³⁴ Chora Jesús tojanëjua: —Quem luarentse boyabásenga y shembásenga mondbétsobouamnaye; ³⁵ pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásenga o shembásenga, ya ndoñe quemochatóbouamnaye, ³⁶ ni queochátopodena chënga chamóbanama, y chca, chënga mochántsemna mo angeléngcá, y Bëngbe Bëtsabe básenga mochántsemna, obanënguentsana mochtayénayeca. ³⁷ Y Moisésnaca, chë yojtsángbototjuana betiyetémmama tojanábementse, bënga sòntsinyanýná chë obanëga inmátayenama; chentse Bëngbe Bëtsá tojánayana cha yomna Abraham, Isaac y Jacobébe Bëtsá ca. ³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuátambayënga Jesús tmojanianya: —Buatëmbayá, tsabá tcjayana ca.

⁴⁰ Y ya ndoñe más montsenñemua inye soyëngama jatstjanayana.

*¿Cristo ndabe entsábentšana yomna?
(Mt 22.41-46; Mc 12.35-37)*

⁴¹ Jesús tojanatjá: “¿Ndáyeca tsëngaftanga šmnétsichamo chë Uámana Uabuayaná, chë Cristo, Rey Davídbentšana iuabó ca? ⁴² Er cach David, chabe librésañe Salmos ca uabainëšañe, tojánayana: Bëngbe Bëtsá, atšbe Utabná Crístbioye tbojanianya:

‘Atšbe catsbioica mótbema,

⁴³ atšbe obenánaca, acbe uyayënga acbe cucuatšifne chamoquedama chamëntscuana ca.’

⁴⁴ ¿Ntsámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuátambayëngbiana tojánayana chënga ndoñe tsabá montsama ca

(Mt 23.1-36; Mc 12.38-40; Lc 11.37-54)

⁴⁵ Nyetsca entsanga imojtsuenana, y Jesús chabe uatsjëndayënga tojanëyana: ⁴⁶ “Cuedado šmochtsebonna, y ndoñe šmattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámana luarënguifne jtsetbiámanana, y fiestënguifne nya quešseroca. ⁴⁷ Pero chë viudángbioye chë tmobonna soyënga jtsabacayana; y entsangbe delante tsabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá inyëngbiana más chënga echanjácastigaye ca” —Jesús tojánayana.

21

*Jesús yojtsěnyaye chě crocénana quěcjnayěnga
(Mc 12.41-44)*

¹ Běngbe Bětsabe bėts yebnentše, Jesús yojtsěnyaye chě bomnėnga crocénana jtsequěcjnyayana chě crocénana quěcjnayětėmiñe; ² y canye viudá ndbomnėjėmnaca tbojáninye, uta crocénana chětėmiñe yojaftsesegóra. ³ Chora Jesús tojánayana: “Ndegombre cbėyana, quem viudá ndbomnėjema, Běngbe Bětsabiamana nyėtscangbiamana más becá tonjėftsesegorá; ⁴ er nyėtscanga tmonjėftsesegorá chě yojtsóyentšjamentšana, pero chana, masque tša ndbomnėjema, cha vida jtsebomnana lempe ntsachetšá yobomncá tonjėftsesegorá ca.”

*Jesús tojánayana Běngbe Bětsabe bėts yebna lempe mochjánpochocama
(Mt 24.1-2; Mc 13.1-2)*

⁵ Báseftanga imojtsichamo chě Běngbe Bětsabe bėts yebnama, tša yojtsebotamanana puerte uámama ndėtsbėngaca y chě entšanga imojanamana juambana Běngbe Bětsábioye uátšėmbona soyėngaca ca. As Jesús tojánayana: ⁶ — Canye tempo echanjóshjango, y lempe ntšamo mora muentše šmontsonyáca tondaye queochatoquėda, ni mo canye ndėtsbé inyėbé juatsboye. Lempe mochantsepochóca ca.

*Ntšamo yochtsemna quem luare jopochóca te chaojtsobeco ora
(Mt 24.3-28; Mc 13.3-23)*

⁷ Chora chėnga tmojantjá: —Buatėmbayá, ¿ntseco chca yochjopása? ¿Y ndayá Běngbe Bětsá yochjama, chca jopásama yojtsobecuama entšanga chamotsetatšėbuama ca?

⁸ Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chėnga atše imomna ca. Mochántsičhamo: “Atše chě Cristo sėndmėna”, y “Mora chě tempo entsemna ca”. Pero ndoñe šmatjóyaunaye. ⁹ Y tšėngaftanga, entšanga imojtsentsjanama y entšanga mandadėngbe contra imojtsemnama chašmojtsuenana ora, ndoñe šmattsauatja, er entseyta natsana chě soyėnga chaohnėngo; pero masque chca, chě quem luare jopochóca tempo cabá ndoñe queochátsmėna ca.

¹⁰ Y mėntšánaca Jesús tojanėyana: “Canye luarentša entšanga, inyė luaroca entšángaftaca mochántsičhamo; y canye amėndayábentša entšanga, inyė amėndayábioica entšangaftácnaca. ¹¹ Ba luarėnguiñe jabuache echanjuangmėmana, bėts shėntsana, y entšanga pochócaye šocanėnga echanjóshjango; y celoca echántsemna puerte uabouana soyėnga y bėts soyėnga, entšanga jinjányiyama quem luare ya yochtopochóca.

¹² “Pero cabá ndoñe chca chaondochnėngo ora, tšėngaftanga cmochanjíshėche y chašmosufrima mochántsama; bėnga judiėngbe enefjuana yebnėngoye cmochanjunatse játsėtšenama y cárceloyraca cmochanjútame, y reyėnga y mandadėngbióynaca cmochanjunatse, atšbe štonėnga bėtsemna causa. ¹³ Chca šmochanjapása, ntšamo atšbiamana šmotatšėmncá chėnga chašmėyanama. ¹⁴ Natsana ndoñe šmatjátšjuabnaye jenėyuanama ntšamo chora jóyebuambayana, ¹⁵ er atše chanjama puerte tšabá y osertanánaca tšėngaftanga chašmóyebuambama; y chca, tšėngaftangbe uayayėnga ndoñe quemochatobenaye jayanana ndoñe tšabá šmontsičhamo ca, y ndocá jojuama quemochatobenaye. ¹⁶ Pero uayayėngbe cucuatšėne

cmochanjábashejuana cach tsëngaftangbe bëtsëtsanga, catšátanga, pamíllanga y amiguënga; y tsëngaftanguentsana báseftanga cmochantsëbaye. ¹⁷ Y nyëtsca entsanga cmochantsëbuayënja, atšbe ústonënga bëtsemna causa. ¹⁸ Pero tsëngaftangbe bestšašentsana ni mo canýe stjënëja quecmochátabajajo. ¹⁹ Tsëngaftanga nyëts tempo atšbeñe ošbuáchiyënga chašmojtsemnëse, chë nyëtsca tescama yomna tsabe vida šmochántsebomna ca.

²⁰ “Jerusalén nyëts šheconana soldadënga chašmojanýe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamotsacheta; Jerusalemntšë chamojtsemnënga, chentšana chamuaisebocana; y chë jajenache chamojtsemnëngna, Jerusalemoye ndoñe chamondësamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguine endayanca chora echanjochnëngo. ²³ ¡Tša lastema chë tempo shembásenga ngomámanëngbiana o ochóchaye básenga chamojtsabamnëngbiana! Er chora corente ngménana quem luarentšë echántsemna, y quem luarentša entsangbiana chë uabouana castigo. ²⁴ Inýenga espadéjaca mochanjóbana, y inýengbiyoye nyëtsca luarënguëjana utámenënga mochanjunatse; y chë ndoñe judiëngna, Jerusalemoca entsangbiyoye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mt 24.29-35, 42-44; Mc 13.24-37)

²⁵ Mëntsánaca Jesús tojánayana: “Chora bëts soyënga echantsinýna shinýiñe, juashconiñe y estrellënguine; y quem luarentša entsanga tša mochántsausatja, ndayá jamama ntsetatšëmbcá, chë mar bëjaye y olëshënga corente echantsefshauenana causa. ²⁶ Entšanga echantsabuatëcja tša auatja causa y ndayá quem luariñe yochjopásama enóochinýena causa; er chë quem luarentša tsbanánoca espíritënga obenana bomnënga echanjángmëmana. ²⁷ Y chora entsanga mochanjinýe, chë Bëngbe Bëtsá Entšá tbojanbemá jantšëtëshiñe echántsaboye, puerte obenánaca y corente buashinýinýaniñe. ²⁸ Chë soyënga jochnënguama chaojobojatšé ora, añemo šmochjëntšetaye y bestšaše játsbanase šmochjarrepára, er chora echántsemna chë tsëngaftangbe atsebacyana ca” —Jesús tojánayana.

²⁹ Mëntsánaca Jesús tojanëyana jabuátambama: “Smochjinýe canýe higo betiye o ndaye inýe betíynaca. ³⁰ Tojtsaisëjotsanama šmojinýe ora, jtsetatšëmbuana chë tsabe tempo ya yojtsaisobecua. ³¹ Cachcá, chë soyënga yojtsëchnëjuana chašmojinýe ora, šmochtsetátšëmbo chë Bëngbe Bëtsabe amëndayana ya yojtsobecuama.

³² “Ndegombre cbëyana, lempe chca echanjochnëngo, morsca entsanga cabá ndóbana ora. ³³ Celoca y quem luare echanjopochóca, pero atšbe palabra ndocna te queochaisopochóca.

³⁴⁻³⁵ “Cuedado šmochtsebomna y ndoñe šmatjalesëncia tsëngaftangbe ainana bacna juabnëngaca chaotsemnana, jenomándama ntšobencá mocá enobuena causa, tmoye causa y nyë quem luarentša soyëngama enóochinýena causa; y tsëngaftanga prontánënga šmochtsemna, nyë ndeolpe chë te chaojobuache ora; y tsëngaftanga ndëprontánënga ndoñe chašmondëtsemna, mo tsëngaftangbiana canýe uachmaniñe cuaftsemncá. Er nyëtsca quem luarentša entsangbiana chca echántsemna. ³⁶ Cuedado

šmochtsebomna y yejuana šmochtsantješna; nÿe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanëyana.

³⁷ Jesús, bnëtë Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama. ³⁸ Y nÿetsca entsanga cabá cachëse Bëngbe Bëtsabe bëts yebnoye yojánajna Jesús joyeunayama.

22

Entsanga tmojanjuabó ntšamo jamëse Jesúsbiøye jishachama
(Mt 26.1-5, 14-16; Mc 14.1-2, 10-11; Jn 11.45-53)

¹ Ya yojétsobeco Bashco fiesta, chë lewadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. ² Chë bachnangbe amëndayënga y ley abuátambayënga imojts-senguaye ntšamo jamëse Jesús jóbana, pero entšangbiamama imojtsauatja.

³ Chora Satanás, Judas chë Iscariote ca uabobuatmabe ainaniñe bacna juabnënga tojanjáj. Chánaca yojamna chë bnëtsana uta uatsjëndayënguentsá; ⁴ y tojána, chë bachnangbe amëndayënga y Bëngbe Bëtsabe bëts yebno ca soldadëngbe amëndayëngaftaca jencuéntama, ntšamo Jesús chëngbe cucuatšinë jayentšbáshejuanama. ⁵ As chënga imojóyejuaye, y Judas tmojanšbuachená crocénana chama jtatšetayana. ⁶ Y Júdasna aiñe ca tojánayana; y cach orscana cha yojtsenguaye ntšamo jamana y ndëmua ora Jesús chëngbiøye jayentšbáshejuanama, ndocna entsanga ora.

Jesús chabe uatsjëndayëngaftaca Bashco saná tojanse
(Mt 26.17-29; Mc 14.12-25; Jn 13.21-30; 1 Co 11.23-26)

⁷ Chë Bashco fiesta ora tojanóshjango, chë lewadúraca ndëpormana tandëse sayté; chë te yojamna, Bëngbe Bëtsá jëtschuyamna canÿe oveshá jóbana chora jasama. ⁸ As Jesús, Pedro y Juánbiøye tojanëyana: —Motsata y saná šochjaprónta Bashco fiestama bënga mochjasama ca.

⁹ Chora chata tbojantjá: —¿Ndëmoca cojtseboše chë saná fchjapróntama ca?

¹⁰ Y Jesús tojanëjua: —Jerusalenentše chašojámashëngo ora, canÿe bacó cmochanjóbiatše, matbajiñe búyeshë echantsabuyambaye. Cha šochjuasto, y šochtsonÿaye ndëmuanÿe yebnentše cha yochjámashënguama; ¹¹ y chentša nduiño šochjauyana: “Chë Buatëmbayá sonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’ ” ¹² As cha cmochanjínÿanÿiye canÿe bëts tsañe, tsbanana pišoca; ya lempe echántseprontana, y chentše, Bashco fiestama saná šochjaprónta ca.

¹³ As chë útata tbojána, y tbojáninÿena lempe ntšamo Jesús tojanëyancá, y chentše chë Bashco saná tbojanprontata.

¹⁴ Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. ¹⁵ Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufrí ora. ¹⁶ Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

17 Chorna canje coptema vínoyeca tojanaca, Bëngbe Bëtsábioye tbojtanchuá y mëntśá tojánayana: “Quem coptema vínoye menáfšenga; y cbëyana, 18 chë uvas betiyentśa shajuanentśana obocniye ndoñe más quichaisofšiyee, Bëngbe Bëtsabe amëndayana candóshjanguëntscuana ca.”

19 Chentśana, tandëse tojanca y Bëngbe Bëtsábioye tbojtanchuá; tojan-jatá, tojanatśatá y mëntśá tojánayana: “Quem soye, atśbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atśbiama jtenójuaboyama ca.”

20 Tmojansentśana, chë coptémaca tojanma cachcá ntšamo chë tandëseca tojanmcá y mëntśá tojánayana: “Quem coptema vínoye entsemna chë Bëngbe Bëtsabe tšëm trato entśangftaca. Atśbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entśanga tojanašebuachenacá ndegombre yochjochnënguama. Chë buiñe tšëngaftangbe tšabiama echanjuábuashana. 21 Pero chë uayayëngbe cucuatsiñe šochjaboshjoná, mesëshentśe átšeftaca entsemna. 22 Ndegombre, chë Bëngbe Bëtsá Entśá tbojanbemáftaca echanjopása, ntšamo Bëngbe Bëtsá chabiama tojanjuabocá. ¡Pero tśa lastema chë bochjáboshjonabiama ca!” —Jesús tojánayana.

23 Chorna chë uatsjëndayënga tmojanontśé entjanayana, chënguentśá nda chë boshjuaná bëtsemnana.

Nda chë más uamaná yomna

24 Chë uatsjëndayënga imojntsenatsëtsnaye chënguentśá nda chë más uamaná bëtsemnana. 25 As Jesús tojanëyana: “Chë ndoñe judiëngbeñe, chë reyënga chëngbe entśangbioye nÿe ntśámñaca jtsamëndayana, y chentśa amëndayënga jtsamana, entśanga chëngbioye tšabe soye amënga ca chamotsëboboútmama. 26 Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. 27 Er, ¿ndase chë más uamaná yomna, chë mesëshentśe jasama tojtobemá o chë uajuatśnayá? Ndegombre co chë mesëshentśe tojtobemá; pero atśna tšëngaftangbeñe sëntsemna mo chë oservenacá.

28 “Atśbe padecëniñe tšëngaftanga sempre átšeftaca šmondëtsemna. 29 Chíyeca, atśbe bariëna, canje amëndayana cbochanjátšataye, ntšamo atśbe taitá canje amëndayana šojatśtacá; 30 chca, atśbe amëndayoca mesëshentśe átšeftaca šmochanjase y šmochanjofšiyee, y uámana tbemaniñe mo reyëngcá šmochanjotbiama, chë Israeloca bnëtsana uta pamillanga entśangbiama chašmuayanama tšabá o ndoñe tšabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama (Mt 26.31-35; Mc 14.27-31; Jn 13.36-38)

31 Jesús mëntśánaca tojánayana: —Simón, Simón; cochtsetátšëmbo, Satanás obenana tonjotjañe tšëngaftangftaca nÿe ntśámñaca jamama, mo chë trigo matënga tcojtsashatiyeynacá; 32 pero atśna Bëngbe Bëtsá sënjaimpadá, átšbeñe ošbuáchiyana ndoñe chacmondëtsebuáshbenama. Y aca, nÿets ošbuáchiyana átšbeñe chacojtsatsbomna ora, chë inÿe ošbuáchiyënga cochjújabuache átšbeñe sempre chamotsošbuáchema ca.

33 Chora Simón tbojanëyana: —Bëngbe Utabná, atśe sëntseprontana ácaftaca cárceloye jámnaca y jobanámñaca ca.

34 Y Jesús tbojanëyana: —Pedro, atśe cbëyana, cam ibeta bínÿanoye, ngallo cabá ndëcánta ora, aca unga soye cochanjayana ndoñe sconduabuátma ca.

Chë más jabuache ora yojtsobeco

³⁵ Chentšana Jesús tojanatjá: —¿Chë ni shecnájaca, ni crocenánaca, ni she-cohëtjonésheca tbonjanichamá ora, nderado ndayá tmojanabuáshebena ca?

Y chënga tmojanjuá: —Tondaye ca.

³⁶ Chora tojanëyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaíya chaotsatábuiye y canye espadëja chauatobuámiñe. ³⁷ Er cbëyana, entseyta átseftaca chaopasá, ntšamo Bëngbe Bëtsabe uabemana palabrenguiñe atšbiama iuayancá, mëntšá: “Y chábioye tmonjáninye mo chë puerte bacna soye amënguentsá canya cuaftsemncá ca.” Y lempe ntšamo atšbiama iuabemancá, mora ya echanjochnëgo ca —Jesús tojanëyana.

³⁸ As chënga tmojaniana: —Bëngbe Utabná, muentše uta espadëja entsemna ca.

Y japochócamna cha tojánayana: —Nye nyetsá ponto ca.

Getsemaní luarentse, Jesús Bëngbe Bëtsáftaca tbojanencuentá (Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos tjšahoye tojána, y chabe uatsjëndayënga tmojanasto. ⁴⁰ Choca tmojánashajna ora, Jesús tojanëyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentshana yojoluára, mo canye ndëtsbé jutšenëntscoca nyetsá, y yojoshëntsamentsiye Bëngbe Bëtsáftaca jencuëntama. ⁴² Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfriana. Pero ntšamo atše stebošcá ndoñe chaondëtsemna, sinó ntšamo aca cojtsebošcá ca.”

⁴³ Chca orna celocana canye ángel tbojánëbëbocna, añemo chaotsebomnama juajabuáchama. ⁴⁴ Jesús tša ngmëniñe yojtsemna, y Bëngbe Bëtsáftaca más ibojtsencuëntaye. Y chabe bosesey yojtsemna mo fshantsiñe buiñe cuaftsebuastëtjuancá.

⁴⁵ Bëngbe Bëtsáftaca jencuëntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnëtsomañe, tša ngmënaca imojtsemna causa. ⁴⁶ Chora tojanëyana: “¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

Uayayënga Jesús tmojánishache (Mt 26.47-56; Mc 14.43-50; Jn 18.2-11)

⁴⁷ Jesús cabá yojtsóyebuambnantscuana, ba entšanga chentše tmojánashajna. Chë Judas ca uabainá, canya chë bnëtsana uta uatsjëndayënguentsá, chë entšangbe natsana yojtsaye. Cha yojobeconá Jesús juamóchama; ⁴⁸ pero Jesús tbojaniana: “Judas, ¿canye juamochëse chë Bëngbe Bëtsá Entšá tbojanbemá uayayëngbe cucuatšifne cochjaboshjona ca?”

⁴⁹ Chë Jesúseftaca imojtsemnënga tmojáninye ntšamo chora yochjanopásama; as tmojaniana: —Bëngbe Utabná, ¿espadëjaca fšcatsatsejaye ca?

⁵⁰ Y canya chënguentsá, chë bachnangbe más uámana amëndayabe bochich-nayábioye catšbioica matscuaše tbojtsantëtse, y tbojtsanëštjango. ⁵¹ Chora Jesús tojanëyana: —Cachcá monjá; nye nyetsá ponto ca.

Y chë bochichnayábioye chë matscuaše tbojánbojajo y tbojanshná. ⁵² Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanëyana: “¿Ndáyeca espadëjangaca y ngarotbéngaca šmojabo atše jishachama, mo atše canýe bacá uamana entšá cuaftsemncá ca? ⁵³ Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmátanbojajo. Pero ora tojobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanëyana.

Pedro tojánayana Jesúsbioye ndoñe bonjanabuátma ca
(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Chentšana Jesús tmojánishache, y chë bachnangbe más uamana amëndayabe yebnoye tmojanánatse. Y Pedro bënocana ibojtsëstona. ⁵⁵ Choca, chashja tsëntsaca, canýe iñeshe tmojanangbotjó y entšanga chë shëconana imojtsetbiámama; y Pédrënaca chentše chëngaftaca yojótbema. ⁵⁶ Chora, canýe shembása chentša oservená, Pédrëbioye tbojáninýe chë iñe juachaca yojtsetbema; tbojanonýinýe y tojánayana: —Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntšá tbojaniyana: —Sobrená, atše cha ndoñe quetsatabuatma ca.

⁵⁸ Ndoñe yapa bën y inýa chábioye tbojátaninýe y tbojaniyana: —Acnaca chë uatsjendayënguentšá condmëna ca.

Pero Pedro tbojanjuá: —Bacó, atše ndoñe quetsátsmëna ca.

⁵⁹ Chentša benëntscosna, inýa más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojtsóyebuambnantscuana, canýe ngallo yojacánta.

⁶¹ Chora Bëngbe Utabná yojobuértana y Pédrëbioye tbojanonýinýe; y Pedro chora yojenójuaboye ntšamo Bëngbe Utabná tbojaniyana: “Cam ibeta bínýanoye, ngallo cabá ndëcánta ora, aca unga soye cochanjayana ndoñe šconduabuatma ca.” ⁶² As Pedro shjoye tojánbocna, y corente ngmënaca yojtsenóbošachna.

Jesús imojtsáboyejuana
(Mt 26.67-68; Mc 14.65)

⁶³ Chë Jesús imojtsebojanýá entšanga cha imojtsáboyejuana y imojtsejantsetaye; ⁶⁴ y jtsabuchëntscajuase, imojtsetjanaye: “¡Momalisiá, nda tcmënjajantšetá ca!” ⁶⁵ Y imojtsóyenguaye, nýe mocá soyënga jtsatsëtsnayëse.

Jesús, chë judiëngbe uamana mándayëngbe delante
(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bëtsëjemëngcá amëndayënga, bachnangbe amëndayënga y ley abuatambayënga tmojánenëfna, y chëngbioye Jesús tmojanánatse. Choca tmojantjá: ⁶⁷ —Smëyana, ¿aca Bëngbe Bëtsabe Uamana Uaubuyaná, chë Cristo conna ca?

Y Jesús tojanëjua: —Añe ca tbojáuyanëse, tšëngaftanga chama átsbeñe ndoñe quešmochatošbuáchiye. ⁶⁸ Y nderado tbojátjasna, tšëngaftanga ndoñe quešmochatojuá ca. ⁶⁹ Pero cam orscana, chë Bëngbe Bëtsá

Entsá tbojanbemá, chë Bëngbe Bëtsá nyets obenana bomnabe catšbioica echántsatsbemana ca.

⁷⁰ Chora nyetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tsëngaftanga chca šmongsichamo; atse cha sëndmëna ca.

⁷¹ As chora chënga tmojánayana: —¿Ndayama más entsanga šochjátëjamoto Jesusbe contra chamuayanama? Er cach bënga chabe uayášentsana chca tmonjouena ca.

23

Jesús, Pilatbe delante

(Mt 27.1-2, 11-14; Mc 15.1-5; Jn 18.28-38)

¹ Nyetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. ² Y chentše tmojanontsé cha mal jaquédana, mëntšá: —Bënga fsënjínÿena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canÿe reycá ca.

³ Chora Pilato Jesúsbioye mëntšá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atse ni mo canÿe soye chiyátinÿena, quem boyabása castiganá chaotsemnama jayanama ca.

⁵ Pero chënga más tmojanáyebuachena: —Nyets Israel luarëjana entsabuatambá, Galilea entsangbe amëndayëngbe contra jtsemnama. Galilea luaro ca chca tonjabojatse y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileocá tayojamnama. ⁷ Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. ⁸ Herodes Jesúsbioye tbojáninÿe ora, corente tojanoyeuá. Chana tempscana inaboše Jesús jinÿama. Cha ba soyënga Jesusbiama tojanuena, y yojtseboše jinÿama Jesús jamana canÿe bëts soye, Bëngbe Bëtsabe obenánaca. ⁹ Heródesna ba soyënga tbojantjá, pero cha ndocá tbojanjuá. ¹⁰ Y chëntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canÿe reycá; chentsana cachiñe Pilátbioye tmojesanichmó. ¹² Cach te Herodes y Pilato tbojtananatsëtsaye; tempna chata ibojenáyata.

Jesusbiama chaóvana ca tmojánayana

(Mt 27.15-26; Mc 15.6-15; Jn 18.39-19.16)

¹³ Chentšana Pilato, chë bachnangbe amëndayënga, chë pueblentša amëndayënga y nyetsca entsanga tojánachembo, ¹⁴ y mëntšá tojanëyana: —Tsëngaftanga quem entsá átšbioye šmojuánatse, mo bacna soye entsángbeñe

abuatabayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canýe soye chiyátinýena, quem boyabása castiganá jtemnna ibotsemna ca jayanama. ¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canýe ndoñe tonjobuachjanguá jóbana chabotsemnna. ¹⁶ Chcasna, jabuache chamotsecastigá y chentsana chanjëtshojona ca —cha tojánayana.

¹⁷ Yojamna canýe utamená jëtshojona, ntšamo Bashco fiesta ora jamana imojanamancá. ¹⁸ Pero chora entšanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

¹⁹ Barrabás inautámena, mandadëngbioye ndëtsayaunanama chë bëts pueblentše entšanga tojánenautanama y entšá óbanaye causa. ²⁰ Pilato cachiñe tojánayana Jesúsbioye jëtshojonama yojtsanboše ca; ²¹ pero entšangna más tmojtëtanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canýe bacna soye chiyátinýena, mua jóbana chabotsemnna. Chcasna, chanjacastiga y chora chanjëtshojona ca.

²³ Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyëñaná Jesús chamóbama. ²⁴ As Pilato tojanmandá ntšamo chë entšanga imojtsotjanañca chaotsemnna; ²⁵ as chora Pilato, Barrabásbioye cachá tbojtanboshjona, chë nda inautámena mandadëngbioye ndëtsayaunanama entšángbioye tojánenautanama y entšá óbanaye causa. Y Jesusna entšangbe cucuatšíñe tbojánboshjona, ntšamo chënga tmojtsebošcá chamomama.

Jesús tmojanrucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora jajocana inátaboje canýe boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

²⁷ Y banga chë pueblentša entšanga imojtsëstona; y chë shembásenga imojtsëstonënga imojtsayošachiye y ngménaca imojtsanioye, Jesús chca yojtsepásama. ²⁸ As Jesús chëngbioye tojanobuértana y tojanëyana: “Jerusalenentša shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna.

²⁹ Canýe te echanjóshjango y chë te šmochántichamo: ‘Tša tšabá chë shembásenga šësona ndobmnëngbiana, chë quem luaroye šësonga ndoñe tmojnëtsëshejajñëngbiana, y chë šësonga ndoñe tmojnëtsësabachengbiana ca.’

³⁰ Chora entšanga jetsóitanama mochántseboše y mochanjontsé íchámuaana: ‘Tjashënga šmotsëtebuantsá y batsjabenga šmotsaitame ca!’ ³¹ Atše, chë ndocna bacna soye amá, chíyeca puerta obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betiyeca chca tmojtsamëse, ntšamo chë tojtsebuashá betiyeca mochjama ca?’ —cha tojánëyana.

³² Jesúseftaca cruciñe jóbana, útata bëts bacna soyënga ochjajnayátnaca imojtsënachaye. ³³ Chë “Obanabe Bestšashe ca” uabaina luaroye tmojánashjajna ora, Jesús tmojanrucificá y chë bëts bacna soyënga ochjajnayátnaca, canýa chabe catšbioica y chë inýana chabe uañicuayoica.

³⁴ Chora Jesús mēntšá tojánayana: “Taita, mēngbe bacna soye motsaperdónaye, er ntšamo montsamama chēnga ndoñe quemátstatšēmo ca.”

Chē soldadēnga Jesusbe entšayamna, tsbanánoye tmojanētšena, chēnga jtenájatayama. ³⁵ Entšanga chentše imojtsemnēnga chca imojtsonyāye, y chē pueblentša mandayēngnaca Jesús imojtsáboyejuana y mēntšá imojtse-natsētsnaye: “Inyēnga aññe tojētsatsebacá; mora cachá chautesbocá, cha ndegombre Cristo, chē Bēngbe Bētsabe Uámana Uabuayaná tomnēse ca.”

³⁶ Soldadēngnaca Jesús imojtsáboyejuana; tmojanobeconá y untja vínoye imojtsefšēsñaye, ³⁷ y mēntšá imojtsatsaye: “¡Chē judiēngbe Rey tcomnēsna, cach aca mentsbocá ca!”

³⁸ Jesusbe bestšaše juatsboicna canye uabemana soye tmojananjo; chiñe mēntšá yojtsanáebemana: MUA CHĒ JUDIĒNGBE REY ENDMĒNA ca.

³⁹ Canye bēts bacna soyēnga ochjajnayá yojtsecrucificaná, Jesúsbioye mēntšá tbojanóyenguango: —Chē Bēngbe Bētsabe Uámana Uabuayaná tcomnēsna, mentsbocá y bēndátnaca šmatsebocá ca.

⁴⁰ Pero chē inye bēts bacna soyēnga ochjajnayana mēntšá tbojanácacana: —¿Ni mo Bēngbe Bētsá ndoñe condérrespetana? Bēndátnaca bontsamna chacá jóbanama. ⁴¹ Ndegombre bēndata muentše bontsemna bēts bacna soyēnga ochjajnaye causa, y chíyeca chca jasúfriama bontsamna. Pero quem boyabása ni mo canye bacna soye ndoñe tonjobuachjanguá ca.

⁴² Y chorna, quem bēts bacna soyēnga ochjajnayá Jesúsbioye tbojanianya: —Jesús, atšbiamá cochtenójuabo ye aca reycá jabomándama chacojtabo ora ca.

⁴³ Y Jesús tbojanjuá: —Ndegombre cbēyana, mēnté átseftaca celoca, chē nyētscanga oyejuayēnga mondbetsemno ca, aca cochantsatsmēna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Nyētsco orscana las tresēntscoñe nyēts quem luare yojtseibétata. ⁴⁵ Y shinye yojtsajbaná binynayana, y Bēngbe Bētsabe bēts yebnentše yojújonýana entšējua tsēntsaca yojtsenájataye. Chējua bēnjua inauamna y chē tsatsēntsaca inaújonýana. ⁴⁶ As Jesús tojanáye buachena: “Taita, atšbe espíritu acbe cucu-atšñe šcoboshjona ca.”

Y chca jayanama tojanpochocá ora, tojanóbana.

⁴⁷ Chē romano soldadēngbe amēndayá chca tojáninýe ora, Bēngbe Bētsábioye tbojtanadorá, mēntšá jayanēse: “Ndegombre, quem boyabása ainaniñe tšabe juabnēnga bomná inamna ca.”

⁴⁸ Nyētsca entšanga chē soye jinýama tmojánabēnga, chca tojanopasama tmojáninýe ora, tmojanontsé jtangana enocochjantšetaye, ngmēnama.

⁴⁹ Pero Jesusbe nyētsca ubuátmēnga y chē shembásenga Galileocana tmojanastēngna, chaboca tmojanoquedá chē soyēnga onýayañe.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmēna canye boyabása, José ca uabainá, canye Judeoca pueblócá, Arimatea ca uabaina; cha inamna canya chē pueblentša uámana amēndayēnguentšá y canye tšabe entšá y nyētsca soyēnguiñe tšabá amá.

⁵¹ Chánaca yojanabátmana chē Bēngbe Bētsabe amēndayana chaóshjanguama, y tondaye tbojanogustá ntšamo chē inye amēndayēnga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe.

⁵³ José chē cruzocana Jesusbe cuerpo tbojtanéštjango, canye lino entšējua

tbojanandmaná y canye cuevēshiñe, peñēshiñe pormániñe, tbojanajó. Chentše cabá ndocná mondējajo. ⁵⁴ Yěsana ochnayté bétsemnayecna, cach te yojanotocana saná japróntana chē yěsana jasama; y chē ochnayté ya yojtsebínñana.

⁵⁵ Chē shembásenga, Galileocana Jesús tmojantjēmbambanga, tmojána y chē cuevēshe tmojáninnye, y tmojanrrepará ntšamo Jesusbe cuerpo tmojanjajoma. ⁵⁶ Yebnoye tmojaná orna, tmojanprontá botamana uanguētše bėjayēnga y soyēnga chē cuerpiñe janětjuama.

Chē ochnaytena chēnga tmojanochná, ntšamo Moisesbe leyiñe yojanmandancá.

24

Jesús tojtanayena

(Mt 28.1-10; Mc 16.1-8; Jn 20.1-10)

¹ Y tmengo, chē inye semana bojatséntena, cabá cachēse, Jesús tmojanatbontsá cuevēshoye chē shembásenga tmojána, y tmojanamba chē tmojanprontá botamana uanguētše soyēnga. ² Pero choye tmojánashjajna orna, tmojáninñena chē cuevēshoye amashjuanentša ndětsbé chentšana juanániñe, ³ y choye tmojánamashjna ora, Bēngbe Utabná Jesusbe cuerpo ndoñe tmonjáninñena. ⁴ Chē shembásengna ndoñe imontsetátšēmo ntšamo jajuaboyana chē soyama; chora, uta boyabásata, uabuashinñinñana entšayá uichětjonata chentše tbojabántsaye. ⁵ Y chē shembásenga tmojanēuatjanama y fshantsoye imojtsatsejbénama, chata tbojanéyana: “¿Ndáyeca obanēngbentše chē vida totsobomñá šmojtsenguá ca? ⁶ Muentše cha ndocná quenátsmēna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: ⁷ ‘Chē Bēngbe Bětsá Entsá tbojanbemá bontsemna bacna soye amēngbe cucuatšiñe chamoboshjonama, chamocrucificama y unga tianoye cháuatayenama ca’ ” —chata tbojánayana.

⁸ Chora chē shembásenga Jesusbe palabréngama imojtenójuaboye, ⁹ y chē cuevēshentšana tmojaná ora, chē tšabe noticiēnga chē bnětsana canye uatsjéndayēnga y inye entšángbiroye tmojanacuntá. ¹⁰ Chē uatsjéndayēngbiroye chca cuentayēngna imojamna María Magdalena, Juana, y María, chē Santiagbe mamá, y chē inye shembásenga chēngaftaca imojamnēnga. ¹¹ Pero chē uatsjéndayēngna mēntšá chē shembásengbiama imojětsejuabnaye: “Chēnga montsoyebuamná mo corente juabna ndbomñēngcá ca.” Y chca, chēnga chē soyiñe ndoñe montsanošbuaché.

¹² Pero chentšana, Pedro tojěftsantsbaná y ochamanana chē Jesús tmojanajó cuevēshoye tojána. Y choca yojtsemna ora, yojotsejbéna tsoye jontješiyama, pero nye ena entšējuangá yojuinnye, chē Jesús tmojanbochmējuangá. As Pedro ojnananá yebnoye yojtá, chca tojanopasama.

Chē Emaús puebloye benachiñe

(Mc 16.12-13)

¹³ Cach te, uta uatsjéndayata Emaús puebloye ibojtsaye. Emaús yojamna Jerusalemocana bnětsana canye kilómetroca. ¹⁴ Chata ibojtsayencuéntaye lempu ntšamo tojanopasama. ¹⁵ Y tojanopasá, ibojtsencuéntaye y ibojtse-natsětsnayěntscuana, cach Jesús tojanobeconá y chátaftaca cánñiñe yojtsaye; ¹⁶ masque imojtsonyaye, ndoñe ibontsobena cha jótēmbana. ¹⁷ Jesús tojanéyana: —¿Ndayama benachiñe šuabanencuéntaye ca?

As chata ngménaca ibojotsaye, ¹⁸ y canya, Cleofás ca uabainá, tbojanianyana: —¿Nýe aca cojtsemna, inýe luarocana ashjanganá Jerusalenentse oyená, ndayá chentse quem dienga yopasánama ndétatšembua ca?

¹⁹ Chora cha tojanéyana: —¿Ndaye soyenga ca?

Y chata tbojanianyana: —Chè Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nýetsca entsangbe delante. ²⁰ Y ntsamo, chë bachnangbe amëndayënga y chentša mandadënga ínýengbe cucuatšifne tmonjáboshjona, jóbánama ibojtsemna ca entsanga chamuayanama y chamocrucificama. ²¹ Bënga chabiamana fsënjanoábtmana, Césarbe cucuatšentšana Israeloca entsangbe atsebacayá chaotsemnana; pero morna ya unga te entsemna chca tonjopasá. ²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjajó cuevëshoye tmonjá, ²³ y chabe cuerpo ndoñe tmonjinýena; as chora chënga bëngbioye tmontabo y montsabíchamo angelënga tmojëftsanyë y chënga catmënjayana cha ainá yojtsatsmëna ca. ²⁴ Bëngbentshana baseftángnaca chentšana chë cuevëshoye tmonjá, y tmojinýena ntsamo chë shembásenga tmonjayancá, pero Jesús ndoñe tmonjëftsinyë ca —chata ibojtsichamo.

²⁵ As Jesús chata tojanéyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! ²⁶ ¿Mo ndoñe yonjamna chë Uámana Uabuayaná chë soyënga chaosufrima, y chentšana nýetsca entsanga corente cha chamuatschuama ca?

²⁷ Chentšana Jesús tojanontsé chata jábuayenana, lempe ntsamo chabiamana yojanoyebuambnacá chë Bëngbe Bëtsabe uabemana palabrénguiñe; yojontsé Moisesbe librësangañe y chë Bëngbe Bëtsabe juabna oyebuambnayëngbe librësangañnaca.

²⁸ Chë ibojétsaye pueblöye imojtsebeconá ora, Jesús tojanma mo más chöyë cuaftsacá. ²⁹ Pero chatna tmojanatarié chentse chaotsoquedáñama, mëntsá jauyanëse: —Bëndáftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. ³⁰ Chentšana tojanopasá, juasama mesëshentse imojtsetbiámána ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjëndayata ibojobenaye Jesús jótëmbana; pero chana nýe ndeolpe yojuenatjëmbe. ³² Chora chata ibojtsenatsëtsnaye: “Chë benachiñe Bëngbe Bëtsabe uabemana palabréngama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojáninýena chë bnëtsana canye uatsjëndayënga cánýentse imojtsemna y chëngbe enutëgnaca; ³⁴ y mëntsá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntsamo benachiñe tbojanpasacá, y ntsamo Jesúsbioye imojótëmbe, chë tandëse tojanjatá ora.

*Jesús chabe uatsjëndayënga tojánebébuacna
(Mt 28.16-20; Mc 16.14-18; Jn 20.19-23)*

³⁶ Chë uatsjédayënga chë soyëngama cabá imojtsencuéntantscuana, Jesús chëngbe tséntsaca tojabántsaye y mëntsá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canye añemëse imojétsonyaye ca imojtsejuabnaye. ³⁸ Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca?” ³⁹ Atšbe cucuatšënga y atšbe shecuatšënga minyënga; šmobjajajo y šmochanjinye. Cach atšbe séntsemna. Canye añemësna, ni mëntsena ni betašënga ntsebomnana; pero tšëngaftanga šmontsonyá, atšna añe ca” —tojanëyana.

⁴⁰ Chca yojsichámëse, chabe cucuatšënga y chabe shecuatšënga tojaninyañé. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canye tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentšana Jesús tojanëyana: “Quem palabrenga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguiñe, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

⁴⁵ Y chora chë uatsjédayënga, Jesúsbeyeca tmojanobená chë Bëngbe Bëtsabe uabemana palabrengama josértana. ⁴⁶ Chentšana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. ⁴⁷ Y morna atšbe uabaina jayanëse, átšbeñe betsošbuáchema, nyets quem luarentše smochjónštša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalemntše chaobojatšé. ⁴⁸ Tšëngaftanga atšbiana soyënga šmonjinýe y smondétatšëmbo. ⁴⁹ Atšbe Taitabe šbuachenaná, tšëngaftangbiana chanjíchmuá. Pero morna camuentše Jerusalemntše moquedanga, Bëngbe Bëtsabe obenana chašmóyëngacñëntscuana ca” —cha tojanëyana.

Jesús celoye tojtantsjuá (Mc 16.19-20)

⁵⁰ Chentšana, Jesús chabe uatsjédayënga ínjoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama. ⁵¹ Chca yojsamëntscuana, cha chëngbentšana tojanoluaré y tojanontšé celoye játsjuana. ⁵² Chë uatsjédayëngna, Jesús tmojtanadorá chentšana, Jerusalemoye oyejuayënga tmojtaná; ⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

¹ Quem luare ndobojátša ora, Cristo, chë Bëngbe Bëtsabe Uámana Oye-
buambnayana ya yojtsemna; chora cha, chë chca uabainá, Bëngbe Bëtsáftaca
yojtsanmëna, y cachá Bëngbe Bëtsá inamna. ² Ndegombre cha, chë temp-
scana Bëngbe Bëtsáftaca yojtsanmëna. ³ Cháftaca, Bëngbe Bëtsá lempe tojanma;
cháftaca ndóñesna, lempe ntšamo mora yomncá, Bëngbe Bëtsá tondaye
matëñjanma. ⁴ Cachábeñe nyets vida inamna, y quem vídaca tojánabo quem
luarentša entsangbe juabnënga jabuábinýnaya. ⁵ Cha tonjánabo moye, chë
entsangbe juabnënga ndoñe binýniñe yonjamnoye, chiñe jabobínýnaya.
Cha sempre chca yobinýna, y Satanás chë entsangbe juabnënga ndoñe
binýniñe chaondëtsemnama amá, ndoñe yondobena chë binýnayabe obe-
nana jtsejuánana.

⁶ Inamna canye boyabása, Juan ca uabainá; y Bëngbe Bëtsá tbojanichmó,
⁷ binýnayabiama chaóyeuambama; entsángbeñe binýnayabiama cháuyanama,
chca, ntšamo Juan chë binýnayabiama tojanya soyëngaca, nyetscanga
Jesúsbeñe chamotsošbuáchema. ⁸ Juan ndoñe yonjamna chë binýnayá.
Cha inamna canye ichmoná, chë nda binýnayá yomnabiama entsángbeñe
chauabáyanama. ⁹ Chë ndegombrá quem luaroye tonjánabo chë entsangbe
juabnënga jabuábinýnaya.

¹⁰ Chë Bëngbe Bëtsabe Uámana Oyebuambnayana quem luariñe yojt-
sanmëna; masque cháftaca Bëngbe Bëtsá quem luare tojanma, nda cha
yojamnama muentša oyenënga ndoñe monjántatšëmbo. ¹¹ Cachabe lu-
are entsángbiroye tonjánabo, y entsanga ndoñe tmonjánbošena cha jofjana.
¹² Nyetscanga, ndëmuanýenga cha tmojanébuaja y chábeñe tmojtsošbuáchenga,
cha derecho tonjanatšatá jtsobenama Bëngbe Bëtsabe básenga ca jtsabáinama.
¹³ Quem ošbuáchiyëngna, chca jtsemnama ndoñe tmonjanobená entsangbe
buiñëntšana tmojanonýnáyeca, o ndaye entsabe juabnentšana. Nye Bëngbe
Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oyebuambnayana, entsá tojanóbema,
y quem luare bëngaftaca yojëftsiyena. Cha yomna chë Bëngbe Bëtsabe
nye canye Uaquiñá; chiyecca bënga tifjáninye chabe bëts obenana y chabe
tšabe juabna, chë Bëngbe Bëtsábentšana tojanóyëngacñana. Cha corente
jtsababuánýeshanëse šojánanyëna y yojëftsiyena ntšamo ndegombre inamncá.
¹⁵ Juan mëntšá chabiama yojanáyeuache: “Chabiama sënjanoyebuambná, chë
ndabiama chora atše sënjánayana, chë átsbentšana jabamana atšbiama más
uamaná endmëna, er atše cabá ndonýna orna, cha ya yojtsemna ca.”

¹⁶ Cha tša tšabe ainana bómnyeyeca, bënga nyetscanga mallajta tšabe ben-
dicionënga tmojóyëngacñe. ¹⁷ Moisesbiajana tifjanóyëngacñe chë Bëngbe
Bëtsá tojanmandá soyënga. Pero Jesucrístbeyeca, Bëngbe Bëtsá tšabe bendi-
cionënga bëngbiama tojama y chë ndegombre soyënga bënga tmojëftsashjache.
¹⁸ Ndocná, ndocna te Bëngbe Bëtsábroye tbonjinýe. Chë nýe canye Uaquiñá
ibobomná, cach Bëngbe Bëtsá yomna; y cha, Bëngbe Bëtsá chë Taitáftaca
cánýiñe mo canýacá yomna. Mua, chë Uaquiñá, bëngbiama tojama, Bëngbe
Bëtsá juabuátmanama chaotsopodënama.

*Juan chë Ubayaná Jesucristbiana tojanabuayená**(Mt 3.11-12; Mc 1.7-8; Lc 3.15-17)*

¹⁹ Canýe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnocá trabájayënga, Juan yojtsemnoye, cha nda bëtsemnama chamuatjayama. ²⁰ Chocna, Juan chëngbe ñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsásmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanëjua: —Atše cha ndoñe quetsásmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanëjua: —Ndoñe ca.

²² Chora chënga tmojaniana: —Asna, ¿aca ndase cojtsemna? Bënga sontsamna nda aca cojtsemnama jtsetatšëmbuana, as chë sonjadespachenga jacúntama. ¿Ndayá cojtsobena cach acbiana jayanama ca?

²³ Y Juan mëntšá tojanëjua: —Atše sëntsemna chë ndabiana Bëngbe Bëtsabe juabna oyebuambnayá Isaías mëntšá tojanábema: “Entšanga ndoyenoca canýe abuyayinayá echántsemna, y entšanga mëntšá echántsabuyayinaye: Bëngbe Útabná echanjabo ca. Mo nda canýe benache tojtseprontacá, tšëngaftángnaca cachcá, cha jabama tšabe juabnëngaca smochtseprontana ca.”

²⁴ Chorna, báseftanga chë fariseungbe ichmónënguentšana, ²⁵ Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnëna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

²⁶ Chora Juan tojanëjua: —Atšna, béjayeca entšanga sëndëubáyana. Pero tšëngaftangbeñe canýa entsemna; cha ndoñe quešmatábuatma; ²⁷ y cha atšbe ústonoye echanjášhango. Atše merecido taitatobuajoñe, ni mo jotsejbiyama, chabe shecochëtjonëshentšá corriëja jajafjonama ca.

²⁸ Chca tojanopasá, canýe pueblo Betania ca uabáinentše, Jordán béjaye chenguana. Cach béjayıñe, Juan entšanga yojanëbáyana.

Jesús chë Bëngbe Bëtsabe Oveshatema ca uabainá

²⁹ Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanëyana: “Smochjinýe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna.

³⁰ Atše chabiana cbonjutsëtsná, mëntšá sënjanayana ora: ‘Atšbe ústonoye canýa echanjášhango. Cha atšbiana más uamana endmëna, er atše cabá ndonýna ora, cha ya yojtsemna ca.’ ³¹ Tempna, cach atše ndoñe quetsjántantatšëmbo nda cha bëtsemnana. Pero atšna inýënga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanëyana.

³² Chentšana Juan mëntšánaca tojanobuambá: “Chabiana mëntšá bominyë sënjanajó: chë Uámana Espiritu, mo canýe palomatemcá, celocana tonjánastjango y quem boyabásabe juatsbuañe tonjanotoná. ³³ Atše cabá ndoñe quetsjántantatšëmbo nda cha bëtsemnana, pero chë béjayeca jubáyama sonjanichmó cha, mëntšá sonjaniana: ‘Nda chacojinýe, chë Uámana Espiritu jastjanguana y chabe juatsbuañe jototonana, chábeyeca atše chanjíchmuá chë

Uámana Espíritu entsangbe ainaniñe cháumashënguama ca.' ³⁴ Y morna, atse aíñe chca tijinÿe, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca" —cha tojanëyana.

Chë Jesusbe natsana ústonënga

³⁵ Yëfsana, Juan chabe uatsjëndayënguentsana útataftaca cachoca yojtësemna.

³⁶ Jesús yojtsachnëjuanama, Juan tbojáninÿe ora, tojanëyana: "Sochjinÿe. Mua entsemna nda Bëngbe Bëtsá tbojichmó y iytanana Oveshatemcá entsobianná cha ca."

³⁷ Chora chë Juanbe uta uatsjëndayata, chca tbojanuena ora, Jesús tmojanasto. ³⁸ Jesús tojesanontjeshé y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentse icoyena ca? (Rabí endayana "Buatëmbayá ca".)

³⁹ Chora Jesús tojanëjua: —Mabo y sochjinÿe ca.

As chata tbojána y tbojáninÿe ndayentse cha yojaniyenana. Y chentse cháftaca tojéftsanajetana, ya jetiñe mo las cuatro ora yojtsemna causa.

⁴⁰ Chë Jesusbiam aoyebuambnayana Juánbioye tbojanóyeunata y Jesús tbojanasto útatentsana cánÿana Andrés ca yojanabaina; cha yojamna Simón Pédrëbe catšata. ⁴¹ Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniyana: "Chë Bëngbe Bëtsabe Uámana Uabuayaná, Cristo, fsënjínÿena ca."

⁴² Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniyana: "Aca condmëna Simón, Jonasbe uaquiñá, pero Cefas ca cochantsabaina ca." (Chcana endayana "Pedro o ndëtsbé ca".)

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: "Smasto ca."

⁴⁴ Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. ⁴⁵ Chentšana Felipe tojána Natanael janguanguama; y tbojaniyana: —Chë ndabiama leyënga librëšangañe Moisés tojanábema cha fsënjínÿena ca. Cachabiam a, Bëngbe Bëtsabe juabna oyeuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojaniyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentsana entšá jtsemnama. Cha tšabe entšá endmëna; ndocnábioye quebnatsíngña ca.

⁴⁸ Chora Natanael Jesúsbioye tbojantjá: —¿Ntšamo atse šcuabuatma ca?

Y Jesús tbojanjuá: —Felipe cabá aca ndëchembo ora, atse tcbonjinÿe, chë higo betiye tēchetšoye condëtsomñe ora ca.

⁴⁹ As, Natanael tbojaniyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

⁵⁰ Chora Jesús tbojanjuá: —¿Aca átsbeñe cojtsošbuaché, nÿe chë higo betiye tēchetšoye tcbonjinÿe ca tcbojauyanama? Ndegombre, chë soyama más bëts soyënga cochanjinÿe ca.

⁵¹ Chentšana Jesús tojaněyana: —Ndegombre šcuayana: Tšəngaftanga šmochanjinye celoca atəfjniñe, y Bəngbe Bətsabe angelotəmənga jtsetsjuajana y jtsastjajuanana Bəngbe Bətsá Entšá tbojanbemabe tatsətsoca.

2

Canye casamento Galilea luaroca, Caná pueblentše

¹ Chentšana unga tianoye, canye casamento inamna, canye pueblentše Caná ca uabáinentše, Galileoca. Chə oboyejuayoca Jesusbe mamá yojtsemna.

² Jesús y chabe uatsjəndayəngnaca chə casamentoca ófjanənga imojtsemna.

³ Chə oboyejuayentše, vínoye yojtsopochóca y Jesusbe mamá tbojaniyana: —Ya tondaye vínoye quemátsbomna ca.

⁴ As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

⁵ Chentšana, chabe mamá, chentša oservénənga tojaněyana: —Lempe šmochjama, ntšamo cha chacmojuayancá ca.

⁶ Chocna, chnənguana ndətsbé matbaja inamna. Chca matbajənguentša bəjayeca, judiənga imojanamana jtsacuéntšabiana cabá ndəse ora, ntšamo tempo entšanga imojanamancá, Bəngbe Bətsabe delante tšábənga jtsatsmənəma. Cada matbajiñe, mo shachna o canyəsəfta bnətsanájua bəjaye yojanába.

⁷ Chora Jesús chə oservénənga tojanaməndá: “Quem matbajənga bəjayeca mobuajutetjé ca.” Y chənga, chora lempe tmojanbuajutetjé.

⁸ Y Jesús tojaněyana: “Morna, bəseye mobuatsjo y chə fiesta otocanábioye mabuyamba ca.” Y chənga chca tmojanma.

⁹ Chora, chə fiesta otocaná, chə bəjaye Jesús vínoye tojanbemiye tojanftantiá, ndəmocana yojóbcnəma ntsetatšəmbcá. Pero chə oservénəngna aiñe imojtsetatšəmbo ndəmocana, er cachənga chə bəjaye tmojanbuatsjo. As, chə fiesta otocanana, chə bobontse bouamnábioye tbojanchembo, ¹⁰ y tbojaniyana: “Njətscanga monduamana natsana chə más uámana vínoye jushebəcana, y chə ófjanənga becá tmojatəmo ora, chə más batšá uámaniye. Pero acna, chə más uámana vínoye morscama tcojtsabofjájó ca.”

¹¹ Ntšamo Jesús tojanmca Caná pueblentše, Galileoca, yojamna chabe natsana bəts soye Bəngbe Bətsabe obenánaca. Y chca, chabe bəts obenana y uámanana cha tojaninjanjé; y as, chabe uatsjəndayənga chábeñe imojtsošbuaché.

¹² Chca tojanopasá chentšana, Jesús canye pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjəndayənga cha tmojantjəmbambá, y chocha baseftatescama tmojanoquedá.

Jesús Bəngbe Bətsabe bəts yebnentšana bacna entsanga tojtanəbuacna (Mt 21.12-13; Mc 11.15-18; Lc 19.45-46)

¹³ Ya canye judiəngbe bəts fiesta, chə Bashco fiesta yojətsobeco, chə ntšamo Bəngbe Bətsá chəngbe bəts taitanga Egiptocana tojánatsebacama jtenójuaboyama. Chə fiestama Jesús Jerusalenoye tojána. ¹⁴ Jerusalenoca, Bəngbe Bətsabe bəts yebnentše, Jesús tojánanjəna uacnənga, oveshənga y paloma enənga, y entšəngbioye crocənana atrócayənga, chəngbe luarənguenache

imojtsetbiámána. ¹⁵ Jesús chca tojánanýe ora, biajenga tojanaca, tjanjanéja tojanobopormá, y Bèngbe Bètsabe bèts yebnentšana nyetscanga tojtanébuacna, chèngbe oveshènga y uacnéngaca. Chentšana Jesús, Bèngbe Bètsabe bèts yebnentšana yojanoserverna crocénana atrocayèngbe crocénana tojtšanèjquèsheshe, y chë mesèshangá tojtšanenásatajchquèca. ¹⁶ Chë paloma enèngana Jesús tojanéyana: —¡Quem soyènga lempe muentšana matábocana! ¡Ndoñe matsbuamnana ni mátenana atšbe Bètsabe yebnentše, mo cányentše jiyama luarentše cuaftsemncá ca!

¹⁷ Y as, chabe uatsjéndayènga tmojanenojuabó ntšamo Bèngbe Bètsabe uabemana palabrénguife iuayanama: “Bèngbe Bètsabe yebna jtsebogianama juabna, nyets átšbeñe entsemna ca.”

¹⁸ Chora, judiènga Jesús tmojantjá: —¿Ndaye bèts soye cochjama bènga chašcunýanyèma, aca ndaye deréhcoca bèngaftaca chca cojtsobenama ca?

¹⁹ As Jesús tojanéjua: —Quem Bèngbe Bètsabe yebna menásatajchca, y atše unga tese chtètsbaná ca.

²⁰ Chora chë judiènga tmojaniana: —Canta bnètsana chnènguana uatiñe, quem Bèngbe Bètsabe yebna tmojanjebo. ¿Y aca, nye unga tese lempe cochtètsjebo ca?

²¹ Pero Bèngbe Bètsabe yebna, ndayama chora cha chca tojánayana, cachabe cuerpo yojsemna, ndoñe chë jebna soye. ²² Chama, Jesús obanènguentšana tojtanyena ora, chabe uatsjéndayènga tmojanenojuabó ntšamo muentše cha tojanéyanama. Chca ora, Bèngbe Bètsabe uabemana palabrénguife y Jesús chora tojánayana palabrénguife más chènga imojtsošbuaché.

Jesús nyetsca entšangbe juabna iuábuatma

²³ Jesús Jerusalenoca chë Bashco fiestama yojtsemnèntscuana, entšanga tmojáninýe Jesús jamana bèts soyènga Bèngbe Bètsabe obenánaca. Chíyeca, ba entšanga chábeñe imojtsošbuaché. ²⁴ Pero Jesús chèngbeñe ndoñe yontsošbuaché, cha nyetscanga yojanèbuatma causa. ²⁵ Y Jesús ndoñe bonjanájaboto chë entšangbe soyèngama chabotsebuaiyina, er cachá entšangbe ainaniñe nyetsca juabnénga yojanábuatma.

3

Jesús y Nicodemo

¹ Inamna canýe boyabása Nicodemo ca uabainá. Cha yojamna fariseunguentšá y judièngbe canýe amèndayá. ² Chana íbeta Jesúsbioye tojána y tbojaniana: —Buatèmbayá, bènga fsèntsetatšëmbo aca canýe buatèmbayá comnama, Bèngbe Bètsabe ichmoná. Ndocná quenátobena jamana quem bèts soyènga, aca contsama soyènga, Bèngbe Bètsá cháftaca ndoñe tontsemnèse. Chíyeca bènga chca fsèntsetatšëmbo ca —cha tbojaniana.

³ Chora Jesús tbojanjá: —Ndegombre cbèyana, nda ndoñe cachiñe ton-tonýná, cha ndoñe quenátobena Bèngbe Bètsabe amèndayana jinýama ca.

⁴ Y Nicodemo tbojantjá: —¿Ntšamo, canýe entšá ya bètsá tojtsemna ora, nantsobena cachiñe jtónýnama ca? Ndegombre, cha ndoñe ntsoebenana cachabe mamabe cuerpiñe jtamashènguana cachiñe jtónýnama ca.

⁵ Chora Jesús tbojanjá: —Ndegombre cbèyana, béjayerca y chë Uámana Espíritbeyeca ntjonýnacá, ndocná quenátobena Bèngbe Bètsabe amèndayoye jamashènguama. ⁶ Nda bètsétsabentšana tojonýná cha, quem luarentša entšangcá jtsemnana; pero chë Uámana Espíritbeyeca tojonýná chana,

jtsemnana canya chë Uamana Espiritu ainaniñe bomná. ⁷ Ndoñe matenjnanana ntšamo tbonjauyanama: “Nyetcanga entsamna cachiñe jtónyana”. ⁸ Chë binýia ndëmuajana tojtseboše jtsemnana, chëjana jtsanana. Masque entšanga, chë binýiyama jtsuenanana, ndoñe ntsetatšëmbuana ndëmocana yobama y ndëmoye yojsoma. Cachá, tšëngaftanga ndoñe quešmátstátšëmo ntšamo entšanga chë Uamana Espiritbeyeca tmojtsónyana; pero tšëngaftanga šmontsetátšëmo aíñe chca yomnama ca —Jesús tbojaniana.

⁹ Chora Nicodemo tbojantjá: —¿Ntšamo chca nántsemna ca?

¹⁰ Y Jesús tbojanjá: —Aca, canye Israeloca abuatambayá, ¿chë soyëngama ndoñe condëtatšëmo ca? ¹¹ Ndegombre cbëyana, bëngna chë fststátšëmo soyëngama fsëntsoyebuambná, y chë tifinye soyëngama ndegombre bëtsemnana fsëntšchamo. Pero tšëngaftanga, chë cbontsëtsësná soyënguiñe ndoñe quešmatošbuaché. ¹² Atse, quem luarentša soyëngama sënjoyebuambá y tšëngaftanga átsbeñe ndoñe chešmatošbuaché. Y as, ¿ntšamo átsbeñe šmochtsošbuáchiye, celoca soyëngama cbojtsëtsësnase?

¹³ “Ndocná, nye cachábeyeca Bëngbe Bëtsábioye tonjátsjua. Nye chë celocana tojabá aíñe, chë Bëngbe Bëtsá Entšá tbojanbemá. ¹⁴ Y chcase, ntšamo Moisés entšanga ndoyenoca bronce mëtscuaye tsbanánoca tbojananguëšëtjá, šoquënga tšabá chamotsatšmënana; cachá entsemna, Bëngbe Bëtsá Entšá tbojanbemá entšanga chamuatsšbanama; ¹⁵ chca, nyetcanga chábeñe tmojtssošbuáchenga, chë nyetsca tescama yomna tšabe vida chamotsebomnama ca” —Jesús Nicodémioye tbojaniana.

Ntsachetšá Bëngbe Bëtsá entšanga iuababuányëshana

¹⁶ Mëntšánaca Jesús tojánayana: —Bëngbe Bëtsá quem luare entšangbioye tša yojánababuanýëshanayeca, chë nye canye Uaquiñá ibobomná, bëngbioye tbojichmó, nyetsca chábeñe ošbuáchiyënga ndoñe chamondóbanama, y aíñe chë nyetsca tescama yomna tšabe vida chamotsebomnama. ¹⁷ Er Bëngbe Bëtsá chabe Uaquiñá quem luaroye ndoñe tbojichmó quem luare entšangbiamama jabányana ntšamo tmojamama castigánënga chaotsamnama ca, sinó, entšanga chábeyeca atsebácanënga chamotsemnana.

¹⁸ “Nda Bëngbe Bëtsabe Uaquiñábeñe tojtssošbuáchebiamama, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nye canye Uaquiñá ibobomnábeñe ndoñe yontsošbuaché causa. ¹⁹ Chca, chë ndoñe tmontsošbuáchengbiamama cha ya tojayana, ntšamo tmojamama castigánënga chamotsemna ca; er chë entšangbe juabnënga binýiná quem luaroye tojabo, pero ba entšanga tmojábosëna jtsomñana, chë entšangbiamama bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñana. ²⁰ Chë bacna soyënga tojtsamá ndoñe ntsebošana, chë binýiná chabe bacna soyënga chabuñýinýema, ni chabe bacna soyëngama chabuácacanamama. Chíyeca, chë bacna soyënga jtsamëse oyená, chë binýinábioye jtsáboýënjana, y chë binýinábioye ndoñe ntjabana. ²¹ Pero nda sempre tojtsiyena ntšamo ndegombre yomncá jtsamëse, chana aíñe chë binýinábioye jabana, chë binýiná chabiamama chabuñýinýema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachiñe Jesucristbiamá tojanabuayená

²² Chca tojanopasá chentsana, Jesús chabe uatsjéndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjéndayëngaftaca tojanoquedá, entsanga ubáyana. ²³ Cach tempo, Juanënaca entsanga yojanëbáyana Enonoca, Salim béconana, er choca bétscá béjaye inabinýna. Ba entsanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontsé inýe judíoftaca enatsësnayana ntšamo tempo judiënga chë jtsacuëntšabiama imojanámanama. ²⁶ Chora, chënga Juánbioye tmojánabo y tmojanियana: —Buatëmbayá, chë Jordán chenguánoica ácaftaca enjamnă, ndabiamá tša tsabá conjanoyebuambná, mora entsanga entsëbayana y nyëtscanga cha montséstona ca.

²⁷ As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. ²⁸ Cach tsëngaftanga tsabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámána Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamá entsanga jabábuayenama. ²⁹ Chë tobiasë tojtsobouamá ora, chë bobontse chábioye jtsebomnana; y chabe amigna, chabiamá jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna. ³⁰ Cha bontsemna más uamaná jtsemnana, pero atše šontsemna más nduaná jtsemnana ca —Juan tojanéyana.

Ntšamo yomna chë celocana tojabá

³¹ Mëntšánaca Juan tojánayana: “Chë tsbanánocana tojabá, nyëtsca entsangbiamá más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyebuambnayana, pero chë celocana tojabana, nyëtsca entsangbiamá más uamaná endmëna. ³² Cachá ntšamo tojinýe y tojouencá entsoyebuambná, pero chë entsichamo soyënguiñe ndocná quenatošbuaché. ³³ Nda ntšamo cha tojtsóyebuambnañe tojtsóšbuaché y chca tojtsama, jtsinýanjñayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tojichmó chë Uámána Espíritu, nyëts tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábioye bondbobonshana, y chë Uaquiñábioye obenana tojatšetá nyëtsca soyënguiñe jtsemándayama. ³⁶ Nda chë Uaquiñabeñe tojtsóšbuaché, chë nyëtsca tescama yomna tsabe vida echántsebomna; y nda chë Uaquiñábioye ndoñe bontsašbuaché, chana chë vida ndoñe queochátsbomna, y chë Bëngbe Bëtsabe uabuouana castigo nyëtsca tescama chábeñe echántsemna ca” —cha tojánayana.

4

Jesús y chë Samaria luaroca shembása

¹ Chë fariseunga tmojanuena Jesús, Juanbiamá más ústonënga yojtsabamnama, y más entsanga yojtsëbáyana. ² Pero ndegombre, cach Jesús

ndocnábioye bonýanábayana, sinó chabe uatsjédayënga. ³ Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojéftsanbocna y Galileoye tojtaná.

⁴ Choye jtamna ibojamna Samaria luarëjana jachnënguana. ⁵ Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiná Josébioye tbojéftsanlargá fshantse béconana. ⁶ Choca yojamna cánýentšë atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nýetsto ora, chentše Jesús yojtsemna, aniñe uamëntšnaya, chë atëfjóniñe batsjaca yojótbema. ⁷⁻⁸ Chabe uatsjédayëngna chë pueblöye tmojána saná jobuámiñama. Chora, canýe shembása Samariocá, chë atëfjónöye tojánashjango, búyeshe jauafcama; as Jesús tbojaniyana: —Búyeshtema šmabuatsëtá ca.

⁹ Y chë shembása tbojanjuá: —Aca canýe judío condmëna y atšna canýe samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanatsëtšná.)

¹⁰ Chora Jesús tbojanjuá: —Aca mo cojtsetátšëmbo nýe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

¹¹ Y chë shembása tbojaniyana: —Señor, tondaye quecátsbomna nýe mo ndayecnaca búyeshe jabuatsjuama, y chë atëfjóniñe corente tboca endmëna; y as, ¿ndayentsana cochjobenaye béjaye vida bomniye atše juabuatsšetayama? ¹² Bëngbe tempsca bëtš taitá Jacob, quem atëfjóniñe bëngbiana tojéftsanboshjona. Cachá, chabe básenga y chabe bayënga muentšana búyeshe tmojéftsanofšë; y ¿aca chabiama más bëtšá comna ca? —chë shembása yojtsichamo.

¹³ As Jesús tbojanjuá: —Nýetscanga chë quem búyeshentsana tmojofšenga, chënga cachiñe echantëtëjuendaye. ¹⁴ Pero chë chanjuabuátšetaye búyeshentsana tojofšë chana ndocna te cachiñe quebochëtajuendaye. Cha chanjuabuátšetaye búyeshna, chábeñe echántsemna mo cánýentšë béjaytema obocaniñcá, chë nýetsca tescama yomna tšabe vida jtsebomnama ca —cha tbojaniyana.

¹⁵ Chora chë shembása tbojaniyana: —Señor, chca búyeshe šmabuatsëtá, as atše ndoñe cachiñe chašondetsajuendama, ni búyeshe juafcama moye jtsaboyama ndoñe chašondëtsemnama ca.

¹⁶ As Jesús tbojaniyana: —Motsa acbe boyá jachembuama y cochjésabo ca.

¹⁷ Chora chë shembása tbojanjuá: —Boyá ndoñe quetsátsbomna ca.

As Jesús tbojaniyana: —Tšabá tcjayana boyá ndoñe condbomna ca. ¹⁸ Er, aca shachna boyanga conjánabamna, y chë mora contsebomna, acbe boyá ndoñe quenátšmëna. Ntšamo tconjayancá ndegombre entsemna ca.

¹⁹ Chë shembása chca tojanuena ora, Jesúsbioye tbojaniyana: —Señor, mora atše séntsetatšëmbo, aca canýa Bëngbe Bëtsabe juabna oyebuambnaya comnama. ²⁰ Bëngbe tempsca bëtš taitanga quem tjoca Bëngbe Bëtsá monjánadorana; pero tšëngaftanga, judiënga šmondbëtsichamo, bënga Bëngbe Bëtsá jadóramna, Jerusalenoca chë luare canmëna ca.

²¹ Chora Jesús tbojanjuá: —Shembása, šmoyeuná; canýe tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana. ²² Tšëngaftanga samaritanënga ndoñe quešmatábuatma nda šmetsadoránama; pero bënga

aíñe fsënduábuatma, er chë atsebacayá judiënguentsana endabó. ²³ Pero ora entsoshjauana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántsadorana. Er chë Taitá entseboše chë chábioye adórayënga chca chamotsamama. ²⁴ Bëngbe Bëtsá, Espiritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca —Jesús tbojanianyana.

²⁵ Chora chë shembása tbojanianyana: —Atše sëndëtatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

²⁶ As Jesús tbojanianyana: —Atše, chë ácaftaca entsoyebuambná cha, cha entsemna ca.

²⁷ Chëntsacuana, Jesusbe uatsjëndayënga tmojtannashjajna, y tmojtannëuatjaná, Jesús canyë shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

²⁸ Chorna, chë shembása chabe uafcanëja tojésanboshjona, y chë puebloye betso tojtaná. Chocna, entsanga tojanëyana: ²⁹ “Mabënga canyë boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

³⁰ As chë entsanga chë pueblcana tmojánbocana y Jesús yojtsemnoye tmojánashjajna. ³¹ Chca yojtsopasánëntscuana, chë uatsjëndayënga Jesúsbioye imojtseimpadana: —Buatëmbayá, batšatema mose ca.

³² Pero cha tojanëyana: —Atše canyë soye jasama sëntsebošna. Tšëngaftanga chë soyama ndoñe quešmátstatšëmbo ca.

³³ Chora chë uatsjëndayënga tmojanontšë entjanayana: —¿Nderado nda jasama chabiamá tojiyëbo ca?

³⁴ Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiamá entsemna.

³⁵ Tšëngaftanga šmondbétsichamo: “Cabá canta ishinyë entsashbena jaja saná chaotsebinýnama ca”; pero atše cbëyana: Minýënga tša entsanga moye montsabëbana; chënga montsemna mo jajañe saná játbanama tojtseprontancá. ³⁶ Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchifnana. Cachcá, tšëngaftanga cmontsamna atšbiamá entsanga júbuajana, chë nyetsca tescama yomna tšabe vida chamotsebošnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsanga átšbeñe chamojtsošbuaché ora, nyetscanga, chë atšbiamá obuájajanënga y chë atšbiamá trabájayëngnaca cánýiñe oyejuayënga mochántsemna. ³⁷ Quem entsangbe ichámuaana, canyë ndegombre soye endmëna: “Chë jená canýa jtsemnana, y atbanayana inýa ca.” ³⁸ Atše tšëngaftanga cbonjichamó canyë soye játbanama, y tšëngaftanga tondaye chešmatšma chca chaotsebinýnama. Inýënga chiñe bëtscá tmonjëftsetrabája, y tšëngaftangna, chëngbe trabajënguentsana šmojolograñe ca —Jesús tojánayana.

³⁹ Bëtscá entsanga, Samarioca pueblentšënga Jesúsbeñe imojtsanošbuaché, ntšamo chë shembása tojanëyanama. Chë shembása tojanëyana: “Lempe ntšamo atše tijamcá cha šonjauyana ca.” ⁴⁰ As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjëtana. ⁴¹ Y más

entšanga, cach ntšamo Jesús yojtšanëtsëtsnacá tmonjanuena ora, chábeñe imojtsanošbuaché.

⁴² Y chë shembása chë entšanga tmojaniana: “Mora cocayé fsëntsošbuaché, ndoñe nye ntšamo aca šcojáuyanama, sinó cach bēnga chábioye oído fsēnjabuajóyeca; y mora fsēntsetatsēmbō ndegombre cha yojtsemna chë quem luare entšangbiana Atsebacayá ca.”

Jesús, canye mandado uajabuachanabe básabioye tbojanshná

⁴³ Uta te chentšana, Jesús Samariocana tojáisanbocna y Galileoye tojataná. ⁴⁴ Cach Jesús mēntšá tojánayana: “Canya Bēngbe Bētsabe juabna oyebuambnayá, cachabe luarentše oyenēnga ndoñe bētsá ntjabemēngana ca.” ⁴⁵ Galileoca oyenēnga Jerusalenoye tojána, y tojáninnye nyētsca bēts soyēnga ntšamo Jesús Bashco fiesta ora choca tojanmcá. Chiyeca, Jesús Galileoye tojtanashjango ora, chēnga tšabá tmojtanoŋja.

⁴⁶ Galileocna, Jesús cachiñe Caná pueblōye tojēsanashjango, chë bējayeca vínōye cha tojānbementše. Choca yojtsemna canye mandadbe uajabuachaná, y chabe uaquiñana Capernaum pueblōca šocá yojtsejájona. ⁴⁷ Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuet-seshnáñama, er ya jtsóbanama yojtsemna ca. ⁴⁸ As Jesús tbojaniana: —Tšēngaftanga, Bēngbe Bētsabe obenana jinyan'yiyama bēts soyēnga atše jamama ndoñe šmonjin'yēse, átšbeñe ndocna te ntsošbuáchiyana ca.

⁴⁹ Chora, chë mandadbe uajabuachaná Jesúsbioye tbojaniana: —Taita, betso mabo, atšbe uaquiñá cabá ndóbana ora ca.

⁵⁰ As Jesús tbojaniana: —Acbe yebnoye motsatá. Acbe uaquiñá ainá endētsomñe ca.

Chë boyabásana tojanošbuaché ntšamo Jesús tbojaniancá y tojtaná. ⁵¹ Cha yojtsataye orna, chabe oservēnēnga tojánbocana jajēbenguama y tmojaniana: —Acbe uaquiñá tšabá entsatsmēna ca.

⁵² As cha tojanatjá: —¿Ntseco orscana tbenjatēcja ca?

Y chēnga tmojanjuá: —Tonjopasá yēfse, mošenana orscana chë calentora tbonjábosana ca.

⁵³ Chora chë taitá tojanenujabó, cachca ora Jesús tbojaniana: “Acbe uaquiñá ainá endētsomñe ca”. Y cha y nyētscanga chabe yebnentše oyenēnga Jesúsbeñe imojtsanošbuaché.

⁵⁴ Ntšamo Jesús chora, chë uajabuachanabe uaquiñabiana tojanmcá, Judeocana Galileoye yojtsataye orna, yojamna chabe utama chca bēts soye jamama, Bēngbe Bētsabe obenana jinyan'yiyama, Galilea luaroca.

5

Jesús canye jama ndobenábioye tbojanshná

¹ Baseftayté chentšana, chë judiēnga canye oboyejuaye te imojtsebomna ora, Jesús Jerusalenoye tojána. ² Choca, chë Oveshēngbe amashjuana ca uabáinentše yojamna canye binche uafjajónaye, entšangbe pormániñe. Chë bējaina judiēngbe biyañe Betzata ca inauabaina. Chë bējaye juachañe shachna amashjuana otsbojebniñe inamna. ³ Chiñna ba šoquēnga jtanēnga, coshetēnga y jama ndobenēnga imojtsecjana; chë bējaye chamobonjoma imojtsobátmana. ⁴ (Nderado nderado, Bēngbe Bētsábica canye ángel yojanamana

jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) ⁵ Chë šoquënguñe canye boyabása inamna, unga bnëtsana y posufta uatama jama ndobená. ⁶ Jesús chë jajonábíoye tbojáninye ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënana ca?

⁷ Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inya atšbe natsana jtsamashënguana ca.

⁸ Y Jesús tbojaniana: —Matëtsbaná, acbe tjuashe mesocñe y matontsé jóyenana ca.

⁹ Cach ora chë boyabása tšabá yojtsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. ¹⁰ Chíyeca, chë tbojanshnábíoye chë judiënga tmojaniana: —Mëntena ochnayté. Mënté ndoñe quenátopodena aca tjuashe jtssecsnana ca.

¹¹ Y chë boyabása tojanëyana: —Chë šonjashná cha mëntšá šonjauyana: “Acbe tjuashe mesocñe y montsé jóyenana ca”.

¹² As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tmojauyaná ca?

¹³ Pero chë shnaná ndoñe yontsetátsëmbo nda tbojanshnama. Chocna bëtscá entšanga imojtsemna; chcasna, Jesús chëngbe tsëntsajana tojanenatjëmbe.

¹⁴ Chentšana, Jesús Bëngbe Bëtsabe bëts yebnentše chë boyabásabíoye tbojáninyena y tbojaniana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Añese, acbiama puerte mal echanjopása ca.

¹⁵ Chë boyabása tojtsanoñe y chë judiënga tojanëyana: —Chë šonjashná cha Jesús entsemna ca.

¹⁶ Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. ¹⁷ Pero Jesús tojanëyana: “Atšbe Taitá nyets tempo tšabe soyënga endbëtsama; cachcá, átsnaca tšabe soyënga sëntsama ca.”

¹⁸ Jesús tojanma ntšamo ochnayté ndoñe yonjanapodencá, y Bëngbe Bëtsabíama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

¹⁹ Chentšana Jesús tojanëyana: “Ndegombre šcuayana: Bëngbe Bëtsabe Uaquiñá, nye cachabe cuenta tondaye quenátobena jamana. Cha jtsonyayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. ²⁰ Er Bëngbe Taitá chabe Uaquiñábíoye bondbobonshana, y lempe ntšamo cha tojtsamcá chábíoye bondinjinyná; y más bëts soyënga bochanjinjinñiye, chë soyëngama tšëngaftanga chašmenjnanama. ²¹ Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanyënga cha tojtsebošcá. ²² Chë Taitá ndocnabíama jatichámuaana tšabá o ndoñe tšabá yontsama ca. Chabe Uaquiñábíoye nyets obenana tbonjatšetá nyetscangbiamna jayanama tšabá o ndoñe tšabá tmonsamama. ²³ Chca, chënga chamuinjinñyé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinjinynaycá. Nda chë

Uaquiñábíoye ndoñe más uamaná tbotsebiamnă, cach ndoñe más uamana ntsebiamnăyana chë Taitábíoye, nda chë Uaquiñá tbojichmóbíoye.

²⁴ “Ndegombre šcuayana: Nda ntšamo atše sentsichamcá šojoyeuná, y chë muentše šonjichmó chábëñe tojtsošbuaché, chë nyetsca tescama yomna tšabe vida jtsebmomna. Chabiama chë Uaquiñá ndoñe queochátayana castiganá chaotsemna ca. Chca, Bëngbe Bëtsabiama cha ya ndoñe más mo obanacá queochátmëna, chábëñe ndošbuáchiye causa; y ya ndoñe nyetsca tescama castiganá queochátmëna. Y aíñe, chë nyetsca tescama yomna tšabe vida echántsebmomna.

²⁵ “Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabiama mo obanëngcá imomnënga mochanjouena Bëngbe Bëtsabe Uaquiñá jtsóyebuamnăyana. Nda chca tšabá chašojoyeuná cha, tšabe vida echántsebmomna. ²⁶ Er ntšamo Bëngbe Taitá obenana endbmocná, cachá jamana entšanga vida chamotsebmomna, chabe Uaquiñábíoyenaca obenana tbojatšetá entšanga vida chamotsebmomna jamama. ²⁷ Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábíoye obenana tbojatšetá nyetscangbiama jayanama tšabá o ndoñe tšabá tmontsamama. ²⁸ Chama ndoñe matenjnanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. ²⁹ Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebmomna. Pero bacna soyënga tmojëftsemëngna obanënguentšana mochántayena nyetsca tescama castiganënga jtsemnama ca” —Jesús tojanëyana.

Jesús, ndegombre Bëngbe Bëtsabe ichmoná inamna

³⁰ Mëntšánaca Jesús cachatbiama tojánayana: “Nye átšbeyeca tondaye quetsátobena jamama. Chë Taitá šontsemánda ntšamo nyetscangbiama jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátsboše jamana nye ntšamo cach atše stebošcá; pero sempre sëndbëtseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbiama sentsichamo tšabá o ndoñe tšabá tmontsamama; y ntšamo nyetscangbiama sentsichamcá, ndegombre endmëna.

³¹ “Ntšamo cach atšbiama tijayanama, ndegombre entsemna ca stsichámëse, ntšamo stsichamcá, nyetscangbiama tondaye ntsámanana. ³² Pero inya entsemna. Cha endëtatsëmbo y entsichamo ntšamo ndegombre atšbiama yomncá; y sëntsetatsëmbo ntšamo cha atšbiama yojtšichamcá, nyetscangbiama aíñe yojtšámanana. ³³ Tšëngaftanga ínýenga šmojanichamó atšbiama Juan jatjayama; y ntšamo cha tmojuayancá ndegombre endmëna. ³⁴ Masque chë soyënga cha tmojáuyana, ndoñe quešnatájoboto ndocna entšá atšbiama chaotsichamo ‘cha aíñe chca endmëna ca’. Atše quem soyënga sentsichamo ndayá nye tšëngaftanga atsebácanënga chašmotsemnama. ³⁵ Juan enjamna mo canye uajuinýanësha tojtšajuinýana y tojtšabuashinýinýancá. Tšëngaftanga chabe buashinýinýanana šmonjinýe, y šmonjábošena rato cháftaca oyejuayënga jtsemnama. ³⁶ Pero chë atše sënjama soyëngacna más entsinýinýena ntšamo atšbiama ndegombre yomncá, chë ntšamo Juan atšbiama tojánayanama. Ndayá atšbe Taitá šojabonýe jamama, ntšamo atše sentsamcá, entsinýinýná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo

atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe. ³⁸ Pero tsêngaftangbe ainanoye chabe palabra ndoñe tonjómashêngo, cha tbojichmóbeñe tsêngaftanga ndoñe quešmatošbuaché causa. ³⁹ Tsêngaftanga, Bêngbe Bêtsabe palabra tša jtsatsjéndayana, er šmondobátmana, chca jtsamëse chë nÿetsca tescama yomna tsabe vida jónÿenama. Y Bêngbe Bêtsabe uabemana palabrênguiñe atšbiana endayana ntšamo ndegombre yomncá; ⁴⁰ pero masque chca, tsêngaftanga ndoñe quešmátsboše atše jtséstonana, y chca, tsabe vida jtsebomnana.

⁴¹ “Atše ndoñe quetsátsboše entsanga yapa tsabá atšbiana chamotsichámuama. ⁴² Y inÿe soye, atše puerte chondëbuatma, y sëndétatsëmbo tsêngaftanga Bêngbe Bêtsá ndoñe šmondobonshánama. ⁴³ Atšna atšbe Taitabe cuenta sënjabo, y tsêngaftanga ndoñe quešmátsboše atše jofjana. Pero inÿa, cachabe cuenta tojabábioye cocayé aifne šmatjofja. ⁴⁴ Tsêngaftanga corente jébeošana, ínÿenga tsêngaftangbiana tsabá chamotsichámuama, y ínÿengbiana tsabá jtsichámuama; pero ndoñe ntsebošana chë nÿe canÿe Bêngbe Bêtsá tsêngaftangbiana cachcá chaotsichámuama. Chca šmojtsamëse, ¿ntšamo šmochtsobena Bêngbe Bêtsábeñe jtsošbuáchiyana? ⁴⁵ Ndoñe šmattsejuabnaye, atšbe Taitabe delante tsêngaftangbe contra atše chjyana ca ntšamo tsêngaftanga šmojtsamama. Tsêngaftanga tša jtsobátmanana atsebácanënga jtsemnana, chë ntšamo Moisesbe leyiñe endayancá šmojtsamama; pero ndegombre, ntšamo cha tojayancá, cach tsêngaftangbe contra entsemna. ⁴⁶ Tsêngaftanga, chë Moisés tojéftsanabema soyiñe šmojtssošbuachese, átšbeñnaca šmattsošbuáchiye, er cha atšbiana tojanábema. ⁴⁷ Pero chë tojanábema soyiñe tsêngaftanga ndoñe šmontsošbuachesna, ¿ntšamo šmochjobenaye chë atše sentsichamo soyënguifne jtsošbuáchiyana ca?” —Jesús tojanéyana.

6

Jesús shachna uaranga boyabásenga saná tojanacaredadó (Mt 14.13-21; Mc 6.30-44; Lc 9.10-17)

¹ Chë soyënga tojanopasá chentsana, Jesús chabe uatsjéndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. ² Ba entsanga imojtséstona, er chënga tmojáninÿe cha bêts soyënga jtsamana, šoquënga jtsashnayëse. ³ As Jesús tjoye tojántsjuá, y choca chabe uatsjéndayëngaftaca tojanótbema. ⁴ Ya judiëngbe canÿe fiesta, chë Bashco fiesta, vojétsobeco.

⁵ Jesús tojanótbema ora, tojanontješé y tojánanÿe ba entsanga chábioye imojtsebéconaye. As Felípbioye tbojaniyana: —¿Ndayentše saná cuanjabuámiye nÿetsca quem entsanga chamosama ca?

⁶ Jesús chca tbojaniyana, ana Felípbioye jinÿama ntšamo cha tabuanjojuama; er cach Jesús tsabá inatátsëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nÿetsca entsanga nÿe mo batšatëmnaca chamuëtsesama ca.

⁸ Chorna, Jesusbe canÿe uatsjendayá, Andrés ca uabainá, Simón Pédrëbe catšata, Jesúsbioye tbojaniyana: ⁹ —Muentše entsemna canÿe básetema y cha shachna cebada tandëse y uta beónata entsebomna. Pero, ¿ndayase nÿe nÿetsatema chëfta entsangbiana ca?

¹⁰ As Jesús tojánayana: —Entšanga mēyana chamotbiama ca.

Becá shácuana chē luariñe inamna, y n̄yetsca entšanga chiñe tmojanoshēntsajtbiama. Chē entsanguentše shachna uaranga boyabásenga imojtsemna. ¹¹ Chora Jesús, chē tandēse chabe cucuatšine tojanca, y Bēngbe Bētsábioye chē tandēsama tbojtanchuá; y chabe uatsjéndayēnga tojanējatá, y chē uatsjéndayēngna n̄yetsca entšanga imojtsetbiámanēnga tmojanatšatá. Cachá Jesús chē beónaca tojanma, y ntšamo entšanga imojanbošcá tmojanatšatá. ¹² N̄yetscanga tmojanse y tmojtanoshachá ora, Jesús chabe uatsjéndayēnga tojanēyana: —Chē ojamnētēmēnga šmochtsatbananga, tondaye n̄ye cachá ntjēftsonyayama ca.

¹³ As chēnga tmojanatbaná, y chē tmojanse shachna cebada tandēsentsana tojanójamēmēngaca, bnētsana uta sbarēcua tmojanajutjé. ¹⁴ Chē entšanga quem bēts soye Jesús jamama tmojánin̄ye ora tmojánayana: “Ndegombre quem boyabása, chē quem luaroye jabama Bēngbe Bētsabe juabna jabóyebuambayama cha entsemna ca.”

¹⁵ Jesús yojtsetátšēmo entšanga chēngbe rey jabemama imojetsebošama. Chíyeca cach tjoye tojtsaisanoñe can̄ya jtsomñama.

Jesús bėjaye juatsbuacá yojtsaye
(Mt 14.22-27; Mc 6.45-52)

¹⁶ Tojanibétata ora, Jesusbe uatsjéndayēnga chē uafjajónayoye tmojantsmá; ¹⁷ barquēshañe tmojtanojajé, y tmojanontsé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chēngbioye ntashjanguana. ¹⁸ Chca imojtensashbuachnējuana orna, chē bėjayiñe jabuache bin̄yia tojanóshjango y bēts olēshēnga chē barquēshoye yojtsójantšetaye. ¹⁹ Shachna o chnēnguana kilómetro chēnga tmojána ora, tmojánin̄ye Jesús chēngbioye yojtsebéconaye, bėjaye juatsbuacá yojtsaye. Chēnga chca tmojánin̄ye ora tša tmojanocochauatjaná, ²⁰ pero Jesús tojanēyana: “Atše sēndmēna; ndoñe matauatjēngana ca.”

²¹ Chora chē uatsjéndayēnga oyejuayēnga imojtseboše Jesús chē barquēshoye jofjana, y ndoñe bēnēntscose ya chē imojtsaye luaroye tmojánashjajna.

Entšanga Jesús tmojáanguo

²² Yēfsana, n̄yetsca entšanga, chē uafjajónaye chenguánoica tmojanoqueadanga tmojánin̄ye, chē in̄ye yēfsana chē n̄ye can̄ye barquēsha jojuamnēshañe Jesusbe uatsjéndayēnga tmojtsanoñama, y Jesús chēngaftaca ndoñe tonjánama. ²³ Pero chēntscuana, Tiberias pueblentšana in̄ye barquēshangá tojanáshjajna can̄ye luarentše, chē Bēngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. ²⁴ Asna, ni Jesús ni chabe uatsjéndayēnga chentše ndoñe montsemnama chē entšanga tmojánin̄ye ora, chē barquēshangañe tmojtanojajé y Capernaumoye tmojána Jesús jetsenguanguama.

Jesús, chē n̄yetsca tescama yomna tšabe vida jtsebomnama tandēse

²⁵ Chē uafjajónaye chenguánoye tmojánashjajna ora, Jesús tmojánin̄yena y mēntšá tmojantjá: —¿Buatēmbayá, ntseco ora muentše tcojášhango ca?

²⁶ Y Jesús tojanēyana: —Ndegombre cbēyana, tšēngaftanga ndoñe atše quešmatsngúá, chē bēts soyēnga tjamama, sinó n̄ye chē jtshachaye n̄yetsá tandēse šmojasama. ²⁷ Ndoñe matenángmenana chē n̄ye ndoñe bēn y

jopochócana sanama; chë ndmopochócaye saná, chë nyetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinýanýé, tšabe soyéngaca, cha chábiyoye tbojuábuayanama ca —tojánayana.

²⁸ Chora chë entšanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

²⁹ Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chašmotsošbuáchemaca.

³⁰ Chora chënga tmojaninyana: —¿Ndaye tšabe soye cochjama acbe obenana bënga jinýanýiyama ca? Chë soye chaftsjinýese, ábeñe fchantsošbuáchiye. ¿Bëngbiana taicochjama ca? ³¹ Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrënguñe mëntšá endayana: “Cha celoca tandëse tonjanatšatá chamosama ca” —chënga tmojánayana.

³² Chora Jesús tojanéyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbiyoye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatšatná. ³³ Er Bëngbe Bëtsábíocana tandëse entsemna chë celocana tojastjanguá; y cha quem luare entšangbiana entsama chë nyetsca tescama yomna tšabe vida chamotsebomnama ca —cha tojanéyana.

³⁴ Chora chënga tmojanimpadá: —Taita, chë tandëse sempre šcochtsatšatnaye ca.

³⁵ Y Jesús tojanéyana: —Atše sëndmëna entšanga chë nyetsca tescama yomna tšabe vida jtsebomnama tandëse. Nda atše chašojtséstona, sempre oyejuayá echanjéftsemna y Bëngbe Bëtsabe soyënga nyets tempo echanjesóbomñe, mo nda nyets tempo saná totsobomñcá, y ndocna te tbonstishëntsancá.

³⁶ Pero ntšamo ya tbonjauyancá, tšëngaftanga atše šmonjinýe y cabá ndoñe átšbeñe quešmatosbuaché. ³⁷ Nda atšbe Taitá atšbiana tbojabocacá, cha atše šochantséstona; y nda átšbiyoye šojtséstona, átšbentšana quichtëtábocna.

³⁸ Er atšna celocana sënjabo chë šojichmó cha ntšamo yojtsebošcá jamama, y ndoñe nye ntšamo atše stsebošcá. ³⁹ Y chë šojichmó cha entseboše, ni mo canýa chë atšbiana tojabacacá chentšana, atše chailenciá pochocaná chaotsemnama; y quem luare jopochócama tena, nyetscanga atšbiana tojábacangbiana chámuatayenama atše chaimama. ⁴⁰ Er atšbe Taitá entseboše, nda chabe Uaquiñábíoye tbojinýe y chábeñe tojtsošbuaché, chë nyetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

⁴¹ “Atše sëntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiana podesca ichámuana. ⁴² Chënga mëntšá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmotsábuatmñe. ¿Ntšamo cha mora yochjátichamo celocana tojástjango ca?

⁴³ As Jesús tojanéyana: —Atšbiana ndoñe podesca matichámuana. ⁴⁴ Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atše chanjama cha cháuatayenama quem luare jopochócama te. ⁴⁵ Chë tempsquënga Bëngbe Bëtsabe juabna oyebuambnayënga mëntšá tmojanábema: “Cach Bëngbe Bëtsá

nÿetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinÿe, cha atšbe šochanjuasto.

⁴⁶ “Ndocná atšbe Taitá tbonjinÿe. Nÿe chë Bëngbe Bëtsábíocana tojabá aiñe. ⁴⁷ Ndegombre šcuayana: Nda átšbeñe tojtsošbuaché, chë nÿetsca tescama yomna tšabe vida echántsebomna. ⁴⁸ Atšbe sëndmëna entšanga chë nÿetsca tescama yomna tšabe vida chamotsebomnana tandëse. ⁴⁹ Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana. ⁵⁰ Pero atšbe sëntsoyebuambná ndayá chë celocana tojóshjango tandësama. Nda chë tandëse tojase, ndoñe queochatóbana. ⁵¹ Atšbe sëntsemna entšanga chë nÿetsca tescama yomna tšabe vida jtsebomnana tandëse, chë celocana tojóshjanguëse. Nda quem tandëse tojase, nÿetsca tescama nÿe ainá echanjesomñe. Chë chanjátšataye tandëсна, cach atšbe cuerpo entsemna. Chca chanjama quem luare entšanga chë nÿetsca tescama yomna tšabe vida chamotsebomnana ca” —Jesús tojánayana.

⁵² Chora chë judiënga tmojanontšé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

⁵³ As Jesús tojanëyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. ⁵⁴ Nda atšbe cuerpo tojase y atšbe buiñe tojofšé, chë nÿetsca tescama yomna tšabe vida echántsebomna, y quem luare jopochócama te atšbe chanjama cha cháuatayenama. ⁵⁵ Atšbe cuerpo ndegombre saná endmëna, y atšbe buiñe ndegombre ofšësnayiye. ⁵⁶ Nda atšbe cuerpo tojase y atšbe buiñe tojofšé, átšeftaca cánÿiñe mo canÿacá echántsemna, y átšnaca cháftaca. ⁵⁷ Atšbe Taitá, chë šojichmó cha, vida endbomna, y atšbe chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. ⁵⁸ Chë ndaye soyama atšbe sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nÿe nÿets tempo vida echanjesóbomñe ca —Jesús tojánayana.

⁵⁹ Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

Chë nÿetsca tescama yomna tšabe vida jtsebomnana palabrënga

⁶⁰ Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeyanayama. ¿Nda buanjóyeunaye ca?

⁶¹ Jesús yojtsetátsëmbo chënga ndoñe tšabá imontsichámuama; as, chënga tojanatjá: —¿Ntšamo chontsëtsëtsnacá ndoñe tšabá cmontsëuenana ca? ⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinÿëse, ¿ntšamo šmattsejuabnaye? ⁶³ Bëngbe Bëtsabe Espiritu entsama entšanga chë tšabe vida chamotsebomnana. Chë cuerpo ndoñe uámana soye quenátsmëna; chë tcbonjáuyana soyënguñe entsemna chë Uámana Espiritbe uajabuáchenana y chë tšabe vida. ⁶⁴ Pero masque chca entsemna, tšëngaftangbentšana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatšé orscana, cha inatátsëmbo ndëmuanÿenga chábeñe

ndoñe mochanjanošbuáchiye, y nda chë uayayëngbe cucuatšíñe yochjéftsayentsbashejuana. ⁶⁵ Y Jesús yojtétóntša oyebuambnayana: —Chíyeca, atše tšëngaftanga tconjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶ Chë causa, chentsana, ba chabe ústonënga cachcá tmojesanonýa, y cháftaca ya ndoñe imontsajna. ⁶⁷ Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

⁶⁸ Chora Simón Pedro tbojanjá: —Bëngbe Utabná Jesús, ¿chcasna ndábioye fchjanga ca? Nýe aca šcontsëtsëtsná chë nýetsca tescama yomna tšabe vida jtsebmomna palabrénga. ⁶⁹ Acbeñe fsëntsošbuaché, y mora fsëntsetatsëmbo aca chë Bëngbe Bëtsabe Uamaná comnaca.

⁷⁰ Chora Jesús tojanëyana: —Atše tconjabacacá, chë bnëtsana útata; pero canýa tšëngaftanguentsana, mo Satanasbe canýe trabajayacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque canýa chabe bnëtsana uta uatsjëndayënguentšá inamna, Jesús uayayëngbe cucuatšíñe yochjáftsayentsbashejuana.

7

Jesube catšátanga chábeñe ndoñe montsanošbuaché

¹ Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. ² Chora, judiëngbe canýe bëts fiesta semana yojt-sobeco. Quem fiestënguëntscuana, chë judiënga imojanamana tambënguñe jtsiyenana. ³ As chora Jesube catšátanga tmojanayana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaa chaminýama. ⁴ Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamësna, motsa y nýetscangbe delante chca cochjama ca —chënga tmojanayana.

⁵ Er ni mo cach Jesube catšátanga chábeñe ndoñe montsanošbuaché. Chíyeca chënga chca tmojanayana.

⁶ Chora Jesús tojanëjua: —Atšbe ora cabá ndoñe quentóshjango, pero tšëngaftangbiamocna órnaca tšabá endëtsomñe. ⁷ Chë nýe quem luarama enójuabnaye entsanga ndoñe quemátobena tšëngaftanga jtsëbuayënjana, pero átsbioyna aínë, er atše puerte tšabá sëntsinýanýná ntšamo chënga imojtsamcá ndoñe tšabá yontsemnama. ⁸ Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

⁹ Jesús chë soyënga tojanëyana y cach Galileoca tojtanoquedañe.

Chë tambënguñe jtsiyenama fiesta

¹⁰ Chabe catšátanga chë fiestoye tmojána chentsana, Jesúsnaa tojána, masque ndoñe entsángbeñe, sinó mo iytëcana cuenta. ¹¹ Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

¹² Entśángbeñe ba soyënga chabiama iytëcana imojtsichamo. Inyënga chabiama imojtsichamo: “Cha tsabia endmëna ca”; pero ín'yënga: “Cha entsanga entsáingña ca”.

¹³ Pero ndocná Jesusbiamia beca añémoca yontsoyebuambná, chë judiëngbe amëndayëngbiamia imojtsauatja causa.

¹⁴ Chë fiesta semana tsëntsañe yojtśó ora, Jesús Bëngbe Bëtsabe bëts yebnentśe tojánamashëngo, y tojanontśe jabuátambana. ¹⁵ Chentśe chë judiënga, ntśamo Jesús tojanabuatambacá tmojanuena ora, ojanánënga imojtsichamo: —Bëtscá ntjuatsjinÿcá, ¿ntśamo nyëtsá nantsetátśëmbo ca?

¹⁶ As Jesús tojanëjua: —Atśbe buatëmbayana ndoñe nyë átśbentśana quenatóbocana, ndayá chë šonjichmó chábentśana. ¹⁷ Nda tojtseboşe jamama ntśamo chë šojichmó cha yojtseboścá, cha echántsetatśëmbo atśbe buatëmbayana Bëngbe Bëtsábocana yóbocana o nyë átśbentśana.

¹⁸ Nda nyë cachabe juábna ca tojtsoyebuambná, jsebošana entsanga más bëtsá chamobemama; pero nda bëtscá tojtśama, chë tbojichmóbioye entsanga más bëtsá chamobemama, cha cocayé ntśamo ndegombre yomncá jtśoyebuambnayana, y ndocnábioye ntseingñayana.

¹⁹ “Ndegombre, Moisés tšëngaftangbiamia ley tojëftśanaboshjona. Pero masque chca, tšëngaftanguentśá ndocná quenátama ntśamo cha tojëftśanmandacá. Y ¿ndáyeca šmojtseboşe atśe jóbama ca?” —Jesús tojanatjá.

²⁰ Chora entsanga tmojanjuá: —¡Ndegombre aca bacna bayëjbe juabna contśambá! ¿Nda yojtseboşe aca jóbama ca?

²¹ Chora Jesús tojanëyana: —Nyëtsca tšëngaftanga ojanánënga atśe šmontsonÿá, atśe canÿe ochnayté canÿe entśá tijashnama. ²² Pero, Moisés tcmojjanamëndá bássetema base bobachtema chë más delicadentśe jatëtsana, chaotsinÿnama (ndoñe nyë Moisésbeyeca chca, sinó Moisesbiamia más tempśca bëts taitanga chca jamama imojanamáyeca); y tšëngaftanga canÿe bássetema base bobachtema chë más delicadentśe jatëtsana, masque chë te canÿe ochnayté totsomñëse. ²³ Y mora, ntśamo Moisés tcmojëftśanamëndacá ndoñe cachcá ntjonÿayama, canÿe bássetema chca jatëtsana masque ochnayté; as, ¿ndáyeca atśe šmojtśayaná, atśe ochnayté canÿe entśabe nyëts cuerpo tijashnama? ²⁴ Nyë batsá jinÿëse, ín'yëngbiamia ndoñe matichámëngana tśabá o ndoñe tśabá tmonjama ca. Ntśamo chë soyënga ndegombre bëtsemnama natsana lempe tśabá jshëtsetatśëmbëse, šmochjayana tśabá o ndoñe tśabá tmonjama ca —Jesús tojánayana.

Jesús tojánayana ndëmocana cha tojánabama

²⁵ Chora bássetanga Jerusalenoca oyenënga tmojanontśe ichámuana: —¿Mua ndoñe yontsemna chë jóbama montśenguá cha ca? ²⁶ Masque ba entsangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámama Uabuayaná yojtsemna ca? ²⁷ Pero bënga mondëtatśëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatśëmbo ndëmocana cha yochjabama ca —chënga imojtsichamo.

²⁸ Chca tojanuena ora, Bëngbe Bëtsabe bëts yebnentśe Jesús yojtśabuátambayëntscuana, cha jabuache tojánayana: —¡Tšëngaftanga šmojtsejuabná atśe ndegombre šmabuatma, y ndëmocana tijabama šmojtsetatśëmbo ca! Pero nyë atśbe cuenta, ndoñe chiyátabo, ndayá canÿa šojichmóyeca, nda ntśamo ndegombre yomncá nyëtsca soyëngama

endbétsoyebuambnaye; y tšëngaftanga cha ndoñe quešmatábuatma. ²⁹ Atšna aĩne cha sënduábuatma, er atše chábentšana sënjabo y cha quem luaroye šonjichmó ca — Jesús tojánayana.

³⁰ Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. ³¹ Baga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiama más tšabe soyënga yochjama ca?”

Chë fariseunga tmojánbošena Jesús jishachama

³² Chë fariseunga tmojántatšëmbona ntšamo entšanga Jesusbiamia iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnocá josticiënga, Jesús chamuishachama. ³³ Chora Jesús tojánayana: “Muentšana nye baseftayté tšëngaftangaftaca chanjëftsemna; chentšana, chë šojichmó chábioye chanjëtšpadësa. ³⁴ Chora tšëngaftanga atše šmochántseguaye, pero ndoñe quešmochátinýena; y ndayentše chántsemnocá ndoñe quešmochatobenaye jashjanguama ca.”

³⁵ Chora chë judiënga tmojanontšé entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? ³⁶ ¿Ntšamo yojtsentšáyana cha šonjauyancá, chë ‘tšëngaftanga atše šmochántseguaye, pero ndoñe quešmochátinýena; y ndayentše chántsemnocá ndoñe quešmochatobenaye jashjanguama ca?’” — chënga imojtsichamo.

Béjayënga vida bomniye

³⁷ Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¡Nda tbojtsajuendá, átšbioye chauabo y chaofšé! ³⁸ Ntšamo Bëngbe Bëtsabe uabemana palabrenguiñe endayancá: ‘Nda átšbeñe tojtsobuaché, cha echántsemna mo ndabe ainantšana vida bomna béjayënga tojtsobocancá.’ Chca echántsemna átšbeñe ošbuáchiyëngbiama ca” — cha tojánayana.

³⁹ Chë sóyeca, Jesús yojtseboše jayanana, chábeñe ošbuáchiyënga chë Uámana Espiritu mochjanóyëngacñe ca; er chë Uámana Espiritu cabá ndoñe tonjánabo, Jesús corente bëtsá yojamna cabá ndoñe tmonjaninýinýe causa.

Nýetsca entšanga ndoñe cachcá Jesusbiamia imontsejuabnaye

⁴⁰ Chca tmojanuena ora, ínýenga imojtsichamo: — Quem boyabása ndegombre chë Bëngbe Bëtsabe juabna oyebuambnáyá entsemna, chë Cristbe natsana jabamá ca.

⁴¹ Inýenga imojtsichamo: — Ndegombre cha chë Cristo, chë Uámana Uabuayaná entsemna ca.

Peró ínýengna: — Ndoñe, er chë Cristo Galileocana ndoñe queochátabo. ⁴² Ndegombre, Bëngbe Bëtsabe uabemana palabrenguiñe endayana, chë Cristna rey Davídbentšana entšá canmëna, y Belenocana caochjabo ca, cach pueblócana ndayentšá David inamna ca — chënga imojtsichamo.

⁴³ Y chca, ínýengna Jesúsbe pavor imojtsemna, y ínýengna chabe contra. ⁴⁴ Inýenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanošbuaché

45 Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtashajna ora, tmojanatjá: —¿Ndáyeca ndoñe Jesús šmonjuánatse ca?

46 Chora chë josticiënga tmojanëjua: —Ndocná quenatoyebuambná ntšamo chë boyabása tonjoyebuambacá ca.

47 Chora chë fariseunga tmojanëyana: —¿Tšëngaftángnaca šmojalesenciá cha chacmaingñema ca? 48 ¿Nderado bëngbe amëndayënguentšá o bënga fariseunguentšá nýe mo canýa chábeñe tayojtsošbuaché? 49 Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

50 Chora Nicodemo, canýa fariseunguentšá, chë Jesúseftaca jencuéntama ibeta tojána cha, tojánayana: 51 —Ntšamo bëngbe leyiñe endayancá, bënga ndoñe quemuátobena jayanana canýe entšá castiganá jtsemnana ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

52 Chora chënga Nicodemo tmojanjúá: —¿Acnaca chábeñe cojtsošbuaché y mo canýe Galileoca entšacá cojtsejuabná ca? Bëngbe Bëtsabe uabemana palabrënguiñe cochjuatsjinýe, y cochanjinýe ni canýa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

53 Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatóñënga.

8

1 Pero Jesusna canýe tjoye, Olivos ca uabáinoye tojtsanoñe. 2 Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nýetsca entšanga tmojanobeconá jouenama, y Jesús tojanótbema y tojanontšë jabuátambama.

3 Chorna, báseftanga ley abuátambayënga y fariseunga tmonjánashajna, y canýe shembása tmojanëshjango. Chana tmojáninýena chabe boyábioye ínÿaftaca ibnetsoíngñañëntscuana; nýetscangbe tsëntsaca tmojanatsá, 4 y Jesús tmojaniana: —Buatëmbayá, quemuá fsënjínýena chabe boyábioye ínÿaftaca bondëtsoíngñañëntscuana. 5 Leyiñe Moisés šonjanamëndá mëntšá uamana shembásengna ndëtsbéngaca jtsëbáyama. ¿Aca ntšamo catjayana ca?

6 Jesús chca tmojaniana ana jisháchichiyama, chca chënga jtsebomnama ndáyeca chabe contra jayanana. Pero Jesús nýe fshantsoye yojtsejbéna y yojóntša ntšabuáfjaca fshantsiñe juabemama. 7 Chënga nýe imojtsetjanaye causa, Jesús tojantsbaná y tojanëyana: —Nda tšëngaftanguentšá tondaye bacna soyënga tondbomná, chaobojatšë ndëtsbeca jatëchënjama ca.

8 Chentšana Jesús cachiñe fshantsoye yojtsejbéna, y yojtétóntša fshantsiñe jtëtabemama. 9 Chca tmojanuena ora, entšanga tmojanontšë canýánýa chentšana jésebocanana; natsana chë más bëtsanánënga y chë ínÿengna ústonoye. Canýa Jesús tonjanoquedá y chë shembásanaca. 10 As, Jesús tojtantsá y tbojantjá: —¿Shembása, ndayentše chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

11 Ndoñe, Taita, ndocná ca —chë shembása tbojanjúá.

Chora Jesús tbojaniana: —Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

Jesús yomna quem luarentsa entsangbe juabna binñayá

¹² Jesús cachiñe Bëngbe Bëtsabe bëts yebnentše yojtsabuátambaye, y entsanga mëntśá tojanéyana: —Atše sëndbínýna quem luare entsangbe juabnënga. Nda atše chašojtsëstona, cha echantsiyena atše chë binñayáftaca; y ndoñe mo ibetiñcá queochátaye, y chca, tšabe vida echántsebomna ca.

¹³ Chora chë fariseunga Jesús tmojaninyana: —Aca nýe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴ As chora Jesús tojanéjua: —Ntšamo cach atšbiama sentsichamcá añe entsámama, masque nýe atše stsichamo ntšamo atšbiamana ndegombre yomncá. Er atše sëndétatšëmbo ndëmocana tijabo y ndëmoye ttsá. Pero tšëngaftanga ndoñe chca quešmatstatšëmbo. ¹⁵ Tšëngaftanga šmondbëtsichamo ínýengbiamana tšabá o ndoñe tšabá tmonsamama, chca, nýe ntšamo entsanga mondbetsejuabnacyá. Pero atšna ndocnabiamana chca quetsátichamo. ¹⁶ Atše ndoñe nýe canýa quetsátsmëna ínýabiamana jayanama tšabá o ndoñe tšabá tontsamama; ndayá atšbe Taitá, chë šonjichmó cha, átšeftaca chca jayanana. Chýeca, atše ínýabiamana tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. ¹⁷ Tšëngaftangbe leyíñe enduábemana, uta entšata ndayámnaca cachcá tbojayanëse, ntšamo chata tbojayanáca puertejtsámanana ca. ¹⁸ Y morna, atše sentsichamo chë ntšamo cach atšbiamana ndegombre yomncá, y atšbe Taitá, chë šonjichmó chánaca entsichamo ntšamo atšbiamana ndegombre yomncá ca —Jesús tojánayana.

¹⁹ Chora chënga tmojantjá: —¿Ndayentše acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atše ni atšbe Taitá. Atše šmojtšábuatmëšna, atšbe Taitánaca šmattšábuatma ca.

²⁰ Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

“Chë chanjá luaroye, tšëngaftanga ndoñe quešmatobena jama”

²¹ Chora Jesús yojtétóntša oyebuambnayanana: —Atše chantá, y chora tšëngaftanga atše šmochántseguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca —Jesús tojánayana.

²² Chora chë judiënga tmojanontšë enatsëtsayanana: —¿Mo nderado yojtsejuabná jtsenóitanama, y chýeca yojtsichamo chë cha yochjá luaroye bënga ndoñe montsobena jama ca?

²³ Chora Jesús tojanéyana: —Tšëngaftanga quem luaroquënga šmondmëna; atšna tšbananocá, celocá sëndmëna. Tšëngaftanga nýe quem luarama enójuabnayešna šmondmëna, pero atše ndoñe. ²⁴ Chýeca atše chca tchbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

²⁵ Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabuátambama sënjanbojatsë orscana chama tchbonjáuyana. ²⁶ Atše ba soyënga sëntsebomna tšëngaftangbiamana jayanama, tšëngaftangbe contra jayanama; pero chë šonjichmó cha nýetsca soyëngama

ndegombre endbétšichamo, y atšna ntšamo chá bentšana tijouencá, cachcá quem luare oyenénga séntšetsétná ca —cha tojanéyana.

²⁷ Pero chénga ndoñe tonjanésertá Jesús cachabe Taitabiama chca tojanéyanama. ²⁸ As Jesús tojanéyana: —Béngbe Bétšá Entšá tbojanbemá chašmojatsbaná ora, šmochántsetatšémbo nda sēndmēná atše bétsemnama. Cachcá, tšéngaftanga šmochántsetatšémbo, nýe cach atšbe juábnaca atše tondaye jamama sēndobenama. Nýe ndayá atšbe Taitá šojabuátēmbacá atše sēndoyebuambná. ²⁹ Y chē šonjichmó cha ndoñe nýe canýa quešnátsboshjuana. Chca endmēna, er atše sempre sēndbétšama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábēñe imojtsanošbuaché.

Béngbe Bétšabe básenga y chē nýe bacna soye jtsamama vida bomnēnga

³¹ Chora Jesús, chē chábēñe imojtsošbuaché judiēnga tojanéyana: —Ntšamo cbontšetsétnacá tšéngaftanga sempre šmojtsamēse, ndegombre atšbe uatsjéndaýēnga šmochántsemna. ³² Ntšamo ndegombre yomncá šmochántsetatšémbo; y ntšamo ndegombre yomncá jtsetatšēmbēse, atsebacánēnga šmochántsemna ca.

³³ Chora chénga tmojanjuá: —Béngna Abrahámbentšana entšanga fsēndmēna, y ndocná ndocna te chešnáisishēche nýe chabiama nýets tempo jtsošservénama. As, ¿ndáyeca šcojtsétsétná bēnga atsebacánēnga fchtsemna ca?

³⁴ Chora Jesús tojanéyana: —Ndegombre šcuayana: Nda bacna soyēnga tojtsama, cha nýe bacna soyēnga jamama juabnēngaca mandaná jéftsemnana. ³⁵ Canýe oservená ndoñe nýets tempo chē pamillentsá ntjéftsemnana, ntšamo canýe uaquiniá siempre chē pamillentsá jesomñanca. ³⁶ Y chca, Béngbe Bétšabe Uaquiniá chacmojátsebacase, tšéngaftanga ndegombre atsebacánēnga šmochántsemna bacna soyēnga juabnēnguentšana. ³⁷ Atše sēndētatšémbo tšéngaftangna Abrahámbentšana entšanga šmomnama; pero tšéngaftanga šmontseboše atše jóbama, ntšamo atše cbontšetsétnacá ainaniñe jójēngacñama ndoñe quešmátsboše causa. ³⁸ Ntšamo atšbe Taitábioca tijinýcá, cach soyēngama atše sēntsoyebuambná. Tšéngaftángnaca, cachcá ntšamo tšéngaftangbe taitábentšana šmojuencá šmontsama ca —tojanéyana.

³⁹ Chora chénga tmojanjuá: —Béngbe uámana bēts taitá, Abraham endmēna ca.

As Jesús tojanéyana: —Tšéngaftanga Abrahambe básenga ca jtsabáinama merecido šmojtsebuajónēse, chē ntšamo Abraham tojéftsema y cachcá tšéngaftanga šmattsama. ⁴⁰ Atšna ntšamo ndegombre yomncá sēndoyebuambná, ntšamo Béngbe Bétšábentšana tsouenancá. Pero mora tšéngaftanga šmontseboše atše jóbama; Abraham ndocna te chca chenisobuachjanguá. ⁴¹ Tšéngaftangna, ntšamo tšéngaftangbe taitá tojéftsemcá y cachcá jtsamana ca —Jesús tojánayana.

Chora chénga tmojanijana: —Bénga nýe enaquécana básenga ndoñe queftsátmēna. Chē nýe canýe taitá fsēndbomná, Béngbe Bétšá endmēna ca.

⁴² Chora Jesús tojanéyana: —Béngbe Bétšá ndegombre tšéngaftangbe taitá tojtsemnēse, tšéngaftangna atše šmattsebobonshana. Er atšna, Béngbe Bétšábíocana sēnjabo y muentše sēntsemna. Nýe atšbe ponto ndoñe chiyátabo; Béngbe Bétšá šonjichmó. ⁴³ ¿Ndáyeca tšéngaftanga ndoñe šmontsobena atšbe palabrénga josértana? Co, ntšamo cbontšetsétnacá joyeunayama

ndoñe quešmátsboše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátsama orscana, Satanás entšá obanayá endmëna. Satanabe juabnoca, ndocna tšabe soyënga ni ndegombre soyënga ntsebinýnana. Chíyeca, ndocna te cha ntšamo ndegombre yomncá ntšamana. Cha canýe bostero endmëna, y chábentšana nyetsca bostero soyënga jtsóbocanana. Chíyeca, cha tojtsebostero ora, nye ntšamo cachá yomnama jtsichámuana. ⁴⁵ Atšna sempre ntšamo ndegombre yomncá chondutsëtsná; chíyeca, chë séntsichamo soyiñe tšëngaftanga ndoñe quešmatošbuaché. ⁴⁶ ¿Nda tšëngaftanguentsá nanjobenaye jinýanýiyana atše ndaye bacna soye tijamama? Y atše, nye ntšamo ndegombre yomncá stsichámëse, ¿ndáyeca chë tijayaniñe ndoñe šmontsebošbuaché? ⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanëyana.

Cristo Abrahambiana más natsana ya yojtsemna

⁴⁸ Chora chë judiënga tmojanianana: —Ajá, bënga co ndegombre ftsichamo, aca nye samaritano y bacna bayëjbe juabna uambayá comna ca ftsichamo ora ca.

⁴⁹ Y Jesús tojanëjua: —Atše ni mo canýe bayëjbe juabna quetsa-tambá. Ntšamo atše séntsamcá, endmëna jinýanýiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënana ndoñe quešmatinýinýná. ⁵⁰ Atše ndoñe quetsátsboše ínýenga atše más uamaná chašmobemama. Pero inýa endmëna; cha aífne endboše atše bëtsá bëtsemnama chaminýanýema. Y chánaca endmëna chë ínýengbiana tšabá o ndoñe tšabá tmontsamama endbetsichamuá. ⁵¹ Ndegombre šcuayana, nda ntšamo atše séntsichamcá tojouena y chca tojama, ndocna te queochatóbana ca —Jesús tojánayana.

⁵² Chora chë judiënga tmojanianana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nyetscanga Bëngbe Bëtsabe juabna oyeuambnáyëgnaca. ¿Y mora aca cochjátichamo, “Nda ntšamo atše séntsichamcá tojouena y chca tojama, cha ndocna te queochatóbana ca”? ⁵³ ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyeuambnáyëgnaca. ¿Ndase cojátsmëna ca aca cojatsjuabná ca? —chënga imojtsichamo.

⁵⁴ Chora Jesús tojanëjua: —Atše nye cach atše más bëtsá stsenobiamnasna, chë soye tondaye nantsámama. Pero chë más bëtsá šojtsebiamná cha, atšbe Taitá endmëna, cach ndabiana tšëngaftanga šmondbëtsichamo tšëngaftangbe Bëtsá canmëna ca. ⁵⁵ Pero tšëngaftanga cha ndoñe quešmatábuatma; atše aífne. Y atše, “cha ndoñe quetsatabuatma ca” stsichámëse, átšnaca cach tšëngaftangcá canýe bostero stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbëtsama. ⁵⁶ Tšëngaftangbe uámana bëts taitá Abraham, chë atše jabama te jinýama yojtsejuabnaye ora, puerte oyejuayá yojtsemna. Y pronto tojéftsaninýe, y puerte tojanoyejuá ca —Jesús tojánayana.

⁵⁷ Chora chë judiënga tmojanijana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinye ca?

⁵⁸ Chora Jesús tojanējua: —Ndegombre cbëyana, Abraham cabá ndoñe ainá quenjatsmëna ora, atše ya sënjetsemna ca.

⁵⁹ Jesús chca tojanējua ora, chënga ndëtšbenga tmojanájaca cha jt-satëchënganjama. Pero Jesusna oitanánana, Bëngbe Bëtsabe bëts yebnentšana tojésanbocna.

9

Jesús tojanma, canye boyabása jtaná onýnaná chabuabínýnma

¹ Canye luarëjana vojtsachñëjuana ora, Jesús canye boyabásabioye tbojáninye. Chë boyabásana jtaná inónýna. ² Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanējua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndaya entšanga jinýanyama ntšamo Bëngbe Bëtsá yobencá. ⁴ Cabá vojtsësháchena ora, šontsamna jamana ntšamo chë šonjichmó cha vojtsëbošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵ Quem luariñe chjëftsemnëntscuana, atše quem luare entšangbe juabnënga binýnaya chanjëftsemna ca —tojanējana.

⁶ Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojábema, y chë jtaná chë ngüicheca tbojanbucharëtjo. ⁷ Chora chë jtaná tbojanijana: —Motsa y metsobúchjabebie, chë binche uafjajónaye entšangbe pormániñe, Siloé ca uabániyoca ca. (Siloé, judiëngbe biyañe endayana “Ichmoná ca”).

Y chë jtaná tojána; choca vojtsobúchjabebie, y yebnoye tojtaná ora, ya ibo-jtsabinýna. ⁸ Chë juachañe oyenënga y chë jtaná tempo lemošna otjanañana tmojáninyënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inýyënga imojtsichamo: —Cha entsemna ca.

Y ínýyënga: —Cha ndoñe quenátsmëna, pero chacá entsábona ca.

Y cach shnaná vojtsichamo: —Atše cha sëndmëna ca.

¹⁰ As chë entšanga tmojantjá: —¿Ntšamo chca mora cmojtsabinýna ca?

¹¹ Y cha tojanējua: —Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjajónayañe metsobúchjabebie ca”. Chcasna, atše sënjá, sënjetsobúchjabebie y cachora šontsabinýna ca.

¹² Chora chënga tmojantjá: —¿Ndayentše cha vojtssemna ca?

Y chana: —Atše ndoñe quetsátstatšëmbo ca —tojanējua.

Chë jtana shnanábioye fariseunga imojtsetjanaye

¹³ Chora chë entšanga, chë jtaná inamná fariseúngbïoye tmojanánatše. ¹⁴ Chë Jesús batšá yebuáyeca ngüiche tojábema, y chë jtaná tojanma te, canye ochnaytë inamna. ¹⁵ As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanējua: —Cha ngüiche yebuáyeca tonjábema y šonjabucharëtjo. Sënjetsobúchjabebie, y cachora šonjuabinýna ca.

16 As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chýyeca cha Bëngbe Bëtsabe entsá ndoñe quenátsmëna ca.

Ínyenga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, ínýenga Jesusbe pavor imojtsemna, y ínýengna chabe contra. 17 Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiama ntšamo catjayana ca?

Chora cha tojanējua: —Chana canýa Bëngbe Bëtsabe juabna oyebuamb-nayá entsemna ca.

18 Pero chë judiënga ndoñe montsanošbuaché, cha chë jtaná inamnama y chora ibojtsabinýnama. As chënga, ínýenga tmojanichamó chë boyabásabe bëtsëtsata jobiatšama. 19 Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

20 Chora chë bëtsëtsata tmojanējua: —Aíñe fsëndëtatšëmbo cha bëndatbe uaquiñá endmënema y jtaná tonjanonýnama. 21 Pero ndoñe queftsátstatšëmbo ntšamoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

22 Tempo, chë judiënga imojenóyeunaye, chëngbe enefjuana yebnëguentsána jtëbuacanana chë Jesús ndegombre chë Uámana Uabuauaná, chë Cristo yojamna ca tmojananënga. Chë bëtsëtsatna chama ibojtsauatja; 23 chýyeca tmojanējyana: “Cha ya bëtsá entsemna. Cachá motjanga ca”.

24 As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiama ndegombre mobuambá. Bënga fsëndëtatšëmbo chë boyabása canýe bacna soyënga amá yomnama ca.

25 Chora cha tojanējua: —Cha canýe bacna soyënga amá o ndoñe tondmënema, atše ndoñe quetsátstatšëmbo. Atše nýe mëntšá sëntsetatšëmbo: Atše jtaná sënjanmëna, pero mora sontsabinýna ca.

26 Chora chënga cachiñe tmojatantjá: —¿Ntšamo tcmënjama? ¿Ntšamo cha ténjama chacmotsabinýnama ca?

27 Y cha tojanējua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

28 Chora chënga cha tmojtsanóyenguango y tmojanianyana: —Acna canýe chabe ustoná cojtsemna, pero bënga ndoñe; bënga Moisesbe ústonënga fsëndmëna. 29 Bënga fsëndëtatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

30 Chora chë boyabása tojanējua: —¡Ntšamo chca nántsemna! Tšëngaftanga ndoñe šmontsetatšëmbo ndëmocana cha tojabama; pero chašubabinýnama cha tonjama. 31 Bënga tšabá mondëtatšëmbo, bacna soyënga amënga Bëngbe Bëtsá ndoñe queondbátayauanama. Chana, nýe chábioye adorayá y ntšamo cha tojtsebošcá amábioye joyeunayana. 32 Quem luare jobojátšama orscana ndocna te quenaisótatšëmbo canýe jtaná onýnanabiama ndánaca cha chabotsabinýnama tojëftsemama. 33 Quem boyabása, Bëngbe Bëtsabe

ichmoná chabe soyënga jamama ndoñe tontsemnëse, tondaye nantsobena jamama ca —chë entsá tojánayana.

³⁴ As chë fariseunga tmojanianyana: —¡Ndayá! Aca tcojanonýná orscana, corente bacna soyënga amá tcomnëse, ¿ntsamo mora bënga šochjátabuatabaye ca?

Y chora chë judiëngbe enefjuana yebnentšana cha tmojtanábocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianyana: —¿Aca Bëngbe Bëtsá Entsá tbojanbemábeñe quecojtsosbuaché ca?

³⁶ Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

³⁷ As Jesús tbojanianyana: —Aca ya tconjinýe; chë ácaftaca entsoyebuambná cha entsemna ca.

³⁸ Chora, chë boyabása Jesús bentše tojanoshamentsé jëtschuayama y tbojanianyana: —Atšbe Útabná, aíñe sëntsošbuaché ca.

³⁹ Chora Jesús chë entsanga tojanéyana: —Atše quem luaroye tijabo ndayá entsanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínýanýiye, nýe batšá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojanianyana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanéjua: —Tšëngaftanga Bëngbe Bëtsabe soyëngama ndëtatšëmbënga šmojtsemna ca, y ndegombre chë soyëngama ndoñe cmontsésertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátónýaye. Pero tšëngaftanga corente Bëngbe Bëtsabe soyëngama cmojtsésertana ca šmojtsichámëсна, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanéyana.

10

Chë oveshënga abujëñýa y chabe oveshënga

¹ As Jesús tojanéyana: “Ndegombre šcuayana: Nda chë oveshëngbe luaroye bësháshajana ndoñe tonjámashëngo, pero aíñe inýajana tojtsamáshëngo, chana canýe atbëbaná y abacayá jtsemnana. ² Pero chë bësháshajana tojamashënguana, chë oveshënga anýená jtsemnana. ³ Chë bëshásha ebtafjuaná, chë bëshásha jebëtafjuana, y chë oveshënga abujëñýa ntšamo cada ona tmabaincá chë oveshënga jáchembuana. Y chë oveshënga jtsetatšëmbuana chëngbe abujëñýa yojtsachembuanama; y chë luarentšana cha jubuacnana. ⁴ Nýetsca oveshënga tmojábocna ora, chë abujëñýa chënga jtsebënatsanana, y chë oveshënga jtšestonana, er chabe oyeubuambnayana chënga joyátëmbana. ⁵ Pero chë tmondubuatuamábioyna chë oveshënga ndoñe ntjuastana; nýe chábentšana jtsachetëngana, chë oveshënga chabe oyeubuambnayana ndoñe ntjoyátëmbana causa ca” —Jesús tojánayana.

⁶ Jesús entsanga chca tonjanacuntá, pero chënga ndoñe ntjosértana ntšamo vojtsentsayanca.

Jesús, chë oveshënga tšabe abujënyä

⁷ As Jesús cachiñe tojanëyana: “Ndegombre cbëyana: Atše sëndmëna chë bësásha oveshënga mondbëtsamashjuanëjana. ⁸ Nyëtsanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbiye ntjóyaunayana. ⁹ Atše chë bësásha sëndmëna. Nda quem bësáshajana tojamashënguá, atsbocaná echántsemna. Canye oveshá jamashënguana y jabocnana, y shácuana jónyënana. Cachcá, chë quemëjana tojamashënguá, lempe echanjónyëna.

¹⁰ “Chë atbëbaná jabana nye jatbëbama, jóbama y lempe jtsepochoçama; pero atšna, entsanga vida chamotsebomnama y átseftaca bëtsca tšabe vida chamotsebomnama tijabo.

¹¹ “Atše sëndmëna chë oveshënga tšabe abujënyä. Chë oveshënga tšabe abujënyä sempre jtseprontána chëngbiama jóbana, chabe oveshënga abuanýeshanayeca. ¹² Pero nda nye crocenánama totrabája y chë oveshënga ndoñe chábenga tmontsemna, cha nderado tojinye canye tjañe queše chë oveshëngbiye tojtsobécocnama, cachora nye cachcá jesënyëyana y jtsachana. Chë tjañe queše oveshënga jtsacamiyana, y chë oveshëngna nye cátoye jtsachetana. ¹³ Cha jtsemnana nye crocenánama trabajayá; chabiama nye chë uacanána más uámana soye jtsemnana, y chë oveshëngbiama tondayana ntentšamnana; chíyeca cha jtsachana.

¹⁴ “Atše sëndmëna chë oveshënga tšabe abujënyä. Atše chënga sëndëubuatma, y chëngnaca atše šmonduábuatma. ¹⁵ Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndëtseprontana jóbana, atšbe oveshënga sëndababuanýeshánayeca. ¹⁶ Atše inye oveshënga sëndábamna, pero chënga ndoñe quem luariñe oveshënga quemásmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca canyñe mochántsemna, y atšna nyetsca chë oveshëngbiama chë abujënyä chántsemna.

¹⁷ “Atše sempre sëndëtseprontana jóbana, chora jtayenama. Chíyeca chë Taitá šondbobonshana. ¹⁸ Ndocná atšbe vida quešochatsbojuána, pero chënga sëndababuanýeshánayeca siempre sëndëtseprontana jóbana, cach atše chca sëndbošeyeca. Derecho sëndëtsóboñe chëngbiama jóbana, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y inyënga Jesusbe pavor imojtsemna. ²⁰ Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as çndáyeca cha mochjátsyeunana ca?

²¹ Pero inyënga imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canyë bayëja nantsobena jamama canye jtaná chabotsabinýnama ca?

Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsennama

²² Canye uaftena tempo inamna, y Jerusalemntše canye fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entsanga jtenójuaboyama. ²³ Jesús Bëngbe

Bëtsabe bëts yebnoca yojétsana, canÿe amashjuana otsbojebniñe, Salomonbe Amashjuana ca uabáinentse. ²⁴ Chora, chë judiënga tmojanóbobuashcona, y tmojantjá: —¿Buetaytentscuana bënga fchjëftsemna acbiamana ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿë ca.

²⁵ As Jesús tojanëjua: —Ya tcbonjáuyana y tšëngaftanga átsbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana. ²⁶ Pero tšëngaftanga átsbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abujëñÿa mondbetsëstoncá. ²⁷ Chë atše šmondústonënga, atše šmondbóeyunaye y šmondbéuasto. Atše chënga sëndëubuatma. ²⁸ Atše chanjama, quem entšanga chë nÿetsca tescama yomna tšabe vida chamotsebomnama; chënga ndocna te pochocánënga quemochátšmëna, y ndocná quenátobena átsbentšana chënga jefcana. ²⁹ Atšbe Taitá Bëngbe Bëtsá, chë entšanga atše chašmuastama tojamá, nÿetscangbiamana más bëtsá endmëna, chíyeca ndocná quenátobena chábsentšana chënga jefcana.

³⁰ Chë Taitá y atše canÿa fsëndmëna ca —Jesús tojánayana.

³¹ Chora, chë judiënga cachiñe ndëtsbënga tmojanájaca Jesús jtsatëchënganjama. ³² Pero Jesús tojanëyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentšana soyama atše šmochtsatëchënganja ca?

³³ Chora chë judiënga tmojanjuá: —Ni canÿe quem bëts soyëngama bënga queftsátšboše aca jtsatëchënganjama. Aca Bëngbe Bëtsabiamana ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtsbëngaca aca jtsatëchënganjama ca —chënga tmojanianyana.

³⁴ Chora Jesús tojanëyana: —Bëngbe Bëtsabe uabemana palabrenguiñe mëntsá endayana: “Atše sënjayana tšëngaftanga diosënga šmomna ca.”

³⁵ Bëngbe Bëtsá chca tojánayana chë chabe palábraca y cha chamotseservënana tojánamandangbiamana; ndocná quenátobena jinÿanÿiyana ni mo canÿe soye Bëngbe Bëtsabe uabemana palabrenguiñe, ndoñe ndegombre soye yomnama.

³⁶ Y atšbiamana, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtšobena jayanama, “aca Bëngbe Bëtsabiamana ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? ³⁷ Ntšamo atšbe Taitá endamcá atše ndoñe sëntsamëse, tšëngaftanga átsbeñe ndoñe šmattsošbuáchiye. ³⁸ Pero, ntšamo atšbe Taitá endamcá atše aiñe stsamëse, masque ndoñe átsbeñe šmontsošbuaché, nÿe chë Taitabe obenánaca soyënga tijamama šmochtsobuáchiye. As, canÿe ora chašmotsetatšëmbo y chacmësertá, chë Taitá átsbeñe yomnama y atše chábeñe tsmënama ca —Jesús tojanëyana.

³⁹ Chora chënga cachiñe tmojánbošena Jesús jishachama, pero cha chëngbentšana tojanotsbocá.

⁴⁰ Chentšana, Jesús Jordán bëjaye chenguana tojesaná y choca tojt-sanoquedañe. Chentše Juan tempo entšanga yojanëbáyana. ⁴¹ Ba entšanga tmojánana Jesús jinÿama, y mëntsá imojsichamo: “Ndegombre, masque Juan ni mo canÿe bëts soye Bëngbe Bëtsabe obenánaca tonjëftsema, lempe ntšamo quem boyabásabiamana tonjanoyebuambacá, ndegombre yojamna ca.” ⁴² Y chentše, ba entšanga Jesúsbeñe imojsanošbuaché.

11

Lázaro tojanóbana

¹ Inamna canÿe boyabása šocá, Lázaro ca uabainá. Cha inoyena canÿe pueblo Betania ca uabáinentše, Marta y Mariáftaca, chabe uabénata. ² Quem María inamna nda Bëngbe Utabná Jesusbe shecuatšifne botamana uanguëtsiye tbojanáshecbuešcja, y chabe stjënashaca tbojtanshechojó cha. ³ Chë uta uabénatna ínÿenga tmojanichamó Jesús jauenayama: —Bëngbe Utabná, chë aka condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero aiñe entsemna Bëngbe Bëtsabe obenana entsanga jinÿanÿiyama, y Bëngbe Bëtsabe Uaquiñá chamuatschuama ca.

⁵ Jesús corente yojánababuanÿeshana Marta, María y chatbe uaftše Lázaro.

⁶ Masque chcasna, Lázaro šocá yojtsemna ca Jesús tmojanianyana ora, cabá uta te más cha yojtsemna luarentše tojtanoquedañe. ⁷ Chentšana, chabe uatsjëndayënga tojanéyana: —Judeoye cachiñe cuajna ca.

⁸ As chë uatsjëndayënga tmojanianyana: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

⁹⁻¹⁰ Chora Jesús tojanéyana: —Bnëtsana uta hora bnëté endmëna. Nda bnëté tojtšana, ndoñe ntjojéstjiana, binÿniñe bëtsemnayeca. Cachcá átseftaca endmëna, tondaye quenátopodena átseftaca jopásana, atše jóbanama cabá ndoñe tonjobuache ora. Pero ibeta tojtšanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

¹¹ Chentšana tojanéyana: —Bëngbe amigo Lázaro tojtsomaná, pero atše choye chanjá jetsefšenama ca.

¹² Chora chë uatsjëndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

¹³ Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama. ¹⁴ As Jesús tšabá tojanéyana: —Lázaro tontsóbana. ¹⁵ Atše sëntsoyejuá choca atše ndoñe tsmënama, tšëngaftangbe tšabiamana chaotsemnana; chca, tšëngaftanga más átšbeñe chašmotsošbuáchema. Pero cuajna cha jinÿyama ca.

¹⁶ Chora Tomás, chë Gemelo ca uabobainá, chë inÿe uatsjëndayënga tojanéyana: “Bëngnaca cuajna, cháftaca mochjóbona ca.”

Jesús iuama entsanga chámuatayenama y chë nÿetsca tescama yomna tšabe vida chamotsebonnana

¹⁷ Jesús chë béconana tojánashjango ora, tojántatšëmbona Lázaro ya canta te uatbontsána yojtsemnana. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiënga tojóana Marta y María jautsëtsayama y jatjëmbabayama ndoñe tša ngmënaca chabondëtsemnana, chatbe uaftše tojanóbana causa. ²⁰ Jesús yojtsashajuanama Marta tojántatšëmbona ora, tojánbocna cha jajënguama, pero María cach yebnentše tojanoqueda.

²¹ Chora Marta Jesúsbioye tbojanianyana: —Bëngbe Utabná, aka muentše macmënëse, atšbe uaftše ndoñe matënjóbana. ²² Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátsetaye ca.

²³ Y Jesús tbojanjuá: —Ache uaftše echántayena ca.

²⁴ Chora Marta tbojaniyana: —Aíñe, atše sëndétatšëmbo cha yochtayenama, pero quem luare jopochócama te, nÿetsca obanënga mochtayena ora ca.

²⁵ As Jesús tbojaniyana: —Atše sëndmëna chë entšanga chámuatayenama y chë nÿetsca tescama yomna tšabe vida chamotsebomnama endamá. Nda átsbeñe tojtsošbuaché, masque chaóbana, echántayena. ²⁶ Y nda cabá ainá totsomñe y átsbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

²⁷ Chora Marta tbojaniyana: —Aíñe, Bëngbe Utabná, atše ácebeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

Jesús, Lázaro yojtšátbontsana cuevēshentše yojenóbošachna

²⁸ Chca tojánayanentšana, Marta tojtaná chabe quenata María jachembuama, y iytëcana tbojaniyana: “Buatëmbayá tojánshjango y entseboše aca jinÿama ca.”

²⁹ María chca tojanuena y cachora tojéftsanbocna y tojána Jesús jinÿama. ³⁰ Jesús cabá ndoñe chë puebløye tonjánamashëngo; yojëtsemna Marta tbojanjébengo luarentše. ³¹ Chë yebnentše imojtsemna judiënga, María tša ngmënaca ndoñe chaondëtsemnama tjëmbambnayënga, tmojánbocana María juastama; er chë tojéftsantsbaná y tojéftsanbocna ora, chë judiënga imojtsejuabnaye, Lázaro yojtšátbontsana luaroye María yojtšaye, choca jošachnama ca.

³² Jesús yojtsemnentše María tojánashjango ora, chábentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

³³ María y cháftaca tmojánashjajna judiënga, nÿetscanga imojtse-
senóbošachiye; y Jesús chca tojáninÿe ora, corente tbojancochtsetšena y
puerte ngmënaca yojtsemna. ³⁴ Chora Jesús tojanatjá: —¿Ndayentše cha
šmojuatbontsá ca?

Y chënga tmojanjuá: —Bëngbe Utabná, mabo y cochjinÿe ca.

³⁵ Chora Jesús tojánenobošachna. ³⁶ As chë judiënga tmojánayana: —
¡Minÿënga, tša ibnabobonshana ca!

³⁷ Pero inÿe judiënga imojtsichamo: —Chë jtaná chabuabínÿnama tojamá,
¿tondaye tonjobená jamama, Lázaro ndoñe chaondóbanama ca?

Lázaro tojtanyena

³⁸ Jesús, cachiñe puerte cochtsetšenaná, chë uatbontsánøye tojanobeconá.
Chë luarna cuevēshe inamna, y amashjuanentše canÿe bëts ndëtšbeca yojt-
satámena. ³⁹ Chora Jesús tojanëyana: —Chë ndëtšbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora
ya bacá yojtsonguëtšé, er ya canta te entsemna cha tontsóbana ca.

⁴⁰ Y Jesús tbojanjuá: —Ndegombre, ya tchonjauyana, aíñe átsbeñe tcojt-
sošbuáchese, cochjinÿe Bëngbe Bëtsá puerte obená y bëtsá bëtsemnama ca.

⁴¹ Chora chë ndëtšbé tmojanjuaná; Jesús celøye yojontješiye y Bëngbe
Bëtsábøye tbojaniyana: “Taita, cbatschuá atšbe opresido tcojouenama.

⁴² Atše sëndétatšëmbo aca sempre šcondbëtseyeunanama; atše chca
tchonjauyana, muentše montsemna entšangbe tšabiama, chca, aca atše
šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana mats-bocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

Chë judiëngbe amëndayënga tmojanenoyeuná Jesúsbioye jóbama (Mt 26.1-5; Mc 14.1-2; Lc 22.1-2)

⁴⁵ Chë soyëngama, banga chë judiënguentšana, María jatjëmbabayama tmojánanga, y ntšamo Jesús tojanmcá tmojáninyënga, Jesúsbeñe imojtsošbuaché. ⁴⁶ Pero inye judiënga fariseúngbioye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefjna inye judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nye cachcá chamojonýase, nyetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochóca, Bëngbe Bëtsabe bëts yebna y bëngbe luare Israel ca —chënga imojtsichamo.

⁴⁹ Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. ⁵⁰ Y ndoñe quešmatsjuabná, tšëngaftangbiana más tšabá yojtsemna nye canye boyabása Israeloca entšangbiana chaóbana, y ndoñe nyëts bëngbe luare chamotsepochóca ca —cha tojanéyana.

⁵¹ Pero Caifás chë soye nye cachabe juábna ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espiritbe obenánaca tojánayana Jesús ibojamna Israeloca entšangbiana jóbana ca. ⁵² Y ndoñe nye Israeloca entšangbiana, sinó chë inye luarënguiñe Bëngbe Bëtsabe básenga tmojanáshanënga chamuatábama, as chca, nyëtscanga nye canye luarentša entšanga chamotsemnama. ⁵³ Chcasna, cach tescana judiëngbe amëndayënga tmojanenoyeuná Jesús jóbama.

⁵⁴ Chíyeca Jesús entšangbeñe, Judea luariñe ya ndoñe yontšana. Chë luarentšana tojéftsanbocna y canye luaroye tojtsanoñe, entšanga ndoyeniñe béconana, canye pueblo Efraín ca uabáinoye. Y chentse chabe uatšëndayëngaftaca tojtsanoquedañe.

⁵⁵ Judiëngbe Bashco fiestama batšá yojtsámajna, y ba entšanga pueblënguentšana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominýama tšábenga jtsemnama, chë Bashco fiesta cabá ndobuache ora. ⁵⁶ Chocna, judiënga Jesús imojtsenguaye, y Bëngbe Bëtsabe bëts yebnentse imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbëšna, chaobuambá ca, as Jesús jishachama.

12

María, botamana uanguëtsiye Jesúsbeñe tbojanáshecbuešcja (Mt 26.6-13; Mc 14.3-9)

¹ Chnënguana te chë Bashco fiestama yojtsámajna ora, Jesús Betania puebloye tojtaná. Lázaro, chë Jesús tbojtanayená cha, choca inoyena.

² Chentšna bēts saná Jesusbiamá tmojanábua. Marta tojanējuatsé, y Lázaro yojtsemna chē Jesúseftaca juasama meséshañe imojtsetbiámanēnguentse. ³ As María canye jarrētema tojanaca; chiñe yojanaftsuamna canye botamana uanguētsiye, bētsá uámaniye, ena nárdoca pormániye. Chē uanguētsiye, María, Jesusbe shecuatšēnguiñe tbojanáshecbuešcja, y cachabe stjēnashaca tbojtanshebojó. Chora, chē yebnentse ena nardiána yojtsonguētsiye.

⁴ Chora, canya Jesusbe uatsjēndayēnguentšá, Judas Iscariote, chē Jesús uayayēngbe cucuatšīñe yochjanayentšbashejuaná, tojánayana: ⁵ —Quem botamana uanguētsiye unga patse denario crocénana enduámána. ¿Ndáyeca ndoñe šmonjuíye y ndbomnjēmēngba chē crocénana mašmēntsatsatá ca?

⁶ Pero Judas chca tojánayana, chē ndbomnjēmēngbeñe ntsejuabnacyá, sinó cha atbēbaná inamna causa. Judas chēngbe crocénana shecnēšīñe yojánatbēna, y ba soye, chē shecnēšoye imojanatsuáma crocénantšana cha yojánatbēbana.

⁷ As Jesús tbojanjá: —Cachcá monyá. María mēntscoñe chē botamana uanguētsiye iuabofjájona, cha jobenayama átsbeñe jabuéšcja, er ndoñe bēn y atse šmochanjaitēme. ⁸ Chē ndbomnjēmēngba tšēngaftangbeñe sempre mochanjesomñe, pero atse ndoñe ca —tojánayana.

Judiēnga tmojanenoyeuná Lázaro jóbama

⁹ Ba judiēnga tmojántatšēmbona Jesús Betanioca yojtsemnama, y choye tmojána, ndoñe nye Jesús jinýama, sinó Lázarnaca, chē Jesús tbojtanayená cha. ¹⁰ As chē bachnangbe amēndayēnga tmojanenoyeuná Lázarnaca jóbama. ¹¹ Chabe causa, ba judiēnga chēngbiyoe cachcá tmojesanēñya y Jesúsbeñe imojtsošbuaché.

Jesús Jerusalenoye tojánashjango

(Mt 21.1-11; Mc 11.1-11; Lc 19.28-40)

¹² Chē yēfsana, mallajta entšanga, Jerusalenoca fiestama tmojánashjajnēnga, tmojántatšēmbona Jesús choye yochjánashjanguama. ¹³ As chēngna palma betiye buacuafjēnga tmojanatētsēse, y Jesús jajēbenguama tmojānbocana, y mēntsá imojtsáyebuahe: “¡Bēngbe Bētsá matschuanga! ¡Corente bendición bomná chē Bēngbe Utabnabe obenánaca tojabá! ¡Corente bendición bomná chē Israeloquēngbe Rey ca!”

¹⁴ Jesús canye burrotema tbojáninýena y chábeñe tojanenoyayé. Ntšamo Bēngbe Bētsabe uabemana palabrenguiñe iuayancá, cachcá tojanopasá. Chiñe mēntsá endayana Jerusalenoca entšangbiamá:

¹⁵ Sión bēts puebloca oyenēnga, ndoñe matauatjēngana.

Minýēnga, tšēngaftangbe Rey burrotēmiñe enjaquēnta entsabó ca.

¹⁶ Chca orna, Jesusbe uatsjēndayēnga chē soyēngama ndoñe tonjanēsertá; pero chentšana, Jesús corente bētsá yomnama Bēngbe Bētsá tojaninýanyé ora, chē uatsjēndayēnga chama tmojanenoyabó, lempe ntšamo Bēngbe Bētsabe uabemana palabrenguiñe iuayancá y cachcá Jesúseftaca tojanopasama.

¹⁷ Chē Jesúseftaca imojtsemna entšanga, Lázarbíoye uatbontsánoye tbojanchembo ora y chentšana tbojtanayená ora, ntšamo tmojáninýama chora imojtseuēntaye. ¹⁸ Chíyeca, ba entšanga tmojānbocana Jesús jajēbenguama, chē bēts soye Bēngbe Bētsabe obenánaca cha tojanmama tmojanuénayeca. ¹⁹ Pero chē fariseunga imojtsenatsētsnaye: “Tšēngaftanga šmontsonyá bēnga tondaye jamama quemuátobenama y más, inýetscanga cha montsēstona ca!”

Básefta Grecia luaroca entsánga Jesús tmojánguango

²⁰ Bashco fiestama, chë Bëngbe Bëtsá jadórama Jerusalemoye tmojánangbeñe, básefta griego entsángnaca imojtsemna. ²¹ Chëngna, Felipe chë Galilea luarocá, chë Betsaida pueblócábioye, tmojanobconá y tmojanimpadá: “Señor, bënga fsëntseboše Jesús jinýyama ca.”

²² Chora Felipe tojána Andrés jauyanama, y chë útatna Jesúsbioye tbojána, chë grieguëngbiana jauenayama. ²³ Jesús chata tojanéyana: “Chë Bëngbe Bëtsá Entzá tbojanbemá corente bëtsá yomnama jinýanyiyama te ya tocbuache. ²⁴ Ndegombre šcuayana: Canýe trigo jénaye ndoñe fshantsiñe tmonjuatbontsá y ndoñe tonjóbanëse, nýe cach canýe trigo jénaye jesomñana. Pero tmojuatbontsá y tojóbanase, bëtscá jashájonana. ²⁵ Cachcá, nda nýe cachá tojtsenóbobonshana, cha chabe vida echanjéftsobuetše. Pero nda nýe cachá ndoñe tontsenóbobonshana y ntšamo atše stsemandacá, quem luariñe vida tojtsebomñentscuana cha tojtsamëse, chë nýetsca tescama yomna tšabe vida echántsebomna. ²⁶ Nda ntšamo stsemandacá jamama tojtseboše, atše chašotsëstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiana, atšbe Taitá Bëngbe Bëtsá echanjinýanyiyiye bëtsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sëntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. ²⁸ Taita, šminýanyé aca puerte bëtsá y obená comnama ca.”

Y cachora, celocana canýe oyebuambnayana tojanóbocna mëntšá: “Ya tcbonjinýanyé atše puerte bëtsá y obená tsmënama, y mora cachiñe cachcá chanjama ca.”

²⁹ Entšanga chca tmojanuena ora, inýyenga imojtsichamo nýe tojanjuésase ca; pero inýyenga imojtsichamo: —Canýe ángel chábioye tbonjuatsëtsá ca.

³⁰ Chora Jesús tojánayana: —Ntšamo šmonjuencá, atšbiana ndoñe quenátsmëna, sinó tšëngaftangbiana. ³¹ Mora chë tempo entsemna, chë quem luare entsánga tmojëftsema bacna soyënga jinýanyiyama y chëngbe castiguama jayanama. Y mora, chë nýetsca bacna soyënga mandayá, quem luarentšana mochántábocna. ³² Pero atše fshantsocana atšbananá chaitsemna ora, nýetsca entsánga átšbioye chanjúbuaja ca —Jesús tojánayana.

³³ Chca cha yojtsichamo, ana jinýanyiyama ntšamo jóbanama ibojamnama. ³⁴ Chora chë entsánga tmojanjuá: —Bëngbe Bëtsabe uabemana palabrënguiñe endayana, y chíyeca bënga fsëndëtatšëmbo chë Cristo nýetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entzá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entzá tbojanbemá ca? —chënga imojtsichamo.

³⁵ Y Jesús tojanéyana: —Nýe baseftatescama chë entsángbe juabnënga binýnayá tšëngaftangbeñe entsemna. Chë binýnayá cabá tšëngaftangbeñe yojtsemñentscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binýniñe tojtsana, cha ndoñe ntsetatšëmbuana ndëmuajana yojtsana. ³⁶ Chë binýnayá cabá tšëngaftangftaca endëtsemñentscuana, chábeñe šmochtsošbuáchiye; as, tšëngaftangbe juabnënga binýniñe echántsemna ca —Jesús tojánayana.

Chë soyënga tojánayanentsana, Jesús tojtsanoñe y entsangbiana yojetsóitana.

Ndáyeca chë judiënga Jesúsbeñe ndoñe montsanošbuaché

³⁷ Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, ³⁸ ntšamo Bëngbe Bëtsabe juabna oyebuambnyá Isaías tojanabemcá, cachcá chaotsemnama. Isaías mëntsá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntsánaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama

y chabe soyënga ainaniñe ndoñe chamondóyëngacñama,

as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama,

y atše ndoñe ntjátsebacama;

y chca, chënga mochántsemna mo ndëshnana entsangcá ca.”

⁴¹ Isaías chca tojánayana, er tojáninÿe Jesús puerte bëtsá y obená yojamnama, y chca chë uabemaniñe Jesusbiana yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiana auatja causa, chë judiëngbe enefuana yebnënguentšana ndoñe chamondëtëbuacnama. ⁴³ Chëngbiana más yojanámana, entsanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesube palabrëngaca yochtsótatšëmbo entsanga tšabá o ndoñe tšabá tmonjamama

⁴⁴ Chora Jesús mëntsá jabuache tojánayana: “Nda átšbeñe tojtssošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana. ⁴⁵ Cachca, nda atše šojtsonÿá, chë šojichmó chábioynaca cha jtsonÿayana. ⁴⁶ Atše quem luaroye tijabo entsangbe juabnënga jabobínÿnama, chca, nda átšbeñe tojtssošbuaché, mo ibetiñcá ndoñe chaondëtsemnama.

⁴⁷ Pero nda atšbe soyëngama tojouena, pero ntšamo sentsichamcá ndoñe tontsama, atše chabiana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. ⁴⁸ Nda atše šojtsaboté y atšbe palabrëngama ndoñe šonjoyeuná, ya entsebmna nda chabiana yochjayana bëts castigo jtsebmnama ibojtsemna ca. Atše tijanoyebuambá palabrëngaca, quem luare jopochócama te chabiana chca echántsayana. ⁴⁹ Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, sonjamandá ntšamo jayanana y ndayá jabuátambana. ⁵⁰ Atše sëndëtatšëmbo, atšbe Taitá tojamandá orna, cha jamándana entsanga chë nÿetsca tescama yomna tšabe vida chamotsebmnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

13

Jesús chabe uatsjéndayënga tojanashecjabebé

¹ Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftseboचना y chabe Taitábioye jtama. Ntšamo Jesús chábenga yojanababuanýeshancá, chë quem luare imojamnënga, chórnaca yojtseboše chë bëts bonshánana puerte más jinýanýiyana.

² Pero Satanás, Júdasbe ainaniñe bacna juabnënga tojanjajó, uayayënge cucuatšíne Jesús jayentšbáshejuana. Judas Iscariote, Simonbe uaquiñá. ³ Jesús yojtsetátšëmbo chabe Taitá Bëngbe Bëtsá nyets obenana tbojánatsetama. Cachcá, Jesús yojtsetátšëmbo, Bëngbe Bëtsábiocana cha tojánabama y cachábioye jtama ibojtsemnana. ⁴ Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoniya tojanenátsejca y canýe tuallëjua tojanenasná. ⁵ Chentšana, canýe bachešíne búyeshé tojanbuescja y tojanontsé chabe uatsjéndayënga jushecjabebiyana y jtëshecbojuana cha yojtsasnana tuallëjuaca.

⁶ Pero, Simón Pedro tbojanobuache ora, Jesúsbioye tbojaniana: —Atšbe Utabná, ¿aca šcochjuashecjabí ca?

⁷ Chora Jesús tbojanjuá: —Atše sentsama soye mora ndoñe quecmátësertana; pero más chcoye aiñe cmochanjósérta ca.

⁸ As Pedro tbojaniana: —¡Ndocna te šcatjuashecjabí ca!

Pero Jesús tbojaniana: —Ndoñe chachonjuáshecjabese, atšbia ndoñe quechóatšmëna ca.

⁹ Y Simón Pedro tbojaniana: —¡Atšbe Utabná, as nýe atšbe shecuatšënga ndoñe, ndayá atšbe cucuatšënga y bestšásnaca ca!

¹⁰ Pero Jesús tbojanjuá: —Nda bebená tojtsemna, nýe shecuatše jtsashecjabiana jtsajabótana, ndoñe nyetšá cachiñe. Nda tojtsobebé, ndoñe tsengá ntsemnana. Cachcá, mo bebëñënga cuenta tšëngaftanga šmontsemna; pero canýa muentše entsemna, y cha mo bebenacá ndoñe quenátšmëna.

¹¹ Jesús yojtsetátšëmbo nda chë uayayënge cucuatšíne boshjuaná yochtsanmënama, chíyeca tojánayana: “Tšëngaftanguentšá canýa entsemna, cha mo bebenacá ndoñe quenátšmëna ca”.

¹² Jushecjabebiyama tojanpochocá ora, chabe juatsboye uichëtjoniya tojtaničëtjo, y mesëshentše tojtanoíbema. Chora tojanéyana: —¿Chë tbonjábiana soyama quecmojtsésertana ca? ¹³ Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna. ¹⁴ Atše, tšëngaftangbe Buatëmbayá y Utabná, tbonjushecjabebé; chcasna, tšëngaftángnaca cmontsamna jenáshecjabebiyana. ¹⁵ Ntšamo quem sóyeca tbonjanýanyéca, tšëngaftanga cachcá šmochtsama. ¹⁶ Ndegombre šcuayana, chë oservená chabe nduiñbiana ndoñe más uamaná ntsemnana. Cachcá, chë ichmoná chë tbojichmobiana ndoñe más uamaná quenátšmëna. ¹⁷ Quem soyënga chašmojuatsjinýe y chca chašmojamëse, tšëngaftanga puerte oyejuayënga vida šmochanjëftsebmoma.

¹⁸ “Atše sëndëtatšëmbo chë tijábacangbiana, chíyeca atše nyetscangbiana ndoñe chca quetsatoyebuambná. Y ntšamo Bëngbe Bëtsabe uabemana palabrënguñe endayancá cachcá chaotsemnana, chë ‘canýa átšeftaca tandëse tonjasá, atšbe contra echántsemna ca’, cachcá echanjopása. ¹⁹ Mora, cabá

ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

Jesús tojánayana uayayëngbe cucuatšíñe Judas bochjáboshjonama
(Mt 26.20-25; Mc 14.17-21; Lc 22.21-23)

²¹ Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canýa tšëngaftanguentšá uayayëngbe cucuatšíñe šochanjáboshjona ca.

²² Chora, chabe uatsjëndayënga tmojanontsé enonýinýnayana, y ndoñe montsetátšëmbo ndabiamá Jesús chca tojánayanama. ²³ Canýe uatsjëndayá, chë Jesús puerte ibnabobonshaná, Jesusbe juachaca inatbemana. ²⁴ As, Simón Pedro chábioye tbojánefatšëmbo, ndabiamá Jesús chca tojánayanama Jesúsbioye chabotjama. ²⁵ Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjuá: —Atše canýe base tandëtema chanjafchëcuacuaye y ndábioye chajoyé, cha entsemna ca.

As Jesús canýe base tandëtema tojanfchecuacuá, y Judas, Simón Iscariotbe uaquínábioye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniana: “Chë cochanjama soye, cam ora moma ca.”

²⁸ Pero ni canýa chë jasama imojtsetbiamanënguentšá tbojanësertá, ndayama Júdasbioye chca tbojanianama. ²⁹ Judas inamna chëngbe crocénana shecnëšíñe uambayá; chíyeca ínýenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjëmënga ndayánaca chauatsatama ca.

³⁰ Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

Chë tsëm mando

³¹ Judas tojéftsanbocnentšana, Jesús tojánayana: —Ora tocbjbuache, Bëngbe Bëtsá Entšá tbojanbemá corente bëtsá y obená yomnama jinýanýiyama; y mua echanjínýanýiye Bëngbe Bëtsá corente bëtsá y obená yomnama. ³² Cha echanjínýanýiye Bëngbe Bëtsá chca yomnama, chíyeca Bëngbe Bëtsánaca echanjínýanýiye corente bëtsá y obená yomnama, y mora entsemna chë ndaye ora Bëngbe Bëtsá chca chabiamá yochjínýanýiye. ³³ Atšbe básenga, baseftatescama tšëngaftangaftaca sëntsemna. Chora šmochántseguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. ³⁴ Canýe tsëm soye chetsamëndá: Nýetscanga šmochtsenbobonshana. Ntšamo atše tšëngaftanga chondábabuanýeshana, cachcá tšëngaftanga šmochtsenbobonshana.

³⁵ Tšëngaftanga šmojttsenbobonshánëse, nýetsca entšanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanéyana.

Jesús tojánayana, chábioye ndoñe bonjanabuátma ca Pedro yochjánayanama
(Mt 26.31-35; Mc 14.27-31; Lc 22.31-34)

³⁶ Chora Simón Pedro tbojantjá: —Bëngbe Utabná, ¿ndëmoye cochjá ca?

As Jesús tbojanjuá: —Atše sěntsá luaroye, mora aca ndoñe quecátobena atše juastana, pero más chcoye aĩne šcochanjuasto ca.

³⁷ As Pedro tbojaniana: —Atšbe Utabná, ¿ndáyeca ndoñe sěntsobena mora aca juastama? ¡Atše sěntseprontana acbiama jóbana ca!

³⁸ Chora Jesús tbojaniana: —¿Ndegombre cojtseprontana atšbiama jóbana? Ndegombre cběyana, cabá ngallo nděcánta ora, aca unga soye atšbiama cochanjanya: “Cha ndoñe quetsatabuatma ca”.

14

Jesús beyeca entšanga jobenayana Běngbe Bětsábioye jama

¹ Měntšánaca Jesús tojánayana: —Ndoñe ainana tsetšaněnga matsmėnana. Tšěngaftanga Běngbe Bětsábeñe šmondošbuaché; átšbeñnaca šmoctsošbuáchiye. ² Atšbe Taitá Běngbe Bětsá endmėnoca, ba luarěnga joyėnana endmėna. Ndoñe chca tontsemnėse, atše chca matchěnjáyana. Morna, cha endmėnoye atše chanjá tšěngaftangbiana canye luare joyėnana jabuáprontama. ³ Atše chaijá y chě luare chachobabuaprontá ora, cachiñe moye chanjėsabo, tšěngaftanga átšeftaca junatsama. As, atše chaitsemnoye, tšěngaftangnaca chašmotsá joyėnana. ⁴ Atše chanjá choye ntšamo jama y jashjanguama ya šmontsetátšěmbo ca —Jesús tojánayana.

⁵ Chora Tomás Jesúsbiye tbojaniana: —Běngbe Utabná, ndėmoye cochjama ndoñe queftsátstatšěmbo. As, ¿ntšamo bėnga fchtsetátšěmbo ntšamo choye jama ca?

⁶ Chca tbojaniana ora, Jesús tbojanjuá: —Atše sěndmėna benachcá; chějna tcojtsase, pronto jashjanguana. Atše sěndmėna ntšamo ndegombre yomncá sempre oyebuambnayá, y entšanga chě nyetsca tescama yomna tšabe vida chamotsebomnama endamá. Nye átšbeyeca endopodena ndayějana jama, y atšbe Taitá Běngbe Bětsábioica jashjanguama. ⁷ Tšěngaftanga atše šmojtsábuatmėse, atšbe Taitánaca šmattsábuatma. Morscana ya cha šmotsábuatma y cha šmontsonyá ca —tbojaniana.

⁸ Pero Felipe tbojaniana: —Atšbe Utabná, nye chě Taitá šmanyanyé, ndayama más ca.

⁹ Chora Jesús tbojaniana: —Chěfta te tšěngaftangftaca sěntsemna, y ¿cabá ndoñe atše šcontsábuatma, Felipe? Nda atše sojinye, chě Taitá Běngbe Bětsábioynaca jinýana. As, ¿ntšamo atše scojtsatsá, chě Taitá šmanyanyé ca? ¹⁰ ¿Ndoñe condošbuaché, atšbe Taitá átšbeñe y átšnaca chábeñe nye canyácá ftsmėnana? Chě cbontsětsěsná soyěnga, ndoñe nye atšbe juábnaca chca quetsatoyebuambná. Atšbe Taitá, chě átšbeñe vida endomná jtsamana lempe ntšamo stsamcá. ¹¹ Muiñe šmoctsošbuáchiye: Atšbe Taitá átšbeñe endmėna, y átšnaca chábeñe mo nye canyácá sěndmėna. Chama ndoñe šmontsošbuachese, as nye chě tijama soyěngámna átšbeñe šmoctsošbuáchiye. ¹² Ndegombre šcuayana, nda átšbeñe tojtsóšbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chě átšbeñe ošbuachiyá, chama más bėts soyěnga echanjama. ¹³ Tšěngaftanga ndaye sóynaca Běngbe Bětsábioye šmojtjañe, y chca šmojama atše jótšěmbonėse, átšbeñe šmošbuachéyeca, lempe šmochanjóyěngacñe; chca, chě Uaquiñá echanjinyanýiye chě Taitá corente bětsá y obená yomnama. ¹⁴ Tšěngaftanga ndaye sóynaca atše šmojtjañe, y chca šmojama

atše jótšëmbonëse, átsbeñe šmošbuachéyeca, atše chë soye chanjama ca — Jesús tojánayana.

Jesús tojanašebuachená chë Uámana Espíritu jíchmuama

15 Mëntsánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. 16 Chca chašmojamëse, atšbe Taitá Bëngbe Bëtsá tšëngaftangbiamá chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nyetsca tescama tšëngaftangaftaca chauétsemnama. 17 Cha, chë Uámana Espíritu endmëna chë nyetsca soyënguiñe ntšamo ndegombre yomncá oyebuambnayá. Chë nye quem luarama enójuabnaye entšanga, chë átsbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

18 “Atše ndoñe quebocháisabashejuana, mo uajchonga cuenta chašmotsemnama. Tšëngaftangbiyoe chanjésabo. 19 Muentšana baseftaytese, chë nye quem luarama enójuabnaye entšanga ndoñe más quešmochátönyaye; pero tšëngaftangna aíñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebmoma. 20 Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canýacá šmomnama y átšnaca tšëngaftangaftaca. 21 Nda totátšëmbo ntšamo atše tijamandacá y siempre chca tojtsama, cha ndegombre šojtsebobonshana. Nda átšbiyoe šojtsebobonshana, chábíyoe atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

22 Chora, inýe Judas, ndoñe Judas chë Iscariote, Jesúsbiyoe tbojaníyana: — Bëngbe Utabná, ¿ntšamo chca yojtsemna, nye bënga šcochjínýanýiye ntšamo cach aca comnama, y nyetsca quem luarentšëngbiyoe ndoñe ca?

23 Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábíyoe bochántsebobonshana, y bëndata chábíyoe fchanjabo y chábeñe vida fchantsebmoma. 24 Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábnaca quenátsmëna, sinó chë Taitá, chë šonjichmó chabe juábnaca.

25 “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. 26 Chë Uajabuachaná, chë Uámana Espíritu, atšbe im-padanánaca atšbe Taitá bochanjíchmuá. Cha lempe cmochántsbauatambaye, y echanjama nyetsca chë tcbonjáuyana soyëngama chašmuatenójuaboma.

27 “Chë atšbe ainaniñe puerte tšabe ebionana tšëngaftangbiamá šcuétšeboshjona, cbetsatšatá. Chë nye quem luarama enójuabnaye entšanga cmondbétšatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. 28 Ya šmonjouena ntšamo tcbonjáuyancá: ‘chanjá y tšëngaftangbiyoe chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábíyoe jama šojtsemnama, er chë Taitá atšbiamá más bëtsá endmëna. 29 Quem soyënga tcbonjáuyana, cabá ndoñe chca

tonjopasá ora; as, chca chaojopasá ora, chiñe jenójuaboyese átsbeñe chašmotsošbuáchema.

³⁰ “Chè quem luarentša bacna soyenga mandayá endabó; chíyeca atše ya ndoñe bëtscá tšëngaftangafaca quichaisóyebuambaye. Pero cha tondaye quenátobena atše jabórlana. ³¹ Masque cha chca endmëna, chca entsemna, atše chë Taitábioye tsbobonshánama quem luarentša entsanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanëyana.

15

Jesús yomna mo chë tšabe uvas betiyá

¹ Mëntsánaca Jesús tojánayana: “Atše sëndmëna mo chë tšabe uvas betiyá, y atšbe Taitá Bëngbe Bëtsá chë tšabe uvas betiye inyenacá. ² Chë inyená, chë uvas betiyentša buacuafjënga ndëshajuanëfjënga jtsebuácuëtëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³ Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. ⁴ Atšeftaca cánýiñe mo canýacá šmochtsemna y atše tšëngaftangafácnaca. Chë buacuafja uvas betiyentšana juanánëfja ndoñe ntsoebenana nýe cachabe ponto jashájonana. Cachcá, tšëngaftanga átšeftaca ndoñe cánýiñe mo canýacá šmontsemnëse, ndoñe šmattsobena Bëngbe Bëtsábiana bëtscá soyenga jamama.

⁵ “Atše chë tšabe uvas betiyá sëndmëna y tšëngaftanga chë buacuafjëngcá. Nda átšeftaca cánýiñe mo canýacá tojtsemna y atše cháftacnaca, cha Bëngbe Bëtsábiana bëtscá soyenga echanjama, mo canýe buacuafja becá tojtshajuancá. Er, tšëngaftanga atšbe uajabuáchenana ndoñe šmontsebonnëse, átšeftaca cánýiñe mo canýacá ndoñe šmontsemna causa, tondaye šmattsobena jamama. ⁶ Canýa átšeftaca cánýiñe mo canýacá ndoñe tontsemnëse, cha jtsemnana mo canýe buacuëtëtšena buacuafja, utšenëfja y buashánëfjácá. Chca buacuafjënga, entsanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cánýiñe mo canýacá tontsemna, ndoservená jtsemnana y luaroca cha mochantsesegóra.

⁷ “Tšëngaftanga átšeftaca cánýiñe mo canýacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸ Chë shajuana buacuafjëngcá tšëngaftanga chašmojtsemna ora, šmochanjinýanýiye atšbe Taitá corente bëtšá y obená yomnama. Y chca, tšëngaftanga atšbe ndegombre uatsjëndayënga šmochántsemna. ⁹ Ntšamo chë Taitá šondbobonshancá, átsnaca cachcá tšëngaftanga chondábabuanýeshana. Chíyeca, šmochtsiyena atšbe bonshánama jtsejuabnayëse. ¹⁰ Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše chontsamëndacá šmojtsamëse, atšbe bonshánama jtsejuabnayëse šmochantsiyena.

¹¹ “Atše chca chontsëtsëtsná, chë atše sëntsebonna oyejuayana tšëngaftángnaca chašmotsebonnama, y tšëngaftanga puerte

chašmotsóyejuama. ¹² Měntšá cbetsaměndá: Ntšamo atše cbond-ababuanjěshancá, cachcá šmochtsenbobonshana. ¹³ Chě chabe amiguēngbiamá tojóbanabiamá, ndocna quenátobena chabiamá más bonshánana jtsebomnana. ¹⁴ Ntšamo atše tijamandacá tšēngaftanga šmojtsaměse, atšbe amiguēnga šmochántsemna. ¹⁵ Chě oservená ndoñe ntsetatšēmbuana ndayá chabe nduiño tojtsamama. Chíyeca atše tšēngaftanga oservēngca ca ndoñe quechatětsětsná. Morscana mēntšá chontsětsětsná: ‘Tšēngaftangna atšbe amiguēnga šmontsemna ca’, er lempe ntšamo atšbe Taitábentšana tijuatsjinýcá, tšēngaftanga tcbonjinýanýé. ¹⁶ Tšēngaftanga ndoñe atše chešmatábuayana, pero atše aife tšēngaftanga tcbonjabacacá y tcbonjubuáyana, Bēngbe Bětsabe trabajo jamama; y chca, mo canýe betiye sempre tojtseshajuana y chě shajuana ndocna te tontsopochocacá, tšēngaftanga chašmotsemnna. Chca, lempe ntšamo atšbe Taitá šmojotjañcá, y chca šmojama atše jótšēmboněse, átšbeñe šmošbuachéyeca, cha lempe cmochanjátšataye. ¹⁷ Měntšá atše cbetsaměndá: Smochtsenbobonshana ca’ —Jesús tojaněyana.

Jesús y chabe entsanga, chě nýe quem luarama enójuabnayeñgbiamá uaboyēñanēnga

¹⁸ Měntšánaca Jesús tojánayana: “Pero chě nýe quem luarama enójuabnaye entsanga tcmojtsēbuayēñjese, šmochjenójuaboye, natsana chēnga atše šmonjanáboyēñjama. ¹⁹ Tšēngaftanga, chě nýe quem luarama enójuabnaye entsanguentšana šmojtsēmñese, chēnga cmattsababuánjeshana cachēngbengbioycá. Pero tšēngaftanga ndoñe chě nýe quem luarama enójuabnaye entsanguentšana quešmátsmēna, y atšna, chě quem luare oyenēnguentšana tšēngaftanga tcbonjabacacá. Chíyeca chě nýe quem luarama enójuabnaye entsanga tšēngaftanga cmontsēbuayēñja. ²⁰ Smochjenójuaboye ntšamo tcbonjáuyanama: ‘Chě oservená chabe nduiñbiamá ndoñe más uamaná quenátsmēna ca’. Chēnga monjánama atše chaisufrima; tšēngaftánacá chašmotsesufrínama mochántsama. Entšanga ntšamo atše tijayanentšana ntsachetšá tmojtsamcá, cachcá chēnga mochántsama ntšamo tšēngaftanga chašmojtsětsětsná chentšana. ²¹ Chě chacmojtsēbuayēñjēnga, chě šojichmó cha ndoñe quematábuatma. Chíyeca chēnga lempe chca cmochanjáborlaye, atšbe causa.

²² “Atše ndoñe matijabo y chēnga ndoñe matijáuyaněse, ndegombre ndoñe bacna soye mattsebmna. Pero mora, chēngbe bacna soyēngama chēnga ndoñe quemátobena jayanana, ‘¡Chca fsēñjama ntsetatšēmbcá ca!’ ²³ Nda atše šojtsáboyēñja, atšbe Taitábiynaca jtsáboyēñjana. ²⁴ Atše chě bēts soyēnga Bēngbe Bětsabe obenánaca chēngbeñe ndoñe matijaměse, ndegombre chēnga ndoñe bacna soyēnga mattsebmna. Pero mora, masque ntšamo sēñjamcá tmonjinýjese, chēnga atše šmontsáboyēñja y atšbe Taitábiynaca. ²⁵ Chca chēnga montsama, ntšamo chēngbe leyēnguiñe enduabemancá cachcá chaopasama. Chíñe mēntšá endayana: ‘Nýe tondayama chēnga šmonjanáboyēñja ca.’

²⁶ “Atše, atšbe Taitábentšana chě Uajabuachaná y añemuayá tšēngaftangbioye chanjichmua. Cha chě Uámana Espiritu endmēna, chě nýetsca soyēnguiñe ntšamo ndegombre yomncá oyebuambnayá. Cha endmēna chě Taitábentšana ichmoná; y cha lempe atšbe tšabe soyēnga cmochantsětsětsnaye. ²⁷ Chorscana, tšēngaftánacá atšbiamá entsanga

šmochantsětsěsnaye, er tšəngaftanga átšeftaca šmondětsemna, entšanga jábuayenama atše sənjanbojatsě orscana ca” —Jesús tojánayana.

16

¹ Měntsánaca Jesús tojánayana: “Atše quem soyənga cbontsětsěsná, tšəngaftanga átšbeñe ošbuáchiyana ndoñe chašmondájbanama, atše causa chašmojtsesufrina ora. ² Chəngna, chě judiəngbe nefjuana yebnənguentšana cmochantěbuacana. Chca tempo chaojobuache ora, chě tšəngaftanga chacmojtsěbáyənga měntsá mochántsejuabnaye: ‘Bənga tšabá tmonjama ca. Ntšamo Bəngbe Bětsá yojtsebošcá, cachcá bənga tmonjama ca.’ ³ Chəngna, chě Taitá Bəngbe Bětsá ndoñe quematábuatma, y átšbiyoye cach ndoñe. Chíyeca, chca cmochanjáborlaye. ⁴ Atše chca tšəngaftanga cbontsětsěsná, ntšamo tcbonjáuyana chašmuenójuaboma, chca tempo chaojobuache ora ca” —Jesús tojánayana.

Ndayá chě Uámana Espíritu inétsama

Měntsánaca tojánayana: “Entšanga jábuayenama sənjanbojatsě orscana, chě echanjopása soyəngama ndoñe quecbənjanətsětsěsná, er atše tšəngaftangaftaca sənjetsemna. ⁵ Pero morna, chě sojichmó cha yomnoye chantá; y tšəngaftanguentšá ndocná sochanjatjaye, ‘čndə moye cojtsá ca?’ ⁶ Mora, tšəngaftangbe ainana ngménaca entsemna, atše chca tcbonjáuyana causa. ⁷ Pero ndegombre šcuayana: Atše chanjá y chca tšəngaftangbe tšabiamama echantsemna. Atše ndoñe quetsjase, chě Uajabuachaná y añemuayá ndoñe tšəngaftangbiyoye queochátabo. Pero añe chanjá, y chora cha tšəngaftangbiyoye chanjíchmuá. ⁸ Cha chaojášhango ora, echanjama quem luarentša entšanga corente chamotsetátšəmbo ndayá ndegombre yomna bacna soyənga jtsamana, ndayá ndegombre yomna chě Bəngbe Bětsabe bominjəñe tšabia jtsemnana, y ndayá yomna chě Bəngbe Bětsá entšangbiama jayanana tšabá o ndoñe tšabá tmonjamama. ⁹ Entšanga átšbeñe ndoñe quematošbuaché. Chíyeca chě Uajabuachaná echanjama chəngna corente chamotsetátšəmbo ndayá ndegombre yomna chě bacna soyənga jtsamana. ¹⁰ Chě Taitábíoye chanjá y atše ndoñe más quešmochátinje. Chíyeca chě Uajabuachaná echanjama chəngna corente chamotsetátšəmbo ndayá ndegombre yomna Bəngbe Bětsabe bominjəñe tšabia jtsemnana. ¹¹ Quem luarentša bacna soyənga mándayabiamama Bəngbe Bětsá ya tonjayana, ntšamo cha tojamama ndoñe tšabá yontsemna ca y njetšca tescama castiganá chaotsemna ca. Chíyeca chě Uajabuachaná echanjama entšanga corente chamotsetátšəmbo, ndayá ndegombre yomna chě Bəngbe Bětsá entšangbiama jayanana tšabá o ndoñe tšabá tmonjamama.

¹² “Atše cabá ba soyənga səntsebmoma tšəngaftanga jáuyanama. Masque chcasna, mora tšəngaftanga ndoñe quešmátobena chě soyəngama josértana. ¹³ Pero chě Uámana Espíritu, chě njetšca soyənguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatambá. Cha ndoñe nje cachabe juábna queochátoyebuambnaye. Ntšamo chě Taitá chábíoye tbojauyancá, tšəngaftanga cachcá cmochanjáuyana, y cha cmochanjábuayenaye ntšamo yochjopásama. ¹⁴ Atšbe soyənguentšana cha echanjóyəngacñe, y cach soyəngama cmochanjabuatambá. Chcase cha cmochanjínjəñe atše bětsá y obená bětsemnama. ¹⁵ Lempe ntšamo chě Taitá endbomncá, atšbe soyəngnaca endmėna. Chíyeca

atše tcbonjáuyana, chë Uámana Espiritu atšbe soyënguentšana yochjójyëngacñe y cach soyëngama cmochjabuatambá ca.”

16 “Baseftayté y atše ndoñe más quešmochátinÿe. Inÿe baseftayté y cachiñe šmochantétinÿe ca” —Jesús tojanëyana.

“Tšëngaftangbe ngménana, oyejuayana echanjóbema”

17 Chora Jesube básefta uatsjëndayënga imojtsentjanaye: —¿Ntšamo yojsentsšáyana, chë “baseftayté y atše ndoñe más quešmochátinÿe, y inÿe baseftayté y cachiñe atše šmochantétinÿe, er atše chë Taitábioye chanjá ca”? 18 ¿Ntšamo yojsentsšáyana, chë “baseftayté ca”? Ndoñe quemuátstatšëmbo ntšamo yojsentsšáyana ca —chënga imojtsichamo.

19 Jesús yojsentšátšëmbo chënga chca jatjayama imojtsebošama, y tojanëyana: —Atše tcbonjáuyana: “Baseftayté y atše ya ndoñe más quešmochátinÿe, y inÿe baseftayté y cachiñe atše šmochantétinÿe ca.” ¿Chë soyëngama šmojsentjaná ntšamo stsentšáyana? 20 Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nÿe quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema. 21 Canÿe shembása tbojontšabuache šešona jónÿnama ora, tša ngménaca cha jésemnana, puerte tbojtsetsetše causa. Chë šešona ya tojorÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháuwashjanguama chë shembása tojámayeca, chora cha tšabá y oyejuayá jtsemnana. 22 Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbioye chajjésabo ora, atše šmochantétinÿe y corente oyejuayënga šmochántatsmëna. Y ndocná queochatobenaye chë oyejuayana jabuajuánana.

23 “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtotañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. 24 Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjójyëngacñe, y chca, bëtsca oyejuayana šmochántsebmna ca” —Jesús tojanëyana.

Jesucristo, quem luarentše mandayábioye yëñjanayá

25 Mëntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsëtsnaye; chë cuentna, puerte botamana lempe atšbe Taitabiama cbochanjáuyana. 26 Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbëyana; chca, chë te ndoñe quešochatájaboto tšëngaftangbiana atšbe Taitá jatsimpadánana. 27 Atše ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábocana atše tijabama šmojtsošbuáchema, chë Taitá cmondábabuanÿeshana. 28 Atše chë Taitábocana sënjábocna y quem luaroye sënjabo. Pero mora quem luare chanjëftsebošjona atšbe Taitábioye jtama ca” —Jesús tojánayana.

29 Chora chabe uatsjëndayënga tmojanianaya: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. 30 Mora fsëntsetatšëmbo aca nÿetsca soyëngama cotatšëmbuama, y

ndoñe quenátsiyta ndocná aca chacmátstjanama, er aca chëngbe juabnënga jtsabuutmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojaníyana.

³¹ As Jesús tojanëyana: —¿Mora chiñe šmojtsošbuaché ca? ³² Ya tempo tocjbuache y cam ora entsemna, tšëngaftanga nyëtsquéneca šmochanjuáshana y atše nÿe canÿa šmochanjéshojona. Pero atše ndoñe nÿe canÿa quichátsmëna, chë Taitá átšeftaca entsëmnayeca. ³³ Atše lempe quem soyënga cbontsëtsëtsná, tšëngaftangbe ainaniñe tšabe ebionana chašmotsebmomna, átšeftaca cánÿiñe mo canÿacá jtsemnëse. Quem luarentše šmochanjasufrina; pero añemo šmochtsebmomna, atše ya chë quem luarentša mandayá sënjayëñaná ca —Jesús tojánayana.

17

Jesús chabe uatsjëndayëngbiana Bëngbe Bëtsábíoye tbojanimpadá

¹ Jesús chë soyënga tojánayanentsana, celoye tojanontješé y Bëngbe Bëtsábíoye tbojaníyana: “Taita, atšbe te ya tocjbuache. Minÿanjé, atše acbe Uaquiñá, corente bëtsá y obená bëtsemnana. As, atše acbe Uaquiñá, aca corente bëtsá y obená comnana chainÿanjëma. ² Mora aca nyëts obenana šconjatšetà nyëtsca entsángbeñe, nyëtscanga chë atšbiana tcojábacacanga chë nyëtsca tescama yomna tšabe vida chamotsebmomna atše chaimama. ³ Chë nyëtsca tescama yomna tšabe vida jtsebmomna endmëna aca, chë nÿe canÿe y ndegombre Bëngbe Bëtsá jtsabuutmana, y atše Jesucristo, acbe ichmoná.

⁴ “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnana jinÿanjíyama. ⁵ Taita, quem luare cabá ndoñe quenjatsmëna ora, aca tconjaninÿanjé atše corente bëtsá y obená ácaftaca bëtsemnana. Mora moma atše cachcá ácaftaca chaitsemnana.

⁶ “Aca quem luarentša entsanguentsana quem boyabásenga tconjabacacá y atšbiana šconjinÿinÿé. Atše chënga sënjanÿanjé ntšamo ndegombre aca comnana. Chënga acbe entsanga mondëmëna; y acna, chë atšbiana chënga šconjinÿinÿiyá. Chënga acbe palabra tmonjouena y tšabá tmonjoyeuná. ⁷ Chíyeca chënga mondëtatšëmbo, lempe ntšamo atše tsbomncá ácbentšana tijóyëngacñama. ⁸ Atše chënga sënjáuyana ntšamo aca šcojayancá, y chënga montsošbuaché chë atše sënjauyaniñe. Chíyeca, chënga ndegombre mondëtatšëmbo atše acbiocana tijabama, y montsošbuaché aca chë atše šcojichmó cha comnana.

⁹ “Atše chëngbiana cbontseimpadana. Chë nÿe quem luarama enójuabnaye entsangbiana ndoñe quecbátsimpadana, pero aiñe chë atšbiana šcojinÿinÿiyëngbiana, er chënga acbe entsanga mondëmëna. ¹⁰ Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Achëngbe vidëngaca aca tcojinÿanjé atše corente bëtsá y obená bëtsemnana.

¹¹ “Atše ndoñe quem luarentše quešocháisetotona, pero chënga aiñe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinÿinÿiyënga acbe obenánaca cochtsanjëna. Chca ntšamo bëndata mo canÿacá bondmëna, chëngnaca cachcá chamotsemnana. ¹² Atše chëngaftaca sëntsemnëtscuana, chënga sëntsanÿëna, aca šconjatšetà obenánaca. Atše chënga sëndánÿëna, y ni canÿa queochátsmëna infernoca pochocaná, nÿe chë infernoca pochocaná jtsemnana ibomná chana aiñe, ntšamo acbe uabemana palabrenguiñe endayancá, cachcá chaotsemnana.

13 “Morna chë aca condmënöyë chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebmorna puerte bëtsá oyejuayana chëngnaca chamotsebmorna. 14 Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nye quem luarama enójuabnaye entsanguentsá, cachcá, chënga cach ndoñe quemátsmëna. Chíyeca, chë nye quem luarama enójuabnaye entsanga chënga montsëbuayënja. 15 Atše ndoñe quecbátsimpadana, chënga quem luarentšana chacúbuacanama; pero aiñe, nyetsca bacna soyënguentsana chacuatsebacama. 16 Ntšamo atše ndoñe quetsátsmëna chë nye quem luarama enójuabnaye entsanguentsá, cachcá, chënga cach ndoñe quemátsmëna. 17 Cochjama chënga acbe entsanga chamuëtsemnana, y chca, nye acbiama vida chamotsebmorna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. 18 Ntšamo aca quem luaroye šconjanichmocá, cachcá átsnaca chënga sëntsachamná, quem luare entsanga jábuayenama. 19 Chëngbiana atše cachiñe mëntšá cbëyana: Atše nye acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entsanga chamotsemna, y chca, nye acbiama vida chamuëtsebmorna, ntšamo ndegombre yomncá chënga imoyenama.

20 “Pero nye chëngbiana ndoñe quecbátsimpadana, sinó chë átsbeñe mochtsošbuáchiyëngbiamnaca, chë atšbiama šconjínjinyiýënga, chëngbioye atšbiama ínýenga chamojtsabuayiyiná ora; 21 as chënga nyetscanga cánýiñe mo canýacá chamotsemnana. Ntšamo aca, Taita, átsëftaca cánýiñe mo canýacá bondmëna y átsnaca ácaftaca, cachcá chëngnaca cánýiñe mo canýacá bëndátaftaca chamotsemnana cbontseimpadana. Y chca, quem luarentša nyetsca entsanga, atše šcojichmoma chamotsošbuáchema. 22 Ntšamo chë obenana y uámanana šconjatšetacá, cachcá átsnaca chënga sënjatsatá. As, ntšamo bëndata cánýiñe mo canýacá bondmëna, chëngnaca cachcá cánýiñe mo canýacá chamotsemnana. 23 Atše chëngbe ainaniñe sëntsemna, y aca átsëftaca cánýiñe mo canýacá bondmëna; as, chëngnaca nyetsca soyënguñe cánýiñe mo canýacá chamotsemnana. Y chca, quem luarentša entsanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanýeshanama.

24 “Taita, atšbiama chënga šconjínjinyiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatšeta obenana y uámanana chënga chámuinýe. Quem luare cabá ndoñe quenjatsmëna orscana, šconjánbobonshana; chíyeca, cachora tconjaninýanýe atše corente bëtsá y obená bëtsemnana. 25 Taita, nyetsca soyënguñe tšabá amá, masque chë nye quem luarama enójuabnaye entsanga ndoñe quecmatábuatma, atše aiñe cbonduábuatma, y quem boyabásenga montsetátšëmbo, aca comna chë šcojichmó cha. 26 Atše chënga sënjinýanýe ntšamo ndegombre aca comna, y más chanjínjinyiye; chca, ntšamo šcondbobonshancá, chëngnaca cachcá chamotsebmorna y atše chëngbe ainaniñe chaitsemnana ca” —Jesús tojánayana.

18

1 Chë soyënga Jesús tojëftsanayanentsana, chabe uatsjëndayëngaftaca tojëftsanbocna, chë binche bëjaye Cedrón ca uabáiniye chenguana jama. Chentše inamna canýe tjšhetema; y Jesús chabe uatsjëndayëngaftaca choye tojánamengo. 2 Y Judas, chë Jesús uayayëngbe cucuatšifne boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánefjuana. 3 Chora Judas tojánashjango, y cháftaca ba soldadënga y básefta Bëngbe Bëtsabe bëts yebnocca josticiënga; chënga imojamna chë bachnangbe amëndayënga y fariseungbe ichmónënga; nyetscanga uajinýanëshangaca, lamparëshangaca y espadëjangaca uajátënga.

4 Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsanga tojanëyana: —¿Nda šmojtsenguá ca?

5 Y chënga tmojanjuá: —Jesús, chë Nazaretocá fsëntsenguá ca.

As Jesús tojanëyua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna. 6 Jesús tojanëyana: “Atše cha sëndmëna ca”, y cachora chë entsanga tmojanostëtsánanga y fshantsoye tmojánshajaye.

7 Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

8 As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónýaye chamotsóñëngama ca.

9 Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínýinýiye entsanguentsana ni canýa pochocaná queochátsmëna ca”.

10 Simón Pedro canýe espadëja inasëngbuájonýana; asna, tojanenosëngbotëntšena y chë bachnangbe más uámana amëndayabe canýe oservenábioye catšbioica matscuaše tbojtsanëštjango. Chë oservená Malco ca inauabaina. 11 As Jesús, Pédrëbioye tbojanianyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngmënanajtsebonnama, ¿ndoñe chca chaondëtsemna ca?”

Jesús, Anasbe yebnocca

(Mt 26.57-58; Mc 14.53-54; Lc 22.54)

12 Chentšana chë soldadënga, chëngbe amëndayá y Bëngbe Bëtsabe bëts yebnocca josticiënga Jesús tmojánishache y tmojanëcúebatsëca. 13 Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. 14 Caifás yojamna nda judiënga tojanëyana: “Tšëngaftangbiamá más tšabá entsemna canýe boyabása Israeloca entsangbiamá chaóvana ca.”

Pedro tojanayana Jesúsbioye ndoñe bonjanabuátma ca

(Mt 26.69-70; Mc 14.66-68; Lc 22.55-57)

15 Simón Pedro y inýe uatsjendayá Anasbe yebnoye Jesús imojtsëstona. Chë inýe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjónťsoñe jashjanguana. 16 Pero Pédrëna nýe shjoca, amashjuanentše tojanoquedá. Chcasna, chë inýe uatsjendayá tojánbocna y chë bësása ebtafjuana shembásaftaca tojanoyebuambá. Chora Pedro tojanëmashëngo. 17 As chë shembásá Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

18 Tša yojtsešesna causna, chë oservénnga y chë josticiénnga shjoca tmojan-
niñe y chentše imojtósboniye. Y Pédrëna chëngaftaca yojtsešbonena.

Ntšamo chë bachnangbe más uámana pasado amëndayá, Jesúsbiöye tbojantjá
(Mt 26.59-66; Mc 14.55-64; Lc 22.66-71)

19 Chora, chë bachnangbe más uámana pasado amëndayá tojanontšë
Jesús jatjayama chabe uatsjëndayëngbiama y ndayá cha entšanga
yojánabuatambanaca. 20 Y Jesús tbojanjuá: —Atše nyetsca entsangbe
delante sënjoyebuambá. Sempre chë entsangbe enefjuana yebnënguenache
sëndabuatambá, y Bëngbe Bëtsabe bëts yebnócna, nyetsca judiënga
mondëtsenefjuanentšë; y chca, iytëmcá tondaye chiyatoyebuambá.
21 ¿Ndáyeca chca šcojtsetjaná? Atšbe palabra tmojouenënga májtjaye, as
chënga chacmëyana ntšamo atše tijáuyanama. Chënga mondëtatšëmbo ntšamo
atše tijayancá ca —Jesús tbojanjuá.

22 Jesús chë soyënga tojánayana ora, canye josticio chentše yojtsemná,
Jesúsbiöye tbojanjuebjantšetá y tbojaniyana: —¿Chca chë bachnangbe más
uámana amëndayá cuanjojuá ca?

23 Y Jesús tbojanjuá: —Ndoñe tšabá tijayanëšna, šmëyana ndayentše
chë podesca palabra yojtsemna; y tšabá tijóyebuambasna, ¿ndáyeca
šcojajuebjantšetá ca?

24 Chentšana, Anás tojanmandá, chë bachnangbe más uámana amëndayá
Caifasbe yebnoye, Jesús batsëcná chamuánatsama.

Pedro cachiñe tojánayana Jesúsbiöye ndoñe bonjanabuátma ca
(Mt 26.71-75; Mc 14.69-72; Lc 22.58-62)

25 Chëntscuana, Pedro yojtsešbonena, tsanana chë iñe juachaca. Chora chë
entšanga tmojantjá: —¿Aca ndoñe chabe uatsjëndayënguentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha
tojánayana.

26 Chora, chë bachnangbe más uámana amëndayabe canye oservená
Pédrëbiöye tbojaniyana: —¿Atše ndoñe cháftaca chë tjashetémoča tcbonjinýe
ca?

Chë oservená inamna chë Pedro tbojtsanmatstëtšabe pamillo.

27 Y Pédrëna cachiñe ndoñe ca tojánayana, y cachora canye ngallo yojacánta.

Jesús Pilatbe delante
(Mt 27.1-2, 11-14; Mc 15.1-5; Lc 23.1-5)

28 Chentšana, Caifasbe yebnentšana Jesús tmojanánatse chë romano man-
dadbe yebnoye. Ya yojtsebínyana, y chë bëts yebnoye chë judiënga ndoñe
tmonjánamashjna, er chënga imojtseboše chë Bashco saná jasama. Judiënga
ndoñe imonjobena Bashco saná jasana, chca tempo canye ndoñe judiëbe yeb-
noye nda tojámashënguse. 29 Chíyeca Pilato tojánbocna y chënga tojanëyana:
—¿Ndayá quem boyabásabe contra šmochjayana ca?

30 Chora chë entšanga tmojanjuá: —Bacá uamaná ndoñe tontsemnëse,
ndoñe matifjuánatse ca.

31 As Pilato tojanëyana: —Tšëngaftanga matánatse, y ntšamo cach
tšëngaftangbe leyíñe iuayancá muabiana šmochjayana tšabá o ndoñe tšabá
tonjamama ca.

Y chë judiënga tmojanjuá: —Bënga derecho queftsátsbomna ndocná jóbama
ca.

³² Chca tojanopasá, ana ntšamo Jesús cachá jóbanama tojanayancá cachcá chaotsemnama. ³³ As Pilato cach yebnoye tojtanamáshēngo, Jesús tbojanchembo y tbojantjá: —¿Aca chē judiēngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o inýenga atšbiamá tmojacuentáyeca ca?

³⁵ Chora Pilato tbojaniana: —¿Mo atše judío quetsmēna? Cach ácbioca entšanga y chē bachnangbe amēndayēnga muentše tmonjúshjango. ¿Ndayá tcojama ca?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmēna. Añe tojtsemnēna, atšbe ústonēnga muantsatsejaye atše chē judiēngbe cucuatsiñe ndoñe chašmondobshjonama. Pero atšbe jamándama luare ndoñe quem luarentše quenátsmēna ca —Jesús tbojanjuá.

³⁷ As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjanya; atše rey sēndmēna. Chama atše tijeñná y quem luaroye tijabo; y atše sēnjabo ndegombre soyēngama jabóyebuambayama. Y chca soyēnga jtsamēse tmojenēnga, atše jtseyeunanana ca.

³⁸ Chora Pilato tbojaniana: —¿Y ndayase chē ndegombre soye yomna ca?

Jesusbiamá tmojánayana chaóbana ca

(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiēngaftaca jóyebuambayama, y tojanéyana: —Atše ni mo canye soye chiyátinýena, quem boyabása castiganá chaotsemna ca jayanama. ³⁹ Pero tšēngaftanga šmondétatšēmbó, Bashco fiestama atše canye utamená cachcá jētsboshjonama. ¿Šmojtseboše chē judiēngbe Rey chjētsboshjona ca?

⁴⁰ Chorna nýetsca entšanga cachiñe tmojánáyebuachena: —¡Ndoñe, cha ndoñe! ¡Barrabás matsboshjona ca!

Barrabasa canye bacá uamana entšá inamna.

19

¹ Chora Pilato, Jesús tbojanánatse y tojanmandá chamotsetjanjama. ² Y canye coronēsha uchmašēfjangaca chē soldadēnga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichētjo. ³ Chorna chēnga imojtsóbobecocnaye y jtsafchayama imojtsatsētsnaye: “¡Baytē judiēngbe Rey cochtsemna ca!” Y imojtsejuebantšetaye.

⁴ Pilato cachiñe tojánbocna y entšanga tojanéyana: —Šmochjouena; cha chanjuábocna, chē boyabása castiganá chaotsemna ca jayanama atše ni mo canye soye ndoñe sēnjínýenama chašmotsetatšēmbuama ca.

⁵ As Jesús tojánbocna chē uchmašēfjangaca coronēsha uabestšajoná y chē shbuenda uafjatsenga entšayá mo reycá uichētjoná. Y Pilato tojanéyana: — ¡Muentše chē boyabása entsemna ca!

⁶ Chē bachnangbe amēndayēnga y chēngbe josticiēnga cha tmojáninýe ora, tmojanontšé uayebuáchana: —¡Motsecrucificá! ¡Motsecrucificá ca!

Chora Pilato tojanéyana: —Cach tšēngaftanga mánatse y šmochjacrucifica; atše ni mo canye soye chiyátinýena quem boyabása castiganá chaotsemna ca jayanama ca.

⁷ Chora chē judiēnga tmojanjuá: —Bēngna canye ley fsēndbomna, ntšamo chiñe endayancana, quem boyabása jóbanama bontsemna, Bēngbe Bētsabe Uaquiñá entsenobiamná causa ca.

8 Pilato chca tojanuena ora, más yojetsauatja. 9 Cachiñe chabe yebnoye tojtanamáshēngo y Jesús tbojantjá: —¿Ndēmocá aca cmēna ca?

Pero Jesús ndocá tbonjanjá. 10 Chora Pilato tbojaniana: —¿Ndoñe šcochanjojá ca? ¿Ndoñe condētatsēmbo, aca jacrucificama o jētsboshjonama atše tsobenama ca?

11 As Jesús tbojanjá: —Ache obenana Bēngbe Bētsá ndoñe macmējánatšetase, tondaye cattsobena átšeftaca jamama; chíyeca, ache cucuatšīñe šonjaboshjoná, acbiama más bēts bacna soye tonjama ca.

12 Cach orscana Pilato yojetsenguaye ntšamo jamana, jobenayama Jesús jētsboshjonama; pero chē judiēnga imotsáyebuache: —¡Chacojētsboshjonēsna, Césarbe amigo ndoñe condmēna! ¡Nda rey tojtšenobiamná chana, Césarbe uayayá jtsemnana ca!

13 Pilato chē soyēnga tojanuena ora, chashjoye Jesús tbojanábocna. Pilato tojanóbema chabe puestentše tribunaloca. Chē tribunaloca chashjaña hebreo biyañe Gabata ca inauabaina, y endayana “ndētšbēngaca pormániñe ca”. 14 Bashco fiestama canye te yojetsámna, y mo njetsto ora yojtsemna. Chora Pilato chē judiēnga tojanēyana: —¡Muentše tšēngaftangbe rey entsemna ca!

15 Pero chēnga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšēngaftangbe rey atše chjacrucificá ca?

Y chē bachnangbe amēndayēnga tmojanjá: —Bēngbe rey nye César endmēna, ndocná más ca.

16 Chentšana Pilato, chēngbe cucuatšīñe Jesús tbojánboshjona chamocrucificama y chē judiēnga cha tmojanánatse.

Jesús tmojanrucificá

(Mt 27.32-44; Mc 15.21-32; Lc 23.26-43)

17 Jesús tojánbocna chabe cruz tantšajónana y tmojanánatse canye luaroye, “Obanabe Bestšashe ca” uabáinoye (hebreo biyañe Gólgota ca inauabaina).

18 Chentše cha tmojanrucificá y inye útatnaca cátaoica tmojanacrucificá; Jesusna tsēntsaca. 19 Pilato tojanmandá canye uabemana soye chē cruciñe chamuanjuama. Chiñe yojetsábemana: JESÚS NAZARETOCÁ, JUDIĒNGBE REY ca.

20 Y ba judiēnga chē uabemana soye tmojanalía, er chē Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. 21 Chca juabemama tojanmandáyeca, chē bachnangbe amēndayēnga Pilato tmojaniana: —Ndoñe matabiamnana “Judiēngbe Rey” sínó ntšamo cachá tojayanca, “Judiēngbe Rey atše sēndmēna ca”.

22 Pero Pilato tojanējua: —Ntšamo tijuábema cachá chaotsábemana ca.

23 Chē soldadēnga Jesús tmojanrucificá chentšana, chabe entšayangá tmojanájaca y cántañe tmojanajatá, njetšca canta soldadēngbiana. Chabe cmešējua tmojanaca; chējuana yojanamna nduajonanējua, njetšējua uabianánējua. 24 As chē soldadēnga tmojáneniyana: “Ndoñe matjuátanēca; más tšabana tsbanánoye mochjútšena, ndabiana yochjuáquedama chaotso-tatšēmbuama ca.”

Chca tojanopasá ana ntšamo Bēngbe Bētsabe uabemana palabrenguñe endayanca cachá chaotsemnana, chē “Atšbe entšayangá tmojatenájataye; atšbe cmešėjua mna tsbanánoye tmonjanētšena, ndabiana juaquédama jtso-tatšēmbuama ca.” Y lempe chca chē soldadēnga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninye, y chabe juachacna chë Jesusbe bonshana uatsjendayá yojtsemna. Chora chabe mamá tbojanianyana: “Mama, chentše acbe uaquíñá entsemna ca.”

²⁷ Y chë bonshana uatsjendayá tbojanianyana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrénguine endayancá cachcá chaotsemnama, tojánayana: “Sontsajuendá ca.”

²⁹ Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacúa, canye hisopo niñëfjiñe tmojananguësëtjo y játsbanase, Jesusbe uayášoye tmojanbeconá. ³⁰ Chë untja vínoye Jesús tojanofsé ora, tojánayana: “Ya lempe tojochnëngo ca.”

Tojanotsejbé y tojanóbana.

Canye soldado chabe lanzësaca costillaca Jesúsbioye tbojanashacuá

³¹ Bashco fiestama canye te yojtsájamma, y chë judiënga ndoñe imontseboše chë crucificánënga cachentše chë ochnayté chamotsemnana, chë te puerte uámana te bëtsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chao-mandama. ³² As chë soldadënga tmojána y shecuatšënga imojtsatcacaye, natsana canya y chentšana chë inya, Jesúsëftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá. ³⁴ Masque chca, canye soldado Jesúsbioye costillaca canye lanzësaca tbojanashacuá. Y cachora buiñe y búyeshe chentšana tonjanóbocna. ³⁵ Chë mëntšá cuentayá chentše enjamna y tonjáninye, y ndegombre entsichamo; cha endëtatsëmbo ndegombre yojtsichámuama, chca, tšëngaftágnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrénguine endayancá cachcá chaotsemnana. Chiñe endayana: “Ni mo canye betashe cha quemochatsëntsátca ca.” ³⁷ Y inyoca, Bëngbe Bëtsabe uabemana palabrénguine endayana: “Chë tmojenachentsá bominye mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nýe iytëcana, chë judiëngbiam auaatja causa. Pilato aifne tbojanlesenciá; as José tojána y Jesusbe cuerpo yojtsámbarfe. ³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájuañbana. ⁴⁰ As José y Nicodemo Jesusbe cuerpo tbojanca y tmojanandmaná chë botamana uangüëtse soyëngaca unëtjona entšëjuangaca. Judiënga chca inmouamana, obaná juatbontsama ora. ⁴¹ Jesús tmojanrucificá luarentše canye base jajañe inamna, y chiñe

canÿe tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo. ⁴² Asna, nÿe chentše Jesusbe cuerpo tmojansegorá, chë Bashco fiestama canÿe te vojtsájamma causa, y chë cuevëshe chë béconana inámnyeca.

20

Jesús tojtanayena

(Mt 28.1-10; Mc 16.1-8; Lc 24.1-12)

¹ Chë inÿe semana bojatsenté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe inÿoca vojtsëmna chë cuevëshoye amashjuanentsa ndëtsbé. ² Asna, tojëftsanótjajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtsámabañe y ndayentše tmojsejájoma ndoñe queftsátstatsëmbo ca.”

³ Chora Pedro y chë inÿe uatsjendayá chentsana tbojëftsanbocna y chë cuevëshoye tbojánata. ⁴ Nÿets útata ibojtséchamana, pero chë inÿe uatsjendayá Pédrëbiamá más betso tojanótjajo y natsana chë cuevëshoye tojánashjango. ⁵ Tojanotsejbé y chë chentše tmojanacjá entšëjuangá tojáninÿe, pero choye ndoñe tonjánamashëngo. ⁶ Chentsana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentše tmojanacjá entšëjuangá. ⁷ Y chë Jesús juabestšëntsacjuama tojanaservé entšëjuana ndoñe chë inÿájuangaca yontsamna, sinó inÿoca botamana uandmanánëjua. ⁸ Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama vojtsanošbuaché. ⁹ Chëntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguñe endayancá, chë Jesús obanënguentšana jtayenama ibojamnama. ¹⁰ Chentsana chë uatsjendayata chatbe oyenoye tbojtaná.

Jesús, María Magdalénbioye tbojánëbëbocna

(Mc 16.9-11)

¹¹ Pero María chentše tojanoquedá, chë cuevëshe juachaca šachénaca; vojtsošachentscuana tojanotsejbé cuevëshoye jarrepárama. ¹² Y tojáninÿe uta angelotëmata uafjantsëjua uichëtjonata, Jesusbe cuerpo vojtsëjajonëtsë ibojtsetbemana. Canÿa tsëntsëñëshoica y chë inÿana matsësoica. ¹³ Chora chata tmojaniyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabañe, y ndayentše tmojsejájoma ndoñe queftsátstatsëmbo ca.

¹⁴ Chca tojánayana ora, tojanostëtsantješé y tojáninÿe chentše Jesús vojtsëmna, pero María ndoñe yontsetátsëmbo cha Jesús bëtsemnama. ¹⁵ Chora Jesús tbojaniyana: —Shembása ¿ndayama cošaché? ¿Nda conguá ca?

María vojtsëjuabnaye chë boyabásana vojtsëmna chentša base jajañe uais-hanÿá ca; chíyeca tbojantjá: —Bacó, aca tcojuambësna, šmëyana ndayentše cojtsejájó, as atše cha jesocñama ca.

¹⁶ As Jesús tbojaniyana: —¡María ca!

Chora María chábioye tojanontješé y tbojaniyana: —¡Rabuni ca! (hebreo biyañe chca endayana “Buatëmbayá ca”).

¹⁷ Chora Jesús tbojaniyana: —Ndoñe şcatábojajo, er atşe cabá ndoñe atşe Taitábioye quetstétstsjua. Pero motsa atşe catşátangbioye y cochjáuyana, atşe stsetsjuá atşe y tşéngaftangbe Bětsábioye, atşe y tşéngaftangbe Taitábioye ca.

¹⁸ As María Magdalena tojána y Jesusbe uatsjéndaýénga tojanéyana cha chě Utabnábioye tbojáninýe ca y cha chě palabrénga tojánayana ca.

Jesús chabe uatsjéndaýénga tojáneběbuacna

(Mt 28.16-20; Mc 16.14-18; Lc 24.36-49)

¹⁹ Tojanibétata ora, cach semana bojatşenté, chě uatsjéndaýénga tmojánenefna canýe luarentşe, pero lempe tmojtanatame, chě judiéngbiama auatja causa. Chora Jesús tojánamashéngo, chéngbe tséntsaca tojantsá y méntşá tojanacheuá: “Chě atşe ainaniñe tşabe ebionana tşéngaftangaftaca chaotsema ca.”

²⁰ Y chca tojanéyana ora, chabe cucuatşénga y costillaca tojaninýanjé. Chora chě uatsjéndaýénga oyejuayénga imojtsemna, chéngbe Utabná tmojáninýama. ²¹ As Jesús cachiñe tojanéyana: “Chě atşe ainaniñe tşabe ebionana tşéngaftangaftaca chaotsemna. Ntşamo atşe Taitá Běngbe Bětsá şojichmocá, átsnaca cachcá tşéngaftanga cbontşachamná ca.”

²² Chca tojánayana ora, chéngbioye tojangouo y tojanéyana: “Chě Uámána Espiritu şmochjójyéngacñe. ²³ Ndémuanýénga chéngbe bacna soyéngama chaşmojáperdonanga, perdonánénga mochántsatsemná; y ndoñe chaşmonjáperdonasna, ndéperdonánénga mochántsemna ca.”

Tomás, Běngbe Utabnábioye ainá tbojáninýe

²⁴ Pero Tomás, chě Gemelo ca uabobainá, canýa chě bnětsana uta uatsjéndaýénguentşá, chě uatsjéndaýéngaftaca ndoñe yontsemna, Jesús tojánashjango ora.

²⁵ Chíyeca, “běnga chě Utabná fsěnjinye ca”, chě inýe uatsjéndaýénga tmojaniyana ora, Tomás tojanéjua: “Atşe chabe cucuatşině chě uajabonjana uinýniñe ndoñe sěnjinye, y chiñe atşe ntşabuafja ndoñe sěnjajué y atşe cucuatşe chabe costillaca ndoñe, ndoñe quichátoşbuachiye ca.”

²⁶ Canýe semana tojanochnéngo ora, chě uatsjéndaýénga cachiñe canýe luarentşe tmojánenefna. Y Tomásnaca chéngaftaca yojtsemna. Masque chentşe atámeniñe yojtsemna, Jesús tojánamashéngo, chéngbe tséntsaca tojantsá y tojanéyana: —Atşe ainaniñe tşabe ebionana tşéngaftangaftaca chaotsemna ca.

²⁷ Chora Tomásbioye tbojaniyana: —Ache ntşabuafja muentşe mojué y atşe cucuatşe minýe; ache cucuatşe miyěbo y atşe costillaca mojué. Y ndoşbuachiyá ndoñe matsménana, sinó atşe tijtayenama cochtsoşbuachiye ca.

²⁸ As Tomás tbojaniyana: —¡Atşe Utabná y atşe Bětsá ca!

²⁹ Chora Jesús tbojaniyana: —Tomás, nýe şconjinyeyeca cojtoşbuaché. ¡Běngbe Bětsá chaoma puerte oyejuayénga chamotsemna chě nýe ntjinýcá tmojoşbuachenga ca!

Ndayama quem librěša tmojánábema

³⁰ Jesús, chabe uatsjéndaýéngbe delante inýe běts soyénga Běngbe Bětsabe obenánaca tonjéftsema, pero quem librěşañe ndoñe quenatábemana. ³¹ Y quem librěşañe soyéngna, entsábemana tşéngaftanga chaşmotsoşbuáchema, Jesús, chě Cristo y Běngbe Bětsabe Uaquiñá bétsemnama; y chcase, chábeñe chaşmojtsoşbuachese, chábeyeca chě nýetsca tescama yomna tşabe vida chaşmotsebonnama.

21

Jesús, canyësëfta chabe uatsjéundayënga tojánëbëbuacna

¹ Chca tojanopasá chentšana, Jesús inye soye chabe uatsjéundayënga tojánëbëbuacna, Tiberias mar béjaye tsachañe. Chora mëntšá tojanopasá: ² Cányëntše imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquíñata y Jesusbe inye uta uatsjéundayata. ³ Simón Pedro chënga tojanëyana: —Sëntšá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmojáninýena. ⁴ Ya yojtsebínýana orna, Jesús chë tsachoca yojtsemna, pero chë uatsjéundayënga ndoñe imontsetátšëmbo cha Jesús yojamnama. ⁵ Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

⁶ As Jesús tojanëyana: —Barquëshca catsbioica chë atarraiëshca mëtšena y beonga šmochanjáshebuaye ca.

As chënga chca tmojanma, y chora chëshca jtabocnama ndoñe imontsobena, nyetšá beonga tmojánishëche causa. ⁷ As chë Jesusbe bonshana uatsjendayá, Pédrëbioye tbojaniana: “¡Bëngbe Utabná entsemna ca!”

Simón Pedro chca soye tojanuena y cachora entšayá tojtaníchëtjo, er nduichëtjoná yojtsemna, y chë béjayoye tojanoshbuetše. ⁸ Chë inye uatsjéundayëngna chë barquëshañe tmojána, y chë atarraiëshca jútjena beóngaca imojtsásjaye, er chë tsachocama bécoñe imojtsemna, nýe canye patse metroca. ⁹ Fshantsoye tmojánastajjna ora, chënga tmojáninýena canye chebániñe pormániñe, y chentšna canye beona y tandëšnaca yojtsesegorana. ¹⁰ Chora Jesús tojanëyana: “Chë šmonjáshebuaye beonguentšana báseftanga miyëbo ca.”

¹¹ Simón Pedro chë barquëshoye tojánamashëngo, y chë atarraiëshca jútjena bëts beóngaca, uasjojónana tsachóntscoñe tojanëyamba. Mo canye patse y shachna bnëtsana y unga beóngaca; pero masque nyetšá beonga, chë atarraiëshca ndoñe ntjuatanécanana. ¹² Chora Jesús tojanëyana: “Mabënga, šmochjase ca.”

Chë uatsjéundayënguentšana ni canya yontsenñemua cha jatjayama nda cha yojamnama, er nyetscanga imojtsetátšëmbo cha chë Utabná bëtsemnama. ¹³ Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

¹⁴ Chóracna, Jesús ya unga soyama chabe uatsjéundayënga yojtsanebëbuacana, obanënguentšana tojtanayentšana.

Jesús, Simón Pédroftaca tojanoyebuambá

¹⁵ Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquíñá, ¿quemëngbiama más quešcbonshana ca?

Y Pedro tbojanjuá: —Atšbe Utabná, añe. Aca condëtatšëmbo atše añe chondbobonshánama ca.

As Jesús tbojaniana: —Atšbe entsanga, mo oveshatemëngcá imomnënga, cochtsanýena ca.

¹⁶ Chora cachiñe tbojantjá: —Simón, Juanbe uaquíñá, ¿quešcbonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entšanga, mo oveshëngcá imomnënga, cochtsanýena ca.

¹⁷ Y unga soyama tbojtétantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniana: —Atšbe entšanga, mo oveshëngcá imomnënga, cochtsanýena. ¹⁸ Ndegombre cbëyana: Más bobotse conjamna ora, conjanamana cach aca jtichëtjuana y ndémoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inýa cmochantichëtjo y ndémoye jama ndoñe chacontseboše choye cmochanjuánatse ca — Jesús tbojaniana.

¹⁹ Chca tojánayana, ana jtsotatšëmbuama ntšamo Pedro jóbanama ibojanama, y chë chca jóbánese, Bëngbe Bëtsá corente bëtsá y obená bëtsemnama Pedro yochjáninýanyiyama. Y chca tojánayanentšana, Pédrëbioye tbojaniana: —Smasto ca.

Jesusbe bonshana uatsjendayá

²⁰ Pedro tojesanenostëtšantješé y tojáninýe, Jesusbe bonshana uatsjendayá ústonoye yojtseye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?” ²¹ Pedro chábioye tojáninýe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

²² Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmajtátsëntšamna? Acna nýe šmasto ca.

²³ Chíyeca, chentšana, Jesucristbeñe ošbuáchiyëngbenache nýetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmajtátsëntšamna? ca”.

²⁴ Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

²⁵ Jesús inýe ba soyënga tonjëftsema; tša bëtscá soyënga endmëna, nderado lempe cada canýe soye tcojuábema y librëšangá tcojuapormá, atše šëntsejuabná, nýetsca chëšangá quem luarentše ndoñe nanjuába.

Hechos

Jesús tojanašebuachená chë Uámana Espiritu jíchmuama

¹ Teófilo, atšbe natsana librěšaňe tbonjuábobema lempe ntšamo Jesús tojanmama y tojánabuatambama, chca tojanbojatsě orscana, ² y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojětsanaměndá, chë Uámana Espiritbiajana, ndayá jamama yojánamnama. ³ Jesús cruciňe tojanóbana y tojtanayenentsana, ba soye chë ichmóněnga yojánebėbuacana, chca, chěnga jinýanýiyama cha ndegombre tojtanayenama. Canta bnětsana tentscuana cha yojánebėbuacana y Běngbe Bětsabe aměndayama chěnga yojanabuatambá.

⁴ Canýe, Jesús chabe ichmóněngaftaca yojětsemna ora, měntsá tojanaměndá: —Jerusalenentsana ndoňe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tbonjáuyana. ⁵ Ndegombre, Juan entsanga béjayecca tonjaněbaye; pero ndoňe baytesna, Běngbe Bětsá chë Uámana Espiritu bochanjíchmu, tsěngaftangbe ainaniňe jtsemándayama cháuamashěnguama ca.

Jesús celoye tojtantsjuá

⁶ Canýe, chë ichmóněnga Jesúseftaca cánýiňe imojtsemna ora, chěnga tmojantjá: —¿César y chë Romoquěngbe aměndayentsana tašochjatsebacá, y mora běnga, Israeloca entsanga, canýe Rey quemochtsatsbomna ca?

⁷ As Jesús tojaněyana: —Tsěngaftanga ndoňe quecmátamna chë soyěngama jtsetatsěmbuana. Nýe atšbe Taitá aiňe; y cha, chabe obenánaca echanjamánda mocna ora y ndayté chca chaopasama. ⁸ Chë Uámana Espiritu tsěngaftangbe ainaniňe jtsemándayama chaojabo ora, tsěngaftanga obenana šmochanjóyěngacňe. Chentsana, ntšamo atšbiama smotatsěmbcá, chë tbonjabuatambá soyěnga, entsanga šmochjáuyana Jerusalenentše, nýets Judea luariňe, Samarioca y quem luarentša nýets luarěnguenáchnaca ca.

⁹ Chë soyěnga tojánayanentsana y chabe uatsjěndayěnga imojtsonýaye ora, Běngbe Bětsá, Jesúsbioye tbojtanatsbaná y canýe jantšetěshe chábioye ibojútsbotse y ndoňe más tmonjanobená cha jinýama. ¹⁰ Jesús celoye yojtsetsjuama chěnga bėn imojtserreparáněntscuana, nýe ndeolpe, uta boyabásata uafjantse entsayaca bopornánata chěngbe juachaca tbojabántsaye, ¹¹ y chěngbioye tojaněyana: “Galileoca entsanga, ģndáyeca celoye šmojtsantješana? Jesús, chë tsěngaftangaftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjěsabo ca.”

Júdasbe cuenta Matías tmojanábuayana

¹² Jesusbe ichmóněnga chë Olivos tjashocana Jerusalenoye tmojtaná. Chë tjocana Jerusalenóntscofina bécoňe inamna, ndayěntscoca canýe ochnayté jama yojanlesenciana nýetsá. ¹³ Jerusalenoye tmojtanashjajna orna, chë yebnentša tsbanánoca tsoye tmojtanásěngö. Chentše yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiniá, Simón chë Celote ca uabobainá, y Judas, chë Santiagbe uaquiniá. ¹⁴ Chěnga sempre imojanamana jtnefnjana Běngbe Bětsáftaca jencuěntama básefta shembásengaftaca, María Jesusbe mamá y Jesusbe catšátangaftaca.

15 Chë tempo tmojánenefna canye patse y uta bnëtsana Jesucristbeñe ošbuáchiyënga, y canye, Pedro tojantsá y tojanéyana: 16 “Jesucristbeyeca atšbe catšátanga, endánëyta ntšamo Bëngbe Bëtsabe uabemana palabrënguñie iuabemancá chaochnënguama, y tempo, David chë Uámana Espiritbeyeca chiñe tojanábema ntšamo Júdašeftaca yochjanopásama; chcasna, Judas uayayënga tojanëntse Jesús chamuishachama. 17 Júdasna chëngbe enutá enjamna y Jesús chábioynaca tbonjanábuayana bëngcá chabe trabajuñie jtsoservënana. 18 Tsëngaftanga šmondëtatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtšanótsatše y chabe bestšaše tsëntsaca tbojtsanashëtšena y chabe uafsbentšana nyëtsca chabe chunchullëjuangá tojtšanáshana. 19 Jerusalemntše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. 20 Salmos librëšañe, Jesucristo uayayëngbe cucuatšifne boshjuanabiamna mëntšá enduábemana:

Chabe yebna énañe chaotsemna

y ndocná chentše chaondësiyena ca.

Y mëntšánaca endayana:

Chabe cuenta inya chabe trabajo chaoma ca.

21 “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, 22 Juan Jesúsbioye tbonjanabaye orscana y Bëngbe Bëtsá Jesúsbioye bëngbentšana celoye tbon-tanatsbanantscuana. Y mora šontsamna canya mënguentsá juabuáyanama, Jesús tojtanayenama entšangbioye bëngaftaca jábuayenama ca.”

23 As chora útata tmojanabocacá: José, nda Barsabás ca imojanábobuatma y inyënga Justo ca; y chentšana Matías. 24 Chora Bëngbe Bëtsáftaca mëntšá tmojanencuentá: “Bëngbe Utabná, aca nyëtschangbe ainana icuabuatum; chcasna, šminyanýe nda quem útatentšana cochjuábuayanana, 25 canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

26 Y nda chë ichmoná yochtsemnama jtsotatšëmbuamna tsbanánye tmojanëtsena y Matías tbojanobuache; as cach orscana, Jesucristbeñe ošbuáchiyënga chabiamna imojanjuabná mo canye Jesusbe ustonacá, cachcá ntšamo chë bnëtsana canye uatsjëndayëngbiama chënga imojanjuabnacá.

2

Chë Uámana Espiritu ošbuachiyëngbeñe tojánamashëngo

1 Pentecostés ca uabaina fiesta tojanobuache ora, chë jaja sananga tmojanobuáttanama fiesta te, Jesucristbeñe ošbuachiyënga nyëtscanga cánýifne canye luarentše imojtsemna. 2 Ndeolpe, celocana mo canye jabuache binýiécá yojtsaishauenana y chca, tša jabuache shauenanana tojanóshjango nyëts yebnentše, chënga imojtsetbiámanentše. 3 Y chora bichtajënga mo inëshcá yojónýna y canýányabeñe yojojátaye. 4 Chca chë Uámana Espiritu tojánamashëngo chëngbe ainaniñe jtsemándayama; chora nyëtscanga tmojanontšë inyëtsá biyangana, chënga tempo ndmabiyañe, ntšamo chë Uámana Espiritu yojtsamcá chënga inyëtsá chamotsebiyama.

5 Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyëts luarëngocana áshjajnënga; chënga tmojánabo

Bëngbe Bëtsá jëtschuayama. ⁶ Entšanga chë shauenanana tmojanuena ora, tmojanóoto y ndoñe imontsetátšëmbo ntšamo jtsejuabnayana ndayá yojtsopasánama, er chë inye luarocana áshjajnënga imojtsuenana chë Jesucristbeñe ošbuáchiyënga inyëtsá biyangana jtsóyebuambnayana, ntšamo cada ona chënga imoianbiyacá. ⁷ Chë soyëngama entšanga puerte imojenjaná y mëntsá imojtsenatsësnaye: “Chë chca montsóyebuambnanga Galileoquënga mondmëna. ⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? ⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, ¹⁰ Frigioquënga, Panfilia, Egipto y Libia, chë Cirene béconana luaroquënga. Báseftangna Romoquënga montsemna; ¹¹ chëngbeñe nderado judiënga camuentše onyánënga, pero inyëngna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inyëngna Cretocana y Arabiocánëngnaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

¹² Chë causa nyëtscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye yojtsayana ca?”

¹³ Pero inyëngna, chë soyëngama chëngbiyoye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴ Chentšana, Pedro tojantšá chë inye bnëtsana canye ichmónëngaftaca y jabuache tojanontšë chë entšanga jáuyanana, mëntsá: “Atšbe entšanga judiënga y nyëtscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama. ¹⁵ Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátšëmëna; cabá cachëse, base mošenana ora ctsomñe. ¹⁶ Pero ntšamo entsopasánamna, Bëngbe Bëtsabe juabna oyebuambnayá Joel mëntsá tojanábema:

¹⁷ Bëngbe Bëtsá mëntsá tojánayana: ‘Quem luare jopochócama te chaojtsobeco ora, chë soyënga echanjochnëngo.

Atše chanjama, atšbe Espiritu nyëtscangbe ainaniñe cháumashënguama.

Chentšana, tšëngaftangbe uaquiñënga y bemianga atšbe soyëngama entšanga mochantsëtsësnaye;

tšëngaftangbe bobontsëngna, atše chanjama soyënga mochantsonyaye mo otjenayoquëcá;

y tšëngaftangbe bëtsëjëmëngna atšbe soyënga mochantsotjënaye.

¹⁸ Chca ora, atše chanjama nyëtsca atšbe oservënëngbiana, boyabásenga y shembásenga,

chëngbe ainaniñe atšbe Espiritu cháumashënguama,

as chënga atšbe soyëngama entšanga mochantsëtsësnaye.

¹⁹ Atše chanjama bëts soyënga celoca;

y quem luariñe echántsemna buiñe, íñeshe y ngona mo jantšetëshcá, atšbe obenana jinýanýiyama.

²⁰ Cabá chë puerte uámana te, chë Bëngbe Utabná bëts soyënga jamama ndobuache ora,

shinye ndoñe queochátšbuashinýinýana

y juashcona buánganëtema mo buiñcá echántsemna.

21 Y as, ndánaca Bèngbe Utabná tbojtsotsëmbuaná, cha bochanjatsbocá. Chca Joel tempo tojanábema ca” —Pedro tojánayana.

22 Chora Pedro tojatanëyana: “Israeloquënga, šmochjouena ntšamo cbochanjauyancá: Bèngbe Bëtsá ndegombre tcmonjaninÿanÿé, Jesúsbioye chabe trabajo biamnayá cha tbojánbemama. Chë soye Bèngbe Bëtsá tcmonjaninÿanÿé, Jesús chë Nazaretocáftaca cha tojanma bëts soyëngaca y ójnanana soyëngaca, Bèngbe Bëtsabe obenaca jinÿanÿiyama. Cach tsëngaftanga chë soyëngama šmondëtatšëmbo, Bèngbe Bëtsabe obenánaca chë soyënga tsëngaftangbeñe Jesús tonjánmayeca. 23 Ndegombre tsëngaftangbe cucu-atšinë Jesús tmonjánboshjona, pero cabá ndëboshjona ora, Bèngbe Bëtsá tojanjuabó ntšamo jopásana yojamnama; y ntšamo tsëngaftanga cháftaca šmochjanmámncaca cha inatátšëmbo. Tsëngaftangna Jesús šmonjanishache y šmonjanma cha chamóbama y chamocrucificama, bacna entsangbe cucu-atšinë. 24 Pero Bèngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

25 Chora Pedro tojatanëyana: “Rey David tempo Jesusbiamma mëntšá tojëftsanabema, ntšamo cha Bèngbe Bëtsábioye tbojanianama:

Atšbe Utabná, aca sempre átseftaca condbëtsemna, y sempre átseftaca condboquedá atše juajabuáchama, chíyeca ndocná queochatobenaye atše jauátjanama.

26 Chíyeca atše corente oyejuayá sëntsemna, y atšbe uayásaca cbontsatschuaná.

Atše masque chanjóbana, tšabá sëndëtatšëmbo aca atšbe Bëtsá, atše chaitayenama cochjamama.

27 Aca, Bèngbe Bëtsá, obanëngbe luarentše ndoñe quešcochátšboshjona, y ndoñe queochatsleséncia acbe uámana oservenabe cuerpo chaotsopochocama.

28 Aca chë tšabe benache šconjaninÿinÿé, ntšamo tšabe vida jtsebonnama. Aca átseftaca condbëtsemnama, atše puerte oyejuayá sëntsemna ca —David tojëftsanabema ca.”

29 Chentšana Pedro tojatanëyana: “Baconga y batanga, šontsemna ndegombre tsëngaftanga jábuayenana tšabá chacmésertama. Bèngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana. 30 Cach David canÿe Bèngbe Bëtsabe juabna oyebuambnayá inamna. Cha tšabá inatátšëmbo Bèngbe Bëtsá bëtsá tbojanshuáchenama, Davidbe entsanguentšana canÿa, Cristo, cach Davidcá rey jabemama. 31 David inatátšëmbo chë Uámana Uabuayaná, chë Cristo, cháuatayenama Bèngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bèngbe Bëtsá ndoñe ntjalesénciana chabe cuerpo chaotsopochocama ca.

32 Bèngbe Bëtsá tojama Jesús cháuatayenama y bënga cha fsënjinÿe. Chíyeca bënga fsëntsetatšëmbo chca ndegombre bëtsemnama. 33 Bèngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y Bèngbe Bëtsá chë Uámana Espiritu Jesúsbioye tbojanëntšabuaché ntšamo chë Taitá tbojanshuachenacá. Ntšamo tsëngaftanga šmontsonÿá y šmontsuenancá entsemna, Jesucrístoftaca chë Uámana Espiritu bëngbe ainaniñe cháuamashënguama Bèngbe Bëtsá tojámayeca. 34 David ndoñe Jesuscá celoye tonjána, pero mëntšá tojëftsanábema:

Bëngbe Bëtsá atšbe Utabná Crístbioye tbonjaníyana:

‘Atšbe catšbioica cochtsetbemana,

³⁵ acbe uayayënga acbe cucuatšíñe chamoquedama atšbe obenánaca chamèntscuana ca.’ ”

³⁶ Chora Pedro tojatanéyana: “Tšëngaftanga nýets Israeloquënga šmochtsetátšëmbo, atše ndegombre cach Jesusbíama sentsóyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

³⁷ Chë soyënga tmojanuena ora, entsanga cochtsetšénánënga imojtsemna, y Pedro y chë inýe ichmónëngbioye tmojanéyana: —Baconga, ¿ndayá mora jamama šojtsamna ca?

³⁸ As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábëñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháumashënguama.

³⁹ Bëngbe Bëtsá chë soyënga tcmonjanašebuachená tšëngaftangbíama, tšëngaftangbe básëngbíama y nýets chë bën luarënguenache imomna entsangbíama, nýetscanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inýe palabrëngnaca Pedro tojatanéyana y bëtscá tojanabuayená mëntsá: “¡Bëngbe Bëtsá chë Israeloca bacna entsanga echanjácastigaye. Chašmótsbocamna, chëngbentsana šmochtsojuánañe ca!”

⁴¹ Ba entsanga imojtsanošbuaché ntšamo Pedro tojanéyanama y tmojanenabaye. Cach te mo unga uaranga entsanga nýetsá tmojanoboté, Jesucristbeñe ošbuachiyënga jtsemnama. ⁴² Chënga corente imojtseboše jtsamama chë Jesusbe ichmónënga imojtsabatambá soyënga. Tšabá yojtsacochebiona nýetscanga cánýiñe jtsemnama y imojanamana mo chë Jesucristbeñe ošbuachiyëngcá cánýiñe jtsesayana y cánýiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuachiyënga vida innabomna

⁴³ Nýetscanga imojtsenjanayeye, chë ichmónënga bëts soyënga y inýe soyënga chabe obenana jinýanjíyama chamomama Bëngbe Bëtsá tojánmayeca.

⁴⁴ Nýetsca chë Jesucristbeñe ošbuachiyënga sempre cánýiñe mo canýacá imojtsemna y nýetsca chëngbe bomna soyënga nýetscangbíama yojtsemna. ⁴⁵ Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë inýenga tojtsëjbotcá. ⁴⁶ Cada te imojanamana Bëngbe Bëtsabe bëts yebnentšë jnefñana cha jëtschuayama, y yebnënguenache cánýiñe imojtsesaye oyejuayënga y ndoñe ojëndayënga.

⁴⁷ Chënga imojanamana Bëngbe Bëtsá jtsatschuanayana, y nýetsca entsanga imojtsejuabnaye chë Jesucristbeñe ošbuachiyëngbíama tšabe entsanga imojamna ca. Y cada te Bëngbe Bëtsá yojtsama más ošbuachiyënga chamóbotema, chë ndëmuanýënga cha yojtsatsebacyënga.

3

1 Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuéntayana. 2 Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entšanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnéjuaenga lemošna chaótejañama. 3 Pedro y Juan Bëngbe Bëtsabe bëts yebnoye jamashënguama chë cosheto tojánanye ora, canye lemošna chátbioye yojótejañe. 4 Chatna chë šocá imojtsonýaye, y Pedro tbojaniana: “Scochtsénýaye ca.”

5 As cha yojtsénýaye y yojtsejuabnaye ndayá chjójyëngacñe ca. 6 Chora Pedro tbojaniana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbéyana chabe mándoca, matëtsbaná y cochtsana ca.”

7 Pedro chca tbojaniana ora, tbojanábuacueshache catšbióicatše y tbojtantsbaná, y cachora chë cosheto shecuatšiñe y shëmiabeñe añemo yojtsatsbomna. 8 As chë cosheto, canye jontsënjëse tšabá tojtantsá y tojanontsé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsënjnaye y Bëngbe Bëtsá ibojtsatschuanaye, tbojanshnama. 9 Chë Bëngbe Bëtsabe bëts yebnentše imojétsemnënga nýetscanga cha tmojáninýe tšabá jtsanana y Bëngbe Bëtsá jtsatschuanayana. 10 Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuantše jótbemana, entšanga lemošna jotejañama. Cha tšabá yojtsatsmënamna entšanga ojnanánënga imojtsemna.

Ntšamo Pedro tojanoyebuambá Salomonbe Amashjuana ca uabáinëntše

11 Chë cosheto ya shnaná ora, ndoñe yontseboše Juan y Pédrëbentšana joluárana. As, nýetsca entšanga ojnanánënga tmojanójtjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. 12 Pedro chë entšanga tojánanye ora, tojanéyana: “Taitanga y mamanga, Israeloquënga, ¿ndáyeca chë soyëngama ojnanánënga šmojtsemna? ¿Ndáyeca nýe šcojtsëbuáutja? ¿šmojtsejuabná nýe bëndatbe obenánaca quem boyabása tífjashná ca? ¿o šmojtsejuabná quem boyabása tífjashná bëndata Bëngbe Bëtsá puerte tšabá ftsadoránayeca? 13 Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšiñe šmonjáboshjona chamóbama. Pilato enjëtseboše Jesús jëtsboshjona, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbojtantboshjona. 14 Jesús uamaná y nýetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjona. 15 Y chca, chë ndegombre tšabe vida chašmotsebonnama amábioye tšëngaftanga šmonjanóba. Pero Bëngbe Bëtsá tojanma cha cháuatayama y bënga chë soye fsënjáninýe y chama fsëndétatšëmbo. 16 Jesús puerte obená endmënyeca, quem cosheto añémoca entsatsmëna. Ntšamo šmonjinýe y šmonjatatšëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

17 “Taitanga y mamanga, atse sëndétatšëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatšëmbcá. 18 Tempo, Bëngbe Bëtsá chë chabe juabna oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngmënana yochtsanbomnana. Morna, ntšamo Bëngbe Bëtsá tojanayancá ya tonjochnëgo. 19 Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, 20 y tšëngaftangbiöye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. 21 Canye te echanjóshjango, Bëngbe Bëtsá lempe tsmëmacá jëtsbemama. Chë tentscuana Jesús bontsemna celoca joquédana. Chca echanjochnëgo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá. 22 Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atse sëndmëncá, cmochanjayentšíchmuá. Cha tšëngaftangbentšana echanjábocna y tšëngaftanga cmontsamna ntšamo chacmojtsëtsëtsnacá cha jtseyeanana. 23 Ndánaca chábiöye ndoñe chabonjoeyuná, cha bontsemna chë Bëngbe Bëtsabe entšangbentšana luaroca jtsemnana y chamotsepochochama ca’ —cha tojánayana.

24 “Y nyetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonyácá. 25 Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitangaftaca canye trato tojánbema; chë soyënga cabá tšëngaftangbiama entsemna. Bëngbe Bëtsá Abrahámbiöye mëntšá tbojanianana: ‘Chë ácbentšana entšangbeyeca tšabe bendicionënga chanjama nyetsca quem luarentša entšangbiama ca.’ 26 Bëngbe Bëtsá tojama chabe oservená cháuatayenama y natsana tšëngaftangbiöye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnana ca” —Pedro tojánayana.

4

Pedro y Juan Jerusalenentša mandadëngbe delante

1 Pedro y Juan cabá entšanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. 2 Chatna entšangbiöye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna. 3 As, Pedro y Juan tmojánishëche y ya jetiñe yojsemna causa, cárceloje tojanëtame yëfsanëntscuana. 4 Masque chca, banga entšanguentšana, ntšamo Pedro y Juan tbojanayancá tmojanuerënga, añe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nye boyabásenga jacuéntase.

5 Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna.

6 Chéntšnaca imojtsemna, chë bachnangbe más uámana amëndayá Anás

ca uabainá, Caifás, Juan, Alejandro y chë bachnangbe más uámana amëndayëngbe nyetsca pamíllangnaca. ⁷ Chora chënga tmojanmandá Pedro y Juan junatsama, y chëngbe tsëntsaca tojanatsá y mëntsá tmojanatjá: —¿Ndabe obenánaca chë soyënga sojtsama, o, nda derecho tcmënjatšatá chë soyënga chašotsamama ca?

⁸ As Pedro, chë Uámana Espíritu chabe ainaniñe corente jtsemándayëse, mëntsá tojanëjua: —Israeloca mándayënga y bëtsëjëmënga, ⁹ mënté sconjatjá chë jama ndobenáftaca tsabe soye tifjamama y ntšamo cha mora jama yojtsatobenama. ¹⁰ Chcasna, ntšamo tojopasama cbochanjabuayená, chca, tsëngaftanga y nyetsca Israeloca entsanga chë soyënga chašmotsetatšëmbuama. Quem boyabása, chë tsëngaftangbe tsëntsaca entsemná, Jesucristo chë Nazaretocabe bëts obenánaca chca tsabá entsatsmëna. Y Jesús endmëna nda tsëngaftanga šmonjancrucificá y ndabiana Bëngbe Bëtsá tojanma cháuatayenama. ¹¹ Jesusbiana Bëngbe Bëtsabe uabemana palabrenguifne mëntsá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tsëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna. ¹² Nyë cha yobena tsëngaftanga játsebacama. Bëngbe Bëtsá ndocna inyë entsábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nyë Jesucristbe obenánaca aifne ca —Pedro tojánayana.

¹³ Chënga imojenjnaná Pedro y Juan tša añémoca ibojtsóyebuambnama tmojáninye ora, y chata tempo nduatsjínjenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca bayté ibojamnama. ¹⁴ Y entsanga imojtsonyaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵ As chora tmojanamëndá chentsana chábuaisebocnama y chentše tmojanoque dangna chë soyama imojtsentšënyaye. ¹⁶ Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetatšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷ Pero entsanga chama ndoñe más chamondëtsencuëntamna, chata mochjáuyana: ‘Ndoñe más entsángbeñe Jesús šmatšëbáyana; y ndoñe chašmonjouenëse, jabuache castigo šochántse bomna ca.’”

¹⁸ As chë mándayënga cachiñe chata tmojánachembo y tmojanamëndá ndoñe más Jesús jtšëbáyanana, ni chabiana entsángbeñe jtsabuátambayana. ¹⁹ Pero Pedro y Juan tbojánayana: “¿Ntšamo tsëngaftanga šmatjayana ntšamo fchanjayanama ca? Ndegombre, Bëngbe Bëtsabe bominyiñe ndoñe tsabá quenátsmëna tsëngaftangbioye aifne joyaunayana y chábioye ndoñe. ²⁰ Er bënga queftsátobena jtsajbanana oyebuambnayana chë tifjinye y tifjouena soyëngama ca.”

²¹ Chë mandayëngna chátbioye tojtsanautatjá, pero chentsana tmojtanabáshejuana. Nyetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinjenana ntšamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojanimpadá más añemo chau-atšatama

²³ Pedro y Juan ya tmojtanabáshejuana ora, tbojánata chë inyë ošbuáchiyëngaftaca jateninyenama y lempe ntšamo chë bachnangbe amëndayënga y bëtsëjemëngcá mándayënga chatbioye tmojanëyancá, chëngbioye tmojanacuntá. ²⁴ Chënga chca tmojanuentsšana, nyëtscanga canyëñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nyëtsca béjayënga y lempe ntšamo chenache yomncá, ²⁵ chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entšanga yapa imojtsetšátjaye ca?

¿Ndáyeca imojtsejuabná nyë bonamentiama soyënga jamana?

²⁶ Quem luarentša reyënga y amëndayënga imoprontánënga, nyëtscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. ²⁸ Tempo, Bëngbe Bëtsá, acbe obenánaca y ntšamo icnaboščá tcojanmandá ntšamo mora chaotsemnama, y chënga chca Jesúseftaca tmonjama. ²⁹ Morna Bëngbe Bëtsá, mouena ntšamo chënga montsichamo, bënga jasúfriama cašojsamna ca; chcasna, cochjama bënga fchayobená Jesusbe tšabe noticiënga bëts añémoca entšangbeñe jtsóyebuambnayama, ³⁰ y cochjama acbe obenánaca šoquënga tšabá chamot-satsmënama y cochjama bënga fchayobená bëts soyënga jamama, Jesús chë uámana oservenabe obenánaca y cha jótšëmbonëse ca” —chënga tmojánayana.

³¹ Bëngbe Bëtsáftaca jencuëntama tmojanpochocá orna, chë tmojánenefjntše tojanangmëmana; y nyëtscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entšanga jábuayenama.

Nyëtsca bomna soyënga nyëtscangbiama yojtsemna

³² Jesucristbeñe ošbuáchiyënga, nyëtscanga canyë juabna imojtsebojna y ainaniñe cach canyë ebionana. Ndocná ntjatichamuana chabe soyënga nyë chabiana yojtsemna ca, pero aiñe imojtsichamo, “atše sëndbomna soyënga nyëtscangbiama entsemna ca”. ³³ Chë Jesusbe ichmónëngna puerte obenánaca mëntšá imojtsichamo: “Fsëñjinñe y fsëntsetatšëmbo Bëngbe Utabná Jesús obanënguentšana tojtayenama ca.” Y Bëngbe Bëtsá yojtsama chë ichmónënga bëtscá tšabe bendicionënga chamotsebojna. ³⁴ Jesucristbeñe ošbuachiyëngbeñe ndocná yonjamna ndayánaca uajabotá, er nyëtscanga fshantse o yebna bomnënga imojanamana jtsatobuiyana, y chë crocénana ³⁵ chë ichmónëngbioye jayentšbuáchiyana, ntšamo tojtsëjabotcá nyëtscanga jujátayama. ³⁶ Chca tojanma canyë Bëngbe Bëtsabe bëts yebnoca trabajayá, José ca uabainá; cha chë ichmónënga imojanáobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷ Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiama chaoservema.

5

Ntšamo Ananías y Safiraftaca tojanopasá

¹ Inamna canýe bacó, Ananías ca uabainá, y chabe shemna, Safira ca. Chatna canýe fshantse tbojániye. ² Ananías y Safirna tbojanenóyeunata; chcasna, batsá crocénana cachatbiama tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyets crocénana ntsachetšá chë fshantsama tbojanosháchiñe ca. ³ As Pedro tbojaniana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uamana Espiritu chë crocenánama jabuambayama ca? Acna chë fshantsama tcojtabuená crocenánentšana cach acbiama batsá tcontábojama. ⁴ Cabá ntsatobuiye ora, chë fshantse ácbeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocenánama chca jobostérama? Chca jamëse, ndoñe nye entšangbioye quecatabuambná, sinó Bëngbe Bëtsánaca ca” —Pedro tbojaniana.

⁵ Ananías chë palabrenga tojanuena ora, obaná tojánshajaye. Y nyetscanga chama tmojántatšëmbonënga corente imojtsauatja. ⁶ Chentšana, básefta bobontšënga tmojánshajajna y Ananíasbe cuerpo entšëjuaca tmojanandmaná y jauátbontsama tmojanamba.

⁷ Mo unga horëntscose, Ananíasbe shema Safira tojánshajango, pero ndoñe yontsetátšëmbo ntšamo chabe boyáftaca tojanopasama. ⁸ Chora Pedro tbojantjá: —Ndegombre šmëyana, ¿chë šmonjayana nyetšnama chë fshantse šmojiye ca?

As chë shema tbojanjuá: —Aíñe, nyetšnama fsënjiye ca.

⁹ Pedro tbojaniana: —¿Ndáyeca tsëndata šojenoyeuná Bëngbe Utabnabe Espiritu jabuambayama, y cabá castigo jtsebomnana ndoñe šontsobatmana ca? Acbe boyá jauátbontsama tmonjuambënga muentše bëshoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatšentše obaná tojánshajaye. Chë bobontšënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontšá. ¹¹ Y nyetsca Jesucristbeñe ošbuáchiyënga chentše imojtsemnënga y nyetscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinýanýiyama

¹² Chë Jesucristbe ichmónëngaftaca ba bëts soyënga entšangbeñe yojtsebinýna Bëngbe Bëtsabe obenana jinýanýiyama; y nyetsca Jesucristbeñe ošbuáchiyënga imoanamana Bëngbe Bëtsabe bëts yebnoca jénefnana, Salomonbe Amashjuana otsbojebnentše. ¹³ Chë ínýenga, chë Jesucristbeñe ndošbuáchiyëngna, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiama tsabá imojtsencuëntaye. ¹⁴ Bëngbe Utabnábeñe ošbuáchiyënga más imojtsóbotena, bëtscá boyabásenga y shembásëngnaca. ¹⁵ Tša bëts soyënga chë ichmónëngaftaca yojtsebinýna; chíyeca entšanga imoanamana jutsnëshangañe y tjuashënguñe tsáshenoye šoquënga jubuacnana, chca, Pedro chëjana tojtsachnějuana ora, nye mo chabe sóbrëñaca chëngbe cuerpëjana chaochnënguama, shnánënga jtsatsmënama. ¹⁶ Jerusalén chábuañe públënguentsana ba entšanga imoanamana jabana,

y šoquënga y bacna bayëjbe juabna uambayënga imojtsëyabó; y nyëtscanga shnánënga imojtsatsmäna.

Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama

¹⁷ Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerte envidia imojtsebomna. ¹⁸ As chë ichmónëngbiöye tmojánishëche y chë bëts pueblentša cárceloye tojtsanëtame. ¹⁹ Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanëbuacna y mëntšá tojanëyana: ²⁰ “Motsajna, Bëngbe Bëtsabe bëts yebnentše šmochjámashjna, y entšanga šmochjabuayená ntšamo cuanjama chë nyëtsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëse ca.” ²¹ Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entšanga jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatsama. ²² Pero chë soldadënga chë utámenoye tmojánashajna ora, chënga chentše ndoñe tmonjánanÿena. Chcasna, chënga tmojtaná chë mándayënga chca jaúnayama. ²³ Y tmojánayana: “Chë utámenoca fsënjinÿena lempe tšabá endëtsëtámeñe y soldadëngna nyëtsca bëšašangá monduabojanÿanga; pero fsënjatëfjo y tsoye fsënjámashjna orna nodná chibiátinÿena ca.”

²⁴ Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsëtëmmana y imojtsentjanaye ndayá chentšana yochjanopásama. ²⁵ Chorna, chënga imojtsemnentše canÿe boyabása tojánashjango y mëntšá tojanëyana: “Chë šmojutámiënga mora Bëngbe Bëtsabe bëts yebnoca montsemna, entšanga montsabuatambá ca.”

²⁶ Chë soldadëngbe amëndayá tojána soldadëngaca, chë Jesusbe ichmónënga junatsama; pero nÿe tšabá tmojanënatse, er chënga entšangbiana imojtsauatja, nderado cachëngbiöye ndëtsbéngaca muantsëbaye. ²⁷ Chëngbioca tmojanëshejajna ora, mandayëngbiöye tmojanënatse; chora chë bachnangbe más uámana amëndayá mëntšá tojanëyana: ²⁸ —Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambama soyëngama ca. Masque chcasna, mora tšëngaftanga nyëtsca chë Jerusalenentša oyenënga chabe soyëngama šmojtsabuatambá y šmojtseboše, cha tojanóbanama castigo bëngbeñe chaotsemnama ca.

²⁹ Chorna, Pedro y chë inÿe ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entšangbiöye. ³⁰ Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšëngaftanga šmonjanóba canÿe cruciñe juajabonjëse. ³¹ Bëngbe Bëtsá tbontatsbaná y chabe catsbioica tbojëtstbema, jtsamëndayama, y tbojábema entšangbe Unachayá y Atsebacayá, chca, Israeloca entšanga ngmënacna chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama. ³² Bënga fsëntsichamo ndayá bënga ndegombre tifjinÿe Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye.

Bëngbe Bëtsá endbëtsama chë Uámana Espíritu cháumashëngo chë tmojtseye-unanëngbe ainaniñe jtsemándayama ca —chënga tmojánayana.

³³ Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsëbáyama. ³⁴ Pero chë mándayënguentšë yojtsemna canye fariseo, Gamaliel ca uabainá. Chana canye ley abuatambayá inamna y entšanga puerte imnarrespeta. As cha tojantá y tojanmandá chë ichmónënga ratotema chentšana jubuacnama. ³⁵ Chentšana chë inye mándayënga tojanëyana: “Israeloca taitanga, puerte cuedado šmochtsebomna ntšamo quem boyabásengaftaca šmochjamama. ³⁶ Quem soyama šmochjenójuaboye: Ndoñe bayté quenátsmëna, Teudas tonjánbocna y cha enjánichamo canye uámana entšá canjamna ca, y mo canta patse entšanga cha tmojanasto. Pero chora ínÿenga cha tmontsanóba y chabe ústonënga tmontsanáshana, y chca lempe tonsanopochocá. ³⁷ Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca ínÿenga tmontsanóba y nyetsca chabe ústonënga tmontsanáshana. ³⁸ Chíyeca atše cbëyana, quem boyabásenga matabáshejuana y ndocá mataborlánana. Ntšamo chënga montsamancá, nÿe entšangbe juabna y nÿe chëngbe trabajo tojtsemnëse, betscó echanjopochóca. ³⁹ Pero chca Bëngbe Bëtsabe soye tomnëse, tšëngaftanga ndoñe quešmochatobenaye jáyëñjanama. Cuedado šmochtsebomna, nderado mo Bëngbe Bëtsabe uayayënga šmuatjanenobiama ca” —cha tojanëyana.

Y as chënga Gamaliel tmojanoyeuná. ⁴⁰ Chcasna, chë ichmónëngbiöye tmojánachembo, tmojtšanachebuánganja y tmojanëyana Jesusbe uabáinaca entšángbeñe ndoñe chamondëtsoyebuambná ca; y chentšana tmojtšanabáshejuana. ⁴¹ Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiana oservénënga bëtsemnayeca. ⁴² Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšángbiöye imojanabuayiyiná, Bëngbe Bëtsabe bëtš yebnentšë y yebnënguenáchnaca.

6

Chë ichmónëngbiana ujabuáchanënga tmojanëbuáyana

¹ Chë tempo, Jesucristbeñe ošbuáchiyënga betscó imojtsóbotena. Chora chë Jesucristbeñe ošbuáchiyëngbentšë, chë judiënga griego biyanga batšá imojtsetšátjaye y chë judiënga hebreo biyangbiana mëntšá tmojánayana: “Chë griego biyangbe viudángbiöye ndoñe cachcá quemnatëjabuáchana ntšamo chë hebreo biyangbe viudángbiöye cada te montséjabuachancá ca.”

² Asna, chë bnëtsana uta ichmónënga nyetsca chë Jesucristbeñe ošbuáchiyënga tmojanëbuaja y tmojanëyana: “Ndoñe tšabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtséjaboto soyënguiñe. ³ Chcasna, baconga y batanga, tšëngaftanguentšana canÿšëftanga mëbuáyana, tšabá mandbomnëngcá smëbuátmënga, chamotsemna osertánënga y chë Uámana Espíritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. ⁴ Y bëngna sontsamna nÿets tempo Bëngbe Bëtsáftaca jtsencuéntayana y Bëngbe Bëtsabe palabra entšanga jtsabuayiyayana ca” —chënga tmojánayana.

⁵ Nýetscanga tojanogusetá ntšamo chë ichmónënga tmojanayancá; as, Esteban tmojanábuayana; canýe boyabása puerte ošbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). ⁶ Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguñe chë ubuáyanënga chaújabuachama, chëngbe cucuatšënga chëngbe bestšašentše jajájuase.

⁷ Más banga Bëngbe Bëtsabe palabra imojtsuenana, y chca, Jesucristbeñe ošbuáchiyënga más imojtsóbotena, y Jerusalenentše más ošbuáchiyënga betscó imojtsóbotena. Y ba judiëngbe bachnángnaca tmojanontsé Jesucristbeñe jtsóbuáchiyana, ntšamo chë inýenga imojtsanošbuachecá.

Esteban tmojánishache

⁸ Esteban, Bëngbe Bëtsabe obenana y chábensana tšabe bendicionënga yojtsebomñese, entsángbeñe bëts soyënga yojtsama. ⁹ Báseftanga “Ya Cachcá Atabashejuana Oservënënga ca” uabainëngna tmojanontsé Estébanoftaca enatsëtsnayana. Chënga imojamna judiënga Cirenoquënga, Alejandrioquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservënëngbe Yebna ca”. ¹⁰ Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntšamo cha jojuana. ¹¹ As chënga báseftanga tmojanëbuénaye Estébanbe contra podescá soye chamuayanama, mëntšá: “Cha fsënjoyeuná Moisesbiamá y Bëngbe Bëtsabiamá ndoñe tšabá jtsóyebuambnayana, mo cuafjoyanguangcá ca.” ¹² Chcase chënga tmojanma entsanga, bëtsëjemëngcá mándayënga y ley abuátambayënga Estébanbe contra chamóntša enbouenanana; y as, Esteban tmojanotbá y chë mándayënga imojtsemnoye imojúichëmo. ¹³ Y tmojanënatse básefta entsanga, uayátsenaye soyënga y podescá soyënga Estébanbe contra chamuayanama; as chënga mëntšá tmojánayana: “Mua bacna soyënga entsichamo chë Bëngbe Bëtsá jtsadoránama bëts yebnama y Moisesbe leyëngama. ¹⁴ Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochóca y caochjama bënga nýe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëtsanabuatambacá ca.”

¹⁵ Chë mándayënga y nýetscanga chentše imojëtsetbiamanënga Esteban tmojanonýinýe ora, tmojáninýe chabe jubiá yojtsebuashinýinýana mo canýe ángelbe jubiacá.

7

Ntšamo Esteban tojanenëuyaná

¹ Chora chë bachnangbe más uámana amëndayá, Estébanbioye tbojantjá: — ¿Ntšamo acbiamá montsichamcá ndegombre yojtsemna ca?

² As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahambioye tbojánëbëbocna, cha Mesopotamioca yojaniyena ora; tbojánëbëbocna, Harán bëts pueblóca joyënanama cabá nda ora, ³ y Bëngbe Bëtsá tbojanianama: “Metseboshjona acbe fshantse y acbe pamillanga y cbochanjinýinýiye luaroye cochjá ca.” ⁴ As Abraham chabe luare Caldea tojëtsanboshjona y tojáná Haránoca joyënanama.

Chabe taitá tojanóbanentsana, Bëngbe Bëtsá Abrahámbioye chë luaroye tbojanánatse, chë mora tsëngaftanga šmontsiyenentse. ⁵ Pero quem luariñe ni mo base fshantse ndoñe tbonjëfťsanatšetá, ni mo ndayentse jtsiyenama. Pero aĩne Abrahámbioye tbojansbuachená chë fshantse jatsetayama, chabiamá y chabe básengbiamá, Abraham tojóbanentsana. Chca tbojansbuachená ora, Abraham ni canye šešona bonjánbomna. ⁶ Y Bëngbe Bëtsá mëntšá tbojaniana: “Chë ácbentsana entsanga, inyëngbe luaroca áshjajnënga mochántsemna, y choca oyenënga chëngbe oservënënga chëngbioye mochanjábiamá y canta patse uatëntscuana jabuache mochanjasufrina ca.” ⁷ Y mëntšánaca tbojaniana: “Pero atse chanjácastigaye chca oservënënga chacmojábiamá luarentsá entsanga; y as, chentsana chë ácbentsana entsanga mochanjésebocana y mora bontsemna luaroye mochanjésabo y muentše atse šmochántadorana ca.” ⁸ Bëngbe Bëtsá Abrahámbioye tbojansbuachená nye cha y chabe básengbe Taitá cha jtsemnama y jamama tsabe bendicionënga chëngbeñe chaotsemnama, y chama, chaotsinyamna tbojanmandá chabe šešona, boyabásetema tojonýná ora, base bobachtema chë más delicadentše jatětsana. Chýeca, chabe uaquiñá Isaac tojanonýná ora, posufta tianoye Abraham base bobachtema chë más delicadentše tbojantěse. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnětsana uta uaquiñëngaftaca. Chënga monjamna chë Israeloca bnětsana uta běts pamíllangbe taitanga.

⁹ “Quem uaquiñënga bëngbe běts taitanga monjamna. Chëngna, chëngbe uabentsá Josébioye envidia innabomna y tmojtsatanobuiye, Egiptoye canye oservenacá chamotsánatseñama. Pero Bëngbe Bëtsá Josébioye nyęts tempo ibnauájabuachana, ¹⁰ chýeca nyętsca chabe ngenmënguentsána tbojanatsbocá y Bëngbe Bëtsá tojanma cha chaotsetatšëmbuama tsábá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyejuá ntšamo José yojamnama; chýeca Faraón Josébioye tbojánbema Egiptoca mandado y chabe yebnënguentsë oyenëngbiámna.

¹¹ “Chë tempo, Egiptó y Canaán luariñe běts shěntsana tojanóshjango y puerte ngmėnana yojtsemna y bëngbe běts taitanga ndoñe imontsobena saná jónýenama. ¹² Pero Jacob tojántatšëmbona Egiptoca saná yojtsemnama; asna, chabe uaquiñënga, chë bëngbe běts taitanga choye tojanichamó. Chora yojamna chë natsanama chënga Egiptoye jama. ¹³ Uta soyama chënga tmojtesaná ora, José chabe catšátanga tojanéyana: ‘Atse José sěndmėna, tsëngaftangbe uabentsá ca.’ Chca chë Faraón Josebe pamíllangbiamá tojántatšëmbona. ¹⁴ Chentsana, José tojanmandá chabe taitá Jacob y nyętsca pamíllanga Egiptoye chamotsama. Canýsęfta bnětsana shachnënga imojanma chë Egiptoye tojánanaga. ¹⁵ Chcasna, Jacob Egiptoye tojáná choca jóyėnanama. Choca cha tojanóbana y chë inye bëngbe běts taitángnaca. ¹⁶ Jacob y chabe básenga, ntšamo imojtsobancá, chëngbe cuerpo Siquem běts puebløye imojtsatambaye y tmojanětebuantsá, Abraham tojěfťsanbuamé cuevėshënguiñe. Abraham canye crocenánama Hamorbe uaquiñëngbioye, chěshënga yojtęyentsbuamiñe Siquem puebloca.

¹⁷ “Ntšamo Bëngbe Bëtsá Abrahámbioye tbojansbuachenacá jamama yojtsobeco ora, Egiptoca corente tmojanoboté Israeloca entsanga y banga chënga imojtsemna. ¹⁸ Cabana, Egiptoca inye rey tojanoyayé y cha Josébioye ndoñe tbojanabuátmana. ¹⁹ Chë reyna, bëngbe entsanga, chë bëngbe běts taitángbioye tojanaingñé y tojanma chënga puerte

chamosufrima; tojanamëndá, chë tmojtsónÿna šešonatémënga cachcá jtsëñÿayana chamotsóbanama. ²⁰ Chë tempo canÿe básetema tojanonÿná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ishinÿëntscuana. ²¹ Cachcá jonÿayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. ²² Chca, chë Egiptoquënga imnatátsëmbo soyënga Moisés tmojanbuatëmbá y canÿe uamana entšá tojánbocna jóyebuambayama y ndayánaca jamama.

²³ “Canta bnëtsana uata tojánashjache ora, tojanenujabó jama jtsetatšëmbuama ntšamo chë Israeloquënga, chabe entšanga imojtsemnama. ²⁴ Canÿe, Moisés tojáninÿe canÿe Egiptocá canÿe Israelocábioye ibojtsejantšetaye ora; as Moisés tbojanoboguiyaná y chë Egiptocábioye tbojtsanóba. ²⁵ Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentšana chëngbioye játsebacama ca. Pero chë Israeloquënga ndoñe yontšësertana. ²⁶ Yëfsana, Moisés tojánanÿena útata, cach Israelocata, ibojtsentsjanaye; chora cha betscó tojána jetsëuyanama y tojanëyana: ‘Tsëndata catšata šondmëna, ¿ndáyeca šojtsentsjanata ca?’ ²⁷ As, chë inÿabioye ibojtsetsjanayá Moisésbioye tbojtsanajuatsëntše y tbojanianya: ‘¿Nda bëngbeñe tcmënjajáyé mandado y chë tšabá o ndoñe tšabá ftsamama chacuyanama ca? ²⁸ ¿Cojtseboše átšnaca jóbama, ntšamo tonjopasá yëfse chë Egiptocábioye tconjobacá ca?’ ²⁹ Moisés chca tojauena ora, Madián luaroye tojtsanachá y choca joyoyena inÿe luarocana ashjanganacá. Chentše uta uaquiñata yojëftsabamna.

³⁰ “Chentšana canta bnëtsana uatëse, entšanga ndoyena luariñe, Sinaí tjañe béconana, canÿe ángel tbojánëbëbocna zarzësha yojtsángbototjuanentše. ³¹ Moisés yojenjnaná ndayá yojtsonÿama y tšabá jinÿama tojanobeconá ora, tojanuena Bëngbe Bëtsá mëntšá ibojtsatsëtsnaye: ³² ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnyaye y añemo ndoñe yontsebmna choye jon-tješiyama. ³³ As Bëngbe Uatná tbojanianya: ‘Motsenóshecbotsca, er aca contsemnentše nÿe atšbiana luare endmëna, er átšnaca hentše sëntsemna. ³⁴ Ndegombre sënjinÿe ntšamo atšbe entšanga Egiptoca montsesufrina y sënjouena chëngbe oyaboyuayana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojanianya.”

³⁵ Chentšana Esteban tojanëyana: “Quem Moisés entšanga tmojtsanaboté y tmojanianya: ‘¿Nda bëngbeñe tcmënjajáyé mandado y chë tšabá o ndoñe tšabá ftsamama chacuyanama ca?’ Masque chca, Bëngbe Bëtsá mo mandayacá y atsebacyacá tbojesanichmó, chë zarzëshentše tojanobinÿná ángeloftaca. ³⁶ As Moisés, bëngbe bëts taitanga Egiptocana tojësänëbuacna y bëts soyënga tojanma, y inÿe soyënga Bëngbe Bëtsabe obenana jinÿanÿiyama Egiptentše, chë Buángana ca uabaina mar bëjayentše y entšanga ndoyena luarentše, canta bnëtsana uatëntscuana. ³⁷ Cach Moisés Israeloca entšanga mëntšá tojanëyana: ‘Bëngbe Bëtsá tšëngaftanguentsana canÿa bochanjábema atšcá Bëngbe Bëtsabe juabna oyebuambayá ca.’ ³⁸ Moisés Israeloca entšangaftaca yojëftsemna chë entšanga ndoyena luaroca. Choca chë entšanga tmojánenefjna Sinaí tjañe béconana. Chentšna canÿe ángel Moisésoftaca tojanoyebuambá, bëngbe bëts taitangbioye chë buayenana soye

Moisés chaóyebuambama, chë entsanga tšabe vida jónyënema palabrenga; y Moisés chca tojanma, bëgnaca chë palabrenga jouenama jobenayama.

³⁹ “Pero bëngbe bëts taitanga ndoñe tmonjánbošena joyeunayama, masna nye tmojtsanaboté y Egiptoje jeshšeconama imojtsaiseboše. ⁴⁰ Moisés cabá chë tja tsjuanoca chë ángeloftaca yojtsemna ora, chëngbe bachnangbe más uámana amëndayá Aarónbioye mëntšá tmojaniana: ‘Bëngbe Bëtsabe cuenta šmayentšpormá canye buashinýinýana soye jadórama, ndëga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjétsëbuacnáftaca ca.’ ⁴¹ As tmojanma canye buashinýinýana soye mo canye uacnabecá y cha jadórama ba bayënga tmojanëbaye, y tmojanóboyejuanga cachënga chë soye tmojanpormáyeca. ⁴² Chë causa, Bëngbe Bëtsá chëngbentšana tojtsanojuánañe y cachcá tojesanëñyaye chëngbe bacna soyënga causa, estrellatémënga chamotsadoránama. Chca jochnënguama, Bëngbe Bëtsabe juabna oyebuambayëngbe librëšañe mëntšá endayana, ntšamo Bëngbe Bëtsá tojanayancá:

Israeloca entsanga,

¿Atše jëtschuayama bayënga chešmëñjanëbaye y chë soyënga chešmëñjanátšëmbona,

chë canta bnëtsana uata entsanga ndoyena luarentše tšëngaftanga šmonjéftsemna ora?

⁴³ Atše jadóra cuentna, chë Molocbiana jebna soye šmonjanacutšá y cha šmonjánadorana,

y chë Refánbe estréllacnaca cachcá šmonjánama.

Chë soyënga mo Bëngbe Bëtsá cuenta šmonjánbomna y cach tšëngaftanga šmonjanobopormá jadórama.

Mora chë causa atše chanjama, Babilonientšana más chcoye tšëngaftanga chacmotsénatsama ca” —chiñe endayana.

⁴⁴ “Bëngbe tempsa bëts taitanga entsanga ndoyena luaroca, chë jatsjacama opodena yebna imnabomna; chë yebnentše Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninýinýecá.

⁴⁵ Bëngbe bëts taitangna chëngbe taitángbentšana chë jatsjacama opodena yebna chëngbiana tmojanóyëngacñe, y chënga chë Canaán luaroye Josuéftaca, chë inye luaroquëngaftaca jéntsama tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentšana tmojtanëbuacna; y chë jebna soyna chë tmojanayëñjaná luarentše tojanoquedá, rey David yojétsiyenëntscuana. ⁴⁶ David tšabá mandbomná inamna, chíyeca Bëngbe Bëtsá cháftaca puerta yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentše chaotsiyenama. ⁴⁷ Pero Salomón inamna nda chë Bëngbe Bëtsabe bëts yebna tojanjebuá. ⁴⁸ Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

⁴⁹ ‘Celoca endmëna chë luare ndayentšana atše tsmánda,

y quem luare endmëna nye mo canye tšenëtemcá ndayentše atšbe shecuatšënga chjacjaye.

As, ¿ntšamo atšbiana jebna yebna šmochjajebo ca?” —chë Utabná jayanana

—; ‘o ¿ndaye yebnentše atše jóchnama chjobenaye,

50 ndegombre cach atše nyetsca chë soyënga tijamëse ca? ”

51 Esteban mëntsánaca tojanëyana: “Tšëngaftanga nyets tempo josértama ndëbošënga šmondmëna; šmondmëna ainana mo chë Bëngbe Bëtsábeñe ndošuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espíritu joyeunayana. Ntšamo tšëngaftangbe bëts taitanga monjanüyencá, tšëngaftángnaca cachá. 52 ¿Bëngbe Bëtsabe juabna oyebuambnyënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entšanga chënga tmojtsanëbaye, y mëngna entšángbioye imojanabuayiyiná Cristo, chë ntšamo Bëngbe Bëtsá yobošcá amá yochjánabama. Pero morna, uayayëngbe cucuatšíñe cha šmojábošhona y šmojóba. 53 Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanëyana.

Esteban ndëtsbéngaca tmojanóba

54 Chentša mándayënga chca tmojanuena ora, Estébanoftaca tmojanotjayaná y tmojanenaftëšbonzentsé, rábiaca imojtsemnana. 55 Pero chë Uámana Espíritu Estébanbe ainaniñe corente yojtsemándaye. Celoye yojontješiyë y Bëngbe Bëtsabe buashinýinýanana yojinýe, y Jesús, Bëngbe Bëtsabe catšbioica yojtsatsana. 56 As, Esteban tojánayana: “¡Mouenënga, sëntsonýá celoca entsatëfña y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

57 Chora chënga jabuache imojtseyoye, imojtsenamatsachto ndoñe más ntsuenanama y Estébanbioye tmojanontšënja. 58 Chentšana, chënga chë pueblentsana tmojtsanábozna y ndëtsbéngaca tmojtsanatëchënganja. Chë Estébanbioye mal tmojanquedangna entšayangá tmojtsanenátsejca y canýe bobontse, Saulo ca uabainá, tmojesanábonýiñe chaotsinýenama.

59 Ndëtsbéngaca imojtsénanantscuana, Esteban Bëngbe Bëtsáftaca ibojtsencuëntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

60 Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

1 Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, ínýenga tmojanontšé Jesucristbeñe ošbuáchiyënga Jerusalenentše ucamenana y jtsamana puerte chamotsesufrínama; chcasna, chënga tmojtsanacheta y Samarioye y Judeoye tmojanáshana. Nýe chë Jesucristbe ichmónënga ndócnoye tmonjánacheta. 2 Básefta boyabásenga, Bëngbe Bëtsá adórayënga, Esteban tmojanamba jauátbontsama y chabiama puerte tmojánenobošachna. 3 Chëntscuana, Saulo yojtsentsëna Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámíama.

Felipe Samaria luaroca tšabe noticiëngama yojanabuayiyiná

4 Y Jesucristbeñe ošbuáchiyënga tmojanáshanëngna nyetsquénache imojánabuayiyenaye Jesusbe tšabe noticiënga. 5 Chca, Felipe Samarioye tojána

y tojanontsé chë Bëngbe Bëtsabe Uámana Uabuayaná, Cristbiamá, chentša entsanga jábuayenama. ⁶ Entsanga imojánenefjuana Felipe joyeunayama y tmojáninýe bëts soyënga cha jtsamana, Bëngbe Bëtsabe obenana jinýanýiyama. Chënga nyetscanga ntšamo Felipe yojtsichamcá tsabá imojtseyeunana. ⁷ Banga bayëjbe juabna uambayënga tsabá imojtsatsmëna y chë bacna bayëjënga jabuache jtsaiyoyëse chëngbentsana imojtsaisebocana; y banga jama ndobenënga y coshetënga tsabá imojtsatsmëna. ⁸ Chë soyama chë pueblentša oyenënga corente imojtsóyejuaye.

⁹ Pero canýe pueblentše Samarioca inamna canýe boyabása, Simón ca uabainá; cha tempo inamna canýe bocjuaná y chë Samarioca entsanga chabe soyëngama imojánenjanaye. Cha yojánichamo cha canýe uámana entsá canjama ca. ¹⁰ Y chábioye corente innayeunana nyetscanga, uámanënga y nduámanëngnaca. Entšanga imojánichamo: “Mua entsemna chë Bëngbe Bëtsabe bëts obenana inýanýnayá ca.”

¹¹ Y ndegombre chënga corente innayeunana, er cha chë bocjuanana soyëngaca bayté chë entsanga ingñénënga y ojnánánënga yojtsabamna. ¹² Pero chë luarentša entsangna, Felipe tmojanoyeuná chë cha yojtsëtsësná tsabe noticiënga Bëngbe Bëtsabe amëndayama y chë Jesucristbiamá tsabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabaye. ¹³ Y cach Simónëngnaca Jesucristbeñe yojtsosbuáchiye y tojanenábaye, y chentšana cada te Felípeftaca cha yojtsanmëna. Cha tojáninýe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴ Chë Jerusalenoca imojtsemna ichmónënga tmojántatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵ Pedro y Juan Samarioye tbojánashjango ora, chentše Jesucristbeñe ošbuáchiyëngbiamá Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama. ¹⁶ Er cabá ni mo cánýabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca. ¹⁷ As Pedro y Juan chëngbe bestšasiñe cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

¹⁸ Simón tojáninýe, chë ichmónënga entsángbeñe cucuatšënga tmojancjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, ¹⁹ y átsnaca chë obenana šmatsetá, y ndábeñnaca cucuatšënga chajajajó ora, chábeñnaca chë Uámana Espíritu cháumashëngo ca.

²⁰ As Pedro tbojaniana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénanaca jobuámiñama yopodena ca tojajuabó causa! ²¹ Ndegombre, aca bëngaftaca ndoñe quecátsmëna, ni bëngbe trabajo acbiamá quenátsmëna, Bëngbe Bëtsabe delante acbe ainaniñe tsabe juabnënga ndoñe quecátšbomna causa. ²² Ngmëngnaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. ²³ Atše sëntsetatšëmbo, acbe ainaniñe tša bacna juabnënga inýëngbiamá yojtsemnana; y bacna soyënga amana jtsajbanama ndoñe quecátobena causa, aca mo canýe ntsacjuanacá contsemna ca —Pedro tbojaniana.

²⁴ As chora Simón tojanéyana: —Bëngbe Utabná atšbiamá šochjaimpáda, ntšamo šmonjauyancá ndoñe chandëpasama ca.

²⁵ Pedro y Juan, ntšamo Bëngbe Utabná Jesucristbiamá tbojaninýcá y ibnatatšëmbcá entšanga imojtsëtsësnaye. Chentšana, Jerusalemoye tbojésanata y tbojánachnëngo ba Samarioca publënguëjana, tšabe noticiënga entšanga abuayiynaye.

Felipe y chë Etiopía luaroca reinabe uajabuachaná

²⁶ Chentšana, Bëngbe Utabnabe canýe ángel Felípbioye tbojanianya: “Moprontá y tsmána luarëngoye motsa, Jerusalementšana Gaza ca uabaina bëts puebloye benachëjana ca.” Chë benachna entšanga ndoyena luarëjana yojanachnëngona. ²⁷ As Felipe yojëftsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canýe reiná inamna y chë boyabásana chabe uajabuachaná y chabe crocénana bojanýá inamna. Chana Jerusalemoye tojánabo Bëngbe Bëtsá jadórama. ²⁸ Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana librëša yojtsaiualíaye.

²⁹ Chora chë Uámána Espíritu Felípbioye tbojanianya: “Mobeconá y chë cochësha juachaca cochtsaye ca.” ³⁰ As Felipe betscó yojobeconá. Chora yojouena chë Etiopía luarocá, Isaíasbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjuá: —¿Ntšamo šochjosërta, ndocná šonjabuayenase ca?

Y Felípbioye tbojanianya: —Diosmanda, atšbe cochëshoye másëngo y atšbe juachaca mabótbema ca.

³² Isaíasbe uabemana librëšañe mëntšá yojtsalíaye:

Cha tmojanánatse mo canýe oveshá jóbama cuafjuanatscá; y chë mo canýe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

³³ Entšanga tmonjanma cha puerte chaosufríma, mo cha canýe nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiamá jacuéntana,

quem luarentša chabe vida tmontsanbojuaná causa ca.

³⁴ Chora chë Etiopía luaroca uajabuachaná Felípbioye tbojanianya: — Diosmanda, šmobuayená, ¿ndabiamá Bëngbe Bëtsabe juabna oyebuambnayá chca yojtsichamo, cachabiamá o inýabiamá ca?

³⁵ As Felipe tojanontsé, chë Isaíasbe librëšañe yojtsayana sóyeca, Jesusbe tšabe noticiënga jábuayenama.

³⁶ Chentša bënëse, canýe béjaye obëjniñe juachañe ibojtsachnëjuana. Chora chë uajabuachaná tojánayana: —Muentše béjaye entsemna. ¿Ndáyeca ndoñe nanjopódia atše muentše uabainá jtsemnana ca? Diosmanda, šmabayé ca.

³⁷ As Felipe tbojanianya: —Jesucristbeñe nyëts acbe ainánaca tcojtsošbuáchese, añe echanjopódia juabáyama ca.

Y chë boyabása tbojanjuá: —Añe, sëntsošbuaché Jesucristo Bëngbe Bëtsabe Uaquíñá yomnama ca.

³⁸ As chë Etiopiacá tojanmandá chë cochësha chauátotonama. Chentšana, nyëts útata chë béjayoye tbojanashëbëbuástjango y Felipe, chë Etiopíoca uajabuachanábioye tbojanabaye.

³⁹ Chë béjayentšana tbojtanbocna ora, chë Uámána Espíritu Felipe ibojsánatseñe y chë uajabuachaná ya ndoñe más Felípbioye ibontsonýaye, pero

corente oyejuayá yojtsatoñe. ⁴⁰ Felipe tojántatsëmbona Azoto bëts puebloca yojtsemnama, y chentsana tojána nyetsca pueblënguenache chë tsabe noticiënga abuyaynaye, Cesarea puebloye jashjanguëntscuana.

9

Ntšamo Saulo Crístbeñe ošbuachiyá tojanóbema (Hch 22.6-16; 26.12-18)

¹ Saulo chëntscuana cabá Bëngbe Utabnábeñe ošbuachiyënga yojanautatjná jtsëbáyama. Chama cha tojána chë bachnangbe más uámana amëndayábioye, ² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninýañé Benache ustoniñe, boyabásenga o shembásenga tojánýenëse, jótabayama y Jerusalenoye junatsama. Y chca jamama tojánbocna. ³ Pero ya Damasco béconana yojtsaye orna, nýe ndeolpe chabe juachañe celocana canýe bëts tcuinýe tojanbuashinýinýena. ⁴ Chora Saulo fshantsoye tojánshajaye y canýe oyebuambnayana tojanuena, mëntsá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayana tbojanjuá: —Atše sëndmëna Jesús y aca condama atšbe entsanga chamotsesufrinama. ⁶ Pero matëtsbaná y Damascoye mamáshëngo; chentše canýa cmochanjabuayená ndayá jamama cmojtsemnama ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nýe chë oyebuambnayana tmojanuena, pero ndocná tmonjáninýe. ⁸ As Saulo fshantsentsana tojtantsbaná y tojtanobuchatëfjona ora, tondaye yontsobena jinýana. Chcasna, chë ínýenga tmojëtsanobuacuetëntsé y chca, Damascoye tmojanánatse. ⁹ Chentše yojëftsemna unga te, jinýama ntobencá, ni ntjascá y tondaye ntjofsiycá.

¹⁰ Damascoca Jesucristbeñe canýe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninýe y Bëngbe Bëtsá tbojaniyana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniyana: —Moprontá y motsa chë “Ndericho tsáshenañe ca” uabáinoye, y Júdasbe yebnentše cochjanotícia canýe boyabásabiam, Saulo ca uabainábiam, Tarso pueblócá; cha mora Bëngbe Bëtsáftaca bentsencuénta. ¹² Saulo ya tonjinýe mo otjenayoquécá, canýe entsá Ananías ca uabainá entsamashjuana y chabe cucuatšënga chabe bestšašinë entsejájua, chca, cha chabuatabínýnama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiam šmonjacuentá; Jerusalenoca tša bacá acbe entsanga imomnënga tojáborye. ¹⁴ Y mora entsebmna mando chë bachnangbe amëndayëngbentsana, muentse aca otšëmbuanënga jótabayama ca.

¹⁵ As Bëngbe Utabná tbojaniyana: —Motsa, er atše cha sënjuábuayana atšbiam chaotrabajama; chaóyebuambama ndoñe judiëngbeñe, reyëngbeñe y Israeloca entsángbeñnaca, y chca, chënga atšbiam chamotatšëmbonama.

¹⁶ Atše cha chanjinýinýiye ntsachetšá ibojtsemna átšbeyeca jasúfriama ca.

¹⁷ As Ananías tojána Saulo yojtsanmëna yebnoye. Tojánamashëngo ora, Saulëbe bestšašinë chabe cucuatšënga tojanajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjan-abó ora cmonjanehëbocná, šonjichmó aca chacmatabínýnama y chë Uámana Espíritu acbe ainaniñe jtsemándayama cháuamashënguama ca.”

¹⁸ Cachora, Saulëbe bominyëntšana mo beonbe bobachëshëngcá tojan-tquëcjana, y chca, ibojtsatabinýna; chora tojantsbaná y tojanenábaye. ¹⁹ Chentšana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entšanga yojanabuayiyná

²⁰ Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnana. ²¹ Chë imojtsuenanënga nyëtscanga imojtsenjanaye y mëntšá imojtsichamo: “Mua entsemna chë Jerusalenoca Jesusbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšinë jabáshejuanama.”

²² Pero Saulo cada ora más añémoca yojtsóyeuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnana. Chiyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentšana tojtsanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatšëmbona. Bnëtë y ibeta, chë bëts pueblentša bëšašanguenache chënga chabiama imojananýá, jtsóbama; ²⁵ pero chë Jesucristbeñe ošbuáchiyënga, ibeta, cha canýe bëts sbarëcuiñe tmojtsanatsuamá, y chë pueblentša shëconana tapiëšëjana tmojtsanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyëtscanga imojtsebiauatja y ndoñe imontsošbuaché Saulo Jesucristbe ustoná yojtsemnana. ²⁷ Chcasna, Bernabé Súlëbioye tojëftsanbetše y chë Jesucristbe ichmónëngbioye tbojanánatse, y tojanacutá Saulo benachiñe Bëngbe Utabnábioye tbojáninýama, ntšamo Bëngbe Utabná tbojanianama y ntšamo cha Damascoca tša añémoca Jesusbiana entšanga tojánabuayenama. ²⁸ As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiana bëts añémoca entšanga yojanabuayiyná y ²⁹ yojanoyebuambná y imojanenatsëtsná chë griego biyá judiëngaftaca; pero chënga imojtsenýeyunana Saulo jtsóbama. ³⁰ Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjëmbana imojtsemna, y nyëtscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enësbioye tbojanshná

³² Pedro yojánabuache n̄yetsca ch̄e Jesucristbeñe ošbuáchiyēngbenache. Y chca, Lida puebloca Bēngbe Bētsabe entšanga jabuachámnaca tojána. ³³ Lida pueblentše can̄ya tbojánin̄yena, Eneas ca uabainá. Cha jama ndobená inamna y posufta uata jutsnēshañe chca inajájona. ³⁴ Pedro tbojaniyana: “Eneas, Jesucristo tmonjashná. Matētsbaná y acbe tjuashe motsejacadá ca.” Y chchora ch̄e jama ndobená tojtantsbaná.

³⁵ N̄yetscanga ch̄e Lida pueblentše y Saronoca oyenēnga ch̄e entšá shnaná tmojánin̄ye. Y as, chēnga bacna soyēnga amana tmojtсанajbaná y cach orscana tmojanontšé Bēngbe Utabnábeñe ošbuáchiyana.

Pedro tojanma Dorcas cháuatayenama

³⁶ Ch̄e tempo, Jope puebloca yojaniyena can̄ye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha n̄yets tempo tšabe soyēnga yojánama y yojanamana ch̄e tojtséjabotēnga jujabuáchana. ³⁷ Pero chora, šocana tbojanshache y tojtсанóbona. Tmojtсанbebé chentšana, can̄ye tsoye tsbanana tsañoca chabe cuerpo tmojtанajajó. ³⁸ Jope inamna Lida béconana, y Lidentše Pedro yojtsemna; y ch̄e Jope pueblentše Jesucristbeñe ošbuáchiyēnga tmojántatšēmbona Pedro choca yojtsemnama. Asna, uta boyabásata tmojanichamá Pedro jauyanama: “Diosmanda, betscó Jope puebløye mabo ca.”

³⁹ As Pedro tojēftsantsbaná y ch̄e uta boyabásaftaca tojána. Choye tmojánashjajna ora, tmojanánatse ch̄e Dórcasbe cuerpo yojtsemnoye, tsbanánoca; chorna, n̄yetsca viudanga šachénaca Pédrēbioye tmojanóbobuashcona y imojtsin̄jinȳnaye ch̄e Dorcas yojuajonaná entšayangá y cmešējuangá, cabá chēngaftaca yojēftsemna ora. ⁴⁰ Pedro tojanmandá n̄yetscanga chentšana chamotsebocanama; chora Pedro yojoshēntsamentšiyē y Bēngbe Bētsáftaca ibojencuentá. Chentšana, Pedro ch̄e obanábioye tbojanon̄jinȳe y tbojaniyana: “Tabita, matētsbaná ca.”

As Dorcas tojtанobuchatēfjona y Pédrēbioye tbojánin̄ye ora, tojanótbema. ⁴¹ Chora Pedro tbojanábuacueshache y tbojtанatsbaná. As Pedro tojánachembo n̄yetsca ch̄e Jesucristbeñe ošbuáchiyēnga, ch̄e viudanga y ch̄e in̄yēnga, y Dorcas ainá tojtанin̄yan̄yé. ⁴² Ch̄e soye n̄yets Jope pueblentše tojanótatšēmbona y banga Bēngbe Utabnábeñe imojtsošbuáchiye. ⁴³ Y Pedro bayté Jope pueblentše tojanoquedá, Simón ch̄e bobáchēshiñe trabajayabe yebnentše.

10

Pedro y Cornelio

¹ Cesarea pueblentše inamna can̄ye boyabása Cornelio ca uabainá; cha inamna ch̄e Italiano ca uabaina soldadēngbe amēndayá. ² Cornelio Bēngbe Bētsábioye ibnarrespetana y n̄yetsca chabe yebnentša oyenēngaftaca Bēngbe Bētsá puerte imojánadorana. Becá crocénana inaquēcjnaye ch̄e judiēnga nd-bonnējémēnga jujabuáchama y sempre Bēngbe Bētsáftaca ibn̄encuentaye.

³ Can̄ye te, mo bēts mošenana ora, cha botamana tojánin̄ye mo otjenayoquécá, mēntšá: Bēngbe Bētsabe can̄ye ángel Cornelio yojtsemnoye yojt-samashjuana y tbojaniyana: —¡Cornelio ca!

⁴ Cornelio ch̄e ángelbioye ibojtson̄yaye y auatjananá tbojaniyana: —Taita, ¿ndayá yojtsemna ca?

Y ch̄e ángel tbojaniyana: —Bēngbe Bētsá condbētseimpadanama y ch̄e ujabótēnga condbētšéjabuachanama, Bēngbe Bētsá ácaftaca entsoyejuá y lempe

cmochanjóyeunaye. ⁵ Chcasna, mora básefta boyabásenga Jope bēts puebloye michamó y Simón, chē Pedro ca monduabobuatmá, moye chamuánatse. ⁶ Cha posada entsebomna inye Simónbentse, chē bobáchēshiñe trabajayabe yebnentse. Chabe yebna mar bėjaye tsachañe endmēna. Cha cmochanjauyana ndayá jamama cmojtsemna ca.

⁷ Chē Cornéliēbioye ibojuatsētsaye ángel tojtsatanoñe ora, Cornelio chabe oservenēnguentšana útata tojánachembo y canye soldádnaca, chabe uajabuachaná, Bēngbe Bētsá adorayá; ⁸ lempe ntšamo yojopasacá chēnga tojanacuntá y chentšana Jope puebloye tojanichamó.

⁹ Yēfsana mo njetsto ora, chēnga benachiñe Jope béconana imojtsajnēntscuana, Pedro yebnentša tsbanánoye tojánášēngo, Bēngbe Bētsáftaca jencuéntama. ¹⁰ Becá tbojánishēntsená y jasama yojtseboše; pero imojtsebopróntantscuana, Pedro mo otjenayoquécá mēntšá tojáninje: ¹¹ Celoca yojtsatēfjna y mo canye bēts entšayējuacá yojtsabá y njetcsa sibientšana yojtsėjonjána. ¹² Chē entšayējuañe imojtsemna njetcsa bayēnga, ósjojnaye bayēnga y njetcsa shloftšēgnaca. ¹³ Y tojanuena canye oyebuambnayana mēntšá: —Motsbaná, Pedro; mobaye y quem bayēnga mose ca.

¹⁴ Chora Pedro tojánayana: —Ndoñe, atšbe Utabná. Atše ndocna te chiyáise Moisesbe leyíñe ndoñe yondēlesenciana jasama bayēnga y chē jasama ndoñe tšabá imomna bayēnga ca.

¹⁵ Y cachiñe tojtétanuena chē oyebuambnayana mēntšá: —Bēngbe Bētsá tojalesenciá y canye bayá tšabá jasama yomna ca tojayanēse, aca ndoñe matsjuabnana chē bayá jasama ndoñe tšabá yontsemna ca.

¹⁶ Chē soye unga soyama chca tojanopasá chentšana, chē entšayējuá celoye tojtanátsjua. ¹⁷ Pero Pedro ndoñe yontsetátsēmbó ntšamo tojaninjycá ndayá chabiamá yojtsayanama. Chēntscuana, chē Cornéliēbe ichmónēnga noticiánana Simónbe yebnocá tmojánashjajna y shjoca bēšoca imojtsobátmana. ¹⁸ Tmojanchembo ora, tmojanēnoticiá Simón, chē Pedro ca uabobainá, chentše taibojatanama.

¹⁹ Pedro, ndayá tojáninjyama chabosertama yojtsenójuabnantscuana, chē Uámána Espiritu tbojanianá: “Mouena, muentše mora unga boyabásenga cmontsenguá. ²⁰ Motsbaná, mocana matastjango y yapa ntjatenoujauabnacyá chēngaftaca cochjá, er atše chēnga sējnichamó ca”.

²¹ As Pedro tojtanastjango y chē tmojánashjajnēnga tojanēyana: —Atše sēndmēna chē šmongsenguá cha. ¿Ndáyeca moye šmojabo ca?

²² Chaga chēnga tmojanjuá: —Cornelio šonjichamó. Cha endmēna chē soldadēngbe amēndayá, canye tšabá mándbomna entšá y Bēngbe Bētsábioye adorayá, y njetcsa judiēnga chabiamá tšabá mondbétsoyebuambnaye. Bēngbe Bētsabe canye ángel chábioye tbojabuayená ntšamo jamana aca chábioye chacotsama, as chē ndayá cha jauyanama cojtsebomncá cha jouenama ca.

²³ As chēnga tojanēmashengo y posada tojanēyentsame. Yēfsana Pedro chē unga boyabásengaftaca tojáná. Básefta Jesucristbeñe ošbuáchiyēnga Jope pueblentsēnga Pedro tmojantjēmbambá.

²⁴ Chē inye yēfsana Cesarea puebloye tmojánashjajna. Chentše Cornelio Pédrēbiamá yojtsobátmana, y Cornelio tojanēbuaja pamíllanga y tšabe amiguēgnaca chentše imojtsemna. ²⁵ Pedro tojánashjango ora, Cornelio tojánbocna jajēbenguama y chabe shecuatšentse yojoshēntsamentsiye cha

jadórama. ²⁶ Pero Pédrëna tbojtanatsbaná y mëntśá tbojanianyana: — Matëtsbaná, atše cach aquëcá nÿe canÿe entśá sëndmëna ca.

²⁷ Pedro Cornélioftaca encuëntaye chë yebnentše tojánamashëngo y ba entśanga tojánanÿena, chentše tmojanótotënga. ²⁸ Chora Pedro tojanëyana: — Cach tšëngaftanga šmondëtatšëmbo chë judiëngbe leyënguiñe endayana ndoñe yondopodena canÿe judío ndoñe judío entśangftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna ínÿabiamá jatsjuabnayaná cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinÿe atšbe delante canÿe boyabása uabuashinÿinÿana entśayaca bopormaná. ³¹ Cha šonjauyana: “Cornelio, Bëngbe Bëtsá condbéseimpadanama y chë ujabótënga condbétsëjabuachanama, Bëngbe Bëtsá ácaftaca entsoyejuá y lempe cmochanjóyeunaye ca. ³² Básefta boyabásenga Jope bëts puebløye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar bëjaye tsachañe endmëna. Cha cmochanjauyana ndayá jamama cmotsemna ca.” ³³ Chcasna, cachora sënjichamó a jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntšamo Pedro tojanoyebuambá Cornéliëbe yebnentše

³⁴ Pedro chora tojanontśé mëntśá jóyebuambayama: —Mora atše šontsosertana, ndegombre Bëngbe Bëtsabiamá nÿetscanga cachcá uámanënga imomnama. ³⁵ Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga. ³⁶ Tšëngaftanga šmondëtatšëmbo, Bëngbe Bëtsá Israeloca entśanga tojánabuayenama, tšabe noticiënga jtsóyebuambnaye, chënga nÿetscanga ainaniñe tšabe ebionana chamotsebomnama, Jesucristbeyeca; y cha endmëna nÿetsca entśangbe Utabná. ³⁷ Tšëngaftanga šmondëtatšëmbo ntšamo nÿets Judeoca tonjanopasama. Chë soye Galilea luaroca tojanobojatśé, Juan entśanga yojanabuayiná orscana, chënga bacna soyënga amana chamotsajbanama y chamuenábayama. ³⁸ Smondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espiritu chabe ainaniñe cháumashënguama, y tojanma Jesús corente obená chaotsemnama; y šmondëtatšëmbo ntšamo Jesús enjánana entśangbiamá tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninÿe y fsëndëtatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjanóba, canÿe cruciñe jacrucificase. ⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama. ⁴¹ Cha nÿetsca entśangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentšana bënga cháftaca fsënjanse y fsënjanośé. ⁴² Cha šonjichamó entśanga

jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiama y ainëngbiama yochjayana tšabá o ndoñe tšabá tmonjamama. ⁴³ Bëngbe Bëtsabe juabna oyebuambnayënga nyëtsanga cach Jesusbiamama tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espiritu tmojanóyëngacñe

⁴⁴ Pedro chë palabrénga cabá yojtsoyebuambnantscuana, chë Uámana Espiritu tojánamashëngo nyëtsca chë imojtsuenanëngbe ainaniñe jtsemándayama. ⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espiritu ndoñe judiëngbeñinaca cháumashënguama Bëngbe Bëtsá tojanmama. ⁴⁶ Chënga imojtsuenana chënga injëtšá jtsebiayangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espiritu tmonjoyëngacñe ntšamo bënga tmonjoyëngacñécá. Chcasna, ndocná queochatobenaye jamana chënga uabáinënga ndoñe chamondëtsemnama ca.” ⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

11

Ntšamo Pedro chë Jerusalemoca imojánenefjuana ošbuachiyëngbioye tojanëyana

¹ Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. ² Pero Pedro Jerusalemoye tojesaná ora, báseftanga chabiamama ndoñe tšabá tmojánayana. Chënga imojamna chë juabnayënga, chë ndoñe judiënga ošbuáchiyënga boyabásenga canjánamna chë más delicadentse base bobachtema tëtšëñënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútana ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanëyana: ⁵ —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjëtšabeconaye y nyëts canta sibiocana enjëtšëjonýana. ⁶ Y botamana sënjanrrepará ndayá chë tsoye bëtsemnama y sënjáninýe choye monjëtsemna uamna y tjoca bayënga, ósojnaye bayënga y nyëtsca shloftšëngnaca. ⁷ Y sënjanuena canýe oyebuambnayana mëntšá: “Motsbaná, Pedro; mobaye y quem bayënga mose ca.” ⁸ Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.” ⁹ Chentšana cachiñe sëntétanuena chë celocana oyebuambnayana mëntšá: “Bëngbe Bëtsá tojalesenciá y canýe bayá tšabá jasama yomna ca tojanayëse, ndoñe matsjuabnana chë bayá jasama ndoñe tšabá yontsemna ca.” ¹⁰ Chë soye unga soyama chca tonjanopasá y chentšana chë entšëjua celoye tontanátšjua. ¹¹ Y cachora unga boyabásenga Cesarea pueblocana ichmónënga, chë posada sëndbomnentse tmonjánashajna, atše janguanguama. ¹² Y chë Uámana Espiritu šonjanmandá atše yapa ntjatenojwabnacyá

chëngaftaca jama; y quem chnënguana Jesucristbeñe ošbuachiyëgnaca átšeftaca tmonjána. Nyëtscanga canýe entšá Cornelio ca uabainabe yebnoye fsënjánamashjna; ¹³ y chana bënga šonjanacuntá ntšamo tojáninýe, cachabe yebnentše canýe ángel ibojtsebiatsana y mëntšá tbojaniana: “Básefta boy-abásenga Jope bëts puebloye michamó y moye chamuánatse Simón, chë Pedro ca monuabobuatmá, ¹⁴ y cha cmochanjabuayená ntšamo aca y acbe yeb-
nentšá oyeñënga šmochjotsbocá ca.” ¹⁵ As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

¹⁶ “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’ ¹⁷ Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatšatacá. Y chca, atše ndoñe quetsátsmëna canýe tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

¹⁸ Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëgnaca tojalesenciá chëngbe bacna soyëngama ngëmëna chamuatenójuaboma y chca amana chamotsajbanama, chë nyëtsca tescama yomna tšabe vida chamotsebomnama ca!

Ntšamo Antioquía puebloca tojanobojsaté, entšanga Jesucristbeñe ošbuáchiyana

¹⁹ Esteban tmojanóba chentšana, tmojanontsé chë Jesucristbeñe inýe ošbuachiyëgnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nýe judiëngbiama. ²⁰ Pero báseftanga imojamna Chipre y Cirene luaroquënga, y chënga Antioquía bëts puebloye tmojánashhajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. ²¹ Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

²² Jerusalenoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. ²³ Bernabé choye tojánashjango orna, tojáninýe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyëtscanga tojanabuayená chamotsiyena nyëts ainánaca Bëngbe Utabnábeñe jtsošbuáchiyëse. ²⁴ Bernabé inamna canýe entšá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

²⁵ Chentšana, Bernabé Tarso puebloye tojána Saulo janguanguama, ²⁶ y tbojáninýena ora, Antioquía luaroye tbojëftsanbetše. Antioquía luarentšna canýe uata nyëtsá Jesucristbeñe ošbuáchiyëngaftaca cánýiñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuaatma.

²⁷ Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána. ²⁸ Chënguentšana canýa Agabo ca uabainá

tojanśá y chē Uámana Espíritbeyeca tojánayana, mēntśá: “Nýets luariñe entsanga oyeniñe bēts shēntsana echanjóshjango ca.” Y ndegombre chca tojanopasá, Claudio Romoca bēts mandado inamna ora. ²⁹ Chcasna, chē Antioquía bēts pueblentśa Jesucristbeñe ośbuáchiyēnga imojenóyeunaye ntsachetśá crocénanēnaca juíchmuana, ntśamo cada ona tojobenacá, Judeoca Jesucristbeñe ośbuáchiyēnga jubabuáchama. ³⁰ Chca tmojanma, y Bernabé y Sáuloftaca chē crocénana tmojanichmó chē Judeoca Jesucristbeñe ośbuáchiyēnguentśe bētsējemēngcá amēndayēngbioye.

12

Santiago tmojanóba; Pedro tmojanētame

¹ Chē tempo, rey Herodes básefta Jesucristbeñe ośbuáchiyēnga tojánishēche jutámíama y játsētēnama. ² Tojanmandá espadējaca chamóbama Santiago, Juanbe catśata; ³ y Herodes tojántatśēmbona judiēnga chē soye tojanogúsetama; as, cha tojanmandá Pédrēnaca chamutámíama. Chca tojanopasá chē levadúraca ndēpormana tandēse sayté, Bashco fiesta ora. ⁴ Pedro tmojánishache orna, Herodes tojanmandá chamutámíama, y chē cárceloca soldadēnga cantátanga tmojanenojatá cántentśe cha chamotsebojanýama. Herodes yojétsejuabnaye, Bashco fiesta tojochnēngo ora Pedro juabocnama, entsangbe delante jayanama cha chaóbanama. ⁵ Chcasna, Pedro yojtsētámena y chē soldadēngna corente imojtsebojanýá. Pero Jesucristbeñe ośbuáchiyēnga bētscá Bēngbe Bētsá imojtseimpadana Pédrēbíama.

Bēngbe Bētsá tojanma Pedro natjēmbana cárcelocana cháúaisebocnama

⁶ Canye te yojtsájamna Herodes entsangbe delante Pedro juabocnama. Chē te ibetna, Pedro yojtsomañe y cátaoica canye soldado yojtsemna; uta cadenējuaca yojtsabatsēcna y inye soldadēngna bēśócana chē utámeniñe imojtsebojanýá. ⁷ Ndeolpe, Bēngbe Utabnabe canye ángel tojánbocna, y lempe chē utámeniñe yojtsebuashinýinýana. Chora chē ángel tēchañe Pédrēbioye tbojánbojajo, tbojanfśená y tbojaníyana: “Betsco motsbaná ca.” Y cachora chē cadenējuangá Pédrēbe buacuatśēnguentśana tojanatquécjana, ⁸ y chē ángel tbojaníyana: “Matichētjo y matóshēcōchētjo ca.” Pedro tojanma ntśamo chē ángel tbojaníyancá, y chora chē ángel tbojátaníyana: “Mataquēfsayé y śmasto ca.”

⁹ Pedro utámenocana chē ángel ibojtsēstona, pero ndoñe yontsetátśēmba aiñe ndegombre o ndoñe bentsemna chē ángel yojtsama cha chocana cháúaisebocnama; masna, ibojtsinýana mo canye otjénayoca cuaftsemncá ca. ¹⁰ Y útentśe chē soldadēnga imojtsebojanýajana chata tbojánachnēngo y yerēśa bēśásoye tbojánashjango, chē ndayēśa yojanamna tsáshenoye jabocnama; y chē bēśásana nye cachabe ponto yojotéjjo. Chentśana tbojēftsanbocna ora, canye tsáshenējana ibojtsaye, y nye ndeolpe chē ángel Pédrēbentśana yojtsojuánañe.

¹¹ Nya chora Pedro tbojanosertá y tojánayana: “Mora tśabá śjosertá, ndegombre Bēngbe Utabná chabe ángel tbojichmó atśe jatsbocama Heródesbe cucuatśentśana y lempe ntśamo judiēnga átśeftaca jamama imojuabnámnaca ca.”

¹² Pedro chē soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chē yebnentśe banga cánýiñe imojtsemna, Bēngbe Bētsáftaca encuéntaye. ¹³ Pedro chē tsashenoica bēśásoca

tojanchembo ora, canÿe oservená, Rode ca uabainá, tojánbocna jarrepárama. ¹⁴ Chê oservená Pédrêbioye tbojanoyatêmbá ora, corente oyejuayá yojtsemna y cha, jebiatêfjo cuentna, cach tsoye tojesaná chê tšabe noticia jaúnayama, Pedro bëshoca yojtsemna ca. ¹⁵ Chê tsoca imojtsemnêngna chora tmojanianyana: “¿Opá chectsebocna ca?”

Pero chê oservená yojtsichamo ndegombre ca. Y chênga tmojanianyana: “¡Chabe ángel ctsemna ca!”

¹⁶ Chêntscuana Pedro cabá yojtsechembuana; tmojánebiatêfjo y tmojáninÿe ora, chênga puerte imojenjnaná. ¹⁷ Pero Pedro tojánefjatsêmba iytêca chamobiamama y tojanacuntá ntšamo Bêngbe Utabná utámenocana tbojánatsbocama. Chentšana tojanÿyana: “Ntšamo tonjopasama Santiago y chê Jesucristbeñe inÿe ošbuáchiÿénga šmochjaúnaye ca.”

Chora Pedro chê yebnentšana tojtáisebocna y ínÿoye yojáta.

¹⁸ Tojanbinÿna ora, chê soldadénga puerte imojntša enbouenanana, ntšamo Pédroftaca tojanopasama ndoñe imontsetátsêmba causa. ¹⁹ As Herodes tojanmandá Pedro chamotsenguanguama; pero jtsinÿenama ndoñe imonjobenaye orna, Herodes chê soldadénga tojanatjá ndayá Pédroftaca tojanopasana y chentšana tojanmandá chê cha imojanbojanÿá soldadénga jtsébáyama. Chê soyénga tojanochnêngo chentšana, Herodes Judea luaréntšana tojéftsanbocna y Cesarea luaroye tojtsanoñe, y choca tojt-sanoquedañe.

Herodes tojanóbana

²⁰ Herodes corente yojtsetsátjaye Tiro y Sidonoquéngaftaca; as chênga tmojanenoyeuná Heródesbioye jama. Canÿe uámana uajabuachaná, Blasto ca uabainábioye tmojanayeumaná, y chana tojanašebuachená Herodes jauyanama ndoñe más entjayánanénga chamondêtsemnama, er Tiro y Sidonoca entšanga vida innabomna Heródesbe luaroca sanángaca. ²¹ Chcasna, rey Herodes inÿe tescama tojánachembo. Chê tena, jóyebuambayama Herodes uámana entsayaca yojtopórma y yojótbema chabe mándaye tbermanentše; chentšana tojanonguamé. ²² Chora entsanga tmojanontsé mēntšá uayebuáchana: “¡Chê entsoyebuambná cha entšá ndoñe quenátmēna! ¡Chana canÿe dios entsemna ca!” ²³ Cachora, Bêngbe Bětsabe canÿe ángel tojanma Herodes šocana chaboshachama, chabe cuenta Bêngbe Bětsá chamuatschuama entsanga ndoñe yonjáuyana causa. Herodes tojanóbana mamángaca sasná.

²⁴ Pero chê tempo más bětscá entsanga Bêngbe Bětsabe palabra imojtsue-nana y Jesucristbeñe imojtsošbuáchiye.

²⁵ Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chê Marcos ca uabobuatmá, chátaftaca tmojéftsanbetše.

13

Bernabé y Saulo tbojanbojatsé Bêngbe Bětsabe trabajo jamama

¹ Antioquía luaroca Jesucristbeñe ošbuáchiÿénguentše imojtsemna Bêngbe Bětsabe juabna oyebuambnayénga y ošbuáchiÿéngbioye abuatambayénga. Chênga imojanabaina Bernabé, Simón (chê Sibetá ca uabobuatmá), Lucio Cirenocá, Manaén (nda tojanoboché cánÿiñe Herodes, chê Galileoca réyefata) y Saulo. ² Canÿe te, Bêngbe Utabná imojtsatschuanaye y chama

tondaye ntjascá imojtsemna ora, chë Uámána Espírítu tojánayana: “Mora šmochjaleséncia Bernabé y Saulo tšëngaftangbentšana chabuétseboचना; chatna canýe trabajuama sënjabacá ca.”

³ Bëngbe Bëtsá jëtschuyama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tomanjáca, chatbe trabajuíne chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

⁴ As Bernabé y Saulo, chë Uámána Espírítbeyeca ichmónata, Seleucia ca uabáinoye tbojánata y chentšana bejaycá, Chipre luaroye. ⁵ Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

⁶ Nýets chë luarëjana tmojánachnëngo orna, Pafos puebloye tmojánashjajna; y chentše tmojáninjëna canýe judío tatšëmbuá, Barjesús ca uabainá. Cha yojánichamo cha canjamna canýe Bëngbe Bëtsabe juabna oyebuambnayá ca, pero ndoñe chca yonjamna. ⁷ Chë tatšëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. ⁸ Pero chë tatšëmbuá, grieguíne Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtošbuáchema, ntšamo chë Jesucristbeñe ošbuáchiyënga imojanošbuachecá. ⁹ Chora, Saulo chë Pablo ca imojanábobuatmabe ainaniñe chë Uámána Espírítu corente yojtsemándaye; as chë tatšëmbuábioye yejuana ibojonýinjíye, ¹⁰ y tbojaniyana: “¡Abuambnayá, puerte bacna entšá, Satanasse uaquiñá y tšabe soyënga ndoñe chaondëtsebinýnama trabajayá! Bëngbe Utabnabe nýetsca ndegombre soyëngama aca contsichamo uayátšenaye soyënga yojtsemna ca. ¹¹ Mora, Bëngbe Bëtsá cmochanjacastíga, jtaná cochanjoquédá y baseftayé jinýama queochatobenaye ca.”

Cachora Elimas mo ibetiñcá yojoquédá y ibojtsonguaye canýa buacuetëntšnana chabuánatsama, jtaná yojtsemna causa. ¹² Chë mandado chca tojáninjë ora, Jesucristbeñe yojtsošbuaché y yojenjaná Bëngbe Utabnabe soyënga tojanatsjínýama.

Pablo y Bernabé Antioquía pueblentše, Pisidia luaroca

¹³ Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. ¹⁴ Pergentšana Antioquía puebloye tbojátanata; chë pueblo inamna Pisidia luare héconana. Chentšna, ochnayté, chë judiëngbe enefjuana yebnoye tbojánamshëngo y tbojanótbema. ¹⁵ Moisesbe leyiñe y Bëngbe Bëtsabe juabna oyebuambnayëngbe uabemana librëšangañe tmojanalía orna, chë enefjuana yebnentša mándayënga canýa tmojanichmó chënga jáuyanama: — Israeloquënga, bënga fsëntseboše entšanga chašmabuayená, nderado ndayá jayanama šmojtsebomnëse, muentša entšanga añemo chamotsebomnama ca.

¹⁶ As Pablo tojantsá y entšangbioye cucuatšëca tojánëfjatsëmo iytëca chamobiamama, y tojánayana: —Šmochjouena Israeloquënga y ndoñe judiënga Bëngbe Bëtsá adórayënga. ¹⁷ Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtsçanga

chamotsemnana, chënga Egiptoca inÿe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanébuacana. ¹⁸ Canta bnëtsana uata nÿetsá, Bëngbe Bëtsá entsanga ndoyena luaroca chënga yojanéuantana, ¹⁹ y cha tojanma chë Canaán luaroca canÿsëftentsa entsanga chamopochocama y bëngbe bëts taitanga chëngbe fshantsënga nduiñënga tojánabiana. ²⁰ Chë tempo, chë Bëngbe Bëtsá Abrahámbyoe quem fshantse jatsetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntsçuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiana mandadënga tojánabiana, Bëngbe Bëtsabe juabna oyebuambnayá Samuel chëngbe mandayá yojëftsemna tempëntsçuana. ²¹ Chentšana, Israeloquënga Samuel tmojanimpadá canÿe rey chabojayé chaotsamëndama; as Bëngbe Bëtsá Saúlbioye chëngbe rey tojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá. ²² Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davidbioye mo chëngbe reycá tojánbema. Chabiana Bëngbe Bëtsá tojánayana: ‘Atse sëndëtatšëmbo, David, Isaibe uaquiñá, canÿe tšabe entsá yomnana y chama atse sëndoyejuá, y cha sempre endëprontana ntšamo atse stsebošcá jtsamama ca.’ ²³ Davidbentsana canÿe entsá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá. ²⁴ Cabá Jesús ndëbocna ora, Juan nÿetsca Israeloquënga tojanabuayená bacna soyënga amana chamotsajbanama y chamuenábayama. ²⁵ Juanbe trabajo jopochócama yojtsobeco ora, cha tojánayana: ‘¿Nda atse tsmënama tšëngaftanga šmojuabná ca? Chë tšëngaftanga šmontsejuabná atse tsmëna ca cha, atse ndoñe quetsátsmëna. Pero atšbentsana echanjabo canÿa, y atse mercedo taitsatobuañoñe ni mo jotsejbiyama chabe shecohëtjonëshentsa corriëja jajafjonama ca.’

²⁶ “Chcase morna, Abrahámbentsana entsanga y ndoñe judiënga Bëngbe Bëtsá adórayënga; bëngbiana entsemna quem buayenana soye, chë Bëngbe Bëtsá entsanga jatsebacana. ²⁷ Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentse, Jerusalemntša oyenënga y chentša mándayënga ndoñe quenjátanësertana nda Jesús bëtsemnana, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe libréšganãne iuabemancá. ²⁸ Y masque ndocna bacna soye tmonjáninÿena Jesús jóbanama chabotsemnana, Pilato tmojanimpadá chaomandá chábioye jóbama. ²⁹ Chentšana, lempe ntšamo Bëngbe Bëtsabe uabemana palabrënguiñe iuayancá Jesuseftaca tojanochnëngo ora, chabe ústonënga chë cruzocana tmojtanëštjango y tmojanatbontsá. ³⁰ Pero Bëngbe Bëtsá tojanma Jesús cháuatayenama. ³¹ Chë Galileocana Jerusalemoye cháftaca tmojánanga, baytentsçuana Jesús yojánebébuacana; y morna, lempe ntšamo Jesusbiana tmojaninÿcá, chënga entsángbeñe montsoyebuambná.

³² “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, ³³ cha tonjama, bënga chë chëngbe entsanguentsëngbiana, chca chaotsemnana. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana

palabrënguïñe, segundo salmentse mëntśá tojanábema, ntśamo Bëngbe Bëtsá Jesúsbiøye tbojaniyanama:

Aca atśbe uaquiñá condmëna.

Mënté entsanga sënjinÿanÿé aca atśbe Uaquiñá comnama ca.

³⁴ Y tempo Bëngbe Bëtsá chabe uabemana palabrënguïñe tojaninÿanÿé cachá jamama Jesús cháuatayenama y ndoñe cachiñe chaondóbanama, mëntśá tojánayana ora:

Chë ndegombre soyënga y chë tśabe bendicionënga ntśamo David sënjanśbuachenacá,

tśëngaftanga cbochanjátśataye ca.

³⁵ Inÿoca Bëngbe Bëtsabe uabemana palabrënguïñe, Salmos librëśa uabi-amnayá, mëntśá tojanábema ntśamo Jesús Bëngbe Bëtsábiøye tbojaniyanama: Aca ndoñe quecochtsleséncia atśbe cuerpo, chë acbe Uámana oservenabe cuerpo chaotsoepochocama ca.

³⁶ David, chabe tempo imojoyenëngbiama tojanma, ndayá cha chaomama Bëngbe Bëtsá tojanjuabocá. Cha tojanóbana y tmojanatbontśá chë chabe bëts taitángbiøye tmojanëtabuantsá luarentse, y chabe cuerpo tojanopochocá.

³⁷ Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atśe sëntseboše tśëngaftanga quem soye chaśmotsetátśëmbo: Ndayá Jesús tojanmama, entsanga chëngbe bacna soyëngama perdonánënga montsemna. Jesúsbeyeca, nÿetsca chábeñe tmojtsośbuáchenga, bacna soyëngama perdonánënga mochántsemna. Ntśamo Moisesbe leyíñe iuayancá tmojanmama, chënga ndoñe tmonjanobená chca perdonánënga jtsemnama; nÿe Jesúsbeñe jtsośbuáchiyëse chënga perdonánënga jtsemnana. ⁴⁰ Cuedado śmochtsebmna, ntśamo Bëngbe Bëtsabe juabna oye-buambnayënga tmojanayancá, tśëngaftangaftaca ndoñe chaondochnënguama.

⁴¹ Bëngbe Bëtsá mëntśá tojánayana:

Smochjouena. Tśëngaftanga chë ntśamo atśe tijayancá śmojtśábotenga, ojnanánënga śmochántsemna y śmochanjóbana.

Tśëngaftanga cabá vida śmobomnëntscuana, atśe bëts soyënga chanjëftsema, y masque ndánaca chë soyëngama chacmojtsacúnta,

tśëngaftanga chiñe ndoñe queśmochatośbuáchiye ca” —Pablo tojanoye-buambá.

⁴² Pablo y chabe enutënga chë judiëngbe enefjuana yebnentśana tmojëftsanbocna ora, chë ndoñe judiënga chëngbiøye tmojanaimpadá, chë inÿe ochnaytescama chë soyëngama más jábuayenama. ⁴³ Chentśe chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábiøye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nÿets tempo chamotsejuabnama, Bëngbe Bëtsá chëngbiama tśabe soyënga vojtsamama.

⁴⁴ Chë inÿe semana, chë ochnaytena, nÿa mo nÿetsca chë pueblentśe oyenënga tmojanobeconá Bëngbe Bëtsabe palabra jouenama. ⁴⁵ Pero ba entsanga choye jouenama tmojánama chë judiënga tmojáninÿe ora, tmojanotjayaná, ba entsanga Pablo imojtseyeuannama; as chënga tmojanontśe mocá ichámuana ndayá cha vojtsóyebuambnana, y chábiøye oyen-guayana. ⁴⁶ As Pablo y Bernabé más añémoca mëntśá tbojánayana: “Endánëyta, natsana tśëngaftanga, chë judiënga śmomnënga, Bëngbe Bëtsabe palabra jshabuayenana. Pero tśëngaftangna chë palabra śmontsaborté, y

šmontsejuabná tšəngaftangbiana ndoñe tšabá yontsemna chë nÿetsca tescama yomna tšabe vida jtsebomnana ca; chë causa, bēnga fchantsoñe chë ndoñe judiēngbeñe Bēngbe Bētsabe palabra jóyebuambayama. ⁴⁷ Er Bēngbe Bētsá chama šjanichamó, mēntšá jauyanēse:

Aca tchonjuábuayana chë ndoñe judiēngbioye tšabe noticiēnga jábuayenama, chaósertama.

Y chca, aca chēngbiana cochántsemna mo canÿe binÿnayacá.

Chca, ácbeyeca nÿets luarēnguenache entšanga atše chanjatsebacá ca.”

⁴⁸ Chë ndoñe judiēnga chca tmojanuena ora, puerte imojtsóyejuaye y tmojanontsé mēntšá ichámuana: “Bēngbe Utabnabe palabra tšabá bēngbiana entsemna ca.” Y chora, chë nÿetsca tescama yomna tšabe vida jtsebomnana Bēngbe Bētsá tempo tojánabacacanga, tmojanontsé Jesúsbeñe jtsošbuáchiyana. ⁴⁹ Y chca, nÿets chë luariñe más entšanga Bēngbe Bētsabe palabra imojtsuenana. ⁵⁰ Pero chë judiēnga tmojanoyebuambá, shembásengaftaca Bēngbe Bētsá adórayēnga y uámanēnga, y chë pueblentša uámana taitāngaftaca, jamama Pablo y Bernabé chabosufrima y chë luarentšana jtēbuacnama. ⁵¹ As, Pablo y Bernabé tbojésanshecstētonata, judiēnga jinÿanÿiyama chēnga ndoñe tšabá tmojanmama; y chentšana, Iconio puebløye tbojtsanoñe. ⁵² Pero Jesucristbeñe ošbuáchiyēnga corente oyejuayēnga imojtsemna, y chë Uámana Espiritu chēngbe ainaniñe corente yojtsemándaye.

14

Pablo y Bernabé Iconio puebloca

¹ Iconioca, Pablo y Bernabé cánÿiñe tbojánamashēngo chë judiēngbe enefjuana yebnentše y corente obenánaca Bēngbe Bētsabe palabra tbojanoyebuambá. Chiyeca, ba judiēnga y ndoñe judiēnga Jesucristbeñe imojtsosbuaché. ² Pero chë judiēnga Jesucristbeñe ndošbuáchiyēnga, chë ndoñe judiēngbioye tmojanayējaná, Pablo y Bernabebiana podesa chamotsejuabnama. ³ Chiyeca, Pablo y Bernabé bayté chentše tbojanotoná y ndauatjácá Bēngbe Utabná Jesucristbiana tbojanoyebuambá. Bēngbe Utabná obenana chata tojanatšatá bēts soyēnga jtsamama, y chë soyēngaca Bēngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bētsemnama, chë Bēngbe Bētsá nÿetscanga iuababuánÿeshanana. ⁴ Pero nÿetsca chë pueblentša entšanga ndoñe cachcá imontsejuabnaye; inÿenga chë judiēngaftaca imojtsemna, y inÿengna chë Jesucristbe ichmónataftaca. ⁵ As, chë judiēnga y ndoñe judiēnga chentša mandayēngaftaca tmojanenoyeuná chata jtsatsetšenama y ndētšbēngaca jtsébáyama. ⁶ Pero Pablo y Bernabé chama tbojántatšēmbona orna, tbojtsanēchañe Listra y Derbe puebløye, Liconia luaroca, y choca chábuañe luarēngoye; ⁷ y chë luarēnguenáchnaca, chata Jesucristbe tšabe noticiēnga entšanga tmojanabuayaná.

Listra puebloca, ndētšbēngaca Pablo tmojtsanatēchēnganja jtsóbama

⁸ Listra puebloca inamna canÿe boyabása jama ndobená. Ndocna te yon-dobena jana, chca cosheto inónÿna causa. Chë boyabásana yojtsetbema ⁹ ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatšēmbona chë šocá tša yojtsosbuáchemá, shnaná jtsatsmēnama; ¹⁰ as Pablo, juayebuáchenēse tbojanianyana: “¡Motsbaná y acbe shecuatšēngaca tšabá motsa ca!”

Chora chë boyabása, canye jontsënjëse tojantsá y yojóntsa anana. ¹¹ As chë entsanga, ndayá Pablo tojanmcá tmojáninye ora, tmojanontsé uayebuáchana chë Licaonia luarentša biyañe, mëntša: “¡Bëngbe diosënga bëngbioye tbojátsma mo entšatcá ca!”

¹² Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inye diosëngbiama oyeubuambayacá. Páblëbioye chca imojtsábobuatma, er cha más yotsoyebuambná. ¹³ Zeusbiama chentša bachna inabomna canye yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entsanga imojtseboše chë uacnënga jashebuáyana y jajuinýiyana, chca, chë ichmonátbioye jadórama.

¹⁴ Bernabé y Pablo chama tbojántatsëmbona ora, entsayá tbojtsanenántšajatanëca, entsanga jinýanýiyama, ntšamo chënga imojtsamcá chata tondaye yonjógusetama, y tbojéftsantotjajo entsangbe tsëntsajana y mëntša ibojtsaychembumbuana: ¹⁵ “Baconga y batanga, ɿndáyeca chca šmojtsama ca? Bëndata cach tsëngaftangcá entsata fsëndmëna. Muentše bëndata fsëntsemna nye jábuayenama Bëngbe Utabná Jesucristbe tšabe noticiënga, tsëngaftanga chë quem ndoservena soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinýncá. ¹⁶ Masque tempo, Bëngbe Bëtsá entsanga tojanalesenciá cada ona chaoma ntšamo tojtsejuabnacá, tšabá cachëngbiama yojtsëmnayeca, ¹⁷ Bëngbe Bëtsá ndocna te ntjájbanana tsëngaftanga jtsinýanýinayana, cachá tojama tšabe soyëngaca, mocna Bëtsá cha yomnana. Cha endama tsëngaftangbiama chauaftema y chë matënga botamana chaoshájonama, y becá saná cmondatsatná; y cha endama tsëngaftangbe ainaniñe corente oyejuayana chašmotsebomnama ca” —chata tbojánayana.

¹⁸ Masque chë soyënga tbojánayana, nye batšatema más bën y ya ndoñe mathëñanobenata chë entsanga jtsëuyanana uacnënga jashebuáyama, chca, chátbioye jadórama.

¹⁹ Chca ora, bášefta judiënga tmojánashjajna Pisidioca, Antioquíocana y Iconiocana, y chentša entsángbioye tmojanayëñaná, Jesucristbe ichmonatbe contra chamotsemnama. Chcasna, Pablo ndëtsbéngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

²¹ Derbe puebloca Jesucristbe tšabe noticiënga entsanga tmojanabuayená, y chca, entsanga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquioye. ²² Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchema. Y entsángbioye tmojanëyana: “Bëngbe Bëtsabe amëndayoye jamashënguamna, bënga sontsamna quem luarentše bëtscá jëftsepadecënanana ca.” ²³ Nyetsca ošbuachiyëngcá enefjuanenache, bëtsëjemëngcá mándayënga tmojanabacacá, chentša Jesucristbeñe ošbuáchiyënguentšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y

cháftaca imojtsencuénta ora, cha tmojanimpadá, chë ošbuáchiyënga Bëngbe Utabnabe cucuatšíñe chamotsemnana, ndábeñe chënga imojtsošbuaché.

Pablo y Bernabé, Siroca Antioquía puebloye tbojtana

²⁴ Pisidia luarëjana tbojánachnëngo ora, Panfilia luaroye tbojánashjango. ²⁵ Perge pueblentše Jesucristbe tšabe noticiënga entšángbioye tmojanabuayená, y chentšana Atalia puebloye tbojánata. ²⁶ Chentšana, Bernabé y Pablo, bejaycá tbojtana Siroca Antioquía puebloye. Chentša entšanga Bëngbe Bëtsá tmojanimpadá chata chabe cucuatšíñe chabotsemnana, chë trabajuíñe chaotsanýenama; y chorna, chë trabajo ya tbojanpochocá. ²⁷ Choye tbojtashjango ora, nýetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninýanyé, chë ndoñe judiëgnaca chamotsobenama Jesucristbeñe jtsošbuáchiyama. ²⁸ Y Pablo y Bernabé bayté chentše tbojanototoná Jesucristbeñe ošbuáchiyëngtaftaca.

15

Ichmónënga y bëtsëjemëngcá mándayënga Jerusalenoca tmojánenefna jencuéntama

¹ Chë tempo, báseftanga Judeocana áshjajnënga tmojanontsé, Antioquía pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotétsëse, ntšamo Moisesbe leyíñe endayancá, ndoñe quenátopodena tšëngtaftanga atsebácanënga jtsemnana ca.” ² Chíyeca, Pablo y Bernabé jabuachana chca buatëmbayëngtaftaca imojánenatsëtsnaye. Cabana, tmojanëbuáyana Pablo, Bernabé y ínýenga Jerusalenoye chamotsama, choca chë Jesucristbe ichmónëngtaftaca y chë chentše Jesucristbeñe ošbuachiyëngbeñe bëtsëjemëngcá mándayëngtaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalenoye chënga tmojanichamó. Fenicia y Samaria luarëjana imojtsachnëjuana ora, chënga tmojanacuntá ntšamo chë ndoñe judiënga chëngbe tempasca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

⁴ Pablo y chë ínýenga Jerusalenoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngtaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

⁶ As, chë Jesucristbe ichmónënga y bëtsëjemëngcá mándayënga tmojánenefna jencuéntama, chë ndoñe judiënga aíñe o ndoñe yonjánamnama chë más delicadentše base bobachtema tëtšenënga jtsemnana, ntšamo chë judiënga imojanamancá. ⁷ Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catsátanga, tšëngtaftanga šmondëtatšëmbo, ya bayté entsemna Bëngbe Bëtsá tšëngtaftangbentsana atše

šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchemá. ⁸ Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninýañé, chë ndoñe judiëngnaca innobena chabe entšanga jtsemnana, chábeñe tmojtsošbuáchese, chë Uámana Espíritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiana nýetscanga cachcá monduámána, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnana y ainaniñe tšabe juabna chamotsebomnana, Bëngbe Bëtsabe palabriñe jtsošbuáchiyëse. ¹⁰ Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentša mandënga chamotsošbuáchemá, mo nda ínýabioye uauta uasmanësha cuafatsasmëmnacá; pero lempe chë mandënga, ni bëngbe bëts tai-tanga ni bënga ntsoberenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnana Bëngbe Utabná Jesús chabe tšabe juabna šojaninýañeyëca, y Bëngbe Bëtsá cachcá chë ndoñe judiëngnaca tojatsebacá ca” —cha tojanéyana.

¹² Chorna, chentše imojtsemna entšanga nýetscanga iytëca tmojanobiana, y tmojanuena Bernabé y Pablo jtsoýebuambnayana, chë bëts soyëngama, Bëngbe Bëtsabe obenana entšanga jinýañiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

¹³ Chë útata jóyebuambayama tbojanpochocá ora, Santiago mëntšá tojánayana: “Jesucristbeyëca catsátanga, šmochjouena: ¹⁴ Simón šonjabuayená ntšamo Bëngbe Bëtsá natsana tojaninýañé, chë ndoñe judiëngnaca cha iuanýenama, y chíyëca cha chënguentšana banga tojubuáýana chabe entšanga chamotsemnana. ¹⁵ Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguñiñe endayancá, mëntšá:

¹⁶ Chentšana atše chanjésabo

y chë Rey Davidbe pamíllanga cachiñe uámanënga chantabiama;

mo nda canýe uáshajayena yebna tojëtšjebcá, atše, Davidbe pamíllanga cachiñe uámanënga chantabiama;

¹⁷ chca, chë inýe entšanga chamonguango ndayá jamana atše, tšëngaftangbe Utabná, más chašmotsábuatmama, nýetsca ndoñe judiënga, chë atšbe entšanga chamotsemnana atše tijábacacanga.

¹⁸ Chca atše, tšëngaftangbe Utabná sëntsichamo,

nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

¹⁹ Chentšana Santiago mëntšá tojanéyana: “Chíyëca atše sëntsejuabná, bënga ndoñe šontsamna chë ndoñe judiëngbiana jamana más totcá chaotsemnana Jesucristo jtsëstonama. ²⁰ Chamna, šontsamna chënga soyúbábiamana y jáuyanana ndoñe chamondëtsesá, sananga chë ndaye juabné entšanga tmojuabná diosënga yomna ca jadórana tmojuuyëbana; bacna soyënga shembásënga o boyabásëngaftaca ndoñe chamondëtsama y ndoñe chamondëtsesá tšëšana bayëngbe mëntšëna, y buiñe cach ndoñe ca.

²¹ Er chë natsana tempënga orscana, nýetsca publënguenache mondmëna

chë Moisés tojéftsanayana soyënga entšángbioye abuyaynayënga; y chabe leyënga, nyëtsca ochnayté mondbetsaliaye chë bënga judiëngbe enefjuana yebnënguenache ca” —cha tojanëyana

Chë Jerusalenoca ichmónënga y bëtsëjemëngcá mándayënga canye tsbuanácha tmojanichmó chë ndoñe judiëngbiana

²² Chentšana, chë Jesucristbe ichmónënga y bëtsëjemëngcá mándayënga, nyëtsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás cá uabobatmá, y Silas; chata ibnamna uámanata chë Jesucristbeñe ošbuáchiyënguentse. ²³ Y chëngaftaca canye tsbuanácha tmojanichmó, y chiñe mëntšá yojëtsayana:

Bënga chë Jesucristbe ichmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsá bouamna, tsëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

²⁴ Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tsëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnama. ²⁵ Chcasna, bënga fsënjenoyeuná y šonjúnýnana tšabá yojtsemna báseftanga bënguentšana jabacayana tsëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. ²⁶ Chë úatna ba soye tbojtsbocá vida jáshbiana, Bëngbe Utabná Jesucristbiana oservëñe.

²⁷ Chátaftaca Judas y Silas fsënjichamó; y chatna cach tsëngaftangaftaca bochanjóyebuambaye ntšamo quem tsbuanáchañe yojtšabemanama. ²⁸ Chë Uámana Espíritu y bënga cachcá fsëntsejuabná, bënga ndoñe šontsamna tsëngaftanga jamëndana bëtscá jabuache mandënga Moisesbe leyënguñe chašmotsocumplínama. Nye quem uámana soyënga chiñe añe cmontsamna jtsobedecénana: ²⁹ Ndoñe šmattsesaye mëntšëna, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tsešana bayëngbe mëntšëna; y shembásënga y boyabásëngaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojëtsayana.

³⁰ Chcasna, chë quem Jerusalenocana ichmónënga tmojésanodiošofnantšana, Antioquía puebloye tmojána; y chocna, nyëtsca chë Jesucristbeñe ošbuáchiyëngbioye tmojanëbuaja y chë tsbuanácha tmojanayentšbuaché ³¹ Chë Antioquía pueblentsa Jesucristbeñe ošbuáchiyënga ntšamo chë tsbuanáchañe yojtšabemancá tmojanalía ora, bëts añemo tmojtanca y corente imojtsóyejuaye. ³² Judas y Silas Bëngbe Bëtsabe juabna oyeuambnayata ibnamna; as, chátncaca chë chentša Jesucristbeñe ošbuáchiyëngbioye ba soyënga tmojanëyana, chënga añemo chamotsatsbomnama y Jesucristbeñe corente chamotsošbuáchema.

³³ Chentšana baseftaytese, chentša Jesucristbeñe ošbuáchiyënga chëngbioye tmojtanadiošoftá, chë ndëmuanýënga tmojanichamóngbioye jtama. ³⁴ Pero Sílasna tšabá ibojtsinýana cachentše más jëftsajëtanama. ³⁵ Pablo y Bernabé baseftayshinýe Antioquía pueblentse tbojanototoná y ba ínýëngaftaca

Bëngbe Utabná Jesucristbe tšabe noticiënga entšanga tmojanabuatambá y tmojanabuayená.

Pablo cachiñe inye luarëngoye tojána, Bëngbe Bëtsabe trabajo jamama

³⁶ Chentšana baseftaytese, Pablo Bernabébioye tbojaniana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuáchiyënga jábuachama y jányama ntšamo imojtsemnana ca.”

³⁷ Bernabé yojtseboše, Juan chë Marcos ca uabobuatmábioye chátaftaca jëftsbešama. ³⁸ Pero Páblëna ndoñe tšabá ibontsinýana cha jëftsbešana, er Juan chábtentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. ³⁹ Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojëftsanbetše, y bejaycá Chipre luaroye tbojánata; ⁴⁰ y Páblëna, Silas tbojanábuayana jëftsbešama. Chë Antioquia pueblentsá Jesucristbeñe ošbuáchiyënga Bëngbe Bëtsá tmojanimpadá Pablo y Silas Bëngbe Utabnabe cucuatšinë chabotsemnana, chatbe trabajuñe chaotsanýenama. Chentšana, Pablo Sílasefata tbojánbozna y ⁴¹ Siria, Cilicia luarënguëjana tojánachnëngo entšanga añemo atšatnaye, chë luarenache enefjuana ošbuáchiyënga Jesucristbeñe más chamotsošbuáchemá.

16

Pablo Timoteóbioye tbojáninýena

¹ Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entšá inamna. ² Chë Listra y Iconioca Jesucristbeñe ošbuáchiyënga Timoteobiana tšabá imojanoyebuambná. ³ Pablo tojánbošena Timoteo jëftsbešama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga imnatátšëmbo Timoteobe taitá griego inamna. ⁴ Chë ibojtsachnëjuana pueblënguenache chata ibojtsana Jesucristbeñe ošbuachiyëngbioye abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuáchiyënga ndoñe judiënga jamama yojtsamncá. ⁵ Nýets luarenache enefjuana ošbuáchiyënga, Jesucristbeñe más imojtsošbuáchiye, y cada te Jesucristbeñe ošbuáchiyënga más imojtsóbotena.

Pablo mo otjenayoquëcá canýe Macedonioca entšábioye tbojáninýe

⁶ Chë Uámána Espíritu, Pablo y Sílasbioye tojaninýanýe, chata ndoñe yontsanamna Asia luaroca Bëngbe Bëtsabe palabra entšanga jábuayenana; asna, tbojánachnëngo Frigia y Galacia luarëjana. ⁷ Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámána Espíritu tojanabuayená choye ndoñe chabondëtsama. ⁸ Misia luarëjana tmojánachnëngo ora, Troas luaroye chënga tmojána. ⁹ Chë te ibeta, Pablo mo otjenayoquëcá tojáninýe canýe Macedonioca boyabása ibojtsebiatsana y méntšá ibojtseimpadana: “Diosmanda Macedoniocyte mabo y šmabëjabuache ca.” ¹⁰ Pablo chca tojáninýe y cachora lempe tmonjanprontá Macedoniocyte jama. Atšnaca, chë quem soyënga uabiamnayá, chënga sënjëtsetjëmbambnaye. Bënga fsënjëtsetjuabnaye ndegombre Bëngbe

Bëtsá šojtsanachembuana choye jama ca, Jesucristbe tšabe noticiënga chocha entšanga jábuayenama.

Pablo y Silas Filipos puebloca

¹¹ As, Troasentšana bejayca fsënjána Samotracia luaroye, y yëfsana Neápolis puebloce, ¹² y chentsana Filíposoye. Filipos enjamna canýe uámana bëts pueblo Macedonioca y bëtsca romanënga oyeníñe. Chë luarentse basefaytá y fsënjanoquedanga. ¹³ Canýe ochnaytena, chë pueblentsana fsënjëftsanbocna y chë fshájaye tsachoye fsënjána. Fsënjanuena chentse canjamna canýe luare Bëngbe Bëtsáftaca jencuéntama ca, y fsënjána janguanguama. Fsënjáninýena ora, chentse fsënjantobíama y Bëngbe Bëtsabe palabra fsënjanocebuambá chentse tmojanójoto shembásengbiamá. ¹⁴ Enjamna canýe shembása, Lidia ca uabainá, Tiátira pueblócá, y cha enjamna uámana uabuángana uafjatsenga entsáyá uená. Cha inamna Bëngbe Bëtsábíoye adorayá y chentse Pablëbíoye ibotseyunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. ¹⁵ Cha y chabe yebnentse oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre tsošbuaché ca; chacasma, mabënga yebnoye, átsbentse chašmoquedama ca.”

Y šonjanëtarié bënga chentse joquédama.

¹⁶ Canýe te, chë Bëngbe Bëtsáftaca encuëntaye luaroye fsënjétsajna orna, šonjanëbiatše canýe tobíaše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobíaše yojanmalisiaye soyëngama. ¹⁷ Chë tobíaše tonjanontsé Pablo y bënga usetonana y mëntšá enjétsaychembumbuana: “¡Quem boyabásenga montsemna chë celoca Bëngbe Bëtsabe oservënënga y tšëngaftanga cmontsabuaiyiná ntšamo Bëngbe Bëtsá yobena tšëngaftanga játsebacama ca!”

¹⁸ Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbíoye mëntšá tbonjaniyana: “¡Jesucristbe obenánaca y cha jótšëmbonëse, chontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

¹⁹ Pero, chë bayëjbe juabna chárentšana tojésanbocnama y chëngbiamá más crocénana jabemama chora chë tobíaše ndoñe yontsobenama, chë tobíaše nduiñënga tmojáninýe ora, Pablo y Sílasbíoye tmojánishëche y tmojtsanasjojey plazoye, mandayëngbíoye.

²⁰ Chë mandayëngbíoye tmojanënatse ora, chënga mëntšá imojtsichamo: “Quem boyabásata judío entsata bondmëna, y muatbe causa bëngbe pueblentsá entsanga montsenbouenana, ²¹ y bontsabuatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátslesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

²² Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsetsejquécana y niñëfjéngaca jtsachebuánganjana. ²³ Jabuache tmojanachebuánganjentsána, cárceloye tmojanautame y chë utámenënga shanýá tmojanmandá yejuana chaotsabuajëñýama. ²⁴ Chca tmojanmandá ora, chë utamianá chata tojanënatse chë más tsoye utámenoye y shecuatšentsána tsbuanëšíñe tojanatsebuá.

²⁵ Pero tséntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana. ²⁶ Ndeolpe, corente jabuache yojtsébánjua y chë utámena yebna fshantsocana yojtsábonjnaye. Cachora, nyetsca chë utámenentša bëšašangá tojantëfjo y nyetsca utámenënga chë cadenëjuangá yojtsayentsjafjona. ²⁷ Pero chë utámenënga shanyá tojanofšená y chë utámenentša bëšašangá yojtsatëfjnama tojáninye ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntšena jtšenóitanama. ²⁸ Pero Pablo tbojánbochembo: —¡Acbe cuerpo ndocá matenábomana; nyetscanga camuentše fsëndëtsomñe ca!

²⁹ Asna, chë utámenentša shanyá canye uajuinýanëshá tojanëyá y chë utámenoye ochamanana tojánamashëngo y auatja causa ngmëmnyá Pablo y Silasbe shecuatšentše yojoshëntsamentšiyé. ³⁰ Chentšana tojtanébuacna y tojanëyana: —Señórata, ¿ndayá šojtsemna jamama atše atsbocaná jtsemnana ca?

³¹ Y chata tbojanjuá: —Bëngbe Utabná Jesúsbeñe cochtsošbuáchiye, y chca, Bëngbe Bëtsá aca cmochanjatsbocá y acbe yebnentše oyenëngnaca ca.

³² Y cha y nyetscanga chë yebnentše imojtsemnënga, Bëngbe Utabnabe palabra tmojanabuayená. ³³ Cach ora chë ibeta, chë utamianá chata tojanënatše chë lisianënguiñe jetsajabiama. Chentšana, cha y chabe pamíllanga tmojánenabaye. ³⁴ Chentšana, chë utamianá chata tojanënatše chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bëngbe Bëtsábeñe imojtsošbuáchema.

³⁵ Yéfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶ Chë utamianá Páblëbioye tbojaniyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanýiyé ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaodëtsemna; cach mándayënga chamuabo jabátëbuacnama ca —cha tojánayana.

³⁸ Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. ³⁹ Chcasna, cach mándayënga tmojána chata perdón jatëtejañama; chentšana tmojtanébuacna y tojanëyana: “Diosmanda, muentšana inye luaroye motsoñata ca.” ⁴⁰ As chata chë utámenentšana tbojëftsanbocna y Lídiëbe yebnoye tbojëftsanata. Chentšana, Jesucristbeñe ošbuáchiyëngaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata inýoye tbojtsanoñe.

17

Tesalónica pueblaca, Pablo y Silasbioye ndoñe tsabá tmonjanëbuaja

¹ Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canye bëts pueblo, Tesalónica ca uabáinoye tbojánashjango. Chentše, chë judiënga canye yebna innabomna chënga jénefnama. ² Páblëna, ntšamo enjanamancá, cada ochnayté chë jénefnama

yebnoye yojánaye, unga semanentscuana, y chentše chë judiëngaftaca yojanoyebuambná y imojánetsësnaye. Bëngbe Bëtsabe uabemana palabrënguife uyayana soyëngaca, ³ chënga yojanabuayiyiná y ndegombre yojaninÿanÿná, Bëngbe Bëtsabe Uamana Uabuayaná jóbanama y chentšana jtabenama ibojamnama. Y mëntšá yojanetsësná: “Chë Cristo, Jesús endmëna, ndabiana atše chontsabuayiyiná ca.”

⁴ Judiënguentšana báseftanga chië imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uamana shembásëngnaca. ⁵ Pero chë judiënga ndošbuáchiyënga chca tmojáninÿe ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyëtsca chë pueblentsa entšanga chamotsenbouënanama; y canÿe entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuachnama y entšangbe cucuatšinë jabáshejuanama. ⁶ Pero chentše ndocná tmonjáninÿena; as chë entšanga Jasón imojtsejojoye y chentša mándayënga imojtsemnoye tmojanánatse y Jesucristbeñe inÿe ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanÿata ibojtsama nyëtsca luarentša entšanga chamuenbouënanama, quem luaróynaca tbojabo, ⁷ y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguife ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nyëtscángbeñe yojtsemánda ca!” —chënga imojtsáyebuache.

⁸ Chë entšanga y chë pueblentsa mándayënga chca tmojanuena ora, corente imojenbouënanana. ⁹ Pero Jasón y chë inÿyënga, cháftaca imojtsemnënga, crocënanana tmojtanjajó, y as tmojtanabáshejuana.

Pablo y Silas Berea Puebloca

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts pueblöye chabuétsebocnama. Y chata choye tbojánashjango ora, chë judiëngbe enefjuana luaroye tbojánata. ¹¹ Chentša judiënga imojamna más tšabe ainana bomnënga chë Tesalonicoca judiëngbiamá; chcasna, oyejuayënga chë buayenana soye Jesucristbiamá tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá aife o ndoñe ndegombre yojtsemnama. ¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uamana shembásënga y boyabásëngnaca. ¹³ Pero, Pablo Bereoca chë Bëngbe Bëtsabe buayenana soyama entšanga yojtsabuayiyinama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouënanama. ¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétsebocnama y bëjaye tsachoye chaotsoñama; chëntscuana, Silas y Timoteo Bereoca tbojanoquedá. ¹⁵ Pablo tmojantjëmbambá entšangna, Atenas ca uabaina bëts pueblóntsoñe cháftaca tmojána. Chentšana, Pablo chënga tojanabuayená chamuauisshëconama Silas y Timoteo jaúnayama betscó jtsayana, Pábloftaca jateninÿenama.

Pablo Atenas puebloca

¹⁶ Pablo Atenas bëts puebloca Silas y Timoteo yojtsëbatmanentscuana, puerte tbojanongmé, er cha tojáninÿe chentša entšanga imojtsadorana

bëtsá cachëngbe pormana soyënga, ndayama chënga imojanjuabná diosënga yojamna ca. ¹⁷ Chíyeca, chë judiëngbe enefjuana yebnentse, judiënga y ndoñe judiënga Bëngbe Bëtsá adorayëngaftaca imojänenatsëtsnaye, y cada te chentša plazoca chë ndëmuanyënga chentse imojanashjajuanëngaftácnaca. ¹⁸ Y básiëftanga, ntšamo jtsejuabnayama entšanga abuátambayënga, epicureunga y estoiquënga ca uabainëngnaca Pábloftaca imojänenatsëtsnaye. Inyënga imojtsichamo: “¿Ndayama quem bostero yojtsoyebuambná ca?” Y inyënga: “Chana inyë luarëngoca entšangbe diosëngbiama muentše entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná. ¹⁹ Asna, chentša entšanga cha tmojanánatse canyë luaroye, entšanga jénefnama y oyebuambnayënga joyaunayama luare, Areópago ca uabainoye. Chentše imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtsayanana.

²¹ Er nyetscanga Atenasentša oyenënga y inyë luarëngocana áshjajnëngna, corente yojanogúsetana chë tojtsoapasana tsëm soyëngama jtsuenanana y jtscuëntayana.

²² As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominyë sënjjajácá, atše sëntsetatšëmbo tšëngaftanga ba diosënga puerte šmayaunana y šmadoránama. ²³ Atše sëndánrreparana tšëngaftangbe diosënga šmétsadorana luarënguenache y sënjinýena canyë altar y chentše mëntšá iuábemana: “Chë Bëtsá nduabu-atmabiana ca”. Y morna, chë Bëtsá chë nda ntsabuattmá šmadoránabiana, atše chontsabuaiyina.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entšangbe jebna yebnënguiñe, ²⁵ ni quebnatájaboto ndocná chabiana tondaye chaondëtsama, er cha endmëna nda inétsama bënga vida chamotsebonnaya y jtshachnayama chamotsobenama, y cha nyetsca soyënga šnetsatšatnaye.

²⁶ “Cha nýe canyë boyabásabentšana nyets luarënguentša entšanga tojánabiana, nyets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entšanga chamuetsiyenama; ²⁷ chca, Bëngbe Bëtsá chamonguanguama, masque chabiana ndoñe corente tmontsetátšëmo, y chamuinýena y chábeñe chamotsošbuáchema; pero ndegombre, Bëngbe Bëtsá bëngbentše cada cánýabentšana ndoñe bënoca quenátsmëna. ²⁸ Ntšamo canýa tojanayancá: ‘Bënga Bëngbe Bëtsáftaca cánýiñe mo canýacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentša básiëftanga bëts soyëngama uabiamnayëngnaca tmojanayancá: ‘Bënga nyetscanga Bëngbe Bëtsabe básenga mondmëna ca’. ²⁹ Y jcasna, Bëngbe Bëtsabe pamillanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entšangbe castellano, midio o chë ndëtsbeca pormana soyëngcá ca, er chë soyënga nýe ntšamo entšanga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonyayana chë entšangbe tempsca ndosertánana, y morna, nyetsca

luarënguentša entsanga entsamënda, ndaye bacna soyënga tmojtsamama ngmënaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canÿe te tojuinÿnaná, y chë tena, ndocnábioye ínÿabiamá más tšabá ntjatonÿayá, cha echanjayana entsanga tšabá o ndoñe tšabá tmonjamama; lempe chca cha echanjama canÿa cachá tbojabocacá entsáftaca, Jesús; y chca yochtsemnamna, Bëngbe Bëtsá entsanga tojinÿanÿé, chë bocaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entsanga tmojanuena ora, báseftanga Pablo imojtsáboyejuana, y ínÿengna mëntsá imojtsichamo: —Bënga fšëntseboše chë contsichamo soyënga más chcoye cachiñe jatuenama ca.

³³ As Pablo chëngbentšana tojésanbocna. ³⁴ Pero báseftanga aiñe Jesucristbeñe imojtsošbuáchiye y Pablo tmojanasto más jatuenama; chënguentše imojamna Dionisio, canÿa chë Areopagoca tbiamanënguentšá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chë soyënga tojanochnëngüentšana, Pablo Aténasentšana Corinto bëts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, ³ y ntšamo chata jamama Páblënaca jamama inatátšëmboycna, cháaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entsëjuaca japórmana. ⁴ Y nÿetsca ochnayté, Pablo yojanamana chentša judío entsangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtSENTšena judiënga y ndoñe judiënga chamotsošbuáchema, ntšamo cha yojtSANëtsëtsnacá ndegombre bëtsemnama.

⁵ Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entsanga yojtSABUAYIYNAYE y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. ⁶ Pero chë judiënga Páblëbe contra imojtSEMNA y tmojanontsé podesca chabiamá ichámuana. Asna, Pablo chabe uichëtjoniyangá yojtSENántšASJAYE, chënga jinÿanÿiyama chënga ndoñe tšabá tmonjánchjanguama, y tojanëyana: “Tšëngaftanga ndatsebácanënga chašmojóbanëse, cach tšëngaftanga šmochtsótšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷ Chorna, chë judiëngbe enefjuana yebnentšana tojéftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. ⁸ Y Crispo, canÿe chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamállangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. ⁹ Canÿe ibeta, Bëngbe Bëtsá Páblëbioye mo canÿe otjenay-QUÉCÁ tbojanianá: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. ¹⁰ Er atše áaftaca sëntsemna

y ndocná quemochátsbojajo ntšámnaca jáborlama; atše bëtsá entšanga quem pueblentše sëndábamna ca.” ¹¹ Chcasna, Pablo Corintentše canye uata y chněnguana shinye tojanototoná, Běngbe Bětsabe palabra entšanga abuátambaye.

¹² Pero, Galión chě Acaya luarentša mandado inamna orna, chě judiēnga imojenoyeunaye Páblēbe contra; cha tmojánishache y chě tribunaloye tmojanánatse. ¹³ Chocna, chě mandado tmojanianyana: —Mua entšanga entsětsěsná y entsama chēnga Běngbe Bětsá chamotsadorana, pero ndoñe ntšamo bēngbe leyēnguiñe endayancá ca.

¹⁴ Pablo jóyebuambayama uatajanóntša orna, Galión chě judiēnga tojanēyana: —Quem entsá nderado ínjabioye matbēnjóba o ndayánaca chca matēnjobuachjanguá, as cocayé atše matijótbema tšēngaftanga judiēnga yejuana joyauayama; ¹⁵ pero ntšamo šmotsichamcá entsemna nye बातēmbana soyēngama, nye tšēngaftanga šmēbuatma entsāngbiana y cach tšēngaftangbe leyēngama; chcasna, cach tšēngaftanga cmontsamna jenóyeunayana y jamana ntšamo chašmojenoyeunacá. Atše quem base soyēngama ndoñe quetsátsboše ngoberna jtsemnana ca.

¹⁶ As Galión tojanamēndá chě tribunal luarentšana chě judiēnga jtēbuacnama. ¹⁷ Chorna, chě entšanga tmojánishache chě judiēngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chě soye tondayana ibontsentšamna.

Pablo Antioquioye tojtaná y chentšana cachiñe inye luarēngoye tojtána, Běngbe Bětsabe trabajo jamama

¹⁸ Pablo cabá bayté Corintentše tbojántotona. Chentšana, Jesucristbeñe ošbuachiyēngbentšana tojesanodiošoftá y bejaycá Siria luaroye tojtána, Priscila y Aquilaftaca. Cabá Sirioye nda ora, Cencrea pueblaca nyets stjēnashe yojtsenásbotje, Běngbe Bětsábioye jinjinyiyama canye soye tojanšbuáchenama. ¹⁹ Efeso pueblōye tmojánashajna ora, Páblēna Priscila y Aquila tojesanabashējuana. Chentšana, cha tojtána chě chentša judiēngbe enefjuana yebnoye y chentše chě judiēngaftaca yojanoyebuambná y imojānenatsěsnaye. ²⁰ Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauaná; ²¹ chentšana, chēngbentšana tojesanodiošoftá, mēntšá jēftsēyanēse: “Nderádose cachiñe chantésabo tšēngaftanga jabábuachama, Běngbe Bětsá šojalesenciase ca.”

Chora, Pablo bejaycá Efesocana tojēftsanbocna. ²² Cesarea pueblōye tojánashjango ora, tojtána jacheuayama Jesucristbeñe ošbuáchiyēnga Jerusalenoca; y chentšana Antioquioye tojtána. ²³ Chentše baseftayté yojēftsemna; y chentšana, Pablo tojesaná Galacia y Frigia luarēnguenache, Jesucristbeñe ošbuáchiyēnga añemo atšatnaye.

Apolos, Efeso pueblaca Běngbe Bětsabe soyēngama yojanabuayiyiná

²⁴ Cach tempo, Efesoye tojánashjango canye judío, Apolos ca uabainá, Alejandría bēts pueblócá; cha puerta obená inamna janguamiyama y corente inatátšēmo Běngbe Bětsabe uabemana palabréngama. ²⁵ Bětscá tojánatsjinye chě Běngbe Utabná tojaninjanýe benachama; añēmoca yojanoyebuambná y Jesusbe soyēngama botamana yojanabuatambá, masque cha nye ntšamo Juan entšanga tojánabuatambama y tojanēbáyama inatátšēmo. ²⁶ Nduatjca Apolos tojanontsé jóyebuambayama chě judiēngbe enefjuana yebnentše. Pero Priscila y Aquila cha imojóyeunaye ora, barie tmojanchembo

y más botamana tmojanbuayená, ntšamo Bèngbe Bètsabe injinyèna benache bétsemnama. ²⁷ Apolos Acaya luaroye jama yojtseboše orna, Jesucristbeñe ošbuáchiyènga bètsá tmojanañemó y choca Jesucristbeñe ošbuáchiyèngbiama canye tsbuanácha tmojanichmó, chca, Apolos choca tsabá chamofjama. Acaya luaroye tojánashjango ora, Jesucristbeñe ošbuáchiyènga bètsá tojanéjabuache. Bèngbe Bètsá chèngbe tsabiama yojanjabnáyeca, chènga Jesucristbeñe corente imojtsošbuáchiye. ²⁸ Entšangbe delante chë judièngaftaca jabuachana imojánenatsètsnaye y nyetscanga tojaninýanyé, ntšamo ndoñe tsabá inamncá chë judiènga innatatsèmbuama; y Bèngbe Bètsabe uabemana palabréngaca chènga tojaninýanyé, Jesús Bèngbe Bètsabe Uámana Uabuayaná bétsemnama.

19

Pablo Efeso puebloca

¹ Apolos Corintoca yojtsemnèntscuana, Páblèna chë tjañe luarènguèjana tojánachnèngo y Efesoye tojánashjango; chentše básefta ošbuáchiyènga tojánanyèna, pero chèngna nye ntšamo Juan chë Ubayaná tojanabuatambacá innatatsèmbo. ² Pablo chènga tojanatjá: —¿Uámana Espiritu chenjánabo tsèngaftangbe ainaniñe jtsemándayama, Jesucristbeñe ošbuáchiyènga šmojanóbiamá ora ca?

Chora chènga tmojanjuá: —Ni mo queftsátstatsèmbo chë Uámana Espiritu yomnama ca.

³ Y Pablo tojanéyana: —As, ¿ntšamo šmojánenabaye ca?

Y chènga tmojanjuá: —Fsènjánenabaye ntšamo Juan entsanga yojanèbayancá ca.

⁴ As Pablo tojanéyana: —Juan tojanèbaye chë bacna soyènga amama ngménaca tmojanenajuabó, chca amana tmojanajbaná y chë Bèngbe Bètsabe benache tmojánishachènga, y entsanga yojanètsètsná chë chábentsana yochjanashjanguábeñe chamotsošbuaché ca; y cha Jesús endmèna ca —Pablo tojánayana.

⁵ Chca tmojanuena ora, chènga tmojánenabaye Bèngbe Utabná Jesús jótšèmbonèse, chábeñe imojtsošbuáchemá. ⁶ Pablo chèngbe bestšasiñe chabe cucuatènga tojanajó ora, Uámana Espiritu chèngbe ainaniñe tojánamashèngo jtsemándayama; tmojanontsé inyetsá biyangana, chènga tempo ndmabiyañe, y Bèngbe Bètsabe juabna imojtsoyebuambná. ⁷ Chentše imojtsemna bnètsana uta entsanga.

⁸ Unga shinýèntscuana Pablo yojánaye chë judièngbe enefjuana yebnoye y ndauatjá Jesucristbe soyèngama yojanoyebuambná; entsángaftaca imojánenatsètsnaye y entsanga yojanètsètsná Bèngbe Bètsabe amèndayama, chènga chábeñe chamotsošbuáchemá. ⁹ Pero ba nduauenanènga ndoñe imontsošbuaché y Bèngbe Utabná tojaninýanyé Benachama entsángbeñe bacna soyènga imojtsichamo. Chcasna, Pablo chèngbentsana tojtsanojuánañe y nye chë Jesucristbeñe ošbuáchiyènga tojanèbuaja canye scueloye, canye entsá Tirano ca uabainabe yebnoye. Chentše cada te chë ouenanèngaftaca yojanoyebuambná, ¹⁰ y chca yojánama uta uatèntscuana; y chca, nyetscanga Asia luaroca oyenènga Bèngbe Utabnabe palabra tmojanuena, judiènga y ndoñe judièngnaca. ¹¹ Y Bèngbe Bètsá puerte bèts soyènga Pábloftaca yojtsama. ¹² Tša bèts soyènga tojanma; chíyeca, nyetsca chë Pablo tojuabojajo entsáyá y pañuelèjuangá, entsanga imojanamana šoquèngbioye

juyambana, y chca tmojama orna, chë šocanënga juenatjëmbana y chë bacna bayëjënga entsángbentsana jésebocanana.

¹³ Pero básefta judiënga tsáshenañe bacna bayëjënga entsángbentsana imo-
jtanëbuacana. Chë judiënga imojtseboše chë bayëjënga jtëbuacnana, Bëngbe
Utabná Jesús jótšëmbonëse. As, chë bacna bayëjëngbioye mëntšá imo-
jtsëtsësnaye: “Bëngbe Utabná Jesús, Pablo bondbetsebayaná jótšëmbonëse y
chabe obenánaca cbontsamënda muabentsana chašmuaisebocnama ca.”

¹⁴ Chca imojánama chë judío Esceva ca uabainabe canyëšfta uaquiñënga.
Esceva inamna bachnangbe amëndayá. ¹⁵ Pero canye, Escévëbe uaquiñënga
chca tmojánayana orna, chë bacna bayëja mëntšá tojanëjua: “Atše Jesús
šënduábuatma y šëndétatšëmbo nda Pablo yomnana; pero tsëngaftanga,
ždëmuanyënga šmomna ca?”

¹⁶ As, cachora chë bacna bayëjbe juabna uambayá chëngbioye
tojanontšënja y tša afeño homná bëtsemnayeca chënga tojtsanayëñaná,
jabuache jtsajantšetayëse; chë causa, chënga chë yebnentsana
tmojtsanacheta enašënga y lisiánënga. ¹⁷ Nyëtscanga Efesoca oyenënga,
judiënga y ndoñe judiënga, chca tmojátatšëmbona y corente imojtsanauatja.
Y chca, Bëngbe Utabná Jesús entsanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashajuana y
entsangbe delante imojtsecompšaye, tempo bacna soyënga tmojanmama;
¹⁹ banga, chë bocjuanana soyënga jamama imojanëntšënënga, chëngbe
bocjuanana librëšangá tmojaniyëbo y entsanga imojtsantješna ora,
chëšangá imojtsajuinýiye. Tmojanjuabó ntsachetsá chë librëšangá
betsámanama y tojanóbocna slachna bnëtsana uaranga crocénana nyëtsá.
²⁰ Y chca, Bëngbe Utabnabe palabra más ba entsanga imojtsuenana y chiñe
imojtsošbuachiye y Bëngbe Bëtsá chabe obenana entsángbeñe yojtsinýinýnaye.

²¹ Chca tojanochnëngüentsana, Pablo tojanjuabó Macedonia y Acaya
luarënguëjana jachnënguse, Jerusalenoye jésama. Y yojtsejuabnaye
cha ibojtsemna Jerusalenentsana Romoye jama ca. ²² Asna, chabe
uajabuachanënguentsana útata, Timoteo y Erasto, Macedonioye cha
tojanichamó. Chëntscuana Pablo baseftayté más Asia luarentše tbojanjëtana.

Efesoca entsanga tmojánenbouenana

²³ Chë tempo, Efesoca entsanga corente tmojánenbouenana, chë Bëngbe
Utabná yojtsinýanýná Benache imojtsisháchichanëngbe causa. ²⁴ Chë
entsanga chca tmojanma, er canye entsá mídioca soyënga pormayá,
Demetrio ca uabainá, chënga tojanayëñaná chca jamama. Cha yojanamana
binche soyetémënga japórmana y chëtémënga yojáninýna mo chë Efeso
puebloquëngbe diosá Artemisa jadórama bëtš yebná. Demétrioftaca
imojantrabájanga bëtscá crocénana imojanójacañe chë soyetémënga
eniñe. ²⁵ Demetrio tojanëbuaja cháftaca imojantrabájanga y ínýenga
cach mídioca soyënga pórmayënga, y mëntšá tojanëyana: “Bacongá,
tsëngaftanga šmondétatšëmbo, bënga bëtscá crocénana jtsebonnamna
quem trabajuentsana chca jopódiana. ²⁶ Pero tsëngaftanga šmontsonýá y
šmontsuenana ntšamo chë Pablo ca uabainá yojtsichamcá. Cha entsichamo,
chë entsangbe pormana soyënga ndoñe yontsemna jtsadoránana ca; y chca
ba entsanga tojabuayená y chënga aíñe montseyunana. Chë soyna ndoñe
nyë muentše Efesentše chca quenátapasana; nyëts Asia luariñnaca chca
entsopasana. ²⁷ Resjo entsemna; chca causa, entsanga bëngbe trabajuama

ndoñe tšabá quemochátichamo y chë uámana Artemisa jadórama bëts yebnama mochántsichamo uámana yebna ndoñe yondmëna ca. Y chca, Artemisbe obenana entsanga mochántsábotena y Artemisa ndoñe bañe quemochátabatma, nda Asientše y nÿets luarífnaca mondadorana ca.”

²⁸ Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquënge Artemisa corente bëtsá endmëna ca!”

²⁹ Y chca, nÿetsca chë pueblentsa entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambayata; y sjoónana tmojanënatse chëngbe enefjuana yebnóntscöñe.

³⁰ Pablo tojánbošëna choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

³² Chëntscuana, entsanga imojtsejotonocna, ínÿenga imojtsechëmbumbuana canÿe soye y ínÿengna ínÿe soye, chënga corente imojtsebouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. ³³ Pero básefta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánëfjatsëmbo cucuátšëca iytëca chamobiamama, er cha yojtseboše entsangbe delante chë judiënga jobuauyanama. ³⁴ Pero, Alejandro judío bemnama chë entsanga tmojánatšëmbona ora, nÿetscanga tmojanáyebuachena uta horëntscuana, mëntšá: “¡Efesoquënge Artemisa corente bëtsá endmëna ca!”

³⁵ Chë pueblentsa mándayënge uajabuachaná, entsanga iytëca jábiamama tojanobená ora, tojanëyana: “Efesoquënga, nÿets luaríñe endótátšëmbo, quem pueblentše oyenënga iuamna jtsinÿenana chë Artemisa jadórama bëts yebna y chë cha jadórama celocana otsatšëna ndëtšbé. ³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. ³⁷ Tšëngaftanga quem boyabásënga moye šmojunatse, masque Artemisbe yebnentše tondaye tmonjatsbëba y bëngbe Artemisbiana ndoñe podësca tmonjoyebuambá. ³⁸ Demetrio y cháftaca šmotrabájanga, nderado ndabiana ndaye demanda šmojtsebomnëna, cabildoca endatëfjna y chentše mándayënga montsemna chë demandënga joudenama, y chëngbentše cada ona šmochjëftsendemánda. ³⁹ Y tšëngaftanga ínÿe soye šmojtseguasna, cmontsamna ntšamo bëngbe leyënguifne yomandancá, nÿetsca quem pueblentše oyenëngaftaca jenóyeunayana. ⁴⁰ Ndayá mënté tojopasá causa, resjo entsemna bëngbiana chamuayana, ntšamo leyënguifne yomncá bënga ndoñe montsama ca; y bënga ndoñe quemuátobena ndayá jojuana, ndáyecá quem enbouenanana tojopasá ca šojátjayëse ca” —cha tojanëyana. ⁴¹ Y chca jayanëse, chë entsanga tojtanichamó.

20

Pablo, Macedonia y Grecia luaroye tojána

¹ Chë enbouenanana tojanochnëngo ora, Pablo chë Jesucristbeñe ošbuachiyëngbioye tojanëbuaja jábuayenama, añemo chamotsatsbomnana; tojesanodiošoftá y Macedonioye tojëftsanbocna. ² Chë luarënguëjana cha tojánachnëngo Jesucristbeñe ošbuáchiyënga becá añemo atatsatnaye, ba chabe

palabrëngaca; chentšana, Grecia luaroye tojánashjango, ³ y chentše unga ishinýe tojanoquedá. Barquëshañe Sirioye játama Pablo yojtseprontana orna, tojántatsëmbona chë judiënga cha jtsóbama tmojanenóyeunama. Asna, tojanenojuabó jesshëconama, cach Macedonia luarëjana jésachnënguse. ⁴ Pablo quem boyabásenga tmojantjëmbambá: Sópater, chë Bereocá, Pírrbe uaquiná; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófirmaca, Asia luarocata. ⁵ Chënga tmonjanonatsé y šonjanëbatma Troasoca. ⁶ Chë lewadúraca ndëpormana tandëse saye fiestentsana, Filíposentsana barquëshañe fsënjëftsanbocna y shachna tianoye, Troasoca chë tmonjanonatsenga fsëntanishëche, y chentše canýe semana fsënjanoquedanga.

Ntsamo tojanopasá Troas puebloca

⁷ Chë inýe semana jobojátsama te, fsënjánenefjna Jesucristbeñe ošbuachiyëngcá tandëse jajátayama, cánýiñe jasama; y Pablo entšanga enjëtsëtsësnaye. Cha bonjamna yëfsana chentšana jëftsebocnana; chë causa, más bën chëngaftaca tonjanoyebuambá, tsëntsetëntscuana. ⁸ Fsënjamna canýe tsoye tshanana tsañoca y chentše ba uajuinýanëshangá enjanamna; ⁹ y canýe bobontse, Eutico ca uabainá, ventanentše enjántbemana. Pablo bën enjanoyebuambná causa, chë bobontse ocayana tbojanábuache. Cabana, corente tojtsanomaná ora, chë unga tsañocana tontsanótsatše y obaná chora tmontanatsbaná. ¹⁰ As, Pablo tonjánastjango, chë bobóntsbiroye tbonjanotsbuajó y tbonjanotsejcuá. Y chë entšanga tonjanëyana: “Ndoñe nyëtšá matauatjëngana; ainá cha entsatsmëna ca.”

¹¹ Chentsana Pablo cach tshanánye tonjesaná y tandëse tonjanjatá, jtenójuaboyama ndayá Jesús jóbanëse tojanmama. Chora Pablo chë entšángaftaca tonjanse y tontëtanontsé oyeambuambayana, jabinýnëntscuana. Chora Pablo chentšana tontsanoñe. ¹² Y chë otsatsëna bobontsna ainá imojtsatánatseñe, y chama chë entšanga corente oyejuayënga imojtsemna.

Pablo Troasentsana Mileto pueblroye tojána

¹³ Bëngna fsënjanonatsé y barquëshañe fsënjána Aso pueblóntscoñe, chentšana Pablo jtesbetšama, ntsamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fsëntaneninýena ora, bëngaftaca barquëshañe cha tonjána Mítilene pueblroye. ¹⁵ Chentsana fsënjëftsanbocna y yëfsana Quío luarëjana fsënjánachnëngo, y chë inýe yëfsana Samos luaroye fsënjánashajjna. Chentsana fsënjána y yëfsana Mileto pueblroye fsënjánashajjna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndëtsemnama. Chca tojánbošena er cha enjëseboše betesco Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntsamo Pablo chë Efesoca ošbuachiyëngbeñe bëtsëjemëngcá mándayënga tojanëyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. ¹⁸ Chënga tmonjánashajjna ora, Pablo tonjanëyana: “Tšëngaftanga šmondëtatšëmbo ntsamo atše quem Asia luaroye sënjabánashjango orscana tšëngaftangbeñe snetsamana. ¹⁹ Nyëts tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguñe tijasufri,

chë judiënga atše jóbama mondboše causa. ²⁰ Y lempe ntšamo tšëngaftangbe tšabiama yomncá tčonjabuayená; tondaye ntjatsbuetamencá. Njëtscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmëñaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchema. ²² Y mora Jerusalenoye chanjá; Uámana Espiritu chca šontsemánda y ndayá choca chjapásamna ndoñe quetsátstatšëmbo. ²³ Një mëntšá aiñe sëndëtatšëmbo: Njëtscá bëts pueblënguenache ndayëjana atše chandbëtsana, Uámana Espiritu šondbëtsebuayiyenaye entšanga cašmochjutame y puerte chaisufrima camochjama ca. ²⁴ Atšbe vida cach atšbiamá ndoñe yapa quenatámama, chaitsaina o chayóbana. Pero atšbiamá iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšàngaftaca tšabia yomnama jábuayenama.

²⁵ “Y mora atše ndegombre sëntsetatšëmbo, tšëngaftangbentšana, chë ndëmuanjëngbentše Bëngbe Bëtsabe amëndayama sënjabuayená, ndocná atše más quešmochátinye. ²⁶ Chiyeca, atše ndegombre mënté cbetsëyana: Atše tondaye quetsátstatšëmbo nderado nda ndatsbocaná chaojóbanabiamá, ²⁷ er atše ntšamo Bëngbe Bëtsá jamama yojuabnacá lempe tčonjabuayená, tondaye ntsebuetamencá. ²⁸ Chcasna, cach tšëngaftangbiamá šmochtsantješna y njëtscanga muentše Jesucristbeñe ošbuachiyëngbiámna. Chëngbeñe mo chëngbe abuajënyangcá Uámana Espiritu tčmonjajayé, Bëngbe Bëtsabe entšanga chašmotsanjenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëse y jóbanešë, mo bëtscá cuafjopagacá. ²⁹ Atše sëntsetatšëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuachiyënga chábeñe ošbuachiyënga chamotsajbanama chënga jamama. ³⁰ Y tšëngaftangbentšánëñaca báseftanga mochanjábocana y entšàngbïoye uayátšenaye soyënga mochanjabuatambá, chca, báseftanga Jesucristbeñe ošbuachiyënga chë ínjëngbentšana chamotsoluarema y një chë abuatambayëngbïoye chamotsësetonama. ³¹ Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnëté y ibeta, tšëngaftanga cada ona chondëtsabuayiyenama y chama atše puerte tijasufri.

³² “Y morna, Jesucristbeyeca catsátanga, Bëngbe Bëtsabe cucuatšïñe cbëtsabashejuana y ntšamo tšëngaftangbiamá chabe tšabe juabna yomnama palabréngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchemá, y endobena tšabe soyënga tšëngaftanga jatšatayama, ndayá jatšatayama tojanašebuachenacá mo tšëngaftangcá entšàngbïoye, ndëmuanjënga cha tojáchembo chabe entšanga chamotsemnama. ³³ Atše ndocnabe crocénana, o castellano o entšayá atšbiamá quetsatántšaboše; ³⁴ más injëtšá, y tšëngaftanga lempe šmondëtatšëmbo, atše cach atšbe cucuatšëca tijëftsetrabajama, atšbiamá y ántšëftaca imojamnëngbiamá opresido enjamna soyënga janguanguama. ³⁵ Atše njëtš tempo sëndinjanjñá entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesúsbe palabréngama sempre jtsejuabnayëse: ‘Canjë entšá más oyejuayá jtsemnana

ndayánaca ínʼyabioye tbojtsatsetná ora, y ínʼyabioye tbojtseyëngacá ora ndoñe nʼya nʼyetšá ca' ” —Pablo tonjanoyebuambá.

³⁶ Pablo chë soyënga tonjánayanentsana, tonjanoshamentšé y nʼyetścanga chentše monjëtsemnëngaftaca Bëngbe Bëtsá tmonjanótsëmbona. ³⁷ Nʼyetścanga tmonjánenobošachna y Pablo tmontanotsejjuá y tmontanámocho. ³⁸ Y entsanga corente ngménaca monjëtsemna, chënga ndocna te más cha mochántinʼye ca Pablo tojanéyana causa. Chentšana, chënga chë barquësha enjetsamnëntscoñe cha tmonjantjëmbambá.

21

Pablo Jerusalenoye tojána

¹ Chë Jesucristbeñe ošbuáchiyënga fsënjëftsanasashejuana ora, barquëshañe fsënjänenojayé y ndericho Cos luaroye fsënjána; chë yëfsana Rodasoye y chentšana Pátara puebloye. ² Pátara pueblentše canʼye barquësha fsënjáninʼyena, Fenicioye enjëtšaye; asna, chëshañe fsënjänenojayé y chentšana fsënjëftsanbocna. ³ Fsëntsanachnëjuana ora, fsënjáninʼye Chipre luare; Chipre bëngbe uañicuayoica tonjanoquedá y bëngna Sirioye fsënjëtšaye. Tiro pueblentše chë barquëshentša uasmanëshangá jëtsáboshjonama yojámnyeca, chë puebloye bënga fsënjëftsanamashjna. ⁴ Chentšna, Jesucristbeñe ošbuáchiyënga fsënjánanʼyena y canʼyëšfta te chëngaftaca fsënjanoquedá. Chënga Pablo tmonjanianya cha ndoñe ibonjamna Jerusalenoye jtsayana ca, er chë Uámana Espíritu tojanabuayená ndayá choca cháftaca jopásama. ⁵ Chë canʼyëšfta te tonjanochnëngo ora, chentšana fsënjëftsanbocna y nʼyetścanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentše, chë chëñyañe fsënjanoshamentšé y Bëngbe Bëtsá fsënjanimpadá. ⁶ Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

⁷ Tirentšana fsënjëftsanbocna y Tolemaida puebloye fsënjánashjajna; y chentše tonjanopochocá bëngbiana bejaycá chë te ayana. Tolemaidentše Jesucristbeñe ošbuáchiyënga fsënjanacheuá y chëngaftaca canʼye te fsënjanoquedanga. ⁸ Yëfsana, bënga chentšana fsënjëftsanbocna y Cesarea luaroye fsënjánashjajna. Chocna, bënga fsënjána Felipe chë Jesucristbiana tšabe noticiënga abuayiyayabe yebnoye y cháftaca fsënjanoquedanga. Felipe enjamna canʼya chë Jesucristbe ichmónëngbiyoe ujabuachanënguentšá, Jerusalenoca ubuáyanënga. ⁹ Felipe enjánabamna canta ndëbouamna bembiana y chënga monjamna Bëngbe Bëtsabe juabna oyebuambnayënga. ¹⁰ Ya bayté chentše fsënjëtsemna orna, Judeocana tonjánashjango canʼya Bëngbe Bëtsabe juabna oyebuambnayá, Agabo ca uabainá. ¹¹ Agabo bëngbiyoe tonjánashjango ora, Pablëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalenoca quem uasnanëja nduíñbiyoe chë judiënga mëntšá camochjama y ndoñe judiëngbe cucuatšinë camochjáboshjona ca.”

¹² Chca fsënjanuena ora, bënga y chentša entsanga Pablo fsënjanimpadá Jerusalenoye ndoñe chaondëtsama. ¹³ Chora Pablo tonjánayana: — ¿Ndáyeca šmojtsošaché y šmojtsama atšbe ainaniñe puerte ngménana chaotsemnama ca? Atše sëntseprontana y ndoñe nʼye chašmobatsëcamá;

Jerusalenoca jobanámnaca sěntseprontana, Běngbe Utabná Jesusbiamca — cha tonjánayana.

¹⁴ Jáyěnanama ndoñe chibiatanobená ora, ndoñe más chibiatanimpadá; nýe měntśá fsěnjaniyana: —Ntśamo Běngbe Utabná yojtseboścá chaotsemna ca.

¹⁵ Chě soyěnga tonjanochnėngüentsana, fsěnjanoпрontá y Jerusalenoye fsěnjána. ¹⁶ Cesareoca, básefta Jesucristbeñe ośbuáchiyěnga choye ŝonjanatjěmbambá y chocna, chěnga ŝonjaněnatse canýe Chipre luaroca entśabe yebnoye, Mnasón ca uabainá, ndábentśe běnga joquédama. Mnasón tempścana inamna Jesucristbeñe ośbuachiyá.

Pablo tojána Santiago jauatsěsayama

¹⁷ Jerusalenoye fsěnjánashjajna orna, chentśa Jesucristbeñe ośbuáchiyěnga oyejuayěnga ŝonjaněbuaja. ¹⁸ Yěfsana, Pablo bėngaftaca tonjána Santiago jábuachama, y chentśe, nýetsca chě ośbuachiyěngbeñe bėtsějeměngcá mandayěngnaca monjěsemna. ¹⁹ Pablo tonjanacheuá y chentśana tonjanacuntá lempe ntśamo Běngbe Bětsá Páblěbe trabájoca chě ndoñe judiěngbeñe tojanmama.

²⁰ Chca tmonjanuena ora, Běngbe Bětsá tmontanchuá y Pablo měntśá tmonjaniyana: “Morna, Jesucristbeyeca bėngbe catśata, contsonýá ntśamo ba uaranga judiěnga Jesucristbeñe imojtsośbuáchemca, y chěnga nýetscanga montsantjeśna nýetsca Jesucristbeñe ośbuáchiyěnga chě Moisesbe leyentśa nýetsca manděnga chamotsocumplínama. ²¹ Y entśanga chėngbioye noticia tmojatśatá, aca chě inýe luarėnguenache imoyena judiěnga cojtsabuatambá, Moisés tojanmandá soyěnga ndoñe ntseyeanama y basetéměnga base bobachtemca chě más delicadentśe ndoñe ntjatětsama, ntśamo bėnga judiěnga fsėnduamancá, y ntśamo bėnga fsėndětatsěmbcá ndoñe chamondětsamana ca. ²² Y morna, ĩntśamo chě soyěngama cochtsemna? Ndegombre, chěnga mochanjátatsěmbona aca moye tcojabama. ²³ Chcasna, ntśamo chochanjabuayenacá cohjama: Bėngbentśe canta boyabásenga montsemna y chěnga entsamna Běngbe Bětsabiamca canýe ŝbuachenana soye jamama. ²⁴ Acaftaca cohjunatse, chėngaftaca cochtsemna y chėngcá cochtsama Běngbe Bětsabe delante tśábengca jtsatsmėnama ntśamo chamojtsama ora, y ntsachetśá jětsjájuaa chaojtsamncá, aca cohjětsjájua, as chěnga chamobená nýets stjėnashe jtsenátsbotjiamca, jinýanýiyama, ntśamo Běngbe Bětsábioye tmojaśbuachenacá ya tmojamama. Y chca, nýetsca judiěnga mochanjinýe ndoñe ndegombre yontsemna chě ntśamo chėngbioye acbiamca tmojacuntacá; masna, chěnga mochanjátatsěmbona aca ndegombre ntśamo Moisesbe leyiñe yomandancá icuamama. ²⁵ Y chě ndoñe judiěnga Jesucristbeñe imojtsośbuachengbiamna, bėnga ya fsěnjubuábiamca y fsěnjájuyana ndayá jtsocumplínama chěnga yojtsamnamca, měntśá: ‘Ndoñe chamondětsesá měntśena, chě entśanga tmojtsejuabná diosėnga imomna soyěnga jadórama tmojyėbana; ni buiñe, ni tśesana bayěngbe měntśena; y ndoñe chamondětsama bacna soyěnga shembásenga y boyabásengaftaca ca’ ” —chěnga tmojánayana.

Běngbe Bětsabe bėts yebnentśe judiěnga Pablo tmojánishache

²⁶ As Pablo, yěfsana chě cántanga tonjaněnatse y chėngaftaca tonjanma soyěnga Běngbe Bětsabe delante tśábengca jtsatsmėnama. Chentśana, Pablo Běngbe Bětsabe bėts yebnoye tonjánamashėngo chě bachnanga júnayama,

ndayténtscōñe yojamna chë cantangbiana soyënga jtsamama, Bëngbe Bëtsabe delante tsábenga jtsatsmënana, y jayanama ndayté chëngbiana yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabiama juatšëmbonama.

²⁷ Chënga tmojanenoyeuná y tmojánayana canýsëfta tentscuana chca jamana ca. Chë canýsëfta te ya jochñënguama yojtsemna orna, básëfta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entšanga chamuenbouënanama. Y cha tmojánishache, ²⁸ mënšá jtsayebuáchëse: “¡Israeloca entšanga, šmabëtsëjabuache ca! Quem boyabása entsemna chë nýets luarënguenache iuana abuátambaye soyënga bëngbe entšangbe contra, y ntšamo bëngbe leyënguiñe endayanama contra, y quem Bëngbe Bëtsabe bëts yebnama ndoñe tsábá yontsoyebuambná. Y cabana quem Bëngbe Bëtsabe bëts yebnoye grieguënga tojúmashengo, y chca cha tonjama chë Bëngbe Bëtsabe bëts yebna Bëngbe Bëtsabe bominiñiñe ndoñe tsábá chaondëtsemnama ca” —chënga imojtsichamo.

²⁹ Chca imojtsichamo, er entšanga Pablo tmojáninýe chë bëts pueblentše Trófimo Efesocáftaca; y imojétsejuabnaye chábioye Bëngbe Bëtsabe bëts yebnoye Pablo tbojanánatse ca.

³⁰ Nýetsca chë pueblentša entšanga tmojánenbouenana, y ochamanana chë Pablo yojtsemnoye tmojánashjajna. Pablo tmojánishache y Bëngbe Bëtsabe bëts yebnentšana shjoye tmojtsansjojó, y cachora chentša bëšašangá tmojtanatame. ³¹ Jtsóbama ya imojtsebuachéta ora, chë Romoca soldadëngbe mandayá tojánatšëmbona nýetsca chë bëts pueblentša entšanga imojtsenbouenana. ³² Asna, chë mandayá chabe soldadënga y inýe chentša amëndayënga tojánachembo y cánýiñe chë entšanga imojtsemnoye tmojétsanótjajo. Entšanga, chë mandayá y chë soldadëngbioye tmojánanýe ora, tmojtsanajbaná Pablo jantšetayana.

³³ Chorna, chë soldadëngbe amëndayá tojanobeconá, Páblëbioye tbojánishache y tojanmandá uta cadenëjuaca cha chamotsebátsécama y tojanatjá: “¿Nda mua yomna y ndayá tojama ca?” ³⁴ Pero chë entšangbeñe, inýenga canýe soye imojtsáyebuache y inýengna inýe soye; y chca, ntšamo ndegombre tojanopasama jtsetatšëmbuama chë mandayá ndoñe tonjanobená; chcasna, cha tojanmandá Pablo chë soldadëngbe oyenoye chamuánatsama. ³⁵ Chë soldadëngbe oyenoca grádasbengoye tmojánashjajna ora, chë soldadënga tojanotocá Pablo cutsnana juambama, chë entšanga tša rábiaca imojtsemna causa, ³⁶ er chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entšangbe delante tojanenëuyaná

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjá: —¡Aca icobena griego biyañe jóyebuambayama!
³⁸ As, ¿aca ndoñe condmëna chë Egiptocá, chë ndoñe bayté quenátsmëna entšanga yojanëtsëtsná chë mándayëngbe contra chamotsemnana y chë canta uaranga podesca uamana entšanga puñálaca uajatëngaftaca, entšanga ndoyena luaroye tojanbocná ca?

³⁹ Chora Pablo tbojanjuá: —Atše judío sēndmēna, Tarso pueblota on̄yānā, can̄ye uámana pueblentše Cilicia luaroca; Diosmanda šmolesenciá entsānga jáuyanama ca.

⁴⁰ As, chē soldadēngbe amēndayá chca tbojanlesenciá. Páblēna chē gradas-benguīñe tojantsá y cucuatše tojanatsbaná entsānga iytēca chamobiamama. N̄yetscānga iytēca imojtsemna orna, Pablo hebreo biyañe mēntšá entsānga tojanēyana:

22

¹ “Baconga y taitanga, mora šmochjouena atše jenēuyanama ntšamo chjayancá ca.”

² Pablo cachēngbe biyañe, hebreo biyañe yojsóyebuambnāma entsānga tmojanuena ora, más iytēca tmojanobiamā. As Pablo tojanēyana: ³ “Atše judío sēndmēna. Tarso pueblentše, Cilicia luaroca sēnjanon̄yā, pero muentše Jerusalenentše sēnjanoboché y sēndētatsēmbō soyēngna Gamaliélbeyeca chca botamana sēnjanatsjin̄ye. Cha corente tsabá sonjanbuatēmbá bēngbe bēts taitangbe leyēnga; n̄yets atšbe ainánaca Bēngbe Bētsá sēndēservena, ntšamo n̄yetsca tsēngaftanga mora šmotsamancá. ⁴ Atše sēnjānāma chē Jesucristo tojanin̄yan̄yē Benache ústonēnga chamosufrima y chamóbanāma; boyabāsenga y shembāsenga sēnjanētabaye y cárceloje sēnjanautame. ⁵ Chē judío bachnangbe más uámana amēndayá, n̄yetsca chē judiēngbeñe bētsējemēngcá mándayēnga y in̄ye muentša mándayēnga mondobena jayanana ntšamo sēntschamcá ndegombre yomnāma. Chēnga uabemana tsbuanachangá šmonjanīyē, bēngbe catšátanga judiēnga chamotsetatsēmbuama atše mando tsanbomnāma, Jesucristbeñe ošbuáchiyēnga jótabayama; y Damascōye sēnjāna choca Jesucristbeñe ošbuáchiyēnga jótabayama, moye Jerusalenoye junatsama jacastígayama.”

Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)

⁶ “Pero can̄ye te benachiñe Damasco béconana sēnjétsaye orna, mo n̄yetsto ora, n̄ye ndeolpe atšbe juachañe can̄ye bēts tcuin̄ye celocana tonjanbuashin̄yīñyēna. ⁷ Y fshantsoye sēnjétseshajaye y can̄ye oyebuambnayana sēnjanuena mēntšá: ‘Saulo, Saulo, ¿ndáyeca šcojtsacmena ca?’ ⁸ Atše sēnjantjá: ‘¿Nda comna, Bēngbe Utabná ca?’ Y chē oyebuambnayana sonjanjuá: ‘Atše sēndmēna Jesús Nazaretocá, y aca condama atšbe entsānga chamot-sesufrināma ca.’ ⁹ Chē átseftaca monjánajnēnga chē bēts tcuin̄ye tmojánin̄ye y tmojanouatjananga, pero chē oyebuambnayana ndoñe tmonjanuena. ¹⁰ Chora atše sēnjantjá: ‘¿Bēngbe Utabná, ndayá jamama šojtsemna ca?’ Y cha sonjanīyana: ‘Matētsbaná y mētētontšé Damascōye jama. Chentše can̄ya cmochanjabuayená ndayá jamama cmojtsemnāma ca.’ ¹¹ Chē tcuin̄ye yapa tonjanbuashin̄yīñyēna causa, atše jtaná sēnjanoquedá. Chcasna, chē in̄yēnga šmontanobuacuetēntšé y chca, Damascōye sēnjánashjango.

¹² “Chentše enjamna can̄ye bacó Ananías ca uabainá; cha inoyena ntšamo Bēngbe Bētsá yobošcá y yojānāma ntšamo bēngbe leyēnguiñe iuayancá, y n̄yetsca chentša judiēnga monjanamana chabiamā tsabá jtsóyebuambnayana. ¹³ Cha tonjánabo atše jin̄yama y tonjánashjango ora, sonjanīyana: ‘Jesucristbeyeca atšbe catšata, Saulo, chacmotsatabin̄yā ca.’ Cachora y cha sēnjánin̄ye.

¹⁴ “Chentšana cha tonjánayana: ‘Bēngbe bēts taitangbe Bētsá aca tcmojuábuayana, ntšamo cha acbiama yobošcá chacotsetatsēmbuama, chē

nÿetsca soyënguiñe Tšabá Amá chacuinÿama y cachabe uayásentšana chacóyeunama. ¹⁵ Bëngbe Bëtsá chca tojama, aca chë chabe buayenana soyëngama entšángbeñe chacóyeubambama, y chamna nÿets luarentša entšángbeñe cochjacuénta, ntšamo tcojinÿe y tcojouencá. ¹⁶ Y mora, jndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnana ca’ —cha šonjaniyana.

Pablo tojanacuntá ntšamo chë ndoñe judiëngbiroye tmojánichmoma

¹⁷ “Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquécá sënjanoquedá. ¹⁸ Chca ora, Bëngbe Utabná sënjáninÿe y cha mëntšá šonjaniyana: ‘Betsco motsa y cam ora Jerusalenentšana métsebocna; quemuentša entšanga ndoñe quecmochatóyeunaye ntšamo atšbiana condétatšëmbo y contšëtsësnacá ca.’ ¹⁹ Atše sënjanjuá: ‘Bëngbe Utabná, chënga mondétatšëmbo atše sënjánana nÿetsca chëngbe enefjuana yebnënguenache y chë áceñe ošbuáchiyënga sënjanëtámiana y sënjánatsetšenaye; ²⁰ y achiana ndegombre oyeubambnayá Esteban tmonjanóba ora, átsnaca chentše sënjamna y tšabá imojtsama ca chama sënjetsejuabnaye, y cabá chë monjanóbanangbe entšayëjuangá atše chora sënjanabojanÿá ca’ —atše sënjanjuá. ²¹ Pero chca sënjánayana ora, Bëngbe Utabná šonjaniyana: ‘Motsa; atše bën luarëngoye, ndoñe judiëngbiroye cbochanjíchmuca ca.’ ”

Pablo y chë soldadëngbe amëndayá

²² Chë entšanga chëntscoñe tmojanuena; pero chë ndoñe judiëngbiana tojanoyebuambá orna, chënga tmojanontšé uayebuáchana: “¡Ndoñe tšabá quenátšmëna cha vídaca chaotsemnana! ¡Motsóba ca!” ²³ Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsëbëntaye y tsbanánoye polvëshe imojtsëtsana; ²⁴ chë causa, chë mandayá tojánayana chë soldadëngbe oyenoye Pablo chamotšëmashëngo ca, y tojanmandá chamotsetjanja chaoubambama ndáyeca entšanga chca chabe contra imojtsáyebuache. ²⁵ Pero jtsetjanjama ya tmojanbatsëca orna, chentše imojtsemna soldadëngbe amëndayábroye Pablo tbojantjá: —¿Tšëngaftanga šmobena canÿe entšá derecho bomná mo canÿa Romoca onÿnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶ Chë básefta soldadëngbe mandayá chë soye tojanuena ora, tojána y nÿetsca soldadëngbe amëndayábroye chama ibojuenaye, mëntšá: —¿Ndayá cochjama? Chë entšá derecho bomna mo canÿa Romoca onÿnanacá canmëna ca.

²⁷ As chë amëndayá tojána Pablo yojtsemnoye y tbojaniyana: —Smëyana, ¿aca derecho bomná mo canÿa Romoca onÿnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atše becá crocénana sënjetsajó mo canÿa Romoca onÿnanacá derecho jtsebomnana ca.

As Pablo tbojanjuá: —Y atšna derecho bomná mo canÿa Romoca onÿnanacá sëndmëna atše tijanonÿná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentšana tmojanjuaná; y chë mandayánaca tojanjuaná y yojtsauatja, Pablo derecho bomná mo canÿa Romoca onÿnanacá yojamnama tojántatšëmbona ora, er cha tojanmandá Pablo chamotsebátsëcama.

Pablo, Jerusalemntša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyëtsca chë judiëngbe amëndayënga chamobéconama. Chentšana, Pablo tbojanábocna y chëngbe delante tbojanatsá.

23

¹ Chora Pablo, nyëtsca chë mandayëngbiocyte tojanënyänýe y tojanëyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. ³ Pero chora Pablo Ananíasbiocyte tbojanjuá: —Bëngbe Bëtsá ácnaca cmochanjëtsjantšetá, bacna entšá, ntšamo ndegombre tcojuabnacá ndinýinýayá! Aca chentše consetbemana tšabá o ndoñe tšabá tijamama jayanama, ntšamo Moisesbe leyinë yomandancá; as, ¿ndáyeca cojtsemánda chašmojantšetama? Chca chë leyinë ndoñe quenátslesenciana ca.

⁴ As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioyce cochjýenguango ca?

⁵ Chora Pablo tojánayana: —Taitanga, atše ndoñe quetsátstatšëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrenguiñe mëntšá endayana: “Entšangbe mandayabe contra ndoñe catjayana ca.”

⁶ Pablo tojáninýe chë mándayënguentše báseftanga saduceunga y ínýengna fariseunga imojtsemnana; as, mëntšá tojanáyebuachena: —Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tšobátmana causa, atše ndoñe tšabá sëntsama ca tšëngaftanga šmochjayana ca.

⁷ Pablo chca tojánayana ora, chë fariseunga y saduceunga tmojanontšé enatsëtsnayana, y chë causa nyëtsca entšanga ndoñe cachcá imontsejuabnaye.

⁸ Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aiñe chë soyënguiñe jtsošbuáchiyana. ⁹ Y nyëtscanga tša imojtsáyebuache; asna, básefta fariseunga ley abuatambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canýe ángel o espíritu muábioyce ndegombre tbojayana ca.”

¹⁰ Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

¹¹ Yëfsana ibeta, Bëngbe Utabná Páblëbiocyte tbojánëbëbocna y tbojaninyana: “Pablo, ainaniñe añemo cochtsebomna. Ntšamo aca atšbiamna condëtatšëmbo y muentše Jerusalemntše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inýe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

¹³ Chca jamama tmojanjuabó entšanga imojamna canta bnëtsanëngama

más. ¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbiöye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. ¹⁵ Morna, tšëngaftanga y chë inye muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjauyana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Páblëbe uabenbe uaquiñá chë soye tojántatšëmbona; asna, tojána chë soldadëngbe oyenoye, chama Pablo jauenayama. ¹⁷ Chorna, Pablo canye básefta soldadëngbe mandayábioye tbojanchembo y tbojaniyana: “Dios-manda quem basa mánatse chë nyetsca soldadëngbe amëndayábioye; canye soye entsebmna chábioye juenayama ca.”

¹⁸ As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmna canye soye aca jauyanama ca.”

¹⁹ Chë soldadëngbe amëndayá chë bobóntsbiöye tbojëftsanobuácuetëntsiye, luaroye tbojanánatse y tbojantjá: —¿Ndayá cojtsebmna atše jauyanama ca?

²⁰ As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbiöye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. ²¹ Pero ndoñe catjóyaunaye; chënguentšana canta bnëtsanëngama más entšanga iytëmenënga Pablëbiana montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

²² Chentšana, chë soldadëngbe amëndayá chë bobóntsbiöye tbojanmandá, ndayá ibojuenayama ndocnábeñe ntsecuëntayana, y chentšana tbojtanichmó.

Pablo tmojanánatse Félix, chë Cesareoca mandádbioye

²³ Chentšana, chë soldadëngbe amëndayá tojánachembo útata chë inye soldadëngbiöye mándayënguentšana, y tojanamëndá chamoprontama uta patse soldadënga, inye canyëšefta bnëtsanënga couayënguife y inye uta patse lanzëšangaca, Cesarea puebloye ibeta, las nueve ora jabocanama; ²⁴ y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵ Y canye tsbuanácha chëngaftaca tojanichmó y chëchañe mëntšá yojtsábemana:

²⁶ Claudio Lisias, chë bëts uámana mandado Felixbiana: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canya Romoca onýnanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentšana cha sënjatsbocá.

²⁸ Atše sëntseboše jtsetatšëmbuana ndaye soyama chënga chabe contra imojtsichámuama; as, cha sënjuánatse nyetsca chë judiëngbe amëndayënga

montsemnoye; ²⁹ y chentšana, atše sēnjátatsēmbona chēnga chabe contra imojtsichamo ana cachēngbe leyentša soyēngama, pero cha tondaye tonjobuachjanguá, cha jóbama bēnga chašotsamnama, ni mo cárceloje jutámíama. ³⁰ Pero atše sēnjátatsēmbona chē judiēnga tmojenoyeuná cha jtsóbama; chíyeca, cam ora cha ácbioye sēntsichamná, y chabe contra ichámēngna sēnjáuyana, ndayá muabe contra jayanama imojtseboincá acbe delante chamuayana ca.

³¹ Chentšana, chē soldadēnga tmojanma ntšamo tmojanamēndacá, ibeta Pablo tmojéftsanbetše y Antípatris puebloje tmojanánatse. ³² Yéfsana, chē shecuátseca tmojána soldadēngna cach soldadēngbe oyenoye tmojésanshēcuana, y chē couayíne enjaquenēnga Pábloftaca tmojána. ³³ Cesareoye chēnga tmojánashjajna ora, chē tsbuanácha chē mandádbioye tmojanantšabuaché, y Páblēnaca chabe cucuatšíne tmojánboshjona. ³⁴ As chē mandado chē tsbuanácha tojanalía; chentšana, cha tojanēnoticiá ndaye luarocá Pablo inamnama, y Cilicia luarocá cha inamnama cha tojántatsēmbona ora, ³⁵ tbojaníyana: “Acbe contra ichámēnga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bēts yebnoca Pablo chamotsebojanýama.

24

Ntšamo Pablo chē mandado Félixbe delante tojanenēuyana

¹ Shachna tianoye, Ananías, chē bachnangbe más uámana amēndayá, Cesareoye tojána báseftangaftaca chē judiēngbeñe bētsējemēngcá mándayēnguentšana y canýa entšanga obuauyayáftaca, Tértulo ca uabainá; y chē mandádbioye chēnga tmojána Páblēbe contra jayanama.

² Pablo tmojanábocna ora, Tértulo tojanontsé chabe contra jayanama y Félixbioye tbojaníyana: “Aslépaye, taita mandado, ácbeyeca bēnga natjēmbana fsēndoyena y aca puerta obiashjachá cómnayeca ba tsabe soyēnga quem luarentša entšangbíama yojtsebinýna. ³ Nýets tempo y nýetsquénache chē soyēnga fsēndóyēngacañe, bēts uámana mandado, y bēnga chama corente cbondtsechuaná. ⁴ Pero ndoñe yapa bēn jatenbiamnayamna, Diosmanda ratotema šmotsoyauná. ⁵ Bēnga fsēntsetatšēmo quem boyabása entšanguentše entsemna mo hacna shacuancá, nýets luarēnguenache yojtsana y yojtsama chē judiēnga nýetscanga cachca soye ndoñe chamondētsejuabnama, y cha yojtsemna chē Nazaretocabe ustonēngbe uanatsaná. ⁶ Y tonjábosena jamama Bēngbe Bētsabe bēts yebna, Bēngbe Bētsabe bominýíne ndoñe tsábá chaondētsemnama; chíyeca bēnga cha fsēnjotbá. Bēnga fsēnjábosena chabíama jayanana tsábá o ndoñe tsábá tonjamama, ntšamo bēngbe leyēnguiñe endayancá; ⁷ pero chē soldadēngbe amēndayá Lisias tonjontremeté y jabuachana bēngbe cucuatšentšana tbojtsánatseñe, ⁸ y tonjayana chē chabe contra ichámēngna caojtsamna ácbioye chama jabana ca. Cach taitá chacojajtá ora, ndegombre soyēnga cochántsetatšēmo ndáyeca bēnga muabe contra fstsíchámuaa ca” —cha tojánayana.

⁹ Y chē judiēnga chentše imojtsemnēngna imojtsanichamo aífne chca tojanopasá y lempe ndegombre yojtsemna ca.

¹⁰ Chentšana, chē mandado Páblēbioye tbojánefjatšēmo chaóyebuambama; as Pablo tojánayana: “Atše sēndétatšēmo aca ba uatama comna muentša

entsangbiamá tsabá o ndoñe tsabá tmonjamama ichamuá; chcasna, tondayama ntsauatjá y puerta oyejuayá acbe delante scuenuayaná. ¹¹ Ntsámo cach aca jtsetatsëmbuama contsobencá, cabá bnëtsana uta te entsemna atse Jerusalenoye sënjá, Bëngbe Bëtsá jadórama. ¹² Y quemënga ndoñe chešmátinýena nderado ndáftaca jabuachana enatsëtsnayıñe, ni entsanga chamuembouënanama amiñe, Bëngbe Bëtsabe bëts yebnocá, ni chëngbe enefjuana yebnënguenache, ni inýe luarënguenache chë bëts pueblentse. ¹³ Quem entsanga tondaye quemátsbomna ntšámo jayanama, atšbe contra montsichamo soyënga ndegombre yojtsemna ca. ¹⁴ Pero ndegombre endmëna y chanjayana, atse bëngbe taitangbe Bëtsá sëndëserveda, jt-siyenëse ntšámo Bëngbe Bëtsá šonjaninýanýe benache yomncá; y quem entsanga montsichamo, básefta soyënga ntšámo bënga quem Tsëm Benache ústonënga fstsöšbuachecá, ndoñe ndegombre yondmëna ca. Pero atšna nýetsca chë Moisesbe leyinë y Bëngbe Bëtsabe juabna oyebuambnayëngbe uabemana librësanguentša soyënguñe sëndöšbuaché; ¹⁵ y atse cach chëngcá, puerta jtsošbuáchiyëse Bëngbe Bëtsabeñe sëndobátmana cha yochjama chë mochjóbanënga chámuatayenama, nýetsca entsanga, lempe tsabá amënga y chë ndoñe tsabá amëngnaca. ¹⁶ Chíyeca, atse nýets tempo puerta tsabá sëndama, tondayama ntjatenócochinýenama y atšbe ainana natjëmbana chaotsomñama, Bëngbe Bëtsabe delante y entsangbe delántnaca.

¹⁷ “Básefta uatama inýe luarënguenache atse sëndánana; ndoñe bayte quenátsmëna cach atšbe luaroye sëntashjango, chentša ndbomnjëmënga jujabuáchama ndayánaca jatšatayama y bayënga jobáyama, Bëngbe Bëtsá jëtschuayama. ¹⁸ Atse sënjama soyënga Bëngbe Bëtsabe delante tsabá jtsatsmënama; chentšana, básefta Asioca judiënga Bëngbe Bëtsabe bëts yebntse šmonjinýena, pero ndoñe chešmátinýena ni ba entsangftaca, ni enbouenaniñe. ¹⁹ Chë šmonjinýenënga entsamna ácbioye jabana y acbe delante atšbe contra chamuayana, nderado ndayá tmojtsebomnëse. ²⁰ O ndoñesna, cach quemënga, muentse montsemnënga chamuayana, chë judiëngbe amëndayëngbioye atse šmonjuánatse ora, atse ndayá tijobuáchjanguama chešmënjinýena, atse castiganá jtsemnama šojtsemna ca chënga chamuayanama; ²¹ o nderado nántsemna chë atse chëngbentse sëntsemna ora, mëntšá tijuáyebuachenama: ‘Atse chë obanënga mochtayenama puerta jtsošbuáchiyëse sëndobátmana causa, tsëngaftanga atšbe contra šmochjayana ca.’ ”

²² Félix bëtscá inatátsëmbo Bëngbe Utabná tojaninýinýe Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanýana: “Chë soldadëngbe amëndayá Lisias chaójshjango ora, chanjayana ntšámo quem tsëngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšámo tmojtsebošcá cha chamuauájabuachama.

²⁴ Chentšana baseftaytese, chë mandado Félix Cesareoye tojtanashjango, chabe shema Drusílaftaca, canýe judiá. Chorna, cha tojanmandá Pablo jachembuana y tojanuena ntšámo Pablo yojtsichamo, ntšámo canýa nanjobenaye Jesucristeñe ošbuachiyá jtsemnama. ²⁵ Pero, nýetsca soyënguñe tsabá jtsamama, cachá jenomándama jtsobenama y ntšámo tmojamama nýetsca entsangbiamá Bëngbe Bëtsá yochjayanama Pablo tojanoyebuambá

ora, Félix tojanëuatjaná y Páblëbïoye tbojanïyana: “Mora, mata; luare quétstsebmna ora, cbochjachembo ca.”

²⁶ Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuéntama. ²⁷ Y chca uta uata tojanochñëngo; chentšana, Félix ya ndoñe más chë mandado yontsemna y chabe cuentna Porcio Festo mandadca tmojántbema. Félix yojtseboše chë judiëngbe delante tsabá joquédama, chíyeca utamená Pablo tbojëfstanboshjona.

25

Pablo Festbe delante

¹ Festo chë luaroye tojánashjango y unga tianoye, Cesarea pueblentšana Jerusalenoye cha tojána. ² Chocna, chë bachnangbe amëndayënga y chë más uamana judiënga Féstbïoye tmojána Páblëbe contra jayanama. ³ Y tmojanimpadá, mo chëngbïama canye bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. ⁴ Pero Festo tojanëyana, Páblëna Cesareoca utamená yojtsemna y baseftaytese cha choye jtama ca. ⁵ Y tojanëyana: “Chamna, tsëngaftangbe amëndayënga átseftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

⁶ Festo Jerusalenentše posufta o bnëtsana te más chëngaftaca tbojëfstanjëtana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷ Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canye chë soyëngama tmonjanobená jinÿanÿiyana chca ndegombre bëtsemnama.

⁸ Y Pablo, cachá jenëuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹ Festo yojtseboše chë judiëngaftaca tsabá joquédama; as Páblëbïoye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰ As Pablo tojánayana: —Atše sëntsemna chë Romoca bëts mandado tojichamá amëndayëngbe delante y chënga entsamna jayanama atše tsabá o ndoñe tsabá sënjamama. Ntsamo ndegombre contsetatsëmbcá, judiëngbe contra atše ndocna bacna soye chiyatsma. ¹¹ Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšïne atše jaboshjonana. Chíyeca, Diosmanda chë Romoca bëts mandado cháuyayana tsabá o ndoñe tsabá sënjama ca —Pablo tojánayana.

¹² As Festo, chë soyama chabe buayiynayënga tojanatjá y chentšana tojánayana: —Chë Romoca bëts mandado quem soyama cháuyanama tojábóšenësna, chábioye cochjá ca.

Festo, Rey Agríptaftaca tbojanencuentá ntsamo Pábloftaca jamama

¹³ Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsësayama. ¹⁴ Bayté chata chentše tojanajëtana; y chca, Festo chë réybioye tbojancuentá Páblëbe soyama. Cha mëntšá tbojanianana: —Muentše endmëna canÿe entsá, Pablo ca uabainá; Félix utamená tbonjëftseboshjona, atše mandadca sënjontsé ora. ¹⁵ Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶ Y atše sënjáuyana: “Chë romanënga ndoñe quematamana ndocnabiama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenëuyanama cha chaobenama ca.” ¹⁷ Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestntse tribunaloca sëntótbema y sënjamandá chë boyabása jobetšana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canÿe bëts soye chabe contra chemátayana, chënga jóyebuambayama tonjóyentšbuache ora. ¹⁹ Chënga chabe contra montsichamo, nÿe cachëngbe Dios ntšamo jadórama yomnana y canÿa Jesús ca uabainábiana; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstëtsetatsëmbo ntšamo chë soyiñe jamana; asna, Pablo sënjantjá Jerusalenoye jama tayojëtseboše ca, choca atše jayanama tšabá o ndoñe tšabá cha tonjanmama. ²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojananëntscuana ca. Chcasna, atše sënjamandá cha chamotsebojanÿama, chë mandádbioye jíchmuana atše jobenayëntscuana ca” —Festo tbojancuentá.

²² Chca tbojanencuentá ora, Agripa Fëstbioye tbojanianana: —Atšnaca sëntseboše chë boyabása joyeunayama ca.

Y Festo tbojanjuá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblntša uámana taitanga. Chentšana Festo tojanmandá Pablo jobetšana; ²⁴ y chora cha tojánayana: “Rey Agripa y nÿetsca taitanga bëngaftaca šmojtsemnënga: Chentše entsemna chë boyabása. Nÿetsca judiënga chabe contra átšbentše montsabichamo, Jerusalenoca y quem Cesarea pueblntšnaca, y nÿa jtsayebuáchëse tša šmontseimpadana cha chaóbanama; ²⁵ pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶ Pero atše, atšbe bëts uámana mandádbioye quem boyabásabiana juábobemama ndocna serito soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebomnama. ²⁷ Er atše sëntsejuabná ndoñe corente juabnayabe soye yomna, canÿe utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

1 Chentsana, Agripa Páblëbioye tbojanianama: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuyama cucuatše tojanatsbaná y jenéuyanama tojanontsé mēntśá jayanama: 2 —Atše ndegombre sēntsoyejuá mora chjobenaye acbe delante jóyebuambayama, uamana rey Agripa, chca, atše jenéuyanama nýetsca soyēngama ntśamo judiēnga atšbe contra montsichámuama; 3 y más sēntsoyejuá, taitá conduábuatmana lempe ntśamo judiēnga monduamancá y condétatsēmbo chë judiēnga ndayama imuenoboyebuambnama. Chcasna, Diosmanda uantádoca šmotsoyeuná.

Pablo tojanacuntá ntśamo cha tempo inamnana

4 “Nýetsca judiēnga mondétatsēmbo ntśamo atše tempscana chēngbeñe tsiyenama, bobontse sēnjamna orscana, atše sēnjanonýná luarentše y Jerusalenentše. 5 Chēngnaca mondétatsēmbo y montsobena jayanana, chēnga tmojtsebošese, chca ndegombre yomnana; atše nýets tempo fariseucá vida sēndbomna, y chë fariseunga mondoyena más soyēnga jtsamēse chë judiēngbe leyēngaca chë inýe judiēngbiana. 6 Y mora, ntśamo Bēngbe Bētsá bēngbe bēts taitanga tojanašebuachenacá, chë obanēnga jtayenama cha yochjamama puerte jtsošbuáchiyēse atše obatmana causa, šmojuánatse atšbe contra jayanama. 7 Bēngbe bnētsana uta Israeloca bēts pamíllanga mondobátmana chë šbuachenana soye chēngbiana chaóshjanguama y chíyeca, cada te bnēté y ibeta chēnga Bēngbe Bētsá mondadorana y mondēservena. Y atše cach soyama obatmana causa, bēts rey Agripa, judiēnga mora atšbe contra montsabíchamo. 8 ¿Ndáyeca tšēngaftanga judiēnga šmojtsichamo, chë obanēnga chámuatayenama Bēngbe Bētsá yochjamama jtsošbuáchiyama ndoñe šmontsobena ca?”

Pablo tojanacuntá, ntśamo tempo cha Jesucristbeñe ošbuáchiyēnga yojan-aborlánama

9 “Y cach átśnaca sēnjanjuabná atše šojamna lempe ntśamo stjobenacá jamana, Jesús chë Nazaretocábeñe ošbuáchiyēnga corente chamosufrima, 10 y chca Jerusalenentše atše sēnjanma. Chë bachnangbe amēndayēnga mando šmonjanatsetá, y chca, banga Jesucristbeñe ošbuáchiyēnga cárceloye sēnjanētame; y jtsébáyama ca chēngbiana montsanichamo ora, átśnaca aiñe chca chamoma ca sēnjánichamo. 11 Y ba soye, chë judiēngbe enefjuana yebnēnguenache jabuache chēnga sēnjanatsetšená, chēnga Jesucristo ústonana chamotsajbanama, y chēngaftaca tša etonaná sēnjétsemna causa, chë inýe luarēngoca bēts públēnguenáchnaca chēnga sēnjanēcama.”

Pablo tojanacuntá ntśamo cha Jesucristbeñe ošbuachiyá tojanóbema

(Hch 9.1-19; 22.6-16)

12 “Y cachá jamana canýe te Damascoye sēnjétsaye; chë bachnangbe amēndayēnga uabemanēchangá šmonjanēntšabuaché chca jamama y, cachēnga choye šmonjanichmó. 13 Pero, uamana rey, chë benachējana mo nýetsto ora, sēnjáninýe canýe bēts tcuinýe celocana, shinýama corente más enjétsēbinýnaye, y atše y chë átšeftaca ajnēngbe shēconana corente enjétsēbuashinýinýana. 14 Nýetscanga fsēnjánshajaye y atše sēnjanuena canýe oyeubambnayana, hebreo biyañe, mēntśá šonjétsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmēche niñēfjiñe cha tojtsosuncjná orcá, cachá jenótsetšenana ca.’ 15 As atše sēnjánayana: ‘¿Nda

comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. ¹⁶ Pero matëtsbaná y matëtsá. Atše cbonjébëbocna jinÿinÿiyama aca tçbojuábuayanama atše šcochjasërvíama, y chacotsetatšëmbuama y entšanga chacuacuntama, mora tconjinÿe soyama y más chcoye atšbiamu cbochanjinÿinÿiye soyëngámnaca. ¹⁷ Atše chanjama judiëngbiye y ndoñe judiënga tondaye chacmondëborlama; y morna, ndoñe judiëngbiye cbontsichamná, ¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebmoma, mo ibetiñe cuaftsemnëngcá, sinó mo binÿiniñcá chamotsemna átšeftaca, atše chë entšangbe juabnënga binÿinayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebmoma canÿe luare entšángaftaca, chë ndëmuanyëngbiye Bëngbe Bëtsá tšabe entšanga y chabe entšanga tojábiamu, chënga átšbeñe betsošbuáchiyama ca’ ” —cha šonjaniana.

Pablo tojanma ntšamo chë mo otjenayoquëcá tojaninÿcá

¹⁹ “Chcasna, bëts rey Agripa, atše sënjanma chë mo otjenayoquëcá sënjáninÿe ora ntšamo Cristo šonjaniancá; ²⁰ y natsana, Damascoca entšanga chë tšabe noticiëngama sënjanabuayená; chentšana, Jerusalem-quënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngmënaca chamuatënojuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama. ²¹ Chca sënjánama causa, judiënga Bëngbe Bëtsabe bëts yebnoca šmonjanishache y tmonjánbošena atše jtsóbana. ²² Pero Bëngbe Bëtsá sempre šonduájabuachana, y chca, cada te mëntscoñama, nÿetscanga Bëngbe Bëtsabiamu sëndabuayiná, uámanëngbiye y nduámanëngbiyñaca; nÿe ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe. ²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbiye y ndoñe judiëngbiye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.’ ”

Pablo tojanma rey Agrípbiye jáyëñanama, Jesucristbeñe ošbuachiyá chaóbemama

²⁴ Pablo, cachá jenëuyanama chë soyënga tojánayana ora, Festo mëntšá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

²⁵ Pero Pablo tojanjuá: —Opá ndoñe quetsásmëna, bëts uámana Festo; inÿetšá entsemna; atše sëntsoyebuambná nÿets juábnaca, y ndegombre soyënga. ²⁶ Chentše rey Agripa entsuenana, y cha puerte tšabá chë soyëngama endëtatšëmbo, chíyeca, tondayama ntjatauatjca, atše chabe delante sëntsoyebuambná; atše corente sëndëtatšëmbo chánaca chë soyëngama yotatšëmbuama, er ndayá Jesús tojanmcá, ndoñe tonjopasá ndaye iytëmena chaboye. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguiñe aca quecošbuaché? Atše sëntsetatšëmbo aíñe chíñe cošbuáchema ca —Pablo tojaniana.

²⁸ Chora Agripa tbojanjuá: —Batšatema más y maščjayënjáná Jesucristbe ustoná atše jóbemama ca.

²⁹ As Pablo tojánayana: —Nýe batšatema más o bëtschema más, atše Bëngbe Bëtsá sëntseimpadana, ndoñe nýe bëndatbe barie, sinó nýetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemná ca.

³⁰ Chorna, chë rey, chë mandado, Berenice y chë chëngaftaca imojantbiámanënga tmojantsbaná, ³¹ y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnátsmëna ca.

³² Y Agripa Féstbioye tbojanayana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

27

Roma bëts puebloye Pablo tmojanichmó

¹ Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inýe utámenënga Julio ca uabainabe cucuatšinë tmonjánabashejuana. Julio enjamna canýa chë Romoca bëts mandadbe soldadënguentsá mandayá. ² Asna, fsënjánasëngo canýe Adramitio puebloca barcuñe; ya chë Asioca bëts pueblëngoye juama enjétsamna. Cesarea pueblentšana fsënjánbocna y Aristárnacá bëngaftaca enjëtsemna; cha enjamna Tesalónica bëts pueblócá, Macedonia luaroca.

³ Chë inýe yëfsana, Sidón puebloye fsënjánashjajna. Chentše Julio, tšabá mandbomná Pábloftaca enjëtsemna; tbonjanlesenciá chabe amiguëngbioye chauabuáchama, chënga chamofjama y chamóbocuedama. ⁴ Sidonocana fsënjëftsanbocnentšana, bëngbe contra corente enjëtsebinýiaye. Chíyeca, Chípre fshantsënga catšbioicajana, ndoñe yapa quentëtsebinýiayëjana bënga fsënjána. ⁵ Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashjajna, Licia luaroca.

⁶ Chë soldadëngbe amëndayá, canýe Alejandría puebloca barco chentše tonjáninýena, Italia luaroye yojétsaye; asna, šonjanamëndá chë barcuñe jenójayiyana. ⁷ Baseftaytentscuana uenana fsënjánana y pordonto fsënjanobená Gnido pueblentša ndirichiñe jashjanguana. Cabá bëngbe contra enjëtsebinýiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinýiayëjana. ⁸ Y chca, pordonto bejaycá fsënjánana, fshantsënga béconana; chentšana, canýe pueblo, Tšabe Puertënga ca uabáinentše fsënjánashjajna, Lasea ca uabaina pueblo béconana.

⁹ Chca, bayté tonjanochnëngo y chora chë bejaycá jama puerte resjo enjëtsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjëtsobeco.

¹⁰ Chíyeca Pablo chë entsanga mëntšá tonjanabuayená: “Baconga, atše šontsinýana mora puerte resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca.”

11 Pero chë soldadëngbe amëndayá Páblëbïoye ndoñe ntjoyeunayana; más, chë barcuentsa mandayá y chë barco nduñbïoye añe. 12 Ndoñe tšabá yonjamna, chë barco chora enjëtsemmntšë chë uaftena tempëntscuana jëftsemnana; chë causa, nÿa mo nÿetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetse-natjëmbambana juachoica tsjuanoicajana y tsmanoicajana.

Mar bëjayiñe puerte uaftena y binÿia tojanóshjango

13 Chentšana tonjanontšë tsmanoicana batšá binÿiayana, chíyeca chë entšanga tmonjanjuabó ya yojtsanopodena jtëtóntšana jama ca. As, chentšana fsënjëftsanbocna y bejaycá fsënjána, Creta fshantsënga beconañëjana. 14 Pero baseftayté chentšana, chë fshantsëngocana tonjanontšë corente jabuache binÿiayana y chë barquëshoye enjëtsoshjajuana. Chë binÿia yojanabaina Nordeste binÿia ca. 15 Chë barcaña nÿe chë binÿiëbe ponto tonjanontšë uayana; chë binÿia enjëtsobayëjana jama ndoñe quentétsopodena causa, šonjanotocá nÿe ntšamo tojtsebinÿiayacá chašúyambama. 16 Chentšana fsënjánachñëjna Cauda ca uabaina stëtsoicajana, base fshantsënga mar bëjayoca; chiñe ya ndoñe tša jabuache quentëtsebinÿiaye y pordonto fsëñjanobená buyeshoicana jtabocnana chë barco enjanasjá canouše, ndoñe chaondëtšóndbemama. 17 Ya chë barquëshoye fsëntanëšëngo orna, chë entšanga lazjéngaca chë barquëshana tmonsanabatsëcaca, más uamorochësha chaotsamnana. Pero chënga monjëtšauatja nderado chë barco chë Sirte ca uabaina cascajuentše nanjëtšánjua; asna, chë barcuentsa ancla tmonjanashëbëútšëna, chë barco ndoñe betscó chaondëtšábonjnama, y ntšamo enjëtšanbinÿiayacá fsënjána. 18 Chë inÿe yëfsana y chë binÿiayana cabá jabuache enjëtsemna causa, chënga tmonjanontšë chë barcuentsa uasmanëshangá jtsëshbuëtsetšana; 19 y unga tianoye bëngnaca šonjanotocá, cach bëngbe cucuátšëca, chë barcuentsa soyënga buyeshoye jtsëtšana. 20 Baytentscuana bënga ndoñe chibiatanobená jinÿana ni shinÿe, ni estrellatëmënga, tša tonjëtseibetata causa; y tša jabuache enjëtsebinÿiaye causa, bënga ya ndoñe quefstëtšanobatmana chentšana jótšbocana.

21 Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Bacongá, tšabá manjamna atše mašmëñjanoyeuná y Creta luarocana ndoñe matmëñjëftsanbocna; chca mora ndoñe mal mamojtsepašá y ndoñe nÿa nÿetšá matmëñjobuetše. 22 Pero mora ngmënaca ndoñe matmëñëngana; masque chë barco echantsenatjëmbe, tšëngaftanguentšá ndocná queochatóbana. 23 Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó; 24 y chë ángel mëntšá šonjauyana: ‘Pablo, ndoñe matauatjana; entseyta aca chë Romoca bëts mandádbïoye chacotsama, y aca Bëngbe Bëtsábía cómnayeca, nÿetsca quem barcuñe ajnënga jobanámëntšana cha echanjatsebacá ca.’ 25 Chcasna, bacongá, ndoñe matauatjëngana, er atše Bëngbe Bëtsábeñe corente sëntsošbuaché y lempe ntšamo chë ángel šonjauyancá echanjóbcna. 26 Pero mora entseyta canÿe fshantse mar bëjayiñe chašúshejanguama ca” —cha tonjanëyana.

²⁷ Canye ibeta, uta semana fsenjána chentšana chë Adriático ca uabaina mar béjayeñe fsenjésemna, y nye ínjoye y ínjoye chë binýia šonjétsëyambaye. Y mo tséntseto yojésemna orna, chë barcuentsa trabájayënga tmojanjuabó ya fshantse béconana imojésemna ca. ²⁸ As chënga tmonjanmedidá ntsachetsá chë býeshe uatjoye inamnana y tonjanóbocna unga bnétsana y chnénguana metro; más choye cachiñe tmonjanmedidá y uta bnétsana canýsëfta metro tonjanóbocna. ²⁹ Chënga monjétsautja nderado bëtš ndëtšbéngaca nanjétsántšëtjiama; asna, chë barco stëtsoicajana canta ancla buyeshoye tmonjanashëbëútsena, chë barco ndoñe más chaondëtšábonjnama, y tša monjétseseboše betscó chaobinýnama. ³⁰ Chëntscuana, chë barcuentsa trabájayënga tmojánbošena chentšana jtsachetana; chamna, chënga tmojanontšé chë canouše buyeshoye justjanguana, pero chca imojétsama, mo chë anclënga chë barco natsanoica cuafstšëtjajuancá. ³¹ Pero Pablo chë soye tojáninýe, y chë soldadëngbe amëndayábioye y chë soldadëngbioye tonjanená y mëntšá tonjanéyana: “Chë barcuentsa trabájayënga cach quem barcuentsé ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

³² As, chë soldadënga tmonjána y chë canoušentsa lazjënga tmontsantëtsetše y buyeshoye chëše tmontsantsatše.

³³ Enjétsëbinýana ora, Pablo nyetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatšmuananga. ³⁴ Diosmanda, masque nye mo batšatémnaca šmochjase. Chca cmontsamna jamana ndoñe chašmondóbanama, er ndocná ndocá queochatšpása ca.”

³⁵ Pablo, chca tonjánayanentšana, canye tandëse tonjanca y nyetscangbe delante Bëngbe Bëtšábioye tbontanchuá. Chorna, tonjanjatá y tonjanontšé jasama. ³⁶ Chentšana nyetscanga tmonjanenñemó y chëngnaca tmonjanse. ³⁷ (Chë barcuentsé nyetscanga fsënjamna uta patse y canýsëfta bnétsana y chnénguanënga.) ³⁸ Ntsamo innabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtšautama.

Chë barco tojtsanematjëmbe

³⁹ Ya tonjanbinýna ora, chë barcuentsa trabájayënga ndoñe quemëntëtsetatšëmbo ndaye fshantse chentše bëtsemnama, pero tmonjáninýe chë fshantsentše canye luare jachañe, chë béjaye chë luaroye omashjuantše, y chiñe canye chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. ⁴⁰ Asna, chë anclentsa lazjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambana oservena soyentsa uabatsëcnjëngnaca tmontsanjafjoná. Chorna, chë barcuentsa natsanoica niñësiñe entšëjua tsbanánoye tmontanëšëngo, y chë binýia tonjanma chë barco chaontšé chë chënyoye juabéconama. ⁴¹ Pero chë barco canye luaroye tonjánashjango, y chentše chë béjaye catatoicajana enjetsobuá y chë barco cánýentše, bëtšcá cascajo buyeshiñe binýnentše tontsanajo. Chë barcuentsa natsanoica lado chë cascajuñe entsanajuena, ndócnoye juabónjuama ntsopodencá, y chë stëtsoica lado puerte entsanashatiyíná y lempe entsanandbiamná, yapa binýia causa y býeshe chentše enjétsojantšetaye causa.

⁴² Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. ⁴³ Pero chë soldadëngbieye ndoñe chenatanalesenciá chca jamana; y tojanmandá nyëtscanga chë jachbabama obenëngna natsana chë buyeshoye joshbuetšana tsachoye chamuashjanuama, ⁴⁴ y chë ínÿngna tablëshënguifne o chë barcuentsa pedazënguifne chamoshbuetšana. Y chca, nyëtscanga fsëñjanobená tsábá y ndocá ntjapasacá fshantsoye jashjanguama.

28

Pablo Malta luaroca

¹ Ya nyëtscanga fshantsoca tsábá fsëñjëtsemna ora; fsëñjántatsëmbona chë luare Malta ca yojanabaina. ² Chë luarentsa entsanga bëngaftaca corente tsábá mándbomnënga monjëtsemna; canÿe íñeshe tmonjanangbotjó y šonjanëbuaja choca bënga jatósboniyama, er tša enjëtsoftena y yapa enjëtsešsna. ³ Pablo tojanatbaná básefta buashana chamesëfjënga y chë íñeshoye enjëtsešhacjnaye ora, canÿe mëtscuaye tojánbocna y enjëtsechaye, chentše yapa obonÿaye causa, y Páblëbe cucuatšifne tontsanonjonjá. ⁴ Chë luarentsa entsanga, chë mëtscuaye Páblëbe cucuatšifne yojtsajonÿanama tmonjáninÿe ora, monjëtseñatsëtšnaye: “Quem boyabása ndegombre inÿa obanayá cuanmëna; mar bëjayoca jobanámentsana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

⁵ Pero Pablo tontsanenacuestëtoná y íñeshoye chë mëtscuaye tbontsantsatše y Pablo ndocá chenatanpasá. ⁶ Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntétsanjuabnaye y tmonjanontsé ichámuana Pablo canÿe dios inamna ca.

⁷ Chentša béconana inamna chë luarentsa mandayabe fshantsënga. Cha šonjanëbuaja y corente tsábá šonjanacuedá, unga tentscuana. Chë taitana Publio ca inauabaina. ⁸ Chë tempo, Públiëbe taitá šocá jutsnëshañe inajájona, calentóraca y buifneca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha šhnaná enjëtseñatsmëna. ⁹ Chca tonjanopasá chentšana, chë luarentsa inÿe šoquënga Páblëbioye monjánajna y cha enjánashnaye. ¹⁰ Bëtscá tsábe soyënga chentše bëngbiama tmonjanma, y cachiñe jatama ya chë barcuifne fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

Pablo Romoye tojánashjango

¹¹ Chë fshantsentše mar bëjayoca unga ishinÿe fsëñjëftsemna, y chentšana canÿe Alejandriocana yojanabá barcuifne fsëñjanenojayé; chë barco nyëtš uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catsatcá. ¹² Chentšana, Siracusa bëts puebloye fsëñjánashjajna y chentše unga te fsëñjëftsemna; ¹³ y chentšana fshantse béconana bejaycá fsëñjána, Regio puebloye jashjanguëntscuana. Yëfsana, tsmanoicana tsjuanoye enjëtsebinÿiaye, y chca, chë inÿe yëfsana Puteoli puebloye fsëñjánashjajna. ¹⁴ Chentše básefta Jesucristëñe

ošbuáchiyënga fsënjánanÿena, y šonjanëbuaja chëngaftaca canÿe semana chentše jëftsajëtanama; y chentšana Romoye fsënjëftsanbocna. ¹⁵ Romoca Jesucristbeñe ošbuáchiyënga ya imojëtsetatšëmbo bënga choye fchjanashajnama; chcasna, chënga tmonjánbocna bënga jajëbenguama canÿe luare Foro del Apio y Unga Tabernënga ca uabainóntsoñe. Pablo chënga tonjánanÿe ora, Bëngbe Bëtsá tbonanchuá y puerte añëmoca enjëtsemna. ¹⁶ Romoye fsënjánashajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canÿe soldado chabotsebojanÿama.

Ndayá Pablo Romoca tojanma

¹⁷ Choye fsënjánashajnentšana unga tianoye, Pablo tonjanmandá chentše imnoyena judiënga más uámanënga chamobéconama; y nÿetscanga ya tmojánenefjna ora, cha tojanëyana: —Catsátanga judiënga, masque atše tondaye chiyatma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalemoca šmonjanishache y romanëngbe cucuatšinë šmonjánboshjona. ¹⁸ Chë romanënga lempe šmonjantjá chentšana, monjëtseboše atše jëtsboshjonana, er ndocna bacna soye chemátaninÿena atše jóbánama chašotsemnama. ¹⁹ Pero chë judiënga ndoñe quemtëtseboše atše chašmuatsboshjonama; chíyeca, šonjanotocá jáimpadana cach Romoca bëts uámana mandado cháuyana atše tsábá o ndoñe tijanmama, masque atše tondaye quetsátsbomna, cach atšbe luarentša entšanga, judiëngbe contra jayanama. ²⁰ Chíyeca, atše tcbonjúbuaja jáñÿama y jáuyana, er ndayama chë Israeloca entšanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca —tojanëyana.

²¹ Chora chënga tmojanianya: —Bënga ni mo canÿe tsbuanácha Judeocana fchiyatáyëngaca acbiama noticiëngaca, y ni canÿe catsata judío, chocana moye ashjajnënguentšá, ndocna bacna soye acbiama chešnatacutá. ²² Bënga fsëntseboše joudenana ntšamo aca cojuabnama, er ntšamo Jesucristbe ustönëngbiama fstsëtatsëmbcá, entsemna ana nÿets luarenache chëngbe contra entšanga imojtsichamo ca.

²³ Asna, canÿe tescama Pablo tmojanianya chca chaotsemnama; y chë tena, ba entšanga chë Pablo posada inabomnoye tmojanobeconá. Y cachëscana tojanjétanëntscuana, Pablo entšanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojsentšëna chënga jáyënjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana libréšangañe soyëngaca. ²⁴ Báseftanga aíñe imojtsošbuáchiye ntšamo Pablo yojsanëtsëtsnacá ndegombre bëtsemnama, pero inÿengna ndoñe. ²⁵ Nÿetscanga ndoñe cachcá montsanjuabnaye causa, tmojanontšë chentšana jëseboacanana. As Pablo tojanëyana: “Nÿets razónaca chë Uámana Espíritu tšëngaftangbe taitanga tojanëyana, Bëngbe Bëtsabe juabna oyebuambnayá Isaiasbiajana, mëntšá:

²⁶ Motsa chë entšanga jauyanama:

‘Bëtscá šmochantsuenana, pero tondaye quemochátësertana; tša šmochantsafšna, pero tondaye quemochátinÿe.

²⁷ Muentša entšanga ainánaca josértama ndoñe quemátsboše causa, chënga nduauenanënga montsemna y nduabinÿnëngnaca; chënga bomínÿeca ndoñe chamondobená jinÿama,

ni chëngbe matscuašeca jouenama,
ni chëngbe ainánaca josértama ndoñe chamondobená,
chca, atšbe benache ndoñe chamondishachama,
atše ndoñe ntjátsebacama ca.’ ”

²⁸ Pablo chora mëntšá tojanëyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsanga bacna soyënguentsana játsebacama, chë ndoñe judiëngbioye mochanjábuayenaye, y ndegombre chënga cocayé aífne mochanjóyeunaye ca.” ²⁹ (Pablo chca tojánayana ora, chë judiënga chentsana imojésebecana y tša imojtsenatsëtsnaye.)

³⁰ Pablo uta uata chentše tonjanoquedá canýe uántšamena yebnentše; y nýetscanga cha jauatsëtsayama monjánajnënga cha enjanëbuájajana.

³¹ Nýetscangbe delante puerte añémoca entsanga enjanabuayiyiná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiamá, y ndocna Romoca mandayá quebënjatanauyá chca jtsamama.

Romanos

Pablo Romoca ošbuáchiyënga jacheuayama

¹ Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tsabe noticiëngama entšanga chayábuayenama.

² Ya bayté entsemna, Bëngbe Bëtsá chabe juabna oyebuambnayëngaftaca chë tsabe noticiënga entšanga tojanašebuachená, y chënga chca tmojëtsanábema Bëngbe Bëtsabe uabemana palabrenguiñe. ³⁻⁴ Chë tsabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýná canýe rey Davidbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

⁵ Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyëts luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. ⁶⁻⁷ Tsëngaftángnaca chëngbeñe šmontsemna, tsëngaftanga chë Romoca šmoyenënga, ndëmuanyënga Bëngbe Bëtsá tcmojáchembo Jesucristbenga chašmotsemnama. Atše tsëngaftangbiamna sentsabiamná, tsëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama, y chaboma tsëngaftanga ainaniñe tsabe ebionana chašmotsebomnama.

Pablo tša inaboše Roma bëts puebloye jama

⁸ Jabojátšamna, Bëngbe Bëtsá, Jesucristbiajana šcuatschuá, cada ona tsëngaftanguentsabiamna, er nyëts quem luariñe entšanga tša monjesoyebuambná tsëngaftanga Jesucristbeñe bëtscá šmojtsošbuáchemna. ⁹ Bëngbe Bëtsá, nda nyëts ainánaca sëndëserveda, tsabe noticiënga chabe Uaquiñabiamna abuayinayaiñe, endëtatšëmbo atše nyëts tempo Bëngbe Bëtsáftaca stencuénta ora, tsëngaftangbiamna sëndëtseimpadanama; ¹⁰ y mora Bëngbe Bëtsá sëntseimpadana, nýa mora y cha tojtsebošëse, chašolesenciá jama tsëngaftanga jautsëtsayama. ¹¹ Er atše tša sënjëseboše tsëngaftanga jányama, chca, atše chayobená jamama chë Uámama Espiritbentšana yóbocana tsabe soyënga tsëngaftanga chašmotsebomnama; y chca, tsëngaftanga ainaniñe bëts añemo chašmotsebomnama, y Jesucristbeñe corente chašmotsošbuáchemna; ¹² o más tsábá jayanamna, tsëngaftanga y átšëftaca mochjenájabuache ainaniñe bëts añemo jtsebomnama, tsëngaftanga y átšnaca Jesucristbeñe tša imošbuachéyeca.

¹³ Y morna, Jesucristbeyeca catšátanga, sëntseboše tsëngaftanga chašmotsetátšëmbo atše ba soye jama tijájuaboma, tsëngaftanga jautsëtsayama, pero mëntscoñama ndoñe tsjobenaye. Atše sëntseboše ndayá chayobená jamana ínýenga tsëngaftangbioca Jesucristbeñe chamotsošbuáchemna, ntšamo ínýengbeñe ndoñe judiëngbeñe tonjopasacá. ¹⁴ Atše Jesucristbiamna canýe oservená sëndmëna, y chíyeca nyëtscángaftaca obligacionaca sëntsemna, chë pueblënguiñe oyenëngaftaca y bën tjoye oyenëngaftaca, chë

uatsjinÿenÿengaftaca y ndoñe chcangaftácnaca. ¹⁵ Chíyeca atse tša sÿentseboše tšÿengaftanga chë Romoca šmoyenÿngnaca chë tšabe noticiÿenga jábuayenama.

Chë tšabe noticiÿenga Bÿngbe Bëtsabe obenana jtsinÿanÿnayana

¹⁶ Atse ndoñe quetsátëuatja chë tšabe noticiÿenga jtsabuayinayama, er chë noticiÿenga jtsinÿanÿnayana Bÿngbe Bëtsabe obenana; y chë obenánaca, nÿÿetscanga Jesucristbeñe ošbuáchiÿenga jtsobenana atsebácanÿenga jtsemnana, natsana chë judiÿenga chca ošbuáchiÿenga, pero chë ndoñe judiÿngnaca. ¹⁷ Er chë tšabe noticiÿenga jtsinÿanÿnayana ntšamo Bÿngbe Bëtsá inétsama entšanga chabe hominÿiñe tšábenga chamotsemnana. Y entšanga chabe hominÿiñe tšábenga jábiamana, chÿenga Jesucristbeñe tmojtsošbuáchema. Ntšamo Bÿngbe Bëtsabe uabemana palabreñguiñe endayancá: “Nÿe ndabiamana Bÿngbe Bëtsá tojama chabe hominÿiñe tšabia chaotsemnana, cha Bÿngbe Bëtsábeñe betsošbuáchema, cha ndegombre chë nÿÿetsca tescama yomna tšabe vida echántsebomna ca.”

Bÿngbe Bëtsabe delante nÿÿetscanga culpa bomnÿnga mondmëna

¹⁸ Bÿngbe Bëtsá celocana tojinÿanÿé, chë uabouana castigo, tša tbojetnama entšangbiamana chaotsemnana, ainaniñe bacna juabnÿngaca bomnÿngbiamana y chë bacna soyÿenga amÿngbiamana y ndëmuanÿngbiamana, masque Bÿngbe Bëtsabe ndegombre soyÿenga jtsotatsëmbñana, tša bacna soyÿenga tmojtsama causa, ndoñe ntjalesénciana cachÿenga jtsiyenama ntšamo ndegombre yomncá. ¹⁹ Bÿngbe Bëtsá echanjácastigaye, er ntšamo entšanga imobencá Bÿngbe Bëtsabiamana jtsetatsëmbuama soye, chÿengaftaca sempre endétssemna. Y chca endmëna, Bÿngbe Bëtsá chë soye tojinÿanÿéyeca. ²⁰ Bÿngbe Bëtsá quem luare tojanma orscana, entšanga mondetsobena botamana josértana, Bÿngbe Bëtsabe obenana ndocna te yochjëftsopochócama y cha ndegombre Bÿngbe Bëtsá yomnana. Chë soyÿenga Bÿngbe Bëtsabiamana entšanga quemúatobena jinÿyana; nÿe jtsetatsëmbuamna aiñe. Entšanga mondobena chë soyÿenga Bÿngbe Bëtsabiamana jtsetatsëmbuana, cachá tojanma soyÿngaca. Chcasna, chÿenga ndoñe quemátobena jayanana bacna soye tmojama, cha nduabuatma causa ca. ²¹ Chÿenga Bÿngbe Bëtsabiamana mondétatsëmbo, pero ndoñe ntsebošana chábioye jadórana, “aca ndegombre Bÿngbe Bëtsá condmëna ca” jtsichámëse, ni cha ntsatschuanayana. Pero, ntšamo chÿenga tmojtsejuabnacá tondaye ntsámanana; ndoservena juabnÿngaca y bacna juabnÿngaca montsiyena, y chca, chÿenga montsiyena, jtsamëse ntšamo cachÿngbe juabnÿnga yomncá, mo ibetiñe cuaftsajncá. ²² Chÿenga jtsichámuana corente osertánÿnga imomna ca, pero ndegombrena juabna ndbomnÿnga mondmëna. ²³ Chÿenga ndoñe ntsadoránana Bÿngbe Bëtsá, chë ndocna te yochjëftsobaná; chë cuenta, soyÿenga tmojobopormá mo entšangcá, y chÿengna aiñe jóbanana; o soyÿenga shloftšÿngcá o bayÿngcá, o osjojnayÿngcá, y chÿenga diosÿnga imomna ca jtsejuabnayëse jtsadoránana.

²⁴ Chíyeca, Bÿngbe Bëtsá cachcá tojónÿa, cachÿngbe ainaniñe puerte bacna juabnÿngaca mandánÿnga chamotsiyenama, y chca, bacna soyÿngnaca inÿÿengaftaca imojtsama; chë soyÿngamna jtsëuatjana chÿenga entsamna. ²⁵ Chÿenga chca jtsemnana, er ndoñe tmonjábošana Bÿngbe Bëtsabe ndegombre soyÿnguiñe jtsošbuáchiyana, pero chë ndoñe ndegombre soyÿnguiñe cocayé jtsošbuáchiyana; chÿenga jtsadoránana y jtseservénana, Bÿngbe Bëtsá quem luarentse tojama soyÿenga; pero ndoñe ntsadoránana, ni ntseservénana cach

Bëngbe Bëtsá, chë nyetsca chë soyënga tojanmá. Entšanga nyets tempo cha chamotsatschuaná. Chca chaotsemna.

²⁶ Entšanga chca ndoñe tšabá tmonjámayeca, Bëngbe Bëtsá cachcá tojónya, chënga ínÿengaftaca bacna soyënga jtsamama chamotsebošama; chë soyëngamna jtséuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, ínÿe shembásengaftaca bacna soyënga jtsamama. ²⁷ Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše ínÿe boyabásengaftaca bacna soyënga jtsamama. Chënga chë ínÿe boyabásengaftaca bacna soyënga imojtsama causa, entsamna jtséuatjana, y chë soyëngama castigánënga mochántsemna, cachëngbe cuerpënguñe jasúfriase, ntšamo chëngbe bacna soyëngama yojtsëmerecena.

²⁸ Chënga ndoñe tmonjbošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bëtsemnama. Chýeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. ²⁹ Chënga nyetscna bacna soye jtsamana: ainaniñe nyetscna bacna juabna jtsebomnana, nÿe cachëngbiana bëtscá soyënga jtsebomnana tša jésebošana, y ínÿengbioye ntšámnaca jáborlama jtsebošana; chënga nÿe játsbošana ínÿa tojtsebomna soyënga jtsebomnana, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátšenayënga. ³⁰ Chënga ínÿengbiana podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtšétsangbioye ndoñe ntsayaunanana. ³¹ Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. ³² Y chënga corente mondétatsëmbo chca soyënga amëngbiana, Bëngbe Bëtsá chabe leyñe tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsëñyayana ínÿenga cachcá tmojtsama ora.

2

Bëngbe Bëtsá echanjama chë ndoñe tšabe soye amënga bëtš castigo chamotsebomnana

¹ Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinýánayana cach tšëngaftangnaca ndoñe tšabá šmonjamama, y castigánënga jtsemnama cmontsamna, er tšëngaftanga cachëngcá šmojtsiyena. ² Bënga mondétatsëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca y castigánënga jtsemnama yojtsamna ca cha tojayana ora. ³ Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojtsjuabná Bëngbe Bëtsabe castigüentšana šmochjotsbocá ca? ⁴ Bëngbe Bëtsá tšëngaftangbiana corente tšabe juabna endbomna; mora ndoñe quecmátacastigaye, y tšëngaftangftacna puerte uantado nÿe chca endëtsemna. ¿Chama tšëngaftanga cha šmojtsábotena? ¿Ndoñe

šmondétatšëmbo Bëngbe Bëtsá chca corente jtsababuányëshanëse cmojtsënyä, tšëngaftanga juabna chašmotrocama y chabe benache chašmuishachama cha yobóšeyeca? ⁵ Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmotsama más bëts castigo chašmotsebonnama, chë ndayté Bëngbe Bëtsá ntšamo entsanga tmojamcá tšabá o ndoñe tšabá bëtsemnana yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebonnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínýanýiye cha tša tbojetna, entsanga ndoñe tšabá tmonjamama. ⁶ Chca, chë te, ntšamo cada ona tojëftsemama, Bëngbe Bëtsábentšana echanjóyëngacñe. ⁷ Ndëmuanýënga nyëts tempo tšabá jtsamëse imoyena, y chca imonguá Bëngbe Bëtsá más uámanënga chauabiamá, cha chëngbiamá tšabá chaotsoyebuambná y tšabe vida jtsebonnama chaoma; chë te chëngbiamá Bëngbe Bëtsá echanjama, chë nyëtsca tescama yomna tšabe vida chamotsebonnama. ⁸ Inýënga imoyena, nyë cachëngbe juabnëngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyëtsca tescama castigánënga jtsemnana chënga yojtsamna ca. ⁹ Bëngbe Bëtsá echanjama, chca amëngna puerte chamosufrima y lastemcá chëngbiamá chaotsemnana, er yapa tsetšënaná chëngbiamá echanjëftsemna; chca echántsemna chë chcángbeñe judiënga imomnëngbiamá natsana, y ndoñe judiëngbiámna. ¹⁰ Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiamá corente tšabá echanjóyëbuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiamá natsana, pero ndoñe judiëngbiámna.

¹¹ Er Bëngbe Bëtsabiamá nyëtscanga cachcá monduámana. ¹² Chë Moisesbe ley ndoñe monduábomnënga, bacna soye tmojamamna castigo mochántsebonna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebonna ca, chë leyënguiñe iuayana soyëngaca. ¹³ Chca endmëna, er Bëngbe Bëtsá ndoñe queonýbatsma entsanga chabe bominýiñe tšábënga chamotsemnana, nyë ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse. ¹⁴ Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsëtsná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinýanýnayana tšabá imotátšëmbo ndayá aife o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. ¹⁵ Ntšamo tmojtsiyencá chënga jtsinýanýnayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinýanýnayana chënga ntšamo chë leyiñe yomandánama cachcá imojuabnama. Inýe ora, chëngbe juabnënga echantsëtsëtsnaye aife o ndoñe tšabá tmonjama ca; y ndayté, Bëngbe Bëtsá nyëtscangbiamá ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínýanýiye ndayá tšabá o ndoñe

tšabá tmonjamama. ¹⁶ Chê te, Bêngbe Bêtsá nyêtschangbiana echanjayana chêngbe juabnêngama y ntšamo tmojamama, ndayá entšanga tempo ndoñe tmonjáninyama; cha chca echanjama Jesucrístoftaca; y chê atše sêndabuayiyiná tšabe noticiênga entsichamo ndegombre chca yochtsemnana.

Judiênga y Moisesbe ley

¹⁷ Y mora tšêngaftangbiana, chê judiênga šmomna ca ichámênga, y tša šmojtsejuabná Moisesbe léyeca tšêngaftanga tšabe vida jtsebonnana, y jtšenábotamnayana Bêngbe Bêtsabe ubuáyana entšanga šmomna ca; ¹⁸ tšêngaftanga chê ntšamo Bêngbe Bêtsá yobošcá tšêngaftanga chašmotsamama tatšêmbênga, y chê leyentšana šmojuatsjinýe jobocacayana ndayá más tšabá jamama tojtsemncá. ¹⁹ Tšêngaftanga tša jésejuabnayana, šmobena ínýenga chê ntšamo tšêngaftanga cmésertanca ndosertánênga jujabuáchama ca, mo jtanênga unachayênga cuaftsemnêngcá, o mo chê ndoñe binýniñcá oyenêngbe juabnênga binýnayêngcá; ²⁰ tšêngaftanga jtsejuabnayana chê ntšamo tšabá yomncá ndosertánêngbiana abuayiyayênga šmomna ca, y mo chê basengcá tondaye nduatsjinýenêngbiana abuátambayênga ca. Tšêngaftanga tša jésejuabnayana chê ley šmobomnana, lempe šmotátšêmo ca y ntšamo šmojtsichamcá ndegombre yojtsemna ca. ²¹ Y chcasna, tšêngaftanga chê ínýenga abuátambayênga, ¿ndáyeca ndoñe cach tšêngaftanga šmondétsánatsana? Tšêngaftanga ínýengbioye jtsabuayiyayana ndoñe chamondétsatbêbanama; as, ¿ndáyeca cach tšêngaftanga šmnétsatbêbana? ²² Tšêngaftanga jtsichámuana, acbe shema o boyábioye ndoñe ínýaftaca cattseíngñaye ca; as, ¿ndáyeca tšêngaftanga cachcá šmnétsama? Tšêngaftanga jtsáboyênjána soyênga chê ndayama ínýenga tmojtsichamo diosênga yomna ca y jtsadóraryana; as, ¿ndáyeca chê soyênga chênga jadórama yebnênguentšana uámana soyênga šmnétsatbêbana? ²³ Tšêngaftanga tša jtšenábotamnayana chê ley šmobomnana; as, ¿ndáyeca šmonýbêtsama ínýenga Bêngbe Bêtsabiana podesca chamotsóyebuambnana, tšêngaftanga chê leyentša mandênga jobedésama ndocna te ntsebošana causa? ²⁴ Chama, Bêngbe Bêtsabe uabemana palabrenguiñe mêntšá endayana: “Tšêngaftanga judiêngbe causa, ndoñe judiêngbeñe Bêngbe Bêtsabiana ndoñe tšabá quematoyebuambná ca.”

²⁵ Tšêngaftanga ntšamo leyíñe yomandancá šmojtsamêse, Bêngbe Bêtsábenga šmomnana jinýanýiyama, chê más delicadentše base bobachtema têtšenênga jtsemnana tšabá nántsemna; pero ntšamo chiñe tomandancá ndoñe šmotsamêse, chca têtšenênga jtsemnana, tondayama ntoservénana, y chca, tšêngaftanga jtsemnana mo chê más delicadentše base bobachtema ndêtêtsenêngcá. ²⁶ Y chê ndoñe judiênga chê más delicadentše base bobachtema têtšenênga, judiêngcá ndoñe quemátsmêna; pero chênga ntšamo leyíñe yomandancá tmojtsamêse, ndegombre Bêngbe Bêtsá chênga echanjúbuaja mo cachabe entšangcá. ²⁷ Y chca, tšêngaftanga judiêngbiana Bêngbe Bêtsá echanjayana ndoñe tšabá šmonjama ca, ntšamo leyíñe yomandancá ndoñe šmotsama causa. Cha chca echanjama, er bêtscá ndoñe judiênga mondmêna y chênga ntšamo leyíñe yomandancá mondocumplina, pero chênga ndoñe quemátsmêna tšêngaftangcá têtšenênga, jtsinýnama Bêngbe Bêtsábenga šmomnana. Tšêngaftanga, masque Bêngbe Bêtsabe uabemana ley šmonduábomna y chê más delicadentše base bobachtema têtšenênga šmondmêna, cabá ndoñe šmotsama ntšamo leyíñe uyayancá, ndayá jamama cmojtsamnana.

²⁸ Chcasna, nda chë más delicadentse base bobachtema tmojatëtse ora, chábioye chë soye ndoñe ntjábemana canye ndegombre judío. Y canye entśá ndoñe Bëngbe Bëtsábia ntsemnana nye ínŷenga chë más delicadentse base bobachtema tmojatëtśama. ²⁹ Y canye entśá ndegombre judío jtsemnana, ntśamo chabe ainaniñe tomncá, cha Bëngbe Bëtsabe entśá yomnana tojtsinŷanŷase. Y chca, canye ndegombre judío, Bëngbe Bëtsabe entśá yomnana chaotsinŷnamna ndoñe quenátsemna chë más delicadentse base bobachtema jtsetëtśenana, sinó ntśamo Bëngbe Bëtsá tojamcá chabe ainaniñe chaotsebínŷnama. Bëngbe Bëtsabe Espiritu jamana entśá chca ainana chaotsebomnama, ndayá inétsinŷanŷanaye cha canye ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tśabe soye entśabiama ichamuá; entśanga ndoñe.

3

¹ Chcase, ndánaca suatjatjaye, as ¿Bëngbe Bëtsabe entśá jtsemnana jëftsasháchama, más tśabá yojtsemna canye judío jtsemnana ca? ¿Base bobachtema chë más delicadentse tëtśená jtsemnana becá yojtsámama ca? ² Añe, chca jtsemnana corente enduámama y nyetsca soyënguiñe; natsana chjayana, Bëngbe Bëtsá, judiënga chabe palabra tojanabanŷé, nyetscangbiamama chamotsinŷenama. ³ Y morna, ¿ndayá yochjopása nderado judiënguentse báseftanga ya ndoñe chca tmonsentsënese? Y chë causa, ¿Bëngbe Bëtsánaca yochtsajbaná ntśamo tojašebuachenacá amana? ⁴ ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatsëmbo Bëngbe Bëtsá sempre endbëtsama ndayá jamama tojašebuachenacá, masque nyetsca entśanga bosterënga chamotsomñe. Er Bëngbe Bëtsabe uabemana palabrënguiñe Bëngbe Bëtsabiama mëntśá endayana:

Aca ntśamo chacojayana ora, nyetscanga mochanjinŷe aca ntśamo ndegombre yomncá cnétsamama; y chacojtsenëyaná ora, sempre cochanjinŷanŷiye acbe contra tmojtsoyebuambnángbioye, chënga ndoñe tśabá montsamama ca.

⁵ Pero bënga ndoñe tśabe soye montsama ca báseftanga tmojayana ora, Bëngbe Bëtsá sempre tśabá inétsamama entśanga más tśabá jinŷama tmojtsobenëse, ¿ntśamo bënga mochjayana? ¿Bënga imojtsobena jayanana Bëngbe Bëtsá ndoñe tśabá tonjama ca, bëngbiamama castigo chaotsemna ca cha tojayana ora? (Morna atše sëntsoyebuambná ntśamo entśanga jóyebuambayama monduamancá.) ⁶ ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyets tempo ntśamo ndegombre yomncá ndoñe tontsamëse, ndegombre cha ndoñe nanjobenaye jayanama nyetsca quem luarentša entśangbiamama, ntśamo tmojamcá tśabá o ndoñe tśabá bëtsemnana.

⁷ Nderado nda tojayana: “Atše ndaye bacna soye stjama y ndoñe ntśamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnana jinŷanŷiyama, y Bëngbe Bëtsá sempre ntśamo ndegombre yomncá tojtsamama jinŷama entśanga tmojtsobenëse, ¿ndáyeca Bëngbe Bëtsá cabá uiuchamo ntśamo atše tijamcá ndoñe tśabá yontsemna ca y atše canye bacna soye amá stsemna ca?” ⁸ Y chcase, ndánaca mëntśá nanjátayana: “Ntśamo ndoñe tśabá yondmëncá mochjama, chca, entśanga chámuinŷe Bëngbe Bëtsá puerte tśabia yomnana ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá

chca abuatambayënga echanjácastigaye, ntšamo castigánënga jtsemnana imocerecencá.

Ntšamo entsá tojtsamama, Bëngbe Bëtsabe bominiyiñe ndocná tšabia ntsemnana

⁹ Yasna, ¿Bëngbe Bëtsá bënga judiënga ínÿengbiana más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnëngaca mandánënga imomnana. ¹⁰ Er Bëngbe Bëtsabe uabemana palabrënguiñe mëntsá endayana:

Ntšamo entsá tojtsamama, ndocná Bëngbe Bëtsabe bominiyiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

¹¹ Ndocná quenátsmëna ntšamo ndegombre yomncá chabotsosertánama;

¹² Ndocná quenátsmëna nda chaotseboše Bëngbe Bëtsáftaca jtsemnana!

¹² Nÿetscanga ndoñe tšabe benache tmojishache y chiñe montsajna.

Chënga nÿetscanga Bëngbe Bëtsabe bominiyiñe tondayama quemátoservena.

Ndocná quenátsmëna ntšamo tšabá yomncá chaotsamama, ¡ni canÿa ndoñe!

¹³ Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfñëshe puerte bacá tojtsonguëtšecá.

Chënga tmojtsoyebuambná soyëngaca ínÿengbioye jtsaíngñayana.

Chë tmojtsichamo soyëngaca puerte bacna soye ínÿengbiana jtšamana, mo canÿe mëtscuaye tbojtseftëtše orcá, chë veneno canÿe entsábioye jóbana.

¹⁴ Chënga, nÿets tempo ínÿengbiana podesca jtsichámuana, y sempre jtsóyebuambnayana chë ínÿenga ntšámnaca jáborlama.

¹⁵ Sempre jtseprontánana ínÿengbioye ntšámnaca jáborlama y jobáyama.

¹⁶ Chënga sempre jtsiyenana ínÿenga chamotsesufrínama jtšamëse, y nÿe ntšámnaca jtsaborlánana.

¹⁷ Chënga ndocna te tondaye ntjamana nÿetscanga natjëmbana chamotsiyenama;

¹⁸ Chënga ndoñe ntsiyenana Bëngbe Bëtsabiana jtsejuabnayëse, cha chë más bëtsá nÿetscangbiana yomnana ca —chiñe endayana.

¹⁹ Er bënga mondëtatšëmo, lèmpè ntšamo leyíñe iuabemancá, chë leyëngaca mandánënga imoyenëngbiana yomnana. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmo causa ca; y endmëna jinÿanjÿiyama, ntšamo tmojamcá tšabá o ndoñe tšabá bëtsemnana Bëngbe Bëtsá nÿetscangbiana yochjayana ora, nÿetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca. ²⁰ Er, Bëngbe Bëtsá ndoñe queochatsma ndocná chabe bominiyiñe tšabia chaotsemna, ntšamo leyíñe yomandancá cha tojamama; chë ley bëngbiana jamana, nÿe bënga bacna soye tmojamama chamotsetatšëmbuama.

Ntšamo Bëngbe Bëtsá inama entsanga chabe bominiyiñe tšábenga chamotsemnana

²¹ Pero mora, Bëngbe Bëtsá tonjinÿanjÿé ntšamo cha inama entsanga tšábenga chabe bominiyiñe chamotsemnana; y Bëngbe Bëtsá ndoñe ntjamana canÿa chabe bominiyiñe tšabia chaotsemnana, ntšamo ibomncá cha tojtsamama, ntšamo chë leyënguiñe y mandënguiñe yomncá. Pero masque mora chca, Bëngbe Bëtsá tonjinÿanjÿé, Moisesbe leyíñe y Bëngbe Bëtsabe juabna oyebuambnayëngbe librëšangañe yopodena jinÿenana chca yochtsemnana.

²² Bëngbe Bëtsá jamana entsanga chabe bominiyiñe tsábenga chamotsemnama, chënga Jesucristbeñe tmojtsošbuáchema. Bëngbe Bëtsá nyetscanga Cristbeñe ošbuáchiyëngbiana chca jamana, y chabiana nyetscanga cachcá monduámama; ²³ er nyetscanga bacna soye tmojama, y chë causa, ndocna entsá tonjobená jashjáchana ndocna bacna soye ndbomná jtsemnama y puerte bëtásá jtsemnama, ntsamo Bëngbe Bëtsá tojanjuabocá entsanga chamotsemnama. ²⁴ Pero Bëngbe Bëtsá chëngbiana corente tsabe juabna bómnyeyeca, mo ndayá cuafjatšatacá, cha jamana chënga chabe bominiyiñe tsábenga chamotsemnama. Bëngbe Bëtsá chca tojanma, Cristo Jesúsbeyeca, entsanga atsebácanënga chamotsemnama y ya ndoñe más bacna soyënga jamana juabnëngaca mandánënga chamondëtsemnama cha tojanma ora. ²⁵ Bëngbe Bëtsá cha tojanjuabuayana, chabe buiñe juabuáshanëse y jóbaniëse, cha chaotsemna ndábeyeca Bëngbe Bëtsá entsanga bacna soyëngama jáperdonama; Jesucristbeñe jtsošbuáchiyëse entsanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entsanga tsábenga chabe bominiyiñe chamotsemnama, chë entsanga bacna soyënga tmojanmama chë tempo ntjatonÿaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. ²⁶ Cha lempe chca tojanma, jinÿanÿiyama cha sempre ntsamo ndegombre yomncá inétsamama, y nyetscanga Jesucristbeñe ošbuáchiyënga chabe bominiyiñe tsábenga chamotsemnama inétsamama.

²⁷ Chcáyeca, entsá ndoñe ntsobenana tondayama ntsenábotamnyana. Chca endmëna, er Bëngbe Bëtsá tsabia chabe bominiyiñe jabemana, ndoñe ntsamo leyiñe tomandancá cha tojtsamama, sinó nye Jesucristbeñe tojtsosbuáchema. ²⁸ Y chca jayanëse, mora bënga tsabá montsetátšëmbo, Bëngbe Bëtsá inétsama canÿe entsá tsabia chabe bominiyiñe chaotsemnama, nye Jesucristbeñe tojtsosbuáchema, y ndoñe ntsamo leyiñe yomandancá cha tojtsamama.

²⁹ ¿O Bëngbe Bëtsá nye judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aifñe, chëngbe Bëtsánaca cha endmëna; ³⁰ er nye canÿe Bëtsá nyetscangbiana endmëna, y cha echanjama chë más delicadentše base bobachtema tëtšenënga imomnëngbiana y ndoñe chchangbiámna, chabe bominiyiñe tsábenga chamotsemnama, Jesucristbeñe tmojtsošbuáchema. ³¹ Chcasna, Bëngbe Bëtsá jamana entsanga chabe bominiyiñe tsábenga chamotsemnama, Jesucristbeñe tmojtsošbuáchema; ¿chca yojtsayana chë ley nye tondayama yondoserverna ca? ¡Ndoñe, ndegombre ndoñe! Inÿetsá, chca jamana chë ley más chaotsámama.

4

Ntsamo Abrahánoftaca tojanopasá

¹ Morna Abrahambiana mochjóyebuambaye, bëngbe tempsca bëts taitá, y mochjinÿe ndayá tojánatsjinÿe Bëngbe Bëtsábeñe ošbuáchiyana bomnentsana. ² Abraham chabe bominiyiñe tsabia chaotsemnama, ndayá cha tojanmama Bëngbe Bëtsá matënjanmëse, cha matënjanobená entsángbeñe ndayama jtseñábotamnyana, pero Bëngbe Bëtsábe delante ndoñe; ³ er Bëngbe Bëtsábe uabemana palabrénguifñe mëntsá endayana: “Abraham, Bëngbe Bëtsábeñe yojtsosbuáchiyey, y chíyeca Bëngbe Bëtsá tonjánayana cha chabe bominiyiñe tsabia yojamna ca.”

⁴ Canÿe entšá trabajayá, crocénana josháchiñana ndayá tojamama, pero chë crocénana ndoñe nÿe tšetánana ntsemnana, sinó chana jtsemnana ntšamo cha tojtsomerecencá. ⁵ Er menójuabonga, nda tondaye tontsama Bëngbe Bëtsá cháuyanama cha chabe bominÿiñe tšabia yomna ca, pero añe tojtsosbuaché Bëngbe Bëtsábeñe, nda endbáyana chë bacna soye tmojamënga mora mo ndoñe chca cuaffamcá chamotsemna ca, chabiamá Bëngbe Bëtsá echanjama chabe bominÿiñe tšabia chaotsemnana, chabe ošbuáchiyama. ⁶ Rey David cachcá chabe librëšañe tojánayana, chë ndabiamá Bëngbe Bëtsá jayanana chabe bominÿiñe tšabia chaotsemna ca, masque chabiamá chca cháuyanama tondaye tonjamëse. David chca entšabiamá tojánayana, cha puerte echantsoyejuaye ca. ⁷ Chabe librëšañe mëntšá tojanábema: ¡Tša oyejuayënga jtsemnana chë Bëngbe Bëtsá chëngbe bacna soyënga tojáperdonanga,

chë Bëngbe Bëtsá chëngbe bacna soyënga tojabuajuánanga!

⁸ ¡Puerte oyejuayá jtsemnana chë Bëngbe Bëtsá mo ndoñe bacna soye cuafjama cuenta tbojtsonÿá cha ca!

⁹ ¿David tojánayana nÿe chë más delicadentse base bobachtema tëtšenënga imomnëngbiama oyejuayana yomna ca? Ndoñe; ndoñe chca mondmëñëngbiámnaca. Y muentse tmonjayana, Abraham Bëngbe Bëtsábeñe yojtsosbuachéyeca, Bëngbe Bëtsá tojánayana cha chabe bominÿiñe tšabia yojamna ca. ¹⁰ Y ¿ntseco chca tojanopasá? ¿Abraham ya chë más delicadentse base bobachtema tëtšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tëtšená yontsemna ora. ¹¹ Y cabá chentšana, Abraham base bobachtema chë más delicadentse tëtšená yojtsemna; y chca yojamna jinÿanyiyama, Bëngbe Bëtsá tempo ya chabiamá tojánayana cha chabe bominÿiñe tšabia yojamna ca, cha Bëngbe Bëtsábeñe yojtsosbuáchema. Lempe chca tojanopasá, jinÿanyiyama Abraham mo taitacá yomnama Bëngbe Bëtsábeñe imošbuachëngbiama, masque ndoñe base bobachtema chë más delicadentse tëtšenënga mondmëna. Y cachcá Bëngbe Bëtsá chë ošbuáchiyëngbiama tojánayana, chënga chabe bominÿiñe tšábenga imomna ca. ¹² Y Abrahámnaca endmëna mo chë taitacá, chë más delicadentse base bobachtema tëtšenënga imomnëngbiama, pero añe Bëngbe Bëtsábeñe corente jtsosbuáchiyëse imoyenëngbiama, cachcá ntšamo bëngbe bëtš taitá Abraham Bëngbe Bëtsábeñe yojtsosbuachecá. Y cha cabá chë más delicadentse base bobachtema ntsetëtšena ora, ya chca yojtsosbuáchiyë.

Jtsosbuáchiyëse, ntšamo Bëngbe Bëtsá tojašebuachenacá jóshjanguana

¹³ Bëngbe Bëtsá tojanašebuachená Abrahambiamá y chábentšana entšangbiama, quem lure chëngbiama yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanosbuáchema, y chíyeca Bëngbe Bëtsá tojánayana cha chabe bominÿiñe tšabia yojamna ca. ¹⁴ Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiama yojtsemna ca tmojayanëse, Bëngbe Bëtsábeñe jtsosbuáchiyana tondayama nantsoSERVERNA, y ntšamo Bëngbe Bëtsá tojanašebuachenacá tondaye ntsámanana. ¹⁵ Chë ley juabocna, Bëngbe Bëtsá puerte etonaná entšanga cháucastigama, chënga ntšamo chíñe iuayancá ndoñe tmontsamama; pero ndocna mandënga tontsemnëse, ndocná ntsoBENANA chë ndoñe tontsayancá ndoñe ntjamana.

16 Y chca, Bèngbe Bètsá Abrahámboye tbojanšbuachená, cha vojtsanošbuachéyeca, ntšamo Bèngbe Bètsá tojanašebuachenacá, ndegombre chaotsemnama chë Bèngbe Bètsábeñe imošbuáchema mo Abrahámbeñtšana entšangcá imomnèngbiamá; y Bèngbe Bètsá chca tojanašebuachená, cha chèngbe tšabíama iuantjésnayeca. Chë mo Abrahámbeñtšana entšangcá imomnèngbeñe, ndoñe quemnatšmëna nÿe chë ntšamo ley yomandacá imnétsamënga, sinó nÿetscanga chë ntšamo Abraham tojanošbuachecá Bèngbe Bètsábeñe imošbuachéngnaca. Y Abraham nÿetscanga bèngbiamá, Bèngbe Bètsábeñe ošbuáchiyënga, mo taitacá endmëna. 17 Ntšamo Bèngbe Bètsábe uabemana palabrénguiñe endayancá, Bèngbe Bètsá Abrahámboye ibojtsatsëtsnaye ora: “Atše sënjama aca ba luariñe entšangbiamá atšbe bominÿiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bèngbe Bètsá chca Abrahambiamá yojanjuabná; y Bèngbe Bètsá endmëna ndábeñe Abraham vojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

18 Abraham Bèngbe Bètsábeñe vojtsošbuáchiye y vojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjásjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bèngbe Bètsá tbojaniancá: “Acbeñtšana entšanga tša mallajta mochántsemna, ndocná queochatobenaye jacúntana ca”. 19 Abraham yojanobatmanëntscuana, cha puerte chábeñe vojtsanošbuaché, ntšamo tbojanšbuachenacá jójyëngacñama, masque Abraham vojtsonÿaye ya bëtsanáñejema vojtssemnama, er ya mo patse uata vojtsobomna, y chabe shema, Sara, ndoñe yonjobena šesonga jtsabamnama. 20 Abraham ndocna te tonjanajbaná Bèngbe Bètsábeñe ošbuáchiyana, y ni mo canÿe ndoñe yonjanjuaboye chë ntšamo Bèngbe Bètsá tbojanšbuachenacá ndoñe joparéjana ca; sinó más corente chábeñe vojtsanošbuaché, y chca Bèngbe Bètsábioye ibojtsatschuanaye, 21 er cha tšabá inatátšëmbo, ntšamo tbojanšbuachenacá jamama, ndegombre Bèngbe Bètsá obená inamnama. 22 Chíyeca, Bèngbe Bètsá tojánayana cha chabe bominÿiñe tšabia yojamna ca.

23 Pero, chabe bominÿiñe tšabia yojamna ca Bèngbe Bètsá tojánayana ora, ndoñe nÿe Abrahambiamá chca ntsóyeuambnayana; 24 ndayá bèngbiámncá, ndëmuanyëngbiamá Bèngbe Bètsá yochjayana chabe bominÿiñe tšábënga imomna ca, bënga Bèngbe Bètsábeñe imošbuachéyeca; Bèngbe Bètsá, nda tojanma Bèngbe Utabná Jesús cháuatayenama. 25 Bèngbe Bètsá tojanalesenciá entšanga Jesús chamóbama, bënga bacna soyënga tmojanma causa, y Bèngbe Bètsá tojanma cha cháuatayenama. Bèngbe Bètsá chca tojanma jobenayama, bënga chabe bominÿiñe tšábënga jábiamama.

5

Mora bënga Bèngbe Bètsábe bominÿiñe tšábënga montsemna

1 Er Bèngbe Bètsá tojama bënga chabe bominÿiñe tšábënga chamotsemnama, bënga chábeñe imošbuachéyeca; mora tempcá tšabá Bèngbe Bètsáftaca bënga montšatšmëna, Bèngbe Utabná Jesucristbéyeca. 2 Bënga Crístbeñe mondošbuáchema, cha tojama bënga chamotsetatšëmbuama Bèngbe Bètsá tša tšabia yomnama, y Bèngbe Bètsábíocana tšabe soyënga jtse-bomnése mora chamotsiyenama. Bënga tša oyejuayënga jësemnana, er

Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga sochjábiamama, batśá ntśamo cachá yomncá. ³ Y ndoñe nÿe chama bënga oyejuayënga jésemnana, ndayá bënga tmojtsesufrina y padecena soyënguiñe tmojtsajna órnaca. Chca mondobama, er bënga mondétatsëmbo bënga tmojtsesufrina orna, bënga juatsjinÿana ntśamo uantadënga jtsemnana padecena soyënguiñe tmojtsemna ora, Bëngbe Bëtsábeñe jtsošbuáchiyëse. ⁴ Bënga padecena soyënguiñe tmojtsemna ora, más tśabá uantadënga jtsemnana mondobéñayeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tśabá tmojachnëngo ora. Bëngbe Bëtsá oyejuayá bëngaftaca chaotsemnana bënga tmojama ora, bënga jtsoebenana más jtsobátmanana, ntśamo šojašebuachenacá cha yochjamama. ⁵ Bënga chca tmojtsobátmanëse, ndocna te nÿe bonamente quemochatobátmana, er Bëngbe Bëtsá šojinÿanÿé tša bëtsá cha šuababuánÿeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnana jtsemándayama.

⁶ Tempo bënga tondaye chemuatanobená jamana Bëngbe Bëtsabe bomiñiñe tśabënga jtsemnana, y chora Cristo tojanóbana bënga chë bacna soyënga tmojamëngbe tśabiamama, nÿa chama tempo yojamna ora. ⁷ Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntśamo chë leyiñe yomandancá jamana tojtsamanabiamama; pero, canÿa bëtsá jtsababuánÿeshanëse tśabe soyënga inÿengbiamama tojtsamabiamama, nderádose chabiamama jóbanama cuantseprontana. ⁸ Pero Bëngbe Bëtsá bënga šojanÿanÿé tša šuababuánÿeshanama, er bënga cabá bacna soyënga ntsamcá imojoyena ora, Cristo bëngbiamama tojanóbana.

⁹ Cristo, chabe buiñe juabuáshanëse bëngbiamama tojanóbanayeca, Bëngbe Bëtsá tojanma bënga chabe bominiñiñe tśabënga jtsemnana. Y chca endmëñayeca, ndegombre Cristo šochanjátsebacaye, entśanga ndoñe tśabá tmojanama ca y castigo chëngbiamama chaotsemna ca Bëngbe Bëtsá chaojayana ora. ¹⁰ Bënga tempo Bëngbe Bëtsá imojanáya; pero cha tojanma bënga cháftaca tempcá tśabá chamotsatsmënamama, chabe Uaquiñá tojanóbanayeca. Y mora, bënga natjëmbana cháftaca chamotsemnana ya tojama ora, ndegombre atsebácanënga mochántsemna, chabe Uaquiñá ainá yómñayeca. ¹¹ Y ndoñe nÿe chca, ndayá bënga cháftaca puerte oyejuayënga chamotsemnámnaca Bëngbe Bëtsá jamana, ndayá Bëngbe Utabná Jesucristo bëngbiamama tojánmayeca. Y mora, chábeyeca Bëngbe Bëtsá tojama bënga cháftaca tempcá tśabá chamotsatsmënamama.

Adán y Cristo

¹² Canÿe entśá bacna soye tojanma causa, nÿetsca entśanga bacna soyënga amënga tmojábocana; y cha tojanóbana, bacna soyënga tojanma causa. Y chca, nÿetsca entśanga entsamna jóbanama, er nÿetscanga bacna soyënga tmojama. ¹³ Bëngbe Bëtsá Moisésbioye chë leyënga cabá nduántšaboshjona ora, entśanga quem luarentše bacna soyënga tmojanma. Pero ndocna ley tontsemna ora, Bëngbe Bëtsá ndoñe ntjatonÿayana entśanga bacna soyënga tmojamama. ¹⁴ Nÿetsca entśanga, Adánbentsána Moisésbentscoñe, nÿetscanga yójanamna jóbanama, ntśamo cach Adán tojanmcá ndoñe tmojanmëngnaca, ntśamo cha ndoñe chaondëmama Bëngbe Bëtsá tbojanmandacá cha tojanma ora. Y Adánbeñe entśanga mondobena jinÿama, ntśamo chë jabama ibojamná canÿe soyënguiñe yochtsanmëna.

15 Pero ntšamo chë útata tbojanmcá ndoñe cachca soye quenátsmëna; er Bëngbe Bëtsá entsangbe tsabiama jtsejuabnayëse tsabe soyënga chëngbiama tojanma ora, ndoñe yonjamna mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tsëngaftanga šmondëtatšëmbo, nÿe canÿe entšá canÿe bacna soye tojanma causa, cha tojanma nÿetsca entšanga jóbana chaotsamnana, pero Bëngbe Bëtsá entsangbe tsabiama yujuabnýeyeca, más bëts soyënga jamana, chë Adanbe bacna soye entsangbiama bacna soyënga tojanmama. Chca, Bëngbe Bëtsá tojanma ba entšanga bëtscá tsabe soyënga chamotsebomnana; y chca tojama, nÿe canÿe entšá, Jesucristo, tsabe soyënga tojánmayeca. 16 Chë ba entšanga bëtscá tsabe soyënga chamotsebomnana Bëngbe Bëtsá tojamentšana endóbocana soye, puerte inÿetšá comna, chë entšá Adán, canÿe bacna soye tojamentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebomnana ibojtsemna ca, y nÿetsca entšángnaca chë causa; pero masque nÿetscanga bacna soyënga tmojama, Bëngbe Bëtsá entsangbe tsabiama ndoñe bëndëtsebnatjëmbyeyeca, tojanma entšanga chabe bominÿiñe tsábenga chamotsemnana y chë bacna soyëngama castigánënga ndoñe chamondëtsemnana. 17 Ndegombre endmëna, canÿe entšá bacna soye tojanma causa, nÿetsca entšanga jóbana moyjtsamna. Pero puerte más, canÿe entšá Jesucristo tojanma. Ndëmuanÿengbiama Bëngbe Bëtsá tojama bëtscá tsabe soyënga chamotsebomnana, ndëmuanÿengbiama Bëngbe Bëtsá tojama chabe bominÿiñe tsábenga chamotsemnana, y Bëngbe Bëtsábiocana chca tmojóyëngacñënga, chënga nÿetscanga mochantsiyena bacna soyënga jtseyëñjanayëse y nÿetsca tescama mo bëtsetsangcá; y chca echántsemna ndayá Cristo tojánmayeca.

18 Y chca, ntšamo canÿe entšá, Adán, canÿe bacna soye tojanmama, Bëngbe Bëtsá tojánayana nÿetscanga bacna soye tmojanma y castigánënga chamotsemna ca; cachcá ntšamo canÿe entšá, Cristo, puerte tsabe soye tojánmayeca, Bëngbe Bëtsá jayanana nÿetscanga imojtsobena chabe bominÿiñe tsábenga jtsemnana y chë nÿetsca tescama yomna tsabe vida jtsebomnana ca. 19 Y ntšamo Bëngbe Bëtsá tbojanmandacá ndoñe chaondëmama canÿe entšá tojanma causa, nÿetsca entšanga bacna soye amënga tmojanobiama; cachcá, ntšamo Bëngbe Bëtsá tbojanmandacá canÿe entšá, Jesucristo, tojánmayeca, Bëngbe Bëtsá tojanma bëtscá entšanga chabe bominÿiñe tsábenga chamotsemnana.

20 Chë ley entsangbe cucuatšinë tmojanáboshjona, jinÿanÿiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe Bëtsá cabá más chëngbe tsabiama yojsanjuabnaye y más tsabe soyënga chëngbiama yojsama. 21 Chcasna, mora mochjayana, entšanga bacna soyëngaca puerte mandánënga imojamna, y chca, nÿetscanga jóbana moyjamna ca. Pero mora, ya ndoñe chca quenátsmëna, er Bëngbe Bëtsá tojama entšanga chabe bominÿiñe tsábenga chamotsemnana, Bëngbe Utabná Jesucristbeyeca chë nÿetsca tescama yomna tsabe vida chamotsebomnana; chíyeca mora bënga montsobena jtsiyenama, Bëngbe Bëtsá šojatšatá tsabe soyënga lempe bëngaftaca jtsemnëse.

6

1 Y asna, ¿ntšamo mochjayana? ¿Šojtsamna jtsiyenana sempre bacna soyënga jtsamëse, chca, Bëngbe Bëtsá šuababuánÿeshanama más chašotsinÿanÿnama, cha más bacna soyënga bënga jtsaperdónayëse? 2 ¡Ndoñe, ndegombre ndoñe! Tempo bënga monjanियena bacna soyënga jamama juabnëngaca mandánënga, pero mora bënga montsobena jtsiyenana chë juabnëngaca tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ¿ndáyeca bënga muatjátsjuabnaye ntšamo ndoñe tšabá tontsemncá jatiyenana? 3 Er ndegombre tšëngaftanga šmondëtatšëmbo, bënga uabáinënga tmojanoquedá ora, tmonjaninÿanÿé bënga Cristo Jesúseftaca cánÿiñe mo canÿacá bëtsemnana; y bënga uabáinënga tmojanoquedá ora, enjamna mo bënga cuafjobancá, ntšamo Cristo tojanobancá. 4 Bënga uabáinënga tmojanoquedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entšangcá jtsiyenama, ntšamo Crístoftaca tojanopasacá, cha cháuatayenama Bëngbe Bëtsá tojanma ora, chabe puerte bëtš obenánaca.

5 Bënga Crístoftaca cánÿiñe mo canÿacá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cánÿiñe mo canÿacá cháftaca mochántsemna, bënga cachiñe vida nÿetsca tescama chamotsatsbomnama Bëngbe Bëtsá jtsamëse, ntšamo Cristo cháuatayenama cha tojanmcá. 6 Y bënga mondëtatšëmbo, chë ntšamo bëngbe vida enjamncá, bacna juabnëngaca mandánënga, Jesucristbeñe cabá ntšošbuáchiye ora, mora ya ndoñe chca yontsemnana; y chca entsemna mo chë tempca vida chaóbanama cuafjamcá, Cristo tmojancrucificá ora. Chca yojamna, Bëngbe Bëtsá jobenayama chë bacna soyënga jamama bëngbe juabnënga jtsepochócama; y chca, ya ndoñe más chë bacna soyëngaca mandánënga chamondëtsemnana, mo nÿets tempo nÿe ínÿabiamá oservenëngcá. 7 Er canÿe entšá tojóbana ora, chë bacna soyënga chábioye ya ndoñe más ntsemándayana. 8 Er Cristo tojanóbana ora, mo bëngnaca cháftaca cuafjobancá endmënayeca, cháftaca jtsiyenámncá bënga montsošbuaché. 9 Bënga mondëtatšëmbo Cristo cháuatayenama y ndocna te cha cachiñe jatóbanama Bëngbe Bëtsá tojanmama; y ndocna obenana queochatsma cha cachiñe chauatóbanama. 10 Cha tojanóbana, y chë bacna soye jamama juabnënga ndocna ne ntjobenayana chábioye jamándana, y ínÿyenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtseservénama yomna. 11 Cachcá, tšëngaftanga cmontsamna jtsejuabnayanana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cánÿiñe mo canÿacá jtsemnëse.

12 Tšëngaftanga cmontsamna, chë bacna soyënga jamama ainanentšë šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nÿe cach tšëngaftanga, tšëngaftangbe cuerpiñe tšabá jtšomñama. 13 Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviamá chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiamá, y tojanma tšabe vida chašmotsebomnama; y jauyanana nÿetsca tšëngaftangbe cuerpentša soyëngna Bëngbe Bëtsá jasérviamá yojtsemna ca. 14 Ndoñe

quecmátamna bacna soyéngaca mandánënga jtsemnana, er tšëngaftanga ndoñe quešmátiyena leyiñe iuayana soyéngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

Ošbuachiyá obligaciónaca jtsemnana ntšamo tšabá yomncá jamama

¹⁵ Y asna, ¿bënga imojtsobena bacna soyënga jamana, chë leyiñe iuayana soyéngaca ndëmandánënga imomnana, y Bëngbe Bëtsá bëngbiama tšabá jtsejuabnayëse bënga imoyenama? ¡Ndoñe, ndegombre ndoñe!

¹⁶ Tšëngaftanga tšabá šmondëtatšëmbo, ínÿabe cucuatšifne mo nÿets tempo nÿe ínÿabiama oservenëngcá šmojoquedá ora, cha jtsobedecënana, ndegombre tšëngaftanga chë nduiñbiama nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyéngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtsobedecënana, y chca, chabe bominiñe tšábënga jabocanana.

¹⁷ Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiama oservenëngcá šmojamna, bacna soyënga jamama juabnëngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá.

¹⁸ Bëngbe Bëtsá tšëngaftanga cmojatsebacá, bacna soyéngaca ndëmandánënga chašmotsemnana, y morna mo Bëngbe Bëtsabiama oservenëngcá šmojábocna, ntšamo tšabá yomncá jtsamama.

¹⁹ Muentše sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátšomna toto palabrénga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabnëngaca, y nÿe ndaye bacna soyënga jamama juabnëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabnëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

²⁰ Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciónaca quešmënjatšmëna ntšamo Bëngbe Bëtsabiama tšabá yomncá játamama.

²¹ ¿Ndaye tšabe soye tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtšëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá.

²² Pero mora, ndoñe quešmátšmëna bacna soyënga jamama juabnëngaca mandánënga, y mora bëtscá šmojtšëntšëna Bëngbe Bëtsá jtseyeunanana y jtseservënana. Chca jtsamana, tšëngaftangbiama puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántšëbomna.

²³ Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentšana, jóbocnana chë nÿetsca tescama yomna tšabe vida jtšëbomnana, Cristo Jesús Bëngbe Utabnáftaca cánÿiñe mo canÿacá jtsemnëse.

¹ Jesucristbeyeca catšátanga, tséngaftanga šmotátšémbo ntšamo chë leyënga entšangbiamama inëtsemnama; tséngaftanga šmotátšémbo, ntšamo chë leyinë tojtsayancá canyë entšá chaotsamamna, nye chë entšá tojtsainëntscuana chábioyey jtsemándayana. ² Chcasna, canyë bouamna shembása, ntšamo chë leyinë endayancá bontsemna chabe boyáftaca jéftsemnana, chë boyá tuainëntscuana; pero chë boyá tojtsóbanésna, chë leyinë endayana, chë shemna canya jtoquédana, chë boyabiamama ndémandaná ca. ³ Y chca, chë shema inyë boyabásaftaca chabe boyábioyey tbojaingñé, chë boyá cabá vida totsóbomñé ora, chë shemna jtsabáinana chabe boyábioyey ínÿaftaca ingñayá ca. Pero chabe boyá tojtsóbanése, chë leyinë endayana chë shemna canya jtoquédana, chë boyabiamama ndémandaná ca, y cha jtsobenana ínÿaftaca jtobouamayana; y chca tojama ora, boyábioyey ínÿaftaca ingñayana ndoñe jtsemnana.

⁴ Tséngaftanga chë ošbuachiyëngaftácnaca cachá endmëna; ya ndoñe más chë léyeca mandánënga quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, ínÿabe entšanga jtsemnama, Crístbënga, ndabiamama Bëngbe Bëtsá tojanama cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jasérviamama. ⁵ Bënga chë nye ntšamo cabënga imnabošcá monjanियेना ora, chë ley enjanoservena bëngbe ainaniñe chamotsebmnomama bacna soyënga jamama puerte bëts juabnënga, nye bënga tšabá jtsomñama. Ba bacna soyënga tmonjanama, y chë causa bënga šonjánamama nyëtsca tescama castiganënga jtsemnama, mo Bëngbe Bëtsabe bominyiñe nyëtsca tescama obanënga cuaftsemncá. ⁶ Pero mora Bëngbe Bëtsá šojatsebacá chë léyeca ndémandanënga chamotsebmnomama; chë ley tempo enjamna bëngbiamama mo canyë amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aifne tsmëcá chamotsiyenama, ntšamo chë Uámana Espiritu iuamcá bënga vida chamotsebmnomama.

Bacna soye jamama juabna tcojtsebmnomëse, chë ley jamana entšá bacna soye chaomama

⁷ Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšémbo ndayá yomna bacna soye jamana. Atše ndocna te matijántatšémbona ndayá yomna chë “ínÿabioyey jtsántšabošana”, “ínÿabioyey ndoñe cattsantšaboše ca” chë leyinë ndoñe matmënjánábemëse. ⁸ Pero bacna soyënga jamama juabnënga atše bomna causa tonjanama, atše puerte chaitsebošama chë ndoñe šonjamama jtsebošana soyënga; y chca chë juabnëngaca tonjanopasá, atše chë leyënguiñe ndayá iuayanama jtsejuabnayëse. Er ndocna ley todmëna ora, entšá ndoñe ntsetatšëmbuana ndayá yomna bacna soye jtsamana. ⁹ Canyë tempo enjamna, chora atše sënjanियेना leyëngama ntsetatšëmbcá, pero ntšamo leyinë iuayancá sënjanabuátmana ora, ndayá jamama ndoñe yonjamnama, atše sënjanontšé chë bacna soyënga jamama juabnëngaca mandaná jtsemnama; ¹⁰ y chora atše sënjántatšémbona, chë causa šojtsanmëna nyëtsca tescama castiganá jtsemnama, mo Bëngbe Bëtsabe bominyiñe nyëtsca tescama obaná cuaftsemncá. Bëngbe Bëtsá chë mando tojanama, atše chë nyëtsca tescama yomna tšabe vida jtsebmnomama chayobemama, chë ley jtseyeunanése; pero ndoñe chiyatanobedecé causa, chë mando tonjanama atše chašotsemna nyëtsca tescama castiganá jtsemnama. ¹¹ Chë

leyentša mandíñe inye soyënga ndoñe šonjëtsemna jamama ca vojtsayáñayeca, chë bacna soyënga jamama juabnënga átšbeñe, šmonjaningñe bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nyëtscá tescama castiganá jtsemnama, mo Bëngbe Bëtsabe bominiñe nyëtscá tescama obaná cuaftsemncá.

12 Pero bënga mëntšá mochjayana: chë leyña tšabe soye endmëna, er Bëngbe Bëtsábociana tojanóbocna, y chë mandëgnaca Bëngbe Bëtsábociana tojanóbocna ca; chiñe endayana ndayá tšabá yomna jamana y chca tšabá jtsemnana. 13 Y asna, ¿quem tšabe soye tojanma atše chašotsemna nyëtscá tescama castiganá jtsemnama, mo Bëngbe Bëtsabe bominiñe nyëtscá tescama obaná cuaftsemncá? ¡Ndoñe, ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nyëtscá tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nyëtscá entšanga mondobena jinñana canye bacna soye, mo canye puerte bëtš bacna soyca.

14 Bënga mondëtatšëmbo chë ley Bëngbe Bëtsabe ley yomnama, pero atšna nye canye entšá sëndmëna, canya nyëtš tempo nye bacna soyënga jamama juabnëngaca mandaná. 15 Ndegombre ndoñe quešnátšertana ntšamo sëntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsogustancá. 16 Pero chë atšbe ainaniñe stsejuabná ndoñe tšabá tontsemna soye stsamëse, ndayama leyíñe iuayana ndoñe candmëna ntsamana ca, chca atše jtsinjanñayana chë ley ndegombre tšabe soye yomnama. 17 Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama. 18 Atše sëndëtatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama. 19 Atše ndoñe quetsátama chë tšabe soye ndayá jamama sëndbošcá, pero aiñe sëntsama chë bacna soye ndayá jamama ndoñe sëndbošcá. 20 Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca vojtsamá, sinó chë bacna soye jamama atšbe ainaniñe yomna juabnënga chca vojtsama.

21 Chca, atše tijátatšëmbona ndayá átšeftaca vojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. 22 Atšbe ainanoca puerte sëntsoyejuá, Bëngbe Bëtsábociana yóbocana mandëngama. 23 Pero atše sënjinýena inye soye átšeftaca vojtsopasánana; chë bacna soye jamama atšbe ainaniñe yomna juabnënga vojtsama atše ndoñe ntjamama ntšamo atšbe juabnoca yomna mo ndegombre soyca, mo chë bacna soyëngaca mandaná cuaftsemncá.

24 ¡Tša lastema atšbiama! Chë bacna soye jamama juabnënga átšbeñe entsemánda, y entsama atše chašotsemna nyëtscá tescama castiganá jtsemnama, mo Bëngbe Bëtsabe bominiñe nyëtscá tescama obaná cuaftsemncá. ¿Nda nanjobenaye chentšana atše jatsbocama? 25 Nye Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aiñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama

átšbeñe yomna juabñéngaca, atše bacna soyénga séntsama, ntšamo chë juabñénga šontsemnadá.

8

Ntšamo Bëngbe Bëtsabe Espiritu yomandacá jtsiyenana

¹ Y chca, Bëngbe Bëtsá ndoñe ntjayanana, Cristo Jesúseftaca cánjiñe mo canýacá imomñénga, chëngbe bacna soyéngama nyetsca tescama castigánénga jtsemnana yojtsamna ca. ² Er, chë Uámana Espíritofaca mandánénga mondménayeca, Bëngbe Bëtsá šojatsebacá, bënga chë bacna soye jamama juabñéngaca mandánénga ndëtsemnana, y nyetsca tescama castigánénga ndëtsemnana, mo Bëngbe Bëtsabe bominiñe nyetsca tescama obanénga cuaftsemncá. Chë Uámana Espiritu jamana bënga ndegombre tšabe vida chamotsebonnana, cánjiñe mo canýacá Cristo Jesúseftaca jtsemñese. ³ Bëngbe Bëtsá tojanma ndayá Moisesbe ley ndoñe tonjanobenacá, er entšanga mondoyena nye ntšamo cachénga imobošcá, y nye cánýenga ndoñe ntšobenana jamana ntšamo tojtsamncá. Bëngbe Bëtsá tojánayana entšángbeñe bacna juabñéngbe mando jtsepochoçama ca, y chama chabe Uaquiñá tbojanichmó. Cha quem luaroye mo canýe entšacá tojánabo, canýe ainánaca, mo chë entšanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeýeca entšanga bacna soyéngama perdonánénga chamotsemnana. ⁴ Bëngbe Bëtsá chca tojanma, bënga chë mora oyenénga jtsamëse ntšamo chë Uámana Espiritu ainaniñe yomandacá y ndoñe nye ntšamo bënga entšanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

⁵ Chë nye cachénga tšabá jtsomñama cachéngbe juabñéngaca imoyenénga, nye sempre jésejuabnayana bacna soyénga jtsamama, chca bacna juabñéngaca mandánénga; pero ntšamo chë Uámana Espiritu ainaniñe iuamëndacá oyenéngna, sempre jésejuabnayana tšabe soyénga jamama, ntšamo chë Uámana Espiritu yobošcá. ⁶ Ntšamo chë nye cachá tšabá jtsomñama juabñéngaca mandaná oyenentšana jóbocnana entšá nyetsca tescama castigáná chaotsemnana, mo Bëngbe Bëtsabe bominiñe nyetsca tescama obaná cuaftsemncá; y ntšamo chë Uámana Espiritu tojtsemandacá oyenentšana jóbocnana chë nyetsca tescama yomna tšabe vida jtsebonnana y ainaniñe tšabe ebionana. ⁷ Chë nyets tempo oyenénga nye ntšamo tmojtsebošcá nye cachénga tšabá jtsomñama jtsejuabnayése, Bëngbe Bëtsabe uayayénga jtsemnana, er chénga ndoñe ntsamana ntšamo cha tojtsamëndacá, y chca jamama ndoñe ntšobenana; ⁸ y chca, chë nye chca bacna juabñéngaca oyenénga, ndoñe ntšobenana jamana ntšamo Bëngbe Bëtsá tšabá tbojtsinýancá.

⁹ Pero tšéngaftanga ndoñe quešmátiyena nye cach tšéngaftanga tšabá jtsomñama cach tšéngaftangbe juabñéngaca, sinó šmojtšiyena ntšamo chë Uámana Espiritu tšéngaftangbe ainaniñe cmamëndacá, er chë Uámana Espiritu sempre tšéngaftangbe ainaniñe iuésemna. Nda ndoñe quem Cristbe Espiritu tondbomná, ndoñe Cristbia ntsemnana. ¹⁰ Pero Cristo sempre tšéngaftangbe ainantšé vida totsóbomñese, masque tšéngaftangbe cuerpénga yochjopochóca, quem luarentšé entšanga bacna soyénga jtsamana causa, tšéngaftangbe espiritu nyets tempo vida echanjesóbomñe, er Bëngbe Bëtsá tojama tšéngaftanga chabe bominiñe tšábénga chašmotsemnana. ¹¹ Y Bëngbe Bëtsabe Espiritu, Jesús cháuatayenama tojamabe Espiritu, sempre

tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnama. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

¹² Chcasna, Jesucrístbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nýe bënga tšabá jtsomñama cabëngbe bacna juabnëngaca; ¹³ er nýe bënga tšabá jtsomñama cabëngbe bacna juabnëngaca šmojtšiyenëse, castigánënga šmochántsemna, mo Bëngbe Bëtsabe bominýiñe obanënga cuaftsemncá; pero Uámana Espíritbeyeca, chca juabnëngaca nýetsca bacna soyënga jtsamana jtsajbanama šmojobenase, chë nýetsca tescama yomna tšabe vida šmochántsebmoma.

¹⁴ Ntšamo chë Uámana Espíritu yomandacá tmojtsamëngna, Bëngbe Bëtsabe básenga jtsemnana. ¹⁵ Er Bëngbe Bëtsá ndoñe tonjama bënga ainaniñe canýe espíritu chamotsebmomnama, mo nýe ínýabiama nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebmomnama Espíritu jamana bënga Bëngbe Bëtsabe básenga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama. ¹⁶ Y chë Uámana Espíritu y bëngbe espíritu canýe ora jayanana bënga Bëngbe Bëtsabe básenga imomna ca. ¹⁷ Y Bëngbe Bëtsabe básenga mondmënyeyeca, bëngnaca mochanjójyëngacñe ndayá cha chabe básenga jatšatayama tojašebuachenacá; bënga y Cristo cánýiñe chë soyënga mochanjójyëngacñe, er bënga ínýe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

Bëngbe Bëtsá bëtsëtsanga y uámanënga sochjábiami

¹⁸ Atše ndegombre sëndétatsëmbo, ntšamo quem tempo bënga imosufrincá, puerte batšatema yomna chë bëngbe tšabiama uámanana y buashinýinýanana Bëngbe Bëtsá sochjínýanýiyama. ¹⁹ Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnama jinýanýiyama ora. ²⁰ Er lempe ntšamo Bëngbe Bëtsá tojamcá, mora ndoñe yontsoserverna ntšamo chaotsemnana cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnana tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá josérviamana ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canýe te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátsama ora chama cha yojanjuabnacá; ²¹ Bëngbe Bëtsá canýe te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnana, lempe ntšamo cha yojanjuabnacá, chabe uámanana y buashinýinýanana jtsebmomnama, cachcá yochjama lempe chë cha tojanma soyëngaca.

²² Er bënga mondétatsëmbo lempe ntšamo Bëngbe Bëtsá tojanmcá mëntsoñama yomna mo canýe shembása šešona jtsebmomnama ora tbojtsetsetšana tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. ²³ Pero ndoñe nýe chë lempe ntšamo

Bëngbe Bëtsá tojanmcá yojtsemna mo chë shembasacá, sinó bëngnaca; y bënga ainaniñe mondbomna chë Uámana Espíritu, y chë soye endmëna ndayá natsana bënga tmojanóyëngacñe, chë Bëngbe Bëtsá bëtsá soyënga sochjátatayentsana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebmoma. ²⁴ Bënga, Bëngbe Bëtsábeñe jtsosbuáchiyëse monjobátmana ntšamo cha tojanayancá chaomama, y chíyeca cha bënga sojatsebacá; pero ndayama tmobatmancá, ya tojtsëchnëjuanama bënga tmojtsonyase, chora chama ya ndoñe ntjatóbatmanëngana. Er ndocná jatobátmanana chë ndayá jinýama ya tojobenacá. ²⁵ Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

²⁶ Uámana Espíritnaca bënga sochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatšëmo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábiye bëngbiana jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañama, bënga ndoñe ntjobenayana bëngbe palábraca chama jóyebuambayama. ²⁷ Y Bëngbe Bëtsana, ntšamo entšanga ainanoca tmojtsebošcá yonýá, y ntšamo chë Espíritu jayanama tojtsebošcá yotátšëmo, er chë Espíritu chabe entšangbiana ibotjanañe, ntšamo Bëngbe Bëtsá yobošcá.

Bënga ayëñjanayëngama más tmojábcana

²⁸ Y bënga mondtëtsëmo, Bëngbe Bëtsá nyetsca soyënguiñe inétsama cha imobobonshánëngbe tšabiana, ndëmuanýenga cha tojáchembo chabe entšanga chamotsemnana, ntšamo cha jamama yojanjuabnacá. ²⁹ Jesucristbeñe imošbuachëngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempscana tojaninýaná chënga chabe Uaquiñacá chamotsemnana; chca, chabe Uaquiñá chë bëtsá catšátangbeñe chë natsaná chaotsemnana. ³⁰ Y chë Bëngbe Bëtsá chca tojánabacangnaca, tojánachembo chabe entšanga chamotsemnana; chëngbiana tojanma chabe bominýiñe tšábënga chamotsemnana, y chëngbiámnaca yochjama chabe uámanana y obenanentsana chamotsebmoma.

³¹ Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca. ³² Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyetsca bëngbe tšabiana. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe sochanjátataye. ³³ ¿Nda nanjobenaye jayanama chë Bëngbe Bëtsá tojábacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominýiñe tšábënga imomna ca. ³⁴ Y asna, ¿nda nanjobenaye jayanama bënga castigánënga jtsemnana sojtsamna ca? ¿Cristo Jesús cha yojtsemna? Ndoñe. Cristo, nda bëngbiana tojanóbana, pero cabá más, ndabiana Bëngbe Bëtsá tojanma cháuatayenama, y mora Bëngbe Bëtsabe catšbioica yojtsetbemana, jamándama y puerte bëtsá chentše jtsemnana; y choca, chánaca bëngbiana

Bèngbe Bètsábioye ibotjanañe. ³⁵ ¿Ndayá nanjobenaye Crístbentsana, chë tša sondababuanÿeshanábentsana bènga jtsajuánayana? ¿Padecena soyènguiñe jtsemnana, tša jtsetsetšana, bènga chamosufrima ínÿenga tmojtsama ora, tondaye saná shèntsana ora, tondaye entšayá tmonsábomna ora, o resjo bèngbiamá tojtsemna ora, o bènga jtsébáyama ínÿenga tmojtseboše ora? ³⁶ Ntšamo Bèngbe Bètsabe uabemana palabrénguiñe endayancá, canÿe entšá Bèngbe Bètsábioye ibojauyana ora:

Ache causa entšanga cada te sontsètsètsná bènga jtsébáyama ca; entšanga bèngbioye nÿe ntšámnaca jtsaborlánana;

bèngaftaca jamana mo chë jobáyama oveshèngaftaca mondbetsamcá ca.

³⁷ Pero ndoñe; nÿetsca chë soyènguentšana bèngna ayèñjanayèngama más tmonjábocana, cha bènga šuababuánÿeshanayeca. ³⁸ Er atše tšabá sèndétatšèmo tondaye yondobena, bènga Bèngbe Bètsábentsana, chë tša sondababuanÿeshanábentsana jtsajuánayana: masque ainènga o obanènga tmojtsemna; ni angelènga, ni amèndayènga chca jamama quemátobena; ni chë mora yojtsèchnèjuana soyènga, ni chë más chcoye yochjopása soyènga; ni ndocna obenana cach ndoñe; ³⁹ ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bèngbe Bètsá tojamcá, quenátobena chca bènga jtsajuánayama. ¡Ndocna soye quenátobena bènga Bèngbe Bètsábentsana, chë bènga sondababuanÿeshanábentsana jtsajuánayana, chë Cristo Jesús Bèngbe Utabnáftaca Bèngbe Bètsá šojanÿanÿé bonshánentsana!

9

Bèngbe Bètsá Israeloca tojabcacá, uámanènga chamotsemnana

¹ Atše, Crístoftaca cánÿiñe mo canÿacá quetsomñecana, ntšamo sèntsichamcá ndegombre endmèna; atše ndoñe quetsátsbostero. Atšbe ainanoca juabnènga, Uámana Espíritbeyeca jtsemandánèse, chë šmonybèuyana tšabá o ndoñe tšabá tijamama, šmonsatsètsná atše ndoñe stsebosterama. ² Ndegombre, atše puerte ngménaca atšbe entšangbiamá, chë Israeloquèngbiamá sèntsemna y atšbe ainana tša šontsetsetše, chènga Jesucrístbeñe jtsošbuáchiyama ndoñe quemátsoše causa. ³ Tšabá tojtsemnèse, atše stjobenaye jtsebošana cach atše Bèngbe Bètsábeyeca nÿetsca tescama castiganá y Crístbentsana luaroca jtsemnana, atšbe entšanga, chë cach atšcá buiñe bomna entšanga jujabuáchama. ⁴ Chènga mondmèna chë Israeloca entšanga, chë Bèngbe Bètsabe bocacana entšanga. Bèngbe Bètsá chènga chabe basengcá tojánabiamá y chë tša bètsá y uamaná cha yomnama chènga tojaninÿanÿé. Bèngbe Bètsá ba soye chènga tojanabuayená ndayá cha chèngbiamá yojánboše y ndayá chèngbiamá jamama, y chë ley chèngbe cucuatšìñe tojanáboshjona. Chènga monjántatšèmo ntšamo Bèngbe Bètsábioye ndegombre jadórana, y chènga mondbomna chë Bèngbe Bètsabe šbuachenánana: chènga cha játsebacana. ⁵ Chènga mondmèna chë bèngbe tempsca uámana bèts taitangbentsánènga, y Crístnaca mo canÿe entšacá, mo canÿe Israeloca entšangbentsacá tojánabo; y cha endmèna Bèngbe Bètsá, nÿetsca soyènguiñe mandayá. Nÿetsca entšanga nÿets tempo cha chamotsatschuaná. Chca chaotsemna.

⁶ Atše ndoñe quetsátichamo, ndayá jamama tojanašebuachenacá ndoñe Bèngbe Bètsá tonjama ca; er, nÿetsca Israeloca entšangbentsènga ndoñe Bèngbe Bètsabe ndegombre entšanga quemátsmèna. ⁷ Ni nÿetsca Abrahábentsana entšanga, ndoñe chabe ndegombre básenga quemátsmèna;

er Běngbe Bětsá Abrahámbyoye tbojaniana: “Chě ácbentšana entšanga nŷe Isaácbentšana mochanjabo ca.”⁸ Chca entsayana, bėngna ndoñe šontsamna jtsejuabnayana Abrahámbentšana nŷetsca entšangbiana mo Běngbe Bětsabe basengcá; inŷetšá, nŷe chě Běngbe Bětsá tbojanšbuachenáyeca Abraham yojánabamna básengbiana cocayé entsemna jtsejuabnayana, Abrahámbentšana ndegombre entšanga bětsemnana.⁹ Er mětšá endmėna ntšamo Běngbe Bětsá tojánayana, Abrahámbyoye tbojanšbuachená ora: “Camětša tempo entsba uata chanjésabo, y Sara canŷe šešona bochántsebomna ca.”

¹⁰ Pero nŷe nŷetšá ndoñe quenátsmėna. Chě Rebecbe uta básatna canŷe taitá ibnabomna, bėngbe tempca bětš taitá Isaac.¹¹⁻¹² Běngbe Bětsá, Rebėcbioye tbojaniana: “Acbe mayor uaquińá, acbe ngomėnche uaquińábioye bochanjasėrvia ca.” Cha chca tojánayana jinŷinŷiyama chě básatbentšana canŷa cha tbojánbocacama, Jacob, y ndoñe chě inŷe basa, Esaú, chca jamama tempo cha tojanjuabóyeca. Rebėcbioye chca tbojaniana chě básata cabá ndonŷna ora, y ni canŷe basa cabá ndocna soye ndama ora. Y chca, ntšamo tojanopasacana, tojanopasá chě básatbentšana canŷa y ndoñe chě inŷa chca chaotsemnana Běngbe Bětsá tbojanábuayanayeca, y ndoñe ndayá chata tbojanama.¹³ Ntšamo Běngbe Bětsá chabe uabemana palabrėnguiñe tojanayancá: “Jacob sėnjánbobonshana, y Esaú sėnjanáboyėnja ca.”

¹⁴ Y asna, ħntšamo mochjayana? ħBěngbe Bětsá ndoñe cachcá nŷetscángaftaca endětsemna ca? ħNdoñe, ndegombre ndoñe!¹⁵ Er Běngbe Bětsá Moisésbioye tbojaniana:

Atše šochanjóngmia nda chaitsebošabiana,
y nda chaitsebošá chanjalastėma ca.

¹⁶ Y chca, Běngbe Bětsá canŷe entšá jabocacayana, ndoñe ndayá chě entšá tojtsebošama o tojamama, ndayá Běngbe Bětsá tbojalastemama.¹⁷ Er Běngbe Bětsabe uabemana palabrėnguiñe, Faraón chě Egiptoca réybioye cha tbojaniana: “Atše rey tcbonjábema, tša bětscá atšbe obenana yomnama nŷetscanga ácbeñe chayinŷanŷema, y nŷets luarentša entšanga atšbiana chamotatšėmbonama ca.”¹⁸ Y chca, Běngbe Bětsá jalastėmana nda tojtsebošábioye, y nda tojtsebošábioye jalesėnciana chabiana nduauenaná chaot-somñama.

¹⁹ Pero ndánaca tšėngaftanguentšá šuatjatjaye: “Běngbe Bětsá chca tojt-samėse, ħntšamo cha nantsobena jayanana canŷe entšá bacna soye tojama ca? ħNda nanjobenaye chě ndayá Běngbe Bětsá tojtsebošama corente contra jtsemnana?”²⁰ Pero, nŷe entšá quecotsemñecá, ħntšamo catjobenaye tša uamaná comna ca jtsejuabnayana, Běngbe Bětsá jatstjanayama ndáyeca canŷe soye chca yojtsama ca? ħChě pormana soye chě chca tojamábioye buanjauyana: “ħndáyeca chca šcojama ca?”²¹ Chě fshantse soyėnga pormayá jtsoobenana canŷe fshantsentšana jamana, canŷe matbaja uámana tescama, y inŷajna cada te chaotsosevėnama. Cachcá, Běngbe Bětsá jtsoobenana jamana ntšamo cha tojtsebošcá, ndayá cha tojama sóyeca.

²² Běngbe Bětsá yojáboše jinŷanŷiyama entšángaftaca tbojánėtnama, chėngbe bacna soyėngama; y yojáboše cha puerte obená yomnama jinŷanŷiyama. Chíyeca, chėnga tša yojanėuantana, chėnga chě ndėmuanŷėngbiana Běngbe Bětsá yochjánayana chėngbe bacna soyėngama castigánėnga jtsemnana yojánamna ca, chě ndėmuanŷėnga jtsapochócama Běngbe Bětsá yojtsanprontana.²³ Y chánaca yojáboše jinŷanŷiyama cha puerte uamaná y bětšá yomnama. Cha

tojama, bēnga chē ndēmuanjēnga cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó bēnga uámanēnga y bētsétsanga jábiamama. ²⁴ Bēnga mondmēna chē ndēmuanjēnga Bēngbe Bētsá chama šojánachembo, ínŷengna judío entšanguentšana, y ínŷengna ndoñe judiēngbentšana. ²⁵ Ntšamo chabe uabemana

palabrēnguiñe, Oséasbe librēšañe Bēngbe Bētsá tojanayancá:
Entšanga ndoñe átšbenga mondmēnēnga, chēnga “atšbe entšanga ca”
chantsébobuatma;

y canŷe luarentša entšanga ndoñe sēnjánababuanjēshanēnga, chēngna “atšbe
bonshánēnga ca” chantsébobuatma.

²⁶ Y cach luare ndayentše Bēngbe Bētsá tojánayana: “Tšēngaftanga atšbe
entšanga ndoñe quešmátsmēna ca”,

cachentše Bēngbe Bētsá ainá chēnga echanjáuyana “atšbe básenga ca”.

²⁷ Israeloca entšangbiana, Isaías jabuachana tojánayana:

Masque Israeloca entšanga puerte banga chamotsemna, nŷa mo chē mar
béjayoca chēnŷañe cascajá,

Bēngbe Bētsá nŷe báseftanga chentšana echanjátsebacaye;

²⁸ er, ndoñe bēn y Bēngbe Utabná canŷe y nŷetsca tescama echanjayana,

nŷets quem luarentša entšangbiana ndayá chēnga tmojamama tšabá o
ndoñe tšabá bétsemnama,

y chēngaftaca echanjama ntšamo chaojayancá ca —cha tojánayana.

²⁹ Ntšamo Isaías tojanayancá, Bēngbe Bētsá Israeloca entšangaftaca ntšamo
jamama tojanoyebuambá ora:

Bēngbe Utabná, nŷets obenana bomná,

ínŷengna bēnga jtsapochócama cha tojanalesenciá ora,

báseftanga bēngbe entšanguentšēnga ainēnga chamotsomñama ndoñe
matēnjanmēse,

bēnga mora pochocánēnga mamojtsemna, mo chē Sodoma y Gomorra
pueblēngoca entšangcá ca,

cha nŷetscanga y nŷetsca tescama tojtsanapochócaye ca.

Israeloca entšanga y chē tšabe noticiēnga

³⁰ Chcasna, mora mēntšá mochjayana: ndoñe judiēnga tondaye
monjánama Bēngbe Bētsabe bominiñe tšábenga jtsemnama, pero cha
tojanma chēnga chabe bominiñe tšábenga chamotsemnama, chēnga chábeñe

imojtsosbuáchiyama. ³¹ Pero, Israeloca entšanga imojánboše Bēngbe Bētsabe
bominiñe tšábenga jtsemnama, ntšamo chē leyíñe iuayancá jtsamēse; pero

ndoñe chca tmonjanobená. ³² ¿Y ndáyeca chca? Co chē Bēngbe Bētsabe
bominiñe tšábenga jtsemnama, chábeñe jtsosbuáchiyēse, chēnga tondaye

monjánama causa chca, sinó chca jtsemnama imojánboše nŷe ntšamo leyíñe
iuayancá jtsamēse. Y chca, chēngna Jesús tmojtsanaboté, ntšamo chē Bēngbe

Bētsabe uabemana palabrēnguiñe chē tmojtsanábotengbiana endayancá,
chēngbiana cha yomna mo chē ndētsbé ndayiñe chēnga jtsojestjiamcá ca.

³³ Bēngbe Bētsabe uabemana palabrēnguiñe cha chca tojánayana:

Smochjinŷe, atše sēnjama Jerusalenentše canŷa chaotsemna, y cha endmēna
mo ndētsbecá ndayentše chēnga mochjojestje,

y canŷe peñēscá ndayēse yochjama chēnga chamotsótsatšama;

pero nda chábeñe tojtsosbuaché, ndocna te nŷe bonamente
queochátobatmana ca.

10

1 Jesucristbeyeca catšátanga, atše nÿets ainánaca séntseboše y Bèngbe Bètsá séntseimpadana, cha Israeloca entsanga cháuatsebacama. ² Atše sèndétatšëmbo y sèntsobena chèngbiama jayanama, chènga puerte mondboše Bèngbe Bètsá jaserviama, pero ntšamo chènga yojtsésertanca, ntšamo Bèngbe Bètsá jaserviama yojtsamnamna, ndoñe quenátsmèna ntšamo ndegombre yomncá. ³ Chènga ndoñe tonjanésertá ntšamo Bèngbe Bètsá inétsama entsanga chabe bominiñi tšábenga chamotsemnama, y cachènga tmojánguango ntšamo jamése jobenayama Bèngbe Bètsabe bominiñi tšábenga jtsemnama; pero ndoñe chca tmonjanobená, chë entsanga chabe bominiñi tšábenga chamotsemnama ntšamo Bèngbe Bètsá inetsamcá ainánaca ntjyöngacñécá. ⁴ Er Cristo tojama endmèna ndoñe chamondétsama ntšamo leyiñe uyayancá, Bèngbe Bètsabe bominiñi tšábenga jtsemnama, chca, chènga chamobenama chabe bominiñi tšábenga jtsemnama, Crístbeñe jtsošbuáchiyése.

⁵ Chë Bèngbe Bètsabe bominiñi tšábenga jtsemnama bošèngbiama, ntšamo leyiñe uyayancá jtsamése, Moisés mèntšá tojánayana, chèngbiama tojanábema ora: “Nda tojtsama nÿetsca mandènga ntšamo leyènguiñe endayancá, tšabe vida echántsebomna, nÿets tempo chë leyèngaca mandaná ca.” ⁶ Mèntšá endmèna ntšamo Bèngbe Bètsabe uabemana palabrènguiñe uyayana, entsanga chabe bominiñi tšábenga chamotsemnama ntšamo cha inétsamama, Jesucristbeñe jtsošbuáchiyése: “Ndoñe cattsetjanaye: ‘¿Nda celoye yochjátsjua ca?’ (chca endmèna ndayá Cristo quem luaroye chaotsmama); ⁷o, ‘¿Chë obanènga imomna luaroye yochjátsma ca?’ (chca endmèna ndayá Cristo chë obanènga imomna luarentšana chaotjsuama).” ⁸ Ntšamo Bèngbe Bètsabe uabemana palabrènguiñe uyayancá mèntšá endmèna: “Tšèngaftanga paselo šmotsobena ntšamo Bèngbe Bètsá tojabuayenacá jouenama, tšèngaftanga ya chama palabrèngaca šmojoyebuambá y tšèngaftangbe ainaniñe chama šmojtsejuabná.” Chë buayenánana endmèna ndayá bènga ftsabuayiyinacá, y chiñe endayana Jesucristbeñe jtsošbuáchiyama šojtsamna ca. ⁹ Chë buayenana soyènguiñe endayana, Jesús ndegombre Bèngbe Utabná yomna ca aca tcojayanése, y Jesucristo cháuatayenama Bèngbe Bètsá tojanmama, nÿets ainánaca tcojtsošbuáchese, Bèngbe Bètsá cmochjatsbocá ca. ¹⁰ Er ainanoca bènga Jesucristbeñe jtsošbuáchiyana y Bèngbe Bètsá jamana cachabe bominiñi tšábenga chamotsemnama; palabrèngaca bènga jinÿanÿiyana ndegombre Jesucristbeñe imojtsošbuáchema, y Bèngbe Bètsá bènga játsebacana.

¹¹ Er Bèngbe Bètsabe uabemana palabrènguiñe mèntšá endayana: “Nda Bèngbe Bètsábeñe tojtsošbuaché, ndocna te nÿe bonamente queochátobatmana ca.” ¹² Judiènga y ndoñe judiènga atsebácanènga mondmèna cach sóyeca, er canÿe Utabná nÿetscangbe Utabná endmèna, y cha tmojtsošëmbuanèngbiama, cha bètscá jtsamana. ¹³ Er Bèngbe Bètsabe uabemana palabrènguiñe mèntšá endayana: “Ndánaca Bèngbe Utabná tbojtsotšëmbuanábioye, cha bochanjatsbocá ca.” ¹⁴ Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiama jóyebuambayama ndoñe tmonjouenése? ¿Y ntšamo chabiama mochjouena, chabe buayenana soyènga chènga jáuyanama ndocná tontsemné? ¹⁵ ¿Y ntšamo chabe buayenánana mochtsošbuátambaye, chèngbiome jíchamuama ndocná tontsemné? Ntšamo Bèngbe Bètsabe uabemana palabrènguiñe endayancá: “¡Tša tšabá chë buayenánana abuatambayènga tmojáshajna ora ca!”

16 Pero n̄yetscanga ch̄e t̄sabe noticiēnga ndoñe ntjoyeunayana. Cach Isaiás m̄entsá tojánayana: “Utahná, ¿nda ch̄e mondabuayiyiná soyēnguñe yojtsošbuaché ca?” 17 Chcasna, ch̄e t̄sabe noticiēnga jouenēse, entsānga jobenayana Jesucristbeñe jtsošbuáchiyana; y nda Cristbiama tojtsabuayiyinase, entsānga chabe buayenánana jouenana.

18 Pero at̄še ſcotjá: ¿ndegombre nandm̄ena judiēnga ch̄e buayenánana ndoñe tmonjanuena ca? ¡Añe, chēnga añe tmonjanuena! Nt̄samo Bēngbe Bētsabe uabemana palabrenguñe endayancá, ch̄e Bēngbe Bētsabe buayenana soyēngama oyebuambnayēngbiama:

Chēngbe oyebuambnayana n̄yets quem luariñe tojóshjango, y chēngbe palabrenga n̄yets luarēnguent̄sa entsāngbenache tojuáshana ca.

19 Pero cachiñe ſcotjá: ¿Israeloca entsānga ch̄e buayenánana ndoñe tonjanēsertá ca? Natsana, Moisés m̄entsá tojánayana, ch̄e ndoñe judiēnga Jesucristbeñe tmojtsošbuaché ora, nt̄samo ch̄e judiēnga mochtsanjuabnayama tojanoyebuambá ora:

At̄še, Bēngbe Bētsá, chanjama, ndayá ch̄e ndoñe judiēnga chamojashjache soyēngama t̄šēngaftanga chašmotsiyent̄sbuašama, chēnga ch̄e ndoñe monjamna mo t̄šēngaftangcá at̄šbe entsānga.

At̄še chca chanjama chēngaftaca, chēnga ch̄e tempo Bēngbe Bētsabe soyēngama ndoñe tonjanēsertá ca.

20 Isaiásnaca, Bēngbe Bētsabiama tojanoyebuambá ora, puerte añémoca tojánayana:

Ch̄e at̄še ndoñe ſmondēnguanga, ſmonjinyena; y ch̄e at̄šbiama ndoñe mondēnoticiangbioye s̄enjenon̄yinyé ca.

21 Pero Israeloca entsāngbiama m̄entsá tojánayana:

N̄yets tempo at̄še t̄sa s̄enjánama, chēnga át̄seftaca t̄sabá tempcá chamot-sat̄smēnama,

pero chēnga ndoñe chemátanbošena jouenama, y at̄šbe contra monjētsemnaca.

11

Bēngbe Bētsá, Israeloca entsāngbiama t̄sabe juabna yobomnama tojin̄yan̄yē

1 Y as mora ſcotjá: ¿Bēngbe Bētsá chabe entsānga tojtsanēbaté? ¡Ndoñe, ndegombre ndoñe! Cach at̄še can̄ye Israelocá s̄ēndm̄ena, Abrahámbent̄šana entsá y Benjaminbe bēts pamillentsana entsá. 2 Bēngbe Bētsá chabe entsānga ndoñe tonjubaté, ch̄e tempscana tojánabacacanga. T̄šēngaftanga ſmondētats̄embo nt̄samo Bēngbe Bētsabe uabemana palabrenguñe endayancá, Bēngbe Bētsabe juabna oyebuambnayá Elías, Israeloca entsāngbe contra Bēngbe Bētsábioye cha ibojanats̄etsná ora: 3 “Bēngbe Utahná, ache juabna oyebuambnayēnga tmojt̄sēbaye y acbiama pormana altarēnga tmojt̄sepochochá; n̄ye at̄še vídaca tijoquedá, y chēnga montseboše át̄snaca jóbama ca.” 4 Y m̄entsá Bēngbe Bētsá tojanjuá: “At̄še can̄ys̄efta uaranga boyabásenga at̄šbiama s̄enjacuedá, Baal ndoñe tmonjadoranga, ndayá entsānga tmojobormá y imojtsejuabná can̄ye dios yomna ca.” 5 Mór̄naca cachcá entsemna, judiēnguent̄se báseftanga monduájamna Jesucristbeñe ošbuáchiyēnga, ndēmuan̄yēnga Bēngbe Bētsá tojabacacá, cha chēngbiama t̄sabe juabna bóm̄nayeca. 6 Bēngbe Bētsá entsānga jabacacayana chēngbiama t̄sabe juabna bóm̄nayeca; y ndoñe chca ntjamana ndayá entsānga tmojamama. Er

ndayá tmojamama Bëngbe Bëtsá entsanga tojábacacase, cha nanjínjányiye cha chca inétsama, ndoñe nýe chëngbiamá tsábe juabna bómnayeca.

⁷ ¿Y asna? Israeloca entsanga ndoñe chemátaninyena ntšamo Bëngbe Bëtsabe hominýiñe tsábenga jtsemnana, pero chënguentsënga básefta bocacánëngna aínë tmojanobená. Bëngbe Bëtsá tojanalesenciá chë ínýnga Israeloquënguentšana chabe buayenana soyënga ainaniñe ndoñe chamondóyëngacñama; ⁸ ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinýana ni jósertana, mo nduabínýnënga o nduauenanënga cuaftsemnëngcá ca.” ⁹ Davídnaca chëngbiamá mëntsá tojánayana:

Mo chë entsanga canýe fiestentšë oboyejuayënga, chëngbe uayayëngbeyeca nýe ndeolpe ishëchenëngcá,

y mo chë bayëngbiamá uachmaniñe ishëchenëngcá, chënga mal chamopasama chaomama Bëngbe Bëtsá sëntseimpadana, mo nda ndëtsbeñe cuaftsojestjá.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojsamna ca, bacna soyënga tmojama causa;

¹⁰ Bëngbe Bëtsá chaoma ntšamo mochjapásama chënga ndoñe chamondobená jtsetatšëmbuana,

y chaoma puerte chamosufrima, nýets tempo padecena soyënguiñe jt-siyenëse ca —cha tojánayana.

Bëngbe Bëtsá ndoñe judiënga tojatsebacá

¹¹ As mora šcotjá: ¿Israeloca entsanga Bëngbe Bëtsá ndoñe tmonjanoye-uná ora, cha tojánayana chënga nýetsca tescama castigánënga jtsemnana yojsamna ca, ndocna inýe soye chëngbiamá ntsemncá? ¿Chëngbiamá yojamna mo chë ndëtsbeñe jojestjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsiyentšbuaše. ¹² Judiënga bacna soyënga tmojanma causa, inýe entsanga quem luarentšë tmojobená ba tsábe soyënga jtsebonnama. Chë judiënga tmonjanorreba já causa, chë ndoñe judiënga ba tsábe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tsábe bendicionënga Bëngbe Bëtsábentšana nýetsca entsangbiamá echántsemna.

¹³ Ntšamo mora chanjayancá, tsëngaftanga ndoñe judiëngbiamá entsemna. Bëngbe Bëtsá šojichmó chabe soyëngama chë ndoñe judiënga jábuayenama; atšë sëntsejuabná puerte uamana trabajo stsebonna ca. ¹⁴ Atšë sëntsobátmana, quem trabájoca atšë jobenayana jamama chë cach atšcá buiñe bomna entsanguentsënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuaše, y chca, ndayá tijamama, Bëngbe Bëtsá chënguentšana báseftanga cháuatsebacama. ¹⁵ Er chë judiënga Bëngbe Bëtsá tojsanëbaté ora, cha tojanma inýe entsanga quem luarentšë cháftaca tempcá tsábá chamotsatšmënama; y chënga cha chamojoyeuná ora, corente tsábá echántsemna, nýa chënga mo obanënga cuabmëncá y cuaftsatayanëngcá.

¹⁶ Nda canye arninÿentsana chë natsana tandëse Bëngbe Bëtsabiana joserviama yojtsemna ca tojayanëse, jtsemnana mo nÿetsana chabiana cuaftsemncá. Canÿe betiyentsa tbëtëjënga Bëngbe Bëtsabiana yojtsemna ca canÿa tojayanëse, nÿetsca chë betiyentsa buacuafjëngnaca Bëngbe Bëtsabiana jtsemnana.

¹⁷ Chë judiënguentsë báseftanga Jesucristbeñe ndoñe montsanošbuaché ora, tsëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canÿe jena olivo betiyentsana entsanga tmojatëtse buacuafjëngcá, y tsëngaftangna mo tjoca olivo betiyentsa buacuafjënga, chë jena olivo betiyeshiñe jenëfjëngcá. Mora tsëngaftanga Bëngbe Bëtsábentsana cachca tsabe soyënga chë judiëngaftaca šmontsebmna, mo chë jena buacuafjënga y cachentsa buacuafjënga cach tbëtëjentsana lempe cuaftsoyëngacañcá. ¹⁸ Ndoñe šmattsenábotamnaye, tsëngaftanga Bëngbe Bëtsabe tsabe soyënga šmojtsebmna, chë Jesucristbeñe ndoñe montsanošbuaché judiëngbiana yojamna soyënga. Smochtsejuabnaye, buacuafjëngna chë tbëtëjëngayeca vida jtsebmna, y ndoñe tbëtëjënga chë buacuafjëngayeca; cachcá, tsëngaftanga nÿe Bëngbe Bëtsábeyeca chë tsabe soyënga šmojtsebmna.

¹⁹ Pero tsëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsëjanobená mo buacuafjënga betiyiñe jenëfjëngcá chca tsabe bendicionënga Bëngbe Bëtsábentsana jóyëngacñana ca.” ²⁰ Ndegombre, chënga Jesucristbeñe ndoñe montsanošbuaché causa, mo buacuetëšenëfjëngcá tmonjanoquedá, pero Jesucristbeñe šmojtsošbuáchema, tsëngaftanga šmojoquedá Bëngbe Bëtsábentsana tsabe bendicionënga jtsoyëngacañcá. Chcasna, chama ndoñe šmattsenábotamnaye; más tsabana cuedado jtsebmna. ²¹ Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entsanga bëtsebmna, monjamna mo cach betiyentsa buacuafjëngcá; tsëngaftanga, chë mo betiyiñe jena buacuafjëngcá šmommënga, cha cach ndoñe quecmochátaperdonaye, chábeñe ošbuáchiyana šmojtsajbanase.

²² Bëtscá šmochtsejuabnaye Bëngbe Bëtsá puerte tsabia yomnama, pero cha tsatjayá yomnámnaca šmochtsejuabnaye; tsatjayá endmëna chë bacna soyënga tmojtsamëngaftaca, pero tsëngaftangaftacna puerte tsabia. Cha tsëngaftangaftaca chca echántsemna, tsëngaftanga chca chašmojtsomerecénentscuana; pero ndoñesna, Bëngbe Bëtsá echanjama tsëngaftángnaca mo buacuetëšenëfjëngcá chašmoquedama, chë tsabe bendicionënga Bëngbe Bëtsábentsana ntsoyëngacañcá. ²³ Y ntšamo mora imojtsejuabnacá chë judiënga tmojatrocá y tmojontsé Jesucristbeñe jtsošbuáchiyana, chëngnaca cachiñe chë tsabe bendicionënga Bëngbe Bëtsábentsana mochánjóyëngacñe, y mochántsemna mo betiyiñe jena buacuafjëngcá, er Bëngbe Bëtsá becá obenana endbmna jamama ntšamo chë judiënga tempo imojanbmncá cachiñe chamotsatsbmna. ²⁴ Chcasna, más paselo jtsemnana canÿe jena olivo betiyentsa buacuatëšenëfjënga cach betiyiñe jëtsjena, y ndoñe, chë tjoca olivos betiyentsa buacuafja canÿe jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsošbuaché judiëngbiana, jontšana jtsošbuáchiyana y tsabe bendicionënga Bëngbe Bëtsábentsana

jóyëngacñana, tsëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiama.

Bëngbe Bëtsá nyëtscángaftaca puerte tsabia endmëna

²⁵ Jesucristbeyeca catšátanga, atše sëntseboše tsëngaftanga chašmotsetátšëmbo chë tempo Bëngbe Bëtsá entšanga ndoñe tonjaninñanyé soyëngama. Atše sëntseboše tsëngaftanga quem soyëngama chašmotsetátšëmbo, chca, tsëngaftanga ndoñe judiënga chë judiëngbiama más uámanënga šmomna ca ndoñe chašmondëtsejuabnama. Ndayá Bëngbe Bëtsá tempo entšanga ndoñe tonjaninñanyéca, quem soye endmëna: Bëngbe Bëtsá tojalesenciá, nýe baseftatescama banga Israeloquënga Bëngbe Bëtsabe soyënga ainaniñe ndoñe chamondóyëngacñana; pero chca echántsemna, chë ndoñe judiënguentše atsebácanënga jtsamnama imomnënga, atsebácanënga chamojtsemnëntscuana. ²⁶ Chca chaojopasá ora, nyëtsca Israelentša entšanga atsebácanënga mochántsemna; ntšamo Bëngbe Bëtsabe uabemana palabrénguiñe endayancá:

Entšangbe atsebacyá Israelocana echanjabo,
y echanjama nyëtsca Jacóbëbentšana entšanga ndoñe más vida
chamondëtsebmoma, bacna soyënga jtsamëse ca.

²⁷ Y mëntšá endmëna ntšamo chëngbiama chjašebuachená:

chënga játsebacana, chëngbe bacna soyëngama chajjaperdónaye ora ca —chiñe
endayana.

²⁸ Chë tsabe noticiënga tmojtsanaboté causa, judiënga Bëngbe Bëtsabe uayayënga mondmëna, chca, tsëngaftangbe tsabiama chaotsemnama. Pero Bëngbe Bëtsá tojánabacacayeca, chëngnaca Bëngbe Bëtsabe bonshánënga mondmëna, er Bëngbe Bëtsá chëngbe tempsca uamana bëts taitanga chca tojanašebuachená. ²⁹ Chca endmëna, er Bëngbe Bëtsá ndocna te juabna ntjatrocana; nyëtscanga chabe entšanga chamotsemnana tojáchembënga, nyëts tempo cha echántsabuanýeshana, y echanjama chëngbeñe tsabe bendicionënga chaotsemnama. ³⁰ Tsëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa. ³¹ Cachcá, Bëngbe Bëtsá tsëngaftanga tcmojalastemama, judiënga montsemna chë Bëngbe Bëtsá ndoñe montsobedecënënga, chca, Bëngbe Bëtsá chëngnaca cháualastemama. ³² Er Bëngbe Bëtsá tojinñanyé, cha ndoñe ntjoyeunayama juabnëngaca nyëtscanga mandánënga imomnana, chca, nyëtscanga jálastemama cha jobenayama.

³³ ¡Ndegombre, Bëngbe Bëtsá nyëtscangbiama puerte tsabia endmëna, puerte osertaná y puerte obiašnjachá! Ndocná quenátobena ínýënga jábuayenama ndayá Bëngbe Bëtsá jamama inetsejuabnacyá, y ndocná quenátobena corente josértana ntšamo cha inetsamcá. ³⁴ Ntšamo Bëngbe Bëtsabe uabemana palabrénguiñe endayancá:

Ndocná quenátstatšëmbo ntšamo Bëngbe Bëtsá inetsejuabnacyá;
ndocná quenátobena cha jábuayenama ndayá jamana ibomnana.

³⁵ Ndocná quenátobena ndayánaca cha natsana jshatšëtayana, chë tbo-
jatšëtabiama ndebená cha jatsmënama,
y chë ndebënama ndayánaca jtoyiyama chabotsemnana ca.

³⁶ Er lempe cha tojama, lempe cha iútabna, y lempe chabiama yomna.
¡Nyëtscanga nyëtsca tescama cha chamotsatschuaná! Chca chaotsemna.

12

Ntšamo jtsiyenēse Bēngbe Bētsá jtseservénama

¹ Chcasna, Jesucristbeyeca catsátanga, Bēngbe Bētsá bēnga ba soye šojalastemáyeca, puerte chontsaimpadana, tsēngaftanga Bēngbe Bētsá chašmēyana tša šmojtseboše lempe jamana chábioye jadórana ca, Bēngbe Bētsá jadórana mo ndayá cuaftjobacá y cuaftuatšēmboncá, mo cabá ainá cuaftsomñcá. Smochjauyana tsēngaftanga sempre šmochtsentšena cha servénana y jtsamēse cha tsábá bēngaftaca chaotsemnana. As, chca chašmojtsama ora, ndegombre oyejuayá Bēngbe Bētsá šmochántsebiamnaye.

² Ndoñe šmattsiyena jtsamēse ntšamo chē n̄ye quem luarama enójuabnaye entšanga monduamancá, y smochjaleséncia Bēngbe Bētsá mo tsēm entšangcá chácmabiamama, tsēngaftanga ainana y juabna mo tsēmca chaomēse. Chca, tsēngaftanga šmochanjobenaye jtsejuabnayana y šmochántsetatšēmbo ntšamo Bēngbe Bētsá yobošcá: ndayá tsábá yomna, chē ndayá cha oyejuayá ibnabema, y ndayá ya ndoñe yondopodena más tsábá jtsemnana.

³ Ndayá Bēngbe Bētsá atšbiana tsábá jtsejuabnayēse šojatsetama, n̄yetsca tsēngaftanga cbochjáuyana, ndocná cachabiana chaondētsejuabná más uamaná yomna ca, n̄ye ntsachetšá jtsenójuabnayana ibomna n̄yetsá. Más tsábá, cada ona cachabiana tsábá chaotsenjuabná, y chca chaotsenjuabná ntšamo chabe ošbuáchiyana yomncá, chca, chē Bēngbe Bētsá tbojatšeta ošbuáchiyana chabiana chaotsetrabájama. ⁴ Er, ntšamo bēnga cada ona mondbomna can̄ye cuerpo y chē cuerpiñe ba soyēnga jtsebomnana, y n̄yetsca soyēnga ndoñe cach soyama cuerpiñe ntsoservénana, ⁵ cachcá bēnga ošbuáchiyēnga, masque bētscanga imomna, Cristoftaca cán̄yiñe mo can̄yacá mondmēnayeca, bēnga mondmēna mo chabe cuerpo cuaftsemncá, y cada ona cán̄yiñe mo can̄yacá n̄yetscāngaftaca.

⁶ Bēngbe Bētsá tojama bēnga cada ona chamotsebomnana ndoñe cachca chabe tsetana obenana, ntšamo Bēngbe Bētsá cada ona bēngbe tsabiama inajuabnaycá. Y chabe juábnaca bēnga jtsóyebuambnayama jtsobenama Bēngbe Bētsá tojamēse, chca mochtsama ntsachetšá chábeñe bēngbe ošbuáchiyana yomncá. ⁷ Ošbuáchiyēnga bētscá jaserviama bēnga chamotsobenama Bēngbe Bētsá tojamēse, chca mochtsama. Tsábá jtsabuátambayama bēnga chamotsobenama Bēngbe Bētsá tojamēse, chca mochtsama. ⁸ In̄yenga jañēmuama bēnga chamotsobenama Bēngbe Bētsá tojamēse, chca šontsamna. Lempe ntšamo bēnga tmobomncá in̄yengbiámnaca chaotsemnana bēnga jamama chamotsobenama Bēngbe Bētsá tojamēse, n̄yets ainánaca chca šontsamna. Amēndayēnga jtsemnana bēnga chamotsobenama Bēngbe Bētsá tojamēse, šontsamna bētscá jamana tsábá jtsamēndayama. In̄yenga jálastemama bēnga chamotsobenama Bēngbe Bētsá tojamēse, šontsamna oyejuayēnga chca jamana.

Ntšamo bēnga Jesucristbeñe ošbuáchiyēnga jtsamana šojtsamna

⁹ In̄ya chašmojtsebobonshana ora, n̄yets ainánaca chca šmochtsama. Ndayá yomna ndoñe tsábe soye šmochtsaboté y chentšana šmochtsojuánañe; šmochtsentšena ntšamo tsábá yomncá jtsamna. ¹⁰ Cmontsamna n̄yetscanga puerte jtsenbobonshánana, Jesucristbeyeca catsátanga quetsomñecá, chē in̄yenga bēngbiana más uamanēnga imomna ca jtsejuabnayēse.

11 Ndoñe oyējnyāyēnga šmattsemna, ndayá bētsá Bēngbe Utabnabiamia šmochtsetrabájaye; ainaniñe corente añemo jtsebomñese, Bēngbe Utabná sempre šmochtse servena.

12 Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguiñe chašmojtšachñējuana ora, puerte uantadēnga šmochtsemna, y siempre Bēngbe Bētsáftaca šmochtsencuēntaye.

13 Bēngbe Bētsabe entsānga opresido bomñēnga šmochjújabuache, y šmochtseprontana tšēngaftangbe yebnentse posada ínŷēnga júyentšamiamia.

14 Bēngbe Bētsá šmochtseimpadana, chē tšēngaftanga chašmosufrima amēngbiamia tšabe bendicionēnga cha chaotsamama; aíñe, cha šmochjaimpáda tšabe bendicionēnga chēngbiamia chaotsamama, bacna soyēnga ndoñe.

15 Oyejuayēnga ínŷēngaftaca šmochtsemna, chēnga oyejuayēnga chamojtsemna ora; ngmēnaca šmochtsemna, ínŷēnga ngmēniñe chamojtsemna ora.

16 Smochtsiyena nyētscanga jtšenēyeunanēse. Nŷe cach tšēngaftanga uámanēnga ndoñe šmattsenobiamnaye, sinó chē nduámanēnga imomñēngaftaca tšabá mándbomñēnga šmochtsemna. Ndoñe šmattsejuabnaye yapa osertánēnga šmomna ca.

17 Inŷēnga bacá chacmojtšaborlana ora, ndoñe šmattsatēchēnanguaye; corente šmochtsentšena ntšamo nyētsca entsāngbiamia tšabá yomncá jtšamama. 18 Ntsachetsá šmojobenacá, lempe šmochtsama natjēmbana nyētsca entsāngaftaca jtšiyenama. 19 Atšbe bonshánēnga, ínŷēnga bacá chacmojtšaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguiñe cha tojánayana: “Atše chanjama chēnga chamosufrima, ínŷēnga chamosufrima tmojama causa; y chēnga chanjácastigaye, ínŷēngbioye bacá tmojaborlá causa ca.” 20 Chca játamanna, mēntšá šmochjama, ntšamo cachánaca tojanayanca:

Acbe uayayá tbojtseshēntsane, saná cochjacaredáda, y tbojtsajuendase, cochjuáfiye. Chca chacojamēse, cochanjama cha puerte chaotsēuatja ntšamo tmojaborlama,

y ainana corente chabotsetšena, mo chebana iñbēnga chabe bestšašīñe cuafjacacá ca.

21 Ndoñe šmatjaleséncia, ntšamo ndoñe tšabá tontsemncá tšēngaftanga chacmayēñjanama. Chamna, ntšamo tšabá yomncá jtšamēse, chē ndoñe tšabe soye šmochjayēñjaná.

13

1 Nyētsca entsānga entsamna jtšamana ntšamo chē amēndayēnga tmojtšamēndacá, er ndocná obenana ntsebomnana, Bēngbe Bētsá ndoñe chca tbonjalesenciase, y nŷe Bēngbe Bētsá tojama amēndayēnga obenana chamotsebomnama. 2 Chca, chē amēndayēngbe contra tmojtsemnēnga, ntšamo chaotsemnama Bēngbe Bētsá tojayancá contra chēnga jtsemnana; y chca contra tmojtsemnēnga, castigánēnga mochántsemna; 3 er ntšamo tšabá yomncá amēnga, ndoñe quenátamna ndayama chē amēndayēnga jatebēuatjana, nŷe chē bacna soye amēngna aíñe. Tšēngaftanga šmojtseboše jtšiyenama chē amēndayēngbioye ntjatebēuatjácá; chcasna, ntšamo

tšabá yomncá šmochtsama, y chë amëndayëngna tšabe bomínýeca mochantsonýaye ntšamo chašmojtsamcá; ⁴ er chë amëndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamëšna, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. ⁵ Chíyeca, jtseytana ntšamo chë amëndayënga tmojtsichamcá jtsamana, pero ndoñe nýe chë castigo ndoñe chašmondëtsebonnama, ndoñe chca šmontsama causa, sinó chë ainantšša tšabe juabnënga ntšamo tbojtsëtsëtsnacá joyeunayama yómnaýeca. ⁶ Cachca soyëngama, amëndayëngbiama impuesto tšëngaftanga jtsatsquécjnyana; er chë amëndayënga Bëngbe Bëtsabe oservëngna mondmëna, ntšamo chiñe jtsamama tojtsamncá corente tmojtsentšëna ora.

⁷ Chcasna, tšëngaftanga šmochjáýentšbuachiye ntšamo chënga jtsebomnama tojtsamncá. Chë crocënanana entšanga ayëngacayëngbiye, ndaye impuëstnaca šmochtëbuënyaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnyaye.

⁸ Crocënanana inýa jëtsëntšabuáchiyama chacmojtsamnëse, nýe ntoiyycá ndoñe šmatjoquéda, nýets tempo ndebënénga; nýe quem soye sempre šmochtsama: nýetscanga šmochtsenbobonshana; er nda ndëmua entšábíoye tbojtsebobonshana, ya tojama ntšamo leyíne yomandancá. ⁹ Quem mandënga, “acbe shema ínýaftaca ndoñe cattseíngñaye, inýa ndoñe catjóbba, ndoñe catjatbëba, inýa tojtsebomna soye ndoñe nýe acbiama cattseboše”, y chë inýe mandënga leyíne lempe quem mandíne entsemna: “Ndëmua entšánaca cochtsebobonshana ntšamo cach aca cuenobobonshancá”. ¹⁰ Nda ndëmua entšábíoye tbojtsebobonshana, chábiye ndoñe bacá ntjabórlana; chca, ndánaca jtsebobonshánëse, entšá jamana lempe ntšamo leyíne yomandancá.

¹¹ Chë soyënga cmontsamna jtsamana, er bënga mondëtatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuaftošënanagcá, Jesucristo jaserviama jtsentšënése. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristëñe jtsošbuáchiyama tmonjanontšé ora enjamnama. ¹² Mora bënga mondoyena canýe luarentšë bëtscá bacna soyëngaca y ngmenánaca, y chca jtsemnana mo bënga nýets tempo ibetiñe cuaftsajncá. Pero ya entsobeco chë Bëngbe Bëtsá bënga játsebacama te, mo chë ibetiñe ya jtsopochócama y binýiñe ya jontšamcá. Chíyeca mochtsajbaná bacna soyënga amana, y mochtsiyëna tšabe soyënga jtsamëse, Satanás játsjama y jáýëñjanama bënga jtseprontánëse, mo canýe soldado jenëuyanama y inýa jayëñjanama ba soyënga tojenocjacá. ¹³ Ntšamo šojtsamncá mochtsiyëna, ntšamo entšanga ndaye tšabe sóynaca jamama monduamancá, ínýëngbiama lempe chaotsinýnëse. Chcasna, ndoñe quešnátamna yapa tmoyënga ntsemnana, ndoñe fiestënguenache ndoñe tšabe soyënga ntsamana, ndoñe bacna soye boyabása o shembásaftaca ntsamana y jenomándama ntsoñëncá chca soyënga ndoñe ntsamana, nýetscanga ndoñe cachcá ntsejuabnyama ndoñe ntsamana y ndoñe ínýënga yapa ntsiyentšbuašana. ¹⁴ Chca játamamna, šmochtsiyëna jtsamëse ntšamo Bëngbe Utabná Jesucristo endbetsamcá, y ndoñe nýe šmatjësejuabnyaye jtsamana

nýe cach tsëngaftanga tsábá jtsomñama juabnëngaca, ndayá tsëngaftanga chašmotsamama chë juabnënguiñe tojtsemncá.

14

Ndoñe šmattsóyebuambnaye inýe ošbuáchiyënge contra

¹ Chë Jesucristbeñe nýe batsatema ošbuáchiyënga tsábá šmochjúbuaja, y chëngaftaca ndoñe šmattsenatsëtsnaye ndayá aiñe o ndoñe jamana yontsamnama. ² Er básefta ošbuáchiyënga corente imotátšëmo chënga nýe ndayanaca jasama imobenama, pero chë Jesucristbeñe nýe batsatema ošbuáchiyëngna, ndocna mëntsena ntseyayana, er chënga jtsejuabnayana aiñe jasana canýe bacna soye nántsemna ca. ³ Chë nýetsca saná sayënga ndoñe chamondëtsejuabná chë inýe soyënga ndoñe mondëtsesayëngbiama, chë causa chënga más batsá uámanënga imomna ca; y chë ndaye soyënga ndoñe mondëtsesayëngna, chë nýetsca saná sayënge contra ndoñe chamondëtsoyebuambná, er Bëngbe Bëtsá chënga tojúbuaja mo chabe entsangcá. ⁴ Tsëngaftanga ndoñe quemátamna chë ínýabe oservená ndoñe tsábá tonjama ca jatichámuana. Cachabe nduiño jtsemnana nda yochjayana cha tsábá o ndoñe tsábá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

⁵ Báseftanga mondmeña, chënga jtsejuabnayana canýe te inýe tescama más uámana te yomna ca; pero ínýengna jtsejuabnayana cada te cachá iuámana ca. Y entsemna ndayá cada ona corente tsábá chaotsetátšëmo, ntšamo yojuabnacá ndáyeca chca ca. ⁶ Nda tojtsejuabná canýe te inýe tescama más uámana te yomna ca, chca jamana Bëngbe Utabnábiama jtenójuaboyama. Y nda nýetsca saná tojttesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnábiama jtenójuaboyama, y chánaca Bëngbe Bëtsábioye chë sanama jëtschuayana.

⁷ Bënga ošbuáchiyënguentsana ndocná ainá ntsemnana nýe cachabiamá, ni jóbanana nýe cachabiamá. ⁸ Bënga tmojtсийenëse, Bëngbe Utabnábiama jtsiyenana; y tmojóbanëšna, Bëngbe Utabnábiama jóbanana. Chca, masque ainënga o obanënga, bënga Bëngbe Utabnábénga jtsemnana. ⁹ Chama Cristo tojanóana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

¹⁰ As, ¿ndáyeca tsëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínýenga tsëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nýetscanga šontsamna Bëngbe Bëtsabe delante jashjanguana, ntšamo cada ona tojëftsemcá tsábá o ndoñe tsábá bëtsemnana cha cháuyanama. ¹¹ Er Bëngbe Bëtsabe uabemana palabrënguiñe Bëngbe Utabná mëntsá tojánayana:

Ndegombre atše ainá sëndëtsomñe, y chíyeca atše šcojurá,
nýetscanga atšbe delante mochanjoshëntsaméntša atše jadórama,
y nýetscanga šmochanjauyana, “ndegombre aca Bëngbe Bëtsá condmëna ca”.
¹² Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

Ndoñe šmatjama inýe ošbuáchiyënga bacna benachiñe chamótsatsama

13 Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. 14 Atše sëndétatsëmbo, mo canÿa Bëngbe Utabnáftaca cányiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canÿe entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye. 15 Tšëngaftanga inÿa becá šmojtsatsétsná, inÿe soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerte bacna soye tojamama, chca, tšëngaftanga jtsinÿanÿnayana ndoñe šmondoyena jtsamëse chë inÿenga jtsababuánÿeshanëse. Nÿe tšëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. 16 Ndoñe šmatjaleséncia ndayá tšëngaftanga tšabá šmétsamama, inÿenga ndoñe tšabá tšëngaftangbiana chamotsóyebuambnama. Chca šmochanjobenaye, ntšamo šmojtsamcá jt-sajbanase, inÿenga ndoñe tšabá tmontsoyebuambná ora. 17 Bëngbe Bëtsabe amëndayana bëngbeñe ndoñe quenátsmëna inÿe soyënga aiñe jasana o inÿe soyënga ndoñe, canÿe soye aiñe jofšiyana o inÿe soye ndoñe. Pero chabe amëndayana bëngbeñe aiñe endmëna jtsamana soyënga ndayama Bëngbe Bëtsá tojayana aiñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espiritbeyeca bënga jobenayana chca jamana. 18 Y nda Cristbioye chca tbojtseserverna, jamana Bëngbe Bëtsá cháftaca oyejuayá chaotsemnana, y entšangbe bom-inÿiñe tšabia jtsemnana.

19 Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá inÿenga chaujúabuache Jesucristbeñe corente jtsošbuáchiyama y ainaniñe bëtscá añemo jtsebomnana. 20 Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatšama šmojamëse, chë soye cocayé ndoñe tšabá ntsemnana. 21 Tšabá endmëna mëntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chë soye aiñe tcojama ora, Jesucristbeyeca canÿe catšata chaojuaboma y bacna soye chaomama tojoservese.

22 Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangtaftaca chaotsemna. Canÿe entšá ndegombre oyejuayá jtsemnana, canÿe soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. 23 Pero canÿe entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aiñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

15

Ntšamo ínŷengbiana tšabá tojtsemncá mochtsama, ndoñe nŷe bēngbiana

¹ Bēnga, chē Jesucristbeñe corente ošbuáchiyēnga, šontsamna chē nŷe batšatema ošbuáchiyēnga jujabuáchana, chēnga bacna soyēnga tmojtsama ora, nŷe batsá ošbuáchiyana bomna causa; y ndoñe nŷe jatsēnguayana nŷe ndaye soyēngaca yopodena bēnga tšabá jtsemnama. ² Cada ona bēnga šontsamna jamana ntšamo cach bēngcá Jesucristbeñe ošbuachiyabiana tšabá tojtsemncá, y ndayá cha oyejuayá chaotsemnama tojama soye. Chca šontsamna, cha más bētscá Jesucristbeñe chaotsošbuáchema, y ainaniñe más añemo chaotsebomnama. ³ Er Cristo, ntšamo tojanmncá cach ndoñe tonjanma nŷe cha oyejuayá jtsemnama. Inŷetsá, cháftaca tojanopasá ntšamo Bēngbe Bētsabe uabemana palabrenguiñe endayancá, mo Cristo Bēngbe Bētsáftaca cuaftsoyebuambnacá: “Ntšamo entsanga montsichamcá aca joyenguanguama, atše šmotsatsētsná ca.” ⁴ Er lempe ntšamo tempo Bēngbe Bētsabe uabemana palabrenguiñe tmojanabemcá, bēnga jabuátambama endmēna. Ndayá bēnga chiñe tmojuatsjinŷama, bēnga jtsobebana padecena soyēnguiñe tmojtsachnējuana ora uantadēnga jtsemnama, y ainaniñe más añemo jtsebomnama; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama. ⁵ Atše, Bēngbe Bētsá sēntseimpadana, nda inétsama bēnga padecena soyēnguiñe uantadēnga chamotsemnama, y nda inétsama bēnga ainaniñe más añemo chamotsebomnama, cha chaoma nŷetscanga canŷe juabna chašmotsebomnama, ntšamo Cristo Jesús yojanjuabnacá tšēngaftanga jtsejuabnayēse; ⁶ cha chca chaoma, nŷetsca tšēngaftanga mo cánŷiñe cuaftsemncá, y mo nŷetscanga canŷe ora cuafjayancá, Bēngbe Bētsá, Bēngbe Utabná Jesucristbe Taitá, puerte bētsá y uamaná yomnama chašmuinŷanjēma.

Chē ndoñe judiēngbiámncá chē tšabe noticiēnga jtsemnana

⁷ Nŷetscanga oyejuayēnga šmochjenofja, ntšamo Crístnaca tšēngaftanga tmojanēbuajcá, chca, entsanga chamuinŷanjé Bēngbe Bētsá puerte bētsá y obená yomnama. ⁸ Atše sēntseboše ndayá jayanana, Cristo tojánabo judiēnga jabáserviama ca, chca, jinŷanjŷama Bēngbe Bētsá sempre inétsamama ntšamo tojašebuachenacá; tojánabo ntšamo Bēngbe Bētsá bēngbe tempsca uámana bēts taitanga tojanašebuachenacá chaocumplima; ⁹ y Bēngbe Bētsá puerte bētsá yomna ca chē ndoñe judiēngnaca chamuayanámncá, cha chēnga inétsalastemanama, ntšamo Bēngbe Bētsabe uabemana palabrenguiñe endayancá, y chca tojanocumplí:

Chíyeca, atše chē ndoñe judiēngbeñe chaitsemna ora, aca cbochantsatschuanaye, Bēngbe Bētsá;

y jacántase chanjyana aca puerte bētsá y uamaná comna ca.

¹⁰ Inŷoca mēntšá endayana:

Puerte oyejuayēnga chē ndoñe judiēnga šmochtsemna, Bēngbe Bētsabe bocacana entšāngaftaca cánŷiñe ca.

¹¹ Y ínŷoca mēntšá endayana:

Bēngbe Utabná šmochtsatschuanaye tšēngaftanga ndoñe judiēnga, y cha šmochtsatschuanaye nŷetsca tšēngaftanga nŷets luarēnguenache entsanga ca.

¹² Y Isaíasnaca Bēngbe Bētsabe uabemana palabrenguiñe mēntšá tojanábema: Canŷa Isaibe entšanguentšana echanjabo,

y Bëngbe Bëtsá chábiyoe uamaná bochanjábema, nyets luarënguenache entšanga chaotsamëndama,
y chënga chábeñe jtsóšbuáchiyëse, chábeñe mochantsobátmana tsabe soyënga chëngbiana chaotsamama ca.

¹³ Atše, Bëngbe Bëtsá sëntseimpadana, nda inétsama bënga chábeñe chamotsobátmanama tsabe soyënga bëngbiana chaomama, cha chaoma tsëngaftanga ainaniñe puerte oyejuayënga chašmotsemnama y ainaniñe tsabe ebionana chašmotsebmnama, chábeñe jtsóšbuáchiyëse; y Bëngbe Bëtsá chca tsëngaftangbiana chaoma, tsëngaftanga cada te más chábeñe chašmotsobátmanama, chë Uámana Espíritbe obenánaca.

¹⁴ Jesucristbeyeca atšbe catsátanga, atše corente sëndétatšëmbo tsëngaftanga puerte tsábenga šmornama, ndayá cmamnama corente šmotatšëmbuama, y jtsenbuaiynayama šmobenámnaca. ¹⁵⁻¹⁶ Quem tsbuanáchañe básefta soyëngama sënjuábema, ntšamo šmatjatsjuabnayama atše ntjatauatjca; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebmna chë uamana trabajo, Cristo jtseservénana, chë ndoñe judiënga jtsëjabuáchanëse. Atše bachnécá sëntsoservena, Cristo stseservena ora, entšanga tsabe noticiëngama jtsabuaiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiana canye uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

¹⁷ Chca, atše Cristo Jesúseftaca cányiñe mo canyáca quetsomñecá, ndegombre sëntsobena jtsejuabnayana ntšamo Cristo jaserviama atše sëndamcá, puerte uamana soye yomnama. ¹⁸ Atše añemo sëntsebmna nye chë ndayá Cristo átseftaca tojamaa jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamana, ¹⁹ chë Bëngbe Bëtsabe obenana jinñanñiyama bëts soyëngama, chë chabe obenánaca tojopasá tsabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nyetsca luarënguëjana Iliria luaróntsoñe, Cristbe tsabe noticiëngama nyets luarënguenache entšanga tijabuayená. ²⁰ Atše sempre canye soye inye soyëngama más sënjanboše, y enjama chë tsabe noticiëngama jábuayenana, entšanga ndocna te Cristbiana oyebuambnayana tmonjanuena luarënguenache; y chca sënjanma, atše ndoñe játamama inya tojanbojatšé trabajo, mo inñabe bojatšena yebnentše jajuama cuafjatontšecá. ²¹ Ntšamo Bëngbe Bëtsabe uabemana palabrenguñe endayancá, chë tempo Cristbiana ndoñe tmonjanuengbiana:

Chë ndëmuanñyënga tempo ndocná chabiana tonjanabuayená, chënga tsabá mochanjinñe ntšamo cha yomnana;
y chë ndocna te chabiana tmonjouenënga, chabe soyëngama echanjósertaye ca.

Pablo yojanjuanbná Roma bëts puebloye jama

²² Y nya chë causa, atše ndoñe chiyjobená tsëngaftangbiyoe jana tsëngaftanga jányama, masque ba soye tsjenojuanbná choye jama. ²³ Pero mora atšbe trabajo quem luarënguñe sënjapochocá y tempscana tsëngaftanga jányama tša sëndánbošeyeca, ²⁴ sëntsejuabná mora añe chjobenaye choye jama, tsëngaftanga jautsëtsayama, chëjana chaijachnëngo ora, España luaroye

chaitśa ora. Y baseftayté tšəngaftangaftaca chjəftsemna, cbochjányama tšəngaftangaftaca oyejuayá; chentśana Diosmanda śmochjuájabuache, y lempe ntśamo chaśojtsajabotcá śmochjátsetaye jobenayama España y ayana jtétontśama. ²⁵ Morna Jerusalenoye chanjá, choca entśanga Bəngbe Bətsábenga imomnənga jaujabuáchama; ²⁶ er Jesucristbeñe ośbuáchiyənga Macedonia y Acaya luarentśənga, tmonjajuabó tśabá yojtsemna crocénana jájubana chə Jerusalenoca entśanga, Bəngbe Bətsábenga imomnənga y ndbomnəjémənga imomnənga jujabuáchama; y oyejuayənga chca tmonjama. ²⁷ Cachənga chca tmonjajuabó, y chca jamana tśabá endmənə, er judiənga tmonjanma, chə Bəngbe Bətsábocana tmojanóyəngacñe soyənga ndoñe judiəngnaca chamotsebmomnama; chíyeca ndoñe judiənga entsamna chə Jerusalenoca judiənga ośbuáchiyənga jujabuáchana, ndaye soyənga jatśatayəse, chənga vida jtsebmomnama chamotsobenama. ²⁸ Y chca, quem trabajo chajjapochozá ora, y chə ndoñe judiənga ośbuáchiyənga lempe tmojátbanana chajjáftsayentśbuachiye ora, chanjontśe España y jama, y tšəngaftangbiajana chanjachnəngo tšəngaftanga jáftsanýama, tšəngaftangaftaca baseftayté jəftsemnama. ²⁹ Atśe corente səntsetatśəmo tšəngaftangbiocyte chajjá ora, chjášhjangoy chjama tšəngaftanga bətscá tśabe bendicionənga Cristbentśana chaśmotsebmomnama, tondaye chamondətsabuáshebenəntscuana.

³⁰ Jesucristbeyeca catśátanga, Bəngbe Utabná Jesucristbeñe ośbuáchiyənga quetsomñecá, y bənga bonshánana chamotsebmomnama chə Uámana Espirito inətsamayeca, tšəngaftanga cbontsaimpadana, bətscá chaśmotsentśəna Bəngbe Bətsá nýets ainánaca jtseimpadánama, ntśamo atśe səndbetseimpadancá, cha atśe chaśotsinýenama. ³¹ Cha śmochtseimpadana chə Judea luaroca ndośbuáchiyənga ndocá chaśmondəborlama, y chə Jerusalenoquənga Bəngbe Bətsábenga, tśabá chamóyəngacñama ndayá chənga jujabuáchama chajjáftsayentśbuachiye ora. ³² Y chentśana, y Bəngbe Bətsá chca chaojábośenəse, atśe chayobená bətscá oyejuayá tšəngaftangbioca jashjanguana tšəngaftanga jányama, y tšəngaftangaftaca chaitsemna ora, batśá jóchnama chayobená. ³³ Atśe, Bəngbe Bətsá səntseimpadana, nda inətsama bənga ainaniñe tśabe ebionana chamotsebmomnama, nýetsca tšəngaftangaftaca chaotsemnama. Chca chaotsemna.

16

Ubuátmənga jacheuayama

¹ Atśe səntseboše tšəngaftanga jáuyanana Febe, Jesucristbeyeca bəngbe uabena, canýe tśabe entśá endmənənama; cha chə Cencrea puebloca enefjuana ośbuáchiyənga endújabuachana. ² Tśabá cha śmochjofja, mo canýa Bəngbe Utabnábia quetsomñecá, ntśamo Bəngbe Bətsabe entśanga entsamncá inýəngaftaca jenofjana. Śmochjuájabuache ntśamo tbojtsajabotcá, er cha banga tonjújabuache; átśbioynaca.

³ Atśbe cuenta Prisca y Aquila śmochjacheuaye, chə átśeftaca tbonjatrabata, Cristo Jesusbiamā oservéniñe. ⁴ Jobanámnaca bonjanprontana, atśe jatśbocama, ndoñe chaśmondóbama. Atśe chama chata səntsatacheuaná; y ndoñe nýe atśe, sinó nýets luarenache enefjuana ndoñe judiənga ośbuachiyəngnaca chca. ⁵ Chə ośbuáchiyənga, chə Bəngbe Bətsá jətschuayama chatbe yebnentše jénefnama imuamanəngnaca, śmochjacheuaye. Atśbe bonshana Epeneto

šmochjachuaye; cha endmëna chë natsaná Asia luaroca Jesucristbeñe jtsošbuáchiyama. ⁶ María šmochjachuaye; cha tsëngaftangbeñe bëtscă tojatrabajá. ⁷ Chë cach atšcă judeocata Andrónico y Junias šmochjácheuaye. Chata canye ora átšeftaca cárceloye bonjanëtámëna, y Jesucristbe ichmónëngbiama chata puerte uámanata bonjamna, y atšbiama más natsana tbojanontšë Jesucristbeñe jtsošbuáchiyama.

⁸ Ampliato šmochjachuaye, atšbe bonshaná, er atšcă cha Bëngbe Utabnáftaca cánjiñe mo canyáca bondmëna. ⁹ Urbano šmochjachuaye, chë bëngaftaca Cristbiama oservëniñe trabajayá; y atšbe bonshana Estáquisnaca šmochjachuaye. ¹⁰ Apeles šmochjachuaye; cha ba soye tonjinyanyé Jesucristbeñe puerte yošbuáchema; y Aristóbulbe yebnentsëngnaca šmochjácheuaye. ¹¹ Chë cach atšcă judeocá Herodión šmochjachuaye, y chë Narcisbe pamillentsana Bëngbe Utabnábeñe ošbuachiyëngnaca. ¹² Trifena y Trifosa šmochjácheuaye; chata Bëngbe Utabnabiama puerte bondëtrabajá; y bëngbe bonshaná Pérsidnaca šmochjachuaye; cha bëtscă endëtrabajá, Bëngbe Utabnabiama oservëniñe. ¹³ Rufo, chë Bëngbe Utabnabiama uámana trabajayá, šmochjachuaye, y chabe mamánaca; cha mo atšbe mamacá endmëna. ¹⁴ Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucristbeñe ošbuáchiyënga chëngaftaca inmënutanangnaca. ¹⁵ Filólogo y Julia, Nereo y chabe uabena, Olimpas y nÿetsca Bëngbe Bëtsabe entšanga chëngaftaca inmënutanangnaca šmochjácheuaye.

¹⁶ Nÿetscanga mo Jesucristbeyeca catšatangcă šmochjenchuaye, jtenámochëse, ntšamo cach tsëngaftangbe pamillanga puerte bonshanánaca šmondetsacheuanaycă. Nÿets luarenache enefjuana Cristbeñe ošbuáchiyënga cmontsacheuaná.

¹⁷ Jesucristbeyeca catšátanga, atše cbontsaimpadana tšabá šmochjuáfsna y cuedado šmochsebomna chë cánÿenga ínÿengaftaca contra chamotsemnama y ínÿenga Jesucristbeñe ošbuáchiyana chamotsajbanama inmëtsamëngbiama; chëngna, chë tsëngaftanga ndaye šmojóyëngacñe buatëmbana soyëngama contra jtsóyebuambnayana. ¹⁸ Er chca amënga, ndoñe ntsentšënanana Cristo Bëngbe Utabná jtseservënanana, sinó jtsamana ndayá cachënga tmojtsebošcă, nÿe cachëngbe cuerpama tšabá tojtsemncá; y tšabe y botamana palabréngaca chë paselo jáingñama yomna entšanga jáingñana, chëngbe ainaniñe chëngcă chamotsejuabnama. ¹⁹ Nÿetsca entšanga tmojouena, chë Bëngbe Bëtsabe soyëngama ntšamo ínÿenga tmojabuatambacá, tsëngaftanga corente šmnëtsayaunanama, y chíyeca atše puerte oyejuayá tsëngaftangftaca sëntsemna. Atše sëntseboše, tsëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcă. ²⁰ Y Bëngbe Bëtsá, nda inétsama bënga ainaniñe tšabe ebionana chamotsebomnama, ndoñe bën y echanjama tsëngaftanga Satanás chašmoyëñjanama, mo cha tsëngaftangbe cucuatšinë cuafjaboshjoncă. Atše sëntseimpadana Bëngbe Utabná Jesús, chaoma tšabe bendicionënga tsëngaftangbeñe chaotsemnama.

²¹ Timoteo, chë átšeftaca trabajayá, tsëngaftanga cmontsacheuaná; y Lucio, Jasón y Sosípater, cach atšcă Judeoquënga, chëngnaca tsëngaftanga cmontsacheuaná.

²² Atšnaca Tercio, chë Páblëbe cuenta quem tsbuanácha uabiamnayá, tsëngaftanga cbontsacheuaná, tsëngaftanga y átšnaca Bëngbe Utabnáftaca cánjiñe mo canyáca quetsomñecá.

²³ Gayo cmontsacheuaná; atše Pablo chabe yebnentše posada séntsebomna, y cha enduamana n̄yetsca chē muentša ošbuáchiyēnga tšabá júbuajana. Erasto, chē quem pueblentša crocénana bojanýá, tšēngaftanga cmontsacheuaná, y Jesucristbeyeca bēngbe catšata Cuártēnaca.

²⁴ Atše, Bēngbe Utabná Jesucristo séntseimpadana, cha chaoma tšēngaftangbeñe tšabe bendicionēnga chaotsemnama. Chca chaotsemna.

Quem tsbuanácha juapochócoma, Pablo Bēngbe Bētsábioye tbojtanchuá

²⁵ Bēnga sempre mochtsin̄yan̄naye Bēngbe Bētsá puerte uamaná yomnama. Cha endobena jamama tšēngaftanga puerte chašmotsošbuáchema; y chca, cha echanjama ntšamo chē bēnga fsēndabuayiyñá tšabe noticiēnguiñe yomncá, ntšamo chē Jesucristbe buayenana soyēnga yomncá, y ntšamo chē Bēngbe Bētsá šojin̄yan̄yé ndegombre soyēnga yomncá. N̄yets tempo mēntscoñama, Bēngbe Bētsá chē soyēnga entšanga ndoñe tonjin̄yan̄yé, y chē causa chēnga chē soye ndoñe ntsetatšēmbuana. ²⁶ Pero morna, ntšamo Bēngbe Bētsabe juabna oyebuambnayēnga tmojanabemcá, tojama bētscá entšanga chē ndegombre soyēngama chamotsetatšēmbuama; Bēngbe Bētsá, chē n̄yets tempo vida bomná, tojanmandá entšanga n̄yets luarēnguenache chē ndegombre soyēngama chamotsetatšēmbuama, chēnga chábeñe chamotsošbuáchema y ntšamo cha yobošcá chamotsamama.

²⁷ N̄ye can̄ye Bēngbe Bētsá endmēna, y cha n̄yets osertánana endbomna. ¡N̄yetscanga chamotsin̄yan̄ná cha puerte bētsá y uamaná yomnama, ndayá Jesucristo tojanmama! Chca chaotsemna.

1 Corintios

Pablo chënga jacheuayama

¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnana, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca, ² quem tsbuanácha sentsabiamná tšëngaftanga chë Corinto bëts puebloca Jesucristbeñe ošbuáchiyëngbiamna; ndëmuanýenga Cristo Jesúseftaca Bëngbe Bëtsá tojábiamna chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnana, chë nýe quem luarama enójuabnaye entšanguentšana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. ³ Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y tšëngaftangbe ainaniñe tšabe ebionana chašmotsebomnana.

Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebomnana

⁴ Bëngbe Bëtsá tšëngaftangbiamna sempre sëndbétsatschuanaye, er tšëngaftanga cánýiñe mo canýacá Cristo Jesúseftaca šmómnyeyeca, Bëngbe Bëtsá tšëngaftangbeñe tojajuabó, tšëngaftangbe tšabiamna. ⁵ Chca Crístoftaca šmómnyeyeca, Bëngbe Bëtsá tojama tšëngaftanga chašmotsebomnana chábentšana nýetsca tšabe soyënga, tšëngaftanga obenana chašmotsebomnana cha jamëse, Bëngbe Bëtsabe soyëngama jóyebuambayama y chë soyëngama chacmésertama. ⁶ Chca, ntšamo chonjanabuayinacá mo Jesucristbe ndegombre soyëngcá, tšëngaftángnaca inýengbioye tšabá šmojinýanýé ndegombre soyënga bëtsemnana, chë ntšamo tsíeyenama. ⁷ Y chca, Bëngbe Bëtsá chabe entšanga inétsatšatnaye tšabe soyënguentšana tondaye quécnochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtsošbuáchiyëse chašmojtšobátmanëntscuana. ⁸ Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebomnana, ndayá tšëngaftangaftaca jamama cha yujuabnacá chaojapochocantscuana; chca, chë Bëngbe Utabná Jesucristo nýetsca entšangbiamna tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. ⁹ Bëngbe Bëtsá nýets tempo jtsamana ntšamo tojašebuachenacá, y cha endmëna nda tcmojánachembo cánýiñe mo canýacá chašmotsemnana chabe Uaquiñá Jesucristoftaca, Bëngbe Utabná.

Choca ošbuachiyëngbeñe nýetscanga ndoñe cachcá montsanjuabná

¹⁰ Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nýetsca bëngbiamna yomnana, tšëngaftanga nýetscanga cachcá chašmotsejuabnana, y tšëngaftangbeñe ndoñe más báseftanga canýe soye y inýenga inýe soye chamuatsjuabná. Y aiñe šmochtsiyena mo canýacá, nýetscanga cachcá jtsejuabnayëse y cachcá jamama jtsebošëse. ¹¹ Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtšenpenzentserama. ¹² Ntšamo sentsichamcá entsemna ndayá tšëngaftangbentše báseftanga

šmojtsichamo: “Atše Páblēbe ustoná sēndmēna ca”; ínŷengna imojtsichamo: “Atšna Apólosbe ustoná sēndmēna ca”; ínŷenga: “Atšna Pédrēbe ustoná sēndmēna ca”, y ínŷengna: “Atšna Cristbe ustoná sēndmēna ca” imojtsichamo. ¹³ Chca šmojtsamama, jtsóbočanana mo cada básefta ošbuáchiyēnga canŷe Cristo tmojtsebmncá. ¿Pablo yojamna nda tmojancrucificá tšēngaftangbe tšabiamá? ¿O tšēngaftanga uabáinēnga šmomna, atše jótšēmbonēse, tšēngaftanga atšbe ústonēnga bētsemnana? ¹⁴ ¡Bēngbe Bētsá sēndbētsatschuanaye atše ndocná tšēngaftanguentšá tijanábayama; nŷe Crispo y Gáybioye aīñe! ¹⁵ Chca, ndocná quenátobena jayanana, atše jótšēmbonēse uabainá cha tojanoquedá ca, mo átšbeñe ošbuáchiyēnga cuaftsemncá. ¹⁶ Estéfanasbe pamillentšēngnaca sēnjanēbaye, pero ndoñe quetsatabouínŷna ínŷa tijanábayama. ¹⁷ Er Cristo ndoñe chešnatanichmó ínŷenga jubáyama, ndayá chē chabe tšabe noticiēngama entšanga jábuayenama. Ndoñe chešnatanichmó chē soyēnga jayanama, corente osertana entšangbe soyēnga jtsichámēse; chca, entšanga Cristbeñe chamotsošbuáchema, ndoñe chē atšbe osertánanentšana palabréngama, sinó nŷe chē buayenánama, Cristo cruzoca bēngbiamá tojanóbanama.

Cristbeñe yomna Bēngbe Bētsabe obenana y osertánana

¹⁸ Quem buayenánana, Cristo entšangbiamá cruzoca tojanóbanama, chē pochocánēnga jtsemnana tmojtsajnēngbioye jtsinŷanana mo ndoñe corente juabna bomnēngbe soycá; pero bēngbiamá, chē Bēngbe Bētsá nŷetsca tescama šochjátsebacangbiamna, quem buayenánana jtsinŷanŷayana Bēngbe Bētsabe obenana. ¹⁹ Ntšamo Bēngbe Bētsá chabe uabemana palabrénguiñe tojanayancá:

Atše chanjama chē tša osertánēngbe osertánana tondayama chaondētsošervénama;
y chanjama chē ba soyēngama osertánēngbe osertánana tondayama chaondētšámanama.

²⁰ ¿Ntsachetšá yojtsámama chē tša osertaná y chē puerte uatsjinŷená tbojayana soyēnga? ¿Ntsachetšá yojtsámama chē tša tšabá chē soyēngama juabnayá, morscá, y ínŷengaftaca enatsētsnaye ora chēngbe ayēnjanayá tojayana soyēnga? Ndegombre Bēngbe Bētsá tojinŷanŷé, chē quem luarentša bēts osertánánaca tmojayana soyēnga tondaye yonduámanama. ²¹ Bēngbe Bētsá, nŷets osertánana bomná quetsomñecá y puerte tšabá jtsejuabnayēse, ndoñe tonjanalesenciá quem luarentša entšanga cha chamotsábuatmama, chē quem luarentšēnga tša osertánēnga tmojánayana soyēngama. Chamna, cha tšabá tbojanínŷnana chábeñe ošbuáchiyēnga játsebacana chē bēnga fsēndabuayiná soyēngama, masque ínŷēngbioyna mo ndoñe corente juabna bomnabe soycá jtsinŷanana.

²² Judiēnga tša jtsebošana y Bēngbe Bētsábioye jtsotjanañana bēts soyēnga chaomama, chabe obenana jinŷanŷiyama; y ndoñe judiēngna tša jtsen-guayana chē puerte osertánēngbe soyēnga jtsetatšēmbuama. ²³ Pero bēngna Cristbiamá entšanga fsēndabuayiná, chē ínŷenga tmojancrucificabiamá. Quem buayenánana chē judiēnga ndoñe tšabá ntjēuēnanana. Y ndoñe judiēnga mondbētsējuabnaye chca yomna mo canŷe ndoñe corente juabna bomnabe soycá ca; ²⁴ pero bēngbiamá, nŷetscanga Bēngbe Bētsá chabe entšanga chamotsemnana šojáchembēngbiamna, masque judiēnga o ndoñe judiēnga, Cristbeñe endmēna nŷets Bēngbe Bētsabe obenana y osertánana; ²⁵ er ndayá Bēngbe

Bětsá tojanmcá, Cristo cruzoca chaóbanama jalesénciase, banga jtsinjanana mo canye ndoñe corente juabna bomnabe soyca, pero ndegombre endmēna canye puerta más osertaná tojama soye, lempe ntšamo entšanga imotatšēmbuama. Y ndayá cha tojamcá masque bángbioye jtsinjanana mo canye tondaye obenabe soyca, ndegombre chē soye jtsinjanayana Běngbe Bětsá puerta más obenana yobomnana, nyets obenana ntšamo entšanga imobomnana. ²⁶ Jesucristbeyeca atšbe catsátanga, šmoctsejuabnaye ntšamo yojamnama, Běngbe Bětsá chabe entšanga chašmotsemnama tcmojánachembo ora. Tšēngaftangbentše nye báseftanga tša osertánēnga šmojamna, ntšamo chē osertánana bomnēnga imomnama entšanga mondbetsejuabnaye; y báseftanga šmojamna becá mando atšetanēnga o uamana pamillentšēnga. ²⁷ Pero Běngbe Bětsá, quem luarentše ndoñe tša osertánēnga tojanabacacá, chca, cha jamama chē quem luarentša soyēngama tša osertánēnga chamotsēuatjama; y cha, quem luarentše ndobenēnga tojanabacacá, chca, chē obenana bomnēnga chamotsēuatjama. ²⁸ Běngbe Bětsá quem luarentšana tojanbocacá ndayá tondaye yonduamancá y ndayá inyēnga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondětsámanama. ²⁹ Y chca, Běngbe Bětsabe delante ndocná quenátobena jayanana tša bětsá cha yomna ca. ³⁰ Běngbe Bětsá tojama bēnga Cristofaca cānyīñe mo canyáca jtsemnēse chamotsiyenama, y chábeyeca tojama bēnga chamóyēngacñama chabe osertánana bomna soyēnga; chábeyeca tojama bēnga tšábēnga chabe bominyīñe chamotsemnama, chabe entšanga jtsemnama chamobenama, puerta tšábēnga cach Běngbe Bětsacá, y atsebácanēnga chamotsemnama. ³¹ Y chca, ntšamo Běngbe Bětsabe uabemana palabrénguiñe endayanacá: “Nda tojtseboše jayanama cha canye uamaná yomna ca, chamna más tšabá cha bontsemna jayanama Běngbe Utabná puerta uamaná yomna ca.”

2

Ntšamo Pablo Cristo crucificanábiamá chēnga tojanabuayená

¹ Pero, Jesucristbeyeca atšbe catsátanga, Běngbe Bětsabe ndegombre soyēngama tšēngaftanga jábuayenama sēnjána ora, chca sēnjamna ndoñe chē uamanēngbe palabréngaca, ni chē tša osertánēngbe palabréngaca. ² Y tšēngaftangftaca sēnjamna ora, ndoñe quetstétseboše nye ndayīñnaca jatsjuabnayana, ndayá nye Jesucristbeñe, nda bēngbe tšabiamá tmojanrucificá. ³ Atše tšēngaftangbeñe sēnjamna, mo canya ba soyēnga jamama ndobenacá, y mo canya puerta auatjacá y tbojtsengmēmncacá, chabe trabajo jamama ndoñe jobenayama juabnaye causa. ⁴ Ntšamo chonjanětsěsná y chonjanabuayiyinacá atše sēnjanoyebuambá ndoñe chē tša osertánēngbe palabréngaca, tšēngaftanga jáyēnjanama chiñe chašmotsošbuáchema; pero aīñe tchonjanayēnjaná, Běngbe Bětsabe Espiritu y chabe obenana tšēngaftanga jinyanñiyese, ⁵ chca, tšēngaftanga Běngbe Bětsabeñe chašmotsošbuáchema, ndoñe nye entšangbe osertánana, sinó Běngbe Bětsabe obenanama.

Uamana Espiritbeyeca, Běngbe Bětsá jamana entšanga cha chamotsábuatmama

⁶ Pero, chē ya tmojashjáchēnga Běngbe Bětsabeñe puerta jtsošbuáchiyama y chabe soyēngama corente jtsosertánama, chēngbeñe bēnga fchandóyebuambaye becá osertánana bomna soyēnga. Pero ndoñe

quenátsmēna quem luarentša entsānga quem tempo mondbétsichamo soyēnga, ni mora quem luarentše amēndayēngbe soyēnga, ndēmuanyēnga ndoñe bēn y ndocna obenana bomnēnga mochanjēftsoquēda. ⁷ Y aīñe, chē bēnga fsēndoyebuambná osertánana bomna soyēnga endmēna chē Bēngbe Bētsá quem luarentša entsāngbioye baytentscuana ndoñe tonjaninyānyé soyēnga, y chca, entsānga baytentscuana chē soyēnga ndoñe tmonjanábuatmana. Cha yojanjuabná chē soyēnga chca yochtsanmēnana, quem luare cabá cha ndēma ora, y yojanjuabná, chē soyēngaca bēnga mochtsanobena puerte bētsétsānga y uámanēnga jtsemnana, cháftaca chē nyetsca tescama yomna tsabe vida jtsebomnana. ⁸ Quem Bēngbe Bētsabe puerte osertánana bomna soyēnga endmēna canye soye ndayá quem luarentša amēndayēnga ndoñe ntšérsertánana, er chēnga aīñe matēnjanésértase, Bēngbe Utabnábioye chēnga ndoñe matmēnjancrucificá, Bēngbe Utabná nda puerte bētsá y uamaná yomna. ⁹ Bēngbe Bētsabe uabemana palabrēnguiñe quem Bēngbe Bētsabe puerte osertánana bomna soyēngama mēntšá endayana:

Cha imobobonshánēngbiama Bēngbe Bētsá tojaprontá soyēnga,

ndocná tonjinye, ni tonjouena y ni mo tonjauabó ca.

¹⁰ Pero Bēngbe Bētsá quem soyēnga chabe Espíritoftaca bēnga šojanyānyé, er chē Espíritu lempe jtsetatšēmbuana, chē Bēngbe Bētsabe soyēngama puerte totcá josértama yomna soyēngámnaca.

¹¹ Entšāngbeñe ndocná quenátobena jtsetatšēmbuana ndayá entsabe ainaniñe tomnana, sinó nye chē entsabe espíritu, chē chabeñe yomná. Cachcá, nye Bēngbe Bētsabe Espíritu jtsetatšēmbuana ndayá Bēngbe Bētsá tojuabnacá. ¹² Y bēngna, Bēngbe Bētsábiocana Espíritu tmojóyēngacñe, ndoñe canye quem luarentša espíritu, chca, bēnga chašósertama chē Bēngbe Bētsá tojama bēnga chamotsebomna soyēngama, bēngbe tsabiama cha jtsejuabnayese. ¹³ Bēnga chē soyēngama fsēndoyebuambná, ndoñe chē quem luarentša entsāngbentsāna tifjuatsjinye osertánana bomna palabrēngaca, sinó chē Bēngbe Bētsabe Espíritu šojabuatambá palabrēngaca. Chca, Bēngbe Bētsábiocana soyēngama bēnga fsēndabuayiyiná, Bēngbe Bētsabe Espíritbentsāna yóbocana palabrēngaca, chē Uámana Espíritu ainaniñe imobomnéngbioye.

¹⁴ Bēngbe Bētsabe Espíritu ndoñe tondbomná, chabe ainaniñe ndoñe ntjójyēngacñana chē Bēngbe Bētsabe Espíritbiocana yóbocana soyēnga, er chē entšabiama chē soyēnga jtsemnana mo canye ndoñe corente juabna bomnabe soyēngcá, y chabosertama cach ndoñe ntsoobenana. Chca endmēna, er entsá jobenayana quem soyēngama jtsetatšēmbuama y josértama, nye chabe ainaniñe chē Uámana Espíritu tbojtsájabuachañese. ¹⁵ Pero nda aīñe chē Espíritu tbojtsebomna jtsobenana nyetsca soyēnga tsabá jinýama chabosertama, y ndocná chē Espíritu ndoñe tbondbomná ntsoobenana josértana ntšamo chē Espíritu bomná yomnana. ¹⁶ Er Bēngbe Bētsabe uabemana palabrēnguiñe mēntšá endayana: “Ndocná quenátabuata Bēngbe Utabnabe juabna, chábioye jabuátēmbama chaotsobenama ca.” Pero bēnga, chē ošbuáchiyēnga, mondobena jajuaboyana ntšamo Cristo yojuabnacá.

3

Jatrabájama enutanánēnga Bēngbe Bētsá jasérviana

¹ Pero, Jesucristbeyeca atše catšátanga, atše ndoñe chiyatanobená jóyebuambayama, mo tsēngaftanga chē Uámana Espíritoftaca mandánēnga šmojatsmēncá, sinó nye cachēnga tsabá jtsomñama juabnēnga bomna

entsangbioycá, mo basetemengbioycá, Cristbe soyëngama josértama ndobenënga. ² Mo canye bebmaca, chabe basetëmbioye nye lésiye jafsiyana y paselo jabmuánama sananga, chë básetema chcana jasama cabá ndoñe ntobenana causa, cachcá, atse chonjanabuatambá Bëngbe Bëtsabiana nye chë más paselo josértama soyëngama, y ndoñe inye soyënga más totcá josértama soyënga, er tsëngaftanga ndoñe quešmënjatobena chca soyëngama josértana. Y ni mora, tsëngaftanga quešmatobena Bëngbe Bëtsabe soyëngama josértana, chë josértama más totcá yomna soyëngama; ³ er tsëngaftanga cabá šmojtsama, nye ntšamo cach tsëngaftanga tsábá jtsomñama tsëngaftangbe juabnënga yomncá. Y tsëngaftanga inyëngaftaca cabá yapa šmojtsenántšaboše y nye inyëngbioye jayëñjanama soyënga šmojtsamëntscuana, tsëngaftanga šmojtsama nye ntšamo cach tsëngaftanga tsábá jtsomñama tsëngaftangbe juabnënga yomncá, y chca, tsëngaftanga šmojtsiyena mo chë nye quem luarama enójuabnaye entsangcá. ⁴ Er canya: “Atse Páblëbe ustóná sëndmëna ca”, y inyana: “Atse Apólosbe ustóná sëndmëna ca” tojayana ora, chca jtsamana mo chë nye quem luarama enójuabnaye entsangcá.

⁵ Tsëngaftanga chca šmojamama, atse šontsemna tsëngaftanga játjayana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservënata bondmëna, ndátbeyeca tsëngaftanga Jesucristbeñe šmojtsošbuaché, y bëndata cada ona fsëñjama chë Bëngbe Bëtsá šojanjané trabajo. ⁶ Atsna, mo nda jajañe jénaye cuafjuatbontsacá, tsëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftebuešcnacá, enjantrabája cach atse sënjanbojatsé chiñe; pero Bëngbe Bëtsá, ntšamo matatëmënga chauájuaa endbetsamcá, tojama banga tsëngaftanguentse Jesucristbeñe chamotsošbuáchema. ⁷ Ntšamo, chë jená y chë matënguiñe béjaye buešcnayá ndoñe yapa ntsámana chiñe shajuanënga chaóboचना, nye Bëngbe Bëtsá aiñe, cachcá, nda Bëngbe Bëtsabiana entsanga jábuayenama trabajo tojabojatsé y nda chentšana tojášhango cach trabajuiñe jóntšama, ndoñe ntjamana entsanga Jesucristbeñe chamotsošbuáchema; nye Bëngbe Bëtsá chca jamana. ⁸ Chë jená y chë matiñe béjaye buešcnayá cach trabajuiñe jtsentšëñana, y chatna mo trabajyatcá jtsámanana; y cada ona juacánana ntšamo chabe trabajo tomncá.

⁹ Bëndata fsëndmëna trabájayata Bëngbe Bëtsabiana oservëniñe, y tsëngaftanga šmondmëna mo Bëngbe Bëtsabe jajañcá, ndayentse cha yojtseboše tsabe jaja saná chaóboचना, y šmondmëna mo chë cha yojtsejebuana bëts yebncá. ¹⁰ Er Bëngbe Bëtsá atšbe tsabiana jtsejuabnayëse, chë trabajo šojabonýé, y atse mo canye puerte tsabe jebuanacá, canye yebna ndayiñe chaotsëcuatjonama tojapormacá, sënjanbojatsé chë trabajo, Bëngbe Bëtsabe soyëngama tsëngaftangbeñe jábuayenama. Chentšana inya, mo chë inye yebna jebuaná tojabojatsé jajebuama chiñe más jatsjebuama nda tojantontšecá, cach atse sënjanbojatsé trabajuiñe tojanontsé. Pero cada ona botamana chaotsantješna ntšamo chë trabajo yojtsamama. ¹¹ Mo chë canyabentšana inye trabajayacá, ndoñe ntobenana chë yebna jajebuama tojanbojatsé cha chë yebna chaotsëcuatjonama tojanpormañe inye soye cachcá chaoservema jatspórmana, cachcá, ndocná chaondëtsabuatambá inye soyënga, nye ntšamo Jesucristbe soyënga yomncá aiñe, chë ntšamo atse natsana sënjanabuatambacá. ¹² Chë Jesucristbiana más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiana nye nduámana soyënga buatëmbayana

mo chë niñbenga, butsjëshä y tëshenjñësheca yebna jebuanacá. ¹³ Y Cristo chaojésabo te, Bëngbe Bëtsá echanjínñányiye ntšamo cada cánýabe trabajo yomnama. Cha chë te íñeshca chca echanjínñányiye, y chë íñeshca, Bëngbe Bëtsá echanjínñe y echanjínñányiye ndaye trabajo cada ona tojamama. ¹⁴ Ntšamo cada cánýabe trabajo yojtsámanama jtsetatsëmbuama Bëngbe Bëtsá chaojinýe ora, cha chabe trabajo aínne yojtsámana ca queojayanése, chë tsabe trabajayá Bëngbe Bëtsábiocana canýe uacanana soye echanjóyëngacñe, er cha jtsemnana mo canýe entšacá, nda canýe yebna tojtsejebuana jtsejuinýama ndoñe paselo tondmëna soyëngaca. ¹⁵ Pero chë te cánýabe trabajo nýe batšá yojtsámanama Bëngbe Bëtsá íñeshca chaojinñányese, chora chabe trabajo echántsemna mo chë jtsejuinýama paselo tomna soyëngaca jebuanabe soyëngcá, chentsana nýets yebna jtsejuinýana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsábiana trabajo tojtsamá, nýe batšá oservena trabajo, cha echanjobenaye atsbocaná jtsemnama, masque lempe ntšamo tojamcá tondaye queochaisoquéda.

¹⁶ ¿O tsëngaftanga ndoñe šmondétatsëmbo nýetscanga cánýiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnana, y tsëngaftanguentšë Bëngbe Bëtsabe Espiritu yomnama? ¹⁷ Nderado nda tojama, tsëngaftanga nýetscanga cánýiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánýiñe imomñënga, jtsemnana mo chë Bëngbe Bëtsabe bëts yebncá, chabe entšanga nýe chábioye jaserviama; y tsëngaftanga chca šmondmëna.

¹⁸ Ndocná cachá chaondëtsenoíngña. Nderado nda tsëngaftanguentšá tojtsejuabná cha tša osertaná yomna ca, ntšamo quem luarentša entšanga mondbëtsejuabnaye ntšamo canýe puerter osertaná inëtsemnana, cha bontsemna jóbemama mo canýa ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹ Er chë quem luarentša entšanga tša osertánënga imotátšëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrënguiñe mëntšá endayana: “Bëngbe Bëtsá chë tša osertánënga jáyëñjanana, ndayá cachënga ínýenga jáingñama tša osertánáca tmojtsama soyëngaca ca.” ²⁰ Y mëntšánaca endayana: “Bëngbe Utabná endétatsëmbo chë tša osertánëngbe juabnënga tondayama yondoservénama ca.” ²¹ Chíyeca, ndocná chaondëtsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Cristbeñe ošbuachiyënga bëtsemnana, tsëngaftangbe tsábiana endmëna, y nýetscanga chë tcmojjubuachëngnac cachcá. ²² Lempe tsëngaftangbe soye endëtsumñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yochtsemncánaca. ²³ Y tsëngaftanga Cristbenga šmondmëna, y Cristna Bëngbe Bëtsábia.

4

Jesucristbe ichmónëngbe trabajo

¹ Entšanga entsamna bëngbiama jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo

bomnënga, chë Bëngbe Bëtsá baytentscuana entsángbiöye ndoñe tonjan-
inñanyé, pero mora aiñe tojinñanyé soyënga jtsabuátambayama trabajo
bomnënga. ² Chca, nda canye trabajo tojtsebojanñabiamna, chabe mandayá jt-
sobátmanana cha aiñe tšabe palabra bomná chaotsemnana. ³ Atšbe bariëna,
tondaye quenátamana, ntšamo tijamcá šmojinñe y ndoñe tšabá tijama ca
šmojanëse, o inñe entsànga cachcá tmojanëse mo canye tribunaliñcá.
Ni cach atše ndoñe chca quetsátama, jtsetatšëmbuana ntšamo atšbe tra-
bajuama tijayancá ndegombre tayojssemnana. ⁴ Atšbe ainaniñe ndocna
juabna quetsátsbomna atše chašuyanama bacna soye tijama ca, pero chca
ndoñe quenátayana, ndegombre Bëngbe Bëtsabe delante ndocna bacna soye
ndbomná atše stsemna ca. Er Bëngbe Utabná endmëna nda atšbe trabajo
yonýa y nda ndegombre yobena jayanama atše tšabá o ndoñe tšabá tija-
mama. ⁵ Chíyeca, tšëngaftanga ndoñe quecmátamna jinñana y jayanana inñenga
ndoñe tšabá tmonjama ca, chë nýa chama tempo cabá ndóshjanguëntscuana,
Bëngbe Utabná chama chaojésabo ora. Cha chaojésabo ora, puerte tšabá
echanjínñanyie chë iytemencá yomna soyëngama, mo ibetiñe cuaftsemncá,
y botamana echanjínñanyie, mo binñiñcá, ndayá jamama nýe chëngbe
ainanoca entsànga tmojajuabocá. Y chora Bëngbe Bëtsá cada entsabiamna
echanjayana tšabe soyënga, ntšamo tbojtsomerecencá.

⁶ Jesucristbeyeca atšbe catšátanga, chë soyëngama tšabá jábuayenamna,
atše sënjama ntšamo Apolos y atše tifjatrabájama botamana chašminñama,
y chca sënjama tšëngaftangbe tšabiamna, ntšamo bëndata tifjamentšana
chašmuatsjinñama jtsiyenana nýe ntšamo Bëngbe Bëtsabe uabemana pal-
abrënguiñe iuayancá, y ndocná tšëngaftanguentsá canye entsabiamna chaot-
senábotamnaye, y inñabiamna ndoñe tšabá chauátoyebuambnama. ⁷ Er, ¿nda
chë inñëngbiamna más uámanënga tšëngaftanga cmojtsabiamná? ¿Y ndayá
šmombna, Bëngbe Bëtsá ndoñe tcmonjatsatá soye? Y tšëngaftanga chca
chašmotsebomnana cha tojanmëse, ¿ndáyeca šmojtsenabotamná mo Bëngbe
Bëtsabe tšetana soyënga ndoñe tontsemncá, y nýe cach tšëngaftangbeyeca
šmojnñencá?

⁸ Tšëngaftanga šmojtsejuabná ya lempe ntšamo cmëjabotcá
Bëngbe Bëtsábíocana šmojtsebomna ca, y lempe ntšamo jtsebošama
šmojtsobencánaca ca. Mo reyënga cuaftsemnëngcá cmojtsabiona,
bëngbentshana tondaye ntsëjabotcá. Malaye tšëngaftanga mo reyëngcá
šmojtsemna, Cristoftaca cánñiñe jtsemándayëse; chca, bëngnaca
tšëngaftangaftaca jtsemnana, cánñiñe jtsemándayëse. ⁹ Atše šontsinñana,
bënga chë Cristbe ichmónënga Bëngbe Bëtsá šojábiamna mo chë nýetscangbiamna
más nduamanëngcá, mo chë jóbanama yojtsamna entsàngcá. Nýetscanga chë
Bëngbe Bëtsá tojábiamënga bëngbiöye jtsëñyayana mo ndoñe cachca entsànga
fstsemncá; angelënga y entsángnaca cachcá bëngaftaca montsama. ¹⁰ Bënga,
Cristbiamna oservena causa, quem luarentša entsangbiamna fsëntsinñana mo
corente juabna ndbomnëngcá; chë cuenta, tšëngaftanga šmojtsejuabná
Cristbe soyëngama corente osertánënga šmomna ca. Bënga fsëndmëna
chë entsangbe bominñiñe ndocna obenana ndbomnënga; y tšëngaftangna
šmojtsejuabná puerte obenana bomnënga šmomna ca. Tšëngaftangbiöye
inñenga puerte uámanënga y bëtsëtsanga jtsabiamnayana, pero chënga
bëngbiöye jtsëbuayënjana. ¹¹ Y mëntscoñama, bënga šontsabuashebebiana
saná, ndayá jofšiyama y entšayá. Entsànga bëngbiöye bacá jtsaborlánana, y
tondaye yebna queftsátsbomna. ¹² Y bënga puerte jabuache fsëndëtrabája

cach bēngbe cucuatšēngaca. Entšanga šojóyanguango ora, Bēngbe Bētsá fchandbétseimpadana cha chaoma chēnga tšabe bendicionēnga chamotsebomnama. Bēnga chamosufrima inyēnga tmojtsama ora, bēnga chē soye fchandbétsoboyaye. ¹³ Inyēnga bēngbiama bacá tmojtsoyebuambná ora, jtsababuánjēshanēse fsēnduamana jtējuana. Quem luarentša entšangbe bominjīne bēnga jsemnana chē puerte nduámanēnga, mo chē quem luarentša basurēshēngcá, chē quem luarentša entšanga tondayama ndoservénēnga, mo chē quem luarentša tsengacá; y chca endmēna méntscoñama.

¹⁴ Quem soyēnga ndoñe quecbatēbuabiamná tšēngaftanga chašmotsēuatjama, sinó ndayá jábuayenama mo cach atšbe basengbioycá, atšbe bonshánēnga.

¹⁵ Er masque tšēngaftanga mallajta abuátambayēnga chašmotsóbomñe, jacúntama ntjobenaycá, Cristbiamna chacmotsabuátambama, ndoñe banga quešmátabamna tšēngaftangbiama mo taitangcá, Cristo Jesúsbeñe jtsošbuáchiyama tcmojanējabuachama. Nye atše sēndmēna mo taitacá tšēngaftangbiama, mo ošbuachiyēngcá, er atše natsana tcbonjanabuayená chē tšabe noticiēnga Jesucristbiamna, y tšēngaftanga chiñe šmontsanosabuaché.

¹⁶ Chíyecna, cbontsaimpadana ntšamo atše tijamcá chašmotsamaba.

¹⁷ Chama Timoteo tšēngaftangbioye sēntsichamná, atšbe bonshaná, canye aīne tšabe palabra bomná; Bēngbe Utabnábeñe tojanošbuachéyeca, atše Cristbiamna sēnjanbuayiyná ora, mo atšbe uaquíñacánaca cha endmēna, ntšamo chabe ošbuáchiyana yomnama. Cha echanjama tšēngaftanga chašmuatenójuaboma ntšamo atše tšēngaftangbeñe tsjoyenama, Cristbeñe ošbuachiyacá, ndayama atše nýets tempo ošbuáchiyēnga sēndbetsabuatambaycá nýets luare ošbuáchiyēnga enefjuanenache.

¹⁸ Tšēngaftanguentše báseftanga ya šmojatsjuabná puerte uámanēnga šmojtsemna ca, er šmojtsejuabná atše stsauatja tšēngaftangbioye jama jányama ca. ¹⁹ Pero Bēngbe Bētsá chašojalesenciase, sēntsobátmana betscó tšēngaftangbioye jama jányama. As chjinye ntsache obenana imobomna chē Bēngbe Bētsabe entšangcá jtsiyenama tša uámanēnga imomna ca juabnayēnga, y ndoñe nye ntšamo jayanama imobencá.

²⁰ Er Bēngbe Bētsá canye ošbuachiyabe ainaniñe tojtsemánda ora, chca jtsinýnana ndoñe nye ntšamo tojtsichámuama, ndayá Bēngbe Bētsabe obenana chábeñe tojtsemnama.

²¹ ¿Tšēngaftanga ndayá más šmattseboše: atše chayá tšēngaftangbioye jauacánama, o chayá tšēngaftangbioye jányama puerte bonshanánaca y ntsetšatjajycá tšēngaftanga jauyanama?

5

Ndayá cuanjama canye boyabása shembásaftaca bacna soye amáftaca

¹ Ndegombre nýets luariñe entsótatšēmbo tšēngaftanguentše yojtsemna canya, shembásaftaca bacna soye amá, y ntšamo cha yojtsamcá puerte bacna soye yojtsemna; ni chē Bēngbe Bētsábioye nduabuátmēnga chca ntsamana: canye entšá cachabe mamamnáftaca bacna soye yojtsama. ² Y tšēngaftanga cabá šmojatsjuabná corente tšábēnga šmomna ca, masque chca tšēngaftangbeñe yojtsopasánēse. Tšēngaftanga cmontsamna puerte ngmēnaca jtsemnana, tša uabouana soye cha yojtsama causa. Canye entšá chca tojamáftacna, tšēngaftanga cmontsamna jamana cha ndoñe más tšēngaftangaftaca chaondenútanama mo ošbuachiyacá. ³ Y atšna, masque tšēngaftangaftaca choca ndoñe quetsátmēna, atšbe juabna choca tšēngaftangaftaca entsemna; y

chca atšbe espíritoca sêntsemnayeca, Bêngbe Utabná šojéftsanatšetá mándoca, sênjajuabó y sêntsetatšêmo ntšamo tšêngaftanga cmojtsamnama, chê entšá chca tojamáftaca. ⁴ Tšêngaftanga chašmojénefjna ora, chentše atšbe espíritoca tšêngaftangaftaca atše chántsemna, y atšbe espíritu chentše echántsemna Bêngbe Utabná Jesusbe obenánaca. ⁵ Y chora tšêngaftanga cmontsamna jamándana chê entšá ya ndoñe más tšêngaftangaftaca mo ošbuachiyacá chaondenútanama, mo Satanásbe cucuatšíne cha cuafjaboshjoncá, chca, chê quem entšá nÿe cachá tšabá jtsomñama juabnênga chaotsopochocama, y chca, Bêngbe Utabná cachiñe chaojésabo ora, chabe espíritu atsbocaná chaotsemnama.

⁶ Tšêngaftanga šmojtsejuabná puerte tšábenga y uámanênga šmomna ca, pero šmojtseleséncia canÿa tšêngaftanguentše chca chaotsamama. Chca ndoñe tšabá quenátšmêna. Tšêngaftanga ya šmondétatšêmo, ntšamo chê nÿe batšá levadura endbama, nÿets arninÿá chauábochema; cachcá, tšêngaftanguentše canÿa tša bacna soye chca tojama ora, nÿetscangbiama ndoñe tšabe soyênga jóbocnana. ⁷ Chíyeca, tšêngaftanga cmontsamna, chca uabouana bacna soye tojamá jtabocnana, cha ya ndoñe más tšêngaftangaftaca mo ošbuachiyacá chaondenútanama; y chora tšêngaftanga šmochántsemna mo tšêm arninÿacá, ndocna levadúraca, chê bacna juabnêngaca ya ndemandánênga šmojtsemnayeca. Ndegombre tšêngaftanga chca šmondmêna, er Bêngbe Bêtsá tojama tšêngaftanga tšêm vida chašmotseboimna. Bashco fiesta ora, oveshá tmojanóba, Israeloca entšanga perdonánênga chamotsemnama. Cachcá Cristo, mo chê oveshacá, tojanóbana bacna soyênguentsána bênga játsebacama. ⁸ Ntšamo chê judiênga chê fiesta ora mondbamcá, nÿets levadura ojamnana cachcá jonÿayana, cachcá, bênga šontsamna jtsajbanana oyenana bacna soyênga inÿengbiama jamama jtsebošêse, y ndaye bacna soye jtsamêse, ntšamo tempo imojanamcá. Ntšamo chê judiênga chê fiestiñe nÿe levadúraca ndêpormana tandêse mondbetsesaycá, cachcá, bênga šontsamna jtsiyenana nÿetsca soyênga ainaniñe ndocna bacna juábnaca jtsamêse, y ndegombre yomncá jtsóyebuambnayêse y jtsamêse.

⁹ Chê inÿe atšbe tsbuanáchañe tcbonjáuyana, chê boyabása o shembásaftaca bacna soye amêngaftaca tondayama chašmondétsencuénta ca. ¹⁰ Y chca ndoñe quetstétseboše jáuyanana nÿa tondayama chašmondétsoyebuambná nÿetsca chê quem luarentsênga boyabása o shembásaftaca bacna soye amêngaftaca, chê nÿe cachêngbiama bêtscá soyênga jtseboimna tša bošêngaftaca y atbêbanêngaftaca, y chê cachêngbe pormana soyênga diosênga yomnama jtsejuabnayêse adorayêngaftaca ca; er nÿa chca jamamna, tšêngaftanga cmattsamna quem luarentšana jéftsebocanana. ¹¹ Ntšamo chora sênjanayacá endmêna ndayá tondayama ntscuéntayana, chê Cristbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nÿe cachabiama bêtscá soyênga jtseboimna tša tojtseboše, o chê cachabe pormana soyênga diosênga yomnama jtsejuabnayêse tojtsadorana, o yapa tojtsayatsená, o yapa tojtsetmó, o tojtsatbêbana. Chca entšángaftacna, ni mo šmuatjót'bema chêngaftaca cánÿiñe jasama. ¹²⁻¹³ Atše ndoñe quešnátšmêna jayanana chê ndošbuáchiyênga, chê bêngaftaca ndoñe mondbénutananga, aínê o ndoñe tšabá tmonjamama. Bêngbe Bêtsá echántsemna nda chêngbiama yochjayana ntšamo tojamcá tšabá o ndoñe tšabá bêtsemnama, tšêngaftanga ndoñe. Ndegombre nÿe chê ošbuáchiyênga tšêngaftangaftaca innénutanangbiama cmontsamna

chca jayanana. Chcasna, šmochjama ntšamo Běngbe Bětsabe uabemana palabrénguiñe endayancá: “Tšěngaftanga cmontsamna, chca bacna soye amá tšěngaftangbentšana jtabocnana ca.”

6

Ošbuáchiyěnga jendemándama tojtsemna ora

¹ Canye tšěngaftanguentša ošbuachiyá inye ošbuachiyabiamana canye demanda tojtsebomna ora, ¿cha nanjá chě ndošbuáchiyěnga mandaděngbioye chě soye chamojandmanama? ¿Ndáyeca chca nanjama, y ndoñe chě Běngbe Bětsabe entšangbioye nanjá chabe demanda chamouenama? ² Tšěngaftanga ndegombre šmondětatsěmbo, Běngbe Bětsabe entšanga mochjayanama quem luarentša entšangbiamana tšabá o ndoñe tšabá tmonjamama. Y chěnga quem luarentša entšangbiamana chca jayanama tmojtsobeněse, ¿ndoñe montsobena más base soyěngama chca jayanama?

³ Tšěngaftanga ndegombre šmondětatsěmbo chě angelěngbiámna tšabá o ndoñe tšabá tmonjamama běnga mochjayanama. Chcasna, běnga más jtsobenana chě quem luarentše jěftsiyenama soyěngama chca játayanana. ⁴ Y chcasna, tšěngaftangbeñe chca demanděnga chě quem luarentše jěftsiyenama soyěngama tojtsemna ora, ¿ndáyeca šmatjátěbuayana chě ošbuáchiyěngbiamana tondaye tmontsámama entšanga, chě soyěnga chamojandmanama?

⁵ Chca sěnjayana tšěngaftanga chašmotsěuatjama; ¿o tšěngaftanguentše ni mo canya yondmėna corente osertaná, ošbuachiyěngbeñe demanděnga chaojandmanama? ⁶ Pero ndoñe chca: ošbuachiyěngbeñe demanděnga tojtsemna ora, mandaděngbioye jana chě soyěnga chamojandmanama. Y chca jamana ndošbuáchiyěnga mandaděngaftaca.

⁷ Y tšěngaftangbeñe nye demanděnga jájandmanama tojtsemna ora, tšěngaftangbiamana ya canye puerta bacna soye jtemnana. ¿Ndáyeca ndoñe šmattsóboyaye inyěnga bacá cmojtsaborlana ora? ¿Ndáyeca ndoñe cachcá šmatjonýaye inyěnga cmojtsabiaběbana ora? ⁸ Pero cach tšěngaftangaftacna inyětsá copasana, inyěngbioye bacá jtsaborlánana y jtsabiaběbanana, y tšěngaftangcá Crístbeñe ošbuachiyěngbioynaca.

⁹ ¿Tšěngaftanga ndoñe šmondětatsěmbo, chě bacna soye aměnga Běngbe Bětsabe aměndayoye ndoñe mochanjámarshěnguama? Ndoñe matenoingñana. Ni chě boyabása o shembásaftaca bacna soye aměnga, ni chě cachěngbe pormana soyěnga diosěnga yomna ca jtsejuabnayěse adórayěnga, ni cachěngbe boyá o shema inyěftaca ingñayěnga, ni chě boyabásenga mo shembasengcá jtsinýnama bošěnga, ni chě boyabásenga inye boyabásengaftaca bacna soye aměnga, ¹⁰ ni chě atbėbaněnga, ni chě nye cachěngbiamana bėtscá soyěnga jtsehomnana tša bošěnga, ni chě tša tmoyěnga, ni chě uayátsenayěnga, ni chě inyěngbiamana bacna soye jtsaměse imnėtsatbėbaněnga, chěnga nyětscanga ndoñe quemochatobenaye Běngbe Bětsabe aměndayoye jamashjnama. ¹¹ Y tempo báseftanga tšěngaftanguentšěnga chca šmojamna, pero Běngbe Bětsá tšěngaftangbe bacna soyěngama tcmojaperdoná, y chca entsemna mo beběngěna cuaftsemncá; cha tojama tšěngaftanga chabe entšanga chašmotsemnana, nye cha chašmotseservěnama, y tojama tšěngaftanga mo tšabengcá chabe bominýiñe chašmotsemnana. Lempe chca Běngbe Bětsá, tojama ndayá Běngbe Utabná Jesucristo tojanmama y ndayá Běngbe Bětsabe Espíritu tojamama.

Bëngbe cuerpo chaotsemna Bëngbe Utabná jtseservénama

¹² Mondbétsichamo: “Atsbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básiesta soyènga jtsamana ndoñe atsbe tšabiana ntsemnana. “Atsbiama entselesenciana ndayánaca jamama ca”, pero ndoñe quichatslesencia ndaye sóyecnaca nyets tempo mandaná jatsmènana. ¹³ Mèntšánaca mondbétsichamo: “Saná uafsbiana y uafsbíá saná chaóyengacñama ca.” Pero Bëngbe Bëtsá canye te echanjama chë uta soye chaotsopochocama. Bëngbe Bëtsá entsabiana cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiana tšabe bendicionënga chaotsamama. ¹⁴ Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

¹⁵ ¿Tšëngaftanga ndoñe šmondétatšëmbo, Crísoftaca cányiñe mo canyáca šmomnana yomna mo tšëngaftangbe cuerpo chabe cuerpentša soye cuaftsemncá? Tšëngaftangbe cuerpo Crístbioye jaserviama endménayeca, tšëngaftangbe cuerpo jtsemnana mo Crístbe cuerpentša soycá. ¿Ntsámo atše chjátobena atsbe cuérpoca, chë ndayá yomna mo Crístbe cuerpentša soycá, canye bacna vida bomna shembásaftaca bacna soye jamana, y chca atsbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšëngaftanga ndoñe šmondétatšëmbo, canye entsá canye bacna vida bomna shembásaftaca tbojéninyena ora, chë útata jóbemana mo canyáca? Er Bëngbe Bëtsabe uabemana palabrénguiñe boyabása y shembása tbojéninyenama mëntšá endayana: “Chë útata mo canyáca bochantsema ca.” ¹⁷ Pero canye entsá Bëngbe Utabnáftaca cányiñe mo canyáca tójtsemna ora, jtsemnana mo chë útata cach canye espíritu tbojtsebomncá.

¹⁸ Nya ndocna te canye boyabása o shembásaftaca bacna soyènga šmattsama. Nderado ndaye inye bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nye cachabe cuérpoca, y chë causa, chca jamése, cachabe cuerpama más bacna soyènga jtsamana. ¹⁹ ¿Tšëngaftanga ndoñe šmondétatšëmbo tšëngaftangbe cuerpo yomna mo canye yebncá Uámana Espíritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmèna, sinó Bëngbe Bëtsabe soye. ²⁰ Chca endmèna, er Cristo bënga játsebacama tojanóbana ora, yojamna mo cha bëtsca cuafjopagacá tšëngaftanga Bëngbe Bëtsábenga chašmotsemnana. Chiyeca, chë tšëngaftangbe cuerpéngaca chašmojtsama soyéngaca šmochtsinýanýnaye Bëngbe Bëtsá puerte uamaná y bëtsá bétsemnana.

7

Jobouamayama jábuayenama

¹ Mora chanjóyebuambaye ndayá tšëngaftanga átsbioye šmojuábobemama. Ndegombre, canye boyabásabiana más tšabá endmèna ndoñe chaondobouamá. ² Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. ³ Boyábioye bontsemna jamana chabe shembiana lempe ntsámo jamama ibomncá,

boyá bétsemnana; y chabe shémnaca cachcá chabe boyabiamana chaoma. ⁴ Chê shembe cuerpo ndoñe nÿe cha cânÿabiamana ntsemnana, sinó chabe boyabiámnaca. Cachcá, chê boyabe cuerpo ndoñe nÿe cha cânÿabiamana ntsemnana, sinó chabe shembiámnaca. ⁵ Ni boyá, ni shema ndoñe chabondétsejuabná jtsenbiátsbuana. Aíñe chca copodena, pero nÿe chê útata chca báséta tescama tbojenóyeunase, Bèngbe Bètsáftaca jencuéntama jtsentsénama. Pero chentšana chê útata entsamna cachiñe cânÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmtontsobena causa.

⁶ Atše chca séntsichamo, tsëngaftanga jábuayenama, ndayá jamama šmojtselesenciana, y chca ndoñe chašmondétsamama jamëndama. ⁷ Y atšbe bariëna, atšbe juabna entsemna malaye nÿetscanga chê soyënguiñe mo atšcá šmattsemna. Pero Bèngbe Bètsá cada ona obenana tbojatsétá tsabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna inÿe soyama.

⁸ Chê cabá ndbouamnënga y viudanga séntsëtsëtsná, chëngbiamana tsabá yojtsemna ntjobouamaycá joquédana, atšcá. ⁹ Pero chca jtsemnana cachënga jenomándama ndoñe tmtontsobenëse, chënga entsamna jtsóbouamayana, er más tsabá endmëna jtsóbouamayana, y ndoñe nÿe boyabásabiamana o shembásabiamana tša nÿets tempo jésejuabnayana.

¹⁰ Pero chê bouamnënga séntsamënda shema chabe boyábioye ndoñe cachcá chabondetsonÿá. Chca ndoñe nÿe atše quetsatamënda, ndayá cach Bèngbe Utabná. ¹¹ Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chê boyá ndoñe quebnátsmëna chabe shema cachcá jesonÿayana.

¹² Chê ínÿenga chjáuyana, atšbe juabncá y ndoñe Bèngbe Utabnabe soycá, nderado canÿe ošbuachiyá tbojtsebmna canÿe shema Crístbeñe ndošbuachiyá, pero chê shema tojtseboše cháftaca joquédana jtsiyenama, cha chê shëmbioye ndoñe cachcá chabondetsonÿá. ¹³ Nderado canÿe ošbuachiyá tbojtsebmna canÿe boyá Crístbeñe ndošbuachiyá, pero chê boyá tojtseboše cháftaca joquédana jtsiyenama, chê shema ndoñe chaondétsejuabná cha cachcá jesonÿayana. ¹⁴ Er Bèngbe Bètsá tojama, canÿe shembása ošbuachiyá chabe entšá chaotsemnana, nÿe chábioye chabotseeservénama, y chca, chánaca jtsejuabnayana chê shembásabe boyá Crístbeñe ndošbuáchiyabiamana mo chabiamana oservena entšacá, cha chëngbeñe mo canÿe pamillécá jatrabájama tojtseboše ora; y cachcá, chê boyá ošbuachiyábeyeca Bèngbe Bètsá jtsejuabnayana chabe shema Crístbeñe ndošbuáchiyabiamana mo chabiamana oservena entšacá, cha chëngbeñe mo canÿe pamillécá jatrabájama tojtseboše ora. Er chca ndoñe tontsemnëse, chê básenga muántsemna ndošbuachiyatbe básenga, Bèngbe Bètsáftaca tondaye ndbomnënga. Ndoñe chca yondmënayeca, canÿa o nÿets uta bëtšëtsatbe ošbuáchiyama, Bèngbe Bètsá jtsejuabnayana chê básengbiamana mo chabe entšangcá. ¹⁵ Pero chê boyá o shema Crístbeñe ndošbuachiyá cachcá jtsenónÿayama tša tojtsebošëse, chca chaboma. Chora, chê ošbuachiyá ndoñe ntsotocánana chê ínÿaftaca cachiñe jtëtenútanama, er Bèngbe Bètsá tcmojáchembo natjëmbana chašmotsiyenama. ¹⁶ Chca šmochjama, er aca shema çntšamo cattsetátšëmbo, tacuatjobenaye acbe boyá jayëñjanana Crístbeñe chaotsošbuáchemana, y chca, atsbocaná chaotsemnana? o aca boyá çntšamo cattsetátšëmbo, tacuatjobenaye acbe shema jayëñjanana Crístbeñe chaotsošbuáchemana, y chca, atsbocaná chaotsemnana?

17 Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga enefjuanenache sëndbëtsamëndaye. 18 Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentše base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobianná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënana, ntšamo chë judiënga monduamancá. 19 Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. 20 Cada ona bontsemna jtsiyëñana, ntšamo yojoyencá, chabe entšá chaotsemnana Bëngbe Bëtsá tbojanchembo ora. 21 Bëngbe Bëtsá tcmojanchembo ora, nyets tempo ínÿabiama oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnana, cach acbiama jatrabájama, as chca cochjama. 22 Er chë nÿe ínÿabiama nyets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canÿa ya ndoñe más bacna soyënga jamama juabnëngaca mandaná, sinó Bëngbe Utabnabiama oservená. Cachcá, chë nÿe cachabiama trabajayá yojamná, Bëngbe Bëtsá tbojanchembo ora, mora cha nyets tempo Cristabe oservená jtsemnana. 23 Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnana. Ndoñe šmatjaleséncia nÿe entšangbe juabnëngaca nyets tempo mandánënga chašmotsemnana, y Bëngbe Bëtsabiama chacmotsebnëtjomba. 24 Chcasna, Jesucristbeyeca atšbe catšátanga, cada ona bontsemna Bëngbe Bëtsáftaca jt-siyëñana, ntšamo yojoyencá Bëngbe Bëtsá tbojanchembo ora.

25 Y chë ndëbouamna shembásengbiama, chënga aíñe o ndoñe yontsamna jobouamayamna, atše chama ndoñe Bëngbe Utabnabe canÿe mando queatsásbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsmënama. 26 Atše šontsinÿana, entšá ibojtsemna jtšomñana nÿe ntšamo mora yotsomñcá, er bënga mora montsiyena puerte padecena soyënguiñe. 27 Shema tcobomnëse, ndoñe cachcá catjëftsonÿaye; y ndoñe tcondbomnëсна, ndoñe catjátsënguaye. 28 Tcojobouamase, bacna soye ndoñe quecátama; y nderado canÿe tobiaše tojobouamase, cach bacna soye ndoñe quenátama. Pero chë tmojtsobouamangna padecena soyënguiñe mochanjoyena quem luarentše chamojëftsemnëntscuana, y atše sëntseboše chënga jujabuáchama chca jatiyenama ndoñe chaondëtsamnama.

29 Jesucristbeyeca atšbe catšátanga, ntšamo sëntseboše jayanamna mëntšá entsemna: Cristo quem luaroye yochjésabo orscama ya nÿe batšá entsájamna. Chiyeca, morscana y nyets tempo más chcoye, chë bouamnënga entsamna jt-siyenana mo ndoñe bouamnënga tmontsemncá, o mëntšá, entsamna jt-sentšénana Bëngbe Bëtsabe soyënguiñe, y ndoñe nÿe chë bouamná bëtsemnana tbojtsemna soyënguiñe. 30 Cachcá, chë puerte ngmënaca tša ošachiyiñe imonnënga, entsamna jt-siyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. 31 Chë quem luarentša soyëngaca jt-siyenama imojtsentšénënga entsamna

jtsiyenana mo ndoñe chca tmontsamcá, er quem luare ntšamo bēnga mora monduabuatmcá, pronto echanjochnēngo.

³² Atše sēntseboše tšēngaftanga ndoñe chašmondētsenocochinŷenama. Canŷe entšá ndoñe bouamná tontsemna ora, jtsobenana jtsentšénana Bēngbe Utabnabe soyēngama jtsejuabnayama, y ntšamo oyejuayá cha jabemama; ³³ pero chē bouamná nŷets tempo jtšenocochinŷenana quem luarentšá soyēngama, jtsiyenama, y ntšamo chabe shema oyejuayá jtsebomnana; ³⁴ y chca, cha uta soyiñe canŷe ora jtsentšénana. Chē ndēbouamna shembása y chē tobiáše bontsobena jtsentšénana Bēngbe Utabnabe soyēnguiñe sempre jtsejuabnayama. Chēnga mondobena jtsentšénana Bēngbe Bētsá jasérviama, ndayá chēngbe cuérpoca y chēngbe espíritoca tmojamama. Pero inŷetšá, chē bouamna shembásana, nŷets tempo jesenocochinŷenana quem luarentše vida jtsebomnana soyēngama, y ntšamo chabe boyá oyejuayá jtsebomnana.

³⁵ Atše chca chontšetsētsná tšēngaftangbe tšabiamaya, y ndoñe jamēndama ba soyēnga jamama ndoñe chašmondētsobenama, ndayá ntšamo tšabá yomncá chašmotsiyenama, y nŷe Bēngbe Utabná jtse servénama chašmotsentšénama.

³⁶ Nderado nda tojtsejuabná chabe uatsētsnaye tobiášeftaca jtsebouamayama ibojtsemna ca, chca jamama chē tobiáše ya bētsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntšamana. ³⁷ Pero nderado inŷa, tondaye obligaciōnaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšēmo, ndoñe ntšobouamayana tšabá yomna ca, cha tšabá chca jtsamana. ³⁸ Chcasna, chē tobiášeftaca tojtsobouamá chana, canŷe tšabe soye jamana; pero chē ndoñe cháftaca tonjobouamá chana, canŷe más tšabe soye jamana.

³⁹ Chē shembása bouamná jtsotocánana chabe boyáftaca siempre jēftsiyenana, chē boyá vida tojtsebomnēntscuana; pero chē boyá tojóbanēse, cha jtsobenana cachiñe jtobouamayana, nda cha tojtsebošáftaca, pero chca chaoma mo canŷa Bēngbe Utabnáftaca cánŷiñe mo canŷacá quetsomñecá. ⁴⁰ Pero atše jayanamna, cha más oyejuayá nántsemna ndoñe tontóbouamase; y sēntsejuabná, átšnaca tsbomna chē Bēngbe Bētsabe Espiritu chašotsebuaiynama.

8

Uátšēmbona saná entšangbe pormana soyēngama

¹ Mora chanjóyebuambaye ndayá tšēngaftanga atše šmojatjama, ndayá jtseyayama, chē tempo inŷenga cachēngbe pormana soyēnga, diosēnga yomna ca jtsejuabnayēse jadórama tmojanátšēmbona soyēngama. Bēnga mondētatsēmo bēnga nŷetscanga osertánēnga imomnana. Canŷa tbojtsosertana ora, cha nderado nanjájuaboje, chca bētsemnama puerte uamaná cha yojtsemna ca, pero canŷa, inŷenga tojtsababuánŷeshana ora, cha jtsobenana chēnga becá jujabuáchana. ² Nderado nda tojtsejuabná ndegombre canŷe soye yotátšēmo ca, cabá ndoñe yontsetátšēmo ndayá jtsetatšēmbuama ibojtsemncá. ³ Pero nderado nda Bēngbe Bētsábioje tbojtsebobonshana, Bēngbe Bētsá chábioje jtsabuatmana mo chabe entšacá.

⁴ Y chē tempo inŷenga cachēngbe pormana soyēnga, diosēnga yomna ca jtsejuabnayēse jadórama uátšēmbona soyēngamna, atše šcuayana: bēnga

corente mondétatšëmbo chë chënga imnëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nÿe canÿa Bëngbe Bëtsá endmëna. ⁵ Pero masque celoca y quem luarentše chamomna entsangbiamna “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiamna diosënga ca ubuátmënga, y banga bëts mándoca entsangbiamna “utabnënga ca” uabáinënga), ⁶ bënga chë ošbuáchiyëngbiamna nÿe canÿa Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nÿe nda jtse servénama bënga imoyena. Y nÿe canÿe Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

⁷ Pero nÿetsca ošbuáchiyënga ndoñe chca quemátstatsëmbo. Básefta entsanga, Cristbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórana; chënga, chca uatšëmbonana tmojtsešá ora, jtsejuabnayana chca uatšëmbonana bëtsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸ Ndegombre, ndayá bënga tmojtsešacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábënga aiñe tmojtsešama; ni ndoñe chcanga, ndoñe tmojtsešá causa.

⁹ Pero cuedado šmochtsebmomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa inÿënga, chë soyënguiñe más batsá ošbuáchiyënga y osertánënga, ntšamo tšëngaftanga šmojtsemcá chamuatmama, y chentšana, chëngbe ainaniñe juabnënga chamotsebmomna y chëngbioye chaotsëtsësná ndoñe tšabá tmonjama ca. ¹⁰ Er, aca chë soyëngama tatšëmbuá, nderado tcojót'bema jasama canÿe luarentše, canÿe soye ndayama entsanga dios yomna ca jtsejuabnayëse adórayentše, y canÿe Cristbeñe ošbuachiyá tojtsebmomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondétatšëmbo causa, y cha nderado chentše cojtsešama tmojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná. ¹¹ Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnama, er chabe ainantse echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiamna Cristo tojanóbana, cha jatsbocama. ¹² Jesucristbeyeca acbe catšatbiamna chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsësná ndoñe chca chaondëtsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiamna, ndayá cach Cristbiámna. ¹³ Chíyeca, nderado ndayá atše stesama, atše tsjama Jesucristbeyeca atšbe catšata chaoma canÿe soye y chca jamama chabiamna canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatšama.

9

Jesucristbe ichmónëngbe derecho

¹ Ndegombre endmëna, atše ndayánaca jamana steselesenciánama y Moisesbe leyëngaca ndoñe más mandaná séntsemnama. Cach ndegombre endmëna, atše canye Jesucristbe ichmoná tsmënama y Jesús Bëngbe Utabná tijinyama; y cach tsëngaftanga mora ošbuáchiyënga jtsemnëse, šmondmëna ndayá tojóbcna Bëngbe Utabnabiana atšbe trabajuentsana. ² Masque inyënga atšbiana ndoñe quematsjuabná atše canye Jesucristbe ichmoná tsmëna ca, tsëngaftangbiamna aife chca endmëna; er tsëngaftanga Cristbeñe ošbuáchiyënga šmondmënama y Bëngbe Utabnáftaca cányine mo canyáca šmondmënama, puerte tsábá šmontsinyanyna atše Jesucristbe canye ichmoná tsmënama.

³ Mëntšá chanjayana chë atše ndoñe tsábá tijama ca imojtsichámëngbiana: ⁴ Ndegombre bënga nyets derecho fsëndëtsóbomñe jtsobátmanama tsëngaftangbentsana, chë tbojujubuáchëngbentsana, bëngbe trabajuama saná o ndayá jofšiyama chašcuacaredadama. ⁵ Y bëngnaca derecho fsëndëtsóbomñe canye shema ošbuachiyá jtsebonnama y bëngaftaca cha jëfšbetšama inye luaroye fstsajna ora, ntšamo chë Jesucristbe inye ichmónënga, Bëngbe Utabnabe catšátanga y Pédrënaca mondbetsamcá. ⁶ ¿O nye Bernabé y atše šojtsëtocana cabëndatbe cucuátšeca jatrabájana vida jtsebonnama, y ndoñe derecho fsëntsebonna ošbuáchiyënga chašotsacuédanama, Bëngbe Bëtsabiana trabájayama? ⁷ ¿Ndëmua mo canye soldadca tojtsoservená, ndayá tbojtsájabotama cachá nantsatopagana, vida jtsebonnama? Ndocná canye jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanýenana, chë tojabuatëba létsiyentsana ndoñe ntjofšiyama. ⁸ Ntšamo atše muentše séntsichamcá ndoñe nye entšangbe juabna quenátsmëna; y Moisesbe leyinñaca cachcá endayana, ⁹ er chabe leyine mëntšá endayana: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca.” Y chca ndoñe quenátayana Bëngbe Bëtsá nye toronga inëtsanýena ca, ¹⁰ sinó inye más bëts soye; chca endayana ndayá ndegombre bënga, chë Bëngbe Bëtsabiana soyëngama abuayiyanyiñe trabájayënga cha šnetsanýena ca. Chca tmojanábema bëngbiana, er chë fshantse arayá y chë meshënga atbanayá, entsamna chca jamana jtsobátmanëse, chë tmojátabe shajuanentsana batšá jóyëngacñama. ¹¹ Y chca, bënga chë tsabe noticiëngama tbojábubuyenase, y chca, Bëngbe Bëtsábocana tsabe bendicionënga chašmotsebonnama bënga tifjama, ndoñe yapa tanandásmëna tsëngaftanga jótjañana, chë šmobomna soyënguentšana bënga jëfšsiyënama chašcuatšatama. ¹² Inyënga derecho tmojtsebonna tsëngaftanga jótjañana chë šmobomnentsana chašmuacaredadama, tsëngaftangbeñe chëngbe trabajuama, as bënga más derecho fstsebonna chca jamama.

Pero bënga tondaye chechatamëndá, bënga chë derecho bëtsebonnayeca. Chca játamanna, bënga lempe fsëntsoboyá, chca, bënga tondaye ntjátamama, y chë causa entsanga ndoñe chašondëtsayaunana, bënga chë tsabe noticiënga fstsabuayinya ora. ¹³ Tsëngaftanga šmondëtatšëmbo, Bëngbe Bëtsabe bëts yebnoca trabájayënga Bëngbe Bëtsabiana oservëniñe, mondbóyëngacñe chënga jasama, ndayá entsanga Bëngbe Bëtsá jadórana chabe bëts yebnoye tmojijyëbo sananguentsana. Y chë Bëngbe Bëtsá jadórana soyënga

amënga, altaroca, chë juatšëmbonama luarentše, chënga jasana ndayá chentše tmojuatšëmbona soyënguentsana. ¹⁴ Cachcá, Bëngbe Bëtsá tojamandá, chë tšabe noticiënga abuayiyayëngna, vida jtsebomnamna lempe ntšamo tojtšëjabotcá chamóyëngacñe ca, chë tšabe noticiënga abuayiyayama. ¹⁵ Pero atše ndocna te chiyaisemandá ín'yënga chca chašmotsecuedánama, atše chë tšabe noticiënga abuayiyayá bëtsemnama chca derecho tsbómnyeca, y cach ndoñe mora quem soye quecbatëbuabianná, tšëngaftanga ndayánaca atše chašmuatšetama. Atšbiana más tšabá nántsemna jóbanana, y ndoñe ntjaleséciana in'ya chaoma atše cach atšbiana oyejuayá ndoñe ntjátsmënama, in'yëngbentsana soyënga stjóyëngacñe causa.

¹⁶ Atše ndoñe quetsatsjuabná atše can'ye bëtš soye stsama ca, chë tšabe noticiënga stsabuayiyama, er atše obligacónacna séntsemna chca jtsamama, Bëngbe Bëtsá chama šojanchëmboyea. ¡Tša lastemcá atšbiana nántsemna, chë tšabe noticiënga ndoñe séntsabuayiyana! ¹⁷ Chiyeca, atše chë tšabe noticiënga stsabuayiyá n'ye atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna n'ye atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbon'yecá. ¹⁸ Y chca, atšbe uacanana soye endmëna atše oyejuayá jtsemnana chë tšabe noticiënga abuayiyayama, ošbuachiyëngbentsana atše vida jtsebomnama tondaye ntjatoyëngacñëcá; chca, atše tondaye quetsátama chë tšabe noticiënga abuayiyayama tsbomna deréchoca, chë atšbe traba-juentsana vida jtsebomnama.

¹⁹ Atše, masque ndocna entšábeyeca n'yets tempo mandaná quetsátsmëna, puerte nduananá sënjobema, mo can'ya n'yets tempo ín'yabeyeca mandaná, n'yetscanga jasérviamá, chca, atše chca jtsamëse, jobenayama beca entšanga, ntšamo tojopodecá, jáyënjana Cristbeñe chamotsošbuáchema. ²⁰ Chë judiëngbianna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjana Cristbeñe chamotsošbuáchema. Y chë Moisesbe léyeca mandánënga imoyëngbianna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjana Cristbeñe chamotsošbuáchema. ²¹ Pero chë Moisesbe léyeca ndëmandánënga oyenëngbianna, atše chëngcá sënjobema, chënga jáyënjana Cristbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. ²² Chë n'ye batšatema ošbuachiyëngbiama y Bëngbe Bëtsabe soyëngama n'ye batšatema osertánëngbiama, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Cristbeñe chamotsošbuáchema. Y lempe chca, chë atše jamana ntšamo n'yetscanga imomncá atše chaitsemnama, endmëna atše jobenayama báseftanga jáyënjana Cristbeñe chamotsošbuáchema.

²³ Atše lempe chca sëndama, bëtscá entšanga chë tšabe noticiënguifne chamotsošbuáchema, y chca, atše atsbocaná chaitsemnama y chëngcá atše chayóyëngacñama, chë atsebácanënga Bëngbe Bëtsá yochjatšataye tšabe soyënga.

²⁴ Tšëngaftanga šmondëtatšëmbo, can'ye luaroye jashjanguama entšanga tmojótjajo orna, banga jotjajuana, pero n'ye can'ya chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana

soye josháchiñama. ²⁵ Njetscanga chë tmojótjajënga ínÿenga jáyëñjanama, chënga jopróntana njetsca soyënguiñe jtsenomándayëse, chca, canÿe uacanana soye, tsbuanachëngaca uapormana coronësha juayëngacñama; y chësha betesco jtsanctana. Pero bënga ndoñe; bënga mondoyena Cristbiana soyënga jtsamëse, Bëngbe Bëtsábíocana ba tšabe soyënga mo uacanancá jóyëngacñama, y chë soyënga njetsca tescama bënga mochanjëftsebonna. ²⁶ Y atšna, atšbe bariëna sëndëntšena Bëngbe Bëtsá jtseservënama, ndoñe mo canÿa ínÿengbioye jáyëñjanama tojtjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeleíá orcá, chora, cha nÿe ínÿoye chabe buacuatšënga tojtsëtsana y chë ínÿabe cuerpoye ndoñe. ²⁷ Mo canÿe tšabe peliayacá, chabe cuerpo játsetšenana y chca chë cuerpo corente jtemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Cristbioye jtseservëñese chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

10

Cach entsangbe pormana soyënga ndoñe chamondëtsadoránama jábuayenama

¹ Jesucristbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëts taitanga judiënga, chënga njetscanga Bëngbe Bëtsá canÿe jantsetšheca benache yojaninÿanÿná, y chënga njetscanga, chë Buángana ca uabaina mar bejayëjana tmojánachneñna, chiñe mo bojojuiñe cuafstomñcá. ² Chë jantsetšheca Moisés imojanëstonama, y chë mar bejayëjana tmojanama, chënga tmojanóbema Moisesbe ústonënga. ³ Chënga njetscanga tmojanse cachca saná, chë Bëngbe Bëtsá celocana tojanichmó saná; ⁴ y njetscanga tmojanofšé chë Bëngbe Bëtsá tojanma chë peñšentšana chaóocna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñšentše chëngaftaca tojanopasacá, yojaninÿanÿná Cristo chënga yojtsanÿenama. ⁵ Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsanga ndoyenentše.

⁶ Lempe chca tojanopasá bënga jinÿanÿiyama y jábuayenama ntšamo inopása entsanga bacna soyënga jamama tmojtseboše ora, bënga chca jamama ndoñe chamondëtsebošama. ⁷ Chíyeca, tšëngaftanga ndoñe šmattsadorana entsangbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmá. Ntšamo Bëngbe Bëtsabe uabemana palabrenguiñe chëngbiana endayaná, chënga canÿe tenerá castellánoca tmojanpormá ora, mo dios cuafstsemncá jadórama: “Entšanga tmojanotbiana jasama y jatnuama, y chentšana tmojantsbaná joboyeuama ca”. ⁸ Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmá, y chë causa, nÿe canÿe te, uta bnëtsana y unga uaranga entsanga tmojanóbana ⁹ Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnama y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga. ¹⁰ Bëngbe Bëtsabe contra ndoñe šmattsóyebuambnaye, ntšamo báseftanga

chënguentšënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitángaftaca tojanopasá, bënga jinýañiyama ntšamo jtsiyenana šojtsamnama, y Moisés, Bëngbe Bëtsabe uabemana palabrénguiñe chca tojéftsanboshjona bënga jabuátambama, bënga, chë Jesucristo yochjésabo orscama ya batšatema yojtsájamna ora oyenëngbiam.

¹² Chcasna, nda tojtsejuabná Bëngbe Utabnabiamá tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatšama. ¹³ Ndocna entšá jatócochënguana bacna soyënga jamama, ntšamo tempo ínýenga ndoñe tonjanocochëngcá cachca bacna soyëngama, pero tšëngaftanga corente šmondétatšëmbo Bëngbe Bëtsá sempre cmochtséjabuachanama chë padecena soyënguiñe, y cha ndoñe yochanjalesnciamá bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguiñe chašmojtsemna ora, cha cmochanjínýañiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínýenga jtsejuabnayana diosënga yomna ca. ¹⁵ Atše séntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo chojtsétsna cá aiñe o ndoñe tšabá bétsemnana. ¹⁶ Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinýaññayana bënga Crístoftaca cánýiñe mo canýacá imomnana, chabe buiñe juabuáshanëse bëngbiamá tojanóbanayeca. Y chë mondbajataye tandëse tmojase ora, jtsinýaññayana bënga Crístoftaca cánýiñe mo canýacá imomnana, cha bëngbiamá tojanóbanayeca. ¹⁷ Bënga ošbuáchiyënga masque banga mondmëna, chca orna nyëtscanga cach tandësentšana bënga jasana, y chíyeca bënga jtsemnana mo canýacá, mo Cristbe cuerpcá.

¹⁸ Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentšana jasana, y chca chënga chora jtsinýaññayana chënga cánýiñe mo canýacá imojtsemnana Bëngbe Bëtsáftaca, chë chca tmojtsadoranáftaca. ¹⁹ Y chca, atše ndoñe quetsátšboše jayanama chë entšangbe pormana soyënga mo diosënga cuaftsemncá, uámana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná inýe sanama más iuámana ca. ²⁰ Pero aiñe, entšanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbioye jtsadoránana, y ndoñe Bëngbe Bëtsábioye. Y atše ndoñe quetsátšboše, tšëngaftanga chca uatšëmbonana šmojasama, cánýiñe mo canýacá chë bayëjëngaftaca chašmotsemnana. ²¹ Tšëngaftanga ndoñe quešmatobena chë vínoye coptémentšana jofsiyana, ntšamo chë ošbuáchiyënga bétsemnana mondbetsamcá, y chentsana chë cach entšangbe pormana soyënga, mo diosënga cuaftsemncá jadórama vínoye coptementšánëna. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmatobena vínoye jofsiyana y tandëse jasana, ntšamo ošbuáchiyënga bétsemnana mondbetsamcá, y chentsana cach entšangbe pormana soyënga mo diosënga cuaftsemncá jadórama fiestentšana sanánaca jasana, y chca chë bayëjëngbioye jtsadoránana.

²² Bënga chca tmojtsamama, bënga mochanjama Bëngbe Utabná puerte etonaná bëngaftaca chaotsemnana, er chë bayëjëngaftaca bënga chca jt-samana. ¿O imojtsejuabná bënga chabiama más obenana bomnënga imomna ca?

Lempe šmochjama Bëngbe Bëtsá puerte bëtsá y uamaná yomnama jinyanjiyama

²³ Mondbëtsichamo: “Entselesenciana ndayánaca jamana, ndayama Bëngbe Bëtsá ndocá tonjayana ca”, pero básefta soyënga atše stjama ora ndoñe nyetscangbe tšabiama ntsemnana. “Entselesenciana ndayánaca jamama ca”, pero nyetsca soyënga ntšamo bënga tmojamcá, ošbuachiyëngbioye ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnama. ²⁴ Ndocná chaondëtsama lempe ntšamo tojobenacá nje cachabe tšabiama, ndayá más chaotsama chë ínÿengbe tšabiama.

²⁵ Lempe mercadoca tmojtsena soyënguentšana šmochjase, ntjatstjanaycá chë mëntšena aiñe o ndoñe tmonjuátšëmbona chë cach entsangbe pormana soyënga, mo diosënga cuaftsemncá jadórama ca. Ndoñe chca šmatsetjanaye, ntšamo tšëngaftangbe ainaniñe juabnënga šmojtsebomnama; ²⁶ er ntšamo Bëngbe Bëtsabe uabemana palabrënguiñe endayancá: “Quem luare Bëngbe Utabnabe soye endmëna, y lempe ntšamo chiñe yomncánaca ca.”

²⁷ Nderado canye ndošbuachiyá tcmojúbuaja chábioca jasama, y tšëngaftanga choye jama tša šmojtsebošëse, lempe ntšamo cha chacmojonanjacá šmochjase, ndayentšana chë saná tojóbochama ndocá ntjatstjanaycá, ntšamo tšëngaftangbe ainaniñe juabnënga šmojtsebomnama. ²⁸ Pero nderado nda tcmojáuyana: “Quem mëntšena cach entsangbe pormana soyënga mo diosëngcá jadórama tmonjanátšëmbona ca”, as ndoñe chana šmatjase, er canya chca tcmojáuyana, y ainanentše šmojtsebomna juabnënga, chë chca jamama ndoñe tšabá bëtsemnana. ²⁹ Atše sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tšabá yondmënama, ndoñe chë tšëngaftangbe ainanentša juabnëngama.

Pero tšëngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bëtsemnana, ntšamo chë ínÿabe ainaniñe juabna yobomnama ca? ³⁰ Y atše chë ndayá stsesama Bëngbe Bëtsá tijëtschuase, ¿ndáyeca inya šochjauyana atše ndoñe tšabá tijama ca, chë soye tijasama, chë ndayama Bëngbe Bëtsá tijëtschuá ca?” ³¹ Masque ntšámncá, cachcá, chašmojtšesá, o chašmojtsofšëšná, o ndaye inye soye chašmojtsama, ndayama Bëngbe Bëtsá ndocá tonjayana, lempe šmochtsama Bëngbe Bëtsá puerte bëtsá y uamaná yomnama jtsinÿanÿayama. ³² Tondaye šmatjama ndayá chaobená jamana, ínÿenga Cristo chamotsábotema. Ndoñe chca šmatjama, ni judiëngbiana, ni ndoñe judiëngbiana, ni chë Bëngbe Bëtsábeñe ošbuachiyëngcá enfjuanëngbiana. ³³ Smochtsama ntšamo atše sëndëntšencá, nyetscanga nyetsca soyënguiñe oyejuayënga jtsabamnama, lempe ntšamo stjobenacá jtsamëse, ndoñe nje atšbe tšabiama, ndayá masna chë ínÿengbe tšabiama, chënga chamotsobenama chëngbe bacna soyënguentšana atsebácanënga jtsemnama.

11

¹ Tšëngaftanga šmochtsiyena ntšamo atše sëndamcá jtsamëse, cach ntšamo atše sëndoyencá, ntšamo Cristo inetsamcá jtsamëse.

Ntšamo yomna shembásenga tšabá jtsemnama, ošbuachiyéngcá tmojénefjna ora

² Atše séntseboše tšéngaftanga jáuyanana tšabá šmojama ca, tšéngaftanga nýetsca soyénguife atšbiamá šmnétsenojuabnama, y tšéngaftanga šmojtsabuátambama y šmojtsamama ntšamo tčbonjanabuatambacá, cachá ntšamo atše sénéjftsanboshjoncá. ³ Pero atše séntseboše tšéngaftanga chacmésertá: nda nýetsca entšanga iuaménda cha, Cristo endména; y nda shémbioye ibománda cha, boyá endména; y nda Crístbioye ibománda chana, Běngbe Bětsá endména. ⁴ Nderado canýe boyabása chabe bestšaše tojtsenátstotse, inýe ošbuáchiyéngaftaca cánýife Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana cachá chaotséuatjama, chabe bestšásēca chca tojama causa. ⁵ Pero nderado canýe shembása chabe bestšaše ndoñe tontsenátstotse, inýe ošbuáchiyéngaftaca cánýife Běngbe Bětsáftaca tbojtsencuénta ora o Běngbe Bětsabe juabna tojtsoyebuambná ora, cha jamana chama cachá chaotséuatjama; jtséuatjana mo cha lempe jshetětšená cuaftsemncá. ⁶ Er, nderado canýe shembása ndocna te tontseboše chabe bestšaše jtsenátstotsana, chabiamá más tšabá nántsemna lempe chaotsenójshetětše. Pero tojtsejuabná utstotjená o chca lempe jshetětšená jtsemnama cha yochtséuatja ca, as chabe bestšaše chaotsenátstotse. ⁷ Boyabása ndoñe quebnátsména chabe bestšaše jtsenátstotsana, er Běngbe Bětsá tojanma ntšamo cachá yomncá cha chaotsemnama, y chě boyabása chca jtsemnēse, jtsinýanýnáyana Běngbe Bětsá chabe mandayá yomnama. Pero ntšamo chě shembása yomncá, jtsinýanýnáyana chě boyabása chabe mandayá yomnama; ⁸ er Běngbe Bětsá, boyabása ndoñe tbonjanma shembásabentšana, ndayá shembása boyabásabentšana. ⁹ Y Běngbe Bětsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰ Chíyeca, y chca jamama angelénga tšabá jtsinýanánayeca, shembása jtsemnana chabe bestšaše chaotsenátstotsama, chca, chaotsinýnama inýa chábeñe yomándama. ¹¹ Pero, Běngbe Utabnábeñe ošbuachiyéngcá jtsiyenamna, boyabásenga y shembásenga cachá jtseiyētánana. ¹² Er masque Běngbe Bětsá, shembása boyabásabentšana tbojanma, mora, shembásabentšana boyabása jóbocnana; y lempe Běngbe Bětsábiocana endóbocana.

¹³ Cach tšéngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canýe shembásabiamá Běngbe Bětsáftaca jencuéntana, bestšaše ntsenatsbotscá. ¹⁴ Ntšamo entšanga sempre mondbetsejuabnáyca, ndayá tšabá bétsemnama, běngbioye jtsabuátambayana, boyabása bēn stjēnēsha chabuájuama tojalesenciase, cha jamana cachá chama chaotséuatjama. ¹⁵ Pero shembásabiamna, chě bēn stjēnēsha jtsinýanýnáyana chabe botamanana y uámanana, er Běngbe Bětsá tojanma shembása bēn stjēnēsha chaotsábomnama, chca, cha chaotsebomna ndáyeca chabe bestšaše jtsenátstotsama. ¹⁶ Masque ntšámncá, ndánaca tojtseboše quem soyama más jatóyebuambayama, cha bontsemna jtsetatšēmbuana, ni bēnga, ni Běngbe Bětsábeñe ošbuachiyéngcá enefjuanénga queftsatsleséncia chca ndoñe chaondétsemnama.

Běngbe Utabnabiamá jtenójuaboyama jasama ora, chénga ndoñe tšabá imonjánama

17 Mora cbochanjaménda soyënguïñe atse ndoñe quetsátobena tsëngaftanga jáuyanana tsabá šmojama ca, er tsëngaftanga Crístbeñe ošbuachiyëngcá šmojënefna ora, Bëngbe Bëtsá jadórama, atse sontsinýana chë soye yojtsošervena tsëngaftanga más bacá chašmotsemnama, y ndoñe tsëngaftangbe tsabiama. 18 Natsana cbochjáuyana, atse sënjouena tsëngaftanga ošbuachiyëngcá šmojënefna ora, báseftanga canýe soye innésejuabnaye y ínýengna inýetsá ca, y atse sëntsejuabná batšana ndegombre chca yojtsemna ca. 19 Ndegombre jtseytana tsëngaftangbeñe chamotsemna báseftanga canýe soye juabnayënga y ínýengna inýetsá, chca, nýetscanga chamotsetatsëmbuama ndëmuanyënga imojtsemna chë Bëngbe Bëtsá tojayana chënga tsabá tmojama ca. 20 Tsëngaftanga tandëse jasama y vínoye jofšiyama šmojënefna ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tsëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiama jtenójuaboyama jasama ora; 21 er chë jasama tojobuache ora, cada ona inóntša jasama ndayá tojiyëbcá, y ndoñe ntjatóbátmanana nýetscanga ndayánaca jasama chamotsehomnëntscuana; báseftanga shëntseca joquédana, y ínýengna tša jéftsesana y jofšiyana jéftšótmenantscuana. 22 ¿Tsëngaftanga ndoñe yebna šmondobomna ndayentše jasama y jofšiyama? ¿Ndáyeca tsëngaftanga šmojtsejuabná chë imménefna ošbuáchiyënga nduámanënga imomna ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tsëngaftanga šmojtsejuabná atse cbochjáuyana tsabá šmojama ca, chë Bëngbe Utabnabiama jasama ora chca šmojamama? ¡Ndegombre ndoñe!

Bëngbe Utabnabiama jtenójuaboyama saná

(Mt 26.26-29; Mc 14.22-25; Lc 22.14-20)

23 Er atse cach Bëngbe Utabná bentšana ntšamo cbontsbuatëmbacá sënjanóyëngacñe: Bëngbe Utabná cach uayayëngbe cucuatšične tmojánboshjona íbeta, tandëse tojanca, 24 Bëngbe Bëtsábíoye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tsëngaftangbe tsabiama chanjóbana. Ntšamo mora montsamcá šmochtsama, atšbiama jtenójuaboyama ca.” 25 Cachcá, chë saná tmojansentšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tsëngaftanga chašmotsetatsëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšësná ora, chca šmochjama atšbiama jtenójuaboyama ca.” 26 Er tsëngaftanga cada quemëntša tandëse chašmojtšesá ora y quem coptementšaycá chašmojtsofšësná ora, Bëngbe Utabná chaojésabëntscuana tsëngaftanga šmochántsinýanýnaye cha entšangbiama tojanóbanama.

Ntšamo yomna jamana, Bëngbe Utabnabiama jtenójuaboyama jasama ora

27 Chcasna, Bëngbe Utabnabiama jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiama Bëngbe Bëtsá jayanana cha puerta bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buiñe chabiama tondaye yonduámanama. 28 Chýeca, entsemna cada ona corente chauenojuabó jtsetatsëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. 29 Er nderado nda tojase y tojofšé, chë Bëngbe

Utabnabiamama jtenójuaboyama jasama ora, cach Bèngbe Utabnabe cuerpo yomnama ntjajuaboycá, cha chë sóyeca jamana Bèngbe Bètsá chabotsecastigama. ³⁰ Chiyeca, banga tsèngaftanguentsènga soquènga šmojtsemna, inyènga añemo ndbomnènga, y inyèngna ndoñe nye bàseftanga tmojóbana. ³¹ Pero bènga corente tmojajuabó jtsetatšèmbuama aiñe o ndoñe montseprontana ntšamo suamncá jasama y jofšiyama, cabá ndèse y ndofšé ora; chca, Bèngbe Bètsá ndoñe buántsemna bènga játaçastigana, ntšamo tsábá yomncá ndoñe tmonjase causa. ³² Pero, Bèngbe Utabná castígoca chca šojabuayená ora, jtsemnana bènga más tsábá jtšamama chamuatsjinýama, y chca, bayté chentšana, Bèngbe Bètsá ndoñe chabondètsemna játayanana bènga šojtsamna nyetsca tescama castigánènga jtsemnana ca, canýiñe chë nye quem luarama enójuabnaye entšàngaftaca.

³³ Chca, Jesucristbeyeca atšbe catšátanga, tsèngaftanga chë Bèngbe Utabnabiamama saná jasama chašmojënefjna ora, canýiñe nyetscanga šmochjabojátša. ³⁴ Y nderado nda tbojtseshèntšana, cachabe yebnoca chauétsese, chca, Bèngbe Bètsá ndoñe chabondètsemna tsèngaftanga jácastigana chora ndoñe tsábá šmonjama causa. Chë inye soyèngama ndayama tsèngaftanga šmonjatjá, chamna chanjamánda tsèngaftanga jányama chaijá ora.

12

Bèngbe Bètsabe tšetana obenana, tsabe soyènga jamama

¹ Jesucristbeyeca atšbe catšátanga, atše sèntseboše tsèngaftanga chašmotsetátšèmbu Bèngbe Bètsabe tšetana obenanama tsabe soyènga jamama, Crístbeñe ošbuáchiyènga jujabuáchama.

² Tsèngaftanga smondétatšèmbu, tsèngaftanga Crístbeñe ndošbuáchiyènga šmonjamna ora, inyènga cmonjanabuatamba soyènga, y chora tsèngaftanga šmonjamna inýabeyeca uasjanèngcá, cach entšangbe pormana soyènga mo diosènga cuaftsemncá jadórama; y chë soyèngna ni mo jóyebuambayama ntšobenana. ³ Chiyeca, atše mora sèntseboše tsèngaftanga chašmotsetátšèmbu, ndocná ntšobenana jayanana: “Jesús ndoñe chë Cristo quenátsmèna, ni Bèngbe Utabná ca”, chë Bèngbe Bètsabe Espíritbe obenánaca cha tojtsóyebuambnase. Y cach ndocná ntšobenana jayanana: “Jesús Bèngbe Utabná endmèna ca”, chë Bèngbe Bètsabe Espíritbe obenánaca cha ndoñe tontsóyebuambnase.

⁴ Espíritu jamana bènga ndoñe chamondètse bomnana cachca tšetana obenana tsabe soyènga jamama, pero lempe jobayana cach canýe Espíritbeyeca. ⁵ Bènga, Bèngbe Bètsá mondèservena, nyetsca soyènguiñe jtsetrabájayèse, pero cach Utabná nyèts chë trabajènga šojabanýé. ⁶ Nyetsca soyènga Bèngbe Bètsabe obenánaca fsèndbètsama, pero cach Bèngbe Bètsá endmèna nda inétsama bènga chë soyènga jamama obenana chamotse bomnana. ⁷ Bèngbe Bètsá inétsama cada ošbuachiyá chaotse bomnana canýe tšetana obenana tsabe soyènga jamama, y chë soye jtsinýanýnayana Bèngbe Bètsabe Espíritu chabe ainaniñe yomnama; y chë tšetana obenana jtsemnana nyetscangbe tsábiamama. ⁸ Bèngbe Bètsá, Espíritbeyeca, canýa obenana jatštayana puerte osertanánaca chaóyebuambama, y inýana obenana cach Espíritbeyeca ndayámnaca corente jtsetatšèmbèse chaóyebuambama; ⁹ inýana cach Espíritbeyeca, obenana Crístbeñe puerte chaotsošbuáchema, y inýabiamna, cach nye canýe Espíritbeyeca, obenana jatštayana soquènga jáshnama; ¹⁰ inýana, obenana tsabe soyènga

Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtšichamcá, y ínÿengna chama jábuayenama. ¹¹ Pero cach Espiritu, chë nÿe canÿe Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

Nÿetsca ošbuáchiyënga cánÿiñe, mo Cristbe cuerpcá jtsemnana

¹² Cuerpo nÿe canÿe soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nÿe canÿe cuerpo jtsemnana. Bëngaftácnaca cachcá. Bënga banga mondmëna nÿetscanga Cristbeñe ošbuáchiyënga, pero Cristbeyeca, bënga cánÿiñe mo canÿacá jtsemnana. ¹³ Er bënga nÿetscanga, judiënga o ndoñe judiënga, nÿe ínÿabiana nÿets tempo oservénënga o cachëngbiana trabájayënga šojanëbaye, Cristoftaca cánÿiñe mo canÿacá, jtsemnana mo chabe cuerpcá, y chca yomna cach Espiritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

¹⁴ Cachcá, canÿe cuerpo ndoñe nÿe canÿe soye ntsebomnana, ndayá ba soyënga. ¹⁵ Nderado shecuatše tojayana: “Cucuatše ndoñe quetsásmëna causa, atše cuerpentša soye ndoñe quetsásmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. ¹⁶ Nderado matscuaše tojayana: “Bominÿe ndoñe quetsásmëna causa, atše cuerpentša soye ndoñe quetsásmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. ¹⁷ Nÿets cuerpo bominÿe tojtsemnëse, bënga ndoñe muantšobena joudenama. Y nÿets cuerpo matscuaše tojtsemnëse, bënga ndoñe muanjobenaye jonguëtsetšiyana. ¹⁸ Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. ¹⁹ Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. ²⁰ Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

²¹ Bominÿe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”.

²² Inÿetšá, chë cuerpentša soyënga, chë tojtšinÿana mo obenana ndbomna y nduámana soyëngcá, jtsemnana chë cuerpama más iyta soyënga. ²³ Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtÿëse. Y chë cuerpentša soyënga, ndayama bënga jtsëuatjana Inÿenga chamotsonÿama, bënga jamana Inÿenga ndoñe chamondëtsonÿama, chiñe entšayaca jtichëtÿëse.

²⁴ Pero chë cuerpentša soyëngaca, chë nÿetscanga jtsonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtšinÿenama.

²⁵ Cha chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiana. ²⁶ Nderado canÿe cuerpentša soyama bacna soye tojopasá, chora nÿetsca chë cuerpentša soyëngámncaca chca ndoñe tšabe soye jtsebínÿana; pero canÿe cuerpentša soyama tcojama más uámana

soye chaotsemnana o ndaye tšabe soye tojopasase, chora n̄yetsca ch̄e cuerpentša soyëngám̄naca chca tšabe soye jtsebín̄yana.

²⁷ Cachcá, tšëngaftanga Crístbeñe ošbuáchiyënga, cháftaca cán̄yíñe mo can̄yácá jtsemnëse, mo chabe cuerpcá jtsemnana, y cada ona tšëngaftanguentsá mo ch̄e cuerpentša soyëngcá, jtsemnana mo chabe cuerpentša soyëngcá. ²⁸ Ntšamo Bëngbe Bëtsá cuerpentše soyënga tojancjá ndayentsë inabošcá, cachcá, ošbuachiyëngcá nefjuanëngbeñe Bëngbe Bëtsá tojubuáyana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiana abuátambayënga, chorna ch̄e b̄ets soyënga Bëngbe Bëtsabe obenánaca jamama obenana bomnënga, ch̄e šoquënga jáshnama obenana bomnënga, ch̄e ín̄yëngbioye puerte ujabuáchanënga, ch̄e ín̄yë ošbuachiyëngbioye amëndayënga, y ch̄e n̄yetsca biyañe jtsóyebuambnayama obenana bomnënga, tempo ndmabiyañe. ²⁹ Ndegombre, ošbuachiyëngcá nefjuanëngbeñe n̄yetscanga ndoñe Jesucristbe ichmónënga ntsemnana, n̄yetscanga ndoñe Bëngbe Bëtsabe juabna oyebuambnayënga, n̄yetscanga ndoñe abuátambayënga, n̄yetscanga ndoñe Bëngbe Bëtsabe obenana bomnënga, b̄ets soyënga jamama. ³⁰ N̄yetscanga ndoñe šoquënga jáshnama obenana bomnënga; n̄yetscanga ndoñe n̄yetsca biyañe jtsóyebuambnayama obenana bomnënga, tempo ndmabiyañe; ni n̄yetscanga biyañe obenana bomnënga quemátsmëna, ch̄e tempo ndmabiyañe n̄yetsca biyañe jtsóyebuambnayama obenana bomnënga ntšamo tmojtsichamcá josértama y ín̄yëngbioye chama jtsabuayiyayama. ³¹ Pero tšëngaftangna puerte šmochtseboše, lempe ntšamo chašmojobenacá šmochjama, ch̄e Bëngbe Bëtsabe más uámana tšetana obenana jëftsashjáchama.

Bonshánana jtsebo mnana

Y ín̄yë soye más, atše cbochanjín̄yan̄yíye ntšamo šmojtsobena cabá más tšabá jtsiyenana, Bëngbe Bëtsá jtsebo mnana.

13

¹ Nderado atše stjóyebuambaye entsangbe biyañe y angelëngbe biyañe, pero ín̄yëngbioye ndoñe sentsababuán̄yeshanëse, atše stsemna can̄ya tondayama uamaná, mo n̄yë can̄yë metalëshe tojtsenanacá, o mo n̄yë can̄yë platillëshcá ndoñe tšabá tontsenanëshe. ² Y atše obenana stsebo mnana Bëngbe Bëtsabe juabna jóyebuambayama y n̄yetsca soyëngama, y ch̄e Bëngbe Bëtsá tempo entsanga ndoñe tonjanin̄yan̄yé soyënga šojtsésertana, y Bëngbe Bëtsabe n̄yetsca soyëngama stsetátšëmbo, y Crístbeñe puerte stjesošbuáchiye, chca betsošbuáchema n̄ya mo ch̄e tjashënga chamobonjoma jamama, pero ín̄yënga ndoñe sentsababuán̄yeshanëna, atše tondaye sëntsemna. ³ Y atše lempe ntšamo stsebo mnacá ndbomnëjémënga stsëjátaye, y ín̄yëngbioye stjenontrëga atšbe cuerpo chamojuin̄yema, pero ín̄yëngbioye ndoñe sentsababuán̄yeshanëse, atše ndocna uámana soye ntjashjáchana.

⁴ Can̄yë entsá ín̄yënga ababuan̄yeshaná, uantado jtsemnana masque padecena soyënguiñe tmojtsemna órnaca, y ín̄yëngaftaca tšabe ainánaca mando jtsebo mnana. In̄yënga ababuan̄yeshaná ndoñe ntsántšabošana ntšamo in̄ya tojatsbomncá, ni ntsenábotamayana, ni cachá ch̄e ín̄yëngbiama más uamaná ntjatenobiamayana; ⁵ ndoñe bacá mandbomná ín̄yëngaftaca ntsemnana, ni n̄yets tempo ntsebošana y lempe jtsamana n̄yë chabiana tšabe soye jón̄yënama; cha n̄yë ndayám̄naca ndoñe ntjetnana, ntšamo ín̄yënga tmojaborlá

ora jtsaperdónayana. ⁶ Inyenga ababuanyeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aññe. ⁷ Inyenga ababuanyeshaná, ainaniñe añemo jtsebomnana nyetsca padecena soyënguñe, lempe ntšamo más tšabá yomna soyënguñe jtsošbuáchiyana, nyetsca más tšabá yomna soyëngama jtsobátmanana, y jtsóboyayana nyetsca toto soyënga.

⁸ Bonshánana nyetsca tescama jëftsemnana. Canye te echántsemna, chora chë Uámana Espíritu ndoñe más queochátama entsanga Bëngbe Bëtsabe juabna chamotsóyeuambnana, ni chë ndocna te ndmabiyañe chamotsóyeuambnana, ni chë puerte jtsetatšëmbëse jóyeuambayama obenana chamotsebomnana; ⁹ er ntšamo mora bënga imotatšëmbcá y Bëngbe Bëtsabe juábnaca jóyeuambayëse tmojayana soyënga, nye batšatema bëngbiöye jtsinýanýnaya Bëngbe Bëtsabe soyëngama, ndoñe lempe; ¹⁰ pero Jesucristo chaojésabo ora, y chaojama bënga chamotsemna lempe ntšamo Bëngbe Bëtsá bëngbiama yojanjuabnacá, quem soyënga, chë nye batšatema bëngbiöye jtsinýanýnaya Bëngbe Bëtsabe soyëngama, ya ndoñe más queochátsbinýna.

¹¹ Atšë basetema ora, sënjanoyebuambná, sënjanjuabná, y soyëngama tšabá jtsetatšëmbuamna sënjanjuabná mo canye basetemcá; pero bëtsá sënjanóbema orna, séntsanajbaná lempe amana mo canye basetemcá. ¹² Cachcá, mora bënga quem luarentše nye batšatema Bëngbe Bëtsabe soyëngama jtsetatšëmbuana, mo canye espejuñe tmojtsonýacá, pero ndoñe nya corente tšabá. Pero canye te bënga mochántsetatšëmbo lempe nyetsca soyëngama, bënga Bëngbe Bëtsabe delante chamojtsemna ora. Mora atšë séntsetatšëmo nye batšatema Bëngbe Bëtsabe soyëngama, pero chora lempe chanjuábuatmana, ntšamo Bëngbe Bëtsá corente šuabuamtcá.

¹³ Pero morna, Bëngbe Bëtsabeñe jtsošbuáchiyana, chábeñe jtsobátmanana, y chábiöye y ínýëngbiöye jtsababuányeshanana, chë soyëngna nyetsca tescama jëftsemnana; pero chentšana chë más uámana soye endmëna ínýenga jtsababuányeshanana.

14

Ndmabiyañe obenana Bëngbe Bëtsabe tšetánana

¹ Bëtscá šmochtšama nyetscanga jtsababuányeshanëse chašmotsiyenama, y puerte šmochtseboše jtsebomnana chë Bëngbe Bëtsabe tšetana obenana tšabe soyënga jamama; pero chentšana masna, chë Bëngbe Bëtsabe juabna jóyeuambayama obenana. ² Er chë tempo ndmabiyañe mora jóyeuambayama obenana bomná, Bëngbe Bëtsábíöye jtsatsëtsnayana y ndoñe entšángbiöye, er ndegombre entšanguentše ntšamo cha tojtsoyeuambnacá ndocná ntjosértana; chana chabe espíritofaca jtsóyeuambnayana y ndoñe nye chabe juábnaca, chë tempo Bëngbe Bëtsá ndocna entšábíöye tbonjaninýinýe soyëngama. ³ Pero chë Bëngbe Bëtsabe juabna oyeuambnayana entsanga jtsëtsëtsnayana, chënga más chamotsóšbuáchema y ainaniñe añemo chamotsebomnana, Bëngbe Bëtsabe soyëngama jábuayenama, y jamama padecena soyënguñe tmojtsemna órnaca añemo chamotsebomnana. ⁴ Chë tempo ndmabiyañe mora jóyeuambayama obenana bomná, jtsamana nye cha más jtsošbuáchiyama y ainaniñe añemo jtsebomnana; pero chë Bëngbe Bëtsabe juabna oyeuambnayana jtsamana chë ošbuachiyëngcá enefjuanënga chca soyënga chamotsebomnana.

⁵ Atše sêntseboše nyetsca tsêngaftanga chê tempo ndoñe şmonjanbiyañe mora jóyebuambayama obenana chaşmotseboşnama, pero chama atše más sêntseboše tsêngaftanga chê Bêngbe Bêtsabe juábnaca soyênga chaşmotsóyebuambnama. Chê Bêngbe Bêtsabe juábnaca soyênga oyebuambnaya más uamaná jtsemnana chê inye biyañe oyebuambnaya; chca ndoñe nântsemna, ntşamo canye biyañe tojayancá chê biyañe oyebuambnaya tbojtsêsertánese y chê oşbuachiyêngcá enefjuanênga tojúbuayenase, y chca, chê soyênga tmojouenama, chênga chamotsobena más jtsoşbuáchiyama y añemo jtseboşnama. ⁶ Y mora, Jesucristbeyeca atşbe catşátanga, atše nderado tcojúbuache y nye inye biyañe tcojúauyanêse, ¿chca ntşamo cbatjúbuache? Atše jtsoobenana jujabuáchana, nye ntşamo chê biyañe tijayancá átşnaca şojsêsertánese, y ndayá Bêngbe Bêtsá şojinÿinÿecá entşanga jábuayenama stjobenase, chê Bêngbe Bêtsá tojama atše jtsetatşêmbuama soye, chê Bêngbe Bêtsabe juábnaca stsoyebuambná soye o chê tsêngaftanga jabuátambama cha yoboşe soye.

⁷ Entşanga monduamana ndayánaca juéanana, mo flautêja o arpa, vida ndobomna soyênga; cada sóyeca inÿetşá juéanama ndoñe tontsopodênese, ndocná nantsobena jtsetatşêmbuama ndayá canya chê soyêngaca yojséanama. ⁸ Y nderado nda trompetêjua tojuájatêta ora, soldadênga japéliama chamoprontama, chê uajatêtaná inÿetşá, nya chama ndoñe tonjuájatêtese, ndocná buanjósêta y jempéliama ndoñe nanjopróna. ⁹ Tsêngaftangaftácnaca cachcá jtsopasánana. Inÿenga paselo josêrtama jobenaycnana tsêngaftanga ndoñe şmonjóyebuambase, ndocná queochátstatşêmbo ntşamo şmojtsichamcá. Nântsemna mo nye cânÿenga cauftsoyebuambnacá. ¹⁰ Atše sêntsejuabná, ndegombre quem luarentşe ba inye biyañe entşanga imnêtsoyebuambnayana, y ndaye biyáñnaca tmojoyebuambá ora, sempre jtsemnana ínÿenga ntşamo chênga tmojtsichamcá osertánênga. ¹¹ Pero ntşamo inya chabe biyañe şojauyancá atše ndoñe şontsêsertánese, atše stsemna canye chabiama ndosertana biyañe oyebuambnaya, y chánaca cachcá atşbiama. ¹² Chcasna, chê Uámana Espiritu şondinÿanÿná obenana jtseboşnama tsêngaftanga puerte şmobóseyeca, lempe ntşamo şmojobenacá şmochtsama chca tşetana obenana jóyêngacfiama, chê oşbuachiyênga más jtsoşbuáchiyama y añemo jtseboşnama inétsama obenana.

¹³ Chiyeca, chê tempo ndmabiyañe mora jóyebuambayama obenana tojtseboşná, Bêngbe Bêtsá chabotseimpadana, cha chaoma ntşamo chê inye biyañe tojayancá chabosertama y oşbuáchiyênga jábuayenama obenana chaotseboşnama. ¹⁴ Pero atše Bêngbe Bêtsáftaca stjencuênta, chê ndmabiyañe jóyebuambayama cha obenana şojanatşetacá jtsóyebuambnayêse, atşbe espiritu cháftaca nantsóyebuambnaye, pero atşbe juabna ndoñe ntsetatşêmbuana ntşamo chê espiritu tojtsoyebuambnacá. ¹⁵ Y asna, ¿ntşamo atše chtsemana? Bêngbe Bêtsáftaca chanjencuênta atşbe espíritoca, pero ntşamo stschámuama jtsejuabnayéşnaca. Bêngbe Bêtsá jêtschuayama chanjavérsia atşbe espíritoca, pero chca chanjama chíñnaca jtsejuabnayêse. ¹⁶ Nderado aca Bêngbe Bêtsá cojtsatschuaná nye espíritoca, y canya quem Bêngbe Bêtsabe tşetana obenana ndosertaná tmojoyeunase, cha ndoñe ntsoobenana jayanana “chca chaotsemna ca”, cach aquêcá cha yojtsejuabnama jinÿinÿiyama, er ntşamo cojtsichamcá cha ndoñe ntsêsertánana. ¹⁷ Aca jtsoobenana chca puerte tşabá Bêngbe Bêtsá jêtschuayana, pero ntşamo tcojtsamcá ndoñe ntjamana inya

ndaye tšabe soye chaotsebomnama. ¹⁸ Atše, Bëngbe Bëtsá sentsatschuaná inye biyañe jóyebuambayama tšëngaftangbiana más tsobenama; ¹⁹ pero Cristbeñe ošbuachiyëngcá tmojënefna ora, atše más sëndbétseboše nye mo shachna palabratémnaca jóyebuambayana, chënga añe cataffosertacá, chca, ínÿenga jabuátambama, y ndoñe bnëtsana uaranga palabrenga jatóyebuambayana inye biyañe, chënga chaósertama ndoñe tontsopodëse.

²⁰ Jesucristbeyeca atšbe catsátanga, šmochtsajbaná basetemëngcá juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsëtsangcá tšabá šmochtsejuabnaye. ²¹ Bëngbe Bëtsabe uabemana palabrenguñe, Bëngbe Utabná mëntsá tojánayana:

Atše quem entsángbioye chanjáuyana,

ínÿenga inye luarëngocana ashjajnëngaftaca, chëngbiana canye ndosertana biyañe oyeuambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

²² Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinÿanÿiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinÿanÿiyama, y chábeñe ndošbuachiyëngbioyna ndoñe. ²³ Er tšëngaftanga nyëtscanga ošbuachiyëngcá šmojënefna ora, nyëtscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboje tšëngaftanga opënga šmojtsóbema ca. ²⁴ Pero nyëtscanga tmojtsichamo, Bëngbe Bëtsabe juábna jtsóyebuambnayëse, y choye tojámashëngo canya Bëngbe Bëtsábeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosërta; y chë soye cha bochanjayëñjaná cha bacna soyënga tojamama, y ndayá cha tojamiñe corente echántsejuabnaye, ntšamo nyëtscanga tmojtsichámua. ²⁵ Y Bëngbe Bëtsá chábioye bochanjinÿinÿiye ntšamo cha ainaniñe tojajuabó y tojabošencá, ndayá ndocnábioye tbonjinÿinÿecá, y cha echanjoshëntsamentšiyë Bëngbe Bëtsá jadórama, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

Ošbuachiyëngcá šmojënefna ora, ntšamo tšabá yomncá lempe šmochtsama

²⁶ Chcasna, Jesucristbeyeca atšbe catsátanga, šmojënefna ora, cada ona ndayánaca jtsebomnana nyëtscangbiana: ínÿengna jtsobenana javërsiama, Bëngbe Bëtsá jëtschuayama, ínÿengna jtsobenana jabuátambana o jábuayenama ndayá Bëngbe Bëtsá tojinÿanÿecá, o tempo ndmabiyañe chora jtsóyebuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuachiyënga más chamotsošbuáchema y más añemo chamotsebomnama Cristo jasérviana. ²⁷ Nderado inye biyañe jóyebuambayama tojtsemnëse, útata o nya másese únganga chca chamoyebuambá, y canyánÿa; y jtseytana ndánaca ntšamo tmojtsichamcá chabosertá y nyëtscanga chama chauabuayená. ²⁸ Y chca chabosertama y nyëtscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefna ora chë chca oyeuambnayá bontsemna ndoñe chca biyañe ntsóyebuambnayana, sinó nye canya tojtsemna ora cha jtsobenana chca Bëngbe Bëtsáftaca jencuëntana. ²⁹ Utata o únganga

entsamna jayanana soyënga, Bëngbe Bëtsabe juábnaca jtsóyebuambnayëse; y chë ínÿenga jtsamnana botamana jajuaboyana y jayanana ntšamo chënga tmojayancá aïñe o ndoñe Bëngbe Bëtsábíocana tayojsóbocanama. ³⁰ Pero canÿa Bëngbe Bëtsabe juabna tojtsóyebuambnantscuana, inÿa chentše ouenana tbeanábíoye Bëngbe Bëtsá tbojinÿinÿé ndayánaca yojtsebomna jayanama, as chë natsana oyebuambnayá iytëca chaóbema, y chabolesenciá chë inÿa chaóyebuambama. ³¹ Chca, nÿetscanga, canÿánÿa jtsobenana jayanana soyënga, Bëngbe Bëtsabe juábnaca jtsóyebuambnayëse, nÿetscanga chamuatsjinÿama y nÿetscanga añemo jatšatayama. ³² Chë Bëngbe Bëtsabe juabna oyebuambnayá endobena jtsemándayana ntšamo tojtsichamcá, cha cachabe espritoca tojtsoyebuambná ora; ³³ er Bëngbe Bëtsá endmëna nda inétsama bënga natjëmbana chamotsiyenama, y ndoñe chë bënga nÿetscanga cachcá ndoñe chamondëtsejuabnana, y nÿe ntšamo cada ona tojtsebošcá chaotsamama.

Ntšamo nÿets luarënguenache, chë ošbuáchiyënga, chë Bëngbe Bëtsabe entšanga mondbénéfjna luarënguenache endbetsemncá, ³⁴ tšëngaftangbéntšnaca, shembásenga entsamna iytëca jobiamëngana, ošbuachiyëngcá šmojënéfjna ora, er ndoñe quenátslesenciana chënga chora chamuátoyebuambnama, y aïñe chënga entsamna chëngbe boyanga jtsayaunanana, ntšamo Moisesbe leyinë endayancá. ³⁵ Chënga ndayánaca jtsetatšëmbuama tmojtsebošëse, cachëngbe boyángbíoje yebnoca chamotjanga; er ndoñe corente tšabá ntsemnana canÿe shembása jtsóyebuambnayana tšëngaftanga ošbuachiyëngcá šmojënéfjna ora.

³⁶ ¿Tšëngaftanga šmojatsjuabná, Bëngbe Bëtsabe tšabe noticiënga tšëngaftangbeñe tojanobojatšé ca, o nÿe tšëngaftanga chë soyënga šmojanóyëngacñe ca? Ndegombre ndoñe chca; chíyeca tšëngaftanga nÿe cánÿenga ndoñe ntsoebenana jayanama ndayá jamama cmojtsamnana. ³⁷ Nda tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jtsetatšëmbuana, ntšamo Bëngbe Utabná šojamandacá atše stsabiamnana. ³⁸ Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayancá ndoñe šmatjójyëngacñe.

³⁹ Chcasna, Jesucrístbeyeca atšbe catšátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnana, y ndoñe šmattsama chë tempo ndmabiyañe inÿenga ndoñe chamondëtsoyebuambnama; ⁴⁰ pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

15

Cristo tojtayanenama

¹ Morna, Jesucrístbeyeca atšbe catšátanga, atše sëntseboše tšëngaftanga chašmuatenójuaboma atše tbonjanabuayená tšabe noticiënguiñe, ndayá tšëngaftanga šmonjanóyëngacñe, chë ndáyeca tšëngaftanga Jesucrístbeñe šmojtsošbuaché y cha jtseservénëse šmojtsiyena. ² Chca šmobómnyeyeca, tšëngaftanga atsebácanënga šmojtsemna, pero tšëngaftanga sempre chíñe šmojtsošbuachese, ntšamo cbonjanabuayinacá; chca ndoñesna, nÿe ndoñe corente tšabá ntjajuaboycá chë buayenana soyënguiñe šmojtsanošbuaché.

³ Er atše tšëngaftangbeñe sënjëftsanboshjona, Bëngbe Bëtsábíocana atše tijanóyëngacñe más uámana buatëmbana soyënga. Atše tconjabuatambá:

Cristo tojanóbana bēnga bacna soyēnga tmojamama, ntšamo Bēngbe Bētsabe uabemana palabrénguīñe chabe juabna oyebuambnayēnga chama tmojanayancá; ⁴ chē Cristo tmojanatbontsá y unga tianoye cha cháuatayenama Bēngbe Bētsá tojanmama, ntšamo Bēngbe Bētsabe uabemana palabrénguīñe chabe juabna oyebuambnayēnga chama tmojanayancá; ⁵ chē Pédrébioye tbojánebēbocnana, y chentsána chē bnētsana útata ca uabobáinēngbioynaca. ⁶ Chentsána mo shachna patsama más chábeñe ošbuáchiyēnga tojánebēbuacna, chēnga cánjēntse imojtsemna ora; chēnguentšanga banga cabá vida imotsóbomñe, masque báseftanga ya tmojóbana. ⁷ Chentsána Santiágbioye tbojánebēbocna, y chentsána njetsca chabe ichmónēngbioye.

⁸ Y chentsána átsnaca šonjánebébocna. Mo canye šešona cabá shbená tojonýnacá, Cristo chabe ichmoná šonjábema, chē tempo chama jopróntama ntešomncá, ndayēntscuana ínýenga cha tojanabuatambá. ⁹ Er atše sēndmēna chē más batšá uamaná Jesucristbe ichmónēngbeñe; y ni merecido taitatobuajoñe “chabe ichmoná ca” chašmotsábuuatmama, er atše tša sēnjánama Jesucristbeñe ošbuáchiyēnga chamotsesufrinama. ¹⁰ Pero Bēngbe Bētsá atšbe tšabiama yojanjuabná, y chíyeca atše mora tsmēna ntšamo sēndmēncá, y chabe tšabe juábna atšbiana jtsamana, ndoñe nýe bonamente quenátsmēna. Er atše más sēnjatrabajá, chē inýe Jesucristbe ichmónēngbiama; pero ndegombre atše ndoñe nýe canya chca chiyatsma, sinó masna Bēngbe Bētsá chē trabajo tojama, tšabe juabna atšbiana jtsebomñese. ¹¹ Ndayá más yojtsámama ndoñe quenátsmēna, atše o chēnga, Jesucristbe soyēngama abuyiynayañe más tojatrabajá, sinó ndayá chē soyēnga bēngbe buayenana soye yojtsemna, y tšēngaftanga chiñe šmojtsošbuaché.

Chē obanēnga cachiñe vida mochtsatsbomnana

¹² Pero bēngbe buayenana soye endmēna, Bēngbe Bētsá tojanma Cristo cháuatayenama; as čndáyeca básefta tšēngaftanga šmnétsichamo Bēngbe Bētsá ndoñe yochanjama chē mora obanēnga chámuatayenama ca? ¹³ Pero chca tojtsemna, chē obanēnga ndoñe mochántayenasna, Cristo cach ndoñe tontanayena; ¹⁴ y Cristo ndoñe matenjésayenēse, bēnga nýe bonamente chabiama fstsabuayiná, y tšēngaftanga nýe bonamente chábeñe šmojtsošbuaché. ¹⁵ Y canye más bēts soye: chca tojtsemnēsna, bēnga muanjábocna mo chē Bēngbe Bētsabiama soyēnga tmojinýe ca ichamēngcá, pero ndoñe ndegombre chca tontsemna; er bēnga fsēndbētsichamo, Cristo cháuatayenama Bēngbe Bētsá tojanma ca. Pero chē obanēnga ndoñe mochántayenasna, Bēngbe Bētsá ndoñe tonjanma Cristo cháuatayenama. ¹⁶ Pero chē obanēnga ndoñe mochántayenasna, Cristo cach ndoñe tontanayena. ¹⁷ Y Cristo cháuatayenama Bēngbe Bētsá ndoñe matēnjanmēse, tšēngaftanga nýe tondayama chábeñe šmojtsošbuaché; tšēngaftanga chē bacna soyēngama cabá ndoñe perdonánēnga šmontsemna. ¹⁸ Y chca, chē tmojanóbanēnga, Crístbeñe ošbuáchiyēnga, chēnga cach ndoñe chēngbe bacna soyēnguentšana atsebácanēnga quemochátsmēna, sinó njetsca tescama castigánēnga. ¹⁹ Bēnga tmojtsošbátmana Cristo bēngbiama tšabe soyēnga chaotsamama, pero chca nýe quem luarentše bēnga vida tmojtsebomñēntscuana, as bēnga njetscangbiama más muantsomerecena, njetscanga bēngbiama chaotsangmēnana.

²⁰ Pero chca ndoñe ndegombre quenátsmēna, er ndegombre Bēngbe Bētsá tojanma Cristo cháuatayenama. Mo chē uanatsena shajuancá, jtsinýanýnayana

más shajuanënga chentšana yochjóbcocnama, cachcá, Cristo tojtanayena ora, cha tojaninýanýé Bëngbe Bëtsá yochjanma ínýenga chábeñe ošbuáchiyënga chámuatayenama vida chamotsatsbomnama. ²¹ Chca, ndayá canýe entšá, Adán, tojanmama, nýetscanga jóbanama yojtsamna, cachcá, ntšamo inýe entšá, Cristo, tojanmama, Bëngbe Bëtsá yochjama entšanga chámuatayenama. ²² Er ntšamo, Adánbentšana entšanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nýetsca tescama yomna tšabe vida chënga chamotsebomnama. ²³ Pero Bëngbe Bëtsá jamana cada ona cháuatayenama nýa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nýetscanga chë Crístbe entšanga imomnënga. ²⁴ Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nýetsca mandadënga, mando y obenana bomnënga corente jtsayénjanayëse. ²⁵ Er Cristo bontsemna ínýenga mo reycá jtsamëndayana, chabe uayayënga chabe cucuatšíñe chamoquedama Bëngbe Bëtsá tojamëntscuana. ²⁶ Canýe uayayá inétsama entšanga jóbanama; pero Cristo último echanjama chabe obenana pronto chaotsopochocama. ²⁷ Er ntšamo Bëngbe Bëtsabe uabemana palabrénguiñe endayancá: “Bëngbe Bëtsá tojama Cristo nýetsca soyënguiñe chaotsemándama ca.” Pero “tojama Cristo nýetsca soyënguiñe chaotsemándama ca” tojayana ora, jtsopodénana puerte tšabá jinýama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nýetsca soyënguiñe chaotsemándama. ²⁸ Y Cristo nýetsca soyënguiñe chaojtsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nýetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobinýiñe.

²⁹ Inýetsánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? ³⁰ Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nýets tempo resjuíñe jtsajnama, Crístbiamá oservena causa? ³¹ Atšbiamá cada te resjo endmëna jóbanama. Jesucrístbeyeca atšbe catšátanga, atše séntsichamo, chca ndegombre yómnayeca, atše oyejuayá stsemna ca, mo Cristo Jesús Bëngbe Utabnabe canýe oservenacá, tšëngaftanga chábeñe šmojtsošbuáchemá. ³² Mo canýa tšátjaye bayëngaca tojtsentsjaná orcá, atšbiamá puerte resjo enjamna jóbanama, Efeso pueblaca; pero nýe chë entšanga mondbétsejuabnaye jéftsashjáchama soyënga jtsebošëse chca matsjammëse, ¿ndaye tšabe soye matëñjanóbocna, chca atšbiamá resjo jóbanama enjamna ora? Obanënga ndoñe mochántayenëšna, mochtsama ntšamo entšanga jayanana monduamancá: “¡Mochjase y mochjofšiyë, nderado yëfse muatjóbaná ca!”

³³ Ndoñe matenoíngñana. Ntšamo canýa tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.” ³⁴ Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentšë Bëngbe Bëtsabe soyënga ndoñe quešmatábuatma. Atše chca séntsichamo tšëngaftanga chašmotséuatjama.

Ntšamo chë obanënga mochtayena

³⁵ Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” ³⁶ ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebomnama. ³⁷ Ndayá tcojajecá ndoñe ntsemnana chë juábocnama matatema, ndayá nÿe chë meshe, trigo meshe o ndaye mata méshnaca jtsemnana. ³⁸ Pero Bëngbe Bëtsá jamana chë jénayentsana mata chauábocnama, ntšamo jamama cha tojajuabocá; y cha jamana cada jénayentsana canÿe mata chauábocnama, ntšamo chë jénayentsana chauábocnama tojtsemncá. ³⁹ Nÿetsca cuerpënga ndoñe cachcá ntsemnana. Entšanga canÿe cuerpo mondbomna, bayënga inÿe cuerpo, shloftšënga inÿe cuerpo, y beongna inÿe cuerpo. ⁴⁰ Chë celoca vida bomnënga inÿetsá jtsinÿnana, y chë quem luarentše vida bomnëngna inÿetsá. Però chë buashinÿinÿanana y botamanana ntšamo celoca vida bomnënga jtsinÿnancá, ndoñe cachcá ntsemnana chë quem luarentše vida bomnëngbe botamanancá. ⁴¹ Cachcá, shinÿe ndoñe quenátsbomna cachca buashinÿinÿana juashconcá, ni estrellëngcá; y estrellënguentše cach ndoñe cachcá ntsebuashinÿinÿanana.

⁴² Cachcá, chë obanënga chámuatayenama Bëngbe Bëtsá chaojama ora chamojtsebomna cuerpo, ndoñe queochátsmëna cachcá ntšamo quem luarentše imojaniyena ora imojëftsebomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, inÿenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántatsatbomna y ndocna te queochatopochóca. ⁴³ Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinÿinÿana y echantsámana. Bënga quem luarentše imoyenëntscuana imobomna cuerpo, nÿe batšá obenana jtsebomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. ⁴⁴ Quem luarentše imobomna cuerpo endmëna cam luarentše vida chaotsebomnama; pero bënga chámuatayenama chaojama ora, chë bënga mochtsebomna tsëm cuerpo, puerte chë Espíritbeyeca echántsemmandana. Canÿe cuerpo quem luarentše vida chaotsebomnama yómnyeca, canÿe cuerpëncá, jtsemnana celoca vida chaotsebomnama.

⁴⁵ Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entšá tbojanma chaotsainama ca.” Adánbentsana nÿetsca entšanga jabocanana, pero Crístbeyeca, Bëngbe Bëtsá tojama banga mo tsmëna entšangcá chamotsemnana; chca, Cristo jtsemnana mo chë ústonoye Adancá; pero Cristina canÿe espíritu endmëna, y chë espíritu jamana entšanga chë nÿetsca tescama yonna tsábe vida chamotsebomnama. ⁴⁶ Pero chë celoca nÿetsca tescama vida jtsebomnama cuerpna ndoñe natsana ntjóbcnana, ndayá chë quem luarentše vida jtsebomnama cuerpo; chentšana chë celoca vida jtsebomnama cuerpo. ⁴⁷ Bëngbe Bëtsá, chë natsana entšá tbojanma fshántseca, y chca, cha fshantsentsana tojánbocna; Cristina, mo entšángbentsana chë natsaná tsmacá bemanacá, celocana tojánbocna. ⁴⁸ Adánbentsana, chë natsana entšá, chë fshántseca tmojanmábentsana tmojábcnënga, ntšamo cha yojamncá jtsemnana. Cachcá, chë mo tsmëmangcá tojábiámëngna, Cristcá jtsemnana; Cristo nda celocana tojánabo.

⁴⁹ Ntšamo bēnga jtsinŷnana chē Bēngbe Bētsá fshántseca tbojánbema entšacá, cachcá bēngnaca mochtsinŷna ntšamo chē celocá yomnacá.

⁵⁰ Jesucristbeyeca atšbe catšátanga, atše chochjáuyana, nŷe quem luarentše vida jtsebomnama cuerpēngaca, bēnga ndoñe ntsobenana Bēngbe Bētsabe amēndayoye jamashēnguana; ni ndayá yochjopochóca soye, ntsobenana ndayá ndoñe yochanjopochóca soye jtsebomnana. ⁵¹ Smochjouena, atše canŷe soye chochanjáuyana, y chē soye Bēngbe Bētsá entšanga tempo ndoñe tonjaninŷanyé: Bēnga ošbuáchiyēnga nŷetscanga ndoñe quemochatóbana, pero Bēngbe Bētsá ŷochanjátrocaye mo tsmēmangcá. ⁵² Nŷe betesco, mo tcojofshetá y cachora tcojtafšnácá, quem luare ya jopochócama ora, canŷe ángel trompetēfjua chaojuátatēta ora, er chora trompetēfjua echanjuénana, Bēngbe Bētsá echanjama obanēnga chámuatayenama, nŷetsca tescama vida jtsebomnama; y bēnga, chē ainēnga mochtsemnēnga, cha ŷochanjátrocaye mo tsmēmangcá jtsemnana; ⁵³ er jtseytana Bēngbe Bētsá chaotrocá chē bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna te yochanjóbana soyiñe. ⁵⁴ Bēngbe Bētsá chca bēngaftaca chaojama ora, chē cha jatrócana ndayá bēngbeñe yochjopochocacá, ndocna te yochanjopochóca soyiñe, y ndayá bēngbeñe yochjobancá, ndocna te yochanjóbana soyiñe, chora echanjochnēngo ntšamo Bēngbe Bētsabe uabemana palabrenguñe chama endayancá: Bēngbe Bētsá tojayēnjaná chē entšanga chamóbanama endbētsama obenana; entšanga ndoñe más quemochatóbana ca.

⁵⁵ ¡Mora entšanga chamuatóbanama chaotsama obenana ya ndoñe quenátsmēna;

Bēngbe Bētsá chē obenana nŷetsca tescama tojayēnjaná ca!

⁵⁶ Entšanga bacna soyēnga tmojama causa, obenana endmēna entšanga jóbana chaotsamnama. Ndayá leyiñe iuayanama, entšá jtsetatšēmbuana ndayá yomna bacna soyēnga jamana, y chca tátšēmo causa, chca bacna soyēnga jamama juabnēngaca mandaná jtsemnana, y cabana, jóbana jtsemnana. ⁵⁷ ¡Pero Bēngbe Bētsá mochtsatschuanaye, bēnga mo ayēnjanayēngcá cha ŷojábiamama, er ya ndoñe ŷontsamna chca jtsemnana, chē Bēngbe Útabná Jesucristo bēngbiama tojanma sóyeca!

⁵⁸ Chíyeca, Jesucristbeyeca atšbe catšátanga, atšbe bonshánēnga, Jesucristbeñe sempre puerta ŷmochtsošbuáchiye y ndocna te ŷmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre ŷmochtsentšena bētscá jtsamana Bēngbe Útabnabiama trabájayiñe, er tšēngaftanga ŷmondētátšēmo, Bēngbe Útabnabiama trabájayiñe ndayá ŷmojamcá, ndocna te nŷe bonamente ntsemnana.

16

Jerusalenoca ošbuáchiyēngbiama crocenánama

¹ Mora chanjójeyebumbaye chē Jerusalenoca Bēngbe Bētsabe entšanga ndbomnējemēngbiama tšēngaftanga ŷmochjuíchmua crocenánama. Atše sēntseboše tšēngaftanga chca chašmoma ntšamo chē Galacia luaroca ošbuachiyēngcá enefjuanenache chama atše sēnjanabuayenacá. ² Cada tmengo, cmontsamna batšá crocénana jaluárana ntšamo chē semaniñe ŷmojonŷencá, y ŷmochtsejuabaye; chca atše choye chajá ora, ndoñe chacmondētsamna quem uajabótama chora crocénana játatbanayana. ³ Y

atše choye chajáshjango ora, Jerusalemoye chjichamuá chë tsëngaftanga mo tsábengcá šmojubuáyana entsanga, chë Jerusalemoca ošbuachiyëngbioye tsëngaftangbe crocénana chámuayentsbuachema, y tsbuanachangá chanjúyentsbuachiye ndayá imojtsamama chënga jábuayenama. ⁴ Y nderado, átsnaca chëngaftaca jama tsábá tojtsemnëse, chënga átsëftaca chamua.

Ntsamo Pablo yojanjuabná chë luarëngoye jama

⁵ Atše sëntsejuabná tsëngaftangbioye jama jautsëtsayama, Macedonia luarëjana chajachnëngüentsana, chentsa ošbuáchiyënga jaftsanyëse, er atše sëntsejuabná natsana Macedonia luaroye jëftsana. ⁶ Nderado baseftayté tsëngaftangbeñe chašuetsejetana, o nderádose nyëts uaftena tempo; as tsëngaftanga inye luaroye játama chašmuájabuachama, ndëmoye jama chašojtsemnoye. ⁷ Atše ndoñe quetsátsboše nye betscó tsëngaftanga jáftsanyana, er atše sëntsobátmana más bayté tsëngaftangbeñe jaftsemnana, Bëngbe Utabná chca šojalesenciase. ⁸ Pero Efesoca šochanjajétana Pentecostés fiesta chaojobuáchëntscuana. ⁹ Er Bëngbe Bëtsá tojama atše jobenayama muentše chë tsábe noticiëngama banga jábuayenama, y chíyeca banga Cristbeñe montsošbuachë; pero bángnaca atšbe contra montsemna.

¹⁰ Timoteo tsëngaftangbioye chaojase, yejuana šmochtsantješna cha tondayama chaondëtsauatjama, tsëngaftangbeñe tojtsemnëntscuana, er cha Bëngbe Utabnabiana endëtrabája, ntsamo atše sëndamcá. ¹¹ Chcasna, ndocná chábioye chabondëtsábøyënja. Bëtscá šmochjama cha natjëmbana átsbioye chauatábama, er atše cha sëntsobátmana, chë ín'yënga muentše Cristbeñe ošbuáchiyëngaftaca.

¹² Y Jesucristbeyeca bëngbe catšata Apólosna, atše bëtscá cha sënjaimpadá, chë Jesucristbeyeca catšátanga tsëngaftanga jányama mochjángaftaca chaotsama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chënga jtadiósoftanama

¹³ Sempre šmochtsenocuedana chë Bëngbe Utabná ndoñe chašmondëtseservenama tojtsama soyëngama. Nyëts tempo, Cristbeñe y chabe soyënguáñnaca šmochtsóšbuáchiye. Ainaniñe puerte añemo šmochtsebomna, y bëtscá šmochtsama Bëngbe Bëtsabe obenánaca. ¹⁴ Y nyëtsca soyënga ntsamo chašmojtsamcá, bonshanánaca šmochtsama.

¹⁵ Jesucristbeyeca atšbe catšátanga, tsëngaftanga šmondëtatšëmbo, Estéfnas y chabe pamíllanga chë natsanënga monjamnama Jesucristbeñe jtsóšbuáchiyama, Acaya luaroca, y bëtscá imojtsentšëna Bëngbe Utabnabiana jtstrabájayana, chabe entsanga jtsëjabuáchanëse. ¹⁶ Atše chaimpadá, tsëngaftanga lempe šmochtsama ntsamo cmojtsamëndacá, chca entsanga mo tsëngaftangbe uanatsanëngcá, y ntsamo nyëtsca chë ín'yënga mo bëngcá quemuiñe uajabuáchanëse trabájayënga cmojtsamëndacá.

¹⁷ Atše tša oyejuayá sëntsemna tsëngaftangbe pueblentsana Estéfnas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tsëngaftangaftaca choca jtsemnana cabá ndoñe sëntsobenëntscuana. ¹⁸ Er chënga átsbioye tmonjaba, atše y tsëngaftanga natjëmbana šmonjauyana, y chca chënga tmonjama, atše y tsëngaftanga natjëmbana ainánaca chamotsomñama. Chënga šmochtsëtabna mo puerte uámana entšangcá.

¹⁹ Asia luaroca ošbuachiyëngcá enefjuanënga cmontsacheuaná. Aquila y Prisca y chatbe yebnentše mondbétsenefjuana ošbuáchiyënga cmontsacheuaná, Bëngbe Utabnábeñe ošbuachiyëngcá, tšëngaftangcá bétsemnayeca. ²⁰ Muentša ošbuáchiyënga nÿetscanga cmontsacheuaná. Nÿetscanga šmochjenchuaye mo Jesucrístbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²¹ Quem palabrënga tšëngaftanga jacheuayama cach atšbe cucuátšeca sentsabiamná.

²² Nderado nda Bëngbe Utabnábioye ndoñe tbontsebobonshana, Bëngbe Bëtsá nÿetsca tescama chabocastigá. ¡Bëngbe Utabná cachiñe cochjésabo!

²³ Atše, Bëngbe Bëtsá séntseimpadana, Bëngbe Utabná Jesús chaoma tšëngaftangbeñe tšabe bendicionënga chaotsemnama. ²⁴ Atše, nÿetsca tšëngaftanga cbondábabuanÿeshana, canÿa mo tšëngaftangcá, Cristo Jesúsëftaca cánÿiñe mo canÿacá jtsemnëse.

2 Corintios

Jacheuayama

¹ Atše Pablo, Jesucristbe canye ichmoná, Bèngbe Bètsá atše chca jtsemnana yojánbošeyeca, Jesucristbeyeca bèngbe catšata Timotéoftaca quem tsbuanácha sèntsabiámná, Corinto puebloca Bèngbe Bètsábeñe ošbuachiyèngcá enefjuanèngbiama, y nyets Acaya luarentše Bèngbe Bètsabe nyetsca entsangbiámnaca. ² Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tsèngaftangbeñe tsabe bendicionènga chaotsemnana y ainaniñe tsabe ebionana chašmotsebonnana.

Ntsamo Pablo tojansufri

³ Bènga mochtsatschuanaye Bèngbe Bètsá, chë Bèngbe Utabná Jesucristbe Taitá, bèngbe Taitá, chë bèngbiama lastemado yomná, y ndaye padecena soyènguiñe tmojtsemna ora, bènga sòndbetsañemuayá. ⁴ Cha bènga jtsañèmuayana padecena soyènguiñe tmojtsemna ora, chca, bènga chamotsobenama chë tmojtsefufinènga jañèmuayama, ntšamo Bèngbe Bètsá šojujabuachcá chènga jujabuáchese. ⁵ Er ntšamo Cristo tojansufri, bènga tša fsèndèfufina chabiama oservèniñe; cachcá, Cristbeyècnaca Bèngbe Bètsá jamana bènga puerte añemo ainaniñe fchaitsebonnana. ⁶ Er bènga tmojtsefufinèse, jtsemnana bènga jobenayama tsèngaftanga jañèmuayama chë šmojtsefufina ora, y atsebácanènga chašmotsebonnana, Bèngbe Bètsabe soyèngama jouenèse. Chë padecena soyènguiñe tmojtsemna ora Bèngbe Bètsá šojañemose, jtsemnana bènga fchayobenama tsèngaftanga jañèmuayama, padecena soyènguiñe šmojtsemna ora. Chca, bènga jobenayana tsèngaftanga jujabuáchana, Bèngbe Bètsábeñe chašmotsobátmanama, chábeñe jtsošbuáchiyèse, y lempe jtsóboyayama, ntšamo bènga fsènjafufri, tmojtsefufina ora. ⁷ Bènga sempre fsèndobátmana y tsabá fsèndètatsèmba chë padecena soyènguentšana tsabá smochjábocanama, er bènga fsèndètatsèmba, chë ntšamo bènga fsènjafufri tsèngaftanga šmojtsefufina; y cachcá, Bèngbe Bètsá yochjama tsèngaftanga ainaniñe puerte añemo chašmotsebonnana, ntšamo bènga fchaitsebonnana cha tojamcá.

⁸ Jesucristbeyeca atšbe catšátanga, bènga fsèntseboše tsèngaftanga chašmetsatètsèmba ntšamo bènga Asia luaroca tša fsènjafufri. Bènga puerte padecena soyènguiñe fsènjaniyena, nya ndoñe más jauantacá, chentsana vídaca jabocanama ntjatobatmancá. ⁹ Bènga šontsanènana mo jóbana cuafsamncá. Pero chë soye tonjanoservé, bènga jtsošbuáchiyama Bèngbe Bètsábeñe, nda inètsama obanènga chámuatayenama, y ndoñe cabèngbeñe ntsošbuáchiyana. ¹⁰ Cha šojatsebacá bènga jóbana puerte resjo enjamntšana, y cachcá šochjätsebacaye bèngbiama cachiñe cachcá tša resjuñe chamojtsemna ora. Bènga puerte chábeñe fsèndobátmana, puerte padecena soyènguiñe bènga chamojtsemna ora, cha cachiñe šochjätsebacama.

¹¹ Tsèngaftángnaca cmontsamna bènga jujabuáchana, bèngbiama Bèngbe Bètsá jaimpádase; chca, ba entsanga Bèngbe Bètsá mochanjètschuaye, er cha tojama bènga chábensana tsabe bendicionènga fchayóyèngacñama, cha jamèse ntšamo chènga bèngbiama tmojanimpadacá.

Ndáyeca Pablo Corinto puebloye ndoñe tonjána

¹² Canÿe soye endmëna ndayá oyejuayënga šojtsabiamná: bënga bëngbe ainanentsa juabnëngaca jtsetatsëmbuana puerte tsabá jtsamëse fstsiyena ca, ntšamo chë Bëngbe Bëtsabe entsanga endbetsamncá, nyetsca quem luar-entša entsángbeñe, y más tsëngaftangbeñe, y bënga jtsetatsëmbuana ntšamo tsabá tufjamcá nyets ainánaca tufjamama. Bënga tondaye chibiatsma quem luarentša entsangbe osertanánaca, ndayá Bëngbe Bëtsá tša tsabia bëngaftaca bëtsemayeca, šojújabuache chca chamotsiyenama. ¹³ Er ntšamo fsëntsabiamnamna ndoñe queftsátsboše, ntšamo tsëngaftanga šmojtsalía y cmojtsësertánentsana inÿetsá játayanana, y sentsobátmana puerte tsabá lempe chacmósertama. ¹⁴ Mora ndayá atše stsamama ndoñe lempe quecmátësertana. Pero atše sëntseboše tsëngaftanga chama corente chacmósertama; chca, Bëngbe Utabná quem luaroye chaojésabo ora, tsëngaftanga bëngbiam oyejuayënga chašmotsemnana, ntšamo bëngnaca tsëngaftangbiam oyejuayënga fchantsemncá.

¹⁵ Chca ndegombre yomnama atše sëndétatsëmboyecca, atše sënjanjuabná tsëngaftangbiroye jshétsana jányama, y chca, chë tsabe soye tsëngaftangbiam uta soye jamana, tsëngaftangbiroye uta soye jányëse. ¹⁶ Atše sënjanjuabná tsëngaftanga jshaftsanyana, Macedonioye ayiñe chëjana matijánachnëngo ora; y chentsana, ya camoye ataboye ora, tsëngaftanga cachíñe jáftsanyana. Chca, tsëngaftanga mašmëñanobená atše juajabuáchana Judea luaroye játama. ¹⁷ Atše chca jamama tsjanjuabná ora, ¿chca tijanma ndoñe corente tsabá ntjenoyuaboycá? ¿Tsëngaftanga šmatjájuaboye, ntšamo nÿe quem luarama enójuabnaye entsanga monduamancá, cachora canÿe soyama “aíñe” y “ndoñe ca” jayanëse, atše ndayánaca jamama snëtsejuabnaye ca?

¹⁸ Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentsana atšbe juabna jatstrócama, mo canÿa cachora canÿe soyama “aíñe” y “ndoñe ca” cuafjatichamcá. ¹⁹ Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tsëngaftangbeñe fsënjanabuayíyná, ndoñe ntsejuabnayana canÿe soye jamama y chentsana jatsjuabnayana inÿetsá jatsmama, mo canÿe entšá cachora canÿe soyama “aíñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayana y jamana ntšamo ndegombre yomncá, chentsana ntjatstrocaycá. ²⁰ Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “aíñe ca” cuafstichamcá. Chiyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. ²¹ Pero Bëngbe Bëtsá endmëna nda inétsama bënga y tsëngaftanga puerte Crístbeñe chamotsošbuáchema, cháftaca cányíñe mo canÿacá jtsemnëse; y Bëngbe Bëtsánaca endmëna nda bënga šojabacacá chabe entsanga chamotsemnana. ²² Cha tojama chë Uámana Espíritu bëngbe ainaniñe cháuamashënguama jtsemándayama, y chë soye jtsinÿanÿnayana bënga Bëngbe Bëtsabe entsanga imomnama. Y bëngbe ainaniñe chë Espíritu imobómnyayeca, bënga corente jtsetatsëmbuana bënga mochjóyëngaçnama lempe ntšamo Bëngbe Bëtsá bënga jatšatayama šojašebuachenacá.

²³ Bëngbe Bëtsá entsonyá atše ndegombre stsiçhámuaama. Atše Corinto puebloye cabá ndoñe chiyjá, er atše ndoñe quetsátsboše tsëngaftanga jašëchnana, chë bacna soyënga šmojamama, tchojaucácanëse. ²⁴ Bënga ndoñe queftsátsboše tsëngaftanga jamëndana ndayiñe cmojtsamna

jtsošbuáchiyana; er tša šmojtsošbuachéyeca, ndoñe quešmochatajbaná Cristbeñe jtsošbuáchiyana. Bëngbe fséntseboše ndayá tšëngaftanga jujabuáchana, corente oyejuayënga chašmotsemnana.

2

¹ Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtšanmama jábuayenama, y chca, ngménënga játabiamana, ntšamo chanýe sënjamcá. ² Tšëngaftanga ngménënga chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga? ³ Chíyeca tčbonjanëbuábiamama chë ntšamo šmojualiácá, chca, atše choye stjášhango ora, tšëngaftanga átsbioye ndoñe ngmená chašmondëbemama. Chca játamamna, tšëngaftangbiamama más tšabá endmëna oyejuayá atše chašmobera. Atše tšabá sënjántatšëmbo ndayá átsbioye oyejuayá šojabemcá, tšëngaftangnaca chca mašmënjánbošena y oyejuayënga chë soye matcmënjánabiamama. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora. ⁴ Pero chë tšbuanácha tčbonjanëbuábiamama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama šhëchbuínaca sënjanoperdé. Pero atše ndoñe chečbátanëbuabiamama atše jatsmama tšëngaftanga puerte ngménënga chašmotsemnana, ndayá chašmotsetatšëmbuama atše tša cbababuánýeshanama.

Perdón chë bacna soye amabiamama

⁵ Y mora, chë tšëngaftangbeñe puerte ngménënga chaotsemnana tojama boyabásabiamna, cha átsbioye ndoñe ngmená chešnátsbema, ntsachetšá tšëngaftanga tcmojabiamcá, ínýengbioye ínýengbiamama más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca. ⁶ Banga tšëngaftanguentšënga ntšamo šmojamcá, chë entšabiamama ya bëts castigo entsemna. Nýe nýetšá ponto. ⁷ Chamna, ndayá mora cmojtsamna jamamna entsemna, cha jtseperdónana y jañëmuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménënga bëtsemna causa. ⁸ Chíyeca, tšëngaftanga cbaim-padá cachiñe tšabá chašminýinýé chábioye corente šmobobonshánama. ⁹ Tempo ya chama tčbonjanëbuábiamama, atše jinýama tšëngaftanga aiñe o ndoñe šmontsanprontánama, lempe ntšamo tčbonjanamëndacá jamama. ¹⁰ Chcasna, ndánaca ndayánaca tšëngaftanga chašmojaperdoná ora, átsnaca cha chantseperdóna. Y atše cha chantseperdóna, ndayá japerdónama ndegombre tojtsemñëse. Y chca chanjama tšëngaftangbe tšabiamama y Cristbe delante. ¹¹ Atše tšëngaftangcá, quem entšábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inëtseboše ndaye bacna soye entšá chaotsamama.

Ndáyeca Pablo ndoñe natjëmbana Troas puebloca tontsanoquedañe

¹² Atše Troas puebloca sënjánashjango ora, Cristbe tšabe noticiënga jábuayenama, atše sënjáninýe Bëngbe Útabná tojanma chentše banga chë buayenana soye chamouenama y chëngbe ainaniñe chana chamóyëngacñama. ¹³ Masque chca enjamna, atše ndoñe quetstëtšobena natjëmbana ainana jtsebomnana, er atše sënjanjuabná Jesucristbeyeca bëngbe

catšata Tito chentše jinŷenana, pero ndoñe chca. Chíyeca, Troas pueblentša entšanga sēntanadiošoftaná, y Macedonia luaroye sēnjána.

Cristoftaca cánŷiñe mo canŷacá jtsemnēse, bēnga mo ayēnjanayēngcá jtsemnana

¹⁴ Atše Bēngbe Bētsábioye sēndbētsatschuanaye, bēnga bacna soyēnga jamama juabnēnga cha tojanēyēnjanama, tempo šojanamēnda juabnēnga; y chē mora bēnga Cristoftaca cánŷiñe mo canŷacá jtsemnēse, nŷets tempo cha šnetsēnachayama, mo canŷe ayēnjanayacá, y chē nŷets luarenache entšanga Cristbiana soyēnga chamotsábuatmama bēngaftaca cha yojtsamama, mo nda canŷe botamana uanguētše soye nŷets luarēnguenache chauhāshanama cuaftsamcá. ¹⁵ Er chē incienso tojtsejuinŷyana ora, entšábioye tšabá juanguētšenana; cachcá Cristbe tšabe noticiēnga fstsabuayiyná ora, Bēngbe Bētsabiana bēnga jtsemnana chē ndēmuanŷyenga tmojtsama cha oyejuayá chaotsemnana. Incienso tcojtsejuinŷyana ora, nŷetscāngbioye juanguētšenana. Cachcá, Bēngbe Bētsabe palabra fstsoyebuambná ora nŷetscanga jouenana, Cristo yojtsatsebacanga y chē pochocānēnga jtsemnana imojtsajnēngnaca. ¹⁶ Chē pochocānēnga jtsemnana imojtsajnēngna, pochocānēnga mochanjábocana, er ntšamo bēnga fsēndabuayiyná y tmojuencá chēnga tmojtsaboté; y chca, chēngbiana chē tšabe noticiēnga jtsemnana mo canŷe obanabe uanguētšancá. Pero chē Cristo yochjātsebacangna, tšabe noticiēnga tmojóyēngacñeyeca, mochanjobenaye tšabe vida nŷets tempo jtsebomnana; y chca, chēngbiana chē tšabe noticiēnga jtsemnana mo canŷe puerte botamana uanguētšancá. Y asna, ¿nda obenana yojtsebomna chē tšabe noticiēnga jábuayenama trabajo jtsamama? ¹⁷ Bēnga chē tšabe noticiēnga ndoñe queftsatabuayiyná, ntšamo ba entšanga imojtsamcá, mo nŷe batšá uámana soyēnga cuaftsemncá, y ndayánaca juácanama, mo nda ndaye nduámana soyēnga cuaftsemncá. Banga chca mondama; bēnga ndoñe. Bēnga, Cristoftaca cánŷiñe mo canŷacá jtsemnēse, fsēndabuayiyná mo Bēngbe Bētsabe delante cuaftsemnēngcá, ndegombre nŷe ntšamo tšabá yomncá nŷets ainánaca jtsebošese, y mo Bēngbe Bētsabe ichmonēngcá.

3

Chē Bēngbe Bētsabe tsēm tratama buayenana soye

¹ Chca bēngbiana fstsjayana ora, tsēngaftanga cmojtsinŷyana ¿bēnga cachiñe tiftētontsé cabēnga bētsétsanga enobiamnayana? ¿O bēnga šojtsamna, mo inŷyengcá, tsēngaftanga juventšbuáchiyana o juátjañana tsbuanachangá, bēnga tšabá fstsamama chēchangaca jinŷanŷiyama? ² Bēnga bēngbe ainaniñe puerte tšabá fsēndētatsēmo, nŷetsca entšanga, ntšamo tsēngaftanga jtsamēse šmoyencá tmojinŷe ora, tsēngaftanga jtsinŷanŷyana bēnga ndegombre ntšamo tšabá yomncá fstsamama. Chca, tsēngaftanga jtsemnana mo canŷe tsbuanachacá, nŷetscanga jtsabuatomana y jtsobenana jualiana, bēnga tšabá fstsamama. ³ Nŷetscanga tšabá mondētatsēmo Cristo tojanma tsēngaftanga chábeñe chašmotsošbuáchema, y bēngaftaca cha chca tojanmámnaca. Chca, tsēngaftanga šmondmēna mo Cristbe canŷe tsbuanachacá, ndayēcha quem luarentša entšāngbioye tojuyentšbuaché bēngaftaca. Tsēngaftanga ndoñe chešmatanobená Crístbeñe ošbuáchiyēnga jtsemnana entšāngbe trabájoca, er Crístbeñe šmonjanošbuaché chē Bēngbe Bētsá Ainabe Espíritbeyeca; y chca, tsēngaftanga šmondmēna mo canŷe tsbuanácha cháftaca uabemanēchacá, y ndoñe mo entšāngbeyeca uabemana tsbuanachacá. Bēngbe

Bětsá chě manděnga ndětsbé tablěbenguiñe tojanábema, entšanga chamot-sobedecénama, pero tsěngaftangna Cristbe buayenana soye tsěngaftangbe ainaniñe šmojóyěngacñe.

4 Crístbeyeca Běngbe Bětsabeñe jtsošbuáchiyěse, běnga corente fsěndětatsěmbo chca ndegombre bětsemnana. 5 Ndoñe quenátsměna, nje běnga cányenga quem trabajo jamama fstsobena y játayanana běngbe soye chě trabajo yojtsemna ca, er běnga jtsobenana chca jamama, nje Běngbe Bětsabe ujabuáchenanaca; 6 er cha tojama běnga fchayobenama quem trabajo jamama, chě entšanga jábuayenana Běngbe Bětsá chabe entšángbioye tojanašebuachená soyěngama, ndayá Cristo tojanma sóyeca, mo canye tsěm tratcá, Běngbe Bětsá y chabe entšángaftaca. Quem soye ndoñe quenátsměna mo chě Běngbe Bětsá tempo Israeloca entšángbioye léyeca tojanašebuachená soyěngcá. Inyětšá; entšanga mondama Běngbe Bětsabe tsěm trato, Uámana Espíritbeyeca. Chě natsana trato, chě uabemana ley, ntšamo chiñe iuabemancá ndoñe tconjama causa, entšá jóbanama jtsemnana; pero Cristbe tsabe noticiěnga, chě tsěm trato, entšanga ainaniñe tmojóyěngacñe ora, chě Uámana Espíritu jamana, chě nyetsca tescama yomna tsabe vida chěnga chamotsebomnana.

7 Quem Moisesbe ley, chě ndoñe tmonjobedecema entšanga jóbanama jtsamnana, ndětsbé tablěbenguiñe letrěngaca tmojanábema, y Běngbe Bětsá Moisésbiyoye tbojanantsabuaché ora, cha tša buashinỹinỹaniñe tojánabo. Chě causa entšanga ndoñe imontsobena ni mo jinỹana Moisesbe jubíá, er tša ibo-jtsanjueběbuashinỹinỹana, Běngbe Bětsáftaca tbojánencuentěšana tojtanabo ora. Pero betesco tojanějbana chě jubíá chca buashinỹinỹanana. Chě ley, chě natsana trato, Běngbe Bětsá tojanayentšbuaché ora, tša buashinỹinỹanánaca cha tojanmese; 8 ndegombre, más bēn y uámana tempo entsemna chě Běngbe Bětsá běnga šojanašebuachená tsěm soyěnga yojtsama ora, chě Uámana Espíritu běngbe ainaniñe cháuamashěnguama Běngbe Bětsá tojama ora. 9 Běngbe Bětsá chě ley tojanayentšbuaché ora, chě ndáyeca entšanga jóbanama yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinỹinỹanana jinỹanỹiyěse; ndegombre más bēn y uámana tempo entsemna chě mocna ora Běngbe Bětsá yojtsama entšanga chabe hominỹiñe tsábenga chamotsemnana. 10 Er chě Běngbe Bětsá ley tojanayentšbuaché ora tojaninỹanỹé buashinỹinỹanana, mora jtsinỹnana mo ya tondaye cuabndětsemncá, chě Běngbe Bětsá entšangbiama tsěm soyěnga tojtsamama tojtsonyá ora, chě tša buashinỹinỹanana yojtsemna ora. 11 Er chě leyama tempo, chě ya jochněnguama tempo entsemna ora, Běngbe Bětsá chabe buashinỹinỹanana y uámanana tojinỹanỹese; ndegombre chě Běngbe Bětsá tsěm soyěnga entšangbiama jamama ora, chě ndocna te yochanjochněngo tempo ora, Běngbe Bětsá más chabe buashinỹinỹanana y uámanana echántsinỹanỹnaye.

12 Y chca, Běngbe Bětsá chca bětš soyěnga yochjamama fsěndobatmánayeca, běnga fsěntsobena jóyebuambayama, nyetsca soyěngama jayaněse, tondayama ntjatauatjca. 13 Y chca, běnga ndoñe Moisescá queftsátama, chě chabe jubíá chaobuashinỹinỹenama Běngbe Bětsá tojanma ora, canye entšějuaca yojtsenamochěcju; cha chca tojanma, chě Israeloca entšanga ndoñe chamondobená jinỹama chě jubíá buashinỹinỹanana ya yojtsěchnějuana ora. 14 Pero Běngbe Bětsá tojanma chěnga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Běngbe Bětsá

Moisésbioye tbojanšbuachenacá chëngbiana jamama, Israeloca entšanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiana iytëmena soyënga cuaftsemncá, mo chë Moisés yojtsen-amochëcjua entšëjuacá. Y chca endmëna, er nÿe Crístoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmenacá ya ndoñe ntsemnana. ¹⁵ Y mëntscoñama, Moisesa libréjuacá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. ¹⁶ Pero canÿe entšá chë Bëngbe Utabnabe benache tojishache ora, cha jtsobenana chë soyëngama jósertana. ¹⁷ Y Bëngbe Utabná y Espíritu canÿa bondmëna, y Bëngbe Bëtsabe Espíritu tojtsemnentse, chë bacna soyënga jamama juabnënga, ni chë ley ndoñe ntsemándayana. ¹⁸ Moisés chabe jubiañe Bëngbe Bëtsabe buashinÿinanana y uámanana tojaninÿanÿé, y chíyeca, canÿe entšëjuacá yojtsen-amochëcjua, chca, chënga ndoñe chamondinÿama. Pero bënga ošbuáchiyënga nÿetscanga jtsinÿanÿayana Bëngbe Utabnabe buashinÿinanana y uámanana, mo canÿe espejo canÿe soye tojtsinÿanÿnacá, y ndoñe queftsátsboše ntšámnaca jamëse chë soye jatsëytamianana. Cha bëngaftaca yojtsama cada te más chë ntšamo cha yomncá bënga chamotsemnana, cada te más bëtšëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canÿa bondmëna.

4

¹ Y chca, Bëngbe Bëtsá bëngbiana lastemado yómnyeca, quem trabajo sojabanÿé, jtsabuayinayama chë Crístoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. ² Bënga fsëntsaboté chë inÿenga iytëmenacá inmëtsama soyënga, chë inÿenga tmojinÿe ora chama jtsëuatjana, y chë inÿenga entšanga jáingñama inmëtsama soyëngaca, y Bëngbe Bëtsabe buayenana soye ndoñe queftsatstroca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entšabe ainanentša juabnënga chamuayanama, bënga ndegombre soyënga fstsoyebuabmná ca. ³ Y nderado bënga chë tšabe noticiënga fstsabuayiná ora, báseftanga chë soyënga chaósertama ndoñe tontsopodënëse, nÿe chë pochocánënga jtsemnana tmojtsajnëngbiana chca jtsemnana. ⁴ Chëngbiana, chë Crístbeñe ndošbuáchiyëngbiamna, chë quem luarentse mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinÿama chë tšabe noticiënguentšana puerte bëtš y tšabe soyënga, chë Cristo puerte bëtšá y obená yomnana inÿanÿnaye soyënga, nda nÿetsca soyënguiñe Bëngbe Bëtsacá yomna. ⁵ Bënga ndoñe nÿe cabëngbe soyama queftsatabuayiná, ndayá Jesucristbiana mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tšëngaftanga jujabuáchama; y chca fsëndbëtsama Jesús jaserviama. ⁶ Er Bëngbe Bëtsá, nda quem luare jobojátšama ora tojanmandá binÿiñe ibetentšana chaóboconama, chánaca tojama bënga ainaniñe tšabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentšana inëtsovocana osertánana, ndayá Crístbeñe bënga mondonÿá.

7 Pero chë puerte tšabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebomnana, chca, jinÿanÿiyama tša bëts obenana Bëngbe Bëtsábiocana yóbocanama, y ndoñe bëngbentšana. 8 Y chca, bënga nÿetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tšabá jabocanama; ndoñe queftsátsatšëmbo ndayá jamama šojtsamna, pero ndoñe queftsátsmëna ntsobencá jtsobátmanama quem padecena soyënguentšana tšabá jabocnama. 9 Inÿenga montsama bënga puerte fchaisufrima, pero Bëngbe Bëtsá ndoñe nÿe cachcá šontsabashejuana; mo nda inÿabioye cuafjutsencá tmojtsejšaná ora, ya jóbama jtseprontánana, uayayënga bënga jtsëbáyama imojtsejuabnangbe cucuatšinë fsëntsemna, pero cabá ndoñe ntjobáyana. 10 Inÿenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, inÿenga chamobená jinÿama Jesús bëngbeñe vida yobomnama. 11 Er bënga vida fchabomnëntscuana, sempre puerte resjo bëngbiamá jëftsemnana jóbana, Jesúsbioye servena causa; y chca endmëna, inÿenga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo. 12 Y chca, bënga tša fsëndësufrina y jobanámnaca resjo endmëna; y tšëngaftanga tšabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tšabe vida chašmotsebomnama.

13 Bëngbe Bëtsabe uabemana palabrënguiñe endayana: “Atše sëntsanosbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsošbuaché y chabiamá fsëntsoyebuambná. 14 Er bënga fsëndëtatsëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crístoftaca cánÿiñe mo canÿyáca jtsemnëse, bënga chámuatayenama, y tšëngaftangaftaca cánÿiñe cha yochtsemnoye šochjúshejango. 15 Lempe ntšamo bënga fstsama y fstsésufrincá tšëngaftangbe tšabiamá endmëna; chca, más becá entsanga chábeñe chamojtsošbuaché ora, ba tšabe bendicionënga Bëngbe Bëtsá entsangbiamá jtsamëse, más becá entsángnaca chábioye chamotsatschuaná, ndayá chëngbiamá cha yochjamama; y lempe chca, Bëngbe Bëtsá puerte uamaná y obená yomnama nÿetsca entsanga chamotsichámuama.

16 Chíyeca bënga ndoñe ntjábanana ainaniñe añemo bomnana. Masque quem luarentša bëngbe cuerpo cada te jtsopochócayana, Bëngbe Bëtsá jamana chë bëngbentšana nÿets tempo vida yochtsebomna soye, cada te más obenana chaotsebomna; y chca, bënga jtsemnana mo tsmëma entsangcá. 17 Ntšamo bënga mora fsëndësufrencá endmëna nÿe quem luarentše vida tmojtsebomnëntscuana, y chca, chë soye jtsemnana mo canÿe nduámana soycá; pero ntšamo bënga fsëndësufrencá josérviana bënga jtsebomna chë Bëngbe Bëtsá šochjatšataye puerte bëts uámanana y obenana, cháftaca nÿets tempo vida jtsebomna, chë ndayá yomna nÿetsca soyëngama más bëts y uámana soye. 18 Er bënga nÿe chë tojtšopodena jinÿama soyënguiñe ndoñe nÿets tempo queftsatsjuabná, ndayá chë ndoñe yondopodena jinÿama soyënguiñe; er chë bënga imobena jinÿama soyënga ndoñe nÿetsca tescama ntsemnana; pero chë bënga ndoñe mondobena jinÿama soyënga cocayé nÿetsca tescama jtsemnana.

5

1 Bënga mora mondbomna canye cuerpo quem luarentşe vida jtsebomnama. Quem cuerpo yomna mo chë jtsatsjacama yopodena yebncá, cánÿentşe ndoñe nyets tempo ntjëftsemnana. Bënga mondëtatşëmbo, quem cuerpo canye te tojtsopochocase, Bëngbe Bëtsá yochjama bënga tsmëma cuerpënga chamotsatsbomnama, celoca nyetsca tescama vida jtsebomnama, Bëngbe Bëtsabe pormana cuerpënga y ndoñe entsangbe pormana cuerpënga. 2 Chíyeca, bënga quem luarentşe chca vida tmojtsebomnëntscuana, yapa tmojtseufrina causa, bënga tşa jtseboşana betscó Bëngbe Bëtsá celoye chaşuyambama, y bënga nyets tempo celoca jtsiyenama tsëm cuerpo jtsebomnama cha chaomama; 3 chca, Cristo yochjésabo ora, bënga chë tsëm cuerpoca chamotsemnana, y ndoñe nye espíritu ndocna cuerpoca. 4 Bënga quem cuerpiñe, chë quem luarentşe vida jtsebomnama cuerpiñe chamojtsiyenëntscuana, yapa padecena soyënguiñe sufrina causa, bënga jabuache mochanjáshachna; chca echántsemna ndoñe nye chë espíritu ndocna cuerpoca jtsemnana bënga imojtsebóseyeca, ndayá masna, bënga chë tsëm cuerpo chamotsebomnama Bëngbe Bëtsá chaomama imojtsebóseyeca. Bënga fsëntseboşe chë bëngbeñe jopochócama yomna soye Bëngbe Bëtsá lempe chaotrocama, chca, bënga chamotsobenama celoca nyetsca tescama vida jtsebomnama. 5 Y Bëngbe Bëtsá endmëna nda tojama bënga chamotseprontánama chë tsëm cuerpo jtsebomnama, y nda tojama Espiritu bëngbe ainaniñe cháuamashënguama, chca bëngbioye jinÿanÿiyama, bënga ndegombre mochjóyëngacñe ndayá Bëngbe Bëtsá tojaşebuachenacá.

6 Y chca, bënga sempre ainaniñe bëts añemo fchandbëtsebomna. Bënga fsëndëtatşëmbo, quem cuerpiñe cabá vida bënga mochjëftsebomnëntscuana, bënga ndoñe mochántsemna Bëngbe Utabná yojtsemnentşe. 7 Er mora bënga fsëndoyena jtsamëse, ntşamo Crístbeñe bënga imoşbuachecá, y ndoñe nye ndayá jinÿama tmojtsobenama. 8 Bëngbe fsëntsemna ainaniñe bëts añémoca, y más fsëntseboşe jájbanana quem cuerpiñe vida jtsebomnana, jama Bëngbe Utabnáftaca nyetsca tescama vida jtsebomnama. 9 Chíyeca bënga bëtscá fsëndëntşena Bëngbe Utabná sempre oyejuayá jabemama, masque bënga quem luarentşe quem cuerpoca tmojtsiyena, o ya ndoñe. 10 Er nyetscanga şontsamna jashjanguana Cristbe puestoca tribunalentşe, cada ona ntşamo yomerecencá chaóyëngacñama, ntşamo tşabá o ndoñe tşabá quem luarentşe chabe cuerpiñe vida yojjëftsebomnëntscuana tojëftsemcá.

Jábuayenama ntşamo Bëngbe Bëtsá inama entsanga tempcá tşabá cháftaca chamotsatsmënama

11 Chcasna, Bëngbe Utabná nyetscangbiamna chë más bëtsá yomnama jtsejuabnayëse, bënga bëtscá fsëndama entsanga jáyëñjanama, bënga tşabá fstsamama chamotsejuabnama. Pero Bëngbe Bëtsá ya endëtatşëmbo ntşamo bënga fstmënama, y atşe sëntsobátmana tşëngaftángnaca chca tşabá chaşmotsetátşëmbo, tşëngaftangbe ainanentşa juabnëngaca, chë bëngbiamna aïñe ca cmojtsëtsëtsná juabnënga. 12 Bënga ndoñe cachiñe cabëngbiamna queftsatoyebuambná; chca fsëntsichamo ndayá tşëngaftanga oyejuayënga bëngbiamna chaşmotsemnana, chca, tşëngaftanga jojuama chaşmoyenama, chë uámana soyënga tmojtsebiamnángbioye ndayá entsanga canye entsábeñe tmojtsonÿacá y ndoñe chca chë entsabe ainaniñe tomna soyëngaca. 13 Er bënga mo chë ndoñe corente juabna ndbomnëngcá fstsamëse, ntşamo

báseftanga mondbetsichamcá, jtsemnana Běngbe Bětsá jaserviama; y běnga corente juabna bomněngcá fstsaměse, jtsemnana tsěngaftangbe tsabiama. ¹⁴ Běnga chca fsěndměna, Cristo šondábabuanjšeshanayeca, y chě soye endama běnga nŷe cha fchaitseservěnama, er běnga fsěndenojuabná y puerte tsábá fsěndětatsěmbo, canŷa, Cristo, nŷetscangbiama tojanóbana; y cha nŷetscangbiama tojanóbana, endměna mo cha tojanóbana ora, nŷetscanga cháftaca cuafjobancá. ¹⁵ Y Cristo nŷetscangbiama tojanóbana, chě quem luarentse vida bomněnga ndoñe más nŷe cachěngbiama chamondětsiyenama, sinó chabiama, nda chěngbiama tojanóbana y tojtanayena. ¹⁶ Chíyeca, běnga ya ndoñe ndocnabiama queftsatsjuabná ntšamo entšanga quem luarentse jtsejuabnayama monduamancá; masque ndegombre běnga chca Cristbiama fsěnjanjuabná, mora ya ndoñe chca chabiama queftsatsjuabná. ¹⁷ Chcasna, nđerado nda Crístoftaca cánŷiñe mo canŷacá tojtsenna, Běngbe Bětsá tojama cha mo canŷe tsěm entšacá chaotsemnana. Ntšamo chě Crístbioye cabá nduabuátmana ora cha yojamncá, mora ya ndoñe quenátsměna. Morna cha jtsejuabnayana y jtsamana inŷe soyěnga y tsěm soyěnga.

¹⁸ Běngbe Bětsá endměna nda chca inětsama, entšanga mo tsěm entšangcá jábiama; y cha Crístoftaca tojama běnga tempcá tsábá cháftaca chamotsatsměnama. Y cha běnga canŷe trabajo šonjanabanŷé, běnga entšanga jábuayenama, Běngbe Bětsá inětsama entšanga tempcá tsábá cháftaca chamotsatsměnama, y entšanga jujabuáchama chca chamotsemnana. ¹⁹ O měntšá, Cristo tojanma sóyeca Běngbe Bětsá yojtsama entšanga chamotsobenama tempcá tsábá cháftaca jtsatsměnama, y chca, chěnga chamotsobena chěngbe bacna soyěngama perdonáněnga jtsemnana, y chě soyěngama nŷetsca tescama castigáněnga jtsemnana ndoñe chaondětsamnama. Y běnga šonjanabanŷé chě trabajo, entšanga jtsabuayinayama ntšamo Běngbe Bětsá inama entšanga tempcá tsábá cháftaca chamotsatsměnama. ²⁰ Y chca, běnga jtsemnana Cristbe cuenta oyebuambnayěnga y aměnga, mo cach Běngbe Bětsá běngaftaca cmojtsaimpadancá. Cristbe cuenta chaimpadá, bětscá šmochtsentsena Běngbe Bětsáftaca tempcá tsábá jtsatsměnama. ²¹ Cristo ndocna bacna soye tonjanma, pero běngbe bacna soyěnga jabuajuánama, Běngbe Bětsá cháftaca tojanma mo cha canŷe bacna soyěnga amá cuaftsemncá, chca, běnga Crístoftaca cánŷiñe mo canŷacá jtsemněse, Běngbe Bětsabe bominiñe tsábenga jtsemnana chamotsobenama.

6

¹ Chcáyeca, běnga Běngbe Bětsáftaca cánŷiñe trabájayěnga quetsomñecana, cbontsaimpadana ndoñe nŷe bonamente chašmondóyěngacñe chě Běngbe Bětsá yojtsama soyěnga, tsěngaftangbiama tsabe juabna jtsebomněse. ² Er Běngbe Bětsá chabe uabemana palabrenguiñe měntšá tojánayana: Chě tsabe soye jamama tsábá šonjaninŷana ora, atse tcbonjanoyeuná; chě ácbioye jatsbocama te, tcbonjanájabuache ca. Smochjinŷe. Mora entsemna chě mocna ora Běngbe Bětsá tsábá ibojtsinŷana tsabe soye jamama; mora entsemna chě mocna ora Běngbe Bětsá yojtseboše aca jatsbocama.

³ Běnga ndocna bacna soye queftsátama, ndayá chaoma entšanga chě tsabe noticiěnga chamotsábotema, chca, ndocná podesca chaondětsóyebuambnama běngbe trabajuama, Cristbiama. ⁴ Inŷetsá, běngna nŷetsca soyěnguiñe fsěnjaniyena mo Běngbe Bětsabe oserveněngcá; Běngbe Bětsabeñe obatomancá

puerte uantadënga jtsemnëse, fstsufrina ora; puerte padecena soyënguifë bëtsemna causa, ndayá jamama ndoñe fsëntsetatšëmbo ora; y ainaniñe puerte ngménaca fstsemna ora; ⁵ ínÿenga šojtsatsetšená ora; cárceloye šojautame ora; entšanga bëngbe contra tmojtsebouénana ora; jabuache trabájayifë puerte uamëntšnayënga fstsemna ora; baytë ntsamanacá fstsemna ora; y jsama tondaye fsëntsebomna ora. ⁶ Bëngnaca fsëntsinÿanáná Bëngbe Bëtsabe oservénënga fstsmënana, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínÿenga ntšamo šojáborlaye ora puerte uantadënga jtsemnëse; ínÿengbiroye puerte bonshanánaca jtšénÿayëse; Uámana Espiritu bëngbe ainaniñe jtsebonnëse; y ndegombre nÿets ainánaca nÿetscanga jtsababuánÿeshanëse; ⁷ ntšamo Bëngbe Bëtsabiana ndegombre yomncá jtsabuayinayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyënjanama y chëngbiana jenëuyanama soyënga jtsebomnana, chë Satanásbiroye jáyënjanama y chabiana jenëuyanama ndayá Bëngbe Bëtsá šojatšatacá jtsebonnëse; y Bëngbe Bëtsá chca tojama, er cha tojama bënga chabe bominiñe tšábenga chamotsemnana. ⁸ Bënga fsëntsinÿanáná Bëngbe Bëtsabe oservénënga fstsmënana, ínÿenga bëngbiana tšabe soyënga tmojtsejuabná ora y bënga nduamanënga jtsemnana chënga tmojtsama ora; ínÿenga tšabe soyënga bëngbiana tmojtsoyebuambná ora y chënga bëngbiana podësca tmojtsichamo ora; bënga áingñayënga fstsmëna ca básëftanga tmojtsejuabná ora, pero bënga ntšamo ndegombre yomncá jtsóyebuambnayëse. ⁹ Mo nduamanëngcá bënga entšangbeñe jtšénÿayana, pero banga corente tšabá bënga šondëubuatma; bëngbiana sempre resjo endmëna jóbanama, pero šmochjinÿe, bënga sempre vídaca chentšana jatóbocañana; bënga jutatsínÿama jobenayama, Bëngbe Bëtsábeyeca castigánënga fchandbëtsemna, pero nÿa jóbana ndoñe. ¹⁰ Masque ngménënga fstsemna, ainaniñe sempre oyejuayënga fchandbëtsemnë; masque ndbomnjëmëngcá, pero fchandbët sama banga Bëngbe Bëtsábicana bëtscá chamotsebomnana; quem luarentša soyënga tondaye queftsátsbomna, pero Bëngbe Bëtsabe entšanga quetsomñecana, ndegombre lempe fsëndëtsóbomñe.

¹¹ Tsëngaftangbiana, Corintoca entšanga, lempe fsënjayana, tondaye ntjaitëmcá; nÿets ainánaca, corente cbondábabuanÿeshana. ¹² Bënga puerte chondábabuanÿeshana, pero tsëngaftagna ndoñe yapa quešcátababuanÿeshana. ¹³ Atše chontsaïmpadana, mo canÿe taitá chabe básenga cuaftsaimpadancá, atše puerte chašmotsebobonshánana, er atše corente cbondábabuanÿeshana.

Bënga mondmëna mo Bëngbe Bëtsabe bët yebncá

¹⁴ Crístbeñe ndošbuáchiyëngaftaca ndoñe šmatjenutaná ndayánaca jamama, er chca, chëngaftaca šmatjábocana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bominiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca. ¹⁵ Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. ¹⁶ Ndocna soyiñe cachcá ntsemnana, Bëngbe Bëtsabe bët yebna, chë nÿe canÿe Bëngbe Bëtsábroye jadórama yebna, y chë entšangbe pormana soyënga, mo diosënga

cuaftsemncá jtsadoránana soyënga; chca endmëna, er bënga, nyetscanga cánÿiñe Jesucristbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrenguiñe chabe entšangbiana tojanayancá:

Chëngbeñe vida chántsebmna y chëngbenache chántsana;

atše chëngbe Bëtsá chántsemna

y chëngna atšbe entšanga ca.

¹⁷ Chiyeca mëntsánaca Bëngbe Utabná chabe entšanga tojanëyana:

“Chë bacna soye amëngbentsana šmochjésebcana, y chëngbentsana šmochtsojuánañe;

tondaye šmattsebana, ni šmattsama ndayá Bëngbe Bëtsabe entšangbiana ndoñe tšabá tontsemncá.

As cbochanjúbuaja,

¹⁸ y chántsemna mo canÿe taitacá tšëngaftangbiana,

y tšëngaftangna mo atšbe uaquiñënga y bemiangcá.

Chca séntšichamo atše, tšëngaftangbe Utabná, nyëts obenana bomná ca” — chiñe enduábemana.

7

¹ Chcasna, atšbe bonshánënga, chca endmëna ntšamo Bëngbe Bëtsá sojašebuachenacá. Chiyeca šontsamna, Bëngbe Bëtsabe delante nyetsca soyënguiñe tšábenga jtsemnana, bëngbe cuerpama o espíritbiana bacna soye ndoñe más ntsamcá; y Bëngbe Bëtsá nyetscangbiana más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entšangcá, nyetsca soyënguiñe puerte tšábenga jtsemnëse.

Ntšamo chë Corintoca entšanga juabna tmojantrocá

² Bëngbiana šmochtsenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entšá chaotsemnana, y ndocnábioye chibiatsingñë.

³ Atše chca ndoñe quetsátichamo, ndoñe tšabá šmonjama ca tšëngaftangbiana jayanama, er ntšamo ya tbonjauyancá, atše tšëngaftangbiana sempre ainaniñe puerte bonshanánaca sëndbëtsenojuabnaye; y chca, mo átšeftaca canÿiñcá šmochántsemna, masque chayóbana o cabá vida chaitsóbmñëse.

⁴ Atše puerte tšabá sëndëtatšëmbo, ntšamo tšabá yomncá šmochtsamama; y tšëngaftangbiana puerte oyejuayá sëntsemna. Lempe ntšamo tsësufriñcá tsiyenama, atšbe ainaniñe bëts añemo sëndëtsóbmñë y corente sëntsoyejuá.

⁵ Macedonia luaroye fsënjánashajna orscana, ndoñe luare queftsátsbmna jóchnama, sinó nyetsca soyënguiñe fsëndëpadeccena: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse. ⁶ Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnana, Tito moye tonjánashjango ora. ⁷ Y cha tonjánabo ora, bënga ndoñe más añemo quefstëtsebomna nyë cha tojánashjanguama, sinó tšëngaftanga šmojanájabuachama y ainaniñe añemo chaotsebomnana šmojanmama. Cha šonjanëyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngmënacá šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iuámanana; y quem chabe noticiëngaca, cabá más sëntsoyejuá.

⁸ Er masque tsëngaftanga tša ngménaca šmojamna chë tconjanëbuábiana tsbuanáchama, mora ndoñe quetsatsjuabná más tsabá yojamna chca ndoñe jatëbuabiamana ca; masque tempo atše chca sënjanjuabná, er atše sëntsetatsëmbo chë tsbuanácha básefta tescama ngménënga tcmojánabiana, ⁹ mora atše puerte oyejuayá sëntsemna, ndoñe tsëngaftanga ngménënga šmojanama, ndayá chë šmojánbomna ngménana tojanmama tsëngaftanga chašmuenójuaboma ndoñe tsabá šmontsamama, y chca amana chašmotsajbanama, tsëngaftangbe juabnënga jatrócase. Chca enjamna, er tsëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tsëngaftangbiana chibiatsma. ¹⁰ Ntšamo Bëngbe Bëtsá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entsábioye juanatsana atsbocaná chaotsemnana, y chca ndocna te ntjátsjuabnayana más tsabá yojamna ndoñe chca ntjatstrócana ca. Pero ntšamo chë nýe quem luarama enójuabnaye entsanga mondbetsebomncá ngménana bomnentsana, ndoñe ntjóbcnana juabna jatrócana; chentsana jóbocnana nýe nýetsca tescama castiganá jtsemnana, mo nýetsca tescama cuafjobancá. ¹¹ Smochjinýe ndayá tojóbcna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tsëngaftanga chacmetonama chë bacna soye tojanmáftaca; y castigánënga jtsemnana jtsauatjámna. Chentsana, tsëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnana y chca tojanmábioye jacastígama. Nýetsca chë soyënguiñe tsëngaftanga šmonjinýanýe chca bacna soye ndoñe šmonjanmama; y chca, mora tondaye quenátsmëna tsëngaftanga castigo jtsebomnana chacmotsamnana. ¹² Y chca, atše chë tsbuanácha tconjanëbuábiana ora, ndoñe checbátanëbuabiana chë puerte bacna soye tojanmábeyeca, ni chë bacna soye tojanoyëngacñábeyeca; ndayá tsëngaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminýanýe tsëngaftanga bëngbe tsabiama puerte šmenójuabna. ¹³ Chíyeca bënga más añemo ainaniñe fsëntsebomna.

Pero ntsachetšá añemo fstsboamnana, masna puerte oyejuayënga fsëntsemna, er bënga fsënjinye Tito tša oyejuayá, er chabe ainaniñe lempe natjëmbana yojtsemna nýetsca tsëngaftangbiana. ¹⁴ Tito tsëngaftanga jányama cabá nda ora, atše cha sënjaniana tsëngaftanga šmochjanóyeunaye chë atše tconjanëbuaja palabra ca; y tsëngaftanga ndoñe chešmatsma atše chaitsëuatjama chca tijánayanama. Inýetšá, lempe ntšamo tchojauyancá ndegombre endmëna; cachcá, ntšamo bënga Títbioye fsënjaniyancá ndegombre entsemna, chë tsëngaftangbiana fstsóyejuama. ¹⁵ Y mora Tito más cmontsababuánýeshana, ntšamo cha tcmojanamëndacá ndayá tsëngaftanga šmojanmama, y ntšamo puerte respétoca y mo uamaná cuaftsemncá chabiana jtsejuabnayëse šmojanofjama tojtenojuabó ora. ¹⁶ Atše puerte oyejuayá sëntsemna, er atše sëndétatsëmbo tsëngaftanga ntšamo tsabá yomncá nýetsca soyënguiñe šmochtsamama.

8

1 Y mora, Jesucristbeyeca catšátanga, bënga fsëntseboše tšëngaftanga chašmotsetátšëmbo ntšamo Bëngbe Bëtsá bëtsá tšabe bendicionënga tojama Macedonia luarentše ošbuachiyëngcá enefjuanëngbiam. 2 Chënga puerte tojasufrí, y chora chca, chënga tmojinÿanjé becá imošbuáchema y tša imoyeuama; y masque puerte ndbomnjëmënga, chënga nÿets ainánaca bëtsá tmojanacaredadó Jerusalenotša ošbuachiyënga ndbomnjëmëngbiam. 3 Atše sëndétatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóseyeca. 4 Tša šonjánaimpadana chëngbioye jálesenciam ndayánaca jamama, Jerusalenoca ošbuachiyëngbioye jubabuáchama. 5 Bënga ftsjanobatmanama cabá más chënga tmonjanma; natsana, chënga Bëngbe Utabná tmojaniana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. 6 Ndayá Macedonioca ošbuachiyënga tmojanmama bënga añemo fsënjanóyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbanana, Jerusalenoca ošbuachiyënga jubabuáchama, ndayá cha jamama tojanbojatšecá. 7 Y morna, ntšamo tšëngaftanga nÿetsca soyënguiñe tša šmomncá —puerte ošbuachiyënga, becá obenënga Bëngbe Bëtsabe soyëngama jóyebuambayama, puerte osertánana Bëngbe Bëtsabe soyëngama, corente juabnayënga bëtsá jamama Cristo jaserviama y bëngbioye corente ababuánÿeshanënga —cachcá, mórnaca bëtsá šmochjama quem trabajuñe chë ošbuachiyënga ndbomnjëmëngbiam, tšëngaftangbe bonshánana jtsinÿanjñayëse.

8 Chca ndoñe quecatšetsétná mo canÿe mandcá; atše sëntseboše ndayá nÿe tšëngaftanga jáuyanana ntšamo inÿenga bëtsá tmojatrabajá chë ndbomnjëmëngbiam, tšëngaftágnaca cachcá chašmotsamama; y chca, chašminÿanjÿema chë tšëngaftanga šmobomna bonshánana ndegombre bëtsemnama. 9 Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiam tojamama, bëngbioye puerte jtsababuánÿeshanëse. Celoca, cha cabá quem luaroye ndabo ora, cha bëtsá inabomna; pero tšëngaftanga ababuánÿeshanayeca, mo canÿe puerte nduamanacá tojanóbema. Y mora, Cristo mo canÿe nduamanacá tojobemayeca, Bëngbe Bëtsá puerte tšabe soyënga šojatšatá.

10 Tšëngaftangbe tšabiam mëntšá cbabuayená, ntšamo quem soyiñe šmochjamama. Chë inÿe uata tšëngaftanga šmonjanbojatšé, ndoñe nÿe chë ndbomnjëmëngbiam jacjayama, ndayá chca jamama jtsebošámnaca. 11 Morna, chë ndbomnjëmëngbiam trabajo šmochjapochóca; chca, ntšamo tšëngaftanga becá šmonjanprontana y jubabuáchama tša šmonjanbošcá, mórnaca cachcá chašmomama chë trabajo japochócama, ntšamo šmojobenacá jacjayëse. 12 Er canÿe entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtso encá, y ndoñe ntšamo cha ndoñe tontsobencá.

13 Ndoñe quenátšmëna, tšëngaftanga puerte ujabótënga chašmoquedá, inÿengbioye atšatnaye causa, chënga ndoñe yapa ujabótënga chamondëtsemnama. 14 Atše séntsicamo ndayá nÿetscanga chamotsenajabuachana, chca tojtšëjaboto ora ca. Mora, chë bëtsá šmobomnentšana šmontsobena chënga jubabuáchana, ndayá tojtšabuáshebencá jatšatayëse; y inÿe orna, chënga entsamna tšëngaftanga

jujabuáchana chë cmojtsabuáshebena soyëngaca. Chca, nyëtscanga jóyëngacñana ndayá tojtsëjaboto ora. ¹⁵ Ntšamo Bëngbe Bëtsabe uabemana palabrënguiñe endayancá:

Chë tša bomnábioye ndoñe chebatanójama;
y chë nye batšá bomnábioye, ndoñe quebënjatanbuášhebena ca.

Tito y chabe enutënga

¹⁶ Bëngbe Bëtsá šcuatschuá, tšëngaftanga jtsanyënama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. ¹⁷ Er tšëngaftangbioye chaotsama bënga fsënjanimpadá ora, cha oyejuayá añe ca tonjánayana choye jama; y chabiamna puerte enduámána tšëngaftangbe tšabiana; chíyeca mora echanjá tšëngaftanga jánýama, chca jamama cachá yobóseyeca.

¹⁸ Titofaca, canýa Jesucristbeyeca bëngbe catšata fsëntsichamná; chabiamna puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinyayama. ¹⁹ Y ndoñe nye chë soye, sinó quem luarentšë ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjëmëngbiamna trabajuñe; chë trabajo endmëna bonshánana jinýanyiyama; chca fsëntsama, Bëngbe Utabná jtsatschuanayama y jinýanyiyama bënga chca jujabuáchama tša fstsbošama. ²⁰ Titofaca cha fsëntsichamná, chca, ndocná chaondëtsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomnjëmënga jujabuáchama; ²¹ er bënga fsëndama lempe ntšamo fstsobencá, ndoñe nye ntšamo Bëngbe Bëtsabe bominýiñe tšabá yomncá jamama, ndayá ntšamo entsangbe bominýiñe tšabá yomncánaca.

²² Chátaftaca inýa Jesucristbeyeca bëngbe catšátnaca fsëntsichamná; cha bënga ba soyiñe šonjinýanyé cha yojtseboše bëtscá jamama, Cristo jaserviama, y mora más, er cha puerte bëtscá entsejuabná tšëngaftanga puerte tšabá šmochjamama. ²³ Y Titbiamna, cha quem trabajuñe tšabe enutá endmëna, y atšcá tšëngaftangbiamna endëtrabája; y chë inýata Jesucristbeyeca bëngbe catšatbiamna, chata bontsemna quemuentša ošbuachiyëngcá enefjuanëngbe ichmónata, chëngbiamna chabóyebuambama; y chë bontsama sóyecna, chata Cristbioye corente jtsatschuanayana. ²⁴ Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásengbioye šmochjinýanyíye tšëngaftanga ndegombre chënga šmojtsababuánýeshanama, y bënga razón fstsebomnama tšëngaftangbiamna oyejuayënga jtsemnama.

9

Chë inýe ošbuáchiyëngbiamna crocénana játbanama

¹ Chë Jerusalenoca Bëngbe Bëtsabe entsangbiamna crocénana játbanamna ndoñe quenátsiyta tšëngaftangbioye jatëbuabiamnayama, ² er atšë ndegombre sëntsetatšëmbo tšëngaftanga tša šmojtseboše chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inýe uatscana quem trabajuñe jujabuáchama šmoprontánama; y chë jujabuáchama tšëngaftangbe bëtscá juabnënga tmojama banga quem luarentšënga bëtscá añemo chamotsebomnama, chëngnaca chë trabajo jamama. ³ Pero Jesucristbeyeca quem catšátanga sëntsichamná, ntšamo

bënga oyejuayënga tifjayancá tšëngaftanga chašmotsamama, chë tšëngaftanga quem trabajuiñe bëtscá šmochjama ca; chca, ntšamo tijanayancá ndoñe nÿe bonamente chaondëtsemnana, y ntšamo sënjanayancá tšëngaftanga chašmotseprontánama; ⁴ er nderado báseftanga Macedonioquënga átseftaca tmojá y choca ndëprontánënga tcmojánÿena chë ndbomnjëmëngbiana ujabuáchenanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiana cabá más ouatjca nántsemna. ⁵ Chíyeca, tšabá sonjuínÿnana Jesucristbeyeca quem catšátanga jáimpadana chënga atšbe natsana chamotsama tšëngaftanga jáñÿama, y chacmëjabuachama chë juabónana játbanama, ndayá tšëngaftanga tempo šmonjanašebuachenacá. Chca, atše choca chajíáshjango ora, tšëngaftangbe juabónana chaotseprontana. Chca, tšëngaftanga šmochanjínÿanyiye ndbomnjëmëngbiana šmojacjá, chca jamama tša šmobóšeyeca, y ndoñe nÿe batšatema jatšatayama y tšëngaftangbiana bëtscá jobuájuaa šmojtseboše.

⁶ Quemuiñe šmochtsenójuabnaye: Nda nÿe batsá tojajé, cach batsá chentšana josháchiñana; y nda bëtscá tojajé, cach bëtscá chentšana josháchiñana. ⁷ Cada ona bontsemna jajájuana ntšamo chabe ainaniñe tojajuabocá; ndoñe ngmënaca o nÿe ínÿenga chca jamama tmojtsemándayeca. Chca chaotsemna, er nda oyejuayá tojajajóbioye, Bëngbe Bëtsá jtsebobonshánana. ⁸ Bëngbe Bëtsá endobena jamana chábéntšana nÿetsca tšabe bendicionënga y bëtscá soyënga tšëngaftanga chašmotsebonnana; chca, ntšamo nÿetsca soyënguiñe cmojtsëjbotcá sempre chašmotsóbomñama, y cabá más bëtscá chašmotsebonnana, nÿetsca tšabe obrënguiñe ínÿenga chašmëjabuachama. ⁹ Bëngbe Bëtsabe uabemana palabrënguiñe, mëntšá endayana chë bëtscá tojacjabiana:

Cha nÿets ainánaca ndbomnjëmënga bëtscá jatšatayana;

y chë tšabe soyënga ntšamo cha tojtsamcá nÿets tempo jëftsemnana.

¹⁰ Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjbotcá, y echanjama, tšëngaftanga cabá más tšabe soyënga chašmotsamama. ¹¹ Bëngbe Bëtsá echanjama tšëngaftanga nÿetsca tšabe soyënga chašmotsebonnana, chca, tšëngaftanga nÿets ainánaca puerte ínÿengbioye chašmatšatama, y bëngbeyeca, chë mochjóyëngacñënga Bëngbe Bëtsá chamotsatschuanama; ¹² er chë ujabuáchenana Bëngbe Bëtsabe entšanga tojatsatá ora, ndoñe nÿe ndayá tojtsëjbotcá jatšatayana, ndayá chënga Bëngbe Bëtsá chamotsatschuanámna jamana. ¹³ Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe notiçiënguiñe iuayancá tšëngaftanga šmobedecénama, y ntšamo tšëngaftanga tšabá jamëse, nÿets ainánaca bëtscá soyënga chënga y nÿetscanga šmojátšatama. ¹⁴ Y chënga tša mochántseboše tšëngaftanga jáñÿama y tšëngaftangbiana Bëngbe Bëtsá mochántseimpadana, er cha bëtscá tšabe soyënga tšëngaftangbiana tojama. ¹⁵ ;Bëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

10

Ntšamo Pablo tojánayana ínÿenga chabe contra imojtsichamo ora

1 Y mora, atše Pablo, cbochanjáimpada, tšëngaftangbioye puerte bonshanánaca jtsënyâyëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentsšana bënoça stsemna ora ca. ² Tšëngaftanga bontsaïmpadana, tšëngaftanga jányama cháijá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanyënga imojtsejuabná, nÿe bënga tšabá jtsomñama juabnëngaca bënga fstsiyena ca. ³ Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entšanga mond-uamancá; ⁴ er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entšanga japéliama monduamancá, ntšamo nÿe chënga tšabá jtsomñama juabnënga yomncá. Inÿetšá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canÿe uayayábioye jtsepochoçancá, chë Bëngbe Bëtsabe osertánana ndoñe yonduámana ca jinÿanyiyama soyënga ichámëngbiana, ⁵ y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtšámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana. ⁶ Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtšama ora.

⁷ Tšëngaftanga ndayánaca jtsonÿayana nÿe ntšamo tbojtsabinÿnëcá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Cristbënga ftsmënama, ntšamo cha yomncá. ⁸ Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja. ⁹ Atše ndoñe quetsátšbošë tšëngaftanga chacmotsinÿana, tšëngaftanga jaútatjayama atše stsebošë ca, ndayá atšbe tsbuanáchangañe tijuábemama. ¹⁰ Er báseftanga mëntšá atšbiana imojtsichamo: “Chabe tsbuanáchangañe cha šontsamënda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canÿe ndocna obenana ndbomnacá, y ntšamo tojtsichamcá tondaye ntšámanana ca.” ¹¹ Chca entšanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

¹² Ndegombre bënga ndoñe tša añemo queftsátšbomna jayanama nÿetšá uámanënga ftsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábënga imomna ca, nÿe ntšamo cachëngbeñe inÿënga imomnama jtsonÿayëse; y chca tmojtšama ora, chënga juabna ndbomnënga jtsemnana. ¹³ Bënga ndoñe yapa quifchatóyebuambaye cabëngbiana, chca, tša tšábënga bënga imomna ca jtsenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe

Bëtsá šojabanÿecá, y chífnaca entsemna ntšamo tsëngaftangbeñe Corintoca tifjamcá. ¹⁴ Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tsëngaftangftaca ndoñe mafsënjamñese; er bënga chë natsanënga fsënjamna tsëngaftangbioye jama, Cristbiana tsabe noticiënga jábuayenama. ¹⁵ Y ndoñe quifchatóyebuambaye tša tsábá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínÿengbe soye yómnyeca. Chamna, bënga fsëntsobátmana tsëngaftanga Cristbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tsëngaftangbeñe fsëntsamcá. ¹⁶ Chca, fsëntsobátmana bënga jobenayama tsabe noticiëngama jábuayenama, chë tsëngaftangbentšana más chcoye imoyena entsángbioye; chca, bënga ndoñe yapa quifchatóyebuambaye ínÿengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

¹⁷ Ntšamo Bëngbe Bëtsabe uabemana palabrënguñe endayancá: “Nda tojtseboše jayanama cha canÿe uámana entsá yomna ca, más tsábá cha cháuyana Bëngbe Utabná puerte uamaná endmëna ca.” ¹⁸ Er Bëngbe Bëtsá jayanana canÿe entsá ndegombre tsábá tojama ca, ndoñe ñe cachá tojt-senábotamnabiama, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiama.

11

Pablo y chë ndoñe ndegombre ichmónënga

¹ Malaye atše smëntjéuánta, atše básefta soyënga mo canÿe opá tojtsoyeu-ambuambnacá stschámëntscuana, cach atše stsenabotamná ora. Masque ntšámnaca šmochtsëuánta. ² Bëngbe Bëtsábeyeca atše tša cbondábabuanÿeshana y cbondánÿena, tsëngaftanga ñe cha chašmotsëstonama y ndoñe ínÿengbioye. Er atše Cristo sënjašbuachená tsëngaftanga sempre cha šmochtsëstonama, y sëntseboše, cha quem luaroye yochjésabo ora, chábioye tsëngaftanga júshejanguana, mo ñe chábioye sempre ustonëngcá, ntšamo canÿe taitá chabe bembe nodocna boyabása nduabatmá ñe canÿe boyabásaftaca chaóbuamama jushjanguancá. ³ Mëtšcuaye Evábioye tbojaningñe, y cha tbojanínÿnana puerte osertanabe soyënga cuafstsatsëtsnacá, pero ndegom- bre ndoñe chca yonjamna. Atše sentsauatja nderado cachcá ínÿenga tsëngaftangftaca muanjama y tsëngaftangbe juabna chašmotrocá, y chca, tsëngaftanga chašmotsajbaná sempre jtsejuabnayana ñe Cristo ñyetsca soyënguñe jtseservënama. ⁴ Atše chama sentsauatja, er ndánaca jashjanguana y Jesusbiana tojtsabuayiná, mo cha ínÿe entsá cuaftsemncá, ndoñe ntšamo bënga Jesusbiana fsëndabuayinacá, y tojtsama tsëngaftanga chašmobená canÿe espíritu jtsebomnana, pero ndoñe ntšamo chë Bëngbe Bëtsá tojama tsëngaftangbe ainaniñe cháuamashënguama espiritcá, chë Uámana Espiritu, tsëngaftanga tsábá cha jtsëuántana. Y atše sentsauatja, tsëngaftangbe ainaniñe ínÿe buayenana chašmóyëngacñama ndánaca tojtsamama, ndoñe cachcá chë tsabe noticiënga ntšamo ya bëngbentšana šmonjocmá, y chora tsëngaftanga chábioye becá tsábá jtsëuántana. ⁵ Pero atše sëntsejuabná tondayiñe más batšá uamaná tsmëna ca, chë Jesucristbe puerte uámana ichmónënga imomna ca juabnayëngbiama. ⁶ Atše ndoñe sënjuatsjinÿe ntšamo corente tsábá entsángaftaca jóyebuambayama; pero atše puerte tsábá sëndétatšëmbo ntšamo

stsichámuama. Bënga puerte tšabá nyetsca soyënguife tšëngaftanga tčbonjanÿanÿé, ndegombre chca osertánana ftsbomnama.

⁷ ¿O atše ndoñe tšabá sënjama, tšabe noticiënga cbonjanabuayiyiná ora, tšëngaftangbentsana atšbiama tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomana? ⁸ Mo ínÿenache ošbuachiyëngcá enefjuanënga crocénana cuafjabaquécá, crocénana sënjanóyëngacñe chë ošbuachiyëngbentsana, tšëngaftanga jujabuáchama jobenayama. ⁹ Y tšëngaftangaftaca sënjamna ora y ndayánaca šojanájoboto ora, atše ndoñe checbátantjañe atšbe opresidama, chca, tšëngaftangbiana totcá ndoñe chaondëtsemnana; er chë Jesucristbeyeca catsátanga Macedoniocana tmonjánashajnënga, šmonjanatšetá ntšamo šojanbuashbencá. Chca, atše sënjamna, atšbe causa tšëngaftangbiana totcá ndoñe chaondëtsemnana; y sempre chca chántsama. ¹⁰ Serto, Cristbe ndegombre soyënga atšbe ainaniñe sëntsebmna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiyiná ora; y chca chanjama atšbe opresidama chašmoyema ínÿënga ntsamncá. ¹¹ ¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endëtatsëmbo tša cbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿënga, chë Jesucristbe puerte uámana ichmónënga imonna ca juabnayënga ndoñe chamondëtsebmna ndáyeca jatenábotamnayama, ntšamo bënga ftsamcá chënga imojtsetrabája ca. ¹³ Èr chënga ndoñe quemátsmëna Jesucristbe ndegombre ichmónënga, mondmëna chë ínÿënga jáingñama imotrabájanga, y mondama entšanga chaotsinÿanama chënga mo Jesucristbe ndegombre ichmónënga cuaftsemncá. ¹⁴ Y chama ndoñe šmatjenjaná, er cach Satanásnaca endbëtsama mo canÿe buashinÿinÿana angelcá jtsinÿnama; ¹⁵ chíyeca, ndoñe muatjenjaná, chabe oservenëngnaca tmojtsamama mo tšabe entšangcá jtsinÿnama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bëtsemna causa

¹⁶ Cachiñe cbochtëtëyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtséuánta, chca, átsnaca jtsenábotamnayama jobenayama. ¹⁷ Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebmna ndáyeca jobenayama jtsenábotamnayana. ¹⁸ Banga mondmëna, cachënga jtsenábotamnayana ndayá quem luarentše chënga tmojamama, as átsnaca chantsenábotamnye. ¹⁹ Tšëngaftanga chë tša osertánënga, oyejuayënga opëngbioye jtséuantánana. ²⁰ Atše sëndëtatsëmbo tšëngaftanga chë opëngbioye šmnetséuantánama, er tšëngaftanga šmondébetséuantana chë nyets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tcmojtsajuebantšetayënga.

²¹ Atše chca sëntsichamo masque sëntsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiana šmojayancá, tšëngaftangaftaca chca jamama.

Inyenga, chë tsëngaftangbeñe imotrabájanga, ndayama jtsenábotamnayama tmojtsebomñese, puerte uámana ichmónënga imomna ca jtsichámëse, átsnaca añemo sëntsebomna chama jtsenábotamnayama; chca stjayana ora, mo canye opá tojtsoyebuambnacá sëntsoyebuambná. ²² Chënga jtsenábotamnayana hebreaunga imomnama. Atsnaca hebreo sëndmëna. Chënga jtsenábotamnayana Israeloquënga imomnama. Atsnaca Israelocá sëndmëna. Chënga jtsenábotamnayana Abrahámbentsana entsánga imomnama. Atsnaca Abrahámbentsana entsá sëndmëna. ²³ Chënga jtsichámuana Cristo imoservena ca. Atse chëngbiamá cabá más tsabe oservená sëndmëna. Chca stjayana ora, mo canye opá tojtsoyebuambnacá sëntsoyebuambná. Atse chëngbiamá más tijatrabajá, más šmojutame, más šmojatsetšená y ba soye atšbiamá resjo endmëna jóbanama. ²⁴ Shachna soye judiënga šmonjansetšená chë unga bnëtsana y esconëfta soye jasachënjëse, ntšamo chënga jacastígana monduamancá. ²⁵ Unga soye niñëbéngaca šmonjanëtsjanganja, y ndëtsbéngaca canye šmonjanatëchénganja. Unga soye chë atse sënjánënjaquena barco tontsanenatjëmbe, y chca ora, canye šonjanotocá, chë mar béjayoca tsachocana bënoca canye íbeta jëftsebóbíñnana y canye te jëftsejëtanana. ²⁶ Atse becá sënjánana, y chca atšbiamá resjo enjamna bëts fshajayënguiñe y uacuatšënga chašmuebiatbëbama; resjo cach atše entsángbentše, judiënga y ndoñe judiëngbentše; resjo bëts pueblënguentše, entsánga ndoyenentše y mar béjayoca. Atšbíamnaca resjo enjamna chë Jesucristbeyeca atšbiamá catsátanga imomna ca jtsichámuana, pero ndegombre chca ndoñe mondmënéngbeñe. ²⁷ Atse bëtscá tijatrabajá empás uamëntšnayá joquédantscuana; ba soye tijachnëngo íbeta ntsamanacá y ba soye tijachnëngo shëntseca y uajuendayá; ba soye ndayá jasama ntsebomncá; tijasufri sësnama y tondaye entsayama.

²⁸ Quem soyëngama y inyë ndoñe chiyátayana soyëngama más, atse cada te natjëmbana ainánaca ndoñe queschbatsmëna, er ndoñe quetsátstatšëmbo ntšamo nyetsca ošbuachiyëngcá enefjuanënga imojtsiyenana. ²⁹ Ndánaca tsabe soye jamama tondaye añemo tontsebomna ora, atse chabiamá šochandbóngmia, mo átsnaca cach tondaye añémoca cuabndëtsemncá. Nderado ínÿenga tmojama ndánaca bacna soyiñe chaótsatsáma, atse ndegombre puerte ngmëna chandbëtseufrina. ³⁰ Nderado nÿa tojátsiyta atse ndayama jatenábotamnayama, as chë atse tondaye obenana ndbomná tsmënama ínÿanÿnaye soyëngama chtsenábotamnaye. ³¹ Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endëtátšëmbo atse ndegombre stsichámuama chë sëntsoyebuambná soyënguiñe. ³² Atse Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanÿama, atse chašmishachama chëjana stsebocana ora; ³³ pero básefta enutënga, canye sbarëcuiñe šmonsantšjango chë pueblentša shëconana tapiësiñe canye atëfjnëjana, y chca atse sënjanobená chëngbe cucuatšentsana jótsbocana.

12

Ndayá Pablo mo otjenayoquécá tojáninÿe y ndayá Satanás tojanma, Pablo chaosufrima

1 Atše šontsemna más jtsenábotamnayana, masque chca tcojamentšana ndocna tšabe soye ntjóbochnana. Mora chanjóyebuambaye, chë mo otjenayoquécá sënjinýe Bëngbe Bëtsabe soyëngama y Bëngbe Utabná šojinýinýe soyëngama. 2 Atše canýe entšá sënduábuatma, cha Crísoftaca cánýiñe mo canýacá endmëna y nda bnëtsana canta uata entsemna, Bëngbe Bëtsá tbojanátse, chë celoca más tsbanánoye, Bëngbe Bëtsá yomnoye. Atše ndoñe quetsátstátšëmbo Bëngbe Bëtsá cha tbojanánatse chabe cuérpoca o nýe chabe espiritiñe. ¡Nýe Bëngbe Bëtsá chama yotátšëmbo! 3-4 Atše sëndétátšëmbo Bëngbe Bëtsá chë entšábioye celoye tbojanánatsama, nýetscanga oyejuayënga imomnoye (atše ndoñe quetsátstátšëmbo Bëngbe Bëtsá tbojanánatse chabe cuérpoca o nýe chabe espiritiñe; nýe Bëngbe Bëtsá chama yotátšëmbo), y chentše cha tojanuena palabrénga, ndocná bontsemna jayanama palabrénga, chë ndayama entsángbiana ndoñe yontselesenciana jatichámuana. 5 Atše chë entšá sëndmëna. Canýe entšá ndáftaca chca tojopasabiana, tšabá nántsemna chama jtsenábotamnayana; pero cach atšbiana jtsenábotamnayana ndoñe tšabá ntsemnana, ndayá nýe chë atše mo obenana ndbomnacá tsmënama inýinýnaye soyëngama chantsenábotamnaye. 6 Y nderado jtsenábotamnayama atše stseboše, chca ora atše ndoñe stsama mo canýe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiana tbojtsinýanama o ntšamo atšbiana cha tojouenama atše más tsmëna ca. 7 Chýyeca, tša uamaná tsjamna ca atše ntjátšjuabnayama, atše chë Bëngbe Bëtsá tša bëts soyënga tbojaninýinýe entšá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canýe bëts uchmašëfja atšbe cuerpiñe tojtsashacuancá, mo Satanabe ichmona soyca, atše chaisufrima chaomama. 8 Unga soye Bëngbe Utabná sënjaimpadá chca sufrínana chašotsebojuánama; 9 pero Bëngbe Utabná šonjauyana: “Nýe atšbe bonshánana endmëna lempe ntšamo cmojtsajabotcá; nýetscanga atšbe obenana más tšabá jinýana, chë obenana ndbomna entsángbeñe atšbe obenana stjínýanýiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama inýinýnaye soyëngama, Cristbe obenana átšbeñe sempre chaotsomñama. 10 Chýyeca, Crísto jaserviama, oyejuayá chandbëtsemna atše mo obenana ndbomnacá stsemna ora, inýenga šmojtsoyenguá ora, puerte padecena soyënga causa ndayá jamama ndoñe sëntsetatšëmbo ora, atše puerte chaisufrima inýenga tmojtsama ora y puerte tšetšena ainánaca stsemna ora; er chca soyënguiñe stsemna ora, mo canýa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

Nderado ndayá Corintoca ošbuáchiyënga muanjamama Pablo yojánauatja

11 Atše chca chë soyëngama sëntsenabotamná ora sënjoyebuambá mo canýe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanýenga yojtsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnana. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imonna ca juabnayëngbiana, masque atše šontsebiona mo atše tondaye cuaftsamancá. 12 Canýa Jesucristbe ndegombre ichmoná bëtsemnama inýinýnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe

Bëtsabe obenana inÿinÿnaye soyënga y chë tšabe soyënga ntšamo chora tonjanopasacá, puerte tšabá jtsinÿanÿnayana atše canÿe ndegombre ichmoná tsmënama; y atše chca sënjanma, padecena soyënguife puerte uantado jtsemnëse. ¹³ ¿Ndayá tšëngaftanga ndoñe cachcá šmonjanóyëngacñe chë inÿe luarenache ošbuachiyëngcá enefjuanëngbiamá? Canÿe soye aiñe, er tšëngaftangbioye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aiñe sënjalesenciácá. Smochtseperdóna chca bacna soye tšëngaftangbiamá tija-mama.

¹⁴ Atše ya sëntseprontana, móracna unga soyama jama tšëngaftanga jányama, y mora atše cach ndoñe quechochataimpáda atšbe opresidama chašmuatájabuachama. Atše ndoñe quetsátsboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiamá mo canÿe taitacá, Cristbeñe šmonsanošbuachéyeca, atše chabiamá tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiamá. ¹⁵ Y atše corente oyejuayá lempe ntšamo tsbomncá chanjátataye, y atše jopochócantscuanëncá, tšëngaftangbe tšabiamá. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

¹⁶ Ndoñe; tšëngaftanga tšabá šmondëtatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo inÿenga ndayifñnaca jáingñama atše tstátšëmbo ca, chëngbentšana crocénana josháchiñama; y atše catijama, inÿenga jáingñase, nÿe ntšamo atše tsbošcá chamotsamama ca. ¹⁷ ¿O nderado atše tcbjoaingñé, canÿa chë tšëngaftangbioye sënjichamó chentšáftaca? ¹⁸ Tito sënjanimpadá tšëngaftanga jányama chaotsama, y cháftaca sënjanichmó chë inÿa bëngcá Cristbeyeca bëngbe catšata. ¿Nderado Tito tcmojaingñé? ¿Ndoñe ndegombre yondmëna, Tito y atše cachcá fstsjuabná y fstsboše y cachca soyënga jtsamëse ftsiyena? Ndegombre chca endmëna.

¹⁹ Nderado tšëngaftanga šmojtsjuabná bënga jenëuyanama chca cbojtsëtsësná ca; pero ndoñe chca quenátsmëna. Inÿetšá, bënga Crístoftaca cánÿiñe mo canÿacá entšangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucristbeyeca atšbe bonshana catšátanga, tšëngaftangbe tšabiamá tijayana, Cristbeñe corente chašmotsošbuáchema y ainaniñe bëts añemo chašmotsëbomnama. ²⁰ Er atše sëntsauatja, atše jányama chajá ora, ndoñe chacbondánÿena ntšamo tsbošcá, y tšëngaftanga atše ndoñe chašmondínÿena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, inÿengaftaca yapa jtsenántšabošana, ndayánaca rábiaca jtsamana, nÿe tšëngaftangbiamá tšabe soyënga jtsebomnama jtsebošana, inÿengbiamá podësca ichámuana, uayátsenayënga jtsemnana, inÿengbiamá cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chachojánÿenëse, tšëngaftanga ndoñe quešmochátsbošena jóyëngacñana ntšamo tšëngaftanga jucácanama atše šochtsemncá. ²¹ Atše sëntsauatja, cachiñe jányama chajá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngmëncá jošachnama ba tšëngaftangbiamá, ndëmuanÿenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjabaná chë bacna soyënga boyabása o shembásaftaca jtsamama

juabnayana, y chca soyënga jtsamana y nyetsca bacna soyënga jtsamana, jenomándama ntsoberná.

13

Inye soyëngama jábuayenama y jádiosoftama

¹ Móraca ya unga soyama tsëngaftanga jányama chanjá. Atše chajjáshjango ora, tojtseytëse chanjayana ntšamo báseftanga tmojamcá tsabá o ndoñe tsabá bëtsemnana. Nda bacna soye ntšamo Moisesbe leyíñe endëmandancá tojama ora, atše chanjayana cha ndoñe tsabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. ² Atše tempo sënjanabuayená, chë tsëngaftanguentsënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjábananga. Mora, tsëngaftangbentsana bënoca séntsemna ora, cachiñe cachcá cbëtëtabuayená, ntšamo sënjanamcá chë tsëngaftangaftaca uta soyama sënjamna ora: atše cachiñe jányama chajjase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. ³ Atše chca chanjama, er tsëngaftanga šmontsenguá ndayánaca tsabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tsëngaftangaftaca cha tojamama; ndayá chabe bëtš obenana tsëngaftangbeñe bëtscá jtsinÿanÿnayana. ⁴ Er cha tmojanrucificá mo canÿa obenana ndbomnacá; pero mora, Bëngbe Bëtšá puerte obená bëtšómñeyeca, cha tojtayena. Cachcá bëngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtšá puerte obená bëtšómñeyeca, tsëngaftanga jt-saservénama.

⁵ Tsëngaftanga cada ona šmochjshénojuaboye, tsabá jtsetatsëmbuama mocna entsanga bëtsemnana, jtsetatsëmbuama aiñe o ndoñe sempre Cristbeñe puerte tašmuetsošbuáchema. Smochjshénojuaboye chca šmošbuáchema ntšamo šmojtsemnana y tsabá ínÿenga šmochjñÿanÿiye. ¿Ndoñe šmondétatsëmbo Jesucristo tsëngaftangbe ainaniñe yoyenama? Ndoñesna, tsëngaftanga ndegombre ndoñe Cristbeñe ošbuáchiyënga šmontsemna. ⁶ Pero atše séntsobátmana tsëngaftanga ndegombre chašmotsejuabnama bënga Jesucristbe ndegombre ichmónënga ftsmënama. ⁷ Y Bëngbe Bëtšá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënama tsëngaftanga jinÿanÿiyama, ndayá ntšamo tsabá yomncá chašmotsamama. Nyetscanga chca tmojtsamëse, nántsinÿna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënama mo ichmonëngcá, tsëngaftanga jábuayenama. Pero chë soye tondayana šattsentsamna, ⁸ er bënga queftsátobena tondaye jamana Bëngbe Bëtšabe ndegombre soyëngama contra; nÿe ntšamo chabe ndegombre soyënga yomncá aiñe. ⁹ Bënga fsëntseboše ntšamo tsabá yomncá tsëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá ftsemna ora, bëngbe mando jácastigama ntjatinÿanÿnycá, y tsëngaftanga ainaniñe bëtš añëmoca šmojtsemna ora y puerte tsabá šmojtse nománda ora. Bënga Bëngbe Bëtšá fchandbëtseimpadana, chca bacna soyënga amana jtsajbanase, chašmobená jtsemnana nyetsca soyënguiñe tsábënga, y lempe ntšamo tsëngaftanga chašmotsemnana Bëngbe Bëtšá yobošcá. ¹⁰ Quem tsbuanácha

cbontsëbuabiamná tšëngaftangaftaca cabá ndoñe sëntsemna ora; chca, atše choye chaijá ora ndoñe chašondětsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebmomna, y ndoñe tšëngaftanga jatapochócama.

¹¹ Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nÿetscanga cachcá šmochtsejuabnaye, nÿetscángaftaca natjëmbana šmochtsiyena, y Bëngbe Bëtsá, chë cmondababuanÿeshaná y tšëngaftangbe ainaniñe tšabe ebionana chašmotsebmomna endamá, tšëngaftangaftaca echántsemna. ¹² Nÿetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá. ¹³ Nÿetsca quem luaroca ošbuáchiyënga cmontsacheuaná.

¹⁴ Atše, Bëngbe Bëtsá sëntseimpadana, Bëngbe Utabná Jesucristo chaoma, nÿetsca tšëngaftangbeñe tšabe bendicionënga chaotsemnana. Bëngbe Bëtsabe bonshánana sempre chašmotsóbmomñe, y Uámana Espiritu sempre chašmotsóbmomñe, y chë Uámana Espiritoftaca cányiñe mo canyacá chašmotsomñe.

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sěntsabiamná Jesucristbeñe ošbuáchiyëngbiana, chě Galacia luaroca ošbuachiyeñgá enefjuanëngbiana. Jesucristo y Běngbe Bětsá, chě Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Běngbe Bětsá ndocna entšá tbonjanichmó atše chatbe ichmonacá jabuábuayanama. Atše y chě inyënga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. ³ Atše sěntseimpadana Běngbe Bětsá Běngbe Taitá y Běngbe Utabaná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. ⁴ Cristo chabe derecho vida jtsobomñama cachcá tojanonyá y tojanóbana, běngbe bacna soyënguentsana játsebacama, y bęnga chamotsobena jtsiyenama ndoñe ntšamo quem tempo entšanga imoyencá, puerta bacna soyënga imojtsama ora. Cristo tojanóbana ora, tojanma ntšamo Běngbe Bětsá, Běngbe Taitá endmėná yojanboščá. ⁵ Njetscanga njetsca tescama Běngbe Bětsá chamotsatschuaná. Chca chaotsemna.

Nyë canyë ndegombre buayenana soyënga Cristbiana endmėna

⁶ Atšbe ainanoca inyetsá šontsebiona, er nda nanjouena, tšëngaftanga nyë baseftayshinyë y ya juabna šmojatstrocá y Běngbe Bětsá stětsoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerta tšabia tšëngaftangaftaca enjamna. Tšëngaftanga Běngbe Bětsá stětsoye šmojtsequedá, inyënge buayenana soye jouenama, y chě inyënga jtsichámuana chě buayenana soyënga chě tšabe noticiënga canmėna ca. ⁷ Ndegombre, ndoñe quenátsmėna inyë ndegombre buayenánana. Ntšamo entsopasancá męntšá entsemna: báseftanga montsama tšëngaftanga ndoñe natjėmbana ainánaca chašmotsiyenama, y becá montsama chě Cristbiana tšabe noticiënguentšë, ba ndegombre soyënga jtsejuánama, inyë soyënga jacjayama. ⁸ Nderado bęnga o canyë celoca ángel soyënga cmojtsabuayiyná, y ndoñe tontsemna mo chě tšabe noticiënga bęnga tempo tbonjanabuayenacá, as chě chca tojtsamabiana ¡Běngbe Bětsá chaoma infernoca becá chaosufrima! ⁹ Tempo ya chca sėnjánayana; mora cachiñe šcutětayana: Nderado nda soyënga cmojtsabuayiyná, y ndoñe tontsemna mo chě tšabe noticiënga, ntšamo tempo šmonjanoyëngacñěcá, ¡Běngbe Bětsá chabiana chaoma infernoca puerta chaosufrima!

¹⁰ Atše chca stjayana ora, ¿tšëngaftanga cmojtsinýana atše soyënga stsama entšanga oyejuayënga átšeftaca chamotsemnama? Ndoñe chca quenátsmėna. Atše sėndboše ndayá Běngbe Bětsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamėse, atše ya ndoñe Cristbe canyë oservená stsemna.

Ntšamo Běngbe Bětsá Páblėbioye tbojanchembo, Jesucristbe ichmoná jtsemnama

11 Atše sěntseboše tšěngaftanga, Jesucristbeyeca atšbe catšátanga, chašmotsetátšěmbo chě tšabe noticiēnga ntšamo sěndabuayiyinacá quem luarentša entšangbe juabnentšana ndoñe yondóbocanama. 12 Ndocna entšá chě tšabe noticiēnga chešnatanbuayená, ni chešnatanbuatěmbá, ndayá cach Jesucristo šonjaninýinýé.

13 Tšěngaftanga šmojátatšěmbona ntšamo atše tempo tsjanamana jtšiyenana, ntšamo judiēnga Běngbe Bětsá mondadorancá atše cha sěnjanadorana ora, ntšamo atše becá tsjánamama chě ošbuachiyěngcá enefjuanēnga puerte chamosufrima, y ntšamo atše becá tsjánamama ndocná Jesucristbeñe chaondětošbuáchema. 14 Atše inýe judiēnga cach atšcá uata bomnēngbiamá más sěnjánama Běngbe Bětsá adórayiñe, ntšamo judiēnga cha jadóra ma monduamancá, y atše nýets añémoca tša sěnjantšena jtsamama ntšamo bēngbe běts taitanga básenga jabuátambama monjanamancá. 15 Pero Běngbe Bětsá atšbe tšabiamá yojanjuabná, y chíyeca, atše cabá ndonýna ora, canýe běts soyama cha šojanbocacá. 16 Y cha tojánbošena ora, šonjaninýinýé ntšamo ndegombre chabe Uaquíñá yomnana, y šonjanchembo. Cha chca tojanma, atše chě tšabe noticiēnga ndoñe judiēngbeñe chayabuayenama. Y atše ndocnábioye chiyataná ndayá jamama šojsanmēnama chašobuayenama; 17 y Jerusalenoye cach ndoñe chiyataná chě atšbiamá más natsana Jesucristbe ichmónēnga imojamnēngaftaca jencuéntama. Chamna, cachora Arabia uabaina luaroye sěntsanoñe, y chentšana Damasco běts pueblōye sěntaná.

18 Jesucristbeñe jtsošbuáchiyama sěnjanóntša orscana, unga uatěse Jerusalenoye sěnjána Pédroftaca jencuéntama, y cháftaca nýe uta semana sěnjěftsemna. 19 Y ndocna chě Jesucristbe inýe ichmónēnga chiyáisananye; nýe Santiago aínfe, Běngbe Utabnabe catšata. 20 Běngbe Bětsá šontsonýá, ntšamo tšěngaftanga cbontsětsětsnacá ndegombre bětsemnama.

21 Jerusalenocana sěnjěftsanbocnentšana, Siria y Cilicia luarēngoye sěnjána. 22 Pero chě tempo, chě Jesucristbeñe ošbuáchiyēnga Judea luariñe bomínýeca ndoñe quešmēnjatanábuatma. 23 Nýe ínýengbioye imojtsayaunana: “Nda tempo bēnga puerte chamotsesufrinama enjanamá, mora entšanga entsabuayiná, Jesucristbeñe jtsošbuáchiyama caojtsamna ca. Y tempo cha tša enjánboše jamama entšanga Jesucristbeñe ndoñe chamondětšošbuáchema ca” —chēnga imojtsichamo. 24 Y entšanga Běngbe Bětsá imojtsatschuanaye, ndayá cha atšbiajana tojanmama.

2

Chě inýe ichmónēnga tmojánayana Pablo aínfe tšabá yojtsama ca

1 Jerusalenoye sěnjána orscana bnětsana canta uatěse, cachíne choye sějjesaná. Bernabé šonjantjěmbambá, y Tito běndátaftaca fsějěftsanbetše. 2 Choye sěnjána, choye jama šojammama Běngbe Bětsá šonjaninýanýeyeca. Atše nýe chě Jesucristbeñe ošbuáchiyēngbiamá uámanēnga imojamnēngaftaca sěnjanencuéntá, ínýengaftaca ndoñe; y chě tšabe noticiēngama chě ndoñe judiēngbeñe sěndabuayiyinama chēnga sěnjanacuntá. Chca sěnjanma atše jtsetatšěmbuama, ntšamo tijanma y sěnjěftsamcá ndoñe nýe bonamente yonjamnama. 3 Pero chēnga tmonjánayana atše aínfe tšabá tijanma ca, y Tito, chě átšeftaca enjamná, masque Grecia luarocá enjamna, chēnga ndoñe chematanmandá base bobachtema chě más delicadentše tětšená chaotsemnama, ntšamo judiēnga monduamancá, Běngbe Bětsábenga imomnama

chaotsinýnama. ⁴ Chca tonjanopasá, masque ínýenga monjánboše Tito base bobachtema chë más delicadentše tétšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojsanopasánama chë ošbuáchiyënga ntsetatšëmbcá, mo chë ošbuáchiyëngbiana bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nyëts tempo mandánënga chamot-siyenama. ⁵ Pero bënga ndocna ora fchiyátanayana aiñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tsëngaftanga nyëts tempo Jesucristbe ndegombre tsabe noticiënga chašmotsóbmñama.

⁶ Pero chë ndëmuanýëngbiana entšanga monjánichamo chë uánatsanënga imojamna ca (ndayá chënga tempo imojamna atšbiana ndoñe quenatámana; Bëngbe Bëtsabiana nyëtscanga cachcá monduámana), chëngna tondaye chešmatanbuayená, ntšamo tempo tijanmama inýetšá chaimama. ⁷ Marna, chënga tmonjántatšëmbona, Bëngbe Bëtsá chë tsabe noticiënga ndoñe judiënga jábuayenama trabajo atše jamama šojanëntsabuáchemá, ntšamo judiënga jábuayenama cachcá Pédrëbioye tbojanëntsabuachecá. ⁸ Er Bëngbe Bëtsá atše chabe ichmoná šonjábema, ndoñe judiënga chabiana jábuayenama, ntšamo cachá Pédrëbioye chabe ichmoná tbojanbemcá, judiënga chabiana jábuayenama.

⁹ Santiago, Pedro y Juan, chë ošbuachiyënguentša uánatsanënga, atše canýe bëtš trabajo chaitsebomnama Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabëbioye, jinýinýiyama chënga šojanënbuajama mo cachëngbe trabajo amatcá. Y fsënjanenoyeuná bëndata jama, marna ndoñe judiënga jtsabuayinayama trabajo jamama, y chëngna judiëngbeñe. ¹⁰ Chënga nyë šonjanaimpádaye chë ošbuáchiyënga ndbomñëjmënga Jerusalenokuëngbiana jtsenójuabnayama; y atše bëtscá séntsama chënga juabuáchama.

Pablo Antioquioca Pédrëbiana tojánayana cha ndoñe tsabá tojanma ca

¹¹ Pero Pedro Antioquía bëtš puebløye tonjánabo ora, chabe delante sënjánayana cha ndoñe tsabá tonjanma ca, er ntšamo enjanamcá ndoñe tsabá quenjatsmëna. ¹² Mëntšá tonjanopasá: Santiago básefta entšanga Antioquiøye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojsanajbaná chëngaftaca sayana y encuëntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše tétšenënga jtsemnama yojánamna ca tmojánayanënga, chabiana muanjájuaoyama yojsauatja causa. ¹³ Chë inýe judiënga ošbuachiyëngnaca tmojanontšë amana cachcá ntšamo Pedro yojsamcá, jtsamëse ntšamo chënga imojántatšëmbo chca jamama ndoñe yonjanamcá. Y Bernabénaca, ntšamo chënga imojtsamcá jtonýayëse, chëngcá yojsama, jtsamëse ntšamo cha yojántatšëmbo chca jamama ndoñe ibonjamncá. ¹⁴ Chënga ndoñe quemënjátanayana jtsamëse ntšamo yojanamncá, ntšamo chë Jesucristbe tsabe noticiënguentša ndegombre

soyënga endmëncá. Chca sënjaninye ora, Pédrëbiyoe nyetsca ošbuáchiyënge delante sënjanianyana: “Aca canyë judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchemá

¹⁵ Bënga judiënga fsëndmëna, bëngbe bëtsëtsanga judiënga monjámnyeyca, y ntšamo judiënga chë ndoñe judiëngbiyoe mondubobuatmcá, chë “bacna soye amënga ca”, ndoñe queftsátsmëna. ¹⁶ Y bënga mondëtatšëmbo, canyë entšá Jesucristbeñe tojtsošbuáchemá, Bëngbe Bëtsá jamana cha chabe bominyiñe tšabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominyiñe tšábenga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canyë entšá chabe bominyiñe tšabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

¹⁷ Pero, bënga bëtscá mondënguá, Bëngbe Bëtsá chaomama bënga chabe bominyiñe tšábenga chamotsemnana, bënga Crístoftaca cányiñe mo canyácá jtsemnëse, chábeñe imošbuáchemá. Chca mondošbuaché, bënga chë bacna soyëngama perdonánënga chamotsemnana. Pero inyë entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! ¹⁸ Atše, ntšamo Bëngbe Bëtsá šojaninyiñecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplinana perdonánënga jtsemnana, atše stsemna mo nda ndayá cachá tojtsemdbema y cachiñe tojtëtsjebuanacá; y ndegombre, atše stsemna canyá ntšamo ndoñe tšabá yondmëncá amá. ¹⁹ Chë judiëngbe leyëngaca atše sëndëtatšëmbo, ntšamo chë leyënguiñe iuayancá tsamëse, Bëngbe Bëtsá ndoñe yochanjama atše chabe bominyiñe tšabia chaitsemnana; y chca, atše jtsemnana mo obanacá chë castígoca, er chë leyentša mandënga tsamëse, ndoñe quetsátobena atsbocaná jtsemnana. Chë léyeca ndoñe más mandaná ntsemnana jtsebošëse, atše cachcá chë ley sënjanonyá, Jesucristbeñe jtsošbuáchiyama; y chca, atše chaitsobena jtsiyenana Bëngbe Bëtsá jtseservëñe. Atše Crístoftaca cányiñe mo canyácá sëndmënyeyca, Cristo cruciñe tojanóbana ora enjamna mo átšnaca cuaftjobancá; ²⁰ y mora entsemna mo nye atše ya ndoñe cuaftsiyencá, Cristo becá vida atšbe ainaniñe entsebómnyeyca. Y ntšamo mora atše vida sëntsebomncá, entsemna atše chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonyá y atšbe tšabiamá tojanóbana. ²¹ Atše ndoñe quetsatábotena ntšamo Bëngbe Bëtsá entšangbe tšabiamá juabna yobomncá. Nderado Bëngbe Bëtsá tojama canyë entšá chabe bominyiñe tšabia chaotsemnana, ntšamo chë leyiñe jamama yomna ca iuayancá cha tojtšamama, as Cristo nye tondayama matëñjanóbana.

3

Ley jtsobedecénese o Jesucristbeñe jtsosbuáchiyese

¹ ¡Tšëngaftanga Galacientša entsanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana chon-janabuayiyná, Jesucristo cruciñe tojanóbanama. ² Atše sëntseboše nýe canýe soye atše chašmëyana: ¿Uámana Espiritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? ³ ¿Ndáyeca tša ndenójuabnayënga šmomna? Bëngbe Bëtsabe Espiritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nýe entsangbe juabnëngaca jtsiyenese? ⁴ ¿Nyetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. ⁵ Bëngbe Bëtsá, chë Uámana Espiritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtšamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chiýeca Bëngbe Bëtsá tonjánayana cha chabe bominiýiñe tšabia yojamna ca.” ⁷ Chiýeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahábentšana entsangcá, cachcá ošbuáchiyana bëtsebomnana, chë chábentšana ndegombre entsangbiamá más. ⁸ Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiýiñe tšábenga chamotsemnana, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acheyeca, atše chanjama nyetsca quem luarentša entsanga tšabe bendicionënga chamotsebomnana ca.” ⁹ Bëngbe Bëtsá tojanma Abraham ba tšabe bendicionënga chaotsebomnana, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamá tšabe soyënga tojanmcá.

¹⁰ Chë Bëngbe Bëtsá chabe bominiýiñe tšábenga yochjábiama ca juabnayënga, ntšamo leyiñe jamama yomna ca iuayancá lempe tmojtsobedecénama, chënga nyëts tempo jtsiyenana jtsetatšëmbëse Bëngbe Bëtsá nyetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyëts tempo ndoñe tontsama nyetsca mandënga ntšamo chë leyënguiñe iuabemancá ca.” ¹¹ Ndegombre, puerte tšabá entsinýinýena, Bëngbe Bëtsá ndoñe yochanjama ndocná chabe bominiýiñe tšabia chaotsemnana, ntšamo chë leyiñe jamama ibomna ca iuayancá tojtsobedecénese. Chca ndegombre endmëna, er Bëngbe Bëtsabe uabemana palabrënguiñe mëntšá endayana: “Nýe ndabiamá Bëngbe Bëtsá tojama chabe bominiýiñe tšabia chaotsemnana, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.” ¹² Jtsamana

ntšamo chë leyënguifne jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrénguifne endayancá: “Nda tojtsama nyetsca mandënga ntšamo chë leyënguifne endayancá, tšabe vida echántsebmoma, nyets tempo chë leyëngaca mandaná ca.”

¹³ Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnana, ntšamo chë leyifne iuayancá ndoñe tmontsama causa. Ntšamo Bëngbe Bëtsabe uabemana palabrénguifne endayancá: “Nyetsca tescama castigo chaotsebmoma, nda canye niñëšifne tmojajonýa chaóbanama cha ca.” ¹⁴ Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámioye tbojanšbuachenacá, ndoñe judiëngnaca chamotsebmoma, Cristo Jesúsbeýeca; y Jesucristbeñe ošbuachiyánaca, Bëngbe Bëtsá chaomama chë Uámama Espiritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócama

¹⁵ Jesucristbeyeca catšátanga, chë ndayá sentsichamcá endmëna ntšamo nyets tempo entšangbeñe endbetsopasancá. Uta entšata tbojenoyeuná canye trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemëse, ndocná inýa más ntsobenana jayanana ntšamo tbojentratacá ndoñe yontsoservena ca; y inye soyënga chiñe jacjayama cach ndoñe. ¹⁶ Chcasna, Bëngbe Bëtsá ba soye Abrahámioye tbojanšbuachená puerte tšabe bendicionënga chabiama jamama, y chabe entšanguentšana canýabiámna. Y Bëngbe Bëtsabe uabemana palabrénguifne ndoñe quenátayana: “chabe entšanguentsëngbiámna ca”, mo Bëngbe Bëtsá ba entšangbiama cuafstichamcá; sinó mëntšá endayana: “acbe entšanguentšana canýabiama ca”. Y chca entsayana, nye canye entšá ca; y cha endmëna Cristo. ¹⁷ Atše ndayá mëntšá cbontsëtsëtná: Natšana, Bëngbe Bëtsá Abrahánoftaca canye trato tojánbema, y tbojaniyana “aifne ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšifne chë leyënga tbojanántšaboshjona; chíyeca, chë leyënga ndoñe ntsobenana jamana chë Bëngbe Bëtsá Abrahánoftaca tojánbema trato ndoñe chaondëtsošservënama, ni jamana ndayá Bëngbe Bëtsá tojanšbuachenacá ndoñe chaondëtsošservënama. ¹⁸ Er ndayá Bëngbe Bëtsá chabe entšanga tojatšatacá, tojtsemna chënga ntšamo chë leyifne jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiamama tojanma.

¹⁹ Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahámioye tbojanšbuáchenantšana baytese. Bëngbe Bëtsá yojanjuabná chë ley chaoservé entšanga jinýanýiyama ndayá tšabá o ndoñe tšabá jamama bëtsemnana, chë Abrahámntšana Uámama Entšá jashjanguëntscuana, ndabiamama Bëngbe Bëtsá Abrahámioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšifne tbojanántšaboshjona,

y chë entsá Moisés enjamna chë oyebuambnayá Bëngbe Bëtsáftaca y entsángaftaca. ²⁰ Uta entsata canye trato jénbemamna, jtseytana inye entsá chë uta entsáaftaca chaóyebuambama; pero Bëngbe Bëtsá Abrahámbioye ba tšabe soyënga jamama tbojansbuachená ora, nye canya chca tojanma, y ndoñe bonjanájaboto inya chabiamna Abrahánoftaca chaóyebuambama.

Ndayama chë ley yomna

²¹ ¿Chca nántsayana, ntšamo Moisesbe leyiñe iuayancá, chë Bëngbe Bëtsá tojansbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entsangbe cucuatšine canye ley tojanáboshjona, y chë ley tojtsovena jamana entsanga ndegombre tšabe vida chamotsebomnana, as Bëngbe Bëtsá nanjama entsanga chabe bominyiñe tšábenga chamotsemnana, ntšamo chë leyiñe jamama yomna ca iuayancá tmojtsamama. ²² Pero Bëngbe Bëtsabe uabemana palabrënguiñe endayana, nyetsca quem luarentša entsanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jýyëngacñama. Y chënga, Jesucristbeñe imojtsošbuáchema imojtsebomna ndayá Bëngbe Bëtsá tojanašebuachenacá.

²³ Jesucristbeñe jtošbuáchiyama entsanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entsanga Jesucristbeñe muanjobenaye jtošbuáchiyama Bëngbe Bëtsá jinñanyiyama tempo joshjanguëntscuana. ²⁴ Cristo jabama tempo tonjanoshjanguëntscuana, chë ley bëngbiamna enjamna mo canye pamillëntša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Cristbeñe jtošbuáchiyama chamobenama, y chca, Bëngbe Bëtsá chaoma bënga chabe bominyiñe tšábenga chamotsemnana. ²⁵ Pero Jesucristbeñe jtošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entsacá, ndayá tšabá yomncá bënga chamotsamama cuaftsamcá. ²⁶ Cristo Jesúsbeñe šmojtsošbuáchema, nyetsca tšëngaftanga šmojobená Bëngbe Bëtsabe básenga jtsemnana, Cristo Jesúseftaca cányiñe mo canyáca jtsemnëse. ²⁷ Tšëngaftanga tmonjanëbaye, y chca, Crístoftaca cányiñe mo canyáca šmontsemna. Y mora šmojobená mo cach Crístcá jtsemnana. ²⁸ Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nyets tempo nye inñabiamna oservénënga y chë nye cachëngbiamna trabájayënga cachcanga, y boyabásënga y shembásëngnaca. Nyetsca tšëngaftanga mo canyáca šmondmëna, Cristo Jesúseftaca cányiñe mo canyáca jtsemnëse. ²⁹ Tšëngaftanga Cristbe entsanga šmondmënayeca, šmontsemna mo Abrahámbentšana entsanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjýyëngacñe.

4

¹ Atšnaca sëntseboše jayanama, chë uaqiñá nda yochjóyëngacñe ntšamo tbojtsotocancá, ntšamo chabe taitá jatsetayama tbojašbuachenacá, cha cabá mo canye basacá tojtsemnëntscuana, ndocna derecho chë soyënguiñe ntsebomnana; y chca, cha jtsemnana mo canya nyets tempo nye inñabiamna oservenacá, masque lempe ntšamo chabe taitá tbojašbuachenacá chë

uaquiñabiana tojtsemna. ² Chë uaquiñá tojtsobóchantscuana, entsanga jtsemnana ndëmuanýenga ntšamo cha tbojtsajabotcá jtsoinayana, y ínýenga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. ³ Mo cachca cuaftsemncá, bënga chë ndegombre soyëngama cabá ndosértaye ora, bëngnaca mandánënga monjamna mo nyets tempo nýe ínýabiana oservenëngcá, quem luarentse imománda espiritëngaca. ⁴ Pero Bëngbe Bëtsá chabe Uaquiñá quem luaroye tbojanichmó, nýa chama tempo tojanóshjango ora; cha mo nyetsca entsangcá, canýe shembásabentsana tojanonýná, y vojjoyena jtsamëse ntšamo judiëngbe leyiñe jamama ibojamna ca yojanayancá jtsamëse. ⁵ Quem luaroye chca tojánabo bënga jabátsebacama, y chamotsobenama Bëngbe Bëtsabe basengcá jtsemnana, bënga chë tempo šonjánamna chë ley jtsobedecénana. ⁶ Y chca, tsëngaftanga ya chabe básenga šmojtsemnana jinýanýiyama, Bëngbe Bëtsá chabe Uaquiñabe Espíritu tbojanichmó, nyetscangbe ainaniñe cháumashënguama, y chë Espíritu endama bënga Bëngbe Bëtsá chamochembo, “Atšbe Taita ca”. ⁷ Mëntsá, cada ona tsëngaftanguentsá ya ndoñe quenátsmëna mo chë nyets tempo nýe ínýabiana oservenëngcá, quem luarentse imománda espiritëngaca mandánënga, y aifñe Bëngbe Bëtsabe basa tojoquedá. Y chabe basa tojoquedayeca, lempe ntšamo Bëngbe Bëtsá chabe básenga jatšatayama tojašebuachenacá cha echanjójyëngacñe.

Pablo, Galacia luaroquëngbiana ngménaca yojtsanjuabnaye

⁸ Tempo, Bëngbe Bëtsá ndoñe šmonjanábuatma ora, tsëngaftanga šmojamna mo nyets tempo nýe ínýabiana oservenëngcá, ndoñe ndegombre diosënga mondmëna espiritëngaca mandánënga. ⁹ Pero mora, Bëngbe Bëtsábioye šmontsábuatma ora, o tsábá jayanama, Bëngbe Bëtsá cmojtsëbuatma ora, ¿ntšámoyeca tsëngaftanga cachiñe chë quem luarentse imománda espiritënga šmojtsayaunana? Chënga ndocna obenana quemátsbomna, y nduámanënga mondmëna. ¿Ndáyeca tsëngaftanga šmojtseboše cachiñe jtsemnana mo chë nyets tempo nýe ínýabiana oservenëngcá, chë espiritëngaca mandánënga? ¹⁰ Tsëngaftanga tša jtsejuabnayana diënguiñe, shinýënguiñe, canýe uatentša tempënguiñe y uatënguiñe, mo uámana tempëngcá Bëngbe Bëtsá tsábá jadórama, y chama bëts fiestënga jtsebomnana. ¹¹ Atše corente šontsengmena, nderado atšbe trabajo tsëngaftangbeñe tondayama tonjoservé.

¹² Jesucristbeyeca atšbe catsátanga, bëtscá cbontsaimpadana, šmochtsiyena jtsamëse ntšamo atše sëndamcá, er átsnaca sënjobema ntšamo tsëngaftanga ndoñe judiënga šmondmëncá. Tsëngaftanga ndocna bacna soye atše chešatsborlá. ¹³ Tsëngaftanga šmondétatšëmbo, atše sënjanobená chë natsana soyama tsëngaftanga chë tsabe noticiënga jábuayenama, canýe šocana šonjanontšáshjango causa. ¹⁴ Atše canýe šocana sënjánbomna causa, tsëngaftangbiana ndoñe paselo quenjatsmëna tsëngaftangbeñe atše jofjana; pero masque chca, tsëngaftanga ndoñe chešmatanaboté, ni quešmatanáboyënja; masna, tsëngaftangbeñe tsábá šmonjanofja; šmonjanofja mo canýe ángel Bëngbe Bëtsabe ichmoná šmojofcá, o cach Jesucristbioyca. ¹⁵ Ndayá chora tsëngaftangaftaca enjanopasancá, puerte oyejuayënga tcmonjánabiana. ¿Y mora ndayá tojopasá? Ndegombre, atše sëndétatšëmbo y sentsobena jayanama, tsëngaftanga ndaye sóynaca atšbiana mašmënjannama.

Chë más uámana šmojánbomna soyënga atšbe cucuatšíne mašmënjánboshjona, y nÿa mo chë bominyëgnaca masmënjánenobuchjatsëca atše jatšetayama. ¹⁶ Y morna, ¿ntšamo ndegombre yomncá cbojtsëtsëtsnama, atšbiamá šmojtsejuabná mo tšëngaftangbe uayayá cuaftsemncá cá?

¹⁷ Chë ndoñe ndegombre soyënga buátëmbayënga montsinÿinÿná mo tšëngaftangbiamá ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbiamá ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnana, chentšana tšëngaftanga chëngaftaca jtsemnana chašmotsebošama y chënga chašmotsababuánÿeshanama. ¹⁸ Puerte tšabá endmëna atše y inÿenga chafstseboše tšëngaftangaftaca amiguënga jtsemnana, canÿe tšabe soye jamama tojtsemnëse; y sempre chca chauëtsemna, tšabiamá tojtsemnëse, y ndoñe nÿe atše chentše tšëngaftangaftaca stsemna ora. ¹⁹ Tšëngaftanga, chë atšbiamá mo atšbe basengcá šmondmëñënga, Jesucristbeñe chašmošbuáchemá tcbonjanëjabuácheyeca; atše cachiñe séntsesufrina tšëngaftangbe causa, ntšamo canÿe šešona jtsebmomna ora canÿe shembásá jtseufrinancá; y atše chca chanjëftsesentína, ntšamo Cristo endmëncá tšëngaftangbe vidiñe ndegombre chaojtsebínÿnëntscuana. ²⁰ Malaye atše, mora tšëngaftangaftaca stsemna, atše jobenayama jinÿanÿiyama, cach tšëngaftanga jáuyanëse, ntšamo ndegombre atše tšëngaftangbiamá tsësentínana. Atše tša šontsecochëngmena tšëngaftangbiamá.

Ntšamo Agar y Sáraftaca tojanopasá

²¹ Canÿe soye šmochjauyana, tšëngaftanga chë Moisesbe léyeca mandánënga jtsemnana šmojtsebošënga. ¿Ntšamo chë leyíne endayancá tacmojtsësertana? ²² Chiñe endayana, Abraham uta uaquíñata yojánabamna ca; cánÿana Agárbeñe, canÿa chabe shembiamá nÿets tempo oservená; y chë inÿana, cachabe shëmebeñe, Sara, y mua ndocnabiamá nÿets tempo oservená yonjamna. ²³ Chë chabe shembiamá nÿets tempo oservenabe šešona, tojanonÿná nÿe Abraham y Agar chca chaotsemnana tbojánbošenayeca; y cachabe shembe šešona tojanonÿná, Bëngbe Bëtsá chë soye jamama Abrahámbye tbojanšbuachenáyeca.

²⁴ Ntšamo Agar y Sara, y chatbe šešónataftaca tojanopasacá, bënga canÿe uámana soye šontsabuatambá. Ndayá chë uta shembásataftaca tojanopasacá, uta trato entsinÿinÿná: chë shembásá Agar, chë nÿets tempo nÿe inÿabiamá oservená yojamná, entsinÿinÿná chë trato Bëngbe Bëtsá y Israelaca entsángaftaca, chë Moisésoftaca Bëngbe Bëtsá leyënga entsangbe cucuatšíne tojanáboshjona ora. Agar básenga yojtsabamna ora, chëngnaca tmojanonÿná nÿe inÿabiamá nÿets tempo oservëñënga jtsemnana, y chë tratentša leyíne soyëngaca mandánënga jtsemnana tmojtsebošëgnaca jtsemnana mo nÿe inÿabiamá nÿets tempo oservenëngcá. ²⁵ Ndayá Agáraftaca tojanopasacá entsinÿinÿná chë Sinaí batsjoca tmojánbema trato, Arabia luroca; y chë morsca bëts pueblo Jerusalénënga entsinÿinÿná, er chentša entsanga montsemna chë leyëngaca mandánënga. Ntšamo Agar y chabe básenga nÿe inÿabiamá nÿets tempo oservëñënga monjamncá, Jerusalemntša entsángnaca cachcá chëngcá mondmëna, chë leyëngaca nÿets tempo mandánënga bëtsemnayeca. ²⁶ Ndayá Sáraftaca tojanopasacá, chë nÿe

cachabiamia trabájaye shembása, entsinýinýná chë trato, chë tsabe bendicionënga Abrahambiamia jamama chábioye tbojanšbuachená ora. Chánaca entsinýinýná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Cristbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entsanga. ²⁷ Chë celoca Jerusalén endmëna chë ndegombre bëts pueblo chë Jesucristbeñe ošbuáchiyëngbiama, y chca endmëna mo canýe shembása šešonga ndabamná y aífne chaotsabamnama Bëngbe Bëtsá cuafjamcá. Quem luarentša Jerusalén endmëna chë uamana luare chë léyeca mandánënga imomnëngbiama, y chca endmëna mo canýe shembása aífne boyaftaquécá, er Bëngbe Bëtsabe uabemana palabrënguiñe chë shembásatbiamia mëntšá endayana:

Shembása šešonga ndabamná, y ndocna te tsetšanënga ndbomná šešona jtsebomnama,

moyejuá y moyó oyejuayá cojtsemnama.

Chca moma, er aca, chë shembása chabe boyabiamia utšená, chë shembása boyá bomnabiamia más básenga cochántsabamna ca.

²⁸ Chcasna, Jesucristbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tsëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. ²⁹ Ntšamo chë tempo tojanopasacá, chë Isaac chaosufrima Ismael tojanmá (Ismael, Abrahambe uaquiñá Agárbeñe, chë nýe chata chca tbojánbošenayeca onýnaná; Isaac, chë Bëngbe Bëtsabe Espíritbeyeca onýnaná), mórnaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. ³⁰ Pero, ¿ndayá Bëngbe Bëtsabe uabemana palabrënguiñe Abrahambe básatbiamia iuayana? Mëntšá endayana: “Moma, chë nýets tempo nýe ínýabiamia oservená y chabe basa acbe yebnentšana chábuaisebocnama, er chë nýets tempo nýe ínýabiamia oservenabe šešona ndoñe quenátobena chabe taitabe soyënga jtsebomnama. Nýe chë propio shembe šešona aífne, er chë shemna ndoñe nýe ínýabiamia nýets tempo oservená quenátsmëna.”

³¹ Chcasna, Jesucristbeyeca atšbe catšátanga, bënga ndoñe quemuátsmëna mo canýa nýe ínýabiamia nýets tempo oservenabe básenga cuaftsemncá, er mora ya ndoñe más quemuátsmëna chë léyeca nýets tempo mandánënga. Y aífne montsemna mo canýe shema ndoñe nýe ínýabiamia nýets tempo oservenabe básenga cuaftsemncá, er Bëngbe Bëtsabe básenga bënga mondmëna.

5

Cristo bënga šojatsebacá

¹ Cristo bënga šojatsebacá, ndoñe más mo chë nýets tempo nýe ínýabiamia oservenëngcá chamondëtsiyenama, chë léyeca mandánënga. Nýa šmochtsentšena nýets tempo chca atsebácanënga chašmoquedama, y ndoñe šmatjaleséncia tsëngaftanga cachiñe chë léyeca mandánënga ínýenga chácmbiamama.

² Tsabá šmochjouena. Atšbe Pablo cbëyana: Nderado tsëngaftanga ndoñe judiënga, šmojalesenciá ínýenga chë tsëngaftangbe más delicadentše base bobachtema chamotëtšama, ntšamo judiënga monduamancá, asna,

ndayá Cristo tsëngaftangbiamá tojanmcá tondayama nantsoservena. ³ Ndëmuanyë entsánaca, nda tojalesenciá inýenga chabe más delicadentse base bobachtema chamotëtšama, cachiñe cha šcobauyená: Mora aca cmontsemna nyetsca chë judiëngbe leyentša mandënga jtsobedecënaná. ⁴ Ndëmuanyënga tsëngaftangbentšana šmojtšenguá, Bëngbe Bëtsabe bominýiñe tsábenga jtsemnana, ntšamo leyiñe jamama yomna ca uyayancá jtsamëse, tsëngaftanga chca šmojtšamama, šmojama Crístoftaca cánýiñe mo canýacá ndoñe chašmondëtsemnana; Bëngbe Bëtsábentšánënaná šmojtšoluare, y chca, šmontsinýanýná tsëngaftanga ndoñe šmontseboše, Bëngbe Bëtsá tsëngaftangbe tsábiamá jtsejuabnayëse, chácmatsebacana. ⁵ Pero bënga, Bëngbe Bëtsabeñe jtsošbuáchiyëse, mondobátmana cha yochjama bënga chabe bominýiñe tsábenga nyets tempo chamotsemnana. Y bënga chca mondobátmana, Jesucristbeñe ošbuáchiyana bómnyeyca, y chë ošbuáchiyana chë Uámana Espíritbiajana bëngbioye endobá. ⁶ Er Crístoftaca cánýiñe mo canýacá tmojtsemna ora, añe base bobachtema tëtšenënga tmojtsemna o ndoñe, tondaye ntsámanana; ndayá puerte enduámana endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinýanýná inýenga jtsababuánýeshanëse.

⁷ Tsëngaftanga tsábá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tsëngaftanga chašmotsajbanama chë Bëngbe Bëtsabe ndegombre soyënga jtsuenanama? ⁸ Ndegombre, Bëngbe Bëtsá ndoñe quenátsmëna, er cha tsëngaftanga tcmojáchembo chabe entsanga chašmotsemnana. ⁹ Ntšamo entsanga mondëntšayancá: “Nyë base levadura jamana nyetsana chauabochama ca”; cachcá, tsëngaftanga chë judiëngbe básefta leyëngaca mandánënga jtsemnana šmojabojátšese, šmuatjábocna nyetsca leyëngaca mandánënga. ¹⁰ Bënga Bëngbe Utabnáftaca cánýiñe mo canýacá bëtsemnayeyca, atše corente sëntsetatšëmbo, ntšamo atšbe juabna yomncá tsëngaftángnaca cachcá šmochtsejuabnayama; y átšnaca corente sëntsetatšëmbo Bëngbe Bëtsá puerte bochjacastíga, nda tsëngaftanga natjëmbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

¹¹ Y atšbiamá chanjayana, Jesucristbeyeyca atšbe catsátanga, Jesucristbeñe ošbuáchiyënga base bobachtema chëngbe más delicadentse tëtšenënga chamotsemnana entsanga cabá stsabuayinnyase, entsanga ya ndoñe muantsama atše chaitesufrínama. Atše chca tsamëse, Cristo cruciñe tojanóbanama ntšamo uyayancá entsanga stsabuayinnyá ora, chënga ya ndoñe átšeftaca nanjósentiaye. ¹² Pero chë natjëmbana ainánaca ndoñe chašmondëtsiyenama imojtsamëngna, jmalaye cachënga muanjenocbónal

¹³ Pero tsëngaftanga, Jesucristbeyeyca atšbe catsátanga, Bëngbe Bëtsá tcmojáchembo chë judiëngbe léyeyca ndëmandánënga chašmotsemnana. Pero chca bëtsemnana, mora ndoñe šmatjátšjuabnaye šmojtšobena jalesénciana, nyë tsëngaftangbe cuerpënga tsábá chamotsemnana juabnëngaca mandánënga jatiyenama. Chamna, tsëngaftanga šmuenbobonshánayeyca, nyetscanga šmochtšenájabuachana. ¹⁴ Er ntšamo Moisesbe leyentša nyetsca mandënguñe endayancá, nyë canýe mandíñe lempe chca entsayana. Y chë mando endmëna: “Ndëmuá entsánaca cochtsebobonshana ntšamo cach aca cuenobobonshancá.” ¹⁵ Pero inýenga chamotsesufrínama jtsamëse tsëngaftanga šmojtšiyenëse, mo tsátjaye bayënga tmojtšenashantsná

y tmojtšenobanacá, cuedado šmochtsebomna. Ndóñese, nyetscanga šmatjánenpochocaye.

Ntšamo chë Bëngbe Bëtsabe Espíritbeyeca vida jtsebomnama

¹⁶ Chíyeca cbochjáuyana: Nyets tempo šmochtsiyena ntšamo chë Uámana Espiritu cmojtšamëndacá, y chca, tsëngaftanga ndoñe quešmochátama soyënga, nye cach tsëngaftanga tsabá jtsomñama juabnëngaca. ¹⁷ Er ndayá bënga, nye entšangbe juábnaca jamama mondbošcá, jtsemnana ndayá chë Uámana Espiritu bënga chamomama yobošcá contra; y ndayá chë Uámana Espiritu bënga chamomama yobošcá, jtsemnana ndayá bënga, nye entšangbe juábnaca jamama imobošcá contra. Chca endmënayeca, ntšamo chë Uámana Espiritu chašmomama yobošcá šmojtšamëse, ndoñe quešmátobena jamana, ndayá cach tsëngaftanga, nye entšangbe juábnaca jamama šmojtšabošcá. ¹⁸ Tsëngaftanga, ntšamo chë Uámana Espiritu cmojtšamëndacá šmojtšamëse, ndoñe quecmátamna ntšamo chë leyiñe iuayancá játamama.

¹⁹ Ntšamo entšanga, nye entšangbe juábnaca tmojtšamcá, nyetscanga paselo jtsonyayana: chënga bacna soye boyabása o shembásaftaca jtsamana, nye chca soyëngama jësejuabnyana, y ndoñe ntšobenana cachënga jenomándama, chca soyënga jtsamëse. ²⁰ Ba uabouana soyënga jtsamana, diosënga yomna ca tmojtsejuabná soyënga jadórana, jtsencjuanayana, ínÿengaftaca jtšenáyayana, nyetscanga ndoñe cachcá chamondëtsejuabnama jtsamana, ínÿengaftaca yapa jtšenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. ²¹ Nye jtsebošana ntšamo inÿa tojatashjachcá jtsebomnama, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše chabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

²² Pero, Uámana Espiritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjëmbana ínÿengaftaca jtšiyenana, puerte uantado nyetsca padecëniñe jtsemnana, nyetscanga corente bonshanánaca jtšénÿayana, tšabe ainana jtsebomnana, y nyëtšcañe tšabe palabra bomnënga jtsemnana, ²³ jtsejuabnyana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtšobenana. Y ndocna ley quenátsmëna, chca soyënga tmojtšama entšangbiamá contra cháuyanama. ²⁴ Jesucristbenga imomnënga tmojama, chënga chë nye entšangbe juabnëngaca mandánënga ndoñe ntsemnana; ya ndoñe más, chë nye cachënga tsabá jtsomñama bacna juabnëngaca mandánënga quemátsmëna, y chë nye cachëngbiamá soyënga jamama bëtscá juabnëngaca cach ndoñe. ²⁵ Bënga ndegombre tšabe vida chamotsebomnama Uámana Espiritu yojtšamayeca, bënga mochtsiyena jtsamëse lempe ntšamo Uámana Espiritu šojtšamëndacá. ²⁶ Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nye mochjátsboše ntšamo inÿa tojatashjachcá jatsbomnama.

6

¹ Jesucristbeyeca atšbe catšátanga, nderado ndánaca bacna soye tojamama šmojinýe, tšengaftangbentše ntšamo chë Bëngbe Bëtsabe Espiritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonýayëse. Cuedado šmochtsebmna, er ndoñese, tšengaftangnaca cmatjócochéngo cachá soye jamama. ² Chë soyënguifne chašmojtsepadecena ora, šmochtsenájabuachana, mo chë uauta uasmanëshangá šmojtšëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³ Nderado nda tojtsejuabná, cha canýe uámana entšá yomna ca, pero ndoñe chca cha tondmënese, cachá jtseñoíngñayana. ⁴ Cada ona chauenojuabó, ntšamo tojamcá tšabá o ndoñe tšabá bëtsemnana. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínýenga tmojamama más tšabá yojtsemna ca jatichámëse. ⁵ Er cada ona bontsemna jtseñojuabnayana, jtsetatšëmbuama ntšamo tojamcá tšabá o ndoñe tšabá bëtsemnana.

⁶ Nda Bëngbe Bëtsabe soyëngama tojtsatsjendá, cha bontsemna chabe butëmbayáftaca nyetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšengaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñécá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachá josháchiñana ca.” ⁸ Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachá, nda tojtsiyena nýe cachá tšabá jtsonñama bacna juabnëngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachá nda tojtsiyena ntšamo chë Uámana Espiritu tojtsemandacá jtsemëse, chë nyetsca tescama yomna tšabe vida echántsebmna. ⁹ Chcasna, ndoñe chašondëmantšé tšabe soye jtsamama; er masque šojtsëmantšnasna, pero chë tšabe soyënga jtsamama ndoñe tmonjajbanase, canýe bëtse te echanjóshjango, bënga bëtscá tšabe soyënga josháchiñama, mo tša tšabe shajuanënga tmojashaquécá.

¹⁰ Chýyeca, tmojtsobena ora, nyetscangbiana tšabe soyënga mochjama, pero masna chë Jesucristbeñe ošbuáchiyana bómnyeca, bëngcá Bëngbe Bëtsabe básënga imomnëngbiana.

Quem tsbuanácha juapochócama cach Pablo tojanábema

¹¹ ¡Šmochjinýe, tša bëtse letrëngaca cach atšbe cucuátšëca mora chbontsëbuabianná!

¹² Ndëmuanýenga imojtseboše, tšengaftanga chë ndoñe judiënga jamëndama tšengaftangbe más delicadentše base bobachtëma tëtšenënga chašmotsemnana, ntšamo judiënga monduamancá, chënga chca jtsamana nýe chë judiëngaftaca tšabá joquédama. Y chca jtsamëndayana, chënga chamosufrima ínýenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiana puerte iuámana ca chënga tmojtsabuayiynase. ¹³ Pero ni mo chë más delicadentše base bobachtëma tëtšenënga imomnënga, ndoñe quemátama lempe ntšamo chë leyíñe iuayancá. Pero chënga jtsebošana tšengaftanga chca tëtšenënga chašmotsemna, chënga jtseñábotamnyama jobenayama, ínýenga base bobachtëma chacmatëtšama tšengaftanga

šmojalesenciama. ¹⁴ Atšeftacna ndocna te chca chaondopasá. Atše nýets tempo y becá chanjěftsóyebuambnaye ndayá atšbiama Běngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámana ntšamo entšanga quem luarentše imojuabnacá y chěngbiama puerte iuámana; y ndayá atšbiama puerte iuámana, entšangbiama tondaye quenatámana; y chě causa, atše chěngbiama mo obanacá sěndměna. ¹⁵ Chě más delicadentše base bobachtema aíně tětšená o ndoñe, tondaye quenatámana. Ndayá puerte iuámana endměna, Běngbe Bětsá mo tsměma entšangcá běnga šojábiana, Uámana Espíritu běngbe ainaniñe jtsemándayěse. ¹⁶ Chě quem buatěmbana sóyeca jtsaměse šmoyeněngbiama, atše, Běngbe Bětsá sěntseimpadana, cha chaoma tšěngaftangbe ainana natjěmbana chašmotsebmnama y becá chacmotsalastemánama; y ndoñe nýe chěngbiama chca quetsatsimpadana, ndayá nýetscanga Běngbe Bětsabe entšanga imomněngbiámna.

¹⁷ Y mora, nýe canýe soye chochjáuyana: morscana ndocná chaondětsama atše jasúfriama chašotsemnama; er atšbe cuerpiñe endětínýna ntšamo atše tijasufri, Jesusbe oservená bětsemnama.

¹⁸ Jesucristbeyeca atšbe catsátanga, atše sěntseimpadana Běngbe Utabná Jesucristo chaoma tšabe bendicioněnga tšěngaftangbeñe chaotsemnama. Chca chaotsemna.

Efesios

Jacheuayama

¹ Atše Pablo, Jesucristbe ichmoná Bèngbe Bètsá chca yobóseyeca, quem tsbuanácha sèntsabiamná Efeso pueblaca Bèngbe Bètsabe entšanga y Cristo Jesúsbeñe ošbuáchiyènga imomnèngbiama. ² Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnana, y chata chaboma tšèngaftangbe ainaniñe tšabe ebionana chašmotsebonnana.

Crístoſtaca cánÿiñe mo canÿacá jtsemnèse, bènga mochántsebonna nyètsca tšabe soyènga, ntšamo celoca yobinÿncá

³ Bèngbe Bètsá y Bèngbe Utabná Jesucristbe Taitábioye mochjètschuaye, er bènga Crístoſtaca cánÿiñe mo canÿacá mondmènayeca, Bèngbe Bètsá tojama bènga nyètsca tšabe soyènga chamotsebonnana, ntšamo celoca yobinÿncá. ⁴ Bèngbe Bètsá bènga šojanabacacá Crístoſtaca cánÿiñe mo canÿacá chamotsemnana, cabá quem luare cha ndama orscana, bènga chabe delante chamotsemnana chabe entšanga, bacna soyèngama perdonánènga y chabe oservénènga, y bènga ainaniñe bacna soye ndbomnènga imomna ca cha cháuyanama. ⁵ Bèngbe Bètsá šuababuánÿeshanayeca, tempo cha tojanjuabó y tojánbošena bènga mo cachabe basengcá jábiamama, chë Jesucristo yochjanma sóyeca. ⁶ Chíyeca bènga Bèngbe Bètsábioye sempre jtšatschuanayana, cha bèngbe tšabíama juabna yobómnyeca, ndayá chabe Bonshana Uaquiñáftaca bèngbe tšabíama cha tojamama. ⁷ Bèngbe Bètsá puerte bonshanánaca bèngbe tšabíama bètscá yojuabnáyeca, cha bèngbe bacna soyèngama šojtsaperdoná y šojatsebacá, er Jesús bèngbiama tojanóbana, chabe buiñe juabuáshanèse. ⁸ Bèngbe Bètsá tojama bènga nyèts osertánana y becá juabna chamotsebonnana, cha becá bonshanánaca bèngbe tšabíama juabna yobómnyeca, ⁹ y tojama bènga chamotsetatšèmbuama ndayá jamama cha yobošcá, ndayá cachá tempšana yojanjuabná jamama, pero entšanga chca ndoñe tonjaninÿanÿé. Ndayá jamama Bèngbe Bètsá tempo yojanjuabnacá, ndayá cha tojama bènga chamotsetatšèmbuama, cachá yojanjuabná chca jamama. ¹⁰ Ndayá jamama Bèngbe Bètsá yojuabnacá, lempe echanjochnèngo nÿa chama tempo chaojóshjango ora, y quem Bèngbe Bètsabe juabna endmèna jamana, lempe ntšamo cha tojamcá celoca y quem luarènte, Cristo chamotsebonna nyètsca chë soyènguiñe mo chë mandayacá.

¹¹ Bèngbe Bètsá sempre jamana nyètsca soyènga ntšamo tojtsejuabnacá y tojtsebošcá. Y Bèngbe Bètsá bènga šojabacacá, ntšamo cabá chca ndama ora yojanjuabnacá; chca, bènga Crístoſtaca cánÿiñe mo canÿacá jtsemnèse, bènga chamóyèngacñama ndayá Bèngbe Bètsá chabe entšanga jatšatayama tojašebuachená, mo chèngbe otocana soycá. ¹² Y Bèngbe Bètsá chca tojama, bènga chë Crístbeñe natsana imojtsanošbuachenga, cha bènga šochjánatsebacama, tšabe soyènga jtsamèse chamotsiyenama, chca, chë inÿe entšanga Bèngbe Bètsabe obenanama cha chamotsatschuanama. ¹³ Y tšèngaftángnaca, chë ndegombre buayenánana šmojanuena ora, chë Bèngbe Bètsá bènga játsebacama buayenánana, y Crístbeñe šmojtsanošbuaché ora, Bèngbe Bètsá tojanma tšèngaftanga Crístoſtaca

cányiñe mo canyáca chašmotsemnana y tmojanainynaná tšengaftanga chabe entšanga bétsemnana. Běngbe Bětsá chca tojanma, Uámana Espíritu tšengaftangbe ainaniñe cháuamashėnguama tojanma ora, ntšamo tempo cha tojanašebuachenacá. ¹⁴ Běnga chě Uámana Espíritu bėngbe ainaniñe mondbómnyeca, corente monđėtatsěmbo ndayá Běngbe Bětsá chabe entšanga tojašebuachenacá bėnga mochjójėngacñama. Uámana Espíritbeyeca bėnga montsobena chca puerte tšabá jtsetatsěmbuama, chě Běngbe Bětsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguėntscuana; y lempe ntšamo cha bėngbiama inětsamama, nyetscanga cha mochántatschuanaye, cha bětsá y obená bétsemnana.

Pablo Běngbe Bětsábiye tbojanimpadá, ošbuáchiyěnga osertánana chamotse-bomnana.

¹⁵⁻¹⁶ Chcáyeca, atšna, Běngbe Bětsá tšengaftangbiama steimpadana ora, sempre cha sėndbėtsatschuanaye, er atše sėnjátatsěmbona ntšamo tšengaftanga Běngbe Utabná Jesúsbeñe tša šmojtsošbuáchemá, y ntšamo tšengaftanga nyetsca chě Běngbe Bětsábenga imomnėnga šmababuánjėshanama. ¹⁷ Běngbe Bětsá, Běngbe Utabná Jesucristbe Taitá, nda corente iuámana, sěntseimpadana cha chaoma Uámana Espíritu chacmėjabuachama, corente osertánėnga chašmotsemnana, y chacminjányé nda Běngbe Bětsá yomnana, chca, más tšabá cha chašmotsábuatmama. ¹⁸ Atše, Běngbe Bětsá sěntseimpadana, cha chaoma tšengaftanga Běngbe Bětsabe soyėnguiñe corente osertánana chašmotse-bomnana, tšengaftanga chašmotsetatsěmbuama, ndayá Běngbe Bětsábeñe jtsošbuáchiyěse tšengaftanga šmojtsobatmancá cha cmochjátšatayama. Běngbe Bětsá tmojáchembo chábeñe chca chašmotsobátmanama. Atše cha sěntseimpadana, chaoma tšengaftangnaca chašmotsetatsěmbo tša bětsá y bėts soyėnga yomna ndayá chabe entšanga cha tojašebuachenacá; ¹⁹ y chašmotsetatsěmbo tša bėts soye y ndocna te ntjěftopochócama chabe obenana yomnana, chě ndayá bėngbe ainaniñe tšabe soyėnga yojtsama, bėnga chě Crístbeñe ošbuachiyėngbeñe. Cach quem puerte bėts obenana endmėna, ²⁰ ndáyeca Běngbe Bětsá tojanma Cristo cháuatayenama, y chabe catšbioica celoca tbojtantbema chaotsemándama. ²¹ Choca Cristo nyetsca soyėnguiñe yojtsemándá, y más bětsá obenana y mando yojtsebomna nyetsca mándayėngbiama, chě mando y obenana bomnėngbiama, y cha yomna más uamaná y bětsá nyetsca chě entšangbiama mo bėtsėtsangcá utabnėngbiama, chėngbe uabaina respétoca jtsichámėse. Cristo puerte bětsá endmėna lempe ntšamo quem luarentše yobínynama y Cristo yochjėsabentšana yochtsebinynámna. ²² Běngbe Bětsá tojama Cristo nyetsca soyėnguiñe chaotsemándama, y tbojanábuayana nyetsca soyėnguiñe chaotsemándama, chábeñe ošbuáchiyėngbe tšabiama. ²³ Cha endmėna nyetsca chábeñe ošbuáchiyėngbe mandayá, y chėnga mondmėna mo cachabe cuerpo cauftsemncá. Chėngbe ainaniñe cha endoyena y nyetsca luarėnguífñaca, y lempe cha endėmándá.

2

Atsebacanėnga mondmėna, Běngbe Bětsá šuababuánjėshanayeca

¹ Tempo tšengaftanga Běngbe Bětsabiama mo obanėngcá šmonjamna, er tšengaftanga šmonjanियena, ntšamo Běngbe Bětsá yomandacá ntsamcá, y

bètsá bacna soyènga šmojánama. ² Chca, tsèngaftanga šmonjánama mo chë nÿe quem luarama enójuabnayènga monduamancá, y šmonjanëyeunana Satanás, chë bacna espíritènga obenana bomnènga y quem luarentša tsbanánoca imomnèngbe amèndayá, chë Bèngbe Bètsábioye ndëyeunanèngbe ainaniñe yománda espíritu. ³ Tempo bènga nÿetscanga fsënjanienya ntšamo tsèngaftanga šmonjanienyá. Bènga soyènga fsënjánama, nÿe ntšamo ftsjanboščá nÿe bèngbe cuerpèngbe tsabiamá, y nÿe ntšamo bèngbe juabna enjamncá bacna soyènga jamama. Bènga fsënjanienya soyènga jtsamèse mo chë Bèngbe Bètsábioye nduabuatma entšanga mondbetsamcá; chë causa bènga fsënjanomerecena jtsebomnana chë Bèngbe Bètsabe uabouana castigo, cachcá chë Bèngbe Bètsábioye nduabuatmèngcá. ⁴ Pero Bèngbe Bètsá sempre tša lastemado entšangbiamá endmèna y sempre corente bènga sondaábabuanÿeshana; ⁵ y chíyeca, bènga cabá mo obanèngcá chabiamá fsënjamna ora, bacna soyènga fsënjánama causa, chora cha tojanma bènga tsabe vida chamotsebomnama y Cristoftaca cánÿiñe mo canÿacá chamotsemnama. Bèngbe Bètsá tsèngaftangbe tsabiamá juabna bómnayeca, bacna soyènguentsana tcmojatsebacá. ⁶ Bènga Jesucrísoftaca cánÿiñe mo canÿacá bétsemnayeca, Cristo Jesús cháuatayenama Bèngbe Bètsá tojanma ora y celoca tojantbema ora, enjamna mo bèngnaca chámuatayenama Bèngbe Bètsá cuafjamcá y Cristo Jesúseftaca celoca cuafatbiamcá. ⁷ Chca enjamna, Bèngbe Bètsá entšanga cháuinÿanÿema nÿetsca joshjanguama tempènguiñe, ntšamo cha bèngbe tsabiamá bètscá juabna bétsebomnama, cha Cristo Jesúseftaca bèngbioye tsabe juábnaca šojánanÿe ora. ⁸ Er Bèngbe Bètsá tsèngaftangbiamá tsabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácanènga šmondmèna, ndoñe cach tsèngaftanga ndayá šmojánmayeca, ndayá atsbocaná jtsemnana endmèna Bèngbe Bètsabe canÿe tšetana soye. ⁹ Atsebácanènga šmondmèna, ndoñe cach tsèngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnama. ¹⁰ Bèngbe Bètsá sojtabiamá ntšamo bènga mondmèncá, y Cristo Jesúseftaca cánÿiñe mo canÿacá bétsemnayeca, Bèngbe Bètsá mo tsmèma entšangcá cuafatsmèncá sojtabiamá, tsabe soyènga jtsamèse jtsiyenama. Y ndayá bènga tsabá mondamcá, Bèngbe Bètsá tempo tojanprontá bènga chamotsamama.

Cristbeyeca tempcá tsabá Bèngbe Bètsáftaca jtsatsmènana

¹¹ Tsèngaftanga ndoñe judiènga, ndëmuanÿenga judiènga cmondubuatma “chë más delicadentše base bobachtema ndëtètšenènga ca”, chèngcá uinÿnanánènga ndoñe šmondmènama; chènga cachènga jtšenábobuatmana “chë más delicadentše base bobachtema tètšenènga ca”, y cachèngbe cuerpènguiñe chca jtsamana. Mèntšá, tsèngaftanga chë ndoñe judiènga, ¹² šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tsèngaftanga Cristo ndoñe šmonjánbomna, Israeloca entšangbiamá stètsoye šmonjanquedana, y ndoñe šmonjantátšëmbo lempe ntšamo Bèngbe Bètsá chabe entšanga tojanašebuachenacá. Tsèngaftanga quem luarentše šmonjanienya ndocnábeñe ntsobatmancá y Bèngbe Bètsá ntšabuatumcá. ¹³ Pero mora tsèngaftanga Cristo Jesúseftaca cánÿiñe mo canÿacá šmontsemna, chë tempo Bèngbe Bètsá ndoñe šmonjanábuatmènga, y cha tojama chábioye chašmotsábuatmama; y chca yomna, er Jesús, chabe buiñe juabuáshanèse, tsèngaftangbiamá tojanóbana. ¹⁴ Cach Cristo yojtsama bènga

tempcá tšabá Běngbe Bětsáftaca chamotsemnana. Cha tojama judiěnga y ndoñe judiěnga nyětscanga mo cachca entšangcá chamotsemnana, mo nda canye tapiěse tojtsendbemcá, chě ndayěseca canye luarentša entšanga tmojtsenjáta, chěnga enáyaye causa. ¹⁵ Cristo chěnga mo cachca entšangcá tojábiana, judiěngbe leyěnga y manděnga ndocna obenana chamonděsebomnana jaměse. Chca tojama, cha jóbaněse, chě útoica entšanga mo nje canye tsměma entšangcá jábiamama, cháftaca cánjiñe mo canyáca jtsemněse. Cha chca tojanma chěnga nyětscanga tšabá chamotsiyenama; ¹⁶ y Cristo cruciñe tojanóbanayeca, cha tojanma chě útoica entšanga enáyayana chamotsajbanama, y tojanma chě útoica entšanga mo canye entšangcá chamotsemnana, chěnga tempcá tšabá Běngbe Bětsáftaca chamotsatsměnana.

¹⁷ Cristo quem luaroye tojánabo tšabe noticiěnga jabábuayenama, tempcá tšabá Běngbe Bětsáftaca jtsatsměnana. Cha quem tšabe noticiěnga tojanabuayená tšěngaftanga chě ndoñe judiěngbioyе, chě Běngbe Bětsá ndoñe šmonjanábuatměnga, y chě judiěngbioynaca, chě Běngbe Bětsá imojanábuatměnga. ¹⁸ Er chábeyeca, canyánjěnga y ínjěnga montsobena chě Taitábioyе jobéconana, er běnga nyětscanga cachca espíritu běngbe ainaniñe mondbomna, chě Uámana Espíritu. ¹⁹ Chiyeca tšěngaftanga, Běngbe Bětsabe entšanguentše ndoñe quešmátsměna mo inje luarocana ashjajněngcá, y ni mo cachěngbe yebnentše ndoyeněngcá, tondayama derecho nd-bonněnga. Inyětsá endměna; tšěngaftanga derecho šmondombomna cachcá ntšamo Běngbe Bětsabe entšanga mondbomncá, y Běngbe Bětsabe básenga šmondměna. ²⁰ Jesucristo y chabe entšanga mondměna mo canye jebna yebncá. Jesucristbe ichmóněnga y chě Běngbe Bětsabe juabna oyeubamb-nayěnga mondměna mo chě ndětsbenga ndayíñe chě yebna tojtsěcuatjoncá; tšěngaftanga ošbuáchiyěnga šmondměna chě jebna yebnentša soyěngcá, y cach Jesucristo mo chě más uámana luarentše uashacuana ndětsbecá. ²¹ Quem más uámana luarentše uashacuana ndětsbeñe, nyětsca chě běts yebnentša soyěnga jtsěcuatjonana, y tsbanánoye más tmojatsjeběse, chě běts yebnentše tsěm jebna sóynaca chiñe jtsěcuatjonana. Cachcá Cristo, mo chě más uámana luarentše uashacuana ndětsbecá, jtsamana nyětsca chábeñe ošbuáchiyěnga cháftaca cánjiñe mo canyáca chamotsemnana, y ínjěngnaca cachcá chamotsemnana. Y nyětsca ošbuáchiyěnga Crístoftaca cánjiñe mo canyáca tmojtsemna ora, chěnga jtsemnana mo Běngbe Utabnabiama canye běts yebna jebncá, chábioyе jtsatschuanayama. ²² Y tšěngaftanga Efesoca ošbuachiyěngbiámnaca Cristo entsama, chě inje chábeñe ošbuáchiyěngaftaca mo canye entšangcá chašmotsemnana. Y chě Uámana Espíritu běngbe ainaniñe yojtsiyénayeca, běnga nyětscanga cánjiñe mondměna, mo canye běts yebncá ndayentše Běngbe Bětsá yoyena.

3

Pablo Jesucristbe trabajo yojanbonjěna, chě ndoñe judiěngbeñe jamama

¹ Chca, atše Pablo utamená sěntsemna, Cristo Jesusbiana soyěnga entšanga abuayiynaye causa, tšěngaftanga chě ndoñe judiěngbe tšabiama. ² Er tšěngaftanga ya cmontsamna jtsetatšěmbuama, Běngbe Bětsá tšěngaftangbe tšabiama juabna yobomnana; y chca, chě trabajo atše šojabonjé, tšěngaftangbe tšabiama jamama. ³ Tšěngaftángnaca cmontsamna jtsetatšěmbuama ndayá Běngbe Bětsá šojinjinjé, ntšamo cha jamama tempo

tojanjuabocá, pero entsanga chca ndoñe tonjaninñanýé, y chë soyama ya batsatema tcbonjubuábiamá. ⁴ Chašmojualiá ora, šmochanjátatsëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tbonjaninñinýé soyënga; pero mora cha tojinñanýé, Jesucristbe ichmónënga nýe Bëngbe Bëtsabiamá oservënëngbioye y Bëngbe Bëtsabe juabna oyeuambnáyëngbioye; y cha chca tojama chabe Uámana Espíritoftaca. ⁶ Ndayá tempo Bëngbe Bëtsá ndoñe tonjaninñanýecá mëntsá endmëna: chë ndoñe judiënga Jesucristbe tšabe noticiënguñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábicana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšacá y chënga nýetscanga mondmëna mo cachabe cuerpentšá soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánýiñe mo canýacá bëtsemnayeca.

⁷ Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama, tšabe noticiënga entsanga jtsabuayiy-nayëse; y cha átšeftaca chca tojanma chabe obenánaca. ⁸ Atše nýetsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëtš pavor šontsebema, šonjalesenciá chë Cristbe bëtšcá tšabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentšana lempe jtsabuatmana. ⁹ Y chë trabajo šonjabonýé jamama, nýetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nýetsca soyënga tojamá, tempšana yojanjuabnacá. Mëntscoñama Bëngbe Bëtsá chë soye ndocnábioye tbonjinñinýé, pero mora aiñe. ¹⁰ Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nýets osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nýetsca tescama jamama, y chca cha tojama Jesucrístoftaca, Bëngbe Utabná. ¹² Bënga Crístoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábioye jobëconama tondayama ntjatauatjácá, y corente jtsetatšëmbëse cha ndoñe chašondubatema. ¹³ Chiyeca atše cbontsaimpadana ndoñe chašmondëtsajbaná ainaniñe añemo bomnana, atše sëntsesufrina causa, er chë tšëngaftangbe tšabiamá tsësufrintšana, tšëngaftangbiamá tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentšana nýetsca pamíllanga celoca y quem luarentše uabaina imóyëngacañe, chabe delante joshamëntšase, ¹⁶ sëntseimpadana, chabe bëtšcá uámana bomnánaca chaoma, tšëngaftanga ainaniñe obenana y bëtš añemo chašmotsebomnana, chabe Espíritbeyeca, ¹⁷ y tšëngaftanga Cristbeñe jtsošbuáchiyëse, mua tšëngaftangbe ainaniñe chaotsiyenama. Bëngbe Bëtsánaca sëntseimpadana, cha y inýenga nýets ainánaca jtsababuánýeshanëse, ¹⁸ tšëngaftanga y nýetsca Bëngbe Bëtsabe entságnaca tšëngaftangaftaca, chašmotsobena josértama Cristbe bonshánana bëngbiamá tša bëtšcá yomnama. Nderado nda tojontsé chabe bonshánana jatšëmbonana mo canýe soye cuaftsemncá, cha ndocna te

nanjobenaye jtsetatsëmbuana tëntsoye ndayëntscoca yomna y nyanëjoye ndayëntscoca, jashenoye ndayëntscõe y tsbanánoye ndayëntscõe yomna. ¹⁹ Atse sëntseimpadana tsëngaftanga chašmobená chë bonshánana juabuátmanana (chë bonshánana puerte bëtscá endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tsëngaftangbe ainaniñe nye Bëngbe Bëtsabe soyënga chaotsemna y tsëngaftanga chašmotsiyena jtsamëse, ntšamo tsëngaftanga chašmotsamama Bëngbe Bëtsá yojuabnacá.

²⁰ Y mora, nyetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëtš obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebobnmana. ²¹ ¡Entšanga Bëngbe Bëtsá chamotsatschuaná nyets tempo y nyetsca tescama, ndayá Cristbeñe ošbuáchiyënga tmojtsamama y cach Cristo tojamámna! Chca chaotsemna.

4

Uámana Espíritbeyeca bënga cányiñe mo canyácá jtsemnana

¹ As, atse chë cárceloye utamená, Bëngbe Utabnabiana trabájaye causa, tsëngaftanga chontsimpadana, ndëmuanyënga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanyënga Bëngbe Bëtsá cach soyama tojánachembo y chca imomerecena. ² Cada ona chamotsenojuabná mo chë ín'yënga chabiana más uámanënga tmojtsemncá, y nyetscángbioye puerte bonshanánaca šmochtsobátmana, y bëtscá bonshánana jtsebomñese šmochtsenëuantana; ³ siempre šmochtsejuabnaye y šmochtsentšena tsëngaftanga nyets tempo cányiñe mo canyácá chašmotsemnana, nyetsca tsëngaftanga natjëmbana jtsemnëse. Y tsëngaftanga šmontsobena cányiñe mo canyácá jtsemnana chë Uámana Espíritbeyeca. ⁴ Bënga Jesucristbeñe ošbuáchiyënga bëtsemnayeca mondmëna mo cach cuerpentšëngcá, chë Cristbe cuerpo, y cachca Espíritu bënga nyetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nyetscanga cachcá šochjátšatayama chamotsobátmanama. ⁵ Bënga nyetscanga cach Utabná mondbomna, cachca ošbuáchiyana Jesucristbeñe mondbomna, y bënga nyetscanga uabáinënga mondmëna chca betsošbuáchiyama. ⁶ Bënga ošbuáchiyënga nyetscangbiana cach Bëngbe Bëtsá y Taitá endmëna. Cha bëngbe amëndayá endmëna, chabe obenana nyetscángbeñe jtsinynana, y nyetsca bëngbe ainaniñe chabe Espíritu endmëna.

⁷ Pero bënga, cada ona tsetana obenana tojóyëngacñe, tsabe soyënga jamama, ntšamo Cristo jatsatayama tojanbošencá, chábeñe ošbuáchiyënga jujabuáchama. ⁸ Chíyeca, Bëngbe Bëtsabe uabemana palabrenguiñe Jesucristbiana mëntšá endayana:

Cha celoye tontantsjuá, y cháftaca tonjanëyamba nyetsca chabe uayayënga, chë tojánayëñjananga,

y chabe entšángbioye obenana tonjanatšatá, tsabe soyënga jamama ca.

⁹ ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰ Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyetscañe cha chaotsemnana. ¹¹ Y cachá, chë tsabe soyënga

jamama obenana tojanatšatá ora, tojanma chábeñe ošbuáchiyënguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuayiyayënga, y ínÿengna ošbuáchiyënga anÿenënga y Bëngbe Bëtsabe soyëngama abuatambayënga. ¹² Cristo tojanabacacangna chabe entšangbioye mochjanëjabuache, cha tojanabanÿé trabajo chënga chamotsamama, y nÿetsca ošbuáchiyënga, chë nÿetscanga cânÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, ¹³ bënga nÿetscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiana nÿetscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsëtsanga bëtscá juabna bomnëngcá, ¹⁴ y ndoñe nÿe mo basengcá, Bëngbe Bëtsabe soyëngama jtsetatšëmbuama. Chë soyënguiñe ya ndoñe más nÿe mo basengcá quemochátsmëna, ndëmuanÿenga paselo jáingñama yomna. Mo canÿe barquësha nÿe ndaye bínÿiacnaca tojtsëyambancá, hásefta entšanga nÿe ndaye buatëmbana soye tmojatüencá jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatüena tsëm sóyeca, ínÿengbioye áingñayënga. Chënga becá montsetatšëmbo ntšamo entšanga jáingñana, y montseboše chë montsabuatambá bostero soyënga bënga jtseyeunanama. ¹⁵ Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyënga jtsemandayancá. ¹⁶ Mo canÿe bestšašcá, chëse jamana nÿetsca chë cuerpentša soyënga ndayentše chamueneñjama y chiñe jobónjuama chamotsobenama, chë cuerpo saná chaotsebomnama jtsamëse, chca, nÿets cuerpo tšabá chaóbochema, cachcá Cristo, chë nÿetsca ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nÿets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nÿetsca ošbuáchiyënga cada te más ošbuáchiyana mochántsebomna, puerte jtsenbobonshánëse.

Cristoftaca cânÿiñe mo canÿacá jtsemnëse tsëm vida šmochtsebomna

¹⁷ Mëntšá entsemna ntšamo cbontsëtsëtsnacá, y Bëngbe Utabná endmëna nda tojama atše mando chaitsebomnama tsëngaftanga chca jáuyanama: Ndoñe más šmattsiyena bacna soyënga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. ¹⁸ Chëngbe juabnoca obenana mondbomna nÿe ndoñe ndegombre soyëngama josértama. Chënga ndoñe quemátsbomna chë Bëngbe Bëtsábiocana yóbcana tšabe vida, er chënga ndoñe quematsleséncia chë Bëngbe Bëtsabe soyënga chëngbe ainaniñe chaómashënguama; y chca endmëna, er chënga tmojajuabó y tojajama chë Bëngbe Bëtsabe buayenana soye chëngbe ainaniñe tondaye chaondómashënguama. ¹⁹ Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšënanana nÿetsca bacna soyënga amana, y chca jtsamana tondayama ntjatenouabnycá.

²⁰ Pero chca ndoñe quenjatsmëna ntšamo tšëngaftanga Cristbe soyëngama šmojanatsjinÿe y ntšamo chábioye šmojanabuatmancá. ²¹ Ndegombre tšëngaftanga chabiamá šmojanuena y ínÿenga tcmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá. ²² Chcasna, ntšamo tšëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmojanacá; ntšamo tempo tšëngaftanga šmojanjuabná, šmojansentina y šmojanamcá, canÿe ondbiamnaye juabnentsana vojóbocana, tšëngaftanga bacna soyëngama juabnëngaca mandánënga jtsemnëse, y chë juabnënga tšëngaftangbioye cmojánaingñaye. ²³ Tšëngaftanga cmontsamna tšëngaftangbe juabniñe tsëm y tšabe juabnënga jtsebmna. ²⁴ Tšëngaftanga cmontsamna jasháchana mo tsmëna entsangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tšëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëna entsangcá tcmojábiamá, tšëngaftanga chašmotsiyenama jtsamëse Bëngbe Bëtsabe bomínÿiñe tšabá yomna soyënga y chábioye jadórama soyënga, chë ndegombre soyënguentsana óbocana soyënga.

²⁵ Chcasna, ya ndoñe más šmattsebohero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nÿetscanga cánÿiñe mondmëna mo nÿe canÿe entsangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nÿets te chacmondetëna. ²⁷ Ndoñe šmatjaleséncia Sana ndayánaca tšëngaftangftaca chaomama.

²⁸ Chë yojanabëbaná chauajbaná atbëbanama y jatrabájama chaontsé; cachabe cucuátseca tšabe trabajo chaotsóboma, chca, ndayánaca cha chaotsebmna chë ujabótënga jatšatayama.

²⁹ Bacna palabrënga ndoñe šmattsichamo, pero aínë tšabe palabrënga y nÿa chorsca uajabótama palabrënga, chë ínÿe entsángbioye jujabuáchama más Cristcá chamotsemnama, chënga Bëngbe Bëtsábocana tšabe bendicionënga chamóyëngacñama, chë ndayá chašmojtsëtsësná sóyeca. ³⁰ Ndoñe šmattsama soyënga, Bëngbe Bëtsabe Uámana Espíritu chabongmema. Bëngbe Bëtsá tojama Uámana Espíritu tšëngaftangbe ainaniñe cháumashënguama, y chca, tcmojanainÿaná chabe entsanga bëtsemnayeca, chë yochjóshjango tescama, Bëngbe Bëtsá chabe entsanga nÿetsca tescama yochjatsebacye orscama.

³¹ Inÿëngbiamá bacna juabnënga ainaniñe ndoñe chašmondëtsebmna, etonánënga ndoñe chašmondëtsemna, ni ínÿëngftaca ndoñe chacmondetëna. Inÿëngbioye ndoñe chašmondëtsabuachembuana, inÿëngbioye ndoñe šmatjoyánguango y ndaye bacna sóynaca ndoñe šmattsama. ³² Nÿetscángftaca tšábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

5

Ntšamo yomna Bëngbe Bëtsabe básënga chamotsiyenama

¹ Tšëngaftanga, Bëngbe Bëtsabe bonshana básënga quetsomñecá, nÿa šmochtsentsëna cachacá jtsemnama. ² Smochtsiyena nÿetsca soyënga bonshanánaca jtsamëse, ntšamo Cristo sojanabuanÿeshancá; chca, cha chabe derecho vida jtsobomñama cachcá tojanonÿá y bëngbiamá tojanóbana. Y ntšamo Cristo tojanmcá, yojamna Bëngbe Bëtsábioye jëtschuayama, y chabe

bominjiñe tša tšabá yojtsemna, mo ndaye ora Bëngbe Bëtsá oyejuayá jóyëngacñana ndayá tcojóba y altaroca tcojajuinjese, y chë soye botamana jtsonguëtsiyana.

³ Tšëngaftanga, Bëngbe Bëtsábenga šmornënga, ndoñe quecmátamna shembása o boyabásaftaca bacna soyënga jtsamana, ni chca játamama jtsejubnayana y jtsebošana, y chë nÿe yapa jësebošana más soyënga ínÿengbiana jtsebomnama cach ndoñe. Ni chë soyëngama ndoñe šmattsóyebuambnaye. ⁴ Bacna soye ndoñe šmattsóyebuambnaye, ni corente ntjenojabuoycá, ni nÿe ntšámnaca bacna soye jenbotatšëmbonana cach ndoñe, er chë soyënga tšëngaftangbiana ndoñe tšabá ntsemnana. Chca játamama, más tšabá, Bëngbe Bëtsá šmochtsatschuanaye. ⁵ Er tšëngaftanga ya šmondëtatšëmbo, ndocna chë shembása o boyabásaftaca bacna soye amá, ndocna chë nÿe chabe bacna juabnëngaca soyënga jtsamama oyená, o chë nÿe más soyënga ínÿengbiana jtsebomnama bošá y amá (chca jtsayanana chabiana más iuámana soyënga jtsebomnana, Bëngbe Bëtsábioye jatsbobonshánama), chca amënguentšana ndocná tondaye queochatóyëngacñe ndayá Bëngbe Bëtsá chabe entšángbioye jatsatayama tojašebuachenantšana, Cristo y Bëngbe Bëtsabe amëndayoca. ⁶ Ndocná chacmondaingñe ndoñe ndegombre tondmëna palabréngaca, bacna soyënga chašmotsamama, er chë causa chë uabouana castigo echanjobaye, ndáyeca Bëngbe Bëtsá chábioye ndëyeunanënga yochjácastigaye. ⁷ Chíyeca, chca amëngbe soyënga tondaye šmattsama.

⁸ Tempo tšëngaftanga šmojaniiyena bacna juabnënga jtsebomñese y bacna soyënga jtsamëse, mo ibetiñe cuaftsiyencá, pero mora Bëngbe Utabnáftaca cánÿiñe mo canÿacá bëtsemnayeca, chabe soyënga šmontsetátšëmbo y sempre šmondëtsemma cháftaca, chë entsangbe juabnënga binÿnayáftaca. Smochtsiyena jtsamëse mo chë binÿnayabe entšangcá. ⁹ Chë binÿnayábeyeca entšanga tšabe soyënga jtsamana, chë Bëngbe Bëtsabe bominiñe tšabá yomna soyënga, y ndegombre soyëngnaca. ¹⁰ Nÿa šmochtsentšena soyënga jamama, Bëngbe Bëtsá oyejuayá chaotsemnana. ¹¹ Chë mo ibetiñe cuaftsiyencá oyenëngbe bacna soyënga tondayama ntsoservénana, y tšëngaftanga chca ndoñe šmattsama. Chamna, chëngbioye šmochjinÿanÿiye chënga ndoñe tšabá tmonjamama. ¹² Ndegombre, nÿe chë ndayá chënga mo iytemencá tmojamama jóyebuambayama ya cuantsëuatja; ¹³ pero nÿetsca soyënga binÿniñe tmojajcá ora jtsopodénana tšabá jinÿama ntšamo ndegombre tomncá. Cachcá, ntšamo entšanga tmojamcá chë binÿnayá chaojinÿanÿé ora, echantsopodena jtsotatšëmbuama ntšamo chë soyënga yomnana; ¹⁴ er ndayánaca binÿniñe tojtsinÿinjëna, jtsopodénana jinÿama ntšamo ndegombre chë soye tomncá. Cachcá, ntšamo entšanga iytemencá tmojtsamcá chë binÿnayá chaojinÿanÿé ora, chënga mochántsetatšëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canÿa
cuaftsomañcá;

chë bacna soyënga ama causa, Bëngbe Bëtsabe bominiñe mo obanëngcá
imomnënguentšana šmochtsojuánañe,

y Cristo acbe juabnënga echantsebinÿnaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiiyena jtsamëse, mo chë Bëngbe Bëtsabe soyëngama ndosertanëngcá, pero aiñe chë chca soyëngama osertanëngcá.

¹⁶ Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama. ¹⁷ Ntjenouaboycá ndoñe šmattsama, mo chë ndosertanëngcá. Pero aifne bëtscá šmochtsentšena ndayá Bëngbe Utabná jamama yobošcá chacmósertama. ¹⁸ Ndoñe šmattsótmenaye, er chë soye entšábioye juanatsana jenomámdama ndoñe chaondëtsoobenama; chamna, šmochjama Uámama Espíritu sempre y bëtscá tšëngaftanga ainaniñe chaotsemámdama. ¹⁹ Smochjenatsëtseye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye. ²⁰ Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canye yebnentsënga chamotsemnana

²¹ Nyetscanga šmochtsenëyeunana, tšëngaftanga Crístbioye puerte šmorrespetánayeca.

²² Shémanga, šmochtsetátšëmbo tšëngaftangbe boyanga chë yebnentsa mándayënga imomnana; y nyets tempo chca šmochtsama, Bëngbe Utabná chašmotsobedecënana. ²³ Er boyá endmëna shembe mandayá y inyená, ntšamo Cristo chë ošbuáchiyëngbe mandayá y inyená endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnana imotatsëmbcá y chca jtsamana, cachcá, chë shemágnaca entsamna jtsemnana nyetsca soyënguñe chëngbe boyángaftaca.

²⁵ Boyanga, tšëngaftangbe shémanga šmochtsababuñyëshana, ntšamo Cristo chábeñe ošbuáchiyënga yojanabuanyëshancá, y chca, chabe derecho vida jtsohomñama cachcá tojanonýa y chëngbiamá tojanóbana. ²⁶ Chca tojanma, chënga chabe entšanga y puerte tšábenga jábiamama; y chënga tmojánenabayé ora, tmojaninýanýé Bëngbe Bëtsá chëngbe bacna soyënga tojánabuajuanama, y chabe delante tšábenga chamotsemnana cha tojanmama. Cha chca tojanma, er chënga chábeñe imojtsanošbuaché, chabiamá buayenana soyënga tojanuena ora. ²⁷ Cha chca lempe tojanma, chë ošbuáchiyënga japróntayama corente tšábenga y uámanënga cachabiamá chamotsemnana, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inye cachca sóyeca. ²⁸ Ntšamo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsebobonshánana, er chata cánýiñe jtsemnana mo nýe canye entšá cuenta. ²⁹ Er ndocná cachabe cuerpo jtsáboyënjana, ndayá saná janguangoñana y jtšinýenana, ntšamo Cristo bënga chë ošbuáchiyëngaftaca endbetsamcá; ³⁰ er bënga nyetscanga cánýiñe mondmëna mo chabe cuerpo cuaftsemncá, y bënga mo chabe cuerpentša soyënga cuaftsemncá. ³¹ Ntšamo Bëngbe Bëtsabe uabemana palabrénguñe endayancá: “Chíyeca, boyabása chabe taitá y chabe mamá echanjébasashejuana chabe shémaftaca jenútanama, y chë úata mo canýacá bochántsemna ca.” ³² Chë soyënga josértama puerte totcá comna, pero atše scuayana, chë soye entsoyebuambná ntšamo Cristo chábeñe ošbuáchiyëngaftaca yomnana. ³³ Pero morna, tšëngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stëtsoye chabondëquedá.

6

1 Básenga, Bèngbe Utabnáftaca cányiñe mo canyáca bétsemnayeca, tsèngaftangbe bètsétsangbiyoe šmochtsayaunana, er chca jamana tšabá endmèna. 2 Moisesbe leyíñe canye mando endmèna, y chentše endmèna chë Bèngbe Bètsabe natsana mando, ndayentše cha tojašbuachená tšabe bendicionénga jamana: “Acbe taitá y acbe mamá ndoñe stèsoye catjéftsaquédaye, 3 tšabe vida chacuetsobomñama y quem luarentše bayte chacuetsiyenama.”

4 Taitanga, ndoñe šmattsama tsèngaftangbe básenga chauetènama; más tšabana, chènga šmochtsabéchaye jtsabuátambayése y jucacánese, ntšamo Bèngbe Utabná endbetsabuatambaycá.

5 Tsèngaftanga, chë nyets tempo nye ínñabiana oservénenga, tsèngaftangbe nduiñénga šmochtsayaunana; chca šmochtsama puerta respetoca, bètsca cuedádoca y nyets ainaniñe tšabe juabnéngaca, mo cach Crístbiyoe cuaftseservencá. 6 Y chca chë nduiñéngbiyoe šmochtsaservena, ndoñe nye chènga chacmojtšénja ora, mo nda nye entsangbe delante tšabá joquédama cuaftsebošcá, ndayá Crístbe oservenéngcá, chènga nyets ainánaca jtsamana ntšamo Bèngbe Bètsá tojtsebošcá. 7 Nyetsca trabajotémènga šmochtsama nyets tsèngaftangbe añemoca, mo Bèngbe Utabnabiana cuaftsetrabajacá, y ndoñe nye entsangbiana. 8 Er tsèngaftanga ya šmondétatšembo, cada ona, nyets tempo nye ínñabiana trabajayá o nye cachabiana trabajayá tomna, ntšamo tšabe soyènga tojamcá Bèngbe Utabnábiocana yochjójyèngacñe.

9 Y tsèngaftanga, ndèmuanyèngbiana ínñenga nyets tempo imoservena, cachcá tšabá chèngaftaca šmochjamna, tondayama ntsaútatñayése. Smochtsenójuabnaye, Bèngbe Utabná chë celoca endmèná, tsèngaftanga y chèngbe mandayá yomnama, y chabiana nyetscanga cachcá monduámama.

Ndayá Bèngbe Bètsá entsanga tojatsatá Satanasbiana jenèuyanama

10 Y morna, Bèngbe Utabnáftaca cányiñe mo canyáca jtsemñese, ainaniñe bèts añemo šmochtsebomna, chë Bèngbe Utabnabe bèts obenanentšana óbocana añemo. 11 Mo canye soldadcá, ba soyènga jtchétjuana chë tmojtšentsjanganaga ora uayayèngbiana jenèuyanama, tsèngaftágnaca cachcá, nyetsca chë Bèngbe Bètsá cmojatsatá soyèngaca šmochtsèprontana jenèuyanama, tsèngaftanga jáingñama Satanás ntšámnaca tojtsama ora, ndoñe chacmondáyèñjanama. 12 Er bènga ndoñe quemuatenojuerzana cach quem luarentša entsángaftaca jenèyèñjanama, ndayá bacna espírituenga mando bomnéngaftaca; bacna espírituenga obenana bomnéngaftaca; y quem luarentša entsanga, chë bacna juabna bomna causa y Bèngbe Bètsabe soyènga nduabatma causa, mo ibetiñe cuaftsoyencá oyena entsángbiyoe amèndaye espírituengaftaca; y chë tsbanánoca luarènguñe imomna y bacna soyènga chaotsebínñama ama espírituengaftácnaca. 13 Chíyeca, lempe ntšamo Bèngbe Bètsá cmojatsatacá šmochjójyèngacñe y chë soyènga jtsamèse šmochtsiyena jtseprontánama, mo canye soldado jenèuyanama y jáyèñjanama bètsca soyènga tojtchétjácá. Chca šmochjama, chë uayayá Satanás tsèngaftangbiyoe jáingñama chaojtsama ora ndoñe chacmondáyèñjanama, y jenèuyanama lempe jtsamèse, chašmobená cha jayèñjanama.

14 Mo canye soldadcá, jabuache jtsanayana y cochaca canye morocho soye jenácochjatsana jtsevalentiana y ndoñe chamondéyèñjanama, tsèngaftágnaca cachcá, ntšamo ndegombre yomncá jtsamèse šmochtsiyena,

mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtšamëse, mo chë morocho soye cochaca cuafjenacochjatscá, chca, Satanás tšëngaftangafaca tondaye chaondobená jamama. ¹⁵ Mo canye soldadcá jtšhecochëtjuana betscó jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtšabuayinyanama ntšamo Bëngbe Bëtsá inétsama entšanga tempcá tšabá cháftaca chamotsatsmënama. ¹⁶ Canye soldado escudo jtšebomnana chë uayayabe uajuinjinýana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtšošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangafaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadcá, canye morocho buchtsanëse tojtbuchëtsëse chabe bestšaše jenëuyanama, tšëngaftángnaca cachcá, sempre šmochjésejuabnaye Bëngbe Bëtsá cmojátsebacama, y chë juabna cmochanjújabuache, mo canye morocho buchtsanëse cuaftsabuchëtsancá. Mo canye soldadcá, chë uayayábioye jayëjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëjanama. Uámana Espiritu jtšamana, tšëngaftanga Bëngbe Bëtsabe palabra chašmotsebomnana. ¹⁸ Nýets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yeuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtšobátmanëse, y Jesucristbeñe ošbuchiyëngbiana nýetscangbiana cha šmochtseimpadana.

¹⁹ Atšbiámnaca Bëngbe Bëtsá šmochtseimpadana, atše jóyebuambayama chaijontsé ora, cha chë buayenana soye chašúyanama, y atše chayobená tondayama ntjatauátjcá jóyebuambayana, y chca, entšanga chayinýanjé Jesucristbiana tšabe noticiënga, ndayá chënga tempo ndoñe monjántatšëmbo. ²⁰ Bëngbe Bëtsá šojichmó mo canya chabe cuenta oyebuambnayacá, chë buayénanama entšángbeñe jóyebuambayama, y chca bétsamama, mora atše utamená sëntsemna. Atšbiama Bëngbe Bëtsá šmochtseimpadana, atše chayobenama Cristbe buayénanama tondayama ntjatauátjcá jóyebuambayana, ntšamo atše jamama šojtsemncá.

Pablo chënga jtadiósoftanama

²¹ Tíquico, Jesucristbeyeca bëngbe bonshana catšata y canye entšá tšabe palabra bomná, Bëngbe Utabnabe trabajo jamama oservëniñe, ntšamo atše stsemnana y ndayá stsamama tšëngaftanga chašmotsetatšëmbuama, lempe cmochanjácuntaye. ²² Chama cha tšëngaftangbioye sënjichmó, ntšamo muentše ftsemnana chacmëyanama, y tšëngaftanga ainaniñe añemo chašmotsebomnana chaomama.

²³ Atše sëntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebomnana, y Bëngbe Bëtsábioye y inýëngbioye puerte chašmotsababuánýeshanama, Jesucristbeñe tšëngaftangbe ošbuachiyánaca; ²⁴ y chaboma, chë Bëngbe Utabná Jesucristbioye bëts bonshanánaca imobobonshanëngbeñe tšabe bendicionënga chaotsemnana, canye ndocná yondobena jatrócama bonshanánaca.

Filipenses

Jacheuayama

¹ Pablo y Timoteo, Jesucristbiana oservénata, quem tsbuanácha fséntsabianná Filipos béts pueblocá Bèngbe Bètsabe entšanga imomnènga, y Jesucristoftaca cànŷiñe mo canŷacá imomnèngbiana. Fséntsabianná nŷetsca chë Jesucristbeñe ošbuáchiyèngbiana, nŷetsca chentša uanatsanèngaftaca y chë inŷe ošbuáchiyènga ujabuáchaniñe trabajayèngaftaca. ² Atše sèntseimpadana Bèngbe Bètsá Bèngbe Taitá y Bèngbe Utabná Jesucristo, chaboma tšèngaftangbeñe tšabe bendicionènga chaotsemnana, y chaboma tšèngaftanga ainaniñe tšabe ebionana chašmotsebomnana.

Pablo Bèngbe Bètsábioye tbojtanchuá ošbuáchiyèngbiana

³ Cada tšèngaftangbiana stenojuabó ora, Bèngbe Bètsá tšèngaftangbiana sèndbétsatschuanaye; ⁴ y Bèngbe Bètsá tšèngaftangbe tšabiana stseimpadana ora, atše corente oyejuayá chca sèndbétsama, ⁵ ntšamo tšèngaftanga atše šmojuájabuachama, tšabe noticiènga Jesucristbiana entšanga abuayiyñayañe, tšèngaftanga Jesucristbeñe jtsošbuáchiyama šmonjanbojatsé orscana y mèntscoñama. ⁶ Atše corente sèntsetatšèmo, Bèngbe Bètsá tojanbojatsé tšèngaftangbe ainaniñe tšabe soyènga jtsamama, y más tšabe soyènga yochtsamama. Y chca yochtsama, lempe ntšamo tšèngaftangbiana cha yojtsejuabnacá chaochnènguèntscuana, y chca, Cristo Jesús yochjésabèntscuana. ⁷ Atše tšèngaftangbiana sempre ainaniñe sèndbétsenojuabnaye, chíyeca atšbiana puerte tšabá entsemna chca tšèngaftangbiana jtsejuabnayana. Tšèngaftanga nŷetscanga atše šmonjuájabuache jamama chë Bèngbe Bètsá tša tšabia bétsemnayeca šonjanèntšabuaché trabajo. Atše chë Bèngbe Bètsabe trabajo sèndbomna jamama, mora sèntsètámena ora o natjèmbana šhjoca stsana ora, nŷetscángbioye tšabá inŷinŷnayanñe chë tšabe noticiènga ndegombre soyènga bétsemnana, y bètscá amiñe entšanga chë soyènguñe corente chamotsošbuáchemá. ⁸ Bèngbe Bètsá yotátšèmo ntšamo sèntsichamcá ndegombre bétsemnana. Atše tša sèntseboše tšèngaftanga jányama y cbontsababuanŷeshana cachcá ntšamo Cristo Jesús atše šondbobonshancá. ⁹ Atše, Bèngbe Bètsá sèntseimpadana tšèngaftanga cada te más cha chašmotsebobonshánama y chë inŷyengbioynaca, chca, osertánana chašmotsebomnana ndayá chë ndegombre soye bétsemnana jtsetatšèmbuama, y chašmotsetátšèmo ndayá tšabá o ndayá ndoñe tšabá tondmènama; ¹⁰ y chca, chašmotsobena sempre jabocacayama chë puerte tšabá yojtsemna jamama soye. Chca, Cristo yochjésabo ora, tšèngaftanga puerte tšabe vida šmochántsebomna, bacna soyèngaca ndèmandánènga; y tondaye quešmochátama, chora chë entšanga chca ndoñe tšabá quenátsmèna ca chamuátichamuama. ¹¹ Y lempe ntšamo chašmojtsamcá ndegombre tšabá echántsemna, y nŷe Jesucristo endobena jamama entšanga chca chamotsamama. Nŷetsca chë tšabe soyènga echántsemna, Bèngbe Bètsá puerte bètscá y uamaná bétsemnana jinŷanŷiyama.

Atšbe vida endmèna Cristo jtseservénama

¹² Jesucristbeyeca atšbe catšátanga, atše sèntseboše tšèngaftanga chašmotsetátšèmo, ntšamo atše tijapasama, más bètscá entšanga

Jesucristbiamá tšabe noticiënguifne chamotsošbuáchema tojoservema. ¹³ Chca, nÿetsca chë romanëngbe mandadbe bëts yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiamá tstrábája causa. ¹⁴ Atše utamená sëntsemnayeca, ošbuáchiyënguentsana banga ainaniñe más añemo montsebmna, y chíyeca chënga Bëngbe Bëtsabe palabra más y más añémoca y tondayama ntjatauatjá entšángbioye montsabuayiyiná.

¹⁵ Ndegombre entsemna, báseftanga Cristbiamá entšángbioye imojtsabuayiyiná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyana; chíyeca chca imojtsama. Pero inÿengna, entšángbioye montsabuayiyiná tšabe soyënga inÿëngbiamá jamama ndegombre imojtsebóseyeca. ¹⁶ Mënga chca montsama, atše šmondobonshánayeca y Bëngbe Bëtsá chë trabajo šojanëntšabuáchema mondëtatšëmboyeca, Jesucristbiamá tšabe noticiënga ndegombre bëtsemnama entšanga jtsinÿanÿnayana; ¹⁷ pero chë inÿengna chca imojtsama, ndoñe tšabe soyënga inÿëngbiamá imojtsebóseyeca, ndoñe chënga chë inÿëngbiamá tšabe soyënga imojtsebóseyeca. Chënga Jesucristbiamá imojtsoyebuambná nÿe entšanga chënga chamotsarrespetánama, y nÿe cachëngbiamá tšabe soyënga jtsebmnama imojtsebóseyeca. Chënga jtsejubnayanana mochjobenaye jamama atše más chašotsengmënama ca, muentše utamená chjëftsemnëntscuana, chënga entšángbioye chca tmojtsabuatambá ora. ¹⁸ Pero ¿ndayase chë soye atšbiamá? Masque ntšámnaca, tšabe soyënga inÿëngbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá sëntsemna.

Y cabá más chanjójeyuaye, ¹⁹ er atše sëntsetatšëmbo quem utámenentšana atše chjësebochnama. Atše sëntsetatšëmbo muentšana chjësebochnama, tšëngaftanga Bëngbe Bëtsá šmoimpadánayeca y Jesucristbe Uámana Espiritu šuajabuachánayeca. ²⁰ Atše corente jtsošbuáchiyëse Bëngbe Bëtsábeñe sëndobátmana, atše ndocna te tondaye chanjëftsema y chama chjaisëuatjama, pero añe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámuama, atše chaíma entšanga chaminÿanÿema Cristo puerte bëtsá y uamaná bëtsemnama, y chca chántsama masque ainá o obaná chaitsemnëse. ²¹ Chca entsemna, er atšbe vida Cristo jtse servénama endmëna, y nderado atše chajjóbanëse, nÿetscanga puerte bëts soye mochanjëftsashjache. ²² Pero atše ainá stsemnëse, chanjobenaye más uámana trabajo Cristbiamá jëftsemama. Chíyeca, atše ndoñe corente quetsátatšëmbo ntšamo mora jobuáyanana, ainá jtsemnama o ndoñe. ²³ Ndegombre mora puerte šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Cristoftaca jtsatsmënama, y ndegombre chca atšbiamá puerte tšabá nántsemna; ²⁴ pero, inÿoicana tšëngaftangbiamá šontsemna ainá jëftsemnana. ²⁵ Atše corente sëntsetatšëmbo chca ndegombre yochtsemnama, y chíyeca sëntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebmnama. ²⁶ Chca, atše tšëngaftanga jutsëtsayama choye chajjá ora, chašmobená inÿe soyama más Cristo Jesús jëtschuayama.

²⁷ Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguifne endayanca.

Y mēntśá, cachcá, jutsětsayama chajjá o ndoñe, atše chántsetatśēmo tšēngaftanga Jesucristbeñe ošbuáchiyama ndoñe šmontsajbanama, y aifne becá ošbuáchiyana chábeñe šmotsobomñama; nyětscanga cachcá šmojtsejuabnáyeca y nyětscanga cach soye šmojtsebóseyeca, cánýiñe nyětscanga enutanánēnga jtsenojuerzánese, ndocná chē tšabe noticiēnguifne tšēngaftanga šmobomna ošbuáchiyana chacmondábuajuanama. ²⁸ Tšēngaftangbe uayayēngbiama tondayama šmattsauatja, sempre bētscá añemo šmochtsebmoma. Chca tšēngaftanga šmochanjínýañiyē chēnga pochocánēnga mochtsemnama, y tšēngaftangna atsebácanēnga šmochtsemnama. Y chē soye Bēngbe Bētsá tšēngaftangbiama echántsama, Cristbeñe šmošbuachéyeca. ²⁹ Chca echanjopása, er Bēngbe Bētsá tšēngaftangataca puerte tšabia endmēna, Cristbiama oservēnēnga Bēngbe Bētsá tcmojábiana, pero ndoñe nyē chábeñe chašmotsošbuáchema, ndayá chabiama chašmosufrímnaca. ³⁰ Tšēngaftanga y atše cachca soyama montsenojuerzana. Tšēngaftanga ya šmonjinyē ntšamo atše sēnjánenojuerzana, entšanga jinýañiyama chē tšabe noticiēnga ndegombre soyēnga bētsemnama. Y mora, tšēngaftanga noticiēnga šmochanjóyēngacñe ntšamo atše cach soyama cachcá tsamama.

2

Ndoñe uámanēnga šmattsenobiamnaye, ntšamo Cristo ndoñe tonjanmcá

¹ Tšēngaftanga, Cristoftaca cánýiñe mo canýacá jtsemnēse, ainaniñe bētscá añemo šmontsebmoma. Cristo cmondábuanýeshana, y chē soye tšēngaftanga cmontsējabuachana nyětsca trabajēnguentšana tšabá jabocanama. Y tšēngaftanga Cristbe Espíroftaca cánýiñe mo canýacá šmontsemna; tšēngaftanga nyětscanga šmondénbobonshana y nyětscangbiama jóngmiana šmondúamana. ² Tšēngaftanga lempe chca šmobómnyeca, atše corente oyejuayá šmochjábema, er tšēngaftanga nyětscanga cachcá cánýiñe šmondějuabná, cachcá nyětscanga šmondénbobonshana, nyětscanga mo canýe ainancá šmondobomna, y nyětscanga cachca soye šmondboše. ³ Tondaye šmattsama nyē ínýenga chē sóyeca chamotjáyana, o nyē tšēngaftanga tša bēts soyēnga amēnga šmomna ca entšanga chamotsejuabnama; pero ndoñe yapa uámanēnga šmojtsemna ca šmochtsejuabnaye, y cada ona chaotsejuabná chē ínýenga bēngbiama más uámanēnga imomnama. ⁴ Y ndocná tondaye chaondětsama, nyē chabiama tšabe soyēnga jónýenama, sinó ndayánaca chaotsama nyětscangbiámnaca tšabe soyēnga jónýenama.

⁵ Tšēngaftanga cmontsamna jtsemnana ntšamo cach Cristo Jesús yojanjuabná y yojanamcá:

⁶ Cha nyets tempo yomna cach Bēngbe Bētsacá y uamaná cach Bēngbe Bētsacá, pero masque chca, ndocna te yonjanjuabná:
 “Atše sēntseboše nyetsca entšanga nyets tempo atše chašmotserrespetana, ntšamo atšbe Taitá Bēngbe Bētsá mondērrespetancá ca.”

⁷ Pero cha mo nduamanacá tonjanóbema, nyetsca chabe bomna soyēnga jěftseboshjonēse,

y ndegombre, mo canýe oservenacá tojanóbema.

Cha canýe entšacá tojanonýná,

y entšanga canýe ndegombre entšacá tmojáninýe.

⁸ Cachá tojanlesenciá nduamaná jtsemnana,

y sempre Bēngbe Bētsábioye ibnayeunana, y jobanámna, cruciñe jóbane.

⁹ Ndayá cha tonjanmama, Bëngbe Bëtsá, chë celoca más uámana luare tbojan-inyinyé

y chë más uámana uabaina, chë más bëtsétsangbe uabainënguentša uabaina tbojabuajo;

¹⁰ y chca, celoca imomnënga, y quem luarentše y fshantse jashenoye imomnëgnaca nyetscanga chamóshamentšema,

Jesúsbiowe jëtschuayama, chabe uámana uabaina jayanëse;

¹¹ y chca, nyetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nyetscanga chamotsatschuanama.

Cristbeñe ošbuáchiyënga entsamna mo buashinyinyana estrellëngcá jtsemnana

¹² Chcasna, atšbe bonshana catsátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënyeunana, mora atše tšëngaftangbiama bënoca stsemna ora. Bëtsétsanga ntjatenobiamnycá y Bëngbe Bëtsá jtserrespetánëse šmochtsama soyënga, chca, tšëngaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; ¹³ er Bëngbe Bëtsá nyets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

¹⁴ Ndayánaca jamama chacmojtšëjaboto ora, chë soye šmochjama, chca jamama yapa totcá comna ca ntjaticamcá y ínÿengaftaca jabuachana ntjatenatsëtsnycá. ¹⁵ Chca cmontsamna, chca, tšëngaftanga šmojtšama soyënguñe ndocná ndocna bacna soye chaondínÿenama, y puerte tšabe vida chašmotsebomnana. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentše puerte bacna entsángbeñe y sempre bëtscá bacna soyënga jtsamana uamanëngbeñe. Chiyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentše buashinyinyana estrellëngcá.

¹⁶ Chë tšabe soyëngaca entsángbiowe chauinyanÿé ntšamo muanjobenaye tšabe vida jtsebomnana. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanjinyanÿiye atše ndoñe nÿe bonamente jabuache tija-trabajá. Chca atše chantsemna mo nda bëtscá tojoprontá, y chentsana ínÿengaftaca tojtójajo ora, chëngbiowe tojtsayëñjanacá. ¹⁷ Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábíowe oyejuayá jabemama. Tšëngaftanga bëtscá šmojalemošná, Cristbeñe tša šmošbuachéyeca, y tšëngaftangbe ošbuachiyánëncaca endmëna Bëngbe Bëtsábíowe oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábíowe oyejuayá jabemama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. ¹⁸ Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

Timoteo y Epafrodito

¹⁹ Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbiowe jíchmuama, tšëngaftangbiama chašuabocuéntama, y chca, atše más añemo

chaitatsbomnama. ²⁰ Er nye cha endmēna canya cach atšcá ainaniñe juabnayá, y cha ndegombre puerte entseboše tšēngaftanga tšabá chašmuetsiyenama; ²¹ chē ín̄yengna nyetscanga nye cachēngbe tšabiama ndayánaca jamama jtsejuabnayana, y tondaye ntsebošana Jesucristbiana jamama. ²² Pero cach tšēngaftanga ya šmondētātšēmo, ntšamo Timoteo chē padecena soyēnguentšana tšabá tonjtšobocñama, y ntšamo Timoteo y atše, mo canye uaqiñá chabe taitábioye cuaftajabuachancá, cán̄yīñe fsējantrabája, más bētscá entšanga chē tšabe noticiēnga chamóyēngacñama. ²³ Chcasna, atše sēntsobátmana cha jíchmuana, ntšamo átšeftaca jopásama chaitsetātšēmo y cachora; ²⁴ pero bētscá ošbuachiyánaca sēntsobatmánayeca, sēntsejuabná, Bēngbe Utabná chašojtábocñese, pronto átšnaca chjobenaye choye jama.

²⁵ Atše sēntsejuabná yojtsemna, Jesucristbeyeca bēngbe catšata Epafrodítmana choye jichmuana, nda átšeftaca cán̄yīñe endētrabája y chē tšabe noticiēnga ndegombre soyēnga bētsemnama jin̄yan̄iyama endenojuezana, nda tšēngaftanga šmojanichmó atše chašubēuájabuachama. ²⁶ Cha chanjíchmuá; cha puerte entseboše tšēngaftanga ján̄yama, y yapa ngmēnaca entsemna, cha šocá enjamnama šmojátātšēmonama. ²⁷ Y ndegombre cha šocá enjamna, y enjētsin̄yana mo jtsobanamcá; pero Bēngbe Bētsá tbonjalastemá, y ndoñe nye chábioye sinó átšbioynaca, atše ndoñe más ngmenanēnga chayātšobomnama, ntšamo mora sēntsebomnama. ²⁸ Chíyeca atše más sēntseboše cha pronto jíchmuana, as tšēngaftanga cha chašmojtin̄ye ora, puerte oyejuayēnga chašmotsemnama, y atše ndoñe yapa chašondētsengmenama. ²⁹ Šmochjofja nyets oyejuayánaca, Bēngbe Utabnábeyeca catšátanga quetsomñecá; y nyets tempo chacá amēngbioye mo bētsētsangcá šmochtsētabna, ³⁰ er batsatema más y matēnjētsobana, Cristbiana trabajayīñe uajabuachaniñe. Cha chē trabajo tonjanma atše juajabuáchama, ntšamo cach tšēngaftanga ndoñe chešmatanobenacá, atše juajabuáchama.

3

Ndayá Pablēbiana ndegombre corente yojanámana

¹ Y morna, atšbe catšátanga, ndayá Bēngbe Utabná tojamama móyejuanga. Ndoñe bacá quešnatámama, ntšamo chē in̄ye tsbuanáchañe tcbonjanēbuabiamcá cachcá cachiñe jtētēyanama; y chē soye bētscá cmochanjújabuache ndoñe resjuiñe chašmondētsemnama. ² Cuedado šmochtsebonna chē ndoñe tšabe entšangbiana, mo quešēngcá imomñēnga, chē puerte bacna soyēnga mondbētsamēnga, y entšangbe más delicadētše base bobachtema jatētsana uamanēnga; ³ er bēnga mondmēna y ndoñe ín̄yenga, chē ndegombre uin̄yanánana bomñēnga, bēnga Bēngbe Bētsabe entšanguentšēnga bētsemnama, bēnga chē Uámama Espiritbe uajabuáchenanaca Bēngbe Bētsá mondadoránama, bēnga chē Cristo Jesúseftaca cán̄yīñe mo can̄yacá bētsemnama mondbētsoyejuama, y bēnga chē ntšamo ín̄yenga monduamancá bēngbe cuerpiñe jamama tondayama yondoservénama mondbētsejuabnayama.

⁴ Masque atše razón sēndētsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebonna chē soyēnga yoserverna ca jtsejuabnayama, ndegombre atše chabiana más razón chama stsóbomñe. ⁵ Sēnjanon̄yá y posufta tianoye base

bobachtema chë más delicadentše šmojantëtše; atšbe nyets uta bëtšetsata Israeloca entšanguentšata bonjamna, y atšna Benjaminbe bëtš pamillentšá sëndmëna; atšbe tempsca bëtš taitanga nyetscanga hebreunga imnamna. Atšna fariseo sënjamna. Atše sënjánama, lempe ntšamo judiëngbe leyënguiñe endayancá, ndayá jamama šojanmëncá. ⁶ Atše tša sënjánboše Bëngbe Bëtšá jt-serevënana, chíyeca Jesúsbeñe ošbuáchiyënga bëtšcá sënjanëcamena; y ndayá canye entšá ibnëtsemna jtsamama, Bëngbe Bëtšabe bominyiñe tšabia jtsem-nama, judiëngbe ley jtsocumplínese, chama ndocná tondaye quenjátsbomna jayanama, atše ndoñe tšabá sentsanama ca.

⁷ Pero lempe chca ntšamo atše sënjamnama y ndayá sënjánamama, puerte sënjanjuabná atšbiana puerte yojanámana ca; pero mora, Cristo atšbe ainaniñe tonjámashëngoyeca, chë soyënga atšbiana ya ndoñe quenatámana. ⁸ Y cabá más, tondaye atšbiana quenatámana, chë bëtš soye jtsonyáyese, Cristo Jesús, Bëngbe Utabná jtsabuatmana. Chábeyeca, lempe chë nye quem luarentša soyënga sënjësebošhona, y lempe chë soyënga atšbiana tondayama quenátoservena; y chca entsemna, chë bëtš soye jëftsashjáchama, Cristo jtsabuatmama, ⁹ y cháftaca cányiñe mo canyácá jtsemnama. Atše ya ndoñe quetsatsngúá Bëngbe Bëtšabe bominyiñe tšabia jtsemnama, nye ntšamo atše tijamama chë judiëngbe ley jtsocumplínese, pero Cristbeñe jt-sošbuáchiyëse aiñe; Bëngbe Bëtšá entsama atše chabe bominyiñe tšabia chaitsemnama, atšbe bacna soyëngama jtseperdónase, y lempe chca entsemna atše Cristbeñe sëndošbuachéyeca. ¹⁰ Atše sëntseboše ndayá cha jtsabuatmana, chë obanënguentšana tojtanayenama cha tojaninýanýe obenana atše chaitsebomnama, atše cháftaca cányiñe mo canyácá chaitsemna ora; y ntšamo bënga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; ¹¹ y ntšámnaca, atše jëftsashjáchama Bëngbe Bëtšá chaoma atše chaitayenama.

Yejuana jtsentšénese, Bëngbe Bëtšábiocana uacanámana josháchiñama

¹² Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bëngbe Bëtšabe bominyiñe stsemna ca, pero sempre natsanoye sentsá, mo nda canye luaroye jashjanguama cuaftsëchamancá; y puerte jtsošbuáchiyëse sentsobátmana atše chjobenaye jtsemnama, chë ndayama Cristo šojanchembo, er Cristo Jesús ya tonjama atše chabiana chaitsemnama. ¹³ Atšbe catšátanga, atše ndoñe quetsátichamo chca ya tijashjache ca. Pero chama canye soye sentsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtšcá sentsama jobenayama chë jashjanguama yojtsemnoye jashjanguama, ¹⁴ chë ndëmoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juacánama bëtšcá jenojuérase cuaftsëchamancá. Cachcá, átšnaca sentsá chë Bëngbe Bëtšá sojtsachembuana uacanámana josháchiñama, Cristo Jesúsbeyeca; y chë uacanámana entsemna chë nyetsca tescama yomna tšabe vida jtsebomnana.

¹⁵ Chca bënga šontsamna jtsejuabnayana, chë Jesucristbeñe puerte ošbuáchiyana y nyets tempo cha ústonënga; y nderado tšëngaftanga ndayífnaca inýetsá šmojatsjuabná ora, Bëngbe Bëtšá chë sóynaca tšabá cmochanjínýanýe. ¹⁶ Pero morna šontsamna jtsiyenana ntšamo mentscoñama Bëngbe Bëtšabe soyëngama šojosertacá.

17 Jesucristbeyeca catšátanga, ntšamo atše sèndmèncá tšèngaftanga šmochtsemna, y chë ntšamo jtsiyenama tcbonjaninÿanyècá imojtsiyenèngbioye šmochtsèñyaye. 18 Ntšamo chochanjayuncá, ya ba soye tcbonjáuyana y mora cachiñe chca chanjayana, pero chca jayanamna atše puerte ngmèncá sèndbètsemna. Banga mondmeña, y chënga ntšamo vida imojtsebomna montsinÿináná, lempe ntšamo Cristo chë crucife jóbaneşe bèngbiana iuayancá contra chënga imojtsemnama, 19 y chëngbioye nyetsca tescama infernoca mochántsapochocaye. Chëngbiana chë más uamana soye yojtsemna jtsamana ntšamo cachënga tmojtsebošcá, nÿe cachëngbe cuerpñe tšabá jtsomñama. Chënga nÿa mo bëtš soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtséuatjama; y chënga sempre jésejuabnayana chë nÿe quem luarama enójuabnyëngbe soyëngama. 20 Chë cuenta bëngna, ndegombre celocama entsanga mondmeña, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. 21 Cha bëngbe cuerpënga, chë pronto jopochócama cuerpënga echanjatrocaye, jtsemnana mo chabe cuerpçá, chë obanënguentsana tojtayenabe cuerpçá; y cha chca echanjama, cha puerte obenana lempe jtsemándayama bómnyayeca.

4

Bëngbe Utabnáftaca cánÿiñe mo canÿacá jtsemnëşe oyejuayana jtsebomnana

1 Chcasna, Jesucristbeyeca atšbe catšátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëşe, cháftaca cánÿiñe mo canÿacá šmochtsemna. Corente chondábabuanÿeshana y tša sèntseboşe tšèngaftanga jánÿama. Tšèngaftangbeyeca atše puerte oyejuayá sèntsemna, y atše corente sèndbètsoyejuaye tšèngaftangbiana inÿengbioye jáuyanama.

2 Evodia sèntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. 3 Y ácnaca, nda puerte tšabá átšeftaca tconjatrabajá, chontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noticiënga entsanga abuyayinayñe. Clemente y inÿe entsanga átšeftaca tmonjatrabajá cach soye amiñe. Nyetsca chëngbe uabaina entsábemana chë libréšañe, ndayentše yojtsábemana chë tšabe vida mochjónÿenëngbe entsangbe uabaina.

4 Sempre oyejuayënga šmochtsemna, Bëngbe Utabnáftaca cánÿiñe mo canÿacá jtsemnëşe, y cachiñe šcutétayana: ¡Móyejuanga! 5 Nyetscanga chamotsetátšëmbo, tšèngaftanga tšabe juabna bomnënga šmommama. Bëngbe Utabná jésabama tempo ya entsobeco.

6 Tondayama šmattsenócochinÿena, pero cada Bëngbe Bëtšáftaca chašmojtsencuénta ora, ndayá cmojtséjabortama cha šmochjaimpáda. Y chca chašmojtsama ora, chánaca šochtsatschuanaye. 7 Chca, Bëngbe Bëtšá echanjama chë chabe ainaniñe tšabe ebionana tšèngaftanga chašmotsebomnana; chë tšabe ebionana puerte bëtscá endmeña, y bënga entsanga quetsomñecá ndoñe ntšobenana chama jósertana; y chca tšabe ebionánaca, tšèngaftangbe juabnënguñe y ainaniñe tondayama quešmochátencochinÿena, er tšèngaftanga cánÿiñe mo canÿacá Cristo Jesúseftaca šmondmeña.

Lempe ntšamo tšabá yomncá soyëngama jtsejuabnayana

⁸ Cabana, atšbe catšátanga, lempe ntšamo ndegombre yomncá soyënguiñe šmochtsejuabnaye, lempe chë respeto yomerecëniñe, nÿetsca soyënguiñe entšangbe bominiñe tšabá yomniñe, nÿets tempo corente tšabá yomniñe, nÿetsca soyënga entšanga yogusetániñe, y lempe chë ndayama entšanga tmojtsejuabná tša iuámana ca soyënguiñe. Lempe chë tšabá yomna soyënguiñe y jtsatschuanayama yomna soyënguiñe šmochtsejuabnaye.

⁹ Sempre šmochtsama chë átšbentsana šmojuábouñe soyënga, chë atšbiajana šmojóyëngacñe soyënga, chë atše šmojoyeuná soyënga y ntšamo šmojinÿcá atše jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

Pablo tojtanacheuá tmojanájabuachama

¹⁰ Atše corente sëndoyeuá Bëngbe Utabnáftaca cánÿiñe mo canÿacá tsmënama, er tšëngaftanga ba ishinÿe chentsana, cachiñe šmojatobená atše jatinÿinÿiyana ntsachetšá atšbe tšabiana tšëngaftangbiana iuámanana. Chca, atše ndoñe quetsátichamo tšëngaftanga atšbiana cmojtsanebnëtjomba ca, ndayá ntšamo tšëngaftanga tšabá šmojuabnacá atše jinÿinÿiyama ndoñe yonjanopodena ca. ¹¹ Atše chca, ndoñe quetsátichamo uajabotá stsemna ca, er atše sënjuatsjinÿe sempre oyejuayá jëftsemnana, nÿe ndaye soyiñe masque batšatémnaca stsebomñese. ¹² Atše sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcaujabótama más bëtscá jtsebomñese. Atše tijuatsjinÿe oyejuayá jtsemnana masque nÿe ndaye soyënguiñnaca stsemna ora, jasama bëtscá stsebomna ora o masque nÿe shëntseca jtsemnana šojtsemna ora, atše jtsiyenama bëtscá soyënga stsebomñese o masque ndóñnaca. ¹³ Atše lempe chca sëndobena, atše obenana jtsebomnama Cristo endbëtsamayeca. ¹⁴ Masque chcasna, tšëngaftanga tšabá šmonjama, atše padecena soyënguiñe sënjamna ora atše juajabuáchana.

¹⁵ Tšëngaftanga, chë Filipoš puebloca Jesucristbeñe ošbuáchiyënga, corente šmondétatšëmbo, Macedonia luarentšana sënjëftsanbocna ora, nÿe tšëngaftanga atše šmonjanájabuachama; inÿe ošbuáchiyënga ndoñe. Chora enjamna atšbe bojatšena tempo tšëngaftangbe luarentše chë tšabe noticiënga entšanga abuayiyayañe; y nÿe tšëngaftanga atše šmonjanájabuache. ¹⁶ Ba soye atše Tesalónica puebloca sënjamna ora, y chašmuájabuachama šonjanájaboto ora, tšëngaftanga atšbe opresidëngama crocénana šmonjanafja. ¹⁷ Chca ndoñe quenátayana atše tsjuabná nÿe tšëngaftangbentsana ndayánaca jóyëngacñama ca; chë sóyeca atše sëntseboše ndayá tšëngaftanga más tšabe soyënga chašmotsamama, Bëngbe Bëtsá tšëngaftangbiana más chaotsóyejuama. ¹⁸ Er atše ya lempe sënjóyëngacñe, y chë šuajabótama cabá más sëntsebomna. Atše chë ntšamo šjuajabotcá lempe sëntsebomna, chë tšëngaftanga Epafrodítóftaca šmonjanichmó soyëngaca. Ndayá atše šmojanichmocá, Bëngbe Bëtsabe bominiñe puerte tšabá entsemna, mo juatšëmbonama ndayá tcojôba y altaroca tcojajuinÿe y botamana tojtsonguëtšecá, chora cha oyejuayá chca jóyëngacñana. ¹⁹ Atšbe Bëtsá, chabe bëtscá uámana y bëtš bomnánaca, echanjama tšëngaftanga lempe ntšamo cmëjabotcá Cristo Jesusbiajana chašmóyëngacñama. ²⁰ Entšanga nÿets tempo chamotsinÿanÿná Bëngbe Bëtsá y Bëngbe Taitá puerte uamaná bëtsemnana. Chca chaotsemna.

Chënga jtadiósoftanama

²¹ Atsbe cuenta, nyetscanga chë Jesucristbeyeca Bëngbe Bëtsábenga imomnënga šmochjácheuaye. Atšeftaca montsemna Jesucristbeyeca catsátangnaca cmontsacheuaná. ²² Nyetscanga chë muentše Bëngbe Bëtsábenga imomnënga, y más chë romanëngbe mandadbe bëts yebnoca oyenënga, cmontsacheuaná.

²³ Atše séntseimpadana Bëngbe Utabná Jesucristo, chaoma tšëngaftangbeñe tšabe bendicionënga chaotsemnama.

Colosenses

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca, ² quem tsbuanácha sěntsabiamná chě Colosas puebloca Běngbe Bětsábenga imomněngbiamá. Tšěngaftanga běngcá Jesucristbeñe ošbuáchiyěnga šmondměna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicioněnga tšěngaftangbeñe chaotsemnana, y chaoma tšěngaftangbe ainaniñe tšabe ebionana chašmotsebojnana.

Pablo, Běngbe Bětsábioye tbojanimpadá Colosas puebloca ošbuáchiyěngbiamá

³ Běngbe Bětsá, Běngbe Utabná Jesucristbe Taitá tšěngaftangbiamá fstseimpadana ora, cha sempre fchandbětsatschuanaye, ⁴ er běnga fsěnjátatsěmbona ntšamo tšěngaftanga Cristo Jesúsbeñe tša šmojtsošbuáchemá, y ntšamo tšěngaftanga nyětsčanga chě Běngbe Bětsábenga imomněnga šmababuányěshanama. ⁵ Natsanama, chě ndegombre buayenánama, chě tšabe noticiěnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsobena tšabe soyama jobátmana, Běngbe Bětsábeñe jtsošbuáchiyěse. Chě šmotsobatmana soye entsama tšěngaftanga Jesucristbeñe puerte chašmotsošbuáchemá y nyětsčanga chašmotsababuányěshanama. Běngbe Bětsá celoca enduaquěcná chě tšěngaftanga šmojtsobatmana tšabe soye. ⁶ Chě tšěngaftanga tcmojanabuayená tšabe noticiěnga más bětscá entšanga montsuenana; y chca, nyěts quem luarentše entšanga montsiyena más tšabe soyěnga jtsaměse. Chca entsemna ntšamo tšěngaftangbentše tojopasacá, chě natsana te chě tšěngaftanga Běngbe Bětsabe tšabiánama šmojanuena orscana, y ntšamo Běngbe Bětsá puerte bonshanánaca y tšabiánaca běngbioye šuanyěnama ndegombre cmojanosérta orscana. ⁷ Y chca Epafras tšěngaftanga tcmojanabuatambá, Běngbe Bětsabe bonshánama y tšabiánama. Epafras endmēna canya běngaftaca Cristbiamá oservená, y cha běnga fsěndbobonshana; cha Cristbiamá endětrabája běngbe cuenta tšěngaftangbentše. ⁸ Cha šonjáuyana ntšamo chě Uámana Espiritu yojtsama, nyětsčanga Jesucristbeñe ošbuáchiyěngbioye chašmotsababuányěshanama.

⁹ Lempe ntšamo tšěngaftangaftaca tojopasama, chě natsana te tšěngaftangbiamá fsěnjauena orscana y měntscoñama, Běngbe Bětsá sempre tšěngaftangbiamá fchandbětseimpadana, cháftaca fstsencuěnta ora. Běngbe Bětsá fsěnděimpadana, chabe Espiritu chaoma tšěngaftanga chašmotsobena jtsetatsěmbuana y jtsosertánana, chca, ntšamo Běngbe Bětsá yobošcá chašmotsamama, tšěngaftanga tšabá chašmotsetatsěmbuama. ¹⁰ Y chca, tšěngaftanga šmochantsobena jtsiyenana jtsaměse ntšamo Běngbe Utabná yobošcá, y sempre šmochántsama ntšamo chabiamá tšabá yomncá. Ntšamo tšěngaftanga chašmojtsiyencá tšabe soyěnga jtsaměse, chěntšana nyětsca tšabe soyěnga echanjóbcna, y tšěngaftanga más tšabá Běngbe Bětsá šmochantsábuatma. ¹¹ Atše, Běngbe Bětsá sěntseimpadana, chabe puerte bětscá obenánaca cha chaoma tšěngaftangbe ainaniñe běts añemo chašmotsebojnana; y chca, tšěngaftanga chě padecena

soyënguiñe chašmojtsemna ora, puerte uantadënga chašmotsemnama, y ainaniñe añémoca Bëngbe Bëtsábeñe beca chašmotsobátmanama. ¹² Y puerte oyejuayënga Bëngbe Taitá šmochántatschuanaye, nda iuama bënga chamotsobena ntšamo cha chabe entšanga jatsatayama tojašebuachenacá jtsebomnama. Tšëngaftanga šmochanjóyëngacñe ntšamo cmojtsëtocancá celoca, chë corente buashinñinñana luarentše. ¹³ Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšëntšana, y tojama chë chabe bonshana Uaquiñabe amëndayana bëngbe ainaniñe chamotsebomnama; ¹⁴ chábeyeca Bëngbe Bëtsá Satanasbe cucuatšëntšana šojatsebacá; o mëntšá, chábeyeca Bëngbe Bëtsá bëngbe bacna soyënga šojtsaperdoná.

Cristo tojanóbanayeca, entšanga Bëngbe Bëtsáftaca tšabá jtsatsmënana

¹⁵ Cristo tmonjáninñe ora, bënga tmojántatšëmbona ntšamo Bëngbe Bëtsá yomnana; entšanga imojobena cha jinñama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. ¹⁶ Chábeyeca Bëngbe Bëtsá tojama lempe ntšamo celoca y quem luarentše yobinñcá, lempe ntšamo chë entšanga imobena o ndoñe mondobena jinñama soyënga, y chë espíritëngnaca chë imobena ínñengbiyoe jtšamëndayana y obenana imobomna. Bëngbe Bëtsá, chábeyeca y chabiama tojama, lempe ntšamo quem luarentše yobinñcá. ¹⁷ Bëngbe Bëtsá cabá nyëtscá soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. ¹⁸ Cha endmëna nda nyëtscanga Bëngbe Utabnábeñe ošbuáchiyënga uamëndá, ntšamo chë bestšaše nyëtscá chë cuerpentša soyënga jtsemándayancá. Cha endmëna nda iuama ošbuáchiyënga tsëm tšabe vida chamotsebomnama, y cha endmëna chë Bëngbe Bëtsabe más bëts Uaquiñá. Bëngbe Bëtsá tojanma, chë cachiñe ainënga mochatsmënënguentšana, cha chë natsaná chaotsemnama; nye cha canña chë más uámana luare chaotsebomnama, nyëtscañe chaotsemándayama. ¹⁹ Er Bëngbe Bëtsá yojanjuabná cachabiama tšabá yojamna, lempe ntšamo cha yomncá, chabe Uaquiñábeñnaca chaotsemnama, ²⁰ y Bëngbe Bëtsá tojánbošena, Crístbeyeca nyëtscá soyënga quem luarentše y celoca, cháftaca tempcá tšabá chaotsatsmënana. Bëngbe Bëtsá chë soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Bëngbe Bëtsá tojanma nyëtscá soyënga quem luarentše y celoca, cháftaca tempcá tšabá chaotsatsmënana.

²¹ Tempo, tšëngaftanga Bëngbe Bëtsá stëtsoye šmojanquedá y chábioye uayayënga šmojamna, bacna soyënga šmojanjuabná y šmojánama causa; ²² pero mora chabe Uaquiñáftaca, cha mo canñe entšacá jóbaneše, Bëngbe Bëtsá tojama tšëngaftanga tempcá tšabá cháftaca chašmotsatsmënana; y chca tojama, tšëngaftanga chabe delante nyëtscá tempo chašmotsemnama; chora tšëngaftanga, chabe entšanga, ainaniñe ndocna bacna soye ndobonnënga chašmotsemnama, y ndocná chaondayana ntšamo šmojamcá ndoñe tšabá yontsemna ca. ²³ Pero tšëngaftanga cmontsamna chë bëtscá ošbuáchiyana šmondobomnana nyëtscá tempo jtsebomnana, Bëngbe Utabnábeñe jtsošbuáchiyama ndocna te ntjajbanacá. Nyëtscá tempo chë tšabe notiçiënguiñe šmochtsošbuáchiye, y ndoñe šmatjaleséncia ndocná tšëngaftangbe ošbuáchiyana chaotrocama; y nye chca puerte jtsošbuáchiyëse Bëngbe

Bëtsábeñe šmochtšobátmana, ntšamo tšëngaftanga šmojanmca, Jesucristbiana buayenánama šmojanuena ora. Chë buayenánana endmëna ntšamo ba entsanga nyetsca quem luarentša entsángbiye tmojabuayenacá, y atšbe trabajo endmëna cach tšabe noticiëngama entsanga jtsabuayinyayana.

Pablo, ošbuáchiyënga jasérviana trabajo tmojanbonjé

²⁴ Atše corente sënjesoyejúá mora tšëngaftangbiana jasúfriama stsobenama. Ba entsanga entsamna jasúfriana Cristo jasérviana, y atše sëntsesufrina ntšamo Cristo tojansufricá, mora atše jtsesufrinëse chabe cuenta, ntšamo jasúfriama yomncá. Y ntšamo sëntsesufrincá entsemna Cristbeñe ošbuáchiyënge tšabiana, chë chabe cuerpcá imomnënga, chënga Cristbënga bëtsemnama. ²⁵ Bëngbe Bëtsá atše šojábema chë Jesucristbeñe ošbuáchiyënge canye ujabuachaná. Cachá chë trabajuama šojanábuayana, chca jamëse, tšëngaftangbe tšabiana chaotsemnama. Chë trabajo endmëna, lempe ntšamo cha tojayancá entsanga jábuayenana. ²⁶ Bëngbe Bëtsá nyetsca entsanga ndoñe tonjanalesenciá, quem luare jobojátšama orscana y nyets tempo chë buayenánama chamotsetatšëmbuama; pero mora, chábënga imomnënga chë soye cha tojinñanyé. ²⁷ Bëngbe Bëtsá yoboše, chabe entsanga imomnënga chamotsábuatmama ndayá tempo chënga ndoñe tonjaninñanyecá; y yoboše chë ndoñe judiënga jinñanyiyama tša bëts y tšabe soye yomna chë ndegombre buayenánana, ndayá tempo ínñënga ndoñe tonjaninñanyecá. Chë tempo ndoñe yonjanótatšëmbo buayenánana entsemna, Cristo tšëngaftangbe ainaniñe yojtsiyena, y chábëñe puerte jtsošbuáchiyëse šmojtsobena jtsobátmanana, Bëngbe Bëtsá puerte bëtsétsanga y uámanënga chácmbiamama, batšá ntšamo cachá yomncá. ²⁸ Bënga nyetscángbiye Jesucristbiana fchandbëtsabuayinyaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye nyets osertánanaca ndayá chënga aiñe yojtsamna jtsamana, y chca, nyetscángbiye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cányiñe mo canýacá jtsemnëse. ²⁹ Chca chaotsemnama, atše bëtscá sëndëtrabája; y chca séntsama, chë Cristo yojtsama atše chaitsebomnama bëts obenánaca.

2

¹ Atše sëntseboše tšëngaftanga chašmotsetatšëmbo, Bëngbe Bëtsá becá tsimpadánama, tšëngaftangbiye jujabuáchama, chë Laodicea puebloquënga Jesucristbeñe ošbuáchiyënga y nyetscanga chë ndocna te atše šmonjinñe ošbuachiyëngnaca. ² Atše chca sëndama, tšëngaftanga y chënga ainaniñe bëts añemo chašmotsebonnama, y cányiñe mo canýacá chašmotsemanama, nyetscanga jtsenbobonshánëse. Chca, nyets osertánana tšëngaftanga chašmotsebonnama, y chë tempo Bëngbe Bëtsá entsanga ndoñe tonjaninñanyé buayenánama chašmotsetatšëmbuama, y chë buayenánana Cristbe soye entsemna. ³ Mo canye bëtscá bomnana iytëmena soyca pero mora ya uínñenana, cachcá Cristbeñe entsemna nyets osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entsanga ndoñe tonjaninñanyé, pero mora Cristo yojtsama bënga chë uámana soyënga chamotsebonnama. ⁴ Atše chca séntsichamo, botamana palabrëngaca ndocná chacmondáingñema. ⁵ Er masque choca tšëngaftangtaftaca atše ndoñe quetsásmëna, atšbe ainana aiñe choca tšëngaftangtaftaca entsemna; y atše

puerte sèntsoyejuá tsèngaftanga šmatenëyeunanama y nyets tempo Bèngbe Bètsábeñe šmojtsošbuáchema.

Cristoftaca cánýiñe mo canýacá jtsemnëse, entsanga ndegombre tsabe vida jtsebmomnana

⁶ Tsèngaftanga Jesucristbeñe ošbuáchiyënga šmojanóbiamama ora, šmojanayana: “Cristo Jesús, Bèngbe Utabná entsemna ca”. Chcasna, tsèngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá. ⁷ Chca šmontsobena jamana, cháftaca cánýiñe mo canýacá nyets tempo jtsemnëse. Smochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiamama buayenana soyëngama, ntšamo tcmojabuatambacá; y Bèngbe Bètsá sempre šmochtsatschuanaye.

⁸ Cuedado šmochtsebmomna, ndoñe šmatjaleséncia ndocná chaondétsamama tsèngaftanga jtsajbanama Cristbeñe ošbuáchiyana jtsebmomnana. Chca entsanga montsebose juabnëngaca tsèngaftanga jáingñama, nye básefta entsangbe juabnënga y tondayama ndoservena juabnënga. Chë juabnënga jtsóbocanana ntšamo bèts taitanga básengbiyoye mondbetsabuátambayentsana y chë espíritëngbentsana, ndëmuanyëngbiamama entsanga jtsejuabnayana chënga nyetsca soyënguiñe imománda ca; pero Cristbentsana chë juabnënga ndoñe ntsóbocanana.

⁹ Cristo endmëna cachcá ntšamo Bèngbe Bètsá yomncá, masque mo canýe entsacá quem luarentse yojéftsiyena; ¹⁰ y Bèngbe Bètsá tojama tsèngaftanga ndegombre tsabe vida chašmotsebmomnana, Cristoftaca cánýiñe mo canýacá bëtsemnayeca; y Cristo, nyetsca chë mándayënga y obenana homnëngbiamama más uamaná endmëna. ¹¹ Tsèngaftanga Cristoftaca cánýiñe mo canýacá bëtsemnayeca, mo uinýnananëngcá šmontsemna, tsèngaftanga Bèngbe Bètsabe entsanga šmomnana. Quem uinýnanánana ndoñe quenátsmëna mo chë más delicadentse base bobachtema tmojatëtscá, cach entsángbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tsèngaftangbe ainanentsana Cristo bacna juabnënga jabuajuánayana. ¹² Tsèngaftanga šmojánenabayema ora, enjamna mo ntšamo cach Cristo tmojanatbontsacá tsèngaftanga utebuantsánënga cuaftsemncá, er tsèngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bèngbe Bètsá tojamca, cachcá, tsèngaftanga šmojánenabayema ora, enjamna mo tsèngaftanga chašmatayenama Bèngbe Bètsá cuafjamcá, er mora tsèngaftanga mo tsmëma entsangcá šmondoyena. Chca tojanopasá, Bèngbe Bètsá obená bëtsemnana tsèngaftanga šmojtsošbuáchema, y chë obenana tojama Cristo cháuatayenama.

¹³ Inýe tempo tsèngaftanga Bèngbe Bètsabiamama mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bèngbe Bètsabe entsangcá ndoñe šmonjámmayeca, pero aíñe šmojanamana bacna soyënga jtsamana nye ntšamo šmojanbošcá. Morna Bèngbe Bètsá tojama tsèngaftanga tsabe vida chašmotsebmomnana, Cristoftaca cánýiñe mo canýacá jtsemnëse, y Bèngbe Bètsá bèngbe nyetsca bacna soyënga šojtsaperdoná. ¹⁴ Mo nda ba ndebënënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna

chë ndebénana pronto jtobocana ca, pero chë entsá chëchangá tojtsand-biama chë entsanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espírituenga obenana bomnënga y ínÿengbioye amëndayënga; y nÿetsca entsangbe delante tojan-inÿanyë cha chënga jtsamëndayama yobenama, mo canÿe reyca chë ínÿenga tojayëñaná ora, chabe entsángaftaca natsana jtsayana y chë ayëñanánëngna ústonoye.

Ainaniñe becá jtsebošana chë ošbuáchiyëngbiana celoca yomna soyënga

¹⁶ Ndoñe caso šmattsabiamnaye, ndoñe tšabá šmontsama ca ínÿenga tšëngaftangbiana tmojtsichamo ora, ndayá tšëngaftanga šmétsesaye o šmétsosfëšnayama, o ndayá añe o ndoñe šmondbëtsamama Bëngbe Bëtsá jadórama fiestënga ora o shbojueta fiesta ora, o jóchnama tese. ¹⁷ Bayté entsemna, Bëngbe Bëtsá entsangbe cucuatšíñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿanÿnaye ndayá más hcoye jopásama; entsángbioye yojaninÿanÿnaye ndayá Cristo yochjanmama. ¹⁸ Báseftanga mondmëna y chënga mo nduamanëngcá entsángbeñe jtsebínÿnana, pero tsoye cachënga corente uámanënga jtse nobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmóntsámayeca. Chënga jtšichámuana bëts soyënga mo otjenayoquécá tmojinÿe ca, y nÿe cachënga puerte jtse nábotamnayana, pero chca chamotsamama razón ndoñe quemátsbomna, er nÿe ntšamo inÿe entsanga imnetsejuabnycá chëngnaca cachcá jtsejuabnayana. ¹⁹ Chënga Jesucristoftaca cánÿiñe ndoñe tmonjoquedanga, y Cristo endmëna chë nÿetsca ošbuáchiyëngbe amëndayá, mo chë bestšaše nÿets cuerpo jtsemandayancá. Canÿe cuerpiñe chë bestšaše jtsamana nÿets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nÿetsca chë cuerpentša soyënga chameneñnanama jtsamëse. Cachcá, Cristo jtsamana nÿetsca ošbuáchiyënga cánÿiñe mo canÿacá cháftaca chamotsemnana, y cada te más tšabá cha chašmótsábuatmama.

²⁰ Cristo tojanóbana ora enjamna mo tšëngaftángnaca cuafj bancá, y Bëngbe Bëtsá tšëngaftanga cmojatsebácá chë quem luarentše imománda espírituengbe cucuatšentsana. As, ¿tšëngaftanga ndáyeca šmojtsiyena jtsamëse mo chë nÿe quem luarama enojuabnáyëngcá? ¿Ndáyeca tšëngaftanga cabá šmoberdecena chca mandënga, mo: ²¹ “Chë soye ndoñe matsbanana, chca soye ndoñe catjase, o chë soye acbe cucuatšëca ndoñe catjaca ca”? ²² Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtso pochócana y chora ton-daye ntsámanana. Chë mandënga jtsemnana nÿe ntšamo entsanga mondbetsamcá y ínÿengbioye mondbetsabuatambaycá. ²³ Ndegombre, ba entsanga jtsejuabnayana chë mandënga tmojamëngbiana, puerte osertanánaca chca tmojama ca, pero ndegombre chca ndoñe quenátsmëna; er chënga jt-sichámuana, ntšamo Bëngbe Bëtsá jadórama yomncá imojtsabuatambá ca, jtsejuatambayana entsá cabnmëna uamaná ndoñe ntsenobiamnayana ca,

y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entsangbe ainanentsana ndoñe ntjajuánana chë bacna soyënga jtsamama juabnënga.

3

¹ Cristo cháuatayenama Bëngbe Bëtsá tojanma ora, enjamna mo tsëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tsëngaftangbe ainaniñe puerte šmochtseboše ndayá Bëngbe Bëtsá celoca tsëngaftangbiamá yobomncá; y choca, Cristo uámana puestentšë endëtbemana, Bëngbe Bëtsabe catšbioica. Y šmochtsinýinýnaye chca šmojtsebošama, ntšamo jtsamëse mora šmojtšiyenama. ² Tsëngaftanga nýets tempo chë celoca soyëngama šmochtsejuabnaye, ndoñe chë nýe quem luarentšë yomna soyëngama. ³ Tsëngaftanga Crístoftaca cánýiñe mo canýacá jtsemnëse, jtsemnana mo tsëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánýiñe mo canýacá endmëna, y Cristo endmëna nda mora tsëngaftangbe vida yojtšinýena. ⁴ Ndegombre, Cristo endmëna nda endama tsëngaftanga tsábe vida chašmotsebomnama; y quem luarentšë cha cachiñe chaojtonýná ora, tsëngaftángnaca chentšë cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinýanýycá, tsëngaftangbiámncaca echanjínyanýiye más bëtsëtsanga y uámanënga šmojtsemnana.

Tempsca vida y morsca vida

⁵ Tsëngaftanga, ntšamo chë nýe quem luarama enójuabnayeñga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguñe ndoñe chaondëtsejuabná; ndoñe chaondëtšiyena nýe ínýengbiamá bacna juabnënga jtsebomnëse, y ndoñe chaondëtseboše nýe bëtscá soyënga ínýengbiamá más jtsebomnama, er chca jtsamana jtsayanana, chabiamá más yojtšamána soyënga jtsebomnana, Bëngbe Bëtsá jatsbobonshánama. ⁶ Er entsanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entsángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. ⁷ Y tempo, tsëngaftanga šmojanियena jtsamëse, sempre nýe chca bacna juabnëngaca, ⁸ pero mora tsëngaftanga cmontsamna lempe quem soyënga stëtsoye jaquédana: ínýengaftaca jetnana, ínýengaftaca rábiaca jtsemnana, ínýabioye ntšamo jáborlama jtsebošana, ínýengbioye jóyanguanuana, y ndoñe tsábe palabrénga jtsóyeuambnayana. ⁹ Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. ¹⁰ Y mora tsëngaftanga šmojashjache jtsemnana mo tsmëma entsangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entsangcá tcmojábiamá; y cha nýets tempo yojtšama, tsëngaftanga cada te más ntšamo cha yomncá chašmotsemnana, chca, corente tsábá cha chašmuábuatmanama. ¹¹ Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentšë base bobachtema tëtšenënga ndoñe más uámanënga quemátsmëna chë ndoñe chca mondmëñëngbiamá; chë inýe luarëngocana

áshjajnënga, bën tjoye oyenënga, chë nÿe ínÿabiana nÿets tempo oservënënga y chë cachëngbiana trabájayënga, nÿetscanga cachcanga mondmëna. Chë nÿe ndayá iuámana endmëna Cristbeñe jtsosbuáchiyana y nÿetsca osbuáchiyëngbe ainaniñe cha yojtsemna jtsemándayama.

¹² Tsëngaftanga Bëngbe Bëtsábenga šmondmëna. Cha cmondábabanÿeshana y tcmojabacacá chabe entsanga chašmotsemnana; chíyeca, tsëngaftanga cmontsamna ínÿenga jtsinÿanÿayana nÿetscangbiana jóngmiana šmuamanama, tsabe juabna ínÿengbiana sempre šmnétsëbomnana, cada ona chë ínÿenga chabiana más uámanënga cuaftsemncá imnëtsejuabnayama, nÿetscanga puerte bonshanánaca šmnétsëñÿayama, y nÿetsca padecena soyënguiñe corente uantadënga šmomnana. ¹³ Nÿetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tsëngaftanga tcmojaperdonacá, tsëngaftángnaca cachcá ínÿenga šmochjáperdonaye. ¹⁴ Lempe chë soyëngama más enduámana nÿetscanga jtsenbobonshánana. Nÿetscanga šmojtsenbobonshánëse, tsëngaftanga šmochantsobena sempre lempe chë inÿe soyënga corente tsabá jtsamana, ntšamo ndegombre chë soyënga jamama yomncá. ¹⁵ Cristo endama tsëngaftangbe ainaniñe tsabe ebionana chašmotsebomnana. Chë tsëngaftangbe ainaniñe tsabe ebionánaca šmochtsiyena nÿetscanga natjëmbana, Jesucristbeñe osbuáchiyënga quetsomñecá. Bëngbe Bëtsá tcmojáchembo tsëngaftanga nÿetscanga cánÿiñe mo canÿe cuerpcá chašmotsemnana, y chca, natjëmbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Cristbe puerte tsabe buayenana soyënga tsëngaftangbe ainaniñe nÿets tempo šmochtsambaye. Nÿets osertanánaca šmochtsenbuátëmbaye y šmochtsenbuayiyenaye. Nÿets ainánaca šmochjacánta chë Salmos librësañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tsëngaftanga chašmotsobena jacántama soyënga; chca šmochjama Bëngbe Bëtsá jëtschuayama. ¹⁷ Y lempe ntšamo chašmojtsama o chašmotsichamcá, Bëngbe Utabná Jesúsbeñe osbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jt-satschuanayëse.

Ntšamo ínÿengaftanga jtsiyenama

¹⁸ Shémanga, šmochtsatšëmbo tsëngaftangbe boyanga chë yebnentša mándayënga imomnana, y nÿets tempo chca jtsejuabnayëse šmochtsiyena, er tsëngaftanga Bëngbe Utabnábeñe osbuáchiyënga quetsomñecá, chca cmontsamna. ¹⁹ Boyanga, tsëngaftanga shémanga sempre šmochtsababuánÿeshana, y podesa palabrëngaca ndoñe šmattsëtsnaye.

²⁰ Básenga, tsëngaftangbe bëtsëtsanga nÿetscañe šmochtsayaunana; chca šmojtsamëse, Bëngbe Bëtsá oyejuayá echántsemna. ²¹ Taitanga, ndoñe šmattsama tsëngaftangbe básenga chauetënana, ainaniñe tondaye añémoca chënga ndoñe chamondëtsatsmënama.

²² Tsëngaftanga chë nÿets tempo nÿe ínÿabiana oservënënga, tsëngaftangbe nduiñënga nÿetscañe šmochtsayaunana, y ndoñe nÿe chënga tcmojtsëñÿa ora, mo nda nÿe entsangbe delante tsabá joquédama tojtsebošacá, ndayá chënga šmochtsayaunana nÿets ainaniñe ndegombre tsabe juabnëngaca, er tsëngaftanga Bëngbe Utabnabiana corente respeto šmondobomna. ²³ Lempe ntšamo chašmojtsamcá, nÿets tsëngaftangbe

añémoca šmochtsama, mo Bëngbe Utabná ndegombre cwaftseservencá, y ndoñe nÿe entsangbiocyá. ²⁴ Tsëngaftanga ya šmondétatsëmbo, ntšamo cha chabe entsanga tojašebuachenacá mo uacanancá, Bëngbe Utabná tsëngaftanga cmochjásatayama. Er Cristo, chë Utabná, endmëna ndábenga tsëngaftanga šmomnana, y cha šmondëserveda. ²⁵ Pero chë ndoñe tsabe soyënga tontsamábioye, Bëngbe Bëtsá bochanjacastiga, ntšamo chë entsá bacna soyënga tojamcá, er Bëngbe Bëtsabiana nÿetscanga cachcá monduámana.

4

¹ Y tsëngaftanga, ndëmuanyëngbiama inÿenga nÿets tempo imoservena, nÿetsca soyënguiñe tsabá šmochtsama, y nÿetscangbiama cachcá šmochtsemna, chë nÿets tempo nÿe tsëngaftangbiama oservenëngaftaca, er tsëngaftanga šmondétatsëmbo celoca canÿa endmëna, ndabiana tsëngaftangnaca oservénënga šmondmëna.

Ošbuáchiyënga jábuayenama

² Nÿets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. ³ Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiana entsanga jábuayenama, chë buayenana soye ndayama tempo entsanga ndoñe monjántatsëmbo. Atše chë buayenana soye entsanga abuátambaye causa, mora cárceloye sentsëtámena. ⁴ Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entsanga jabuátambama, y chë soye atše chaima chënga corente tsabá catafjosertaycá, er atše šontsemna chca jamana.

⁵ Šmochtsiyena nÿetsca soyënga osertanáncá jtsamëse chë Jesucristbeñe ndošbuáchiyëngaftaca, y chca, nÿets tempo inÿenga šmochtsinÿanyñaye tsëngaftanga Jesucristbeñe ošbuáchiyënga íntsemnama. ⁶ Inÿengaftaca chašmojtsencuënta ora, šmochtsama ntšamo šmojtsoyebuambnacá chëngbiama tsabá chaotsemnama, y soyënga šmochtsichamo nÿetscanga oyejuayana chamotsebomnama; y šmochtsetátšëmbo ntšamo cmojtsamna cada canÿabioye jojuana.

Jtadióšoftanama

⁷ Jesucristbeyeca bëngbe bonshana catšata Tíquico, canÿe trabajayá tsabe palabra bomná y Bëngbe Utabnabiana bëngaftaca oservená, tsëngaftangbiocyte noticiënga echanjuamba ndayá átšeftaca tojopasama. ⁸ Chíyeca cha tsëngaftangbiocyte sentsichamná, chca, tsëngaftanga chašmotsetatsëmbuama ndayá bëngaftaca yojtsopasana, y cha chacmañëmuayama. ⁹ Cháftaca Onésimo echanjá, Jesucristbeyeca bëngbe bonshana catšata; cha canÿe tsabe palabra bomná endmëna, nda tsëngaftangbiocana tonjánabo. Chata tsëngaftanga cmochanjácuntaye lempe ntšamo muiñe yojtsopasancá.

¹⁰ Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tsëngaftanga ya buayanánënga šmontsemna ndayá jamama cmojtsamnana, Marcos tsabá jofjama, cha tsëngaftanga jautsétsayama tojase. ¹¹ Jesús, chë Justo cánaca uabainá, chánaca cmontsacheuaná. Quem pueblentša nÿetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entsángbiocyte chaóshjanguama, y chënga mondama atše

ainaniñe bēts añemo chaitsebomnama. ¹² Epáfrasnaca cmontsacheuaná, inye tšëngaftangbiocá y cha Cristo Jesusbiamá jatrabájama endoserverna. Cha nyets tempo tšëngaftangbiama Bëngbe Bëtsábioye tša bochandbétseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. ¹³ Cach atše sënjinñe y sentsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëgnaca. ¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nyetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëgnaca. ¹⁶ Quem tsbuanácha chašmojualiá chentšana, Laodiceoca ošbuachiyëngbioye šmochjuichmua, chócnaca mëcha chamualiamá; y tšëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tšëngaftangbioye chaojuáshjango ora.

¹⁷ Arquipo šmochjauyana yejuana chaotsantješna chë Bëngbe Bëtsá tbojabonñé trabajo sempre tšabá chaotsocumplínama.

¹⁸ Atše Pablo, nñe quem palabrënga tšëngaftanga jacheuayama cach atšbe cucuátšeca sentsabiamná. Šmochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

1 Tesalonicenses

Jacheuayama

¹ Atse Pablo, Silvano y Timotéoftaca, quem tsbuanácha séntsabiamná tséngaftangbiamá, chë Tesalónica bëts puebloca Jesucristbeñe ošbuáchiyëngbiamá, tséngaftanga chë Bëngbe Bëtsá chë Taitá y Bëngbe Utabná Jesucristoftaca cányiñe mo canyáca šmommënga. Atse séntseimpadana Bëngbe Bëtsá, chaoma tsabe bendicionënga tséngaftangbeñe chaotsemnana, y tséngaftanga ainaniñe tsabe ebionana chašmotsebo mnana.

Pablo Bëngbe Bëtsábiöye tbojtanchuá chë Tesalónica pueblentsa entsangbe ošbuáchiyama

² Bënga sempre Bëngbe Bëtsá fsëndëtschuaná tséngaftangbiamá, y bënga cháftaca ftsencuénta ora, tséngaftangbiamá fchandbëtseimpadana. ³ Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tséngaftanga šmotrabájama, Jesucristbeñe ošbuáchiyana šmobómnayeca; ntšamo tséngaftanga tša ínÿenga šmëjabuáchana, Jesucristo šmobobonshánayeca; y ntšamo tséngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca catsátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnana. ⁵ Bënga chë tsabe noticiënga Jesucristbiamá tchonjanabuayená ora, ndoñe nÿe bënga jóyebuambayëse chca quenjatšmëna, ndayá chë Uámana Espírítbe obenanácnaca, y bënga corente jtsejuabnayëse chë buayenánana ndegombre soye bëtsemnana. Tséngaftanga corente šmondëtatšëmbo ntšamo bënga ftsjamna tséngaftangaftaca fsënjamna ora, tsabe soyënga tséngaftangbiamá nguayíñe.

⁶ Chora, ntšamo bënga fsënjanamcá y ntšamo Bëngbe Utabná enjaníyencá, tséngaftanga šmonjanontsé amana; y chë buayenánana šmonjanóÿengacñe chë Uámana Espírítu tcmojanatsátá oyejuayánaca, masque ínÿenga tmojamna tséngaftanga puerte chašmosufrima. ⁷ Mëntsá, tséngaftanga uánatsanënga šmonjanobiamá ntšamo ndegombre jtšiyenama, nÿetsca Macedonia y Acaya luarentša Jesucristbeñe ošbuáchiyëngbiamá. ⁸ Tséngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentse entsanga chama quemátstatšëmbo —nÿets luarenache entsángnaca montsetátšëmbo ntšamo tséngaftanga Bëngbe Bëtsábeñe šmojtsošbuáchema — y chca, bënga tondaye más quešnátëjabeto tséngaftangbiamá jatichámuama. ⁹ Cach entsanga montsoyebuambná chë bënga tchonjánabuache ora tša tsábá tséngaftanga šcojanëbuajama. Chëngnaca montsichamo ntšamo tséngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tsabe benache jtishachama, y chë Bëngbe Bëtsá ndegombrá y ainá jasérviamá, ¹⁰ y chca, chabe Uaquíñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentsana, Bëngbe Bëtsá entsangbe bacna soyëngama chëngbiamá yobomnentšana.

2

Ntšamo Pablo yojanrabája Tesalónica puebloca

1 Cach tsëngaftanga, Jesucristbeyeca catsátanga, šmondétatsëmbo bënga tcbonjánabuache ora ndoñe nye bonamente quenjatsmënana. 2 Tsëngaftanga šmondétatsëmbo, bënga cabá tsëngaftangbiyoe nda ora, Filiposoca šonjanëyánguango y bacá šonjánaborlama; y masque tsëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tsábe noticiënga bëtscá añémoca jabuátambama. 3 Er bënga entsángbiyoe hostero soyënga ndoñe queftsjatanabuayiyiná, tsëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná. 4 Bëngna inyetsá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tsábe noticiënga entsanga jabuátambama, y chca bënga fsëndoyebuambná; chíyeca bënga ndoñe nye entsangbe bominyiñe tsábá chaotsinýnama queftsátama, ndayá nye Bëngbe Bëtsabiama, nda chë ndayá bëngbe ainaniñe yomnama yotátatsëmbo. 5 Ntsamo tsëngaftanga corente šmondétatsëmbcá, bënga ndocna te tsëngaftangbiama tsábe soyënga tifjánayana, tsëngaftanga bëngaftaca oyejuayënga chašmotsemnana; y ntsamo tsëngaftanga cbonjanëtsëtsnacá ndoñe quenjatsmëna nye tsëngaftangbentsána ba soyënga bëngbiama josháchiñama. Bëngbe Bëtsá chama yotátatsëmbo. 6 Ndocna te bënga queftsatsnguá entsanga más uamanëngcá bënga chašotsabiamnana, ni tsëngaftangbentsána, ni inyëngbentsána.

7 Masque bënga, Cristbe ichmónënga bëtsemnana, matifjanobená tsëngaftanga nye sempre jtsamëndayana, bënga ndoñe chca chibiátanma; bënga corente jtsababuányeshanëse cbonjánanyena, ntsamo canye mamá chabe básenga jtsabëchayana y corente bonshanánaca jtsanyënanana. 8 Tsa cbonjánababuanyeshanayeca, bënga ndoñe nye chë Bëngbe Bëtsabe tsábe noticiënga checbënjatanabuayena, tsëngaftanga chiñe chašmotsošbuáchema ntsamo bënga fsëndošbuachecá, ndayá bëngbe vidënga jáshbiamnaca fsënjanprontana tsëngaftangbe tsabiama. ¡Tsa cbondábabuanyeshana! 9 Jesucristbeyeca bëngbe catsátanga, tsëngaftanga šmenabouínýna ntsamo bënga bëtscá y jabuache fsënjantrabajama, Bëngbe Bëtsabe tsábe noticiënga abuayinyañe y bëngbe vida onguayañe, chca, tsëngaftanga ndoñe chacmondëtsamnama bëngbe uajabótama bënga jatatsatnayama.

10 Cach tsëngaftanga šmondétatsëmbo y Bëngbe Bëtsánaca, ntsamo bënga ftsjamna tsëngaftanga chë ošbuáchiyëngaftaca fsënjama ora; fsënjaniyena ntsamo Bëngbe Bëtsá tsábá tbojtsinýncá, nyetscángaftaca fsënjánama ntsamo jamama šojanamncá, y ndocná quenátobena jatichámuana ntsamo fsënjanamcá ndoñe tsábá yonjamna ca. 11-12 Tsëngaftanga šmondétatsëmbo, bënga bëtscá jóyebuambayëse cada ona tsëngaftanguentsá cbonjanëjabuachanama y cbonjánañemuana, ntsamo canye taitá chabe básengaftaca endbetsamcá. Bënga bëtscá cbonjanëtsëtsná ntsamo Bëngbe Bëtsá tsábá tbojtsinýncá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

13 Bënga, Bëngbe Bëtsabe tsábe soyënga cbonjanabuayiyiná ora, ntsamo tcbonjanëyancá tsëngaftanga šmonjanuena y šmontsanošbuaché mo Bëngbe Bëtsábicocana buayenanancá, y ndoñe nye entsangbe oyeubambnyancá. Y ndegombre Bëngbe Bëtsabe buayenánana endmëna, y chë palábraca, tsëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. 14 Jesucristbeyeca catsátanga, cach tsëngaftangbe luarentša entsanga cmonjanëcamena ora

y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëncá enefjuanënga tmonjanpasacá, y chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora. ¹⁵ Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrinama. Chënga ndoñe tsábenga Bëngbe Bëtsabe bominyiñe quemátsmëna, y nyetsca entšangbe contra montsemna. ¹⁶ Chë ndoñe judiëngbioye, Bëngbe Bëtsá cháuatsebacama jábuayenama ftseboše ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entšanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica puebloca entšanga jányama

¹⁷ Jesucristbeyeca catšátanga, bënga tsëngaftangbentšana baseftayté jëftsebcnana šonjanotocá ora, masque ndoñe choca tsëngaftangaftaca queftsjátanmëna, sempre tsëngaftangbiana fsënjanenojuabná, y tša fsënjánboše tsëngaftangbioye jtésana jautsëtsayama. ¹⁸ Bënga fsënjánboše tsëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. ¹⁹ Atše sënstanboše tsëngaftanga jautsëtsayama, er tsëngaftangbeyeca Bëngbe Utabná Jesusbe delante, cha yochjésabo ora, ntšamo tsëngaftanga šmoyenama, bënga puerte jtsošbuáchiyëse fchantsobátmana, corente oyejuayënga fchtsemnana y más bëtsëtsanga fchtsemnana. ²⁰ Aíñe, ndegombre, ntšamo tsëngaftanga šmoyenama, bënga bëtscá añémoca ntšamo tsëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

3

¹ Chíyeca ya ndoñe chibiatanobená más jatobátmanana tsëngaftanga jautsëtsayama; as fsënjanjuabó nýe bëndata Atenas bëts pueblentše joquédana, ² y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservéniñe, tsabe noticiënga Cristbiana entšanga abuayiynayíñe. Fsënjanichmó chacmañémuayama y chaotsamama tsëngaftanga Jesucristbeñe más chašmotsošbuáchemá; ³ y chca, ndocná Jesucristbeñe ošbuáchiyana chaondájbana, masque tsëngaftanga Jesúsbeñe ošbuáchiyënga bëtsemnana, inýenga imojtsama chašmotsesufrinama. Er cach tsëngaftanga šmondëtatšëmbo bënga šojtsamna chca quem luarentše jëftsepadecénana. ⁴ Y cabá tsëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tsëngaftanga ya šmondëtatšëmbcá. ⁵ As y chë tsëngaftangbiana jtsetatšëmbuama más jatobátmanana ndoñe quetstëtsoyebayeca, sënjanjuabó šojëtsemna Timoteo jíchmuana. Sënjanichmó atše jtsetatšëmbuama aíñe bëtscá o ndoñe tsëngaftangbe ošbuáchiyana Jesucristbeñe tayoammana, er atše yapa sënjanjuabná nderado Satanás tojanma tsëngaftanga bacna soyënga chašmotsamama, y chca, bëngbe trabajo tondayama chaondëtsoyebayenama.

6 Pero mora, Timoteo tsëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tsëngaftanga bëtsá Jesucristbeñe šmojtsošbuáchemá y nyëtsanga šmenbobonshánama. Cha šonjacuntá ntšamo tsëngaftanga corente oyejuayënga bëngbiamá šmuatenajuabnamá, y ntšamo tsëngaftanga tša šmojtseboše bënga jányama, cachá ntšamo bënga tsëngaftanga jányama tša fsëntsebošcá. ⁷ Quem soyëca, Jesucristbeyëca catšátanga, y mora chë bënga nyëtsca chë padecena soyënga fstseboamna ora y ínÿënga bënga jasúfriamá imojtsamá ora, bëts añemo fsëntseboamna, ntšamo tsëngaftanga tša Jesucristbeñe šmojtsošbuáchemá jtsetatšëmbëse. ⁸ Jtsetatšëmbuana tsëngaftanga sempre puerte tšabá Bëngbe Utabnáftaca šmoyenamá, entsamá bënga más añémoca chaftsiyenamá. ⁹ Mora fchantsobena Bëngbe Bëtsá jtsatschuanayana tsëngaftangbiamá, y chë tsëngaftangbeyëca chabe delante bënga oyejuayana ftsbomnánmá. ¹⁰ Cada te, bnëté y ibeta, tša Bëngbe Bëtsá fsëndétseimpadana jobenayamá tsëngaftanga jautsëtsayamá chašualesenciamá, Bëngbe Bëtsabe palabrá tšabá chašmobe decemá, chë buayenánana ntšamo yojtsashbencá jabuátambamá.

¹¹ Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenamá tsëngaftangbiyë jama jautsëtsayamá. ¹² Y Bëngbe Utabná chaomá más bëtsá chašmotsenbobonshánama, y cachcá corente nyëtscángaftaca, ntšamo bënga chondababuanÿeshancá. ¹³ Chca, tsëngaftangbe ainaniñe bëtscá añemo šmochántseboamna; y Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaundayana, ntšamo tsëngaftanga šmojamcá ndoñe tšabá yontsemná ca, er tsëngaftanga šmondmëna Bëngbe Bëtsábënga, nyë cha jtseservénamá.

4

Ntšamo jtsiyenamá, Bëngbe Bëtsá oyejuayá chaotsemnámá

¹ Y mora inÿe palabrá šmochjatspasëncia. Jesucristbeyëca bëngbe catšátanga, tsëngaftanga bëngbentšána šmonjanatsjinÿe ntšamo jtsiyenamá cmojánamná, ntšamo Bëngbe Bëtsábíoye oyejuayá jabemamá yomncá, y ndegombre chca tsëngaftanga šmondoyëna. Y mora Bëngbe Utabná Jesusbe cuenta, cbontsaimpadana y becá cbontsëtsësná más chca chašmotsamamá.

² Tsëngaftanga šmondëtatšëmbo ndayá tifjánayana ntšamo tsëngaftanga chašmotsiyenamá, y chca fsënjanmá Bëngbe Utabná Jesús chca jamamá šonjanamëndáyëca. ³ Bëngbe Bëtsá endboše tsëngaftanga chašmotsiyenamá mo Bëngbe Bëtsabëngcá, ndocná bacná soyënga boyabása o shembásaftaca chaondëtsamamá, ⁴ y nyëtsanga chamotsobena ntšamo canÿe shema jonguanguana, chë ntšamo canÿa Bëngbe Bëtsábía yomná jamamá ibomncá, y ntšamo entšangbe bominÿiñe tšabá yomncá, ⁵ y ndoñe chabondónguango nyë cháftaca bacná soyënga chëngbe cuérpoca jamamá, ntšamo chë Bëngbe Bëtsábíoye nduabuátmënga mondbetsamcá. ⁶ Chë palabriñe ndocná chabe catšátbíoye chabondëingñé, chë catšatbe shëmaftaca bacná soye jamëse, er chca amëngbiyë Bëngbe Utabná corente echanjácastigayë. Chiyëca bënga ya bëtscá chama tcbonjabuayená. ⁷ Er Bëngbe Bëtsá ndoñe šonjánachembo bacná soyënga boyabása o shembásaftaca jtsamamá, ndayá ntšamo tšabá yomncá jtsamamá, ntšamo chabe entšanga mondbetsamcá. ⁸ Mëntšá, nda quem buatëmbana soyënga tojtsábotëna, cha ndoñe nyë entšanga

jtsëbátenana, ndayá Bëngbe Bëtsábioye, nda tsëngaftangbe ainaniñe Uámana Espíritu cháumashënguama tojama.

⁹ Atse ndoñe queñátsmëna juabuábiamana ntšamo cmojtsamna ínÿenga Jesucrísteñe ošbuáchiyënga jtsababuánÿeshanama, er cach Bëngbe Bëtsá tcomonjabuatambá nÿetscanga chašmotsenbobonshánama. ¹⁰ Y ndegombre, tsëngaftanga chca šmondama nÿetsca Macedonia luarentše Jesucrísteñe ošbuáchiyëngaftaca. Pero cbontsaimpadana, Jesucrísteñe catšátanga, más chca chašmotsamama.

¹¹ Nÿa sempre quem soyënguñe šmochtsentšena: natjëmbana jtsiyenana, ínÿengbe soyënguñe ndoñe ntsontremeténana, y ndoñe ntjatobátmanana nÿe ínÿenga tsëngaftangbiamama chamotsetrabájama, ntšamo tbonjanëyancá tsëngaftangaftaca fsënjamna ora; ¹² chca šmochtsama, chë ínÿenga Jesucrísteñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

¹³ Bëngbe catšátanga, bënga fsëntseboše tsëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tsëngaftanga ndoñe ngmenánaca chašmondëtsemnana, mo chë ínÿengcá, chë tcojóbantšana ndoñe yontsemna jtayenama ca juabnayëngcá. ¹⁴ Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbänënga y Jesúsbeñe tmojtsošbuachese, Bëngbe Bëtsá chëngbiamama yochjama chë nÿetsca tescama yomna tsabe vida Jesucrístoftaca chamotsebmomna, y quem luaroye cháftaca chamuatábama.

¹⁵ Chë soyama bënga cbontsëtsëtsná ntšamo cach Bëngbe Utabná tojéftsanabuatomacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinÿena tsbanánoca, más natsana chë ya obanënga chë te mochtayenëngbiamama. ¹⁶ Er entsanga mochanjouena canÿe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámna, y chora cach Bëngbe Utabná celocana echanjástjango. Y chë tmojóbänënga, Crístbeñe imojanošbuachenga, natsana mochantayena; ¹⁷ chentšana, chë ainënga chamojtsemnënga chëngaftaca cánÿiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nÿetsca tescama cháftaca bënga mochantsemna. ¹⁸ Quem palabréngaca nÿetscanga ndoñe más ngmënana ainaniñe chašmondëtsebmomna.

5

¹ Jesucrístbeyeca catšátanga, ndoñe quenátsiyta atse jubuábiamana mocna ora chë soyënga yochjopásama. ² Cach tsëngaftanga corente šmondëtátšëmbo, Bëngbe Utabná yochjésabo chama ndocná chaondëtsejuabná ora, mo canÿe atbëbanacá jashjanguana ibeta ndocná chama tonjatsjuabná ora. ³ Entšanga chamojayana: “Lempe tsabá endëtsomñe y tondayama queñátamna játauatjana ca”, chora nÿe ndeolpe chë entsangbiamama tša jasúfriama echanjóshjango, mo canÿe shembása šešona jtsebmomna ora nÿe ndeolpe jasúfriama jóntšancá; y ndegombre, entsanga chca jasúfriama quemochatotsbocá. ⁴ Pero tsëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga

quešmochátsmëna, mo ndábioye canÿe atbëbaná tbojotbá ora, chábioye cuafsauatjanacá. ⁵ Nÿetsca tšëngaftanga šmondmëna entšangbe juabna binÿnayabe básenga, y mo binÿniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶ chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuafsemangcá oyenënga. Pero aiñe šontsamna mo chë fšnëngcá jtsiyenana, bëngbe cuerpo jtsemándayëse y nÿets tempo jtseprontánëse. ⁷ Ibeta ora entšanga jtsemangana, y cach ibeta tojtsemna ora entšanga jotmenangana; ⁸ pero bënga, chë binÿnentsëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanashbiana jenëuyanama y cha jayënjanama, mo canÿe soldadcá, canÿe morocho soye cochaca jenácochjatsana jtsevalentiana y ndoñe chamondëyënjanama. Y chë castigüentšana Bëngbe Bëtsá šochjátsebacamnaca puerte jtsošbuáchiyëse jtsobátmanana; y chca, bënga mochántsemna mo canÿe soldadcá, cha canÿe casquëse juabuchëtsana jenëuyanama. ⁹ Er Bëngbe Bëtsá ndoñe šonjáchembo bënga chašotsamnana chë nÿetsca tescama castigo jtsebomnana. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. ¹⁰ Cha bëngbiana tojanóbana, bënga cháftaca cánÿiñe jtsiyenama chamotsobenama, masque ainënga o obanënga chamojtsemnëse, cha chaojésabo ora. ¹¹ Chíyeca, nÿetscanga šmochtsenañëmuaye y šmochtsenájabuachana más jtsošbuáchiyama, ntšamo tšëngaftanga mora ya šmontsamcá.

Pablo choca ošbuáchiyënga jábuayenama

¹² Jesucristbeyeca catšátanga, cbontsaïmpadana chašmotsarrespetana chë Bëngbe Bëtsábiana tšëngaftangbeñe trabajayëngbioye, y chë Bëngbe Utabná tšëngaftanguentšë tojábacacanga uánatsanënga chamotsemnana y ntšamo jt-siyenama cmojtsamnana chácmabuayenama. ¹³ Cmontsamna chënga jtsar-respetánana y jtsababuánÿeshanana, ndaye trabajo chënga imojtsamama. Natjëmbana nÿetscángaftaca šmochtsiyena.

¹⁴ Quem soyënga chašmotsamámna cbontsaïmpadana: jatrabájama ndoñe tmontsebošëngbioye šmochjucácana, añemo ndbomnëngbioye šmochjáñëmuaye, bëtsca ošbuáchiyana ndbomnëngbioye šmochjúabuache, y uantadënga nÿetscángaftaca šmochtsemna.

¹⁵ Cuedado šmochtsebmna, nderado nda bacna soye tbojaborlase, ndocná ndoñe cachcá chabondëtachnënguama. Masna, nÿe šmochtsentšena nÿets tempo tšabe soyënga jtsamama cach tšëngaftanguentšëngaftaca y nÿetsca entšangaftácnaca.

¹⁶ Nÿets tempo oyejuayënga chašmotsemna. ¹⁷ Sempre Bëngbe Bëtsáftaca šmochtsencuëntaye. ¹⁸ Nÿetsca soyënguñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

¹⁹ Ndoñe šmattsama ntšamo chë Uámana Espíritu tšëngaftangbeñe yojtsamcá chaotsochocama. ²⁰ Ndoñe šmattsábotena chë Bëngbe Bëtsabe juabna oyebuambnayëngbe buayenana soye. ²¹ Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojt-sichamuabe buayenánama ndegombre Bëngbe Bëtsábiocana tayóbocanama, y

chentsa tšabe soyënga šmochjobuajo y sempre chca šmochtsama. ²² Njetsca bacna soyënguentsana šmochtsojuánañe.

²³ Cach Bëngbe Bëtsá, chë bëngbe ainaniñe tšabe ebionana chamotsebomnama endamá, njetsca soyiñe tšábenga chacá chacmabiamá, y njets tšëngaftangbe espíritu, ainana y cuerpo chaotsinýena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. ²⁴ Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

Inýe rueguënga chëngbiamá y jtadiósoftanama

²⁵ Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

²⁶ Njetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerta bonshanánaca šmondbetsacheuanaycá.

²⁷ Cbontsamënda quem tsbuanácha njetsca Jesucristbeñe ošbuáchiyënga chašmëbuáliama, y chca sentsama, Bëngbe Utabná chca jamama šojanmandáyeca.

²⁸ Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

2 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tsêngaftangbiamá, chë Tesalónica bëts puebloca Jesucristbeñe ošbuáchiyëngbiamá, tsêngaftanga Bëngbe Bëtsá chë Taitá y Bëngbe Utabná Jesucristoftaca cányíñe mo cányáca šmommënga. ² Atše sëntseimpadana Bëngbe Bëtsá, chaoma tsabe bendicionënga tsêngaftangbeñe chaotsemnama, y tsêngaftangbe ainaniñe tsabe ebionana chašmotsebonnama.

Cristo chaojésabo ora, ntšamo entsanga tmojamama Bëngbe Bëtsá echanjayana

³ Jesucristbeyeca bëngbe catšátanga, šontsamna nyets tempo Bëngbe Bëtsá tsêngaftangbiamá jtsatschuanayana, ntšamo tsêngaftangbiamá jamama šojtsëtocancá, er tsêngaftanga cada te más ošbuáchiyana šmontsebonna, y ntšamo tsêngaftanga nyetscanga šmojtsenbobonshana, tempscama más yojtsemna. ⁴ Tsêngaftangbe ošbuáchiyama y bonshánama, bënga nyets tempo oyejuayënga fchandbëtsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tsêngaftangbiamá jóyebuambayama. Bënga fchandbëtsoyebuambayana ntšamo tsêngaftanga inÿetsá ntjatsjuabnaya Jesús Cristo šmëstonama, y ntšamo tsêngaftanga chábeñe tša šmošbuachëmnaca, masque inÿenga tša cmëcamena y chašmosufrima bëtscá imojtsama, tsêngaftanga Jesucristbeñe ošbuáchiyënga bëtsemnama. ⁵ Tsêngaftanga chca Cristo šmëstonayeca, corente entsinÿinÿena Bëngbe Bëtsá nyetsca soyënguiñe tsabá amá yomnama, y entsanga ntšamo tmojamama tsabá o ndoñe tsabá bëtsemnama jayanama ora, cha chca echanjayana ntšamo entsanga tmojtsomerecencá. Y chca entsayana tsêngaftanga aiñe mercedo šmotsobuájoñe chabe amëndayoye jamashënguama ca; y mora, tsêngaftanga choye jobenayama jashjanguama šmojtsamama, inÿenga imojtsama chašmotsesufrinama.

⁶ Bëngbe Bëtsá echanjama ntšamo jamama ibomncá; echanjama chë tsêngaftanga chašmosufrima imojtsamënga bëtscá chamosufrima; ⁷ y echanjama tsêngaftanga y bënga chë mondësufrinëngbiamá, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inÿetsënga echántsemna. ⁸ Cha echanjabo chë Bëngbe Bëtsábioye jtsabuatomama ndoñe montsebošënga jabácastigayama, y chë tsabe noticiënga Bëngbe Utabná Jesusbiamá ndoñe montsuenanëngbioynaca. ⁹ Chënga Bëngbe Bëtsá echanjácastigaye, nyetsca tescama jtsapochócáse; y Bëngbe Utabná bentšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnama. ¹⁰ Quem puerte uámana te, Bëngbe Utabná chaojésabo ora, nyetsca chabe entsanga, nyetsca chábeñe ošbuáchiyënga cha mochántatschuanaye y mochántsíchamo: “¡Tša obená cha yomna ca!” Y tsêngaftanga chëngaftaca šmochántsemna, er tsêngaftanga šmontsanosbuaché bënga ndegombre fšënjántatsëmbo soyënguiñe, chë bënga tcbonjanabuayená soyënguiñe.

¹¹ Chíyeca, chca chaotsemnama, n̄yets tempo Bēngbe Bētsábioye tšēngaftangbiana fsēndēimpadana mercedo bomnēnga chácmbiamama, chē vida chašmotsebomnama, ndayama cha tcmojúbuaja, y chabe obenánaca bētsá chaoma tšēngaftanga chašmobená n̄yetsca tšabe soyēnga ntšamo šmojtsejuabnacá jamama, y chašmobená jamama ndaye soyēnga ntšamo šmojtšamcá, Jesucristbeñe šmojtsošbuáchema. ¹² Chca jtsamēse, tšēngaftanga šmochanjín̄yan̄yie Bēngbe Utabná puerta bētsá y uamaná bētsemnama, y cha echanjama tšēngaftanga más uamanēnga chašmotsemnama. Chca echanjopása, er Bēngbe Bētsá y Bēngbe Utabná Jesucristo tšēngaftangbiana tšabe juabna ibobomma.

2

Chē Bēngbe Bētsabe contra yomná

¹⁻² Mora atše sēntseboše Bēngbe Utabná Jesucristo jésabama orscama jáuyanama, chē bēnga cháftaca tsbanánoca jtenin̄yēnama ora. Básefta entšanga imojtsichamo chē bēts uámana te, chē Bēngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bētscá šmochtsentšēna chēnga ndoñe chamondobená jamana tšēngaftanga in̄yetsá juabna tšēngaftangbe ainaniñe chašmátsbomnama. Ndoñe šmatjóyeunaye nderado nda mēntšá chacmojtšētsētná ora: “Can̄ye Bēngbe Bētsabe juabna oyebuambnayá šonjáuyana chē Bēngbe Bētsabe uámana te ya tojóshjango ca” o “can̄ya chca šonjabuayená ca” o “Páblēbiocana tsbuanácha fsēnjushache y chiñe entsayana chē te ya tojóshjango ca”. ³ Bētscá šmochtsentšēna ndocná tondáyeca chacmondáingñēma. Er chē Bēngbe Utabnabe uámana te cabá ndóshjango ora, mallajta entšanga Bēngbe Bētsabe amēndayama contra mochántsemna, y chē Bēngbe Bētsabe contra yomná echanjábocna. Y cha entsemna nda ibojtsemna infiernoca pochocaná jtsemnama. ⁴ Cha Bēngbe Bētsabe contra echanjóyeuambaye, chē ndēmuan̄yēngbiana y ndaye soyēngama entšanga imojuabná diosēnga imomnama contra echanjóyeuambaye. Chentšana cha echanjuyana chēngbiana más obená yomna ca. Y Bēngbe Bētsabe bēts yebnóynaca cha echanjámashēngo, choca echanjót'bema y entšanga echantsētsētnaye ndegombre cha Bēngbe Bētsá yojtsemna ca.

⁵ ¿Chē soyama tšēngaftanga ndoñe šmondenabouín̄yna? Atše cabá tšēngaftangaftaca sēnjamna ora, chama sēnjanoyebuambná. ⁶ Y tšēngaftanga šmondétatsēmbo, nda mora yojtsama chē Bēngbe Bētsabe contra yomná ndoñe chaondon̄ynama, cabá chē tempo chca jopásama ndóshjango ora. ⁷ Mora ya mallajta entšanga puerta bacna soyēnga tmojontšé amana, ndoñe ntšamo Bēngbe Bētsá tojayancá chēnga jamama yojtsamna ca, y bēnga chē soyēnga josértama ndoñe quemuátobena, ndayá n̄ye Bēngbe Bētsá chca sojin̄yan̄yese; pero ntšamo tcbonjauyancá chē Bēngbe Bētsabe contra yomnabiana ndoñe queochatēchnēngo, n̄ya nda chē soyēnga ndoñe chaondētsemnama yojtsamábioye Bēngbe Bētsá chabojtsejuaná ora aíñe. ⁸ Chora chē Bēngbe Bētsabe contra yomná echanjábocna; pero Bēngbe Utabná yochjésabo ora, echanjángouo y echanjama cha chaóbanama; y tša buashin̄yín̄yanánaca y obenánaca echanjábocnama, chábioye bochantsepochoá. ⁹ Chē Bēngbe Bētsabe contra yomná, Satanasbe obenánaca echanjabo, y entšanga bēts obenana echanjín̄yan̄yie, y chē bēts soyēngaca entšanga ingñénēnga mochántsemna. ¹⁰ Cha ba bacna soyēnga echanjama ntšamo Bēngbe Bētsá

ndoñe yondbošcá, chca, ba entšángbiöye nyetsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnana. ¹¹ Chca causa, Bëngbe Bëtsá entseleséncia entšanga ingñënga chamotsemnana, y chë ndoñe ndegombre soyënguiñe chamotsošbuáchema. ¹² Bëngbe Bëtsá chca echanjama, nyetscanga chë ndegombre soyënguiñe Jesucristbiana ndoñe tmonsošbuáchenga, chë bacna soyënga amama oyejuayënga tmojtsemnënga, chë nyetsca tescama castigo chamotsebonnana jayanama.

Bëngbe Bëtsá šojabacacá atsebácanënga jtsemnana

¹³ Pero bënga šontsamna nyets tempo Bëngbe Bëtsá jtsatschuanayana tšëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnana tcmojánabacacama. Bëngbe Bëtsá tcmojatsebaca er chë Uámana Espíritu Bëngbe Bëtsabe entšanga tcmojábiana, y tšëngaftanga chë ndegombre soyënguiñe šmojtsošbuaché. ¹⁴ Chë tsabe notiçënga bënga cbondábuayiyayeca, Bëngbe Bëtsá tcmojúbuaja chábenga chašmotsemnana. Cha tcmojúbuaja Bëngbe Utabná Jesucristbe obenana y buashinñinñanénëca chašmotsebonnana.

¹⁵ Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inñetšá šmatjátsjuabnaye. ¹⁶ Bëngbe Bëtsá puerte tsabia endmënyeyeca, cha šuababuánñeshana y tojama bënga sempre añemo ainaniñe chamotsebonnana y chë mochjóyëngacñe tsabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbiöye fsëntseimpadana, ¹⁷ chata chaboma tšëngaftanga bëtscá añemo ainaniñe chašmotsebonnana, y tšëngaftanga nyets tempo chašmotsobena ntšamo tsabá yomncá jtsichámuama y jtsamama.

3

Bëngbiana Bëngbe Bëtsá šmochtseimpadana

¹ Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nyetsca luarenache más ba entšanga chamotsobenama Bëngbe Bëtsabe buayenánana jounama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá. ² Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyá palabriñe. ³ Pero Bëngbe Utabná sempre jtsamana ntšamo tojancá, y cha echanjama tšëngaftanga más chábeñe chašmotsošbuáchema, y ndoñe nje cachcá quecmatënña chë bacna soyënga mandayá nje ntšamnaca ndoñe chacmondáborlama. ⁴ Y Bëngbe Utabná entsama bënga ndegombre ainaniñe fchaitsejuabnana, ntšamo bënga tchojanamëndacá mora šmojtsamama y cachcá sempre šmochtsamámncaca. ⁵ Bënga, Bëngbe Bëtsá fsëntseimpadana, Bëngbe Utabná benache chacmanñanyé bonshánana jsebonnana ntšamo Bëngbe Bëtsá endbomncá, y chašmojtsesufrina

ora, corente añemo chašmotsebomnama, ntšamo Cristo tojansufrí ora yojanbomncá.

Njyetscanga entsamna jtsetrabájayama

⁶ Jesucristbeyeca catsátanga, Bëngbe Utabná Jesucristbe mándoca cbontsaménda, ndémua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tchonjabuatambacá, cháftaca ndoñe šmattsóyebuambnaye. ⁷ Cach tsëngaftanga tsábá šmondétatšëmbo ntšamo cmojtsamna jtsiyenana, ntšamo bënga fsëñjoyencá: bënga tsëngaftangbeñe fsëñjaniyena ora, nye ntjatrabajacá oyëñjayënga ndoñe queftsjatsmëna, ⁸ ni ndocnabe saná chibiáisesese, tondaye ntabuenaycá. Inyetsá enjamna; cada te bnété y ibeta jabuache fsëñjantrabája, chca, tsëngaftanga ndoñe chacmondëtsamnana bëngbe uajabótama bënga jatatšatnayama. ⁹ Y ndegombre, bënga derecho fsëñjábomna tsëngaftanga jamëndama chašcújabuachama; pero masque chca, bënga jabuache fsëñjantrabája tsëngaftanga chašmotsetatšëmbuama ntšamo yomna jtsiyenama, y chca chašmotsamama. ¹⁰ Bënga tsëngaftangaftaca fsëñjamna ora, mëntsá tchonjanamëndá: Nda ndoñe tontseboše jatrabájama, cha cach ndoñe chaondëtsesá. ¹¹ Chca fsëntsichamo, er bënga fsëñjátatšëmbona, báseftanga tsëngaftanguentsënga imojtsiyena tondaye ntsamcá, pero tša chë inyëngbe soyënguiñe jtsontremeténese. ¹² Chca oyena entsángbioye fsëntsabuayiyiná y fsëntsaménda Bëngbe Utabná Jesucristbe mándoca, natjëmbana cachëngbe vida onguayíñe chamotsotrabáñaama.

¹³ Jesucristbeyeca catsátanga, ndoñe chacmondëumantsé tsabe soyënga amana. ¹⁴ Nderado nda ntšamo quem tsbuanáchañe fsëñjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. ¹⁵ Mo canye uayayacá ndoñe šmattsonjaye; šmochjabuayená mo canye catsatcá, chca ndoñe chaondëtsamama.

Jtadiósoftanama

¹⁶ Bëngbe Utabná fsëntseimpadana, cha, chë entsanga tsabe ebionana ainaniñe chamotsebomna iuamá, chaoma tsëngaftanga nyets tempo y nyetsca tescama chca chašmotsebomnama. Bëngbe Utabná tsëngaftangaftaca chaotsemna.

¹⁷ Nye quem palabrenga tsëngaftanga jacheuayama cach atšbe cucuátseca sentsabianná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinýinýná quem tsbuanácha atšbiácha iuamnama.

¹⁸ Atše, Bëngbe Bëtsá sëntseimpadana, Bëngbe Utabná Jesucristo chaoma tsabe bendicionënga tsëngaftangbeñe chaotsemnama.

1 Timoteo

Jachuayama

¹ Atše Pablo, Jesucristbe ichmoná sēndmēna. Bēngbe Bētsá bēngbe at-sebacayá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiama cha yochjama. Atše Jesucristbe ichmoná sēndmēna, er chata tbojanmandá atše chca jtsemnama. ² Timoteo, atše quem tsbuanácha cbontsabobiamná. Atše Bēngbe Bētsabe soyēngama entšanga sēnjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquíñacá tconjanóbema. Atše sēntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēnga chacotsebomnama, chata chaclostemama y ainaniñe tšabiana ebionana chacotsebomnama.

Pablo chē ndoñe ndegombre soyēnga abuatambayēngbiama chēnga tojanabuayená

³ Ntšamo chē Macedonia luaroye chocana sēnjēftsanbocna ora tcbonjanimpadacá, mora cachiñe cbochtētsimpáda. Efeso puebloca cochjoquéda, básefta entšanga chácuamēndama chē ndoñe ndegombre soyēnga ndoñe chamondētsabuatambama, ⁴ ni nyēts tempo ndoñe nyē chamondetsejuabná anteungbe cuentēngama, ni chē ba uabemana uabáinēnga chē tempsca bēts taitangbiama. Er nyē chca yapa jesejuabnayanentšana, jóbocnana nyē ín̄yēngaftaca jabuachana enatsētsnayañe, y chca chēngbioye tondayama ntjujabuáchana ntšamo Bēngbe Bētsá jamama yojuabnacá chaósertama. Chē soyna nyē chábeñe jtsošbuáchiyēse jobenayana josértana.

⁵ Chca mando entsemna nyētscanga chamotsenbobonshánama, y chē bonshánana endóbocana nda chabe ainanentše ndocna bacna soyēnga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana. ⁶ Báseftanga tmojtsajbaná chca jtsemnana y in̄yē soyēngama tmojontsé juabnayana; chíyeca chēnga mora imojtsentšana nyē ndayámnaca ndoservenena soyēngama enatsētsnayana. ⁷ Chēnga jtsebošana Bēngbe Bētsabe ley abuatambayēnga jtsemnama, pero chēnga ndoñe yontsósertana ni ntšamo imojtsabuatambacá, ni mo ndayánaca ntšamo chēnga tmojtsichamcá, mo chē soyēnga ndegombre cuaftsemncá.

⁸ Pero bēnga mondētátšēmo chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse. ⁹ Bēngnaca mondētátšēmo, chē leyēnga ndoñe tmonjuama chē nyētsca soyēnguiñe tšabá amēngbiama. Chē leyēnga tmonjuama quemēntša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe imondadoránēnga y bacna soye amēnga, Bēngbe Bētsá ndoñe mondērrespetánēnga y Jesucristbeñe jtsošbuáchiyana y Bēngbe Bētsá jtsadoránana tondaye yondoservenena ca juabnayēnga, cachabe taitá o mamá obánayēnga y ndēmuanyēnga imonna entšanga obánayēnga, ¹⁰ boyabásaftaca o shembásaftaca bacna soye amēnga y boyabásenga cach boyabásengaftaca bacna soye amēnga, entšanga enēnga nyē ín̄yabiana nyēts tempo chamotseservénama, bosterēnga y chē nyē bonamente

Bëngbe Bëtsabiana júrayënga; chca entsayana, chë leyënga yomna jácastigama nyëtsanga ndëmuanyënga ndoñe tmontsama ntšamo chë ndegombre bu-atëmbana soyënguifë iuayancá. ¹¹ Ntšamo muentse chë leyëngama tijayancá, entsebuátëmbana chë Bëngbe Bëtsábiocana puerte tšabe noticiënguifë, chë ndegombre bu-atëmbana soye; Bëngbe Bëtsá, chë corente bendición bomná, sonjichmó chë buayenánana entšanga jabuátambama.

Pablo Bëngbe Bëtsábiye tbojtanchuá, tbojanlastemama

¹² Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjëtseprontanama, y chíyeca šojanábuayana atše chabiana chaitrabajama; y cha endmëna nda inétsama atše obenana chaitsebomnama chë trabajo jamama. ¹³ Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanécamena, y chabiana tondaye respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjatanmëna, y chca, atše ndoñe quetsjatanatšëmbo ndayá tsjanamama. ¹⁴ Y chca, Bëngbe Utabná ba tšabe bendiciónënga atšbiama tonjanma, y chabeñe ošbuachiyá šonjánbema, y tonjanma atše cha chaitsebobonshánama y ínÿengbioynaca. Cha chca bëngbiana tojama, bënga cánÿiñe mo canÿacá Cristo Jesúseftaca bétsemnayeca.

¹⁵ Ntšamo chanjayancá ndoñe nyë bostero soye quenátsmëna, y nyëtsanga entsamna chca ndegombre bétsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentse atše chë más bëts bacna soye amá sëndmëna. ¹⁶ Chíyeca, Bëngbe Bëtsá šonjanlastemá, jinÿanÿiyama cha puerte uantado entšángaftaca yomnama. Y chë soye ínÿengbioye tojaninÿanÿé, chë nyëtsca tescama yomna tšabe vida jtsebomnama, chë chabeñe mochtsanošbuachëngbioye; chca tonjaninÿinÿé cachá átšeftaca uantado jtsemnëse, atše nyëtsangbiana chë más bëts bacna soye amá jtsemnëse. ¹⁷ ¡Entšanga nyëts tempo chamotsinÿanÿná, chë Utabná nyëts tempo mandayá y puerte bëtsá y obená yomnama! Cha endmëna chë ndocna te echanjéftsobaná, chë entšanga ndoñe ntsobenana jinÿamá y chë nyë canÿe Bëngbe Bëtsá yomná. Chca chaotsemna.

¹⁸⁻¹⁹ Timoteo, aca mo atšbe uaqüñacá condmëna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bëngbe Bëtsabe juabna oyebuambnayënga acbiana tmojanayancá, y chiñe jtsejuabnayëse chë Jesucristbe soyëngama chacopeliá y nyëts tempo chca chacot-sama, Jesucristbeñe puerte jtsošbuachiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguifë ošbuachiyana tmojtsanajbananga y tmojanontsé inÿe bu-atëmbana soyënguifë jtsošbuachiyana. ²⁰ Chca tonjopasá Himeneo y Alejándroftaca, y atše sënjalesenciá Satanás chaoma chata chabosufrioma; y chca, chata chabuatsjinÿe Bëngbe Bëtsabiana ndoñe bacá ntšóyebuambnayana.

2

Pablo tojanabuayená ntšamo Bëngbe Bëtsá jtsadoránama

¹ Nyëtsca soyama más cbontsaimpadana ndayá chë Jesucristbeñe ošbuachiyënga Bëngbe Bëtsáftaca chamojtsencuënta ora, nyëtsca soyëngama

ntšamo tojtsějajotbcá cha chamotseimpadana, nyetsca entšangbiamá, y cha sempre chamotsatschuaná. ² Entsemna, nyetscangbe tšabiamá Běngbe Bětsá jtseimpadánama, pero masna quem luarentša reyěngbiamá y inye mándayěngbiamá, chca, nyetscanga puerte natjěmbana jtsiyenama chamuetsobenama, y nyetsca soyěnguiñe tšabá jtsaměse, Běngbe Bětsá jtsamchuanayama, y entšangbe juabniñe tšabá chamotsemnana. ³ Chca jtsamana tšabá endměna, y Běngbe Bětsá, běngbe Atsebacyá, chama jtsóyejuayana; ⁴ y chca jtsóyejuayana, er cha endboše nyetsca entšanga atsebácaněnga chamotsemnana y chě ndegombre buayenánana chamotsábuatmama. ⁵ Chca nyetsca entšangbiamá endměna, er nye canye Běngbe Bětsá nyetscangbiamá endměna, y nye canya endměna nda yobena jamama entšanga tempcá tšabá Běngbe Bětsáftaca chamotsemnana; cha endměna Jesucristo, cach entšá. ⁶ Er Jesucristo, mo canya inyěnga játsebacama cuaftopagacá, chabe derecho vida jtsobomñama cachcá tojanonjá y tojanóbana, chca, nyetsca entšanga chamotsobenama atsebácaněnga jtsemnana. Chě soye cha tonjaninyané, nya chama tempo yojtsemna ora, chě Běngbe Bětsá nyetsca entšanga atsebácaněnga chamotsemnana yobošama. ⁷ Běngbe Bětsá chca nyetsca entšangbiamá yobóseyeca, Jesucristo sojanábuayana chabe ichmoná jtsemnana, chabe soyěnga entšanga jtsabuayinayama; ndegombre soye sěntsoyebuambná, ndoñe quetsátsbostero. Sonjanmandá chě ndegombre buayenánana chě ndoñe judiěngbiyoye jabuátambama, y chěnga entsamna chiñe jtsošbuáchiyana.

⁸ Ntšamo sěnjayancá, atše sěntseboše nyetsca chě Jesucristbeñe ošbuachiyěngcá enefjuana luarěnguenache, boyabásenga Běngbe Bětsáftaca chamotsencuěnta, y chora celoye, Běngbe Bětsábíoye cucuatše chamatsbaná; pero chamna, ainaniñe bacna soyěnga ntsebmncá, inyěngaftaca ntjatentjayanaycá, y inyěngaftaca jabuachana ntjatentseštsnaycá chěnga chamotsemna.

⁹ Y atše sěntseboše shembásenga entšayangá chamuatíchětjo, mo chě tšabe shembásenga mondbetsichětjoncá, ndoñe nye entšanga chamotsěbuáuatjama y ntšamo tmojtsichětjonama chěngna uámaněnga imomna ca entšanga chamotsejuabnana. Ndoñe quenátamna jtsenóbotamnayana, nya mo chca chquěcněnga jtsemněse, ni castellano soyěngaca o uámana fjantse ndětšbėngaca, o yapa uámana entšayangaca, chca, nye entšanga jinýama tšabá jtsemnana. ¹⁰ Pero aiñe mo chě Běngbe Bětsá adóraye shembásenga mondbetsamcá jtsaměse, chě tšabe soyěnga jtsamana.

¹¹ Nderado nda tojtsabuatambá ora, shembása bontsemna jtsatsjěndayana, chca ora tondaye ntjatichamcá, y chentša mándayěnga chaotsayaunana. ¹² Atše ndoñe quichatsleséncia, canye shembása boyabásenga chaotsabuatambá, ni chaotsaměnda. Canye boyabása tojtsabuatambá o tojtsaměnda ora, shembása ndocá chaondětsichamo. ¹³ Chca chaotsemna, er Běngbe Bětsá natsana Adán tbojanpormá, y chentšana Eva; ¹⁴ y er Satanás Adánbiyoye ndoñe tbojaningñé, ndayá chě shěmbíoye; y chca tbojaningñé ora, chě shema tojanma ntšamo Běngbe Bětsá ndoñe tbojanlesenciaca. ¹⁵ Pero shembása atsbocaná echántsemna, básenga quem luaroye endbaúshejangoyeca, pero chamna, aiñe nyets tempo Běngbe Bětsábeñe tojtsóšbuáchese, nyetscanga tojtsababuánýeshaněse, cachá nyetsca soyěnguiñe jenomándama tojtsobeněse, y nyets tempo tšabe soyěnga tojtsaměse, ntšamo Běngbe Bětsabe entšanga mondbetsamcá.

3

Ntšamo ibojtsemna chë ošbuachiyëngcá enefjuanëngbe mandayá

¹ Mëntšá ndegombre endmëna: nderado nda tojtseboše canye trabajo jtse-bomnama, cánÿentse ošbuachiyëngcá enefjuanentse chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. ² Chiyëca, chë ošbuachiyëngcá enefjuanëngbe mandayá bontsemna jtsiyë-nana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnama: nÿe canÿe shembásabe boyá; ntšamo jtsiyenama tšabá juabnýa chaotsemna, cachá nÿetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentse posada entsanga júyentsámiamá, y chaotsobena botamana abuatambayá jtse-mnama. ³ Ndoñe yapa tmoyá o penzentsero chaondëtsemna; pero chaotsemna tšabá mandbomná, entsanga natjëmbana chamotsiyenama bošá, y ndoñe chaondëtsejuabná nÿe crocénana jësebomna. ⁴ Chaotsetátšëmbo ntšamo nÿetsca chabe yebnentša entsanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama; ⁵ er, nda cachabe yebnentša entsanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? ⁶ Cha ndoñe chaondëtsemna cabá mora cuenta Jesucristbeñe ošbuachiyá; aifne chca chë ošbuachiyëngcá enefjuanëngbe mandayá tojtsemnëse, nderado nÿe cachá uámana entsá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entsábioye buanjacastíga. ⁷ Chánaca bontsemna jt-siyenana jtsamëse, y chca chaojtsama ora, chë Jesucristbeñe ndošbuáchiyënga tšabá chabiamá chamotsichamo. Chë entsá ndoñe chca tontsamëse, chënga chabiamá mochanjayana ndoñe tšabá yontsama ca, y Satanás echanjama cha chabócochéngó bacna soyënga jamama.

Ntšamo ibojtsemna chë ošbuachiyëngcá enefjuanënga ujabuachaná

⁸ Cachcá, chë mándayëngbe ujabuáchanënga mëntšá entsamna: uámana entsangcá nÿetscanga chamotsëtabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nÿe paselo becá crocénana jtsebomnama. ⁹ Chënga entsamna ndegombre jtsošbuáchiyana chë Bëngbe Bëtsá tojinÿanÿé soyënguiñe, chë ndayíñe bënga mondošbuaché, chëngbe ainaniñe inÿetšá juabnënga ntjatsbomncá. ¹⁰ Natsana, chëngbiamá botamana šmochjshauarrepára jtsetatšëmboama chënga aifne o ndoñe montsobena mo chë ošbuachiyëngbeñe mándayëngbe ujabuachanëngcá josérviamá. Chënga nÿetsca soyënguiñe tšabá tmojtsemnëse, šmochjálesenciaye chiñe chamoservema. ¹¹ Cachcá, chë shémanga mëntšá entsamna: nÿetscangbiamá mo uámana entsangcá utabnënga, ndoñe uayátsenayënga, cachënga nÿetsca soyënguiñe jenomándama obenënga, y nÿetscañe tšabe palabra bomnëga. ¹² Canÿe ujabuachaná chaotsemna nÿe canÿe shembásabe boyá, y chaotsetátšëmbo ntšamo chabe básenga y nÿetsca chabe yebnentša oyenënga jtsamëndayana. ¹³ Chë ujabuáchanënga tšabá chiñe tmoservënëse, canÿe uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchemá.

Ndayá Bëngbe Bëtsá bënga šojinÿanÿecá, canÿe bëts buatëmbana soye endmëna

¹⁴ Atše sentsobátmana pronto chjobenaye jama aca jauatsétsayama; pero chca cbontsabobiamná, ¹⁵ nderado atše betesco jama ndoñe sënjobenase, chatsetatsëmbuama ntšamo canya ibojtsemna nyetsca chë Bëngbe Bëtsábenga imomñëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomma chë más uámana puestoca quem luarentše, y tša mondëñsena chama ínÿëngbioye jáyëñjanama. ¹⁶ Nya ndegombre endmëna, Bëngbe Bëtsá soyënga šojinÿanyë, y chë soyëngaca bënga montsobena jtsiyenana, chë Bëngbe Bëtsabe entšanga imomñëngcá; chë soyënga bëngbiama ndegombre bëts buatëmbana soye endmëna, y chë buatëmbana soye mëntšá endmëna:

Cristo quem luarentše cach entšacá entšángbioye tojánebébuacna.

Chë Uámana Espíritu tonjinÿanyë cha nyetsca soyënguñe tšabá amá yomnama. Angelënga cha tmojaninÿe, y chabiama ba luarënguentša entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbotanatsbaná, cha puerta bëtsá y obená yomnama jinÿanyiyëse.

4

Báseftanga chë tšabe benachentsana mochtsojuánañe

¹ Uámana Espíritu, nyetscanga catafjosertaycá tojayana, quem luare jopochócama tempo chaojtsobeco ora, básefta entšanga camochtsajbaná ošbuáchiyana chë ndayiñe bënga Jesucristbiana mondošbuaché soyënguñe ca. Chëngna, espíritënga entšanga áingñayënga mochántsayaanana, y chë ndoñe ndegombre soyënga chë bacna bayëjënga entšángbioye mochtsabuátambaye soyënguñnaca. ² Chca buatëmbana soye jtsóbocanana chë bacna entšanga ntšamo ndegombre tmojuabnacá ndinÿinÿayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tojamcá ndoñe tšabá yontsemna ca, er yapa bacna soyënga tmojama causa, chënga nÿe chca chëngbe ainaniñe jésejuabnayana. ³ Quem entšanga ndoñe ntjalesénciana ínÿënga chamotsobouamama, y jtsemándayana básefta sananga entšanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. ⁴ Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe queñátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase; ⁵ er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

Jesucristbiana trabájayinë canÿe tšabe oservená

⁶ Aca, chë soyënga ošbuáchiyëngbioye chacojtsabuátambase, aca Jesucristbiana trabájayinë canÿe tšabe oservená cochántsemna. Y mo nda bëtscá añemo jtsebojnana botamana tojtsesacá, cachcá, ácnaca puerta ošbuáchiyana y ainaniñe bëts añemo cochántsebojnana; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguñe endayancá sempre icuámayeca.

⁷ Pero ndoñe nye quem luarentša entsangbe cuentënga y ndoservena cuentënga cattsuenana. Ba soyënga cochjama aca bëts añemo ainaniñe chacotsebomnana, mo nda bëts añemo jtsebomnana cachabe cuërpoca ba soyënga cuaftsamcá, ntšamo Bëngbe Bëtsá jadórama yomncá jtseyenama jtsamëse; ⁸ cachabe cuërpoca ba soyënga jamana más añemo jtsebomnana, aïñe batšatema endoservena; pero jtseyenana Bëngbe Bëtsábioye jadórama yomncá jtsamëse, puerte enduámana y juajabuáchana nyëtsca soyënga tšabá chaotsemnana; chca jtsamana puerte tšabá endmëna cachabe vidama quem luarentše, y chë inye vidócnaca. ⁹ Ntšamo tijayancá ndegombre entsemna, y nyëtscanga entsamna jtsejuabnayana chca ndegombre bëtsemnana. ¹⁰ Y chë soyama bënga puerte mondëtrabáya y mondësufrina, er chë Bëngbe Bëtsá Ainábeñe puerte mondošbuachëyeca, bënga mondobátmana cha yochjama soyënga bëngbe tšabiama. Cha endmëna chë nyëtsca entsangbe atsebacyá, pero ndegombre masna, chábeñe ošbuáchiyëngbe atsebacyá cha endmëna.

¹¹ Ntšamo quem soyëngama tcbonjauyancá entsanga cochtsamëndaye y cochtsabuátambaye. ¹² Ndoñe catjaleséncia, aca bobontse comnana, ndánaca chacmotsáboýenjama. Pero aïñe bëtscá cochtsama, chënga puerte chacmotserseretánama, chca jtsamëse icoyenama jtsonyáyëse, cachcá chamotsamama: botamana jtsóyebuambnayëse, nyëts tempo tšabe soyënga jtsamëse, nyëtscanga jtsababuánýeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. ¹³ Atše choca chajjashjanguëntscuana, cochtsentšena chë Bëngbe Bëtsabe uabemana palabrénga entsángbeñe jtsalíayama, y chënga jtsabuátambayama y jtsabuayinayama. ¹⁴ Achbioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiama tmojanoyebuambá ora, y chë ošbuáchiyënguentša bëtsëjémënga chëngbe cucuatšënga ácbeñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinyëna.

¹⁵ As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entsanga chamobená jinýama, aca cada te más tšabá lempe cojtsamama. ¹⁶ Botamana cochtsantješna, aca chë tšabe soyënga jtsamëse cojtseyenama, y chë tšabe buatëmbana soye ínýënga cojtsabuátambama. Cada te chca cochtsama, y chca, cach aca cochanjenájabuache atsbocaná jtsemnana y chë ácbioye ouenanëngnaca játsebacama.

5

Ntšamo Timoteo ibojtsemna chë inye ošbuáchiyëngaftaca jtsemnana

¹ Bëtsëjémënga ndoñe catjucácana; chca játamamna, cochjábuaenayaya, chënga mo cach acbe taitá cuaftsemncá; y chë bobontséngaftaca cochjama, mo chënga acbe catšátanga cuaftsemncá. ² Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiášëngaftaca cochjama, chënga mo acbe uabënánga cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebomncá.

Ošbuáchiyëngbenache viudanga tmojtsemna ora

³ Chë ndegombre viudanga, chë ndocná mondbomna chaújabuachama, chënga cochtsarrespetana y cochtsējabuachana. ⁴ Pero canye viudá nderado básenga o nietënga tuabamna, chënga entsamna natsana jshauatsjínýana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanýenëse, y chëngbe bëtšetsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. ⁵ Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nýets tempo jtseimpadánana, bnëté y íbeta, cha chabuájabuachama. ⁶ Pero canye viudá, nye quem luarentša entšángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominýiñe mo canye obanacá jtsemnana, er chábioye ndoñe ntseservénana. ⁷ Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebomnama. ⁸ Er, nda cachabe entsanga y más, cachabe pamíllanga ndoñe tontsacuedana, cha chca jtsinýinýnayana chë buatëmbana soyënga, ndayíñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

⁹ Chë jujabuáchama viudanga imuábemana lístañe, chaotsábemana chë viudá chñënguana bnëtsana uatama más yobomná, y nye canye boyá ibnabomná. ¹⁰ Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajñënga chabe yebnentse posada júyentsámiana prontaná, Bëngbe Bëtsabe entsanga imomnënga tojushecjabebé, chë imosufrínënga tojúabuache; jayanana, nda sempre nýetsca tšabe soyënga jamama yontšëna.

¹¹ Pero chë lístañe, chë viudanga chñënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nye cachënga tšabá jtsemnama juabnënga jtsebomnana y soyënga jtsamana. Chcase, chënga Jesucristbioye ya ndoñe ntseservénana, y chora jtsebošana cachiñe jtëtóbouamayama; ¹² y chca, ínýënga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. ¹³ Y cabá más, tondaye ntsamcá tmojtsemna ora, chënga juabouinýana oyënjayënga jtsemnama, y yebnënguenache jtsanama; y ndoñe nye oyënjayënga, sinó oinýanëngnaca, ínýëngbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse. ¹⁴ Chíyeca, atše sëntseboše, chë viudanga cabá tobiasëngna chamuatoubouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. ¹⁵ Atše chca séntschamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

¹⁶ Canye shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye jujabuáchama.

Ntšamo cuantsemna chë ošbuachiyëngbeñe amëndayëngaftaca

17 Chë bëtsëjémënga, tšabá chë ošbuachiyëngcá enefjuanënga tmamëndangna, jtsomerecénana entsanga más chamotsarrespetánama, chca trabajo bëtsamama, y más, chë sempre entsanga jtsabuayiynayama y jtsabuátambayama imontšenëngbioye. ¹⁸ Er Bëngbe Bëtsabe uabemana palabrénguiñe endayana, mëntšá: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca”; ínÿoca: “Chë trabajayá merecido jtsebuájonana juácánama ca”. Chíyeca, chë bëtsëjémëngcá amëndayënga jtsomerecénana entsanga chamotsarrespetánama.

19 Nderado nda tcmojáuyana canye bëtsëjema bacna soye tojama ca; pero útata o unga entsanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

Inÿe soyëngama jábuayenama

20 Chë bëtsëjémënga nÿe bacna soyënga tmojtsamënga, nÿetsca entsangbe delante cochjucácana, chca nÿetscanga uatjana chamuishache, bacna soye amama castigo mochtsebonnama.

21 Atše bontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá inÿengbiama más tšabá ntjatabacacnycá. ²² Ndocnabe bestšasiñe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canye bëtsëjema amëndayacá josëviamu yojtsobenama, nÿe betso, juabuáyanama botamana ntjenjuaboycá. Pero nÿe ntjenjuaboycá chca tcojamëse, y cha canye bacna soye amá tomñësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebonnama.

23 Aca ba soye uafšbiaca condbëtsešoca causa, ndoñe más nÿe ena býyeshe cattseftmana, sinó base vínoynaca.

24 Entšanga mondobena tšabá jinÿana, básefta entsangbe bacna soyënga, cabá chë soyëngama chëngbioye botamana ntjájaye ora; pero inÿengbe bacna soyëngama, nÿe tcojájayentšana entsanga chama jtsetatšëmbuana.

25 Cachcá, báseftanga entsangbe delante tšabe soyënga jtsamana, y cachora chë soyëngama jtsotatšëmbuana; y inÿengna iytëmcá tšabe soyënga jamana, pero masque chca, ndayténaca chë tmojanma tšabe soyëngama inÿenga mochanjátatšëmbona.

6

1 Chë nÿets tempo nÿe ínÿabiana oservénënga entsamna, chëngbe nduiñëngbiama jtsejuabnayana, chënga uámana entsanga imomnana y nÿets respeto jtsebonnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbëtsabatambaye, inÿengna podesca ndoñe chamondëtsóyebuambnama. ² Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entšanga jtsabuátambayana, y becá jtsëtsëtsnayana chca chacmóyaunama: ³ Nderado nda inye soyënga tojtsabuátambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, ⁴ cha nye cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsëtsnayana, y cha nye chama vida jësebomnana. Cha chca yomna causa, nye jtsebošana chë inya tojashjache soyënga jtsebomnana, nyetscanga ndoñe cachcá chamondëjtsejuabnana jtsamana, ín'yëngbioye joyánguanguama jtsebošana, bacna soyënga ndoñe ndegombre soyënga ín'yëngbiama jtsejuabnayana, ⁵ y ín'yëngta nye sempre jtsenpenzétsiyana, er chëngbe juabniñe nye bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nye más soyënga jóyëngaçñama yoserverna ca. ⁶ Ndegombre canye entšá bëtscá tsábiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nye chë tojtsebomna soyëngaca tojtsemnëse. ⁷ Er bënga tmojanonýná ora, quem luaroye bëngtaftaca tondaye tmonjániyëbo, y quem luarentšana cach tondaye quemochatobenaye jëftsoçñama. ⁸ As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna. ⁹ Pero chë bomnënga jtsemnana tmojtsebošënga, bacna soyënga jamama tojócochéngora, ndoñe ntsemorochana y pronto chiñe jotsatsana, mo bayá uachmaniñe cuaftotsatscá, chë entšanga Satanasbe cucuatšíñe ndeolpe jotsatsana; chora chënga jtsamana soyënga mo chë juabna ndbomnëngcá, y chë cachëngbiama ndoñe tsabe soyënga tmojtsamëngbe juabnëngaca. Y mo chë uándbemana barco, bëts búyeshë asentoye tojtsenatjëmbcá, cachcá, chë bacna juabnënga bomnana, chëngbioye mochántsapochocaye y nyetsca tescama mochántsacastigaye. ¹⁰ Crocénana jtsebomnana yapa jtsebošana, jamana entšabe ainanentšana nyetsca bacna juabnënga y soyënga chaóboçnamá; y básefta entšanga, crocénana jtsebomnana yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiama tmojama puerte chamosufrima y bëts ngmënaná jtsebomnana.

Chë tsabe soyama jtsenojuerzánama, ošbuáchiyana sempre chaotsemnana

¹¹ Pero aca, Bëngbe Bëtsábiana oserverná, chca benachentšana cochtsojuánañe. Nya cochtsentšena, chë Bëngbe Bëtsabe bominiñe tsabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuán'yëshanama, Bëngbe Bëtsábeñe jtsobátmanëse puerte uantado padecena soyënguiñe jtsemnana, y corente jtsababuán'yëshanëse nyetscanga chacotsëñyayama. ¹² Chë tsabe soyama, ošbuáchiyana joboguiyanama cochtsenojuerzana. Chë nyetsca tescama yomna tsabe vida cochjashjache; chama Bëngbe Bëtsá tmojanchembo y bëtscá entšangbe delante tconjánayana tsabe soyënga Jesucristbiana, ndayiñe aca icošbuaché. ¹³ Y mora, Bëngbe Bëtsabe delante, nda endbama

lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiamana ndegombre bemncá Poncio Pilatbe delante lempe tojanayaná, chatbe delante cbontsemánda, ¹⁴lempe cochjama ntšamo tcbonjauyancá, ndocna soye chacmondëntšashbe jamama, y cocht-siyena, ntšamo ndocná tondaya chaondětsebomna jayanama aca bacna soye tcojama ca. Y chca cochtšama Bëngbe Utabná Jesucristo quem luaroye yochjésabëntscuana. ¹⁵Y nýa chë soyama chë tempo chaojóshjango ora, Bëngbe Bëtsá chca echanjínýanýiye, er cha endmëna chë corente bendición bomná y chë nýe canýe Mandado. Cha nýetsca reyëngbiamana, chë más uámana Rey, y nýetsca amëndayëngbiamana, chë más uámana Utabná. ¹⁶Nýe cha ndoñe bondmëna ndocna te ntjóbanana, y cha canýe bëts buashinýinýana luarentše endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga nýets tempo chamotsinýanýná cha puerte bëtsá y obená bëtsemnama! Chca chaotsemna.

¹⁷Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondětsemnama, ni lempe tšabá yochjóbcnana, bëtscá soyënga bëtsebomnama ndoñe chamondëtšobátmana, er chë tcbomna soyëngama ndoñe ntsótatšëmbuana ndayëntsoñama chca mochtsebomnama; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtscá soyënga šnetsatšatnayá; y chca, cha jamana bënga chamotsobena nýetsca chë soyëngaca oyejuayënga jtsemnama. ¹⁸Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entšanga ba soyënga jatšatayama, y ndaye tmobomna soye entšangafatacá jenájatayama. ¹⁹Mo nda bëtscá shajuana tojtšabuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtscá tšabe bendicionënga más chcoye mochtsebomnama. Y chënga chë soyënga tmojtsamëse, chënga chë ndegombre vida, chë nýetsca tescama yomna tšabe vida mochanjéftsashjache.

Inýe soye Timotéobioye tbojanbonýe

²⁰Timoteo, ndayá Bëngbe Bëtsá tcmojabonýecá, botamana cochtsinýena. Entšanga nýe quem luarentša soyëngama encuëntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. ²¹Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá séntseimpadana, ácbeñe tšabe bendicionënga chaotsemnama.

2 Timoteo

Jachuayama

¹ Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entšanga jábuayenama Bëngbe Bëtsabe šbuachenánama, ntšamo cha inétsamama entšanga chë nyetsca tescama yomna tšabe vida chamotsebonnama; y chca vida montsebonna Cristo Jesúseftaca cánýiife mo canýacá bétsemnayeca. ² Atše quem tsbuanácha cbontsabobiamná, acbiama Timoteo, aca mo atšbe bonshana uaquinacá, Crístbeñe condošbuachema. Atše sëntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ábeñe tšabe bendicionënga chaotsemnama, chata ácbioye chacmolastemama, y acbe ainaniñe tšabe ebionana chacotsebonnama.

Ndoñe ntséuatjana entšángbeñe Jesucristbiana jóyebuambayama

³ Sempre Bëngbe Bëtsáftaca stscencuénta ora, acbiama sëndbétsenujubnaye, y acbiama sëndbétsatschuanaye bnété y ibeta; y Bëngbe Bëtsá endmëna nda atše sëndëservena, ainánaca jtsejubnayeše y jtsetatšëmbëse, ntšamo atše stsamcá tšabá bétsemnama, cachcá ntšamo atšbe bëts taitanga tmojanmcá. ⁴ Atše sëndbëtëtenojuboye ntšamo aca, chocana atše sëntanabo ora shëchbuiye tconjanoperdema, y chíyeca atše tša sëntseboše aca jtëtinýama, atše puerte oyejuayá chaitsemnama. ⁵ Bëngbe Bëtsá acbiama sëndbatschuaye, er atše sëndbátenujuboye aca Jesucristbeñe ndegombre ošbuáchiyana condomnama. Natsana, acbe bëts mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndëtatšëmbo.

⁶ Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chë Bëngbe Bëtsá tcmojatšëtá obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšasiñe sënjanjajó y Bëngbe Bëtsá acbiama sënjanimpadá ora. ⁷ Er Bëngbe Bëtsá tonjama bëngbe ainaniñe Uámana Espíritu chaotsemándama, uatjana ndoñe ntsebonnama, ndayá obenana bënga chamotsebonnama, bonshánana Bëngbe Bëtsabiama y nyëtscangbiama chamotsebonnama, y cabënga jenomándama chamotsobenama. ⁸ Chíyeca, ndoñe cattšéuatja entšanga jáuyanama, ntšamo tcojinýe y cojtsetatšëmbcá Bëngbe Utabnabiama ndegombre bétsemnama; ni atšbiana ndoñe cattšéuatja, atše cárceloye sëndutámenama, chabiama oservena causa. Chamna, chë Bëngbe Bëtsá cmochanjátšëtaye obenánaca, sempre cochtseprontana jasúfriama, átšeftaca y ínýengaftaca, entšanga tšabe noticiënga abuyayinaye causa. ⁹ Bëngbe Bëtsá endmëna nda bënga šojatsebacá, y šojáchembo jtsiyenama mo chábenga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóseyeca y bëngbe tšabiama juabna bómnyayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiama jamama sóyeca. ¹⁰ Y mora, Bëngbe Atsebacayá Jesucristo tojáboyeca, Bëngbe

Bětsá šojinjanýe cha bēngbe tšabiama juabna yobomnama. Jesucristo tonjama, entšanga nýetsca tescama obanēnga ndoñe chamondětsemnama, y tonjama bēnga chamotsetatšēmbuama, chē tšabe noticiēnga chabiama jouenēse y joyeunayēse, bēnga chē nýetsca tescama yomna tšabe vida mochjábomnama, ndoñe nýe jopochócama cuerpēnguiñe.

¹¹ Bēngbe Bětsá šojanabuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. ¹² Chē causa, atše mora cárceloca quem soyēnga sēntsesufrina; pero chama atše ndoñe quetsátēuatja, er atše sēndětātšēmbo ndábeñe atše stsošbuáchema, y corente sēndětātšēmbo cha yobena jtsinýenana ndayá šojabonyecá, chē ndayté cha yochjésabēntscuana.

¹³ Nýets tempo, chē ndegombre buayenánana, ndayá átšbentšana tconjanuencá, entšanga cochtsabuayinyaye, entšanga jtsinýanýayēse aca Jesucristbeñe icošbuáchema, y Bēngbe Bětsá y nýetscanga icuababuánýeshanama, y chca yomna aca Cristo Jesúseftaca cánýiñe mo canýacá bétsemnayeca. ¹⁴ Chē Uámana Espíritu, chē bēngbe ainaniñe endoyenabe uajabuáchenanaca, ntšamo Bēngbe Bětsá tcmojabonyecá sempre cochtsinýena.

¹⁵ Ntšamo ya condětātšēmbcá, nýetsca ošbuáchiyēnga Asia luaroquēnga cachcá šmonjesonýá, y chentše bontsemna Figelo y Hermógenes. ¹⁶ Pero Bēngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatēuatja. ¹⁷ Masna, Romoye tojabánashjango ora, cha botamana šojánguango y šonjáninýena. ¹⁸ Bēngbe Utabná lastemado cháftaca chaotsemna, ntšamo nýetscanga tmojamcá tšabá o ndoñe tšabá yontsemnama cha yochjayana ora. Aca corente condětātšēmbo ntsachetšá Onesíforo Efeso puebloca šonjanējabuachama.

2

Jesucristbiam canýe tšabe soldado

¹ Y aca, atšbe uaquiñá, chē Cristo Jesús acbiam tšabe juabna yobomnentšana, bětscá añemo ainaniñe cochtsebomna. ² Ntšamo ba entšangbe delante šconjoyeunacá, cach buayenánana, boyabásenga nýetscañe tšabe palabra homnēnga cochjábanýiye, y chamotsobena ínýenga cachcá jabuátambama.

³ Aca, chē bēnga fsēndbomna padecena soyēngama jasúfriama chacmojtsemna ora, Jesucristbe soyēngama entšanga abuayinyaye causa, ainaniñe bēts añemo cochtsebomna, mo canýe tšabe soldadcá, cha chabe mándayabiam jasúfriana. ⁴ Ndocna soldado ntjátanana shjoca soyēnguiñe vida jtsebomnama o crocénana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama.

⁵ Y canýe travisiayá, ínýenga jáyēnjanama, canýe soye juacánama; pero ntšamo chē uacanána jocñama tomncá ndoñe tonjatravisiase, cha chē soye ndoñe ntjosháchiñama. Cachcá, acbe trabajo cochjama ntšamo cmojtsemncá.

⁶ Chē jajañe trabajayá derecho jtsebomnana chē natsaná jtsemnama, chē mtobjatbaná sananguentšana ndayánaca jtsebomnama. Acaftaca cachcá echanjopása, chē trabajo tšabá chacojamēse. ⁷ Chē cbontsatsētsnañe cochtsenójuabnaye, y Bēngbe Utabná echanjama lempe chacmósertama.

⁸ Sempre cochtsenójuabnaye Jesucristbiam, ndabiam Bēngbe Bětsá tojanma cháuatayenama y enjamna canýa rey Davidbentšana entšá, ntšamo

atše chabiamá sëndabuayiyiná tšabe noticiënguifne endmëncá. ⁹ Chca abuayiy-naye causa, atše sëntsesufrina, nÿa cadenëjuangácnaca utsbuaná, mo canÿe bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entšángbïoye montsabuatambá. ¹⁰ Chíyeca atše nÿetsca padecena soyëngaca sëndëtsóboyana, Bëngbe Bëtsabe bocacánëngbe tšabiamá, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nÿetsca tescama chamotsiyenama.

¹¹ Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjanियencá y Jesucrístbeñe montsošbuaché;

y chca, bëngnaca cháftaca mochantsiyena;

¹² bënga chë padecena soyëngaca tmojtsesufrina ora, tmojtsemorochëse, bëngnaca Jesucrístoftaca mochántsemandaye.

Bënga tmojayana, cha ndoñe monduabuatma ca,

as cha bëngbiámnaca cachcá echanjayana;

¹³ bënga chábeñe ndoñe tmontsošbuáchese,

masque chca, cha cabá echanjama ntšamo tbojašebuachenacá,

er cha lempe jamana, ntšamo sempre iuetsemncá jtsinÿanÿnayëse.

Canÿe trabajayá, ndáftaca Bëngbe Bëtsá jtsoÿejuayana

¹⁴ Chë tconjauyana soyëngama, cochjama chë entsanga chamot-senójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrengama jabuachana enatsëtsnayana; er chca, ndocna tšabe soye ntjamana, y chca tmojtsenatsëtsná ora, jamana chë soye ouenanënga más batšá chamotsošbuáchema, y jujabuáchana chëngbe tšabe juabnënga jtsondbiamama. ¹⁵ Lempe ntšamo icobencá cochtsama, aca chacotsemnama mo canÿe entšá ndabiamá Bëngbe Bëtsá cháuyana nÿetsca soyënguifne tšabá amá yomna ca; aca chacotsemnama mo canÿe trabajayacá, nda tondaye tontsebonna ndayama jatëuatjama; y chacotsemnama chë ndegombre buayenánana corente tšabá buatëmbayá. ¹⁶ Entšanga nÿe quem luarentša soyëngama, ndoservena palabrenga tmojtsencuënta ora, chë soye ndoñe cattsuënanana; er chë soye jamana entsanga puerte inÿetšá chamobocanama, ntšamo Bëngbe Bëtsá ndoñe yondmëncá, inÿetšá jtsejuabnayëse y jtsamëse. ¹⁷ Chëngbe buatëmbana soyëngaca puerte bacá ínÿengbïoye jáborlana, nÿa mo canÿe uabouana šocana chamotsebonnama cuafjamcá. Chca buatëmbayënguentše Himeneo y Fileto bontsemna.

¹⁸ Chata chë ndegombre benachentšana tbojtsojuánañe, y ibojtsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nÿetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entsanga chë ntšamo Jesucrístbeñe imojanošbuachecá, mora ya ndoñe chamondëtsošbuáchema. ¹⁹ Pero Bëngbe Bëtsabe ndegombre buayenánana nÿets tempo cachcá endesomñe, y ndocná quenátobena chë soye jatrócama. Chca endmëna mo chë ndëtsbënga ndayiñe canÿe bëts yebna tojebncá, ndayiñe mëntšá yojtsábemana: “Bëngbe Utabná endëubuatma chë chábénga imomnënga”, y “Nÿetscanga chë Bëngbe Utabnábénga imomnënga ca tmojtsichámënga, chamuajbaná nÿetsca bacna soyënga amana ca”.

²⁰ Canÿe uámana entsábe yebnentše, tsafjoca soyënga ndoñe nÿe castellano o midio soyënga ntsemnana, ndayá niñese y fshantse soyëgnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauetsooservénama. ²¹ Chca endmëna chë Jesucristbeñe imojtsošbuachéngbeñe, ndoñe nÿetscanga tmontsajbaná bacna soyënga juabnayanana y amana, ni chë chca tmojtsama entsángbentšana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canÿe uámana trabajuñe echanjosérvia, y cha sempre echántseprontana ndaye tšabe soye jamama.

²² Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero añe cochtsiyena ntšamo Bëngbe Bëtsabe bom-inÿiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y inÿenga cochtsababuánÿeshana y nÿetscángaftaca natjëmbana cocht-somñe, chë chaújabuachama Bëngbe Utabná mondbetsotsëmbuanëngaftaca cányiñe, ndocna bacna soye ainaniñe ntsebmncá. ²³ Ndoservena soyëngama palabrënga y ndosertántšana óbocana soyëngama ndoñe cattsuenana; aca corente condétátšëmbo chë soyënguentsana entsanga nÿe jabuachana enatsëtsnayañe jabocanana. ²⁴ Pero chë Bëngbe Utabnabiama oservená ndoñe quebnátsmëna inÿengaftaca jabuachana ntseatsëtsnayana; chamna, cha bontsemna jtsababuánÿeshanëse nÿetscanga jtsëñÿayana, jtsemnana tšabe buatëmbayá y inÿengaftaca uantadá. ²⁵ Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatanabotamnaycá. Chca bontsemna, nderado Bëngbe Bëtsá nanjama chca juabnayanana chamotrocama, y chca, chënga chë ndegombre soyëngama chamotsetatšëmbuama; ²⁶ chënga botamana chamuatsjuaboma, y Bëngbe Bëtsá, Satanasbe cucuatšënguentsana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

3

Ntšamo entsanga mochtsemna, Cristo jésabama chaojtsobeco ora

¹ Pero aca cmontsemna jtsetatšëmbuana, Cristo jésabama tempo chaojtsobeco ora, entsanga echántsamna puerte padecena soyënguñe jtсийenana. ² Chca echántsemna, er entsanga, cada ona nÿe cachabe tšabiama echanjësenojuabnaye, crocénana jtsebmnama tša mochántseboše, mochántsemna enábotamnayënga y inÿengbiyoye mo nduamanëngcá mochantsëñÿaye. Bëngbe Bëtsabiama y inÿengbiama bacá mochantsóyebuambnaye, chëngbe bëtsëtsangbiyoye ndoñe quemochátayaunana, ni chëngbiama tšabe soyënga tmojtsamëngbiyoye quemochtëtachuanaye, y Bëngbe Bëtsabiama y chabe soyëngama ndoñe respeto quemochátbomna, ³ ni cachëngbe pamillangbiyoye quemochátabuanÿeshana, mochántseboše ndoñe natjëmbana jtсийenama, uayátsenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotëñënga. ⁴ Chënga, uayayëngbe cucuatšëñe entsanga ayentsbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše.

⁵ Inyenga echantsinyana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínýanyie, Bëngbe Bëtsá obená bëtsemnama chënga ndoñe mondošbuáchema.

Nya tondayama chëngaftaca cattscuéntaye. ⁶ Chënguentše báseftanga mondmëna, y chëngna botamana palabrëngaca yebnënguenache jamashj-nana, y chenache, chë paselo yomna jáingñama shembásenga jtsaíngñayana, chëngbe uatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nye cachënga tšabá jtsemnama, ntšamo tmojtsebošcá. ⁷ Chënga nyets tempo nye ndaye tsëm soye jatóntšana jatatsjínýana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínýenga jáingñama abuatambayënga nyetsca ndegombre soyëngama contra jtsemnana. Chë entsanga chëngbe juabniñe nye bacna soyënga jtsebomnana, y Bëngbe Bëtsá chënga tojtšebaté, chënga chë ndegombre soyënguiñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entsanga jáyëñjanama, er nyetsca entsanga mochanjátatsšëmbona chënga nye bacna soyënga juabnayënga imomnama, mo chë Israeloca entsanga tmojantatsšëmboncá Janes y Jambres nye chca juabnayata bëtsemnama.

Inye soye Timotëbioye tbojanbonýe

¹⁰ Pero acna, puerte tšabá condétatsšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucristbeñe puerte tsošbuaché, ntšamo ínýengaftaca uantado tsmëna; ntšamo atše, Bëngbe Bëtsá y ínýengbioye tsababuányëshana; ntšamo atše, Bëngbe Bëtsábeñe jtsobátmanëse, ¹¹ ínýenga šmonjanacmena ora; y sënjansufrina ora, padecena soyënguiñe bëtš añemo tsjánbomna. Acnaca condétatsšëmbo ntšamo atše chama Antioquía, Iconio y Listra bëtš pueblëngoca tsjansufrinama. Pero masque entsanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. ¹² Ndegombre endmëna, nyetscanga chë Bëngbe Bëtsá jadórana soyënga jtsamëse jtsiyenama bošënga, y Cristo Jesúsëftaca canýiñe mo canýacá imomnënga, puerte mochanjasúfria, chca bëtsemnama, chënga chamosufrima ínýenga chamojtsama ora; ¹³ pero chë bacna entsanga y chë ínýenga áingñayënga, cada te más bacna entsanga mochántsemna, más bacna soyënga jtsamëse; chënga ínýengbioye mochántsaingñaye, pero cachëngnaca ingñëñënga mochántsemna.

¹⁴ Pero aca, nyets tempo cochtsejuabnaye y cochtsama lempe ntšamo tcojuatsjinyá, chë ndegombre soyëngcá cojtsošbuácheñe, er aca tšabá condëubuatma chë tmojanbuátëmbanga; ¹⁵ y aca, cabá básëtëma conjamna orscana, chë Bëngbe Bëtsabe uabemana palabrëngama condétatsšëmbo, chë ndaye sóyeca aca contsobena juatsjínýana, Bëngbe Bëtsá chacmatsbocama, Cristo Jesúsbeñe jtsobuáchiyëse. ¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrënguiñe yobinyncá entsanga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetatsšëmbuama, jinýanyiyama ntšamo más tšabá chë soyënga muanjobenaye jamama; y bëngbioye jabuátambama ntšamo

jtsiyenama chë Bëngbe Bëtsabe bominÿiñe tšabá yomna soyënga jtsamëse; ¹⁷ chca, canÿe entšá Bëngbe Bëtsabiana oservená y obená chaotsemnama, tšabá chaotsetátšëmbo y sempre chaotseprontana nÿetsca tšabe soyënga jtsamama.

4

¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiana y chë ya mochjóbánëngbiana, ntšamo chëngbe vidënguiñe tmojëftsemcá tšabá o ndoñe tšabá bëtsemnama, chatbe delante cbomandá, ² Bëngbe Bëtsabe palabra entšanga chacotsabuayinyayama; sempre chca jamama cochtseprontana, masque entšanga aiñe o ndoñe jounama tmojtsebošëse. Cochjama, inÿenga bacna soyënga tmojtsamama chamotsetátšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerta uantado jtsemnëse. ³ Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántsicamo soyënga nÿe ntšamo cach entšanga jounama tmojtsebošcá. ⁴ Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. ⁵ Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebošna; chë Jesucristbiana tšabe noticiënga entšanga abuayinyayabe trabajo cochtsama; y nÿa cochtsentšëna ndayá Bëngbe Bëtsá tcmojabonÿecá tšabá jtsamama.

⁶ Er mo Bëngbe Bëtsábioye jëtšchuyama, canÿe bayá obanáftaca tcojabuešcja vínoye jtsoepochocancá, cachcá atšbe vídnaca ya jopochócama entsemna. Atše jóbana bécóñe entsemna; chanjóbana ora echántsemna Bëngbe Bëtsá oyejuayá chaotsemnama. ⁷ Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nÿets tempo Jesucristbeñe sëndošbuaché. ⁸ Chcasna, atšbiana canÿe uacanana soye echántsemna, er Bëngbe Bëtsá tojama atše chabe bominÿiñe tšabia chaitsemnama. Bëngbe Utabná endmëna chë ndegombre tšabá ichamuá entšanga aiñe o ndoñe tšabá tmonjamama, y cha chë uacanana soye šochántatšëta, entšanga ntšamo tmojamama cha chaojabáyana ora. Pero cha nÿe atše ndoñe chë uacanana soye quešochtëtatšëta, ndayá nÿetscángbioye chca, ndëmuanÿenga puerta imo-boše cha cachiñe cháuesabama, cha imobobonshánayeca.

Inÿe soyënga Timoteobiana

⁹ Lempe ntšamo tcojobenacá cochjama betscó jabama atše jabínÿama; ¹⁰ er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica pueblöye tojtsoñe. Crescente Galicia luaroye tonjá y Tito Dalmacia luaroye. ¹¹ Nÿe Lucas, chë šmonjanájabuachanënguentšana, mora átšëftaca entsemna. Marcos cochjaft-senguango y ácaftaca cochjëftbetše, er cha atšbe trabajuama puerta oservená endmëna. ¹² Tíquico, Efesoye sënjichmó. ¹³ Chacojabo ora, uabonjanía šcochjesacñe, atše Troas bëtš puebloca, Carpbe yebnoca tijësaboshjona; chë

librëshangánaca, pero chë uámána uabemána tsbuanachangá ndoñe chacmondétsebnatjëmba.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. ¹⁵ Chabiamá cuedado cochtsebomna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

¹⁶ Chë natsana soyama, mándayëngbe delante šonjanotocá jenëuyanama ora, atše ndocná chešnátanajabuache; nyëtscanga cachcá šmonjésonyaye. Pero atše sentsobátmana, Bëngbe Bëtsá chama chënga chaotsaperdoná. ¹⁷ Pero Bëngbe Utabná aíñe šonjanájabuache y tonjanma atše bëts aíñemo jtsebomnama, y hc case, atše sënjanobená Jesucristbiamá nyëtsca chabe tšabe noticiënga entsanga jábuayenama, y chë luarentša ndoñe judiënga tmonjanobená chë soye jounama. Mëntšá, Bëngbe Utabná canyë uabouana resjuentšana šonjanatsbocá, mo canyë león jtsosañámentšana ndábioye cuaftatsbocacá, ¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtsinyenëse, celoye, chë ndayentše cha yománda luaroye šochanjesbetše. ¡Nyëtscanga nyëtsca tescama cha chamotsatschuaná! Chca chaotsemna.

Pablo Timotéobioye jadiósoftanama

¹⁹ Atše cuenta cochjácheuaye Prisca y Aquila, y Onesíforbe pamílnaca. ²⁰ Erasto, Corinto puebloca tontsoquedañe, y Trófimo Mileto puebloca šocá sënjëftsebohona. ²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nyëtscanga muentše Jesucristbeñe ošbuáchiyënga.

²² Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entsanga jábuayenama, chë Bëngbe Bëtsá chabe entsanga chamotsemnana tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnana, mondoyena jtsamëse. ² Lempe chca sëndama, er Bëngbe Bëtsabeñe jtsošbuáchiyëse, atše sentsobátmana chë nyëtsca tescama yomna tšabe vida jtsebonnama. Bëngbe Bëtsá, chë ndocna te obostera-yá, quem luare cabá ndmëna orscana tojanašebuachená entsanga chca vida jtsebonnama; ³ y nÿa chama tempo tojóshjango ora, chë entsanga jábuayenama, soyëngaca Bëngbe Bëtsá chabe palabra šojinÿanÿé, ndayá Jesucristo entsangbiana yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca. ⁴ Tito, quem tsuanácha cbontsabobiamná. Atše Jesucristbe soyëngama entsanga sënjanabuayiná ora, aca chábeñe contsanošbuaché y nyëts útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácheñe tšabe bendicionënga chaotsemnana chata chaboma, y chaboma aca ainaniñe tšabe ebionana chacotsebonnama.

Titbe trabajo Creta luaroca

⁵ Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyëtsca pueblënguenache chë ošbuachiyëngcá enefjuanëngbeñe bëtšëjemëngcá amëndayënga jtsemnana chacubuáyanama, ntšamo tcbonjafstemandacá. ⁶ Canÿa bëtšëjemama uabuayaná mëntšá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntšobencá y nÿe ntšamo tmojtsebošcá imojtsiyena ca, o chënga chëngbe bëtšëtsanga o mándayënga ndoñe montsayaunana ca. ⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿeyeca, cha bontsemna jt-siyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnana; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebonnama. ⁸ Pero chabe yebnentše posada entsanga júyentšamiama sempre chaotseprontana, tšabe soyënga chaotsebínÿinama sempre chaot-sentšena, botamana juabnaya chaotsemna, ntšamo Bëngbe Bëtsabe bom-inÿiñe tšabá yomncá chaotsiyena, nyëts tempo Bëngbe Bëtsábioye chabot-sadorana, y cachá nyëtsca soyënguiñe jenomándama chaotsobena. ⁹ Cha bontsemna nyëts tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre bu-atëmbana soyëngaca ínÿenga añemo chaotsatšatnama, y chë soyama contra tmojtsemnënga jáyëñjanama, ndoñe tšabá montsamama.

10 Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyeuambnayënga y ínÿenga áingñayënga, y chcanga más mondmëna chë nÿetsca ošbuáchiyënga base bobachtema chë más delicadentse tëtšenënga jtsemnana yojtsamna ca mondbétsichamënguëntse. ¹¹ Y entseyta chëngbioye jtayáchetana, er chënga jamana ba pamíllanguentse nÿetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹² Enjamna canÿa, ndabiamá entsanga jtsichámuana cach Creta luar-entša diosëngbiamá oyeuambnayá canjamna ca, y cha cachabe luarentša oyenëngbiamá mëntsá tonjánayana: “Creta luarentse oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” ¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; ¹⁴ y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámna jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. ¹⁶ Chënga jt-sichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entsanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyeuambnacá sempre chaotsemna ntšamo chë ndegombre buatëmbánana endmëncá. ² Cochjayana chë bëtsëjémëngna chamotsemna cachënga nÿetsca soyënguiñe jenomándama obenënga, nÿetscangbiamá mo uámana entsangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; ⁴ chë tobiasënga chamotsinÿanÿná y chamotsabuatabá ntšamo chëngbe boyanga y básënga jtsababuánÿeshanana, ⁵ ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentsénana, nÿetscángaftaca tšábënga jtsemnana, cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyeuambnayana, ntšamo chë tobiasënga tmojamama.

⁶ Cachcá, chë bobontsënga añemo cochtsatsatnayë cachënga jenomándama chamotsobenama, ⁷ y chënga cochjínÿanÿiye ntšamo yomna jtsiyenana, cach aca nÿetsca soyënguiñe tšabá jtsamëse. Chca chacojtsabatambá ora, nÿe chë ndegombre buayenánana cochtsabuátambaye y corente respétoca chca cochtsama, ⁸ chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

⁹ Chë nÿets tempo nÿe ínÿabiana oservënënga cochjábuayenaye, chëngbe nduññëngbiöye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana. ¹⁰ Ndoñe chamondëtsatbëbana, pero añe nÿetscañe tšabe palabra bomnënga chamotsemna. Chënga chca entsamna, chca, ínÿenga chámuinÿe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiana yomna ca.

¹¹ Er Bëngbe Bëtsá bënga sonjinÿanÿé cha bëngbe tsabiama juabnënga yobomnana, y chca, cha tojama nÿetsca entsanga chamotsobena atsebácanënga jtsemnana. ¹² Chë Bëngbe Bëtsabe juabna bëngbe tsabiama, šontsabatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jt-sajbanama; y ntšamo mora quem luarentše jtsiyenámncaca šontsabatambá, cabënga jenomándama jtsobenëse, ntšamo Bëngbe Bëtsabe bominÿiñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buash-ínÿinÿaniñe y canÿe corente uamanacá yochjésabo ora. ¹⁴ Cha chabe derecho vida jtsobomñama cachcá tojanonÿá y bëngbiana tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentsana bënga játsebacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jt-samama.

¹⁵ Chca cmontsemna jtsabuátambayana, chënga becá añemo jtsatsatnayëse, y jtsinÿanÿnayëse chënga bacna soye tmojamama, chë nÿets condbomna mándoca jucácanëse. Ndoñe catjaleséncia ndocná chaodayana aca mando ndoñe condbomna ca.

3

Ndayá Jesucristbeñe ošbuachiyënga vojtsamna jamana

¹ Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. ² Ndocnabiana ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojtsëñÿama entsanga jtsinÿanÿnayëse.

³ Er bëngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama, ingñënënga y mandánënga monjamna nÿetsca bacna soyënga jamama juabnëngaca y nÿe quem luarentše tšabá jtsemnana juabnëngaca. Bënga monjanियena nÿe bacna soyënguiñe juabnaye, ínÿenga uantšaboše. Inÿenga bënga

sonjanébuayënja y bēnga n̄yetscanga monjanenáboyēnja. ⁴ Pero Bēngbe Bētsá, bēngbe Atsebacayá, bēngbe tšabíama juabna yobómnyeca y tša šuababuán̄yeshanama šonjanin̄yan̄yé ora, ⁵ cha šonjanatsebacá, pero ndoñe nderado bēnga ndaye tšabe soye tmojanmama, ndayá cha bēngbiamá tbojanongm̄yeca. Cha šonjanatsebacá, bēngbe bacna soyēnga jabuajuánase, y chē Uámana Espírítu juabuáchēse, bēnga mo tsmēma entšangcá chamotsemnana, ntšamo tempo yojamncá ntjatsjuabnaycá y ntjatamcá. ⁶ Bēngbe Atsebacayá Jesucristbeyeca, Bēngbe Bētsá tojanma Uámana Espírítu bēngbe ainaniñe n̄yets tempo chaotsemándama y bēnga chašotséjabuachanama, ⁷ chca bēnga, Bēngbe Bētsá bacna soyēngama šojaperdónanga y bēngbe tšabíama juabna bómnyeca tojayana chabe bominj̄iñe tšábēnga imomnēnga, chamotsobena cha yobomma soyēnguentšana bēnga mo ndayá cuaftsētocancá j̄oyēngacñama, y chca, chábeñe jtsošbuáchiyēse, chē n̄yetsca tescama yomna tšabe vida chamotsobátmanama.

⁸ Chca, lempe ntšamo tijayancá n̄ya ndegombre endmēna, y atše sēntseboše chē soyēngama bētscá chacotsabuatambá, chca, chē Bēngbe Bētsábeñe tmošbuachenga chamotsentšena chē tšabe soyēnga jtsamama. Chē buatēmbánana puerta tšabá endmēna y n̄yetscangbiamá bētscá endoservēna. ⁹ In̄yēnga n̄ye ndoservēna soyēngama jabuachana tmojtseñatsētsná ora, y anteungbe cuentēngama chamojtsoyebuambná ora, ndoñe cattson̄tremetena; ndoñe cattsama cach tšēngaftanga ndoñe tšabá jtsen̄yeunanamcá, y judiēngbe leyēngama ndoñe in̄yēngaftaca cattsenpéliaye. Chca jtsamana tondayama ntoservēnana, y n̄ye bonamente chca jtsamana.

¹⁰ Nderado nda tojtsama entšanga ndoñe cachcá n̄yetscanga chamondētsejuabnama y chamotsenpéliama, can̄ye o uta soye cochjabuayēná ndoñe tšabá tonjamama; pero cha ndoñe tcmónj̄oyeunase, chentšana cháftaca ndoñe más cattsoyebuambnaye. ¹¹ Chca cochjama, er aca cochanjátatšēmbona can̄ya chca tojtsemná, chabe juabna tojatrocá bacna soyēnga jtsejuabnayama. Chē soye y chē in̄ye bacna soyēnga ntšamo cha tojtšamcá, jtsin̄yan̄nayana cha ibojtsemna castiganá chama jtsemnana.

In̄ye soyēnga Titbiamá

¹² Atše, Artemas o Tíquico ácbioye chajichmó y choca chaojáshjango ora, ndayánaca cochjama Nicópolis puebloye aca jama atše jin̄yama, er atše sēnjajuabó chentše chē uaftenēntscuana jēftsemnana. ¹³ Lempe ntšamo chacojobenacá, cochjuájabuache chē in̄yēnga obuauyayá Zenas, y Apólosnaca; lempe ntšamo chata ibojtsējabotcá cochjátataye, in̄yoye jama jatóntšama chamobēnana y benachējana tondaye chaondētsabuáshebenama. ¹⁴ Atše sēntseboše, bēngbe entšanga, chē bēngcá Jesucristbeñe ošbuáchiyēnga, chamotsentšena chē tšabe soyēnga jtsamama y chē puerta ujabótēnga jtsejabuáchanama, chca, chēnga tondayama ndoservēna vidēnga ndoñe chamondētsebošmama.

Pablo Títbioye jadiósoftanama

¹⁵ N̄yetscanga chē átseftaca montsemnēgnaca cmontsechuaná. Atšbe cuenta cochjácheuaye n̄yetscanga chē bēnga imuababuan̄yeshanēngbioye, cach bēngcá Jesucristbeñe ošbuáchiyana bómnyeca. Atše, Bēngbe Bētsá sēntseimpadana, cha chaoma ácbeñe tšabe bendicionēnga chaotsemnana.

Filemón

Jachuyama

¹ Atše Pablo, mora utamená Cristo Jesusbiana oservena causa, quem tsbuanácha séntsabianná, Jesucristbeyeca bēngbe catšata Timoteóftaca, acbiana Filemón, bēngbe bonshaná y nda bēngaftaca condētrabája Jesucristo jaserviama. ² Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nyetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuyama. ³ Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebonnana.

Filemonbe bonshánana y ošbuáchiyana

⁴ Bēngbe Bētsáftaca stscuēnta ora, acbiana sēndbētsenojuabnaye, y sempre acbiana Bēngbe Bētsá sēndbētsatschuanaye, ⁵ er atše sēnjátatšēmbona ntšamo aca nyetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. ⁶ Bēnga, Jesucristbeñe ošbuáchiyēnga quetsomñecá, ácaftaca mo canýacá fsēndmēna. Chca endmēnayeaca atše Bēngbe Bētsá séntseimpadana, tsēngaftanga chašmobená más botamana josértana nyetsca chē Bēngbe Bētsábiocana tmojóyēngacñe tsabe bendicionēnga, bēnga Cristo Jesúsēftaca cánýiñe mo canýacá bētsemnayeca. ⁷ Jesucristbeyeca atšbe bonshana catšata, aca chē Jesucristbeñe ošbuáchiyēnga tša condábabuánýeshanama, atše corente oyejuayá séntsemna y bēts añemo séntsebonna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga juabuáchése.

Pablo, Filemónbioye Onésimbiana tbojanimpadá

⁸ Y chca, atše Cristbe ichmoná quetsomñecá séntsobena, aca nýe jamándana ntšamo yomncá chacotsamama, pero atše chca ndoñe quichatsma. ⁹ Y chondbobonshánayeca, chca játamanna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiana oservena causa, ¹⁰ canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Cristbeñe tonjanošbuachéyeca, cha mo atšbe uaquiñacá tonjanóbema.

¹¹ Tempo, cha ácbioye tondayama quecmēnjátanservena, pero mora cha becá entsámama, acbiana y atšbiana. ¹² Mora ácbioye séntsatichamná, y atše sempre chabiana sēndbētsenojuabnaye y sēndbobonshana. ¹³ Atšbiana puerte tsabá manmēna cha átšēftaca matēnjoquedase, acbe cuenta atše chašoservema, cárceloye utamená séntsemnēntscuana, chē tsabe noticiēnga entsānga abuyiynaye causa. ¹⁴ Pero atše ndoñe chiyatsma cha cha-queda ma atše chašuájabuachama, er atše ndoñe quetsátsboše aca obligácionaca chacotsemnana, atše juabuáchama ndayánaca chacomama; y séntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē soye chca chaotsemnana aca cabá ndocá ntjayanca. ¹⁵ Atše séntsejuabná nderado Onésimo ácbentšana

básefta tescama tojanoluare, mora ácaftaca nÿets tempo jtsatsmënama ca, ¹⁶ y ndoñe nÿe acbiamama mo nÿets tempo canÿe oservenacá, ndayá chama más uamanacá, mo Jesucristbeyeca canÿe bonshana catšatcá. Atše puerte Onésimo sëndbobonshana, y acna cmontsemna más cha jtsebobonshánana, er cha mora ndoñe quenátsmëna canÿa nÿe acbiamama nÿets tempo oservená, ndayá Bëngbe Utabnábeyeca canÿe catšata, ntšamo cach aca condmëncá.

¹⁷ Chca, aca atšbiamama condëjuabná mo ácaftaca cánÿiñe Bëngbe Utabnabiama trabajayacá; chíyecna cmontsemna cha jtojjana, mo atše šcojofjá. ¹⁸ Nderado ntšamo cha tcmojanborlá o ndayánaca tcmonebena, atše chama cbochjëséntšabuachiye. ¹⁹ Atše Pablo, cach atšbe cucuátšeca quem soye sentsabiamná. Atše chama cbochanjëséntšabuachiye. Ndegombre, ndoñe quenátsiyta atše chachëyana becá šcondebena ca, ntšamo atsbocaná jtsemnama atše tcojábuanayenama. ²⁰ Chcasna, Jesucristbeyeca atšbe catšata, Bëngbe Utabnáftaca cánÿiñe mo canÿacá quetsomñecá, Diosmanda chë pavor šcochtsebema. Diosmanda cochjama atšbe ainana ngmënaca ndoñe chaondëtsemnama.

²¹ Atše chca cbontsabobiamná, er atše tšabá sëndétatšëmbo, ntšamo cbontseimpadancá cochjamama, y cabá más chama cochjatsmama. ²² Y mora inÿe soye, Diosmanda posada šcochjabopróna, atše jányama chajábocna orscama, er atše puerte jtsošbuáchiyëse Bëngbe Bëtsábeñe sëndobátmana, cha tšëngaftangbiamama yochjama lempe ntšamo atšbiamama chašmojotjañcá, y chca, cha šochjaleséncia atše tšëngaftangbioye jésama.

Pablo Filemónbioye jadiošoftanama

²³ Epafra, muentše átšeftaca cárceloye utamená, Cristo Jesusbiamama entšanga abuayinayea causa, chánaca cmontsechuaná. ²⁴ Y Marcos, Aristarco, Demas y Lucas, chë bëngaftaca mondëtrabájanga Cristo jaserviama, chëngnaca cmontsechuaná.

²⁵ Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanëyana, chë chabe juabna oyebuambnayëngaftaca. ² Pero quem tempo bëngaftaca tojoyebuambá, chabe Uaquiñá jichmuase, bëngbioye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nyëtsca inye luarënga tojama. ³ Cha endinñanýná Bëngbe Bëtsabe corente buash-inñinñanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninñanyë cha puerte bëtsá y uamaná bëtsemnama, celoca játbemëse, Bëngbe Bëtsabe catšbioica, nyëtscanga jtsamëndayama.

Bëngbe Bëtsabe Uaquiñá chë angelëngbiana más bëtsá yomna

⁴ Y chca, Bëngbe Bëtsá tbojánbema chë angelëngbiana más uamaná y obená, er Bëngbe Bëtsá tbojanbuajó canye más uámana uabaina y chë angelëngbiana canye más uámana trabajo tbojanbonýé. ⁵ Ndegombre chca endmëna, er Bëngbe Bëtsá ndocna te ndocna ángelbioye mëntśá tbonjaniyana, ntšamo chabe Uaquiñábioye tbojaniyancá:

Aca atšbe Uaquiñá condmëna.

Mënté entsanga sënjinñanyë aca atšbe Uaquiñá comnama ca.

Ni ndocna angelbiana mëntśá tojánayana, ntšamo chabe Uaquiñabiama tojanayancá:

Atše canye taitá chabiama chántsemna,

y cha canye Uaquiñá atšbiama ca.

⁶ Quem Bëngbe Bëtsabe Uaquiñá endmëna nyëtscangbiana más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyëtsca angelënga cha chamotsatschuaná ca.

⁷ Y chabe angelëngbiana, mëntśá tojánayana:

Atše sëndama atšbe angelënga, chë atšbe buayiynayënga, mo binýiëngcá chamotsemnama,

y chënga, atšbe oservëngca, mo inñëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyëtsca tescama echántsemna,

y aca nyëtsca soyënguiñe condbëtsemandaye, ntšamo tšabá yomncá jtsamëse.

⁹ Aca icontsëna ntšamo tšabá yomncá nyëtsca soyënguiñe jtsamama, y sempre chca jtsamama tša icoboše,

pero nýa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocá,

y tojama aca puerte oyejuayá chacotsemnama,

chë inýëngbiana más oyejuayá ca —Bëngbe Bëtsá tojánayana.

¹⁰ Bëngbe Bëtsá mëntśánaca chabiama tojánayana:

Utabná, quem luare jobojátšama ora, aca quem luare tconjanma, y lempe chë celoca yomna soyëngnaca.

¹¹ Lempe chë soyënga nÿets tempo ndoñe queochátsmëna; aca nÿetsca tescama cochántsemna.

Lempe chë soyënga echanjopochóca, mo tojuatanguaná entšayacá.

¹² Aca chë luarënga cochanjátrocaye, mo tsmëcá cuaffabiamcá.

Chca, chë luarëngaca cochanjama, mo entšayá tcojtenëjonëtse y tcojenotrocacá.

Pero aca nÿets tempo cach aca cochandesomñe,

y nÿets tempo vida cochandesóbomñe ca —cha tojánayana.

¹³ Bëngbe Bëtsá ndocna te ndocna ángelbioye mëntšá tbonjanियana, ntšamo chabe Uaquiñábioye tbojaniancá:

Atšbe catšbioica cochtsetbemana,

acbe uayayënga acbe cucuatšñe chamoquedama atšbe obenánaca chjamëntscuana ca.

¹⁴ Ndegombre, nÿetsca angelënga espíritënga mondmëna Bëngbe Bëtsá jaserviama, ndëmuanyënga cha tojanichamó bënga jabújabuachama, chë atsebácanënga mochtsemnëngbe tšabiamá.

2

Canÿe bëts soye endmëna atsebácanënga jtsemnana

¹ Chíyeca, bënga šontsamna sempre Bëngbe Bëtsabe soyënga jtsuenanana, chë bënga tmonjouena soyënga, chë tšabe benachentšana ndoñe chamondojuánama. ² Ndayá Bëngbe Bëtsá tempo angelëngaca entšanga tojanamëndacá, canÿe ndegombre soye endmëna, y entšanga entsamna chca jtšobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, ³ bënga chca bacna soyënga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastigaye ca? Ndegombre cha chca echanjama, bënga chábeñe ndoñe tmontšošbuáchese, chë bëts soye jëftsashjáchama, atsebácanënga jtsemnana. Bëngbe Utabná chë natsaná yojtsemna nda entšanga tojanabuayená Bëngbe Bëtsá entšanga yochjánatsebacama; y ínÿenga bënga šonjanabuayená cachcá ntšamo chábioye tmojanoyeunacá. ⁴ Y Bëngbe Bëtsánaca tonjaninÿanyé, ndayá chënga tmojanabuayenacá ndegombre bëtsemnana, chabe obenana jinÿanyiyama soyëngaca, entšanga chamenjnaná soyëngaca, bëts soyëngaca, y entšanga chë Uámana Espíritu ainaniñe chamotsebomnana cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

Bëngbe Bëtsá tojanma Jesucristo entšangcá chaotsemnana

⁵ Bëngbe Bëtsá angelënga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná.

⁶ Chamna, ínÿoca Bëngbe Bëtsabe uabemana palabrenguiñe mëntšá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entšanga mondmëna. ¿Ndáyeca tša chënga cuanjéšanÿena?

7 Aca tcojama entśá puerte uamaná chaotsemnama, y chë angelëngna nÿe batśatema chabiama más uámanënga mondmëna.

Aca tcojama cha puerte uamaná y respeto merecido bomná chaotsemnama, 8 y cha chaotsemándama nÿetsca chë inÿe soyënguiñe, chë quem luarentşe aca tcojamiñe —chiñe canÿa tojánayana.

Entśá lempe chaotsemándama Bëngbe Bëtsá tojanma ora, tondaye tonjánboshjona entśáftaca ndëmandana soye ca. Pero mëntscoñama ndoñe nÿa chca quemëntinÿe, chë entśá lempe ntśamo quem luarentşe yomncá jtsemándayana. 9 Pero bënga mondetatsëmbo y corente mondonÿá Jesús aínne chca tojanmama. Bëngbe Bëtsá tojanma cha nduamaná chaotsemnama, mo canÿe entśacá, baseftayté chë angelëngbiama más batśá uamaná. Bëngbe Bëtsá, entśangbe tśabiama jtsejuabnaye, yojánboşe Jesús chaóbanama, corente jasúfriase; Bëngbe Bëtsá yojánboşe cha chca chaomama, nÿets luarentşa entśangbe tśabiama. Y Jesús ya chca tojánmayeca, Bëngbe Bëtsá ya tojinÿanÿé cha puerte bëtsá y uamaná bëtsemnama.

10 Nÿetsca soyënga yobinÿna Bëngbe Bëtsabiama y chábeyeca. Tśabá enjamna, Bëngbe Bëtsá jamana Jesucristo chaotsemnama lempe ntśamo entśanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entśanga atsebácanënga jtsemnama unachayá, chaosufrima jamëse, chca, ba entśanga celoca, mo chabe basengcá, cháftaca bëtśétsanga chamotsemnama. 11 Er Bëngbe Bëtsá cach Taitá nÿetscangbiama endmëna: Jesús, chë entśanga Bëngbe Bëtsábenga chamotsemnama iuamabiama, y chë entśanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbiöye catsátanga ca jtsachembuana. 12 Bëngbe Bëtsabe uabemana palabrenguiñe Bëngbe Bëtsáböye cha mëntśá tbojanianya:

Atśbe uabentsëngbeñe acbiama chanjóyebuambaye,
y jacántase cbochanjëtschuaye, ácböye adórayënguentşe ca.

13 Y mëntśánaca cha Bëngbe Bëtsabiama tojánayana:

Atşe atśbe Bëtsábeñe chantsoşbuáchiye ca.

Y más chcoye mëntśá tojánayana:

Muentşe Bëngbe Bëtsabe básengaftaca sëntsemna, chë atśbe cucuatşinë tojábashëjuanënga, atşe jtsanÿenama ca.

14 Quem Bëngbe Bëtsabe básenga nÿetsca entśangcá mondmënayeca, Jesúsna canÿe entśá chëngcá tojanóbema. Cha chca tojanma, jóbanëse, chë entśanga jóbanama chaotsamnama obenana bomná Satanás, jayëñjanama.

15 Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nÿets tempo corente ngmëna: immoyena, jóbanama auatja causa. 16 Er ndegombre, cha ndoñe tonjánabo chë angelënga jabújabuachama, ndayá chë Abrahábentšana entśangbiöye. 17 Y chama cha ibojamna jtsemnana nÿetsca soyënguiñe cachcá mo chabe uabentsëngcá, chë entśanga, chca, jobenayama jtsemnama chëngbiama mo bachnangbe canÿe más uámana amëndayacá, Bëngbe Bëtsá jtseimpadánama chëngbiöye chëngbe bacna soyëngama cháuaperdonama, puerte lastemado mëná y sempre ntśamo Bëngbe Bëtsá tbojauyancá amá. Chca, cha jóbanëse jamama entśanga chamobenama perdonánënga jtsemnama, y chca, jobenayama Bëngbe Bëtsáftaca tśabá tempcá jtsemnëngama. 18 Y mora cha entsobena, ndëmuanÿënga bacna soye

jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentsena ora.

3

Cristo Moisesbiana más uamaná endmëna

¹ Chiyeca, Jesucristbeyeca catšátanga, Bëngbe Bëtsábenga, ndëmuanyënga Bëngbe Bëtsá tojáchembo chabe entsanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uamana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguifë y chë mondbáyana ndegombre yomna ca soyënguifë. ² Er Jesús nyets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entsángbioye cháuaservema. ³ Canye yebna jebuaná chë yebnama más uamaná jtsemnana; cachcá Jesús, nda inétsama entsanga Bëngbe Bëtsábenga chamotsemnana, más jtsomerecénana Bëngbe Bëtsá cha puerte bëtsá y uamaná bëtsemnana cháuinñanyëma, nyë ntšamo Moisés, canya Bëngbe Bëtsabe entsanguentsá yojanomerecénama. ⁴ Ndëmuanyë yébnëna canye jebuaná jtsebomnana, pero Bëngbe Bëtsá endmëna nda tojanma lempe ntšamo yobinñcá. ⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nyetsca Bëngbe Bëtsabe entsángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamillanga tmojtsamiñe; cha, chë Uaquiñá y chënga chë Bëngbe Bëtsabe pamillentsëngcá. Bënga chë pamillentsá entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebomnana puerte oyejuayënga tmojtsemnëse.

Chë jóchnama uamana luare Bëngbe Bëtsabe entsangbiana

⁷ Chcasna, ntšamo chë Uamana Espíritu Bëngbe Bëtsabe uabemana palabrënguifë tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama, mo chë entsanga ndoyena luaroca Moisésofaca imojëftsemnëngcá, Bëngbe Bëtsabe contra nyetsca soyënguifë imojtsemna.

Chënga bëtscá bacna soyënga tmojanma, mo ndayá cuaftsamcá jinýama ntsachetsá más muanjobenaye jamana y Bëngbe Bëtsá cabá uantado chëngaftaca tayojtsemnana.

⁹ Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinýama ndayëntscoñe atše uantado chëngaftaca tsjamnana;

chca chënga tmonjanma, masque canta bnëtsana uatëntscuana chënga chentše tmonjáninýe chë atše sënjánama bëts soyënga.

¹⁰ Chíyeca, atše chorsca entšángaftaca šonjánatna y sënjánayana: ‘Tšéngaftanga mora átšeftaca ndoñe quešmátajna, mo chë otšenënga tmojtsemnëngcá,

y ndoñe šmonjábosena jtsiyenana ntšamo atše tsoščá jtsamëse.’

¹¹ Chíyeca, atše chéngaftaca etonaná sënjánayana, mo nda cuafjajuracá, chénga ndocna te mochjéftsashjache chë átšeftaca jóchnama uámana luaroye jashjanguama ca” —cha tojánayana.

¹² Jesucristbeyeca catšátanga, yejuana šmochtsantješna ndocná tšéngaftanguentšá chaondëtsebmoma canyë ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe.

¹³ Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrénguiñe “mënté ca” uabaina tempo. Chca cmontsamna, ndocná tšéngaftanguentšá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. ¹⁴ Er, ndayá Jesús chabe amëndayoca yobomentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnana, ntšamo bënga chábeñe jtsošbuáchiyama tmonjanontsé ora monjanamcá.

¹⁵ Ntšamo Bëngbe Bëtsabe uabemana palabrénguiñe endayancá: Mënté tšéngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca Moisésoftaca imojéftsemnëngcá, Bëngbe Bëtsabe contra nyetsca soyënguiñe imojtsemna ca.

¹⁶ ¿Y ndëmuanyënga imojamna, chë Bëngbe Bëtsá tojanëyancá tmojanuentšana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga. ¹⁷ ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá. ¹⁸ ¿Y ndëmuanyënga tojanëyana, mo nda cuafjajuracá, chénga ndocna te mochjéftsashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga. ¹⁹ Y ndegombre, bënga montsobena jinýama chénga ndoñe tmonjéftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4

¹ Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuetsemna, puerte cuedado mochtsebmoma, nderado ndánaca tšéngaftanguentšá ndoñe nanjobenaye chca jashjáchama. ² Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chénga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrénguiñe ndoñe

montsanošbuaché. ³ Pero bēnga, chē Jesucristbeñe tmojošbuachengna, mochanjobenaye chē jóchnama uámana luaroye jashjanguama, chē ndayama Bēngbe Bētsá tojánayana, chē tempo chábioye chca tmojtsanábotengbiama cha mēntšá tojánayana ora:

Chíyeca, atše chēngaftaca etonaná, sēnjánayana mo nda cuafjajuracá, ndegombre chēnga ndoñe mochjéftsashjache chē jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴ er Bēngbe Bētsabe uabemana palabrēnguiñe cánŷentše mēntšá endayana, chē canŷsēfta tianoye ndayá cha tojanmama:

Bēngbe Bētsá nŷetsca trabajēngama tonjanochná chē canŷsēfta tianoye ca.

⁵ Y cachentše Bēngbe Bētsabe uabemana palabrēnguiñe endayana, chē tempo chábioye chca tmojtsanábotengbiama:

Chēnga ndocna te quemocháisashjache chē átseftaca jóchnama uámana luaroye jashjanguama ca.

⁶ Chē entšanga monjamna chē natsanēnga chē tsabe noticiēnga jouenama, pero chē Bēngbe Bētsáftaca jóchnama uámana luare ndoñe tmonjéftsashjache, ntšamo cha inabošcá chēnga ndoñe tmonjanma causa. Chcasna, cabá ndegombre endétsomñe háseftanga, chē Bēngbe Bētsá tojánayana soyēnguiñe tmojtsobuáchenga, mochjéftsashjache chē Bēngbe Bētsáftaca jóchnama uámana luaroye jashjanguama. ⁷ Chē entšanga ndoyena luaroca, Bēngbe Bētsá entšanga tojánachembo chē cháftaca jóchnama uámana luaroye chámuamashjnama, y chentsana ba uatēse cha cachiñe canŷe tempo tojuinŷnaná, chora entšanga chamobenama chē cháftaca jóchnama uámana luaroye jashjajnama, chē cha “mēnté ca” tojanabaye tempo. Cha chca tojanma Davidbiajana jóyebuambayēse, David Bēngbe Bētsabe uabemana palabrēnguiñe mēntšá tojánayana ora:

Mēnté tšēngaftanga, ndayá Bēngbe Bētsá tojtsichamcá šmojouenēse, ndoñe šmattsama, Bēngbe Bētsabe buayenana soyēnga ainaniñe ndoñe chaondómashēnguama ca.

⁸ Josué, Israeloca entšanga Canaán fshantsēngoye yojtsēnachaye ora, chē Bēngbe Bētsáftaca jóchnama uámana luare jtsebonnama cha choca matēnjannēse, Bēngbe Bētsá bayté chentsana, David yojétsiyena ora, inŷe tempuama ndoñe matēnjanoyebuambá, chē ndaye ora entšanga muanjobenaye chē cháftaca jóchnama uámana luare jashjáchama. ⁹ Y chca, cabá endmēna canŷe uámana luare ndayentše Bēngbe Bētsabe entšanga mochjobenaye cháftaca jóchnama, ntšamo Bēngbe Bētsá tojanochnacá, chē quem luare jamama nŷetsca trabajēnga tojanpochocá ora; ¹⁰ er nda tojashjache chē Bēngbe Bētsáftaca jóchnama uámana luaroye jashjanguama, cha jóchnana chē Bēngbe Bētsá tbojanmandá jamama trabajēngama, ntšamo Bēngbe Bētsá tojanochnacá, chē quem luare jamama nŷetsca trabajēnga tojanpochocá ora. ¹¹ Chíyeca, šontsamna lempe ntšamo tmojobenacá jamana chē jóchnama uámana luare jéftsashjáchama, ntšamo chē Bēngbe Bētsábioye ndoñe tmonjanoyeunangcá ndocná chaondétsamama, y chē causa chēnga chē soye ndoñe tmonjéftsashjache.

¹² Er Bēngbe Bētsabe palabra endmēna mo canŷe aina soycá, nŷets tempo entšángbioye ndayánaca jtsabuátambayana, y bētscá jamana corente obenánaca, y ndocna te nŷe bonamente chē palabra jóyebuambayana. Mo chē nŷets utoicajana más efsana espadējaquécá, jobenayana puerte jashenoye

jatétsana canye cuerpo tcojatétse ora, cachcá y cabá puerte más Bèngbe Bètsabe palábraca, cha bènga jin'yan'yiana ntšamo bènga n'ye bèngbe ainaniñe tmojtsejuabná y tmojtseboščá, y chë ndocnábioye tmonjin'yinyé sóynaca; y chë palábraca cha endobena jáuyanana ntšamo bènga tmojajuabó y tmojabošencá aiñe o ndoñe tšabá bétsemnana. ¹³ Ntšamo Bèngbe Bètsá tojamentšana tondaye quenátopodena chabíama iytëmenana jtsemnana. Bèngbe Bètsá lempe homin'ye iuetsequëcñá, y n'yetsca soyëngama y n'yetscangbíama lempe yotátšëmbo; Bèngbe Bètsá, ndábíoye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëtš amëndayá

¹⁴ Jesús, Bèngbe Bètsabe Uaquiñá celoye tojámashëngo, y mora cha endmëna nda chabe delante sempre bèngbíama ibuétseimpadana, mo chë bachnangbe canye más uámana amëndayacá. Chíyeca, bènga šontsamna sempre chábeñe jtsošbuáchiyana, ntšamo bèngbe ndegombre ošbuáchiyana yomncá, chë ndayama bènga n'yetsca entšángbeñe tmojayana. ¹⁵ Er chë bèngbíama impadaná, mo bachnangbe canye más uámana bèngbe amëndayacá, Jesús, yobena bèngbíama jóngmiana, bènga in'ye ora ndoñe yapa obenana tmontsebmoma ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbiyoye ba juabnënga chabotsontšáshjajuanama, jayëñjanama bacna soye chaomama, n'yetsca juabnënga ntšamo bèngnaca mondbetsebmomncá, pero Jesús ndocna te ndocna bacna soye tonjëftsema. ¹⁶ As, ndauatjcá Bèngbe Bètsá mochjótšëmbona, mo chábíoye cuafsobecocnangcá; cha canye uámana tbemaniñe yojtsetbemana canye bëtš reycá; chca mochjama, bènga chášualastemama, y bèngbíama tšabe juabna jtsebmomñe, chašújabuachama bènga chca chašojtséjaboto ora.

5

¹ Ndëmuan'ye bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bèngbe Bètsá jasérvíama, chábíoye juatšëmbonama y bayënga jobáyama Bèngbe Bètsá jëtšchuayama, chca, Bèngbe Bètsá chë bacna soyënga entšanga tmojamama cháuperdonama. ² Chë bachna jtsoobenana jóngmiana, chë bacna soyënga amëngbíama chama ntsetatšëmbcá, y chë bacna soyënga jamama ingñënënga imomnënga, mo otšenëngcá imomnëngbíama, er cachánaca in'ye ora ndoñe yapa obenana ntsebmomnana, chë bacna soyënga jamama juabnëngama jtocochbuáchama. ³ Y chíyeca cha jtsemnana bayënga jobáyama Bèngbe Bètsá juatšëmbonama, ndoñe n'ye entšángbiyoye bacna soyëngama cháuperdonama, ndayá chábíoye chaboperdonámnaca. ⁴ Ndocná quenátobena cachá quem uámana trabajo jentsetayana, bachnangbe más uámana amëndayá jtsemnana; cha jtsemnana, Bèngbe Bètsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmncá. ⁵ Cachcá, Cristo ndoñe cachá tonjanenábuayana jtsemnana chë Bèngbe Bètsabe delante sempre bèngbíama impadaná, mo bachnangbe canye más uámana amëndayacá, ndayá Bèngbe Bètsá tbojanábuayana chë uámana trabajo jtsebmomnana. Cha endmëna nda Jesúsbiyoye mëntšá tbojaniyana: Aca atšbe Uaquiñá condmëna. Mënté entšanga sënjin'yan'yé aca atšbe Uaquiñá comnana ca. ⁶ Y in'yocnaca, Bèngbe Bètsabe uabemana palabrënguiñe mëntšá tbojaniyana: Aca n'yetsca tescama canye bachna condmëna,

canje bĕts bachna ntšamo Melquisedec yojamncá ca.

⁷ Jesús quem luarentše yojĕftsiyenĕntscuana, cha juayebuáchĕse y shĕchbuíyeca Bĕngbe Bĕtsáftaca ibnĕncuentaye y ibnaimpadana, cha chĕ jobanámentšana jatsbocama yojanobená; y Jesús ntšamo Bĕngbe Bĕtsá yojanbošcá tojánmayeca y tša respeto chabíama bómnayeca, chábíoye tbojanoyeuná. ⁸ Chca, Cristo masque Bĕngbe Bĕtsabe Uaquiñá inamna, jasúfriase tojanábouinĕ ntsamo jamana ndayá Bĕngbe Bĕtsá tojtsebošcá. ⁹ Chca, Bĕngbe Bĕtsá chábíoye tbojánbema lempe ntšamo entšanga tmojtšajabotcá, nda chĕngbe bacna soyĕngama cháuatsebacama; chentšana cha, Cristo, tojanma lempe ntšamo yojaniytcá, nĕyetscanga chĕ entšanga chábíoye imojánĕyeunanĕnga chamotsobenama nĕyetsca tescama atsebácanĕnga jtsemnama; ¹⁰ y Bĕngbe Bĕtsá tbojanábuayana, chĕ chabe delante sempre bĕngbíama impadaná, mo bachnangbe canje más uámana amĕndayacá chaotsemnama, canje bĕts bachna ntšamo Melquisedec yojamncá.

Resjo endmĕna, ošbuáchiyana jtsajbanana

¹¹ Bĕtscá entsemna quem palabrama jóyebuambayama, pero chĕ soyĕnga jayanama ntšamo tšĕngaftanga catafjosertaycá, ndoĕne paselo quenátsmĕna, er tšĕngaftangna nĕya uenana Bĕngbe Bĕtsabe soyĕngama jósertana. ¹² Tšĕngaftanga ya bayté Jesucristbe soyĕngama šmotátšĕmboiyeca, tšĕngaftanga cmontsamna ya jtsobenana ínĕngbioye chĕ soyĕnga jtsabuátambayana; pero tšĕngaftanga cmontsĕjaboto ndánaca Bĕngbe Bĕtsabe soyĕngama cachiĕne chacmĕtĕtabuayená, chĕ jtsošbuáchiyama šmojontsé ora natsana jshauatsjínĕyana soyĕngama. Y chca, tšĕngaftanga šmojobíama mo šesonatemĕncá, jtsĕjabótana létšiyĕ jofšiyana y ndoĕne jobenayana jasana chĕ jabmuánama ndoĕne paselo tontsemna soyĕnga. ¹³ Chĕ nĕyetsca soyĕnguiĕne ntšamo tšabá yomncá jtsamama buatĕmbana soyĕnga ndoĕne tontsabuatmá cha, jtsemnana mo canje šesonatemcá, nda vida jtsebomnana nĕye létšiyĕ jtseftmanĕse. ¹⁴ Pero chĕ tmojtsobena jajuaboyana y jtsetatšĕmbuana ndayá tšabá yomna o ndayá ndoĕne tšabá jamama, chca jtsamĕse tmoyenamna, chĕnga jtsemnana mo bĕtsĕtsangcá, ndĕmuanĕyĕnga ndayánaca jasana, chĕ ndoĕne paselo jabmuánama soyĕngnaca.

6

¹ Chcasna, bĕnga šontsamna jtsajbanana nĕye jĕsebošana jtsatsjĕndayana Cristbe buatĕmbana soyĕnga, chĕ bĕnga chábeĕne jtsošbuáchiyama tmojanontsé ora tmojanatsjínĕye soyĕnga, y šontsamna jtsatsjĕndayana chabíama nĕyetsca soyĕnga, más totcá josértama yomna soyĕnga. Chca, bĕnga mochántsemna mo chĕ bĕtsĕtsangcá, ndayánaca jtsesayana. Ndoĕne más nĕye chĕ natsana buatĕmbana soyĕngama mattsatsjĕndaye, mo chĕ ndayá yomna bacna soyĕnga jtsamana y chĕ bĕnga ndoĕne vida ntsebomnana junatsana soyĕnga amana jtsajbanana, y chĕ tšabe benache jtishachana; o ntšamo Bĕngbe Bĕtsábeĕne jtsošbuáchiyana; ² chĕ juabáyana ndayá yomna; chĕ ínĕyabe bestšašife cucuatsĕnga jacjayana Bĕngbe Bĕtsábíoye chabíama jaimpádama; chĕ obanĕnga jtayenama Bĕngbe Bĕtsá yochjamama; y mocna ora ntšamo entšanga tmojamama Bĕngbe Bĕtsá yochjayanama, chĕnga chĕ nĕyetsca tescama yomna

tšabe vida chamotsebonnana o nyetsca tescama castigánënga chamotsebonnana. ³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanyënga, canyë ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábënga bëtsemmama, y chë Uámama Espíritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašebuachenacá sempre inëtsamama tmojinñe, y ndëmuanyënga tmojáninñe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjmá. ⁷ Smochjinñe: fshantse jamana chë ba uaftënënga chiñe chaómashënguama, y chë chiñe trabájayëngbiama bëtscá jaja sananga tojóboçnëse, Bëngbe Bëtsá jamana, chë fshantsentšana bëtscá tšabe soyënga entšangbiama chaotsebinñyama. ⁸ Pero nye uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebonnana

⁹ Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna, chë atsbocaná jtsemnana tojtsá cha yobomna soyënga. ¹⁰ Er Bëngbe Bëtsá sempre ntšamo tšabá yomncá nyetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiama šmojinñinñe bonshánama, chabe entšángbioye jtsëjabuáchanëse, ntšamo mórnaca šmojtsama. ¹¹ Pero bënga fsëntseboše, cada ona tšëngaftanguentšá, nyets tempo y Jesús chaojésabëntscuana chaotsinñanñá corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiama cha chaomama. ¹² Ndoñe queftsátsboše tšëngaftanga oyënjayënga chašmotsobiamama chë Bëngbe Bëtsá tcmojabanñe trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá smochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemmama.

¹³ Bëngbe Bëtsá Abrahámioye tbojanšbuachená ora, chca tbojanianyana cachabe uabaina jayanëse, er inñya chabiama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemmama; ¹⁴ cha mënťsa tbojanšbuachená: “Añe, atše chanjama aca bëtscá tšabe bendicionënga chaotsebonnana, y chanjama acbentsa pamillentsana malajta entšanga chamotsemmama ca.” ¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

16 Entšanga tmojajurá ora, chca jamana chëngbiana canye puerte más uámanabe uabaina jayanëse, y chca chëngbiana más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátšetsnayana. 17 Y chca, Bëngbe Bëtsá tojánbošena botamana jinyanjyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninjanýe cha chca yochjanmana, cachabiama jajúrase, chë ntšamo tojanašebuachenacá yochjanmama ndegombre bëtsemnama. 18 Bëngbe Bëtsabe šbuachenana soye y chama jinyanjyama ntšamo tojanayanca, ntšamo tojanašebuachenacá ndegombre yochjanmama, chë uta soye ndocná ntšobenana jatrócama; y chca tojayana ora, ndoñe ntšopodénana Bëngbe Bëtsá chaobená jobostérana. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chášuatsebacama y chášotsanjenama, mo canye bëts resjuentsana tmojtsachetëngcá, ntšamo chentšana atsebácanënga jtsemnama cuaftseguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šochtsanjenama mondobátmana. 19 Mo ntšamo chë bëjaye asentoca cuedádoca tcojajajo anlama, chë barcuñe enjaquenënga tšabá jtsetatšëmbuana chë barco ndoñe yochántšashatiyiyana, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonýana stëtšoica, Bëngbe Bëtsabe delante jtsemnama, 20 ndayentšë Jesús celoca, Bëngbe Bëtsabe delante tojámashëngo bëngbe tšabiama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canye bëts bachna ntšamo Melquisedec yojamncá.

7

Jesús, canye bëts bachna ntšamo Melquisedec yojamncá

1 Quem Melquisedec yojamna Salem puebloca rey y bachna chë celoca Bëngbe Bëtsabiama; Bëngbe Bëtsá, chë nyetscangbiana más uamaná. Abraham chë reyënga y chëngbe soldadëngaftaca imojentsjaná y tojanayëñjaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. 2 Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canye soye. Chë palabra Melquisedec endayana “nyetsca soyënguñe tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. 3 Chabe pamíllangbiana tondaye quenatótatšëmbo; chca cha endmëna mo ni taitá ni mamá ndoñe endbomncá, ni bëts taitanga. Tondaye quenatótatšëmbo ntseco tojanonýnama, ni ntseco tojanóbanama; chca, inye soyënguñe cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

4 Y mora, šmochjájuaboye tša uamaná Melquisedec inamnama, er bēngbe tempsca uamana bēts taitá Abraham chábioye tbojanatsetá, chē reyēngaftaca imojentsjaná ora lempe tojanosháchiñentšana bnētsanentšana canýe soye. 5 Ntšamo Moisesbe leyíñe endēmandacá, chē bachnangbe más uamana amēndayá Leví, Aarónēnaca ca uabainabe pamillentšana tmomna bachnanga, jtsamnana chē Israeloca entšángbioye nyetsca chē tmobomna soyēnguentšana bnētsanentšana canýe soye jtsayēngacayana; y chca jtsamnana masque chē entšanga cachēngbe pamillentšēnga tmomna y Abrahámbentšana pamillentšēngnaca. 6 Pero Melquisedec, masque Aaronbe pamillentšá ndoñe yonjamna, Abraham, chē ntšamo Bēngbe Bētsá tbojanšbuachenacá tojanóyēngacñabentšana, cha tojanóyēngacñe nyetsca soyēnguentšana bnētsanentšana canýe soye, y Bēngbe Bētsábioye tbojanimpadá, Abraham bētscá tšabe bendicionēnga chaotsebomnama chaomama. 7 Y ndocná quenátobena jayanama ndoñe ndegombre yondmēna ca, chē Bēngbe Bētsábioye impadaná inýabiama tšabe soyēnga chaomama, más uamaná inésemna chē chca tojóyēngacñabiama, inýa chabiama Bēngbe Bētsábioye tbojainpadá ora. 8 Quem tempo, bachnanga mochjóbanēnga, entšángbioye jtsayēngacayana nyetsca chē tmobomna soyēnguentšana bnētsanentšana canýe soye, pero chē Bēngbe Bētsabe uabemana palabra, Melquisedecbiana endoyebuambná cha mo canýa cabá ainá totsomñcá. 9 Y bēnga montsobena jayanama, Abraham Melquisedécbioye chē nyetsca soyēnguentšana bnētsanentšana canýe soye tbojanoyé ora, yojamna mo Leví, chē nyetscángbioye nyetsca soyēnguentšana bnētsanentšana canýe soye ayēngacayá, Melquisedécbioye chca cuaftopagacá; 10 er cha Abrahambe pamillentšá inamna. Melquisedec yojtsabó ora y chábioye chē lempe tojanosháchiñentšana bnētsanentšana canýe soye Abraham tbojanatsetá ora, yojamna mo nyetscanga, chē Abrahámbentšana entšanga más chcoye mochtsaniyenēnga, chēngnaca chē bnētsanentšana canýe soye cuafjajocá, masque Abraham chca tojanma ora, Leví y chē Abrahámbentšana inýe entšanga cabá ndoñe tmonjanonýná.

11 Israeloca entšanga Moisesbe ley tmojanáyēngaca, chē bēts taitá Levibe pamillentšēnga bachnanga imojamnēnga Bēngbe Bētsá imojtseservena ora, y chēnga monjamna Aarónbentšana entšanga. Ntšamo chē leyíñe yomandancá imojánamēnga perdonánēnga jtsemnana y Bēngbe Bētsabe bom-inýiñe tšábēnga jtsemnana quem bachnanga jamama matmēnjanobenase, ndoñe manjanēyta Bēngbe Bētsá inýe bachna chabuatschambuama, nda ndoñe yonjamna mo chē bēts bachna Aaroncá, ndayá ntšamo chē bēts bachna Melquisedec yojamncá. 12 Er, canýe bachnanga Bēngbe Bētsábioye jtseservēnama tmojabaná y inýe bachnanga chábioye jaserviama tmojantontsé ora, jtseytana chē natsana bachnanga imojanoservena ora mándaye leyēngnaca jtsetrócama. 13 Bēngbe Utabná, ndabiama quem soyēnga jtsóyebuambnayana, ndoñe Aaronbe pamillentšá quenjatsmēna, ndayá inýe pamillentšá, y quem pamillentša entšanga ndocna te bachnangcá Bēngbe Bētsá tmonjanservé, chē altar ndirichiñe Bēngbe Bētsabe bēts yebnoca. 14 Er nyetscanga mondētátšēmo Bēngbe Utabná Judabe pamillentšana bētsēnana, y chē pamillama Moisés ndocá tonjánayana, Bēngbe Bētsá mo bachnangcá chēnga jtseservēnama.

15 Y ntšamo tmojayancá montsobena más tšabá josértana, er chē tsēm bachna Cristo yojamna canýa mo Melquisedec yojamncá. 16 Cha

bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jéftsiyenama cha inobénayeca. ¹⁷ Er mëntšá endmëna, ndayá Bëngbe Bëtsá chabiamama tojánayana:

Aca bachna nyetsca tescama condmëna, canye bëts bachna ntšamo Melquisedec yojamncá ca.

¹⁸ Cha tojánabo ora, Bëngbe Bëtsá tojanma chë nda bachna jtsemnama y ntšamo josérviamama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbiamama ndoñe bëtsá yonjanoservena. ¹⁹ Er Moisesbe léyeca, entsanga ndoñe tmonjanobená Bëngbe Bëtsabe bominyiñe tsábenga jtsemnama, pero mora chama canye corente más uámana soye montsebonna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tsábenga chásuabiamama, y chca, Bëngbe Bëtsábioye bënga jtobëconama.

²⁰ Y Bëngbe Bëtsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentšëngbioye tmojanëbuáyana ora, Bëngbe Bëtsá ndoñe chca tonjánayana, ²¹ pero mo bachnécá chaoservema Bëngbe Utabnábioye tbojanábuayana ora aifne; cach Bëngbe Bëtsabiamama jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrënguifne endayancá:

Bëngbe Utabná Bëngbe Bëtsá, Jesucristbioye tbojanianama, cachabiamama jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna nyetsca tescama condmëna ca.”

²² Bëngbe Bëtsá chca tojánayanama, Jesúsbeñe bënga corente mondëtatšëmbo, ndayá Bëngbe Bëtsá bëngbiamama jamama tojanašebuachenacá, chë Jesúsbioye bëngbe bachna chaotsemnama juabuáyanana, más tsabá yojtsemna chë ndayá tempo cha chabe entsangbiamama tojanašebuachená soyama. ²³ Chë inye bachnanga banga imojamna, er ndocná yonjanobena Bëngbe Bëtsábioye nyetsca tescama chca jtserervénana; cada ona básefta uatëngama tojëftsanoservé, tojanóbana y inyábioye chë trabajo jatontšabuáchana. ²⁴ Pero Jesús ndocna te ntjobanámayecna, cha mo bachnécá Bëngbe Bëtsábioye nyetsca tescama bochjëftseservena, y ndocna te chabe trabajo inyábioye bochanjëftsininýiye, chë inya cachcá jtsamama chauatontšema. ²⁵ Chiyeca, cha yobena nyetsca tescama játsebacana ndëmuanýenga chábeyeca Bëngbe Bëtsábioye tmojobeconá, er nyetsca tescama cha echanjëftsiyena Bëngbe Bëtsábioye chëngbiamama jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiamama chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna inyábe contra yonjábomna, ainaniñe ndocna bacna juabna yonjábomna, chë bacna soyënga amënguentšana luaroca mëná, y Bëngbe Bëtsá tojanma celoca más bëtsá y obená nyetscangbiamama cha chaotsemnama. ²⁷ Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entsanga tmojanmámna, mo chë inye bachnangbe más uámana amëndayënga mondbetsamcá, cachëngbiamama y chë

judiëngbiámnaca. Cha tojanma lempe ntšamo yojaniytca canye soye y nyetsca tescama, entšanga bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonñá ora; y tojanóbana entšanga chamotsobenama perdonánënga jtsemnana. ²⁸ Ntšamo Moisesbe leyiñe yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšine tojanáboshjontšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabñënga ndbomná.

8

Cristo, nda jóbanëse tojanma entšanga Bëngbe Bëtsáftaca mo canyáca chamotsemnana

¹ Chë más uámana soye ndayama bënga montsichamo, chë Cristo mo bachnëcá yomnama montsoyëbuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbema jtsemándayama, y Bëngbe Bëtsá chë más uámana ttemanentše. ² Chë inye bachnanga Bëngbe Bëtsabe bëts yebnentše tmojanamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentše nyets tempo Cristo mo chë bachnangbe más uámana amëndayacá yoserverna, entšanga ndoñe chca tmonjanpormá, ndayá Bëngbe Bëtsá.

³ Nyetscanga chë bachnangbe más uámana amëndayënga tmojanëbuáyana, entšangbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama. ⁴ Cha quem luarentše tojtsetrabájase, cha ni mo bacna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservënama. ⁵ Chë inye bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nye batšatema bëngbioye šuinýanñá ntšamo chë celoca luare yomnama, ndayentše Cristo mo bachnëcá yoserverna. Y bënga mondëtatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojaniana: “Cuedado cochtsebomna chë atšbiana yebniñe nyetsca soyënga jamama, ntšamo tcbonjaninýinýecá chacomama, chë tjoca bonjamna ora ca.” ⁶ Pero bëngbe bachnangbe más uámana amëndayá Cristo, tojashjache canye más bëts trabajo jtsebomnana, ntšamo chë inye bachnanga imobomna trabajuama; cachcá, ndayá Bëngbe Bëtsá tojayancá Cristoftaca bëngbiana jamama, bënga tempcá tšabá Bëngbe Bëtsáftaca jtsemnana jtsamëse, puerte

más tšabá endmëna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

⁷ Chë Bëngbe Bëtsá natsana tojanašebuachená soyëngaca matëjanopodë entšanga chamotsamama ntšamo yojanamncá, ntšamo tojanašebuachenacá jýëngacñama, as ndoñe manjanëyta Bëngbe Bëtsá cachíne canye trato chauátsbemama entšangbiana. ⁸ Pero Bëngbe Bëtsá tojáninye ntšamo yojanamncá entšanga ndoñe tmonjanmama, ntšamo cha tojanašebuachenacá jýëngacñama, y Bëngbe Utabná Bëngbe Bëtsá chëngbiana mëntšá tojánayana:

Canye tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená, chënga átšeftaca tempcá tšabá jtsemnama chamotsobenama.

⁹ Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jýëngacñama ndoñe chemátanma causa, atše cachcá chënga sënjesanëñyaye ca, Bëngbe Utabná tojánayana.

¹⁰ Chë Israeloca entšangbiana ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

¹¹ Chë tempo ndoñe queochátsiyta cányënga inyënga chamotsabuátambama, cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nyëtscanga uámanënga y nduámanënga, corente tšabá atšbe šmochantsábuatma.

¹² Chënga chanjástemaye y chëngbe bacna soyëngama chanjáperdonaye,

y ndocna te más chë bacna soyënga chënga tmojamama quichátsjuabnaye ca —cha tojánayana.

¹³ Bëngbe Bëtsá, chë entšangbiana mora jamama tojašebuachenama tojtšichamo ora, chca jtsemnana, er cha tojama chë tempo entšangbiana jamama tojanašebuachená soye, mora ya ndoñe chaondëtsošervénama; ndayá mo tanguá soycá tojtsemna y ya ndoñe tontsošervena, chë soyna nye batšatema más y ya jtsohochána.

9

Bëngbe Bëtsá jadórama muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nya chabiama pormana yebnentse quem luarentse. ² Chiyëca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiana yebnentse inauabaina “chë uámana luare ca”; chentse inamna chë canyšëfta quinyenëñjuangá castellano

candelerəsiñe, y canye meséssha ndayiñe yojacjana chë luarentse Bëngbe Bëtsá bëtsemnama inyinynaye tandëšënga.

³ Inye ujonýana entséjua chentsana, inye luare inamna; inauabaina “chë más uámana luare ca”. ⁴ Chentse inamna chë castellano altar, incienso jajuinýiyama, y chë cajontema nyetsiñe castellanoca pormañetema. Quem cajontema yojaninýanýná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inyinynaye cajontema ca”; y chë tsoye quem soyënga inabomna: canye castellano jarrëtema, maná ca uabaina tandëšëca, chë Bëngbe Bëtsá tojanma celocana chabe entsangbiana chaótsatšama saná; Aaronbe varëfja, chë tojanantšëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga. ⁵ Chë cajontema juatsboca inamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninýanýná chë Bëngbe Bëtsabe buashinýinýanana chéntšnaca bëtsemnama. Chënga, chë juatëngmiášhangaca chë cajontémentša nyets ústonëtema imojanëtšbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentse, chë cajontema juatsboca chë bachnangbe más uámana amëndayá jtsamanana buiñe jabuëšcjana, chë Bëngbe Bëtsábioye cha ibnainpadana te, entsanga cháuperdonama. Pero mora ndoñe quenátšiyta chë soyëngama lempe jatóyebuambnayama.

⁶ Lempe chca tmojanprontantsana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. ⁷ Pero nye chë bachnangbe más uámana amëndayá yojobena chë inye luaroye jamashënguana, y nye canye cada uata. Choye jamashënguana orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entsanga tmojanma bacna soyëngnaca. ⁸ Chca, chë Uámana Espíritu jamana bënga chaósertama, chë natsana luare cabá tojtsemnëntscuana y chë bachnanga cabá chë soyënga chentse tmojtšamëntscuana, nyetscanga cabá ndoñe tmonjanobená chë inye luaroye jamashjnama, chë “más uámana luaroye”. ⁹ Chë soyëngaca jtsopodénana bëngbioye jinýanýiyana, chë tempo, chë Bëngbe Bëtsábioye jadórama yebnentse entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiana uátšëmbona soyëngaca y bachnanga tmojanóba bayëngaca, ndoñe tonjanopodé jamana canya Bëngbe Bëtsábioye adorayá, Bëngbe Bëtsáftaca tempcá tšabá chaotsatšëmënama y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. ¹⁰ Chënga, chë uátšëmbona soyëngaca y tmojanóba bayëngaca tmojanma nye ntšamo Moisesbe leyíñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebianana mo tšabe entsangcá Bëngbe Bëtsabe delante jtsatšmënana; nyetsca mandënga nye cuerpama, pero ainanama tondaye ntjamana. Pero chë entsanga chca yojánama jtsamana, nye Bëngbe Bëtsá inye soyënga, más tšabe soyënga jamama tojamandantsuana, chë tsëmtrato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana

amëndayacá, chca, bēngbiana chaotsemnama chē tšabe soyēnga ntšamo mochjoyēngacñēcá. Chē luare celoca ndayentše cha Bēngbe Bētsabe delante mo bachnēcá yotrabája, puerte tšabe luare yomna, y chentše cha, ndoñe chē quem luarentše bachnanga imomnēngcá, cha yobena jamana lempe ntšamo Bēngbe Bētsá entsāngbiana jamama inajuabnaycá. Chē luare ndoñe entsāngbe cucuátšeca yondēpormana, y chca jtsayanana, quem luarentša soye ndoñe yondmēna ca. ¹² Cha, canye y nyetsca tescama chē luaroye Bēngbe Bētsabe delante tojánamashēngo ora, cha ndoñe chivo o ternerbe buiñe tonjanabuyamba, ntšamo chē inye bachnanga imojuamancá; ndayá jóbānēse, chabe buiñe juabuáshanēse, cha tojanma entsānga atsebācanēnga jtsemnama chamotsobenama; y chca tojanmēse, cha tojanobená chē luaroye Bēngbe Bētsabe delante jamashēnguama. Y Cristo chca choye tojanamashēnguēse, tojanma bēnga chē nyetsca tescama yomna tšabe vida jtsebonnama chamotsobenama.

¹³ Ndēmuanýēnga ndayámna ca chē leyama tmojanocuedá mo chē Bēngbe Bētsabe delante ndoñe tšabengcá, chē bachnanga imojuamana chēngbioye toronga y chivēngbe buiñe jabuéšcajana, y chē altaroca tcojajuinýe ternerbe jatinyá chēngbioye jatbótotana, chca, chēnga jábiamama Bēngbe Bētsabe delante mo tšabengcá. Chca tmojamentsana, chē bachnanga tmojánayana chēnga imojtsobena chē ínýēngaftaca jabama, Bēngbe Bētsá jadórāma, y cachiñe mo tšabengcá Bēngbe Bētsabe delante imojtsatsmēna ca. ¹⁴ Ndayá bachnanga tmojanmcá yojánamana entsānga cachiñe mo tšabengcá Bēngbe Bētsabe delante imojtsatsmēna ca jayanama; y chca, chē ínýēngaftaca Bēngbe Bētsábioye jadórāma tmojanobenase, jntschetšá más yojtsámana Cristbe buiñe, ndēmuanýeyē tojanábuashana bēngbiana cha tojanóbana ora! Chē nyets tempo vida bonná Espiritbe obenánaca, Cristo, chabe derecho vida jtsebonmāna cachcá tojanonýa y bēngbiana tojanóbana. Cha, chē ndocna bacna soye ndbomná, tojanóbana ora yojamna mo canye bayá tondaye ndbemaná chē bachnanga cuafjobacá juatšēmbonama, entsāngbe bacna soyēngama; cachcá Cristo, chē ndocna bacna soye ndbomná, bēngbe bacna soyēngama jáperdonama tojanóbana. Bēngbiana tojanóbanayeca, Cristo yobena jamama bēnga ainaniñe corente tšabá chamotsetátšēmo, bacna soyēnga bēnga tmojamama, chē ndoñe vida jtsebonnama bēnga junatsana soyēnga, chama bēnga perdonánēnga imojtsemnama, y chca, bēnga montsobena jtseyenana, Bēngbe Bētsá, chē ndegombre ainá yomná, jtseservēse.

¹⁵ Chýēca, Cristo jóbānēse tojama entsānga Bēngbe Bētsáftaca canýiñe mo canýacá chamotsemnama, ntšamo Bēngbe Bētsabe tsēm trato yomncá; y chca cha tojama, Bēngbe Bētsá chabe entsānga chamotsemnama tojáchembēnga perdonánēnga chamotsemnama, chē Bēngbe Bētsabe tempasca tratentša ley jtsocomplínama inamna ora imojoyenēntscuana bacna soyēnga tmojanmama; y chēngnaca chamotsobenama chē nyetsca tescama mochtsebonna soyēnga jōyēngacñēna, ntšamo Bēngbe Bētsá chabe entsānga tojanašebuachenacá.

¹⁶ Ntšamo canye testamentiñe tojtsayancá chaopasamna, jtseytana chaotsótátšēmo chē chca jamama tojašbuachená cha tojóbanama. ¹⁷ Canye testamento tondaye ntšamanana, chē chca jamama tojašbuachená cha cabá ainá totsomñēntscuana; nya cha tojóbanana orna aiñe. ¹⁸ Chýēca chē Bēngbe Bētsabe natsana trato, entsāngbeñe tojanoboatšé, chora tmojanóba bayēngbe buiñe jabuéšcýēse. ¹⁹ Moisés chē leyentša nyetsca mandēnga nyetsca entsānga tojánabuayenantšana, tojanca buángana boboshēshe y hisopo betiyentša

buacuafja, chë ternerënga y chivëngbe buiñe búyesheca enajuabnëyiñe tojanfchecuacuá, y chora chë leyënga librësañe tojanbuëscacja, y nyëtsca entsãngbefñaca. ²⁰ Y mëntšá tojánayana: “Quem buiñe entsinÿinÿná, ntšamo Bëngbe Bëtsá tojamandacá ndegombre yochtsemnama, y tsëngaftangbiana puerte yochtsámanama ca.” ²¹ Moisésnaca buiñe tojanbuëscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. ²² Er ntšamo leyiñe luayancá, yojtsemna nÿa mo nyëtsca soyënguiñe buiñe jabuëscacjana, Bëngbe Bëtsábioye jadórama tsabá chaoservema; y buiñe ndoñe tonjuábuashanësna, ndoñe ntsopodénana entsãnga bacna soyëngama perdonánënga chamotsemnama.

Cristo jasúfriase y jóbanëse, tojanma entsãnga bacna soyëngama perdonánënga chamotsemnama

²³ Chýeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tsabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batsatema jtsinÿanÿnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tsabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama. ²⁴ Er Cristo ndoñe tonjánamashëngo canÿe luarentše Bëngbe Bëtsá jadórama nÿe entsãngbe pormánentše, ndaye luare nÿe batsatema jtsinÿanÿnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tonjánamashëngo, Bëngbe Bëtsabe delante luaroye, bëngbiana jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canÿe cada uata, bayëngbe buiñeca, ndoñe cachabe buiñeca, chca, ndayánaca jamama entsãnga bacna soyënga tmojamama perdonánënga chamotsemnama. Pero Cristo chë luaroye celoca ndoñe tonjánamashëngo, chentšana jtésebocnama, y chabe buiñe juabuáshanëse cachiñe jatóbanama, y ba soye cachcá chauëtsemnama. ²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canÿe y nyëtsca tescama tojenonÿinÿé quem luarentša entsãnga bacna soyënga jabuajuánama, chëngbiana jóbanëse, mo entsãngbe bacna soyëngama canÿe tmojóba bayá, Bëngbe Bëtsábioye uatšëmbonacá. ²⁷ Cachcá, ntšamo nyëtsca entsãnga jtsamnana nÿe canÿe jóbanama, y chentšana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tsabá o ndoñe tsabá bëtsemnama, y chëngaftaca jamana ntšamo chora tojajuabocá, ²⁸ cachcá, Crístnaca, nÿe canÿe chabe derecho vida jtsobomñama cachcá tojanonÿá, chabe buiñe juabuáshanëse jóbanama, ba entsãnga bacna soyëngama jáperdonama; y chentšana cachiñe yochjésabo, ndoñe bacna soyëngama entsãnga jabáperdonama, ndayá chë cha cháuesabama tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inÿe soyëngaca, ndoñe

ntsinyānyayana lempe chē Bēngbe Bētsá chabe entšanga jatsatayana puerta tšabe soyēnga, pero aīñe batsatema jtsinyānyayana ntšamo chē soyēnga yochtsemnama. Chiyeca chē mandēnga, chē uátšēmbona soyēngaca y Bēngbe Bētsábioye jadórana tmojóba bayēngaca, ndocna te ntjopódiana jamana chē Bēngbe Bētsábioye jobéconama tmojtsebošēnga, chca soyēnga tmojtsamama cada uata nýets tempo, chēnga ainaniñe corente chamotsetatšēmbuama chēngbe bacna soyēngama nýetsca tescama perdonānēnga imojtsemnama. ² Er ndayá tcojtsamama Bēngbe Bētsabiama uátšēmbona soyēngaca y chábioye jētschuayama tmojóba bayēngaca, entšanga Bēngbe Bētsábioye adórayēnga, chabe delante tšábēnga jtsemnama matmēnjanobenase, chēnga chē bacna soyēnga tmojanmama ainaniñe ngménaca ya ndoñe mamēnjētsemna, y matmēnsanajbaná soyēnga amana chē tmojóba bayēngaca. ³ Pero juatšēmbonama entšanga bayēnga tmojóba ora, josérviana entšanga bacna soyēnga tmojamama cada uata chamuatenójuaboma; ⁴ er chē toronga y chivēnga tmojóbanēngbe buñēca ndoñe ntsopodénana entšangbioye bacna soyēnga jabuajuánama.

⁵ Chiyeca, Cristo quem luaroye tojánabo ora, Bēngbe Bētsábioye mēntšá tbojaniyana:

Ndoñe tconjábošena entšanga chacmátšēmbona soyēnga, ni tmojobaye bayēnga, pero aīñe tcojama atše canye entšacá chaitsemnama.

⁶ Ndoñe tšabá quecmátinyana chē tmojóba y tmojajuinyé bayēnga, entšanga bacna soyēngama chacotsaperdonama.

⁷ As atše Bēngbe Bētsá sēnjaniyana: “Bēngbe Bētsá, muentše sēntsemna, ntšamo aca icobošcá atše chaimama, ntšamo ace uabemana palabrēnguiñe atšbiana endayancá, chē ndayá atše chjanmama ca.”

⁸ Natsana, Cristo tojánayana, Bēngbe Bētsá ndoñe tonjánbošena, ni tšabá tbonjanínynana entšanga chamuátšēmbona soyēnga, ni Bēngbe Bētsábioye jētschuayama tmojóba bayēnga, ni tmojóba ni tmojajuinyé bayēnga, entšanga bacna soyēngama cha chaotsaperdonama ca, masque chēnga chē Bēngbe Bētsábioye jadórana soyēngaca jamana, ntšamo leyiñe iuayancá ndayá chēnga jamama yojtsamna. ⁹ Y chentšana, Cristo Bēngbe Bētsábioye tbojtātaniyana: “Muentše sēnjabo, chē ntšamo aca icobošcá atše chaimama ca.” Chca, Cristo tojinānyé chē jtsamana soyēnga tmojóba bayēngaca, tondaye yonduámana entšanga bacna soyēnga jabuajuánama, y entšangbe bacna soyēngama jóbanēse tojaninānyé chē ntšamo Bēngbe Bētsá yobošcá jtsamana, más iuámana chē inyē soyēnga játamama. ¹⁰ Bēngbe Bētsá tojama, bēnga chabe entšanga y chabe delante tšábēnga chamotsemnama, ntšamo Bēngbe Bētsá yobošcá Jesucristo tojánmayeca, chabe derecho vida jtsobomñama cachcá jonjāyēse y entšangbe bacna soyēngama jóbanēse, canye y nýetsca tescama.

¹¹ Judiēngbe nýetsca bachnanga nýets tempo ba soye altarentša natsanoica Bēngbe Bētsá jtseservénana, y ba soye cachcá jtsamana tmojóba bayēngaca, pero chē soyēngaca ndocna te ntjopódiana entšanga bacna soyēnga jabuajuánama. ¹² Pero Jesucristo entšangbe bacna soyēngama tojanóbana ora, yojamna mo canye tmojóba bayacá, Bēngbe Bētsá entšanga bacna soyēngama cháuperdonama; nýe canye y nýetsca tescama chca tojanma, y chentšana Bēngbe Bētsabe catsbioica tojtanoítbema, canye uámana puestentše, jtsemándayama. ¹³ Chentše cha yobátmana, Bēngbe Bētsá

chabe obenánaca Cristbe uayayënga chabe cucuatšifne chamoquedama yochjamëntscuana. ¹⁴ Er nÿe canÿe, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnama chëmbonënga, chabe delante nÿetsca tescama tšabengcá chamotsemnama. ¹⁵ Y Uámana Espíritnaca, Bëngbe Bëtsabe uabenana palabrënguifne sontsinÿanÿná chca ndegombre bëtsemnama, mëntsá tojánayana ora:

¹⁶ Ndayá entšangbiama chjama, canÿe tempo chentšana chanjašebuachená soye mëntsá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntsá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

¹⁸ Chcasna, Bëngbe Bëtsá nÿetsca tescama entšanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuafjobaycá, entšanga bacna soyëngama perdonánënga chamotsemnama.

Sontsamna Bëngbe Bëtsábioye jtobëconana

¹⁹ Y chca, Jesucristbeyeca catšátanga, Jesusbe buifne tojanábuashanama y bëngbiama tojanóbanama, chábeñe jtsošbuáchiyëse, bënga montsobena, tondayama ntjatauatjácá Bëngbe Bëtsabe delante jamashënguama. ²⁰ Bënga montsobena jamashënguama chë tsëm benachëjana, Cristo bëngbiama tojamëjana; cha nda inétsama chë nÿetsca tescama yomna tšabe vida chamotsebonnaya. Mo chë quem luarentše chë bachnangbe más uamana amëndayacá, chë ujonÿana entšëjuajana jamashënguana chë “más uamana ca” uabaina luaroye, Bëngbe Bëtsabe delante jtsemnama, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama. ²¹ Bënga mondbomna canÿe bëts bachnangbe más uamana amëndayá, Bëngbe Bëtsabe entšángbeñe jtsemándayama, y cha endmëna Jesús. ²² Chíyeca, Bëngbe Bëtsá jaserviama ndegombre ainaniñe corente jtsebošëse, y chábeñe puerte jtsošbuáchiyëse, sontsamna Bëngbe Bëtsábioye jobëconana. Ntšamo chë bachnángbioye buifneca tmojanabuešcaccjá, Bëngbe Bëtsabe delante tšabengcá chamotsemnama cha jaserviama, cachcá, Cristbe buifne juabuáshanëse y bëngbiama jóbanëse, bënga ainaniñe corente montsetátšëmbo Bëngbe Bëtsá nÿetsca tescama bëngbe bacna soyëngama šojtsaperdonama. Y bënga béjayeca uabainëngnaca mondmëna; chíyeca bënga jtsoebenana Bëngbe Bëtsábioye chca jobëconana.

²³ Bënga sontsamna nÿets tempo Bëngbe Bëtsábeñe puerte jtsošbuáchiyana, y ndocna te nÿe ndayámnaca játajbanana entšángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. ²⁴ Bënga sontsamna janguanguana ntšamo muatjobenaye añemo jenatšetayana, nÿetscanga jtsebobonshánana, y ntšamo tšabá yomncá jtsamana; ²⁵ pero ndoñe quešnátamna játajbanana, Bëngbe Bëtsábioye jadórama enefjuanana mo Cristbeñe ošbuáchiyënga quetsomñecá, ntšamo báseftanga imojtsamcá. Chamna, nÿetscanga añemo mochtsenatšetnaye Cristo nÿets tempo jtse servénama, y más mora, chë ndayá imojtsonÿama, Bëngbe Utabná yochjésabama ya yojtsobecuama montsetátšëmbo ora.

²⁶ Er chë ndegombre soyëngama tšabá tmojátátšëmbonentšana y chë soyënga tmojoyeuná chentšana, bacna soyënga jtsamëse tmojtšiyena, nÿe chca jamama tmojtseboše causa, muattsaboté ndayá Cristo bëngbiama tojanmá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. ²⁷ Y chca, ndayá bënga muattsobena jobátmana soye nántsemna nÿe chë Bëngbe Bëtsábíocana castigo, chë ndayama šojtsamna uatjana jtsebomnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá ññesheca yochtsapochóca. ²⁸ Ndánaca chë Moisesbe leyama tojayana tondaye yondovalena ca, y útata o únganga chca tmojouena y aññe cha chca tojayana ca chënga tmojananëse, jtsemnana chë entšábíoye jtsóbana, tondaye ntjalastemacá. ²⁹ Canÿa, nÿets ainánaca Bëngbe Bëtsabe Uaquiñábíoye tbojtsaboté; y tojayana Cristbe buiñe, chë ndëmuanyëye tojanábuašana bëngbiama tojanóbana ora, tondaye yonduámana ca, ndayá nÿe ndaye entšabe buiñcá ca, chë buiñe chë ndëmuanyëye šojtsinÿanÿná ndayá Bëngbe Bëtsá tbojašebuachenacá bëngbiama jamama, y ndáyeca Bëngbe Bëtsá chabe entšanga šojábíama, cha jasérvíama; chë entšá Uámana Espíritbíoye tbojóyenguango, nda inétsama bënga tšabe soyënga chamotsebomnana; y canÿa chca amá, ŷtšëngaftanga ndoñe šmontsejuabná cha ibojtsomerecena Bëngbe Bëtsábíocana canÿe puerte más uabouana castigo, chë Moisesbe leyama tondaye yondovalena ca tojananabíama? ³⁰ Bënga nÿetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ññyënga chamosufrima tmojama causa; y chënga chanjácastigaye, ññyëngbíoye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbíama echanjanya ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” ³¹ ¡Tša uabouana, Bëngbe Bëtsá chë nÿets tempo ainabe cucuatšíñe joquédana, castiganá jtsemnana!

³² Pero ntšamo tempo yojamnana šmochtsenójuabnaye, chë ndegombre soyënga Jesucristbíama cabá chora šmonjanábuatmana ora, y chora tša jenujúerzana cmonjanotocá padecena soyënguiñe, y chë causa tša šmojanufrí. ³³ Báseftanga tšëngaftanguentšëngbíoye entšangbe delante tmojanoyánguango, y ññyënga tmojanma puerte chašmotsesufrínama; y ññyënga tšëngaftanguentšënga chca imojansufrinëngaftaca šmojanama, chënga jujabuáchama. ³⁴ Tšëngaftanga šmojánalastemana chë chënguentšënga cárceloye imojanétámenënga; y oyejuayënga šmojanlesenciá ntšamo šmojanbomncá ññyënga chacmotsabacama, er tšëngaftanga šmojátátšëmbona Bëngbe Bëtsábíocana más tšabe soyënga šmojtsebomnana, chë nÿetsca tescama šmochtsobomna soyënga. ³⁵ Chcasna, ndoñe šmatjabaná ainaniñe bëtscá aññe tjtsebomnana, ni Bëngbe Bëtsábeñe sempre jtšobátmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnana. ³⁶ Tšëngaftanga cmontsamna corente uantadënga jtsemnana, padecéñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. ³⁷ Er Bëngbe Bëtsabe uabemana palabrenguiñe cha mëntšá tojánayana: Betsco, ndoñe bën, y chë jabama ibomná echanjabo. Ndoñe bën quebochatóbema.

³⁸ Nÿe chë ndabíama atše chajama atšbe bominÿíñe tšabia chaotsemnana,

átsbeñe cha betsošbuáchema, cha ndegombre chë nyetsca tescama yomna tšabe vida echántsebomna; pero uatjana causa, átsbeñe ošbuáchiyana tojtsajbanase, atše cháftaca ndoñe quichátoyejuaye ca —cha tojánayana.

³⁹ Pero bēnga ndoñe quemátsmēna chë uatjana causa Bēngbe Bētsábeñe ošbuáchiyana tmojtsajbananga, y chca, nyetsca tescama pochocánēnga jtsemnama imojtsajnēnga; pero aīñe mondmēna chë Bēngbe Bētsábeñe ndegombre ošbuáchiyēnga, y chca, chë atsebácanēnga jtsemnama mochjashjáchēnga.

11

Bēngbe Bētsábeñe ošbuáchiyana jtsebomnana

¹ Ošbuáchiyana jtsebomnana endmēna corente jtsetatšēmbuana, ndayá tmojtsobamčá ndegombre chca yochjopásama; endmēna ainaniñe corente jtsetatšēmbuana, ndayá bēnga mora ndoñe tmontsonyáca ndegombre chca yomnama. ² Bēngbe Bētsá tojánayana bēngbe bēts taitanga tšabá imojánama ca, chēnga chábeñe imojtsošbuachéyeca.

³ Bēnga, Bēngbe Bētsábeñe mondošbuachéyeca, mondétatšēmo cha quem luare y nyetsca luarēnga tojanmama, chca chaotsemnama cha tojanmandá ora; chcasna, chë ndayá mora bēnga jinýama imobencá, cha tojanma bēnga ndoñe mondobena jinýama soyēnguentšana.

⁴ Abel Bēngbe Bētsábeñe yojanošbuachéyeca, oveshatémēnga chábioye tbojanátšēmbona, y chë soye Bēngbe Bētsabiama más tšabá yojtsemna, chë ndayá Caín, chabe catšata, Bēngbe Bētsá jētschuayama tbojanátšēmbonama. Chíyeca, Bēngbe Bētsá tojánayana Abel chabe bominiñe tšabia yojtsemna ca, ndayá Abel chábioye jētschuayama tojanmá oyejuayá tojanóyēngacñeyeca. Ntšamo Abel Bēngbe Bētsábeñe yojanošbuachecá, masque cha ya obaná yojtsemna, chë soye cabá bēnga šontsabuatambá.

⁵ Enoc Bēngbe Bētsábeñe puerta yojanošbuachéyeca, Bēngbe Bētsá celoye tbojesanbētseñe, ntjobaná. Chentšana ndocná tonjanobená cha jtsinýenana, Bēngbe Bētsá tbojesanbētseñe causa. Y Bēngbe Bētsabe uabemana palabrēnguiñe endayana, Bēngbe Bētsá Enócaftaca oyejuayá canjamna ca, ntšamo jtsamēse vojyoyenama, y chentšana celoye tbojtsanámabañe.

⁶ Pero Bēngbe Bētsábeñe ntsošbuachiycá, ndoñe quenátopodena cha oyejuayá bēngaftaca jabemama, er chábioye jobéconama, entšá jtsemnana jtsošbuáchiyana cha ndegombre bētsemnama, y cha inétsamama chë cha jtsabuatamba tša tmošošēngbiama bētscá tšabe soyēnga chamotsebomnama, mo chábiocana uacanana soyēngcá.

⁷ Bēngbe Bētsá Noébioye tbojanbuayená uabouana soyēnga yochjanopásama, cachora ndopodena jinýama soyēnga, y cha Bēngbe Bētsábeñe yojanošbuachéyeca, tojanma ntšamo Bēngbe Bētsá tbojanmandacá y barquēsha tojanapormá chabe pamíllanga játsebacama. Cha chca tojanma ora, ošbuáchiyana bómnyayeca, cha tojaninýanýé entšanga tša bacna soyēnga tmojanmama y chë causa castigánēnga jtsemnama yojtsamnama. Chabe ošbuachiyanámna Noé tojánashjache Bēngbe Bētsabe bominiñe tšabia jtsemnama, y chca entšá jashjáchana, nye Bēngbe Bētsábeñe jtsošbuáchiyēse.

⁸ Bēngbe Bētsá Abrahámioye tbojanchembo, inýe luaroye cháuama; Abraham Bēngbe Bētsábeñe yojanošbuachéyeca, tojanma ntšamo Bēngbe Bētsá tbojanmandacá, y tojánbocna chë luaroye jama, chë Bēngbe Bētsá tbojanšbuachená jatšetayama luaroye, masque Abraham

ndoñe yontsetátšëmbo ndëmoye yochjánama. ⁹ Bëngbe Bëtsábeñe yojanošbuachéyeca, yojobena mo inye luarocana ashjanganonacá jtsiyenana, cachabe luarentse ndoyená, chë Bëngbe Bëtsá tbojanšbuachená luarentse. Entšëjuaca pormana tambënguñe yojoyena, cachá ntšamo chë chá bentšana básenga Isaac y Jacob ibojëftsiyencá; y chátnaca Abrahamcá ibojanobátmana jöyëngacñama ntšamo Bëngbe Bëtsá Abrahámioye tbojanšbuachenacá. ¹⁰ Er Abraham corente uantadá yojanobátmana chë canye luaroye celoca jamashënguama tempo; chë luare inamna canye bëts pueblo, puerte tšabe ucatjoniñe pormana pueblo, canye luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

¹¹ Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canye šešona chabotsebmnama, masque chora ya bëtsanáñejema yojtsemna, šešona jtsebmnama. Bëngbe Bëtsá chca tojanma, er Sara corente yojanjuabná, cha chë canye šešona yochtsanbomnana tbojanšbuachená cha, nyets tempo ntšamo tojayancá amá yojamna ca. ¹² Y chca, quem entšá Abraham, chë šešonga jtsabamnama ya ndobenábentšana, ba básenga tmojanonýna, tša mallajta mo chë celoca estrellëngcá, y tša chëftanga mo chë mar bëjayoca chënyañentša cascajá, ndocná jacúntama ntjobenayana.

¹³ Nyetsa quem entšanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chënga imojtsemna. Chënga tmojanayana quem luarentse chënga imojoyena mo cachëngbe luarentse ndoyëngcá, y quem luarëjana mo nye achnëjuanëngcá ca. ¹⁴ Y chca tmojtsichámëngna, puerte jtsinýanýnayana chënga tša imojtseboše inye luaroca joyéanama, canye luare cachëngbiama. ¹⁵ Chënga nye chë ndayentšana tmojëftsanbocna luarama manjánjuabnase, matmëjanobená tšabá cachoye jeshëconama. ¹⁶ Pero chëngna canye más tšabe luare imnaboše, canye luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechëmbuanama, er celoca canye bëts luare, mo canye bëts pueblécá chëngbiama tojanprontá.

¹⁷ Bëngbe Bëtsá Abrahámioye jinýama, ndegombre aíñe o ndoñe Bëngbe Bëtsábeñe tayojsanošbuachema, tbojanmandá chabe uaqiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nye canye uaqiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: ¹⁸ “Chë á bentšana entšanga nye Isaacbiajana mochanjabo ca.” ¹⁹ Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnana, chë obanënga chámuatayenama jamama. Chíyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñécá. Y chca, ntšamo Isaácaftaca tojanopasacá, batsá yojtsinýanýnaye ntšamo Jesucristoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaqiñátbiamá, Jacob y Esaú, bëtscá tšabe bendicionënga chabotsebmnama, chë joshjanguama tempënga ora.

²¹ Jacob Běngbe Bětsábeñe yojanošbuachéyeca, ya jóbanama ora, tbojanimpadá cada ona chě Josebe básengbiana, Běngbe Bětsá chaoma bětscá tšabe bendicioněnga chamotsebomnama. Cha chca tojanma, jotsejbénase Běngbe Bětsábioye jadórama, y chabe jatjoněfjiñe tsbanánoca jojuáchase.

²² José Běngbe Bětsábeñe yojanošbuachéyeca, ya jóbanama ora, tojánayana más chcoye chě Israeloca entsanga Egiptó luarentšana mochjětsanbocna ca, y tojětsanmandá ndaya jamana chabe óbana cuérpoca.

²³ Moisesbe bětsětsata Běngbe Bětsábeñe ibojanošbuachéyeca, cha tojanonýna ora, unga shinýěntscuana cha tmojtsaniytěme, er chata tbojáninýe cha canýe botamana básetema bětsemnama, y ndoñe tbonjaněuatjaná chě reybe mandama, chě nýetsca judiěngbe basetéměnga boyabáseteměnga jtšébáyana.

²⁴ Moisés Běngbe Bětsábeñe yojanošbuachéyeca, ya bětsá yojtsemna ora, ndoñe tonjánbošena chě Egiptoca reybe bemběbe uaquiñacá chamotsábuatmama. ²⁵ Chamna, tojánbošena cha jasúfriama inýenga chamotsamama, cánýiñe chě Běngbe Bětsabe entsángaftaca, y ndoñe nýe baseftayté tšabá jatsmėnana, bacna soyěnga jtsaměse, ntšamo cachá tojtsejuabnacá, nýe cachá tšabá jtsomñama. ²⁶ Chamna, cha yojanjuabná, chě padecena soyěnguñe jasúfriana ntšamo Cristo tojansufricá, más tšabá yojamna chě Egiptoca uámana soyěngama, er cha Běngbe Bětsábeñe jtsošbuáchiyěse chábeñe yojanobátmana, ba tšabe soyěnga mo canýe uacanana soyca cha ibochjanatšetayama.

²⁷ Běngbe Bětsábeñe yojanošbuachéyeca, Moisés Egiptocana tojětsanbocna, chě luarentša rey cháftaca chábuetnama ntjatauatjácá. Cha ainaniñe nýets tempo añemo yojtsebomna, y chca yojáninýna mo chě ndocná jinýama tondobenacá, Běngbe Bětsábioye cuaftsonýacá. ²⁸ Běngbe Bětsábeñe yojanošbuachéyeca, ntšamo Běngbe Bětsá tojanmandacá, Moisés chě judiěnga tojanabuayená Bashco fiesta jamama, y chě Israeloca entsángaftaca yebněngoye amashjuaniñe buiñeca tojanbuěscacjca, chca, chě ángel obanayá, chě Israeloca pamíllangbeñe Egiptoca chě mayor uaquiñěnga ndocá chaondámama.

²⁹ Moisés y Israeloca entsanga Běngbe Bětsábeñe imojanošbuachéyeca, chě “Buángana ca” uabaina mar bejayějana tmojánenachněngo, mo chiñe bojojo fshantse cuaftsomñcá; chentšana, chě Egiptoca entsanga cachcá jamama tmojánbošena ora, nýetscanga chiyiñe tojtsanatajo.

³⁰ Israeloca entsanga Běngbe Bětsábeñe imojanošbuachéyeca, chě Jericó běts pueblentša tapiěšěnga shěconana canýsěfta tentscuama chěnga imojánajnentšana, chěšěnga yojtsášhajaye.

³¹ Rahab, chě pueblentša bacna vida bomna shembása, Běngbe Bětsábeñe yojanošbuachéyeca, ndoñe tonjanóbana chě inýengaftaca, chě běts pueblentse oyeněnga, chě ntšamo Běngbe Bětsá tojanmandacá ndoñe tmonjanměnga; y ndoñe tonjanóbana, er chě Israeloca entsanguentsana ichmóněnga tšabá tojaněbuaja, chě jarrepárama tmojánanga ntšámose chě luarentse oyeněnga jáyěňjanama jobenayama.

³² Atše sěntsobena bangbiana más jóyebuambayama, Běngbe Bětsábeñe ošbuáchiyěngbiana, pero luare šattsěshbe chcangbiana jóyebuambayama, mo Gedeoncá, Barac, Sansón, Jěfté, David, Samuel y Běngbe Bětsabe juabna oyebuambnayěngcá. ³³ Chěnga Běngbe Bětsábeñe imojanošbuachéyeca inýengbe mandaděngbe entsángbioye tmojanayěňjaná, bětscá imojánama

nÿetsca entsãngaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebegoma, chentsana báseftangbiöye ndocá chamondámama. ³⁴ Osbuáchiyana bómnyeca, Bëngbe Bëtsá tojanma lempe chaotsefsanama, chëngbiöye íñeshiñe tmojanacá ora, chënga ndocá chamondëpasama; tmojanotsbocá espadëjaca jobanámentsana; ya tondaye añemo béntsebmna ora, Bëngbe Bëtsá tojanma bëts obenana y puerte añemo chamotsebmnama; tmojánashjache bëts obenana jtsebmnama íñyënga jáyëñjanama, chëngaftaca imojtsentsjaná ora; y tmojanobená inÿe mandadënga y chëngbe soldadënga jáyëñjanama, chamotsachetama jamëse. ³⁵ Osbuáchiyana bómnyeca, básefta shembásenga chëngbe óbana pamíllangbiöye cachiñe ainënga tmojananyë, chënga ainënga chamotsatsmënema Bëngbe Bëtsá tojanma ora.

Osbuáchiyana bómnyeca, íñyënga tmojanma básefta osbuáchiyënga, puerte chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebmnama, y ndoñe nÿe chë jótsbocana batšatema más vida jtsebmnama. ³⁶ Osbuáchiyana bómnyeca, íñyënga corente tmojansufrí, íñyënga chëngbiöye tmojanoyánguango ora y tmojanatsetšená ora; y íñyënga tmojansufrí y cárceloje cadenëjuangaca utámenënga joquédamnaca. ³⁷ Inÿëngbiöye ndëtšbéngaca tmojtsanatëchénganja, serruchëshaca tmojtsanëjácacaye, espadëjaca tmojtsanëbaye. Inÿënga imojánajna cánÿentsana inÿecnoye nÿe oveshá y chivëbe bobácheca uichëtjonënga, ujabótënga, ainana tsetšanënga, y inÿëngbeyeca mocá borlánënga. ³⁸ Chë nÿe quem luarama enójuabnyënga ndoñe monjanomerecena chënga mëngaftaca jtsiyenama, chënga chë vida imojábomna cánÿentsana inÿecnoye aniñe, entsãnga ndoyena luarënguenache, tjañenache, fshantsiñe atëbéñjiñe y cuevëshënguñe.

³⁹ Nÿetsca quem entsãnga, ndëmuanÿëngbiama muentše tmonjoyebuambá, Bëngbe Bëtsá tšabá chëngbiama tojánayana, osbuáchiyana imojánbmna ca; pero ni canÿa chënguentsá tonjanóyëngacñe, ndayá Bëngbe Bëtsá chëngbe entsãnga jatšatayama tojanašebuachenacá, nÿetsca tescama jtsebmnama. ⁴⁰ Bëngbe Bëtsá, bëngbeñe jtsejuabnyëse, tojanjuabó canÿe más tšabe soye bëngbiama jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñëse.

12

Bënga mochtsejuabnyë ndayá Jesús tojanmama

¹ Chíyeca, bënga mochtsejuabnyë ba entsãngbiama, chë bëngbiama más natsana imojaniyenënga, ndëmuanÿënga puerte tšabá bënga jtsinÿanÿnayana ntšamo ndegombre yomnana Bëngbe Bëtsábeñe osbuáchiyana jtsebmnama, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, íñyëngaftaca jenëyëñjanama, chë jashjanguama tojtsemna luaroye natsana jashjanguama, chënga jotajuamna, chë chorscama nduaserverna entsãyá jtsenátsejcana, y lempe ndayá tojtsama más uenana chamotjajuama soyëngnaca jtsenójacana; bëngnaca cachcá, ndoñe mataleséncia bënga Crístbiöye ndoñe tšabá ndëtšoservënema, ni chë bacna

soyënga jamama juabnënga, chë bëngbioye paselo jáyëjanama juabnënga cachcá chamotsamama. Chamna, šontsamna sempre Bëngbe Bëtsá jt-seservénana, puerte uantadënga jtsemnëse masque padecena soyënguifë tmoyna, bënga chamobená chë trabajo jamama, chë ndayama Bëngbe Bëtsá šojáchembo. ² Jesusbiana mochtsejuabnaye, nda šuebënantsana bënga ošbuáchiyana chamotsebomnama, y šuinýanýná ntšamo nýetsa tempo nýetsca soyënguifë Bëngbe Bëtsábeñe jtsošbuáchiyama. Cha chë cruzoca jóbanaama sufrínana lempe tojanoboyá, er cha yojanobátmana chë chentšana yochtsan-bomna bëts oyejuayánama; y yojanjuabná, chë más bacá uamana entšangcá jóbanaama, chabiana ndoñe canýe uámana soye yonjamna ca; y chentšana chë uámana puestentše tojtanoíbema, Bëngbe Bëtsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobatmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiana oservëniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. ⁴ Tšëngaftanga padecena soyënguifë šmojachnëngo, entšanga bacna soyënga imojtsama causa, pero mëntsoñama ndoñe cmontsamna jóbanaama, Cristbe soyëngama enojuerzániñe; ⁵ y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojabuayenama. Chë Bëngbe Bëtsabe uabemana palabrenguifë mëntšá endayana:

Atšbe uaquiná, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjásjuabnaye chiñe mo canýe nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebomnana.

⁶ Er Bëngbe Utabná jábuayenana nda cha tbobobonshanábioye, y jacastígana chë mo chabe uaquináca tbojofjábioye ca —chiñe endayana.

⁷ Padecena soyënguifë chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canýe uaquiná, y chábioye chabe taitá ndocna te buanjuácacana, más tšabá chaot-samama? ⁸ Nderado Bëngbe Bëtsá tšëngaftanga ndoñe tcmonjabuayená, ntšamo nýetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

⁹ Y bënga básenga monjamna ora, bëngbe bëtsétsanga quem luarentše monjanamana bënga jácastígana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiana, nda tojama entšanga espíritu chamotsebomnama, y chca, bënga tšabe vida chamotsebomnama. ¹⁰ Bëngbe bëtsétsanga quem luarentše, nýe básefta tescamo, bënga jëftsabuayinayana, y chca jamana chënga tšabá tojtsinýana ora; pero Bëngbe Bëtsá bënga šojtsabuayiná ora, sempre chca jtsamana bëngbe tšabiana, bënga chabe entšanga jábiamama, cachacá puerte tšábenga, ntšamo cha nýetsa tempo yomncá. ¹¹ Sempre bënga ndaye castigo tmojtsebomna ora, chora bënga chama ndoñe oyejuayënga ntsemnana, pero aifë cochtsetšenánënga. Pero bënga chë castigüentšana tmojuatsjinýe ndayá Bëngbe Bëtsá chë sóyeca tbojtsabuayinacá, as chentšana jóbocnana natjëmbana oyenana, nýetsca soyënguifë ntšamo tšabá yomncá jtsamëse.

Bëngbe Bëtsábioye jtsabotena, entšangbiana ndoñe tšabá ntsemnana.

12 Mo nda puerte uamëntšnayacá, jatrabájama tondaye añemo ntjtse-bomncá, tsátšena buacuatsšengaca y puerte uamëntšena ntsamiasšengaca, tsšengaftangbentše báseftanga ya uamëntšnayénga šmojtsemna Běngbe Utabn-abiamia trabájajyiñe, y ainaniñe ndoñe añemo šmontsebomna. Cachiñe bėts añemo šmochtishache, y Běngbe Bėtsabe obenana cachiñe šmochtsatsbomna. 13 Mo chě canye benache tsábá y ndericho chaotsemnama tmojtsaměngcá, chca, chě cosheténga chiñe jama chamotsobenama y más tsábá jtsatanama chamuatatsjínjama, y chě benachentšana ndoñe chamondětsebocanama; cachcá tsšengaftanga, chě bėtscá ošbuáchiyana y Cristo jaserviama corente añemo šmobomnēnga, chě nye batsatema ošbuáchiyana y chca jatrabájama nye tondaye añemo ndbomnēnga šmochjújabuache; chě soye šmochjama, ntšamo Cristo tsábá jaserviama yomncá jinjanjyiyese, y ntjalesenciaj ndocna soye chaotsama chě tsabe benachentšana tsšengaftanga chašmotsojuánañama.

14 Lempe ntšamo chašmojobenacá šmochjama nyetscángaftaca natjěmbana jtsiyenama, y ntšamo Běngbe Bėtsabe entšanga mondbetsamcá jtsaměse chašmotsiyenama, cha jtseservēnese; er chca ntjamcá, canya ndoñe ntsobenana Běngbe Utabnábioye jinjama. 15 Yejuana šmochtsantješna, ndocná Cristbeñe ošbuáchiyana chaondětsajbanama, y chca, chě Běngbe Bėtsá chabe entšángbioye yochjatsataye tsabe soyénga chénga ndoñe chamondashjache. Šmochtsantješna, tsšengaftanguentše ndocná chaondětsemna, mo canye untja tbětjécá, chě chcaja sayéngbioye jásocayana, nda chaotsama, ínŷenga natjěmbana ainana ndoñe chamondětsebomnama y bacna soyénga jtsaměse chamotsiyenama. 16 Yejuana šmochtsantješna ndocná tsšengaftanguentše shembása o boyabásaftaca bacna soye amá chaondětsemnama, ni canya ndabiamia Běngbe Bėtsabe soyénga tondaye chaondětsámama. Esaú chca tojanma, chě lempe yochjanashjachcá, mayor uaquiñá bětsemnama, chabe uabentsábioye canye scnena sanama tbojtaname ora. 17 Y tsšengaftanga šmondětatsěmbo, chca tojanopasá chentšana, Esaú tojánbošena chabe taitá Běngbe Bėtsábioye chaboimpadama, chabiamia tsabe bendicionēnga chaomama, chě mayor uaquiñá bětsemnama yojanobena jtsebomnama soyénga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jětsjandmanana. Masque cha tša tojánbošena, shěchbuíyeca chabe taitábioye jaimpádase, ya ndoñe yontsopodena ntšamo tojanopasacá jětsjandmanana.

18 Tsšengaftanga ndoñe chešmatobconá, mo chě entšanga Israeloca Sinaí ca uabaina tjoye tmojanobconacá, ndayá chénga imojobena jabojuama, y íñesheca yojtsángbototjuana, tondaye binjyñe luare, tša ibetiñe y puerte jabuache binjyěngaca; 19 ni chešmatuena chéngca, canye trompetěfjua uajatětanana, ni Běngbe Bėtsabe oyebuambnayana. Chě oyebuambnayana tmojanuenēnga, imojtseimpadana ndoñe más chéngbioye chaondětsóyebuambnama. 20 Chca tmojanma, jauántama ndoñe tmonjanobená causa, ntšamo Běngbe Bėtsá tojanaměndacá: “Nda quem tjoca chaojyená, masque canye bayá chaotsomñe, entsemna chana ndětšbēngaca chamotsatěchěnjanga jtsóbama ca.” 21 Ndegombre, ntšamo tmojaninycá tša uabouana yojtsemna, cach Moisésnaca mēntšá tojánayana: “Tša šontsengmēmna auatjanana sěntsemna causa ca.”

22 Pero tsšengaftanga Běngbe Bėtsábioye šmojobconá, y chca endmēna mo tsšengaftanga canye Sión ca uabaina tjoye celoca cuafjobeconacá, chě

Bèngbe Bètsá nÿets tempo vida bomnabe bèts puebloye, mo celoca Jerusalén cuenta; y ba uaranga angelèngbiroye šmojobeconá, cánÿiñe oyejuayènga enefjuanènga imojtsemnèngbiroye, Bèngbe Bètsá jtsatschuanayama. ²³ Endmèna mo tsèngaftanga chè Bèngbe Bètsabe entsàngbiroye cuafjobeconangcá, chentše enefjuanènga mo Bèngbe Bètsabe basengcá, chènga ndayá chè Taitá tojašebuachenacá jóyèngacñama, ndèmuanÿenga Bèngbe Bètsá chabe librèšañe tojubíama. Tsèngaftanga šmojobeconá Bèngbe Bètsábiroye, ntšamo nÿetsca entsanga tmojamcá tsabá o ndoñe tsabá bétsemnama yochjayanábíroye. Endmèna mo tsèngaftanga cuafjobeconacá, chè entsanga mora ya obanènga y ntšamo tsabá yomncá jtsamèse imojèftsiyenèngbe espirítèngbiroye, chè entsanga ndèmuanÿengbíama Bèngbe Bètsá tojanma chamotsemnana lempe ntšamo chabe entsàngbíama yojanjuabnacá, chca, cháftaca sempre vida jèftsebomnana. ²⁴ Tsèngaftanga Jesúsbiroye šmojobeconá, chè jóbánèse, entsanga Bèngbe Bètsáftaca mo canÿacá chamotsemnana tojanmá, ntšamo Bèngbe Bètsabe tsèm trato yojamncá; y endmèna mo chè bèngbíama cha tojanóbana ora tojanábuashana buiñoye tsèngaftanga cuafjobeconacá; chca tojanábuashana, bèngbiroye Bèngbe Bètsabe delante mo tsabengcá jábiamama, mo ntšamo entsàngbeñe buiñe jabuéscacjama chè bachnanga imojuamancá. Caín chabe catšata Abélbíroye tbojanóba ora, yojamna mo chè Abelbe uabuáshanana buiñe Bèngbe Bètsábiroye cuaftseimpadancá, chè bacna soyama castigo chaotsemnana; pero Jesucristbe buiñe ndoñe chca ntsamana, ndayá chíyeca bènga más tsabe soyènga jashjáchana; Jesusbe buiñeca, bènga montsobena atsebácanènga jtsemnana.

²⁵ Cuedado šmochtsebomna, bèngbiroye tojtsoyebuambná ora cha joyeunayama. Chè Israeloca entsanga ndoñe tmonjánbošena Bèngbe Bètsá joyeunayama, chè Sinaí tjoca quem luarentše tojanabuayená ora; chèngbiroye cha tojanacastigá. Y mora más, Bèngbe Bètsá, chè celocana bènga buayiyenayá, ndoñe cachcá ndècastigánènga quešochátabashejuana, ntšamo cha šojtsètsètsnacá ndoñe tmontseyeunanèse. ²⁶ Bèngbe Bètsá Sinaí tjoca chè entsàngbiroye tojanoyebuambá ora, chabe oyebuambnayanaca tojanma quem luare chauangmèmanama, pero mora cha chabe uabemana palabreñguíñe tojašebuachená: “Atše cachiñe chanjatsma chauangmèmanama, ndoñe nÿe quem luare, sinó celócnaca ca.” ²⁷ Bèngbe Bètsá “cachiñe ca” tojánayana ora, chè sóyeca yojtsichamo, chè ndayté lempe chaongmèmanama cha cachiñe yochjama ora, chè quem luarentše tmojama soyènga y chè jatrócama yopodena soyènga yochtsejuána ca, chca, nÿe chè nÿetsca tescama yomna soyènga y ndoñe jatrócama soyènga chaoquedama. ²⁸ Chcasna, Bèngbe Bètsabe amèndayoca, chè cha yochjama bènga chamuamashènguama luare, yomna cachcá nÿetsca tescama y ndocna te ntjotrócana. Bèngbe Bètsá chama mochjètschuaye, y ntšamo cha tsabá tbojtsinÿancá mochtsadorana, chabíama bèts respeto jtsebomnèse, y nÿetscangbíama más bètsá cha yomnama jtsejuabnaye. ²⁹ Er Bèngbe Bètsá puerte etonaná chè chabíama nduauenanènga jabuache echanjácastigaye, y chca, cha jtsemnana mo canÿe íñeshe lempe jtsepochocamcá.

13

Ntšamo jtsiyenama, Bèngbe Bètsá oyejuayá bèngaftaca chaotsemnana

1 Sempre n̄jetscanga šmochtsenbobonshana, Jesucristbeyeca catšátanga quetsomñecá. 2 Sempre tšabá ch̄e tšëngaftangbe yebnoye in̄ye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

3 Ch̄e útamenëngbiana sempre šmochtsenójuabnaye, mo tšëngaftángnaca chëngaftaca útamenënga cuaftsemncá. Ch̄e in̄yënga tmojtsama chamot-sesufrinëngbiana šmochtsenójuabnaye, er tšëngaftángnaca nderado cachcá šmatjatspása.

4 Boyabása y shembása tbojanobouamá ora, ntšamo tbojanenšbuachenacá n̄jetscanga chamotserrespetana; y ch̄e útata chabotsama n̄ye ndayá y n̄ye ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye ch̄e shembása o boyabásaftaca bacna soye amënga, y ch̄e shema o boyábioye in̄yáftaca ingñayëngnaca.

5 Ndoñe šmattsiyena jtsejuabnayëse n̄ye mallajta crocénana jëftsebomnana. N̄ye ch̄e šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochaton̄yaye, ni can̄ya quebocháiseboshjona ca.” 6 Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá can̄ye entšá nanjobenaye átšëftaca jamama ca?

7 Tšëngaftangbe amëndayëngbiana, ch̄e Bëngbe Bëtsabe buayenana soyënga tcmojábuatambangiama, sempre šmochtsenójuabnaye. Sempre šmochtsenójuabnaye ch̄e ntšamo chënga imojaniyentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnana.

8 Jesucristo cachá n̄yets tempo iuëtsemna, tempo, mora y n̄yetsca tescama. 9 Ndoñe šmatjaleséncia in̄yënga chamotsamama tšëngaftanga ch̄e benachentšana chašmotsojuánañama, ndayá chënga tmojtsabuátambama, y ch̄e Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnyeyca, y ndoñe ch̄e sanama, ch̄e ndayá añe o ndoñe šontsamna jtsesayana soyëngama mandënga tcojtsamëse. Chca mandënga ndocna te ch̄e Israeloca entšangbiana tempo tonjanoservé.

10 Bënga ch̄e Jesucristbeñe mondošbuáchenga, can̄ye soye mondbomna mo ch̄e Bëngbe Bëtsábioye jëtschuayama altaroca juin̄yena soycá, bacna soyëngama perdonánënga jtsemnana. Bënga mondbomna ch̄e Jesucristo bëngbiana tojanma soye, cruzoca tojanóbana ora, bëngbe bacna soyëngama; y ch̄e n̄ye tmojóba bayëngaca soyënga tmojtsama bachnanga ndoñe ntsebomnana, ch̄e Cristo tojanóbana ora, ndayá tojanmentšana tojanóbocna tšabe soyënga. 11 Er ch̄e judiëngbe más uámana bachnangbe amëndayá, ch̄e tmojóba bayëngbe buiñe ch̄e “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuperdonama, y ch̄e bayëngbe cuerpënga jtsejuin̄yiyana entšanga tmoyena luarentšana chaboca. 12 Cachcá, Jesúsna tojansufri y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábënga chamotsemnana, y chabe delante mo tšabëngcá chamotsemnana. 13 Chiyeyca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufriacá bëngnaca

mochjasúfria. ¹⁴ Er quem luarentse bēnga ndoñe quemátsbomna canye bēts pueblo bēngbiama, nyets tempo chauesomñe bēts pueblo, ndayá bēngna tša mondboše y puerte mondobátmana bēnga joyéanama chē celoca yochtsemna Bēngbe Bētsabe bēts pueblentse. ¹⁵ Chýeca, šontsamna sempre Bēngbe Bētsábioye jtsatschuanayana, Jesucristbiajana. Bēngbe Bētsá chca tmojtsadorana ora, jtemnana mo chábioye jētschuayama canye soye cuafjuatšēmboncá. Chcasna, jtsóyebuambayēse cha mochtsadorana. ¹⁶ Sempre ntšamo tšabá yomncá šmochtsama, y chē šmobomncá inyēngbiámncá chaotsemna. Chca šmochtsama, er chca tcojama ora, Bēngbe Bētsá oyejuayá jtsejuabnayana chca chabiamna tcojama ca, y jtsinýnana bēnga Bēngbe Bētsá imojtsatschuanama, ndayá cha tojamama.

¹⁷ Sempre šmochtsama ntšamo chē tšēngaftanga ošbuachiyēngcá enefjuanēngbeñe amēndayēnga tmojayancá, y sempre šmochtsiyena jtsamēse nye ntšamo chēnga tmojtsebošcá. Chēnga sempre tšēngaftangbioye jtsanýenana, tšēngaftangbe tšabiamna, ntšamo cmojánanýenama Bēngbe Bētsábioye jojuama yojtsamnana chēnga jtetatšēmbēse. Jtsayaunanēse, šmochjama chēnga chēngbe trabajo oyejuayánaca y ndoñe ngménaca chamotsamama, er ndoñe chca šmonjamēse, chē trabajo tšēngaftangbe tšabiamna ndoñe nántsemna.

¹⁸ Bēngbe Bētsá bēngbiama šmochtseimpadana, er bēnga ainaniñe corente fsēndētātšēmo tšabá tifjamama, y tša fsēntseboše jtsiyenana ntšamo tšabá yomncá lempe jtsamēse. ¹⁹ Tšēngaftanga bētscá cbontsaimpadana, Bēngbe Bētsá chašmoimpadama, atse chašolesenciamna tšēngaftangaftaca cachíñe jtatsmēnana.

Bēngbe Bētsábioye chēngbiama jaimpádama y chēnga jacheuayama

²⁰ Atše, Bēngbe Bētsá sēntseimpadana, cha chē nda endbētsama bēnga natjēmbana chamotsiyenama, y nda tojanma Bēngbe Utabná Jesús cháuatayenama, nda bēnga šondánýena mo oveshēngbe tšabe abuajēñyácá; y Bēngbe Bētsá chca tojanma, Jesús, chabe buiñe juabuáshanēse tojanóbanayeca, chca, entšanga jinýanýiyama ndegombre bētsemnana ntšamo Bēngbe Bētsá chabe entšangbiama tojanašebuachenacá nyetsca tescama jamama. ²¹ Cha sēntseimpadana chaoma tšēngaftanga chašmotsebmomnana nyetsca tšabe soyēnga ntšamo cmojtšējabotcá, chca, lempe ntšamo cha yobošcá tšēngaftanga chašmotsamama; y cha Jesucristoftaca chaboma bēngaftaca ntšamo cha tšabá tbojtsinýancá. ¡Nyetscanga nyetsca tescama Cristo chamotsatschuaná! Chca chaotsemna.

²² Jesucristbeyeca catšátanga, tšēngaftanga cbontsaimpadana, jábuayenama ntšamo tchonjauyancá, puerte uantádoca tšabá chašmóyēngacñama, er nye básefta palabréngaca chama tconjubuábiamna. ²³ Atše sēntseboše tšēngaftanga chašmotsetátšēmo, Timoteo Jesucristbeyeca bēngbe catšata, ya ndoñe utamená yontsemnana, y cha betscó átšbioye chaojtabēse, átseftaca chanjēftsbetše tšēngaftanga jányama chajá ora.

²⁴ Tšēngaftanga ošbuachiyēngbeñe nyetsca amēndayēnga šmochjácheuaye, y nyetsca Bēngbe Bētsabe entšángnaca choca. Chē Italia luaroquēnga ošbuáchiyēnga tšēngaftanga cmontsacheaná.

²⁵ Atše, Bēngbe Bētsá sēntseimpadana, cha chaoma tšabe bendicionēnga tšēngaftangbeñe chaotsemnana.

Santiago

Jacheuayama

¹ Atše Santiago, Bëngbe Bëtsá y Bëngbe Utabná Jesucristbe canye oservená, tšëngaftanga cbontsëbuabiamná, tšëngaftanga chë bnëtsana uta Israeloca bëts pamüllangbioye nÿets luarëjana ujquëshenënga. Atše cbontsacheuaná.

Chë Bëngbe Bëtsábicocana osertánana

² Jesucristbeyeca atšbe catšátanga, tšëngaftanga ndaye padecena soyënguiñe chašmojtсийena ora, chiñe šmochjájuaboye mo chca tšëngaftangbe tšabiama cuaftsemncá y šmochjóyejuaye; ³ er tšëngaftanga šmondëtatšëmbo, chcañe chašmojtšajna ora, šmochtsetátšëmbo cach tšëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomnëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguiñe chašmotsomñëse. ⁴ Pero chca chašmojtsemnëse, šmochtšentšëna jashjáchama ntšamo canye entšá Bëngbe Bëtsabe soyëngama corente osertaná yomncá chašmotssemnana, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondëtsabuashebenëse.

⁵ Nderado nda tšëngaftanguentšana ndoñe tontsobena corente osertánana jtsebomnana, cha bontsemna Bëngbe Bëtsá jaimpádana cha chaoma aiñe chana jtsebomnana, y Bëngbe Bëtsá chana bochanjátšetaye; er Bëngbe Bëtsá nÿetscanga bëtscá endbëtsatsatnaye y ndocnábioye jatáboyënjana. ⁶ Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y cha nderado ndoñe bochanjóyeunayama ntjatátëmnancá. Nda mëntšá tojtšamëse, inÿe ora aiñe Bëngbe Bëtsábeñe cuaftsošbuachecá y inÿe ora ndoñe, cha entsemna mo canye olëšhcá, mar béjayoca binÿia nÿe cátatoye jtsambayana. ⁷ Chca ama entšá ndoñe chaondëtsejuabná, Bëngbe Utabnábensana ndayánaca jatóyëngacñama. ⁸ Cha jtsemnana canye entšá, mora canye soye juabnayá, pero chentšana inÿetšá jatójuabnañana. Chca, cha jtсийenana nÿetsca soyëngama uta soye jtsejuabnayëse, y chca cha ndoñe ntšobenana tondaye puerte tšabá jamama.

⁹ Chë Jesucristbeñe ošbuachiyá, ndbomnëjema y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominiñe cha canye uámana entšá jtsemnana; ¹⁰ y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaninë uantšëfjushacá, cha ndoñe nÿets tempo quem luarentše ntjëtšiyenana. ¹¹ Shinÿe tojábocna y becá tojojëñyana ora, chë shácuaana jtsebuashana, chë uantšëfjúsha jtsátsatšana y chabe uabótamanana ya ndoñe más ntšebínÿnana. Cachcá chë bomná, echanjóbana nÿe cachabiamna más becá crocénana onguayiñe chaotsemna ora.

Bacna soye ocochënguentšana tšabá jabocnana

¹² Oyejuayá chaotsemna chë entšá chë padecena soyënguentšana tšabá tojtšebocná, cabá Jesucristbeñe ošbuachiyá; chama Bëngbe Bëtsá chabiama oyejuayá echántsemna y echanjama chë nÿetsca tesca yomna tšabe vida cha chaotsebomnana, mo uacananancá chabe ošbuáchiyama. Chë soye Bëngbe Bëtsá tojašebuachená nÿetscanga cha imobobonshánëngbioye.

¹³ Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama. ¹⁴ Inÿetśá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jësejuabnayana y chë soye jtsasjayana cha chca jamama. ¹⁵ Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanjastíga.

¹⁶ Atśbe bonshana catśátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca. ¹⁷ Nÿetsca tśabe soyënga y chë puerte tśabe soyënga tsbanánocana endobá, Bëngbe Bëtsá chë Taitábíocana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá iuesomñe y ndoñe inÿa ntjátsmënana. ¹⁸ Cachá jamama tojánbošenayeca, bënga chábenga šojánabiama, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentše tojamentśana, bënga chë natsanënga chábenga chamotsemnama.

Ntšamo ndegombre yomna Bëngbe Bëtsábíoye tśabá jadórama

¹⁹ Atśbe bonshana catśátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámna. ²⁰ Inÿaftaca tbojetna ora, canÿe entśá ndoñe ntsamana ntšamo Bëngbe Bëtsá yoboścá, chë nÿetsca soyënguiñe tśabá jtsamana. ²¹ Chcasna, šmochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjójyëngacñe. Chë buayenánana chašmójóyeunase, echanjopódia tšëngaftanga atsebácanënga jtsemnama.

²² Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmontsenoíngña. ²³ Nda nÿe chë buayenánana tojouena, pero betscó tbojtsebnatjëmba y ndoñe tontsama ntšamo chiñe tojtsayancá, cha jtsemnana mo canÿe entśá chabe jubíá espejuiñe tojtsenonÿacá: ²⁴ chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnama. ²⁵ Pero nda ntšamo tojouencá ndoñe tbonjebnatjëmba, y sempre tojtsejuabná chë entśanga játsebacama Bëngbe Bëtsabe puerte tśabe mando chabosertama, y tojtsiyena ntšamo chë mandënguentše endayancá, lempe ntšamo chë entśá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábíoye ibojtsadorana ca y chë Bëngbe Bëtsábíoye adorayá ntšamo ibomncá cha yojtsama ca, pero ndoñe tontsobena bacna soye oyebuambayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabíama tondaye ntsámanana. ²⁷ Bëngbe Bëtsá chë Taitabe hominÿiñe, chë puerte tśabe y ndegombre soyënga, ndayá entśá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y

ndoñe bacna soyēnga játamana, mo chē n̄ye quem luarama enójuabnyēnga mondbetsamcá.

2

N̄yetscanga t̄sabá jtsatenon̄yayēngana

¹ T̄sēngaftanga, Jesucristbeyeca at̄sbe cat̄sátanga, šmondošbuaché Bēngbe Utabná Jesucristo, chē puerte bētsá y uamanábeñe; chíyeca t̄sēngaftanga cmontsamna n̄yetsca ent̄sanga cachcá jtsatenon̄yayēngana. ²⁻³ Nderado t̄sēngaftanga cán̄yēt̄se šmojënef̄na, y chora can̄ye bomna ent̄sá tojášhango castallano nt̄šabuchēt̄jonēf̄jngaca y uamana ent̄sayējuangaca bopormaná, cha botamana šmojúmashēgo y mēnt̄sá šmojauyana: “Moca quēfseroca mabesótbema ca”. Pero cachca ora, can̄ye ndbomn̄ejema tojášhango uandocuenta ent̄sayá uichēt̄joná, y cha šmojauyana: “Acna choca tsanana cochtsemna o chafjoca mótbema ca”. ⁴ Chca t̄sēngaftanga ya šmontsama cach t̄sēngaftanguent̄se báseftanga más uamanēnga ín̄yēngbiama chamotsemnama, y chca šmojt̄sama, ana bacna juabnēnga šmojt̄sebmna causa.

⁵ At̄sbe bonshana cat̄sátanga, quem soye šmochjouena: Bēngbe Bētsá quem luarent̄se ndbomnēnga imonnēnga tojabacacá, chēnga can̄ye puerte uamana soye chamotsebomnama, Jesucristbeñe puerte chamotsošbuáchema; y mo otocana soycá Bēngbe Bētsabe amēndayama chamosháchiñama. Cha imobobonshánēngbioye chē soye jat̄satayama tojašebuachená; ⁶ pero t̄sēngaftanga chē cuenta, mo ndoñe cach t̄sēngaftangcá ent̄sanga bendmēncá chēngbioye jtsēñyayana. Ndegombre, chē bomnēnga mondmēna chē n̄ye sempre cmondbētsamēndayēnga y chē sjoñonana chē pueblent̄sa mandadēngbioye cmondbáunatsēnga. ⁷ Y cach bomnēngnaca mondmēna chē Cristbiama podesca oyebuambnyēnga, ndábenga t̄sēngaftanga šmondmēna, y chabe uabaina t̄sēngaftangbiama puerte enduámána.

⁸ Bēngbe Bētsabe uabemana palabrenguiñe mēnt̄sá endayana: “Ndēmua ent̄sánaca cochtsebobonshana nt̄samo cach aca cuenobobonshancá ca.” T̄sēngaftanga nt̄samo chē Bēngbe Utabnabe mandiñe endayancá ndegombre šmojt̄samēse, t̄sabá šmochánt̄sama. ⁹ Pero t̄sēngaftanga ndoñe cachcá šmontsenon̄yase, chcana bacna soye jtsamana y šmojama nt̄samo Bēngbe Bētsabe leyēnguiñe ndoñe yondēlesenciancá. ¹⁰ Y mora, can̄ye ent̄sá n̄yetsca chē leyent̄sa mandēnga tojt̄sobedecena, pero ndoñe tont̄sama nt̄samo n̄ye mo can̄ye mando nt̄samo iuayancá, cha Bēngbe Bētsabiama jt̄semnana can̄ya nt̄samo n̄yetsca chē leyent̄sa mandēnguiñe ndoñe yondēlesenciancá amá. ¹¹ Cach Bēngbe Bētsá, chē “acbe shema o boyábioye ín̄yáftaca ndoñe catt̄seññaye ca” tojanayaná, cachá mēnt̄sánaca tojánayana, “ín̄yábioye ndoñe cat̄jóba ca”. Chca, nda cachabe shém̄bioye ín̄yáftaca ndoñe t̄bonjaingñé, pero aiñe ín̄yábioye t̄bojóba, chca, Bēngbe Bētsabiama cha jt̄semnana can̄ya n̄yetsca chē leyent̄sa mandēnga ndocumpliná.

¹² T̄sēngaftanga cmontsamna jtsóyebuambnyayana y jtsamana ndayá Cristo šojanamēndacá, atsebacana ent̄sangcá, er Bēngbe Bētsá echanjayana nt̄samo tmojamcá aiñe o ndoñe t̄sabá bētsemnama. ¹³ Er chē ín̄yēngbiama ndoñe ngmēnana bomnēngbiama, Bēngbe Bētsá nt̄jongmiacá echanjayana nt̄samo tmojamcá aiñe o ndoñe t̄sabá bētsemnama; pero chē ín̄yēngbiama aiñe ngmēnana bomnēngbiama, nt̄samo tmojamcá aiñe o ndoñe t̄sabá bētsemnama Bēngbe Bētsá chaojayana ora, chēnga t̄sabá chent̄sana mochanjábocana.

Chë ndegombre ošbuáchiyana, soyëngaca jinÿanjÿiyana

¹⁴ Atšbe catsátanga, ¿ndayama cánÿabioye buanjosérvia jayanana aiñe Jesucristbeñe sentsosbuaché ca, pero cha ínÿengbiana tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha ñe chca tojtsichámëse, ndoñe ntsopodénana cha atsbocaná chaotsemnana. ¹⁵ Nderado canÿe boyabása o shembása ošbuachiyá entšayá tbojtsabuáshbena y saná chë te jasamnaca tbojtsebuáshbena, ¹⁶ y canÿa tšëngaftanguentšá tbojauyana: “Diošoftá, sësnama ndoñe chacondétsepadecena y becá chacuatoshachá ca”, pero chca chaotsemnana chábioye tondaye tbonjatšetase, ¿ndayama nantsoservena chca jayanana? ¹⁷ Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnana jinÿanjÿiyama, ñe chca ošbuáchiyana jtsebomnana tondayama ntsoservénana.

¹⁸ Pero nderado ndánaca mëntšá echanjayana: “Aca Jesucristbeñe icosbuaché, pero atšna ínÿengbiana tšabe soyënga sentsama ca.” Chora atše stjojuá: “Sminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿnama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché ñe canÿe Bëngbe Bëtsá yomnana y chca tšabá contsama; pero chë bacna bayëjëgnaca chiñe jtsošbuáchiyana, y chë causa chënga uatjana jtsebomnana y jtsangmëmmanaya. ²⁰ Ndoñe obëjema cattsemna; ndegombre chochanjinÿinÿiye nderado nda Jesucristbeñe tojtsosbuaché, pero tondaye tontsama chca chaotsinÿnama, chabe ošbuáchiyana tondayama ntsoservénana. ²¹ Bëngbe Bëtsá tojánayana chabe bominÿiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. ²² Aca contsobena Abrahámbeñe jinÿyama, cha Bëngbe Bëtsábeñe yojanošbuáchema, y soyënga yojánama chca chaotsinÿnama; y ndayá cha tojanmama entsinÿinÿyena, cha ndegombre puerte bëtscá yojanošbuáchema. ²³ Chca tojanopasá ntšamo Bëngbe Bëtsabe uabemana palabrënguiñe endayancá, mëntšá: “Abraham Bëngbe Bëtsábeñe yojtsosbuáchiye, y chama Bëngbe Bëtsá tojánayana chabe bominÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

²⁴ Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿnama, y ndoñe ñe ošbuáchiyana tojtsebomnana. ²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanéyentsame, y chentšana tojanëjabuache inÿe benachëjana chamuáisebocanama, chë pueblentša soldadëngbiana chamotsachetama. ²⁶ Lempe básefta palabrënguiñe jayanamna mëntšá entsemna: ntšamo canÿe cuerpo, espíritu nd-bomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinÿnama, tondayama ntsoservénana.

3

¹ Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entšanga abuatambayëngbiama, chë castigo más bëtsćá yochtsemnana, Bëngbe Bëtsá ndoñe tmonjòyeunase, ntšamo entšanga tmojamama aife o ndoñe tšabá bëtsemnana cha chaojayana ora. ² Bënga nyëtscanga nyëtscaba bacna soyënga mondbëtsama. Nderado nda oyeubambnanyiñe ni mo canye bacna soye tonjama, chë entšá puerte tšabia jtsemnana, ntšamo Bëngbe Bëtsá yobošćá jtsiyenëse, y cha yojtsoyena cachá sempre jtsemomándayama.

³ Chë couayëngbioye freno tmojuayashbé ora, ntšamo bënga tmojtsebošćá chënga mochántsama, y bënga cachora jtsoybenana ntšamo nyëtsc chëngbe cuerpoca tmojtscamćá jtsemándayana, y ndoñe nye chëngbe bestšaše.

⁴ Barquëshamnaca šmochjenójuaboje. Masque tša bëtsëtsacuemëngá y tša jabuache binjyënga chë barco jtšëjuatsëntšayana, chë uamanéjayënga chë barco juyambana ndayëjana tmojtsebošćá, y chca, nye canye base soyetémaca, timón ca uabainëtémaca. ⁵ Cachćá, chë bichtaja cuerpiñe canye base soyetema endmëna, pero chë bichtájaca entšanga jtšenábotamnayana bëts soyënga tmojamama. Smochjouena, canye base iñeshe jtsoybenana canye bëts tjañe juangbotjuama. ⁶ Y chë bichtaja endmëna mo canye iñeshćá, mo canye luare ndayentše puerte bacna soyënga tobyñćá. Chë bichtaja jtsoybenana bëngbe cuerptse puerte bacna soyënga bëngbiama jamama. Mo canye iñeshe becá tojtscandbiamnacá, chë bichtájaca tcojtsichamo ndoñe tšabe soye, jtsoybenana bacna soyënga bëngbiama jamama nyëtsc tempo quem luarentše tmuetsiyenëntscuana; y mo nda ndayá tojtscangbotjuacá, Satanás jtsoybenana chë bichtaja jtsemándayana, bacna soyënga chaotsamama.

⁷ Entšá endobena jtsemándayana nyëtsc tjoica bayënga, shloftšënga, osjoynayënga y buyeshiñe oyena bayënga; y ndegombre mora entsamënda; ⁸ pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtsemamana bëtsćá bacna soyënga cada te chauëtsebinjñama, y mo canye mëtscuayćá veneno jtsebomnana jóbama, chë bichtájñaca cachćá endmëna. ⁹ Bichtájaca bënga puerte tšabá Bëngbe Bëtsá y Taitabiama jtšichámuana, y cach bichtájaca bënga puerte bacá entšangbiama mondbëtsichamo, masque Bëngbe Bëtsá cachacá enoparecëñënga chënga tojábiamana. ¹⁰ Cach uayášentšana jtsóbocanana Bëngbe Bëtsabiamana tšabe palabrënga y entšangbiama bacna palabrënga. Jesucristbeyeca atšbe catšátanga, chca ndoñe chaondëtsemna. ¹¹ Canye béjaye obocanentšana ndoñe ntsopodénana tšabe býeshe chaóboconama y cachentšana untja býeshñaca. ¹² Ntšamo canye higo betiyentšana ndoñe ntsopodénana olivosëšënga jashacama, y canye uvav betiyentšana ndoñe ntsopodénana higuëbënga jashacama, cachćá, atšbe catšátanga, tamona býeshentšana ndoñe ntsopodénana tšabe býeshe chaóboconama.

Bëngbe Bëtsábiocana Óbocana osertánana

¹³ Nderado tšëngaftanguentšë tojtsemna canye puerte tatšëmbuá y osertaná, cha bontsemna, chca yomnana entšanga jinjñanyiyana, tšabe soyënga amana jtsiyenëse y chë ntjatsoberbnayćá tojama soyëngaca; y cha chca jamana, puerte osertaná bëtsemnana. ¹⁴ Pero tšëngaftangbe ainaniñe yapa ínjbabioye šmojtšántšaboše y nye ínñënga chamotjáyana soyënga šmojtšama, as ndoñe šmattsenábotamnaye osertánënga y tšábënga šmomnana, er ndegombre Bëngbe Bëtsabe osertánana tšëngaftanga ndoñe šmontsebmna. ¹⁵ Er

chca osertánana, Bèngbe Bètsábiocana ndoñe ntsóbocanana, ndayá n̄ye quem luarama enójuabnayèngbentsana, n̄ye entsàngbe juabnentsana, y can̄ye bacna bayèjbentsana. ¹⁶ Ndayentse entsanga yapa tmojtsenántšaboše, y n̄ye ín̄yenga chamotjáyana soyènga tmojtsama, chentse tondayama quemochátenéyeunana y n̄yetsca bacna soyènga mochántsama.

¹⁷ Pero ch̄e Bèngbe Bètsábiocana óbocana osertánana bomnènga, n̄yetsca soyamna, natsana puerta tsabe vídaca jtsiyenana, bacna soyèngaca ndèmandánènga; y ch̄enga jtsemnana ch̄e ín̄yenga ndoñe chamondètsentsjanama amènga, tsábenga y sempre jtseprontánana ín̄yenga joyaunayama. Y cach quemènga jtsemnana ín̄yengbiana ngmènanana bomnènga, sempre tsabe soyènga jtsamana, cachcá n̄yetsca entsàngbioye jtsènyáyana, y ntšamo ndegombre tojtsemncá jtsichámuana y jtsamana. ¹⁸ Ntšamo can̄ye jená, botamana shajuana jtsebonnama tsabe jénaye jájena, cachcá, sempre natjèmbana jtsiyenama bošèngna, natjèmbana ín̄yengaftaca jtsiyenana, chca, n̄yetsca entsanga chamotsamama ntšamo Bèngbe Bètsabe bominiñe tsábá yomncá.

4

Smochtsiyena Bèngbe Bètsá tsèngaftangbeñe jtsemándayese

¹ ¿Ndayentsana ch̄e tsèngaftanga jtsentsjanayama y jtsenpenzétsiyama yóbocana? Endóbocana ch̄e tsèngaftangbe bacna juabnènguentšana, n̄ye cach tsèngaftanga tsábá jtsomñama; y ch̄e soyènga tsèngaftangbe ainaniñe sempre ch̄e tsabe juabnèngama contra jésemnana. ² Tsèngaftanga ndayánaca jtsebonnama šmojtseboše, pero chca jtsebonnama ndoñe šmontsobena, as jtseprontánana ín̄yengbioye jtsébáyama. In̄ya ntšamo tobomncá tsèngaftanga tša jtsántšabošana, y ch̄e soye jashjáchama ndoñe šmontsobena ora, ín̄yengaftaca jentjayanangana y jtsenpenzétsiyana. Ntšamo šmojtsebošcá ndoñe ntjobenayana jtsebonnama, Bèngbe Bètsá chama ndoñe šmondbotjañe causa; ³ y ch̄e soye šmojtjañe ora, tsèngaftanga ndoñe ntjójyèngacñana, ndoñe botamana ch̄e soye šmondbotjañe causa, er tsèngaftanga ch̄e soye jtsebošana n̄ye chaoservema oyejuayènga bacna soyènguiñe jtsomñama.

⁴ ¡Tsèngaftanga, Bèngbe Bètsá bobonshánana šmojtsajbananga! ¿Ndoñe šmondétatšèmbo, ch̄e jtsebošana n̄ye quem luarama enójuabnayèngbe amigo jtsemnana y n̄ye quem luarentša soyènga jtsebonnama, chca, can̄ye entsá Bèngbe Bètsabe uayayá jtsemnana? Ndánaca tojajuabó n̄ye quem luarama enójuabnayèngbe amigo jtsemnana, chca, can̄ye Bèngbe Bètsábioye uayayá jóbemana. ⁵ Ndoñe n̄ye bonamente Bèngbe Bètsabe uabemana palabrénguiñe mèntšá endayana: “Ch̄e Bèngbe Bètsá tbojanichmó bèngbe ainaniñe chaotsiyenama Uámana Espíritu, puerta entseboše n̄ye Bèngbe Bètsá can̄ya bèngbe amèndayá chaotsemnana ca.” ⁶ Pero Bèngbe Bètsá, bèngbe tsabiama jtsejuabnayèse bènga jtsèjabuáchanana, chíyeca Bèngbe Bètsabe uabemana palabrénguiñe mèntšá endayana:

Bèngbe Bètsá ch̄e n̄ye cachènga uámanènga tmojtsenobiamnangbe contra entsemna, y ch̄e ndoñe uámanènga montsenobiamnangbiamna, Bèngbe Bètsá más tsabe juabna entsebonna ca.

⁷ Asna, tsèngaftanga šmochtseprontana n̄ye Bèngbe Bètsá chacmot-samèndama; ntšamo Satanás tcmojtsamèndacá ndoñe šmattsama, y cha cachora tsèngaftangbentsana echantsachá. ⁸ Bèngbe Bètsábioye

šmochtobconá, y cha echanjama tsëngaftanga ntšamo cha yomnama chacmotsësertánama. Tsëngaftanga bacna soye amënga, cach tsëngaftangbe cucuatšëngaca tšabe soyënga šmochtsama, bacna soyënga ndoñe. Tsëngaftanga chë inye ora jtsejuabnayana Bëngbe Bëtsá jtsebobonshánama, y inye orna, nye quem luarentša soyënga jtsebonnama, šmochtsajbaná bacna soyënga jamama bošana, chca, nye tšabe juabnënga tsëngaftangbe ainaniñe chašmotsebonnama. ⁹ Tsëngaftangbe bacna soyëngama ngmënaca šmochtsemna, šmochjenóbošachna y cochtsetšenánënga šmochjóyebuambaye. Jatenbiajuayamna, šmochjenóbošachna; y joyejuayëngamna, ngmënaca šmochtsemna. ¹⁰ Bëngbe Bëtsabe delante bëtšétsanga ndoñe šmattsenobiamnaye, y cha más uámanënga mochjanjábiana.

Inyëngbiana ndoñe ntsichámuana ndoñe tšabá tmonjama ca

¹¹ Jesucristbeyeca catšátanga, inyëngbiana bacna soyënga ndoñe šmattsóyebuambnaye. Nda cachabe catšatbiana bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsoCumplínana y jtsichámuana chë leyentša mandënga tondayama yontsoserverna ca. Y chë leyama chca tcojtsichámëse, cach ley jocúmplia cuenta, contsobiamná canye ichamuá chë ley aife o ndoñe yondoservénama, y chca ndoñe quecmátsmëna jtsamana. ¹² Chë ley tojuapormá cha nye canya endmëna, Bëngbe Bëtsá, y cachá endmëna ntšamo entšanga tmojamcá aife o ndoñe tšabá bëtsemnama ichamuá, y cachánaca entsobena entšanga játsebacama o nyetsca tescama jácastigama. Y acna, ¿ndase cmëna ndëmua entšabiámna jobenayama jatichámuama ntšamo tojamcá aife o ndoñe tšabá bëtsemnama?

Ndayá yëfse yochjatëchnënguama ndoñe ntsótatšëmbuana

¹³ Y mora quem soye šmochjouena, tsëngaftanga chë šmondbëtsichamo: “Mënté o yëfse quemoye o chë inye bëtš puebløye fchanjanga, y chentše canye uata fchanjëftsemna ba soyënguiñe trabájayiñe, y ndegombre beca fchanjónyëna ca.” ¹⁴ ¡Pero ni mo ndayá yëfse tsëngaftangataca yochjochnënguama ndoñe quešmátstatšëmbo! Tsëngaftanga ndoñe quešmátstatšëmbo ndayëntscuana vida šmochjëftsebonna, y chca, tsëngaftanga šmondmëna mo canye jantsetëshcá, chëshe mora jónynana y nye ndeolpe jatenatjëmbana. Tsëngaftangataca cachcá echanjopása. ¹⁵ Tsëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” ¹⁶ Pero chë cuenta, tsëngaftanga bëtš soyënga šmochjamama sempre jtsenábotamnayana, ndayá tsëngaftanga chašmomama Bëngbe Bëtsá yochjalesenciaca ntsetatšëmbcá; y chca jtsamana ndoñe tšabá quenátsmëna. ¹⁷ Nda tojtsobena ntšamo tšabá yomncá jamama, pero ndoñe chca tonjama, cha canye bacna soye jtsamana.

5

Chë bomnënga jábuayenama

¹ ¡Quem soye šmochjouena, tsëngaftanga chë bomnënga! ¡Chë tsëngaftanga šmochtsesufrínama šmochjenóbošachna y uatjananënga šmochtseyoye! ² Tsëngaftangbe bomnana buajónana janguánana entsemna, tondayama quenátoserverna, y chë entšayëjuangá mejëjonga montsásá.

³ Tsëngaftangbe castellano y midio tojtsengúsheshe; y chë ngúsheshna echántsinÿinÿnaye tsëngaftanga chë crocenánaca ndoñe šmonjanmama ntšamo inÿenga jujabuáchama yojamncá; chë causa, nÿetsca tescama cmochántsapochocaye, ntšamo chë inÿeshe canÿe soye endbetsepochoacá. Tsëngaftanga quem tempo bomnana šmojtsejuabá, y mora quem luare jopochócama ya entsobeco. ⁴ Tsëngaftanga chë tsëngaftangbe fshantsënguife tmojtsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nÿets obenana bomná, chë trabajayëngbe chembuanana ya tojouena. ⁵ Quem luarentše tsëngaftanga šmondoyena ba botamana soyëngaca y nÿe ntšamo cach tsëngaftanga šmobošcá jtsamëse. Ntšamo canÿe uacná jóbana, minÿicá tojtsemna ora, cachcá tsëngaftangbiama entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsebínÿnama tempo ya entsobeco! ⁶ Tsëngaftanga, chë puerte tšabá amëngbiama šmojayana jóbana yojtsamna ca y šmojtšëbaye, chca ndoñe chaondëtsemnama chënga ndocá jamama ntšobencá.

Chë uantado jtsemnana y chë Bëngbe Bëtsáftaca jencuéntama ora

⁷ Pero tsëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. ⁸ Tsëngaftangnaca uantadënga šmochtsemna, y tsëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catšátanga, ntšamo inÿenga tmojtsamama ndoñe nÿe šmattoquejana, Bëngbe Bëtsá tsëngaftangbiama ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aiñe o ndoñe tšabá bëtsemnama, ya entsebecóna. ¹⁰ Atšbe catšátanga, chë tempsquënga Bëngbe Bëtsabe juabna oye-buambnayënga, ndëmuaniÿenga entšanga tmonjanabuayená Bëngbe Utabná jótšëmbonëse, chënga bëngbiöye sonjëftsaninÿanÿiye ntšamo tmojansufrima, ntšamo šojtsamna uantadënga jtsemnana tmojtsufrina ora; y chca tsëngaftanga cmontsamna jtsamana. ¹¹ Bënga chëngbiama fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebonnëse. Tsëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguife yojasufrina ora; y šmondëtatsëmbo ntšamo Bëngbe Bëtsá cabana cháböye tbojanuedama, y chca yojamna Bëngbe Utabná entšangbiama puerte ngmená yómnayeca.

¹² Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inÿe soyama. Tsëngaftanga aiñe ca jayanama šmojtsebošëse, nÿe aiñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

¹³ Nderado nda tsëngaftanguentšá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. ¹⁴ Nderado nda šocá tojtsemna, cha bontsemna chentša ošbuachiyëngcá enefjuanëngbeñe bëtsëjemëngcá amëndayënga jáchembuana, chënga Bëngbe

Bětsá chabiama chamoimpadama, y Běngbe Utabná jótšěmboněse aceitiye chamuanětjuama. ¹⁵ Y tšěngaftanga, puerte jtsošbuáchiyěse Běngbe Bětsá chašmojaimpadá ora, chě šocá salud echántinýena, y Běngbe Utabná echanjama cha tšabá cachiñe chaotsatsmēnama; y nderado cha bacna soyěnga tojaměse, Běngbe Bětsá bochantseperdóna. ¹⁶ Chíyecna, chě bacna soyěnga šmojtsamama šmochjobuambaye, y Běngbe Bětsá nýetscangbiamama šmochtseimpadana, chca, tšabá mo shnaněngcá chašmotsemnama. Canýa ndabiamama Běngbe Bětsá tojayana chabe bominýiñe tšabia yomna ca, cháftaca tbojencuentá ora, chánaca ba tšabe soyěnga jójyěngacñana, y jobenayana běts soyěnga jamama. ¹⁷ Běngbe Bětsabe juabna oyebuambnayá Elías, mo cach běngcá canýe entšá inamna, y puerte jtsošbuáchiyěse ndoñe chaonduaftema Běngbe Bětsábioye tbojanimpadá ora, quem luariñe mo unga uata y tsěntsañe ndoñe tonjanafté. ¹⁸ Chentšana, Běngbe Bětsábioye cachiñe tbojtanimpadá ora, quem luariñe tojanafté y cachiñe chě jajañenache bětscá saná yojsatsbinýna.

¹⁹ Atšbe catšátanga, nderado nda tšěngaftanguentšá tojtsajbaná chě ndegombre soyěnga jtsamana, pero inýa chábioye tbojuájabuache cachiñe chě tšabe benache cháuatishachama, ²⁰ tšěngaftanga šmochtsetátšěmbo, ndánaca chě bacna soye amábioye tbojuájabuache chabe ndoñe tšabe videntšana cháuaisebocnama, cha chě nýetsca tescama castigüentšana chábioye jatsbocana, y jamana ba bacna soyěngama cha perdonaná chaotsemnama.

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sěntsabiamná chě cachěngbe luarentše ndoñe mondoyeněngbiama, chě Ponto, Galacia, Capadocia, Asia y Bitinia luarěnguenache ujquěsheněnga imoyeněngbiama.

² Sěntsabiamná chě Běngbe Bětsá Běngbe Taitá tojánabacangbiama, ntšamo cachá jamama yojanjuabnacá y ntšamo jopásama yojantatsěmbcá, cabá chca ndochněngo ora; Uámana Espíritbeyeca, Běngbe Bětsá tojama tsěngaftanga chabe entšanga chašmotsemnama, Jesucristo chašmotseyeunanama y Běngbe Bětsabe delante tsábá chašmotsatsmēnama, bacna soyěnga abua-juáněnga. Y Běngbe Bětsá chca tojanma, Jesucristbe buiñe juabuáshaněse, cha tojanóbanayeca. Atše bětscá sěntseimpadana Běngbe Bětsá, chaoma tsábe bendicioněnga tsěngaftangbeñe chaotsemnama, y chaoma tsěngaftangbe ainaniñe tsábe ebionana chašmotsebonnama.

*Běngbe Bětsábeñe jtsošbuáchiyěse vida jtsebonnama, atsebácaněnga jtse-
nama*

³ Běngbe Bětsá y Běngbe Utabná Jesucristbe Taitábioye matschuanga; cha puerta lastemado íněngaftaca yómnayeca, tojanma běnga tsēm juábnaca vida chamotsebonnama, běngbioye bacna soyěnga jabuajuánase, Jesucristo cháuatayenama tonjánmayeca. Chiyeca běnga montsobena chábeñe jtsobátmanana sempre y nyětsca tescama, ndayá cha sochjatsatayama.

⁴ Ndayá běnga sochjatsataycá ndoñe quenátsmēna jětsopochócoma opodena soyěnga, ndayá nyěts tempo tsábe soyěnga. Y běnga mondobátmana jójyěngacñama ndayá Běngbe Bětsá chabe entšanga jatsatayama tojašebuachenacá, ndayá celoca běngbiama cha yojtsinýena. ⁵ Chě soyěnga tsěngaftangbiama entsemna, Běngbe Bětsábeñe šmošbuáchema; cha chabe obenánaca cmondánýena, tsěngaftanga játsebacama. Cha chca jamama ya tojaprontá y echanjínýanyíye, Cristo jésabama tempo chaojóshjango ora.

⁶ Chiyeca tsěngaftanga tša oyejuayěnga šmojtsemna, masque nderado jtseytana inýe ora, nyětsca padecena soyěnguiñe jasúfriase chašmuachněnguama. ⁷ Mo chě castellanama jtsetatsěmbuama aínē o ndoñe tsábe castellano tomnama iñiñe fjuchněngcá, padecena soyěnguiñe tsábá chašmojachněnguse, Běngbe Bětsá echanjínýanyíye tsěngaftanga ndegombre taišmošbuáchema. Chě castellano pronto endbetsopochóca, masque chca, chana puerta endbetsámama. Y tsěngaftangbe ošbuáchiyana chě castellanama puerta más enduámama. Tsěngaftanga padecena soyěnguentšana běts ošbuachiyánaca chašmojábocněse, Jesucristo chaojésabo ora, entšanga mochanjínýe tsěngaftanga šmojtsomerecena chacmotsatacheuanama, más bětsětsanga y obeněnga chácmbiamama y uámaněngnaca.

⁸ Tsěngaftanga Jesucristo šmondobonshana, y chábioye ndoñe chešmátaninýe; masque mora cha ndoñe quešmatonýá, tsěngaftanga chábeñe šmontsošbuachě, y šmontsebonna canýe puerta tsábe oyejuayana, y ntsachetsá chana yomnana ndoñe quešmátobena jayanama, tša bětscá causa. ⁹ Chca oyejuayana tsěngaftanga šmontsebonna, er ndayá tsěngaftanga jtsošbuáchiyěse šmobatmancá, ya šmojtsosháchichana, chě Běngbe Bětsá tsěngaftanga jtsatsebacyana.

10 Bëngbe Bëtsabe juabna oyebuambnayënga ya imojanatsjendá y imojanguá jtsetatsëmbuama, ntšamo Bëngbe Bëtsá entsanga játsebacama, y tmojanoyebuambá ndayá Bëngbe Bëtsá tsëngaftanga jatsatayama, tsëngaftangbiana tsabe juabna cha yobómnayeca. 11 Chëngbe ainaniñe yojtsemna Cristbe espírítu, y ntšamo tojanëyancá, cabá chca ndochnéngo ora, yojamna Cristo jasúfriama y ntšamo chentsana Bëngbe Bëtsá chábioye puerte bëtsá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatsëmbuama chë soyënga yochjanopása ora, ndaye tempo y ntšamo chë tempo yochtsemnama. 12 Pero tempo Bëngbe Bëtsá chëngbioye tojaninñanyé, chca jtsamana ndoñe cachëngbe tsabiama yonjamnama, ndayá chca jtsamana yojamna tsëngaftangbe tsabiama. Chënga tmojanoyebuambá, ntšamo chë tsabe noticiënga oyebuambnayënga tsëngaftanga tmojayuancá. Y chca tmojáuyana chë Uámana Espírítbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tsábá jinýama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

13 Chíyeca, botamana jtsejuabnayëse tsábá jatrabájama, y cach tsëngaftanga jenomándama jtsoberëse, yejuana šmochtsobátmana, Bëngbe Bëtsá soyënga cmochjatsatayama tsëngaftangbe tsabiama jtsejuabnayëse, Jesucristo quem luaroye yochjésabo ora. 14 Tsëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tsëngaftangbe bacna juabnénga yomncá nýe tsábá jtsonñama, ntšamo Bëngbe Bëtsábioye cabá nduabatma ora šmonjanbomncá. 15 Chamna, šmochtseyena mo chë Bëngbe Bëtsabe entsangcá, puerte tsabe entsangcá jtsamëse, er Bëngbe Bëtsá, nda tmojáchembo chca chašmotsemnama, sempre uamaná endmëna. 16 Er Bëngbe Bëtsabe uabemana palabrënguiñe mëntšá endayana: “Tsëngaftanga Bëngbe Bëtsabeñe uámanënga šmochtsemna, er atše uamaná sëndmëna ca.”

17 Tsëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiama nýetscanga cachcá mondmëna. Chíyeca, ntšamo nýetscanga tmojamama tsábá o ndoñe tsábá yontsemna ca cha yochjayana ora, cha chca echanjama nýe ntšamo chënga tmojamcá jtsonñayëse. “Taita ca” chábioye šmondbuyánayeca, quem luarentše šmochtseyenëntscuana sempre šmochtsejuabnaye cha nýetscangbiana más bëtsá yomnama, chë šmojtsama sóyeca chca jtsinñanyayëse. 18 Tsëngaftanga šmondëtatšëmbo, Jesucristo, mo nda ínýengbioye játsebacama crocénana cuafjëtšajocá, tonjanóbana tsëngaftanga játsebacama, chë nýetsca soyënga nýe bonamente jtsamëse oyenentsana, ntšamo jtsiyenama tsëngaftangbe bëts taitángbentsana šmojanatsjinýcá. Cristo ndoñe checmatanatsebacá, yopodena jtsoPOCHÓCAMA soyënga jëtšájuaese, mo crocénana o castellancá, 19 ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. 20 Chama Bëngbe Bëtsá Crístbe tojanjuabó y tbojanábuayana, cabá quem luare ndëtsemna ora; pero quem tempo, Cristo entsángbeñe tonjábocna tsëngaftangbe tsabiama. 21 Crístbeyeca, tsëngaftanga šmondošbuaché Bëngbe Bëtsabeñe, nda tonjanma Cristo cháuatayenama y

puerte uamaná tbonjánbema. Měntšá, ndábeñe tšěngaftanga šmošbuaché y šmobátmana, Běngbe Bětsábeñe endmēna.

²² Tšěngaftanga šmojama ndocna bacna soyēnga ainaniñe ntsebomnama, Jesucristbeyeca catšátangbiyoye ndegombre jtsababuánjēshanama, er tšěngaftanga ntšamo ndegombre yomncá jtsamēse, Běngbe Bětsá šmoyeunana. Chcasna, sempre nyets ainánaca nyětscanga šmochtšebobonshana. ²³ Běngbe Bětsá tojama tšěngaftanga tsēm vida chašmotsebomnama; pero tšěngaftanga tsēm vida šmontsebomna, ndoñe nyē quem luarentša entšanga ndayá tmojamama, sinó ndayá Běngbe Bětsá chē ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebomnama y chē palabra ndocna te queochaispochóca. ²⁴ Ntšamo Běngbe Bětsabe uabemana palabreñguñe endayancá: Nyětsca entšanga mondmēna mo shacuanacá, y chēnga imobomna tšabe soyēnga, endmēna mo chē shacuanentša uantšefjushangacá.

Chē shácuana jtsanctana y chē uantšefjushangá jtsatquécjanana; entšanga cachcá, nyets tempo quem luarentše ndoñe quemochátiyena; ²⁵ pero Běngbe Bětsabe palabra nyets tempo echanjesomñe ca —chiñe endayana.

Y chē palabra endmēna chē Jesucristbe tšabe noticiēnga, chē buayenánana ntšamo ínŷenga tcmojabuayenacá.

2

¹ Chcáyecna, nyětsca tescama šmochtsajbaná nyětsca bacna soyēnga amana, ínŷengbiyoye áingñayana, bacna entšanga chē ntšamo ndegombre šmojuabnacá ndinŷinŷnayēnga ntsemnana, ínŷengbiyoye untšabošana, y ínŷengbiama uayátšenayana. ² Mo cabá mora onŷnana šešoncá, tša jtsebošana chabe mamabe létŷiye, cachcá tšěngaftanga cmontsamna puerte jtsebošana nyets tempo Běngbe Bětsabe soyēnga jtsebomnama, chē soyēngaca Jesucristbeñe corente chašmotsošbuáchema, y chca, atsebácanēnga chašmotsemnana; ³ ntšamo Běngbe Bětsabe uabemana palabreñguñe endayancá: “Tšěngaftanga šmojátatšēmbona Běngbe Utabná puerte tšabia nyětscángaftaca yomnama ca.”

Cristo, chē mo aina ndětsbecá endmēná

⁴ Běngbe Utabnábiyoye šmochtobeconá, nda endmēna mo canŷe aina ndětsbecá, ndēmuanŷēse tojtsama entšanga tšabe vida chamotsebomnama. Báseftanga cha tmojtsaboté, mo ntšamo chē ndětsbéngaca canŷe yebna tmojtsejubana ora, luaroca tmojtsejajó ndětsbecá; pero Běngbe Bětsá chábiyoye tbojuábuayana, y chabe hominŷiñe cha puerte uamaná endmēna. ⁵ Chábiyoye šmochtobeconá, tšěngaftanga chē tšabe vida šmojóyēngacñēnga, cánŷiñe mo aina ndětsbéngcá, Běngbe Bětsabiama jajebuama canŷe yebnentšama chašmotsemnana; mo Běngbe Bětsabiama bachnangcá chašmotsemnana, nyē Běngbe Bětsábiyoye jtseservénama jtsentšénēse, chábiyoye jtsatschuanayama. Ntšamo Běngbe Bětsábiyoye jtseservénama šmojtsamcá, chábiyoye tšabá jtsinŷanana, ndayá Jesucristo tojanmama. ⁶ Chca ndegombre endmēna, er Běngbe Bětsabe uabemana palabreñguñe, Běngbe Bětsá Jesucristbiama mēntšá tojánayana: Smochjinŷe, atše sēnjama Jerusalenentše canŷa chaotsemna,

y cha endmëna mo chë canÿe yebna jajebuámentſe chë más bëts uashacuanëſentſe jajona ndëtsbecá.

Cha atſbe Uabuayaná endmëna, y atſbiama puerte enduámana.

Nda chábeñe tojtoſbuaché, ndocna te nÿe bonamente chábeñe queochátobatmana ca.

⁷ Tſëngaftanga, chábeñe oſbuáchiyëngbiamna, nda endmëna mo chë yebna jajebuámentſe más bëts uashacuanëſentſe jajona ndëtsbecá, cha puerte enduámana; pero chábeñe ndoſbuáchiyëngbiamna, entsopasana ntſamo Bëngbe Bëtsabe uabemana palabrënguifne Cristbiama endayancá:

Chë yebna jebuanënga tmonsanaboté ndëtsbé,

mora chë más bëts uashacuanëſentſe entſejáona ca.

⁸ Inÿoca, Bëngbe Bëtsabe uabemana palabrënguifne mëntſánaca chabiamna endayana:

Cha endmëna mo ndëtsbé ndayentſe jtsojestjiyamcá;

y mo peñëſcá yomna chënga chamotsótsatſama ca.

Chënga Jesucristo jtſabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

⁹ Pero tſëngaftanga ſmondmëna Bëngbe Bëtsábeyeca bocacánënga, y mo canÿe rey tmojtſeservena bachnangcá, y ſmondmëna Bëngbe Bëtsabe entſanga nÿe chabiamna jtſetrabájayama, y chë nÿe Bëngbe Bëtsábenga ſmognënga. Y chca endmëna, tſëngaftanga chë bëts soyënga ntſamo Bëngbe Bëtsá tojamcá chaſmotsabuayiyama. Cha endmëna nda tcmojáchembo chaſmotsajbanama oyanana mo ndoñe binÿniñcá jtſejuabnayeſe y jtſamëſe, cháftaca jtſemnama chaſmotsobenama, chë tſëngaftangbe juabnënga puerte binÿnayáftaca. ¹⁰ Tempo tſëngaftanga ni mo canÿentſa entſangcá ndoñe queſmënjatſmëna, nÿe ujquëſhenënga; pero mora, Bëngbe Bëtsabe entſanga ſmontsemna; tempo ſmonjamna entſanga ndocná tonjánalastemanga, pero mora, Bëngbe Bëtsá aifne lastemado tſëngaftangtaftaca entsemna.

Bëngbe Bëtsá jtſeservënama jtſiyenana

¹¹ Atſbe bonſhánënga, ndayentſe tſëngaftangbe ndegombre luare yomna, celoca endmëna, y muentſe quem luarentſe, tſëngaftanga ſmondmëna mo inÿoicana aſhjajnëngcá, y mo canÿe luarëjana nÿe achñëjuanëngcá, cach tſëngaftangbe luaroye átayifne. Chíyeca cbontſaimpadana, ndoñe chaſmondëtsama soyënga ntſamo chë ſmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtſenpenzéntſiyana, chentſe jtſemándayama y Uámana Espiritu ndoñe chaondëtsemándama. ¹² Chë Bëngbe Bëtsábioye nduabuatmëngbeñe ſempre ſmochtsiyena tſabá jtſamëſe; chca chënga, masque mora tſëngaftangbe contra imojtſoyebuambná, tſëngaftanga mo bacá uamana entſanga cuaftsemnëngcá, chë tſabe soyënga ntſamo tſëngaftanga ſmojtſamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatſchuanama.

¹³ Bëngbe Bëtsá ſmoyeunanama, nÿetsca entſanga mando bomnëngbioye ſmochtsobedecena; chë Romoca bëts mandábioye, cha chë quem luarentſa más uámana puesto jtſemándayama endbómnyeca; ¹⁴ y chë tſëngaftangbeñe mandadëngbióynaca, ndëmuanÿënga cha jíchamuana chë bacna soyënga amënga jácaſtigama, y chë tſabe soyënga amëngbiamna tſabá imojtſama ca chamuayanama. ¹⁵ Chë mando bomnëngbioye ſmochtsobedecena, er

Bëngbe Bëtsá endboše tsëngaftanga tsábe soyënga chašmotsamama, chca, chë ndosertánënga chë tsëngaftangbiamá podesca ichámënga, ntšamo ndegombre yomncá ntsetatšëmbcá, tondaye chamondëtsebmna tsëngaftangbe contra jayanama.

¹⁶ Šmochtsiyena tsábá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnma ndoñe šmatsejuabnaye nÿe ndaye bacna soye jamama šmojtsoberna ca, y nÿe chca šmochjátama. Más tsábá endmëna jtsiyenana, mo chë Bëngbe Bëtsá imoservenëngcá. ¹⁷ Nÿetscangbiamá respeto šmochtsebmna, chë Jesucristbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiamá jtsejuabnaye cha chë más bëtšá yomnana, y chë Romoca bëtš mandado šmochtserrespetana.

Cristo chabe entsanga tojinÿanÿé ntšamo yomna jasúfriana

¹⁸ Tsëngaftanga, chë nÿets tempo ínÿabiamá canÿe yebnentše oservénënga, tsëngaftangbe nduiñëngbioye šmochtsayaunana, puerte respeto chëngbiamá jtsebmne; y ndoñe nÿe chë tsábëngbioye y nÿe tsábá mandbomnëngbioye, ndayá chë bacá mandbomnëngbioynaca. ¹⁹ Nderado nda, ntšamo Bëngbe Bëtsá yobošcá jamama bošama, tojoberyá chabe nduiño cha chaosufrima tojtsama ora, masque chama jasúfriana ndoñe tbondmëna, chca jamëse, Bëngbe Bëtsá corente tsábá jtsinÿanana. ²⁰ Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntšamanana. Pero tsábe soyënga šmojtsama y chë causa šmojtseufrina, y tša uantadënga chiñe šmojachnëngo, chë soye cocayé Bëngbe Bëtsá corente tsábá jtsinÿanana. ²¹ Chca cmontsamna, er Bëngbe Bëtsá tcmojánachembo tsábe soyënga jamama y chca jasúfriana; chca ndegombre endmëna, er Cristo tsëngaftangbiamá tonjansufrí, y chca cha tcmonjaninÿanÿé, ntšamo jamama cmojtsamna, tsëngaftanga chca chašmotsamama. ²² Cristo ndocna te ndocna bacna soye chenáisema, ni ndocnábioye chebnai-seingñé. ²³ Chábioye tmojtsoyengúá ora, chëngbioye ndoñe ntéyánguanguana. Cha chaosufrima tmonjanma ora, cha ndocá ntjatëtšëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tsábá o ndoñe tsábá yonjamna ca yochjayana ora, chca echanjama nÿe ntšamo chënga tmojamcá jtonÿayëse. ²⁴ Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriana castigo, bënga chë bacna soyënga jamama juabnëngaca ndoñe más mandánënga chamondëtsemnma, y bënga ntšamo Bëngbe Bëtsabe bominÿiñe tsábá yomncá jtsamëse chamotsiyenama. Er Cristbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. ²⁵ Er tsëngaftanga, tempo Bëngbe Bëtsábentšana bënoca šmonjamna, mo ótsena oveshëngcá; pero mora Cristbe benache šmojtishache, y cha cmontsanÿena, mo oveshëngbe canÿe abuajëñÿacá, y cha entsantješna tsëngaftanga tsábá chašmotsemnma.

3

Ntšamo iuamna chë bouamnëngbioye jtsiyenana

¹ Cachcá mo chë oservenëngcá, tsëngaftángnaca shémanga, tsëngaftangbe boyángbioye šmochtsayaunana, chca, chë Bëngbe Bëtsabe buayenana soyënguiñe ndošbuáchiye boyángbioye chašmobená jáyëñjanama, Jesucristbeñe

chamotsošbuáchemá, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnyana, ² er chënga mochanjinÿe tšëngaftanga šmojtsiyena, Bëngbe Bëtsá nÿetscangbiana más bëtsá yomnama sempre jtsejuabnayëse, y ntšamo šmojtsamcá chca yojsinÿinÿnáyeca. ³ Cach tšëngaftangbiana ndoñe mëntsá šmattsejuabnaye: “Entšanga atše botamaná tsmëna ca chamotsejuabnama atše nÿa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; ⁴ ndayá chca chaotsemna, ntšamo tšëngaftanga chë Uámana Espíritbeyeca mandánënga jtsemnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nÿe cach tšëngaftanga uámanënga jenobiamama juabnënga ntsebomncá, pero añe ainaniñe tšabe ebionana jtsebomnëse. Chë soyënga Bëngbe Bëtsabe bominiñe puerte enduámana. ⁵ Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsabeñe imojtsanošbuaché y chábeñe imojanobátmana, y nÿetscanga chëngbe boyángbiye imojánayaunana. ⁶ Chca yojamna Sara, Abrahámbye ibnayeunana y chábbye “Taita ca” ibojanábouatma. Tšëngaftanga Sarabe bembangcá jtsemnana, tšabe soyënga šmojtsamëse, y tondayama uatjana šmontsebomnëse.

⁷ Cachcá, tšëngaftanga boyanga, cada ona cachabe shëmaftaca chaotsiyena, tšabá jtseñeyeanëse, y cha respeto buajoná chaotsemnana jtsamëse; pero chca, ndoñe nÿe cha acbiana más batšá obenana bomná bëtsemnana, ndayá Bëngbe Bëtsá chabiana tšabe juabna yobómnyeca, ntšamo cach aca tšabe vida tcmojášbuachenacá chábbyonaca tbojšbuáchenama. Chca šmochtsama, Bëngbe Bëtsáftaca jencuéntama totcá chaondëtsemnana.

Chë tšabe soyënga amama jasúfriama yojsamnënga

⁸ Y morna, nÿetsca tšëngaftanga cachcá šmochtsejuabnaye, ínÿenga šmochtsalastemana, chë Jesucristbeyeca catšátangbiye šmochtsababuánÿeshana, ínÿengbiana chacmóngmiaye, y cada ona chaotsejuabná chë ínÿenga chabiana más uámanënga imomna ca. ⁹ Inÿenga tšëngaftangbiana ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbiye ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnana cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábicocana tšabe bendicionënga chašmoháchifñama. ¹⁰ Ntšamo Bëngbe Bëtsabe uabemana palabrënguiñe endayancá:

Nda toboše tšabe vida jëtsebomnama y puerte oyejuayá tempënga jtsebomnama,
 yejuana chaochtsenojuabná bacna soyëngama ndoñe
 chaondëtsóyebuambnama,
 y ndoñe chaondëtsebosterama.

¹¹ Bacna soyënguentšana chaotsojuánañe y tšabe soyënga chaotsama, natjëmbana nÿetscángaftaca jtsiyenama chaotseboše, y chca chaotsemnana sempre chaotsentšena.

¹² Chca bontsemna jamana, er Bëngbe Utabná, chabe bominiñe tšabe soyënga amëngbiye jtsanÿenana, chëngbiana sempre jtsantjeshëse; y sempre chëngbiye jtsayaunanana, chábbye ndayámnaca tmojtsotjanañe ora;

pero chë bacna soyënga jamana uamanëngbe contra cha jtsemnana ca — chiñe endayana.

¹³ ¿Nda nanjobenaye tsëngaftangbiana bacna soyënga jamama, tsëngaftanga chë tsabe soyënga jamama sempre šmojtsentšënëse? ¹⁴ Pero masque tsëngaftanga cmojtsamna jasúfriama tsabe soyënga šmojtsamama, Bëngbe Bëtsá chama tsabe soyënga cmochántatšataye. Chë tsëngaftanga chašmosufrima amëngbiana ndoñe matauatjëngana, ni ainana tsetšenánënga ndoñe matsmënéngana, ¹⁵ ndayá ainaniñe sempre šmochtsejuabnaye Cristbiana mo Bëngbe Utabnacá y chabiana respeto šmochtsebomna; y sempre šmochtseprontana jojuama ndëmuanyënga tcmojtsatjaná ndáyeca tsëngaftanga Bëngbe Bëtsábeñe jtsošbuáchiyëse, chabiana ainaniñe šmobátmanama. ¹⁶ Pero chca šmochjama tsabe ainánaca jtsënyáyëse y Bëngbe Bëtsabiana respeto jtsebomñëse. Smochtsiyena tsábá jtsamëse, y chama ainaniñe ndoñe chašmondëtsebomna juabnënga y chamuayana chca ndegombre ndoñe tsábá šmontsama ca, chca, ín'yënga tsëngaftangbiana podesca chamojtsoyebuambná ora, tsëngaftanga Crístbeñe ošbuáchiyënga quetsomñëcá tsabe soyënga šmojtsamama, chënga chamotsëuatja chca tmojtsóyebuambnana.

¹⁷ Más tsábá endmëna jasúfriana tsabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. ¹⁸ Er Cristo n'ye can'ye tonjanóbana bënga bacna soyëngama jáperdonama; chë n'yetsca soyënguiñe tsábá amá, chë Bëngbe Bëtsabe bominyiñe ndoñe tsábá yondmëna soyënga amëngbiana, tsëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanama, cha cachiñe vida chabe espiritiñe chaotsatsbomnana. ¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tsabe entšanga imonjamnëngbe espíritënga utámenënga imojamnoye, chëngbiana castigo tojtsemnëntscuana; y cha tojanayénjanama chënga tojanabuayená. ²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tsabe benache chámuatishachama Bëngbe Bëtsá bën yojanobátmana ora, barquësha canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquësha yojtsámnyayeca. ²¹ Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtsenóbolimpiana, ndayá bëngbe ainaniñe ndocna bacna juabnënga ntsebomnana Bëngbe Bëtsá tmojtseimpadánama; y bënga atsebácanënga mondmëna, Jesucristo cháuatayenama Bëngbe Bëtsá tojánmayeca. ²² Cristo celoye tojtantsjuá y Bëngbe Bëtsabe catšbioica yomna jamándama. Cha endmëna chë amëndayá an-gelëngbiana y espíritënga mando y obenana bomnëngbiana.

4

Entšanga entsamna jtsiyenana ntšamo Bëngbe Bëtsá yobošcá

¹ Chcasna, ntšamo Cristo tojansufricá, chabe cuerpiñe mo entšacá játsetšenëse, tsëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufri, chë bacna soyënga amentsana tojtsojuánañe, ² chca, chabe vidiñe, morscana y jobanëntscuana,

jeftsiyenama ntšamo Běngbe Bětsá yobošcá, y ndoñe nye entšangbe bacna juabnėngaca, nye quem luarentše tšabá jeftsemnana. ³ Tempo, bayté enjamna, ndayěntscuana tšěngaftanga šmonjánama soyěnga, mo chě Běngbe Bětsábioye nduabuátměnga mondbetsamcá; nya ndoñe más. Chě tempo, tšěngaftanga šmonjaniyena nyětsca bacna soyěnga jtsaměse, jenomándama ntšobencá; tšěngaftanga šmonjánama soyěnga nye ntšamo šmojanbošcá, nye tšěngaftanga tšabá jtsomñnana; šmonjanamana jotmenangana y ba fiestěnga jtsebmomnana, y chora chě ófjaněnga tša jtsetmoyana y tša jtseyoyana, y ba uabouana soyěnga šmonjanamana jtsamana chě diosěnga yojamna ca šmojanjuabná soyěnga jadórana. ⁴ Morna, chě Běngbe Bětsábioye nduabuátměnga montsenjnaná, tšěngaftanga ya ndoñe más bacna soyěnga jtsaměse šmojtsiyenama, ntšamo tempo šmonjaniyena, ntšamo chěnga jtsaměse mondoyena, jenomándama ntšobencá; y chě causa, chěnga bacna soyěnga tšěngaftangbiana jtsóyebuambnayana. ⁵ Pero chěnga echanjótocaye jayanama ndáyeca chca tmojamama, chě entšangbiana, chě ainěnga y chě ya mochjóbáněngbiana, ntšamo tmojamama, aifne o ndoñe tšabá bétsemnana jayanama entseprontanabe delante. ⁶ Chíyeca, Crístbeñe ošbuáchiyěnga, chě mora obaněnga imojtsemněnga, ainěnga monjamna ora, ín'yěnga chě tšabe noticiěngama chěngbioye monjanabuayiyná, chěnga chamobenama chě nyětsca tescama yomna tšabe vida chěngbe espíroftaca jtsebmomnana, ntšamo Běngbe Bětsá yobomncá; masque mora quem luarentše, chěngbe cuerpo tojóbana, er Běngbe Bětsá tojayana nyětsca entšanga yojtsamna jóbanama ca.

⁷ Ndoñe bayté y nyětsca soyěnga echanjopochóca. Chíyeca, tšěngaftanga cmontsamna botamana jtsejuabnayana y jenomándama jtsobenana, Běngbe Bětsáftaca jencuéntama chašmotsobenama. ⁸ Nyětsca soyěngama, masna, sempre nyětscanga puerte šmochtsenbobonshana, er nda ín'yěnga puerte tojtsababuanyěshaná, sempre jtseprontánana ín'yěnga jáperdonama, chěngbiana bacna soyěnga tmojamama. ⁹ Nyětscanga šmochtsamana tšěngaftangbe yebniñe jenofjana, chca jamama totcá yojtsemna ntjatichamcá. ¹⁰ Nyětsca tšěngaftanga Běngbe Bětsá tcmojatšatá obenana tšabe soyěnga jamama; chca, chě obenánaca cmontsamna jtsamana soyěnga chě ín'yěnga tšabiama, chě Běngbe Bětsá cmojatšatá nyěts obenánaca ín'yěngbioye jujabuáchama, nyěts tempo tšabe soyěnga jtsaměse. ¹¹ Nda tojtsabuayiyná, Běngbe Bětsabe palabra chaotsabuayiyná mo Běngbe Bětsá chabijana cuaftsoyebuambnacá; nda ín'yěnga tojtsaserverna, chca chaotsama chě Běngbe Bětsá yojtsama cha chaotsebmomnana obenánaca. Nyětsca soyěnga ntšamo šmojtsamcá chaotsin'yán'yá Běngbe Bětsá puerte uamaná y obená bétsemnana, Jesucrístbeyeca. Chca šmochtsama, er Běngbe Bětsá puerte uamaná endmėna y obenana endbomna nyěts tempo y nyětsca tescama. Chca chaotsemna.

Puerte tšabá endmėna, Crístbeñe tcošbuáchema, jasúfriama tbojtsemnėse

¹² Atšbe bonshana entšanga, ndoñe šmattsenjnanaye padecena soyěnguiñe šmojtsesufrínama; chiñe jtsin'yánana ntsachetšá ošbuáchiyana šmobomnana. Chca ora ndoñe šmattsejuabnaye, tšěngaftanga ndoñe cmondamna chca soyiñe jtsachějuanana ca; ¹³ chamna, šmochjójeyuaye chě ntšamo Cristo tojansufricá šmojtsesufrína ora, chca, Cristo corente obenánaca y uamanacá entšángbeñe chaojton'yná te, tšěngaftanga puerte chašmotsóyējuama. ¹⁴ Puerte šmochtsóyējuaye, nderado nda tcmojoyánguango Crístbiana bétsoservernayeca,

er Bëngbe Bëtsabe Espíritu, chë corente bëtsá endmëná, sempre tsëngaftangbe ainaniñe iuëtsemna. ¹⁵ Tsëngaftanguentse ndocná chabondëtsemna jasúfriama inya óbanaye causa, atbëbanama, bacna soyënga ín'yëngbiama amama, o ín'yëngbe soyënguiñe ontremetënama. ¹⁶ Pero Cristbe ustoná tomnama tojasufri, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bëtsemnama.

¹⁷ Er chë tempo ya tojobuache, Bëngbe Bëtsá jayanama, cach Cristbeñe ošbuáchiyëngbiama, chabe entšangbiama, tšabá o ndoñe tšabá tmonjamama. Cha chca bëngbiama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiama chca chaojayana ora. ¹⁸ Y chca, chë Bëngbe Bëtsabe bom-inyíñe tšabá amabiamna ndoñe paselo atsbocaná jtsemnama tontsemnëse, ¿ntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? ¹⁹ Chcasna, chë imosufriñëngaftaca Bëngbe Bëtsá chca yobóseyeca, entsamna chë tšabe soyënga jtsamana y Bëngbe Bëtsabe cucuatsiñe chëngbe espíritu chamoboshjona cha chaotsin'yënama, er cha chënga tojánabiamna, y n'yetsca soyënguiñe tšabe palabra bomná cha endmëna.

5

Cristbeñe ošbuáchiyënga jábuayenama

¹ Y mora, chë tsëngaftangbentse ošbuáchiyëngcá enefjuanëngbeñe bëtsëjemëngcá amëndayënga chanjabuayená, atše cach tsëngaftangcá bëtsëjema, canya ntšamo Cristo tonjansufriacá tonjanin'yá y chama ín'yënga tonjanéyana, y canya ndábioye cach tsëngaftangcá Bëngbe Bëtsá bochjábema más uámana y bëtsá, Cristo entsángbeñe chaojotónyá ora; tsëngaftanga cbabuayená. ² Ošbuáchiyënga šmochtsan'yëna; chënga chašotsan'yënama Bëngbe Bëtsá chca tcmojábiamna. Chca, chentša ošbuáchiyëngbeñe šmochtsama ntšamo canye tšabe abuajënä chabe oveshëngaftaca endbetsamcá. Bëngbe Bëtsabe trabajo ndoñe šmattsama, nye cmojtsëtocanama, ndayá chca jamama šmojtsebóseyeca. Chca ndoñe šmatjama nye paselo crocënana juácana, ndayá ín'yëngbioye jujabuáchama tša šmobóseyeca. ³ Chë cmojtsamna jtsan'yënama ošbuáchiyënga ndoñe nye bëtscá šmattsamëndaye, mo chëngbe nduiñënga cuafjatsmënëngcá, ndayá ntšamo tsëngaftanga šmojtsiyënama, chënga šmochjín'yänäyie ntšamo yojtsamna jtsiyënama. ⁴ Chca, chë bënga n'yetscanga, mo chë tšabe abuajën'yacá šuan'yëná, quem luaroye yochjésabo ora, mo canye uabuashin'yëñana coronësha ndocna te tontsandbemëshacá, tsëngaftanga canye bëts uacanana soye šmochanjóyëngacñe, y chë soye endmëna n'yetsca tescama; Bëngbe Bëtsá uámanënga y bëtsëtsanga cmochanjábiamna, cháftaca n'yets tempo oyejuayënga jtsemnëse.

⁵ Cachcá, tsëngaftanga chë bobontsëngnaca cbabuayená, sempre šmochtsejuabnaye chë bëtsëjemënga tsëngaftangbe amëndayënga imomnama, y chca šmochtsama. Cada ona tsëngaftanguentšá bontsemna jtsejuabnayana chë ín'yënga tsëngaftangbiama más uámanënga cuaftsemncá, ín'yëngbioye šmojtsaservena ora; er ntšamo Bëngbe Bëtsabe uabemana palabrénguiñe endayancá:

Bëngbe Bëtsá chë nye cachënga uámanënga tmojtsenobiamnangbe contra entsemna,

y chë ndoñe uámanënga montsenobiamnangbiamna, Bëngbe Bëtsá más tšabe juabna entsebomna ca.

⁶ Sempre šmochtsejuabnaye Bëngbe Bëtsá chë más bëtsá nÿetscangbiamna yomnama, y nÿets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaobjuache ora. ⁷ Nÿetsca soyënga ndayama šmuenócochinÿenama Bëngbe Bëtsabe cucuatsiñe šmochjáboshijona, er cha tšëngaftanga yejuana cmondánÿena.

⁸ Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama. ⁹ Puerte šmochtomorócha, Jesucristbeñe bëtsá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama yojtsamnama jtsetatšëmbëse. ¹⁰ Pero tšëngaftanga baseftayté chašmojasufri chentšana, Bëngbe Bëtsá cmochanjábiamna nÿetsca soyënguñe puerte tšábenga, puerte chašmotsemorochama, bëtsá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiamna tšabe juabna bomná, bënga nÿetsca tšabe soyënga šonjatšatá, y nda bënga šojáchembo nÿetsca tescama bëtsëtsanga jtsemnama, chca echanjama. ¹¹ Cha nÿets obenana nÿets tempo y nÿetsca tescama chaotsebomna. Chca chaotsemna.

Jtadiósoftanama

¹² Silvano, ndabiamna sëndëjuabná atšbiamna canÿe tšabe palabra bomná Jesucristbeyeca catšata yomnama, cháftaca quem base tsbuanácha tcbonjubaábiamna. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chiyeca, sempre šmochjëftsiyena jtšamëse ntšamo chabe tšabe juabna tšëngaftangbiamna yomncá.

¹³ Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšangaftaca, mo chë tempo, Babilonia bëts puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiamna mo uaquiñacá endmëná, chánaca cmontsacheuaná. ¹⁴ Nÿetscanga Jesucristbeyeca catšatangcá šmochjenchuaye, jtenámochëse tša šmojtsebobonshánama.

Atše, Bëngbe Bëtsá sëntseimpadana cha chaoma tšëngaftanga chë Jesucristoftaca cánÿiñe mo canÿacá šmognënga, nÿetscanga ainaniñe tšabe ebionana chašmotsebomnama.

2 San Pedro

Jacheuayama

¹ Atše Simón Pedro, Jesucristbe oservená y chabe ichmoná, quem tsuanácha sentsabiamná tsëngaftangbiamá, ndëmuanÿenga šmojashjache jtsebomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema. ² Atše sëntseimpadana, tsëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tšabe bendicionënga tsëngaftangbeñe chaotsemnama y chaoma tsëngaftanga ainaniñe tšabe ebionana chašmotsebomnama.

Chë Jesucristbeñe ošbuáchiyëngbe tšabe soyënga

³ Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtšëjabotcá tšabe vida jtsebomnama y jtсийenama, Bëngbe Bëtsá jadórana soyënga jtšamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëtš soyënga jamëse, chabe entšanga chamotsemnama. ⁴ Chca, Bëngbe Bëtsá šojatšatá ntšamo bënga jatšatayama tojanašebuachenacá, bëtš y uamana soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnéngaca jtсийenama yapa boše causa. Chánaca chë tšabe soyënga šojatšatá, tsëngaftanga cháftaca cánÿiñe mo canÿacá chašmotsemnama, cachacá jtsemnama jashjáchése. ⁵ Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tšabe soyënga jtšamëse; chora bëtscá šmochtsama Bëngbe Bëtsabe soyëngama chacmotsësertánama; ⁶ chora bëtscá šmochtsama cach tsëngaftanga jenomándama chašmotsohenama; y chca, tsëngaftanga masque padecena soyënguiñe chašmojtšachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tsëngaftanga Bëngbe Bëtsá šmojtšadoránama jinÿanÿiyama; y ⁷ chca, nÿetsca tsëngaftanga ošbuáchiyënga chašmotsenbobonshana; y chca, nÿetsca entšanga chašmotsababuánÿeshana.

⁸ Tsëngaftanga lempe chë soyënga šmojtsebomna, y bëtscá chca šmojtšamëse, šmochantsiyena becá oservena soyënga jtšamëse, y chentšana puerte tšabe soyënga echantsóbocana, corente tšabá Bëngbe Utabná Jesucristo chašmotsábuatmama. ⁹ Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tšabá chaotsatsmënama tojamama. ¹⁰ Chíyeca, Jesucristbeyeca atšbe catšátanga, nÿa šmochtsentsëna chca tšabe soyënga jtšamama, y chca, corente tšabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtšamëse, Jesucristbeñe ošbuáchiyana ndocna te quešmochatajbaná. ¹¹ Chca, Bëngbe

Bëtsá oyejuayá tšëngaftangbiana echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

¹² Chcáyecna, atše sëntsejuabná tšëngaftangbioye sempre chë soyëngama jtsabuayiyayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguife y chca šmojtšiyena, chë mora šmojtsetátšëmbo soyënguife. ¹³ Sëntsejuabná, chajjéftšainëntscuana tšabá yojtsemna jamana, ainaniñe bëtscá añemo chašmotsebmomnama chë soyënga jtsamama, ntšamo tijayancá jtsabuayiyayese. ¹⁴ Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftšanbuayenacá; ¹⁵ pero bëtscá chanjëftsema, atše chajjóbana chentsánëncana tšëngaftanga nyets tempo chë soyëngama chašmotsenójuabnama.

Cristo corente uamaná y obená yojamnama tmojáninýe ora

¹⁶ Bëngbe Utabnabe obenanama y cha yochjésabama ntšamo tcbonjanabuatabacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana. ¹⁷ Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábocana oyebuambnayana Jesúsbioye mëntšá tbonjaniana ora: “Mua atšbe bonshana Uaquiñá endmëna, atše chabiana sëntsoyejuá ca.” ¹⁸ Cach bënga chë oyebuambnayana fsënjajuena, chë celocana tonjanóbocnana, er bënga Bëngbe Utabnáftaca fsënjannëna, chë uámana tjoca.

¹⁹ Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeanëse. Chca, chëngbe palabrengaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanësha canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjinýanýiye, mo tšëngaftangbiana canýe tsëm te cuafjabinýncá, y chë jabinýnama ora bínýnaye estrella tojábocna tšëngaftanga jabuabinýnamcá. ²⁰ Pero natsana chacmësértá, ndocna palabra Bëngbe Bëtsabe uabemana palabrenguife tojyana canýe soye yochjopása ca, cabá chca ndopása ora, nye cach Bëngbe Bëtsabe juabna oyebuambnayëngbe juabnentšana tojanóbocnama; ²¹ er Bëngbe Bëtsabe juabna oyebuambnayënga ndoñe monjanoyebuambná nye chënga chca jamama imnabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyeuambama tojanmayeca.

2

Chë ndoñe ndegombre soyënga buátëmbayënga (Jud 4-13)

¹ Chë Bëngbe Bëtsabe juabna oyebuambnayëngbe tempo, Israeloca entšangbeñe baseftángnaca imojamna, ndëmuanýenga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe abuátambayënga mochántsemna, y chënga ndoñe ndegombre soyënga

mochántsabuatambaye, pero ndegombre soyéngaca cánýiñe, chca, chénga chca imojtsabuátambama entšanga ndoñe chamondétatšémbonama. Ché buatémbana soyénga echanjama, entšanga ndoñe ndegombre soyénga y bacna soyénga chamotsamama. Ntšamo chénga mochántsama y mochántsabuatambaye soyéngaca, mochántsama Jesucristo ndoñe chéngbe Utabná chaondétsemnana, cha nda chénga tojatsebacá, mo nda ínýenga játsebacama crocénana cuafjétsajocá. Y chca, nye ndeolpe, ché Béngbe Bétšábicana uabouana castigo nyétsca tescama mochántsebmna. ² Banga chéngbioye mochantsésetona, nyétsca bacna soye, jenomándama ntobencá jtsamése; y chéngbe causa, ínýenga ndoñe tšabá quemochátoyebuambnaye ché tšabe benachama, ché ndegombre soyéngaca benache jtishachama. ³ Chénga bétšá crocénana jtsebmna yapa mochántseboše causa, ba bostero soyéngaca cmochántsangñaye; pero Béngbe Bétšá tempo chéngbiama tojánayana, ndoñe tšabá imojtsamama y chéngbiama castigo nyétsca tescama chaotsemnánna.

⁴ Béngbe Bétšá ché bacna soyénga tmojanma angeléngbioye ndoñe tonjanaperdoná, ndayá infernoye tojtsanatsatše y puerta ibetiñe tojtsanabáshejuana, ché uabouana tboca chamoquedama, Béngbe Bétšá chéngbiama nyétsca tescama castigo chamotsebmna yochjayana orscama. ⁵ Y cach ndoñe quem laurentša entšángbioye tonjanaperdoná Noé yojéftsiyena ora, y chénga jácastigama aíñe tojanma ché uabouana uaftena chéngbeñe chaotsemnana, ché nduauenana y bacna entšanga jtsapochócama. Chentšana, nye Noébioye, tbojanatsbocá, nda entšanga yojanabuayiná ntšamo jtsiyenana, Béngbe Bétšabe bomínýiñe tšabá yomncá jtsamése; cha y inye canýséftangnaca tojanatsebacá. ⁶ Bayté entsemna, Béngbe Bétšánaca tojánayana ché Sodoma y Gomorra bétš poblentša entšanga, yapa bacna entšanga imojamna, bétš castigo jtsebmna yojánamna; y íñesheca tojtsanapochocá, ché poblénga y chentša entšanga jatinyá jtsabiaméntscuana. Y ché sóyeca Béngbe Bétšá tojaninýanýé ntšamo bacna entšángaftaca yochjama, ché chentšana mochtsiyena bacna entšángbiama. ⁷ Pero Béngbe Bétšá Lótbioye tbojanatsbocá, ché bétš poblénga pochócaýentšana. Cha yojamna Béngbe Bétšabe bomínýiñe tšabá amá, y ntšamo ché laurentša entšanga imojaniyenama, nyétsca bacna soye jtsamése, jenomándama ntobencá, cha puerta ngménana inabomna. ⁸ Er quem tšabe entšá, chéngbeñe oyená, ché entšanga imojtsama bacna soyénga cada te yojanonýaye y yojanuenana ora, puerta chabe tšabe ainaniñe inasufrina.

⁹ Chca, Béngbe Utabná endobena ché Béngbe Bétšábioye adórayénga játsebacana padecena soyénguentšana y bacna soyénga jamama juabnénguentšana, y ché bacna soyénga jamama uamanéngna castigánénga jtsabamna, ché ntšamo chénga imojaniyenéntscuana imojanamcá ndoñe tšabá yonjamna ca Béngbe Bétšá yochjayana tescama, y chénga nyétsca tescama ché bétš castigo chamotsebmna jamándama. ¹⁰ Chca ndegombre endmèna, y más ché ndémuanýenga nye cachéngbe cuerpéngama bacna juabnéngaca jtsamése imoyenéngbiama, chénga ché Béngbe Utabnabe mando jtsaboténana. Chénga bacá buátsenanénga mondémèna y jtsebošana nye ntšamo cachénga tmojtsejuabnacá chaotsemnana, y ndoñe ntsuatjana ché espíriténga obenana bomnéngbiama puerta bacna soyénga jtsóyebuambnayama. ¹¹ Chamna ché angelénga, masque más añemo y obenana bomnénga

mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmeña mo tja bayëngcá, soyënga tšabá josértama juabna ndbomnënga; chënga jtsiyenana nye ntšamo tojtsebiona y tmojtsebošcá, y chënga jónyñana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

¹³ Chënga mochanjasúfria, ínÿyënga chamosufrima tmojama causa. Chëngbe oyejuayana endmëna nye chora chënga tšabá jtsemnana soyënga. Tšëngaftangftaca cánÿiñe mo ošbuachiyëngcá tmojttesá ora, tšëngaftangbiana ouatjá jtsemnana y chëngbe causa, ínÿyënga tšëngaftangbiana podessa mochántsicahmo, er chënga chentse oyejuayënga jtsemnana, nye chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbiöye jtsaíngñase.

¹⁴ Chënga ndoñe ntsoobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nye batsá ošbuáchiyana bomnënga jtsaíngñayana, y sempre jtsentšénana nye más soyënga jésebošama y jésebonnana, ínÿyënga tmobomnana más soyënga jashjáchama; chënga montsemna pochocánënga jtsemnana. ¹⁵ Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juacánama ínÿyëngbiana bacna soyënga jtsamëse; ¹⁶ y Bëngbe Bëtsá, chábiöye chabe bacna soyëngama tbojanácana, cachabe asno chábiöye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

¹⁷ Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsooservénana, y chca, chënga jtsemnana mo búyeshe obocantšë tojtsebuashjá; y chënga mora canÿe soye jtsejuabnayana y chentšana ínÿetšá; chca chënga jtsemnana mo jantšetëshënga bëts bínÿiaca bonjnëshëngcá. Chëngbiana Bëngbe Bëtsá tojayana castigo chamotsebonnana, chë más ibetoca, tondaye binÿiñe luarentšë.

¹⁸ Chënga ba botamana palabréngaca jtsenábotamnyana, pero tondayama ntsooservénana; y chë cabá mora Jesucristbeñe tmojtsošbuachëngbiöye jtsaíngñayama, chënga ntšamo chëngbe enutënga Bëngbe Bëtsábiöye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbiöye jáÿenjanase, nye cachënga tšabá jtsomñama bacna juabnéngaca soyënga chamotsamama, cachënga jenomándama ntsoencá.

¹⁹ Chë abuátambayënga jašebuachenana tšabe vida jónÿenama, nye ntšamo chënga tmojtsebošcá jtsejuabnayëse y jtsamëse; pero cachënga mondoyena cachëngbe bacna juabnéngaca mandánënga, y chca, chënga montsajna pochocánënga jtsemnana, er ndaye entšánaca mandaná jtsemnana, chë nÿets tempo tobedecena sóyeca. ²⁰ Er ndëmuanÿyënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nye quem luarama enójuabnaye entšangcá, nÿetsca bacna soye amana y tša bacna juabnénga ainaniñe bomnana, pero mora cachiñe chë soyënguñe tmojtésajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana. ²¹ Chëngbiana más tšabá manjamna

ndoñe ntjobenayana jtsetatšëmbuana ntšamo Bëngbe Bëtsabe bominiñe tšabá yomncá inétsamama, chë soye jatabuátmanana y chentšana játabanana chë buatëmbana soyënga y chë abuyiynayëngaftaca chëngbiöye Bëngbe Bëtsá tojanoyé mandënga jtsoebedecénana. ²² Pero chëngaftaca tojopasá ntšamo entšanga mondëntšayancá chca ndegombre bëtsemnana: “Chë queše chabe ashconánana tojtsemnoye jeshhéconana ca” y “chë cotše cabá chora bebená, ngüichetsoye jana jetsójuanduoyama ca”.

3

Jesucristo quem luaroye jésabama ora

¹ Jesucristibeyeca atšbe bonshana catšátanga, móraca ya uta soyama chbontsëbuabianná. Quem uta tsubanáchaca atšbe sënjábošena jamama tšëngaftangbe juabna nýe ena tšabe soyëngaca chaotsemnana, y chca chaotsemnamna atšbe jtsabuayiynayëse chë tcmojanabuatambá soyëngama. ² Atšbe sëntseboše tšëngaftanga chašmotsenuabná, ntšamo chë inýe tempënga ora, chë nýe Bëngbe Bëtsábioye jtsoservénëse, chabe juabna oyebuambnyënga tmojanayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

³ Pero masna quem soye chacmotsësertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nýe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchemá. ⁴ Chënga mëntšá mochántsiichamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentšë cha yojtsemna? Bëngbe bëtšëtsanga, ndëmuanyëngbiöye cha tojanašebuachená quem luaroye jésabama, ya tmonjóbana, y quem luarentšë lempe cachcá endesomñe, ntšamo quem luare tojanobojatšë orscana enjamncá ca.” ⁵ Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnana. Cha quem luare tojanma býeshentšana y býeshëca; ⁶ y cach býeshëcnaca, chë uabouana uaftenentšá béjayeaca, ya bayté yojtsemna, cha lempe quem luarentšë yojanbinýncá tojtsanpochocá. ⁷ Pero chë mora entsemna celoca y quem luare, cach Bëngbe Bëtsabe mándoca, ndoñe quenátópodena chamotsepochochama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnana, y chë bacna soyënga tmojamama nýetsca tescama castigo chamotsebonnana jamándama tempo candóshjanguëntscuana. Chora Bëngbe Bëtsá, celoca y quem luare iñeshëca echantsepochochá.

⁸ Pero, atšbe bonshánënga, canýe soye endmëna y chë soye ndoñe chacmondëbnëtjomba: Bëngbe Utabnabe juabnama, canýe te endmëna mo canýe uaranga uatcá, y canýe uaranga uata mo canýe tecá. ⁹ Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betesco yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nýetsca tescama castigo chaondëtsebonnana, ndayá nýetscana bacna soyënga amana jt-sajbanase, Bëngbe Bëtsabe tšabe benache chamuashjáchama.

¹⁰ Pero Bëngbe Utabná echanjésabo ndocná chama chaondëtsejuabná ora, mo canýe atbëbanacá jashjanguana, ndocná chama tontsejuabná ora. Chora celoca echanjopochóca, canýe jabuache shauenánanaca, y quem luare ndaye

soyënguentsana yomnana ñesheca echántsefjatëjo, y ndayá Bëngbe Bëtsá y entšanga quem luarentse tmojamcá, lempe echántsejuinë.

¹¹ Lempe chca japochócama entsémnyeca, ndegombre tsëngaftanga cmontsamna jtsiyenana ntšamo chë Bëngbe Bëtsabe entšanga jtsiyenana entsamncá, y nyets tempo jtsamëse chë Bëngbe Bëtsábioye jtsatschuanayama yomna soyënga, ¹² tsëngaftanga chë Jesucristo quem luaroye jésabama chaóshjanguama šmojtsobátmanëntscuana; y nÿa šmochtsentsëna cha más betso cháuesabama. Chë te ñesheca celoca echántsejuinë, y ndaye soyënguentsana quem luare yomnana cach ñesheca echántsefjatëjo. ¹³ Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nyetscanga mochantsiyena ntšamo Bëngbe Bëtsabe bominÿiñe tsábá yomncá jtsamëse.

¹⁴ Chiyeca, atšbe bonshánënga, chë soyënga chaotsemnama šmojtsobátmanëntscuana, nÿa chiñe šmochtsentsëna, chca, cha yochjésabo ora, chacmanÿena oyeniñe tsábá Bëngbe Bëtsáftaca jtsatsmënëse, ínÿengaftaca natjëmbana jtsiyenëse; chacmanÿena ainaniñe ndocna bacna soye ndbomnënga, y puerte tsábá jtsamëse oyeniñe; chca, ndocná chaondobená jayanama tsëngaftanga ndaye bacna soye šmojama ca. ¹⁵ Quem soye šmochtsejuabnaye: Bëngbe Atsebacayá ndoñe yapa betso tonjésabësna, chca jtsemnana cha puerte uantado nyetscángaftaca yómnyeca; chca cha yomna, ba entšanga chë bacna soyënga amana chámajbanama y chabe benache chámuatishachama y chca, atsebácánënga chamotsemnama. Cach quem soyëngámncá, Jesucristbeyeca bëngbe bonshana catšata Pablo tcmonjanëbuábiana, chë Bëngbe Bëtsá tojanma cha chaotsebomnama osertanánaca. ¹⁶ Chë soyëngama, Pablo nyetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana inÿetsá juabnayënga, jtsejuabnayana y ínÿengbioye jtsabuayiynayana ndoñe ndegombre yondmëna ca. Y cachcá jtsamana inÿe soyëngaca, Bëngbe Bëtsabe uabemana palabrënguinë. Chca chënga montsajna pochocánënga jtsemnama.

¹⁷ Chiyeca, atšbe bonshánënga, tsëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ínÿënga jáingñama, tsëngaftanga ndoñe chašmondëtsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. ¹⁸ Pero atšna, Bëngbe Utabná y Atsebacayá Jesucristo sëntseimpadana, tsëngaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tsëngaftanga cada te más tsábá cha chašmotsábuatmama. ¡Nyetscanga cha chamotsatschuaná, mora y nyetsca tescama! Chca chaotsemna.

1 San Juan

Cristo, chë nyetsca tescama yomna tšabe vida entsanga chamotsebomnama amá

¹ Bënga cbontsëbuabiamná chë Bëngbe Bëtsá ndabiajana inétsoyebuambnabiama, chë nyetsca tescama yomna tšabe vida entsanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuašëngaca chabe oyebuambnayana fsënjouena y bëngbe bominyëca cha tonjama soyënga fsënjinyë. Aíñe bënga cha fsënjinyë y bëngbe cucuátseca fsënjábojajo. ² Cha bëngbentše tonjanonýná y fsënjáninyë; chíyeca bënga chabiama cbontsëtsësná y cbontsabuayiyná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyé. ³ Bënga tšëngaftanga cbontsabuayiyná ntšamo tifjinyë y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiná Jesucristoftaca. ⁴ Bënga quem soyënga tšëngaftanga cbontsëbuabiamná, bëngbe oyejuayana corente bëtsá chaotsemnama.

Bëngbe Bëtsá endmëna chë entsangbiama binýnayá

⁵ Mëntšá entsemna ntšamo Jesucristbentšana tifjouencá y chca tšëngaftanga cbontsabuayiyná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. ⁶ Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷ Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiná Jesucristbe uabuáshana buíñeca, Bëngbe Bëtsá bëngbe bacna soyënga sempre šochántsabuanayey, y echanjama bënga chabe delante tšabá chamotsatsmëna.

⁸ Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe; ⁹ pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyey cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonayey y nyetsca bacna soyënga šochanjábuajuanayey. ¹⁰ Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga sojauyancá ainaniñe ndoñe tmonjóyëngacñe.

2

Cristo, bëngbe obuauyayá

¹ Tšëngaftanga mo atšbe basengcá, er atše tcbonjanëjabuache Jesucristbe tšabe noticiënguiñe chašmotsošbuáchemá, quem soyënga cbontsëbuabiamná bacna soyënga ndoñe chašmondétsamama. Pero ndánaca Crístbeñe

osbuachiyënguentsá bacna soye tojamëse, bënga canye obuauyayá Bëngbe Bëtsabe delante montsebmna, y cha endmëna Jesucristo, chë nyetsca soyënguine tšabá amá. ² Jesucristo tonjanóbana ndoñe nye Bëngbe Bëtsá bënga chásuaperdonama bëngbe bacna soyëngama, ndayá quem luarentša nyetsca entságnaca chëngbe bacna soyëngama cháuaperdonama.

³ Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. ⁴ Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. ⁵ Pero nda ntšamo Bëngbe Bëtsá ibuamëndacá tojtsama, jtsinýanýnáyana chabe ainaniñe Bëngbe Bëtsabiama corenta bonshánana yomnama, y chca, mochántsetatšëmbo bënga sempre cánýiñe mo canýacá cháftaca imomnama. ⁶ Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

Canye tsëm mando

⁷ Atšbe bonshana entsanga, ntšamo mora chontsëbuabiamnacá, ndoñe canye tsëm mando quenátsmëna, pero añe canye tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga bëngbentsána šmonjouencá. ⁸ Pero masque chca endmënëse, quem chontsëbuabiamná soye tsëngaftangbiama echántsemna mo canye tsëm mandcá. Cristo enjëftsiyena ntšamo quem Bëngbe Bëtsabe mando ndegombre yomncá y tsëngaftágnaca cachcá šmondoyena, er chë bacna juabnënga jtsebmñëse mo ibetiñcá jtsiyenana tempo ya echanjochnëngo, y chë entsangbe juabna ndegombre binýnáyá ya entsebuashinýinýana.

⁹ Nda tojayana chë binýnáyáftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebmñëse yojtsiyena, mo ibetiñcá. ¹⁰ Nda chabe catšátbioye tbojtsebbonshana, cha chë binýnáyáftaca jtsiyenana, y tondaye queochátsmëna cha bacna soye chaotsamama. ¹¹ Pero nda chabe catšátbioye tbojtsáboyënja, cha bacna juabnënga jtsebmñëse jtsiyenana, mo canya ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebmñëse jtsiyenana chábioye ndoñe ntjalesénciana ntšamo tšabá yomncá chaotsamama.

¹² Básenga, atše chontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. ¹³ Taitanga, tsëngaftanga chontsëbuabiamná, er tsëngaftanga ya šmonjuábuatmana chë quem luare jobojátsama orscana ya inamná. Tsëngaftanga bobontsëgnaca cbontsëbuabiamná, er tsëngaftanga ya chë nyetsca bacna soyënga mandayá Satanás šmonjayëñjaná.

¹⁴ Básenga, tsëngaftanga tconjubuábiana, er tsëngaftanga chë Taitá ya šmonjuábuatmana. Taitanga, tsëngaftanga tconjubuábiana, er tsëngaftanga ya šmonjuábuatmana chë quem luare jobojátsama orscana ya inamná. Bobontsënga, tsëngaftágnaca tconjubuábiana, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nyetsca bacna soyënga mandayá šmonjayëñjaná.

¹⁵ Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebomnama. Nda yapa tojtseboše quem luarentša bacna soyënga jtsebomnama, cha ndoñe chë Taitábioye bondbobonshana. ¹⁶ Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebomnama ntšamo chë ainaniñe bacna juabnënga bomnënga mondbetsebošá; yapa jtsebošana nÿe ndayá tmojátinÿe soye; y yapa jtšenábotamnyana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentsána. ¹⁷ Pero quem luare echanjopochóca y nÿetsca chentša soyënga, chë entsanga bacna juabnëngaca yapa imoboše jtsebomnama soyëngnaca. Pero nda ntšamo Bëngbe Bëtsá yobošcá tojtsama, cha chë nÿetsca tescama yomna tšabe vida echántsebomna.

Chë Cristbe contra yomná

¹⁸ Básenga, quem luare jopochócama tempo ya entsobeco. Ntšamo tšëngaftanga šmonjouená, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. ¹⁹ Chënga cach bëngbentsána tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nÿetscanga ndoñe mondošbuáchema.

²⁰ Pero Cristo, chë Uamaná, tšëngaftanga tmonjabacacá, y cha tonjama chë Uamana Espiritu tšëngaftangbe ainaniñe cháumashënguama; y nÿetsca tšëngaftanga chë ndegombre soyënga šmondëtatšëmbo. ²¹ Atše cbontsëbuabimná, ndoñe chë ndegombre soyëngama ndoñe šmondëtatšëmbuama, ndayá aiñe šmotatšëmbuama; er tšëngaftanga šmondëtatšëmbo chë ndegombre soyënga y ndoñe ndegombre soyënga cánÿiñe jtsemnana ndoñe yondopodénama. ²² Nda tojayana Jesús chë Bëngbe Bëtsabe Uamana Uabuyaná, chë Cristo ndoñe yondmëna ca, chana jtsebosterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiama ndoñe ntsejuabnayana cha chë Taitá bëtsemnana. ²³ Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánÿiñe mo canÿacá ndoñe ntsemnana. Pero nda entšangbeñe tojayana, Cristo aiñe Bëngbe Bëtsabe Uaquiñá endmëna ca, chana aiñe chë Taitáftaca cánÿiñe mo canÿacá jtsemnana.

²⁴ Tšëngaftanga, chë Cristbe ústonënga šmojanóbiamama orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánÿiñe mo canÿacá šmochántsemna. ²⁵ Y quem soye entsemna ntšamo Cristo sojëftsasëbuachená: chë nÿetsca tescama yomna tšabe vida jtsebomnana.

²⁶ Atše chca cbontsëbuabimná, chë tšëngaftanga jáingñayama imojsebošëngbiamama chašmotsetatšëmbuama. ²⁷ Pero Cristo tcmojanabacacá ora, Uamana Espiritu šmojanóyëngacñe, y mora tšëngaftangbe ainaniñe Uamana Espiritu šmontsebomna, y ndoñe quenátsiyta ndocná más chacmotsabuátambama, er chë Uamana Espiritu lempe cmontsabuatambá; y

cha endabuatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabuatambacá jtsiyenëse, Crístoftaca cánýiñe mo canýacá šmochtsemna.

²⁸ Y mora básenga, Crístoftaca cánýiñe mo canýacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. ²⁹ Tšëngaftanga šmontsetátšëmbo Jesucristo nyëtsca soyënguifne tšabá amá yomnana. Chcasna, cmontsamna jtsetatšëmbuana, nyëtscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

3

Crístbeñe ošbuáchiyënga, Bëngbe Bëtsabe básenga

¹ Menójuabonga, ntsachetsá Bëngbe Bëtsá chë Taitá šondábabuanýeshanama. Chabe bonshánana tša bëtscá endmënayeca, bënga šondëubuabuatma chabe básenga ca, y ndegombre bënga chca mondëmna. Chë causa chë nýe quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana. ² Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnana, aifne mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinýama ntšamo cha ndegombre yomncá. ³ Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

⁴ Pero nda bacna soye tojama, chana ntšamo Bëngbe Bëtsá tojéftsemandacá jtsaboténana; er bacna soye jamana endmëna, jtsabotena ntšamo Bëngbe Bëtsá tojéftsemandacá. ⁵ Tšëngaftanga ya šmondëtatšëmbo Jesucristo quem luaroje tojánabo bëngbe bacna soyënga jabëtsabuajuanama, y cha ni mo canýe bacna soye ndoñe yondbomnana. ⁶ Chcasna, nda cánýiñe mo canýacá cháftaca nyëts tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnana. ⁷ Atšbe básenga, ndocná chacmondaingñé: nda nyëtsca soyënguifne tšabá tojtsama, cha canýe tšabá mándbomna entšá jtsemnana, ntšamo Jesucristo yomncá; ⁸ pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nýa quem soyama tojabo: chë Satanásbe soyënga jabëtsepochochama.

⁹ Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. ¹⁰ Corente jtsoatšëmbuana ndëmuanýenga Bëngbe Bëtsabe básenga imomnana y ndëmuanýenga Satanásbe básenga; ndëmuanýëngnaca ntšamo tšabá yomncá ndoñe tmontsama o chabe catšata ndoñe tmontsebobonshana, ndoñe ntsemnana Bëngbe Bëtsabe básenga.

Nýetscanga jtsenbobonshánana

¹¹ Quem buayenana entsemna ntšamo tšëngaftanga šmojanuena, tšëngaftanga Crístbe ústonënga šmonjanobiana orscana: nyëtscanga

šontsamna jtsebomshánama. ¹²Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábíoye tbojtsanóba. ¿Y ndáyeca tbojtsanóba? Cha ndoñe tsabá yonjánama; chabe uabentsana añe; chíyeca tbojtsanóba.

¹³Jesucristbeyeca atšbe catsátanga, ndoñe šmattsenjnanaye chë nýe quem luarama enójuabnayënga cmojtsébuayënjama. ¹⁴Bënga mondétatsëmbo, bënga tempo monjaníyena chë nýe quem luarama enójuabnayënga mon-doyencá, y chca, Bëngbe Bëtsabíama mo obanëngcá monjamna, er bënga monjaníyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondétatsëmbo, er bënga bëngbe catsátangbíoye mondábuanýeshana. Nda chabe catsátbíoye ndoñe tñontsebomnana, cha cabá mo obanacá jtseyenana. ¹⁵Nda cachabe catsátbíoye tbojtsábóyënja, cha jtsemnana mo entšanga obanayacá. Y tsëngaftanga šmondétatsëmbo entšanga obanayá ndoñe ntsoberenana jtseyenana, chë nýetsca tescama yomna tsabe vida chabe ainaniñe jtsebomñese.

¹⁶Ndayá chë jtsebomshánana bëtsemnana mëntšá montsetatsëmbo: Jesucristo chabe derecho vida jtsebomñama cachcá tojanonýa y bëngbíama tojanóba; cachcá bënga šontsamna jtsemnana, sempre jtseprontánana chë Jesucristbeyeca bëngbe catsátangbíama jóbanama. ¹⁷Canýa bomnana tojtsebomna y catsátbíoye uajabotá tbojtsonýa, pero chabíama ndoñe tñon-jongmé y ndoñe tñonjuájabuache, cha ndoñe ntsoberenana Bëngbe Bëtsabíama ainaniñe bonshánana jtsebomnana. ¹⁸Atšbe básenga, ndoñe quešnátamna nýe bëngbe catsátanga imuababuánýeshana ca jatichámuana, y nýe chë bonshánama jatóyebuambnayana; pero ndegombre šontsamna ndayánaca jamana, chca, jinýañíyama, bënga ndegombre inýengbíama imuababuánýeshanama.

Bëngbe Bëtsabe delante natjëmbana ainánaca entšanga

¹⁹Chcaxe bënga mochántsetatsëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemocháténocochinýena, Bëngbe Bëtsábíoca jtsemnana merecido ndoñe mondbuájona ca tmojtsejuabná ora; y bëngbe ainana natjëmbana Bëngbe Bëtsabe delante echántsemna. ²⁰Bënga chca bëngbe ainaniñe tmojtsejuabná ora, bënga montsobena natjëmbana ainana jtsebomnana, er Bëngbe Bëtsá corente jt-sotatsëmbñana ntšamo bëngbe ainana yomnana, y cha lempe yotátšëmbo. ²¹Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsoberenana añémoca jtsemnana y tondayama ntsauatjácá Bëngbe Bëtsabe delante jtsemnana. ²²Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibumandacá y ndayá chabe bominiñe tsabá yomncá. ²³Y chabe mando endmëna: bënga chabe Uaquiñá Jesucristbeñe jtsošbuáchíyana, y bënga nýetscanga jtsebomshánana ntšamo Jesús šojëftsamëndacá. ²⁴Ntšamo Bëngbe Bëtsá tojëftsemmandacá amënga, Bëngbe Bëtsáftaca cánýiñe mo canýacá jtsemnana, y cha sempre chëngaftaca cánýiñe mo canýacá echanjëftsemna. Y quem sóyeca bënga montsobena jtsetatsëmbuana cha bëngaftaca iuétsemnana: Uámana Espíritu bëngbe ainaniñe cháumashënguama cha tojama.

4

Chë Bëngbe Bëtsabe Espíritu y chë Cristbe uayayabe espíritu

¹ Atsbe bonshana entsanga, n̄yetscanga ch̄ B̄ngbe B̄tsabe juábnaca imoyebuambná ca ichám̄ngbiye ndoñe šmattsayaunana; botamana šmochjuarrepára corente jtsetats̄mbuama ch̄nga aĩñe o ndoñe ch̄ B̄ngbe B̄tsabe juábnaca imóyebuambnama. Quem tempo banga B̄ngbe B̄tsabe ndoñe ndegombre juabna oyeubuambnaȳnga quem luar̄jana mondajna. Ch̄ causa ts̄ngaftanga cmontsamna botamana ch̄ngbiana juarrepára. ² Ch̄ B̄ngbe B̄tsabe Esp̄ritu ndegombre imobom̄ngbiana ts̄ngaftanga m̄ntsá šmotsobena jtsetats̄mbuana: nda tojayana Jesucristo quem luaroye aĩñe entsacá tojánabo ca, cha ndegombre ch̄ B̄ngbe B̄tsabe Esp̄ritu yojtsebomna. ³ Pero nda ndoñe chca Jesucristbiana tonjayana, cha B̄ngbe B̄tsabe Esp̄ritu ndoñe yontsebomna; in̄yetsá, chana ch̄ Cristbe contra yomnabe esp̄ritu yojtsebomna. Ts̄ngaftanga šmojouena ch̄ esp̄ritu yochjabama; pero ndegombre cha ya quem luarentse emsemna.

⁴ Atsbe básenga, ts̄ngaftanga B̄ngbe B̄tsábenga šmondm̄na y ndoñe šmonjalesenciá ch̄ B̄ngbe B̄tsabe ndoñe ndegombre juabna oyeubuambnaȳnga ts̄ngaftangbiye chacmaingñema, er ch̄ n̄yets tempo ts̄ngaftangbe ainaniñe vida endbomná, ch̄ n̄ye quem luarama enójuabnaȳngbe ainaniñe mándayabiana más obená endm̄na. ⁵ Ch̄ B̄ngbe B̄tsabe ndoñe ndegombre juabna oyeubuambnaȳngna ch̄ n̄ye quem luarama enójuabnaȳnguentšana mondm̄na, chíyeca ch̄nga n̄ye quem luarentsa soȳngama jtsóyebuambnayana, y ch̄ n̄ye quem luarama enójuabnaȳnga ch̄nga jtsayaunanana. ⁶ Pero b̄nga B̄ngbe B̄tsábenga mondm̄na. Nda B̄ngbe B̄tsábioye tbojtsabuatma, b̄ngbiye jtsayaunanana; pero nda B̄ngbe B̄tsábioye ndoñe tbojtsabuatma, cha b̄nga ndoñe ntsayaunanana. Chiñe b̄nga montsobena jtsetats̄mbuana nda ch̄ ndegombre soȳnga jóyebuambayama ama esp̄ritu yobomnabiana, y nda ch̄ in̄yengbiye jáingñama ama esp̄ritu yobomnabiámna.

Ch̄ bonshánana B̄ngbe B̄tsábiocana yóbocana

⁷ Atsbe bonshana entsanga, ch̄ bonshánana B̄ngbe B̄tsábiocana endóbocana; chcase, b̄nga šontsamna n̄yetscanga jtsenbobonshánana. Nda B̄ngbe B̄tsábioye y ch̄ in̄yē entsángbiye tojtsababuán̄yeshana, cha B̄ngbe B̄tsabe uaquiñá jtsemnana y B̄ngbe B̄tsábioye jtsabuatmana. ⁸ Nda ndoñe chca tontsebobonshana, cha B̄ngbe B̄tsábioye ndoñe ntsábuatmana, er B̄ngbe B̄tsá bonshanánaca n̄yetsca soȳnga jamana. ⁹ B̄ngbe B̄tsá šonjin̄yan̄yē b̄nga suababuán̄yeshanana, cha ch̄ n̄ye can̄ye Uaquiñá ibobomná quem luaroye jíchmuase; cha tbojanichmó, b̄nga chábeyeca ch̄ n̄yetsca tescama yomna ts̄abe vida chamotsebomna. ¹⁰ B̄ngbe B̄tsabe bonshánana m̄ntsá endm̄na: ndoñe quenátsm̄na b̄nga B̄ngbe B̄tsá imobobonshánayeca, ndayá cha b̄nga šojánababuan̄yeshanayeca, y chabe Uaquiñá tbojanichmó, cha jóban̄ese, b̄nga b̄ngbe bacna soȳngama perdonán̄nga chamotsemnana.

¹¹ Atsbe bonshana entsanga, B̄ngbe B̄tsá chca suababuán̄yeshana; chcasna, b̄ngnaca šontsamna n̄yetscanga jtsenbobonshánana. ¹² Ndocná ndocna te B̄ngbe B̄tsábioye tbojin̄yē. B̄nga n̄yetscanga tmojtsenbobonshán̄ese, B̄ngbe B̄tsá n̄yets tempo b̄ngaftaca echántsemna, y chabe bonshánana puerta b̄tsacá b̄ngbeñe echántsemna. ¹³ B̄nga m̄ntsá montsobena ndegombre jtsetats̄mbuana b̄nga B̄ngbe B̄tsáftaca imomnana y cha b̄ngaftaca: cha tonjanma chabe Esp̄ritu b̄ngbe ainaniñe

cháuamashēnguama. ¹⁴ Y cach bēnga fsēnjinye y entšanga fsēntsētsētná, chē Taitá chabe Uaquiñá tbojichmoma, quem luarentša entšanga jabátsebacama. ¹⁵ Nđánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cányiñe echántsemna y Bēngbe Bētsánaca sempre cháftaca cányiñe mo canýacá.

¹⁶ Chcase bēnga montsetátšēmo y montsošbuaché ndegombre Bēngbe Bētsá bēnga šuababuányeshanama. Bēngbe Bētsá nyetsca soyēnga bonshanánaca jamana y nda Bēngbe Bētsá y chē inye entšanga sempre tojtsababuányeshana, cha Bēngbe Bētsáftaca cányiñe mo canýacá jtsemnana y Bēngbe Bētsánaca sempre cháftaca cányiñe mo canýacá. ¹⁷ Chca, Bēngbe Bētsabe bonshánana puerte bētsacá bēngbeñe echántsemna, bēnga bēts añémoca y tondayama ntsauatjá chamotsemnana, chē tsábá o ndoñe tsábá tmonjamama entšangbiana jayanama Cristo yochjésabo orscama; er bēnga Jesucristoftaca cányiñe mo canýacá jtsemnēse, quem luarentše mondmēna ntšamo Jesucristo endmēncá. ¹⁸ Nda Bēngbe Bētsá y chē inye entšanga tojtsababuányeshana, tondayama ntsauatjana; bēnga corente tmojtsebobonshana ora, ndoñe ntšopodénana uatjana jtsebmomna. Canye entsá tojtsauatja ora, jtsemnana mo chabe castigo ya cuafjobojatsecá. Chca, nda uatjana tojtsebmomna, Bēngbe Bētsábioye y chē inye entšanga cha ndoñe corente yondábabuanýeshana, ntšamo Bēngbe Bētsá bēnga šuababuanýeshancá.

¹⁹ Natsana Bēngbe Bētsá šojánababuanýeshana, y chíyeca bēnga, cha y chē inye entšanga imuababuányeshana. ²⁰ Nda tojayana: “Atše Bēngbe Bētsábioye sēndbobonshana ca”, pero cachca ora cachabe catšátbioye tbojtsáboyēnja, cha canye bostero jtsemnana. Canya aíñe jtšobenana chabe catšata jinýama; y cha chē catšátbioye ndoñe tšontsebobonshana, ndegombre cha Bēngbe Bētsábioye ndoñe bondbobonshana, ndábioye jinýama ndoñe ntšobenana. ²¹ Y bēnga quem mando chábensana tmonjanóyēngacñe: nda Bēngbe Bētsábioye tbojtsebobonshana, cachabe catšátbioynaca chabotsebobonshana ca.

5

Chē Jesucristbeñe ošbuachiyá endobena Satanasbe soyēnga jayēnjanana

¹ Nda tojtssošbuaché Jesús chē Uámana Uabuayaná, chē Cristo yomnama, cha Bēngbe Bētsabe uaquiñá jtsemnana; y nda canye taitábioye tbojtsebobonshana, chē taitabe uaquiñábioynaca cha jtsebobonshánana. ² Bēnga Bēngbe Bētsá tmojtsebobonshana y ntšamo cha tojsemandacá tmojtsamēse, bēnga ndegombre mochántsetatšēmo, chē Bēngbe Bētsabe basengbioynaca bēnga imuababuányeshanama. ³ Bēnga Bēngbe Bētsábioye imobobonshánama quem soyiñe jtsinýnana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa totcá quenátsmēna bēnga chamotsamama. ⁴ Nda Bēngbe Bētsabe uaquiñá tomna, chana jáyēnjanana quem luarentša entšanga y soyēnga ntšamo Satanas yomandacá. Quem luarentša entšanga y soyēnga ntšamo Satanas yomandacá, Cristbeñe bēnga imošbuachéyeca montsobena bēnga jayēnjanana. ⁵ Nyē nda, Jesús Bēngbe Bētsabe Uaquiñá yomnama tojtssošbuaché, cha jtšobenana chē entšanga y soyēnga ntšamo Satanas yomandacá jayēnjanana; ndocná más.

Bēngbe Bētsá tojinýanyé ntšamo chabe Uaquiñabiana ndegombre yomncá

⁶ Cach Jesucristo endmēna nda quem luaroye tojánabo y mēntšá tojanenonýinyé: búyeshca cha tmojanabayē ora, y buiñe juabuáshanēse cha

tonjanóbana ora. Cha ndoñe tonjanenonjinyé nye búyesheca, ndayá búyesheca y buñeca. Cach Uámana Espíritu entsobena jayanana chca ndegombre bétsemnana Jesusbiana, er chë Espíritu endmëna chë sempre ndegombre oyebuambnayá. ⁷ Endmëna unga soyënga, ndayá iuinjanyá ntšamo ndegombre yomná Jesusbiana: ⁸ Espíritu, búyeshé y buñe; y chë unga soyënga lempe cachá Jesusbiana jtsinjanayana. ⁹ Bënga mondbétsejuabnaye, ndayá entšanga tmojinje ca tmojsichámuama mo ndegombre cuaftsemná, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. ¹⁰ Nda Bëngbe Bëtsabe Uaquiñabeñe tojtošbuaché, cha chca nyets tempo chabe ainaniñe jtsejuabnayana; nda Bëngbe Bëtsabeñe ndoñe tontsošbuaché, cha chca jtsamana mo Bëngbe Bëtsá canye bostero cuaftsemná, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca. ¹¹ Ntšamo Bëngbe Bëtsá chabe Uaquiñabiama tojayancá mëntšá entsemna: Bëngbe Bëtsá bëngbiama tojama chë nyetsca tescama yomna tšabe vida chamotsebojnana; y quem vida chabe Uaquiñabeñe entsemna. ¹² Nda Bëngbe Bëtsabe Uaquiñáftaca cányiñe mo canyáca tojtsemna, cha chë tšabe vídnaca jtsebojnana; pero nda chë Bëngbe Bëtsabe Uaquiñáftaca cányiñe mo canyáca ndoñe tontsemna, cha chë nyetsca tescama yomna tšabe vida ndoñe ntsebojnana ca.

Inje soyëngama jábuayenama y jtadiósoftanama

¹³ Tsëngaftanga, chë Bëngbe Bëtsabe Uaquiñabeñe šmošbuachëngbiye quem soyënga cbontsëbuabianná, ndegombre chašmotsetatšëmbuama chë nyetsca tescama yomna tšabe vida šmojtsebojnana.

¹⁴ Bënga bëts añémoca y ndauatjá Bëngbe Bëtsabe delante mondmëna, er bënga mondtatšëmbo, nderado ntšamo chaotsemnana cha tojtsebošcá bënga tmojtjañe ora, cha bënga šnétsayaunanama. ¹⁵ Nderado ndayá chca Bëngbe Bëtsábioye tmojtsotjanañe ora, cha bënga joyaunayana; bënga mondtatšëmbo chca ndegombre yomnana, y chca, bëngnaca montsetatšëmbo, ndayánaca chábioye bënga chamojtjañcá cha šochjátatayama.

¹⁶ Nda cachabe catšátbioye tbojinje canye bacna soye tojtsamama, pero chë bacna soye tojamentšana cha perdonaná jtsemnana cabá tojtsopodënese, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catsata chë nyetsca tescama yomna tšabe vida chaotsebojnana, cha chca tojamentšana perdonaná jtsemnana cabá tojtsopodënese. Pero canye bacna soye endmëna, y chca tojamama canya ndoñe ntsoebenana perdonaná jtsemnana, y chca, cha jabocnana canya nyetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpádánana chaboperdonama ca. ¹⁷ Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nyetsca bacna soyënga ntšamo canya tojtsamcá, ndoñe ntjamana cha ndëperdonaná chaotsemnana.

¹⁸ Bënga mondtatšëmbo, nda Bëngbe Bëtsábioye mo taitacá tbojtsebojna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onjnaná chábioye jtsinjenana, y Satanás, chë nyetsca bacna soyënga amëndayá, tondaye ntsoebenana chábioye jabórlana. ¹⁹ Bënga mondtatšëmbo, bënga chë Crístbeñe ošbuáchiyënga Bëngbe Bëtsábënga imomnana, y chë quem

luarentša inŷe entšanga Satanasbe cucuatšiñe imomnama. ²⁰ Běgnaca mondětatsěmbo Běngbe Bětsabe Uaquiñá tojabama, y cha iuama bėnga osertánana chamotsebomnama, chě ndegombre Běngbe Bětsá yomná jtsabuatmama. Bėnga chě ndegombráftaca cánŷiñe mo canŷacá mondmėna, bėnga chabe Uaquiñáftaca cánŷiñe bėtsemnayeca. Cha chě ndegombre Běngbe Bětsá endmėna, y nda chě nŷetsca tescama yomna tšabe vida entšanga chamotsebomnama iuamá. ²¹ Atšbe básenga, ndoñe šmattsadorana cach entšangbe pormana soyėnga, chě ndayama ínŷenga mondbėtsejuabnaye diosėnga yomnaca.

2 San Juan

Jtsiyenana ndegombre soyëngaca y nyëtscanga jtsenbobonshánëse

¹ Atše chë bëtsëjema, quem tsbuanácha sëntsabiámná, chë uámana mamá, chë Bëngbe Bëtsabe bocacáná y chabe basengbiámnaca, ndëmuanyënga atše ndegombre sëndábabuanÿeshana. Y ndoñe nyë atše chënga quetsátababuanÿeshana, ndayá nyëtscanga chë Bëngbe Bëtsabe ndegombre soyënga uabuátmëngnaca.

² Atše cbontsababuanÿeshana, chë ndegombre soyënga bëngbe ainaniñe mondbómnyeyca, y chë soyënga bëngbe ainaniñe sempre echántsemna.

³ Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbiyoe chácmalastemama, y chaboma tsëngaftangbe ainaniñe tsabe ebionana chašmotsebofnama. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

⁴ Puerte sënjoyejuá, er atše acbe básenguëntse básëftanga sënjánÿena chë ndegombre soyënga ntšamo Bëngbe Bëtsá chë Taitá šojamëndacá jtsamëse. ⁵ Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiámná soye ndoñe canÿe tsëm mando quenátsmëna, ndayá cach Cristbe ústonënga tmonjanobiana ora tmonjanóyëngacñe mando. ⁶ Bënga, Bëngbe Bëtsá y chë inÿe entsanga imababuanÿeshanama jtsinÿnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiana ora šmojanuencá, mëntšá endmëna: jtsiyenana Bëngbe Bëtsá y chë inÿe entsanga jtsababuánÿeshanëse.

Chë entsángbiyoe áingñayënga

⁷ Quem luarëjana banga entsángbiyoe áingñayënga mondajna, y chënga jtsejuabnayana Jesucristo quem luaroye ndoñe mo canÿe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. ⁸ Chëngbiama cuedado šmochtsebofnama. Ndoñe chcase, tsëngaftanga ndoñe quešmochátsbofnama chë Cristbiama cach tsëngaftangbe trabajuentsana tojóbozna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbiyoe jatšatayama yojtsebošcá.

⁹ Ndánaca chë Cristo tojanbuatambá soyëngama inÿe soyënga tojatatabu-atambá, cha ndoñe Bëngbe Bëtsáftaca cánÿiñe mo canÿacá ntsemnana; pero nda sempre ntšamo Cristo tojanbuatëmbacá tojtsabu-atambá, cha aíñe chë Taitáftaca y chabe Uaquiñáftaca cánÿiñe mo canÿacá jtsemnana. ¹⁰ Ndánaca tsëngaftangbiyoe tojá jabuátambama, pero ndoñe ndayá Cristo tojanbuatambacá tojtsebuatëmbase, cha ndoñe šmatjofja, ni mo šmatjachuaye. ¹¹ Er nda chábiyoe tbojachuase, chábiyoe jtsajabuáchanana chë bacna soye chaomama.

Jtadiósoftanama

¹² Atše ba soyënga sëntsebofnama tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tsëngaftangbiyoe jama, jobenayama nyëtscánggaftaca jencuéntama, chca, bëngbe oyejuayana puerte bëtscá chaotsemnana.

¹³ Crístbeyeca acbe quenata, chë Bëngbe Bëtsabe bocacáná, chabe básënga cmontsacheuaná.

3 San Juan

Juan Gaybiana puerte tšabá tojanoyebuambá

¹ Atše chë bëtsëjema, quem tsbuanácha atšbe bonshana amigo Gaybiana sentsabiamná. Chábioye atše ndegombre sëndbobonshana.

² Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nýtetsca soyënguifne chacotsemnana y salud bomnánaca. Atše sëntsetatšëmbo aca ainaniñe tšabá cotsomñama, Bëngbe Bëtsabiana bëtscá tšabe juabnënga chentše jtsebomnëse. ³ Er báseftanga Jesucristbeñe ošbuáchiyënga átšbioye tmonjabo y šmonjacentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtscá sëntsoyejuá. ⁴ Tondaye jamana atše nýtšá oyejuayá chaitsemnana, ndayá nýe jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵ Atšbe bonshaná, aca contsama ntšamo Jesucristo tonjanbuatëmbacá, aca chë inýenga Jesucristbeñe ošbuáchiyënga jujabuáchama ndayánaca tcojama ora, y masna, chë inýe luaroquëngocana ashjajnëngbiana ndayánaca tcojtsama ora. ⁶ Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánýeshanama. Diosmanda, ntšamo tojtšëjabotcá chënga cochjújabuache, chca, chënga chamobená tšabá inýe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama mercedo imobuajoncá. ⁷ Chca cochjama, er chënga chëngbe pueblënguentšana tmojëftsehocana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšëntšana. ⁸ Chíyeca bënga šontsamna chëngbiana jtsantješnana y jtsëjabuáchanana, chca, bënga chamobená cánýiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótfes ndoñe tšabá tonjanma; Demetrio aifne

⁹ Atše canýe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiana, pero Diótfes ndoñe yontsuenana ntšamo atše sentsichamcá, er cha yojtseboše chë inýengbioye nýe jtsamëndayana. ¹⁰ Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoinýana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana imnëtsenefjuana luarentšana yojtsatëbuacana.

¹¹ Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnana.

¹² Jesucristbeñe ošbuáchiyënga nyetscanga tšabe soyënga Demetriëbiamá montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëngnaca chabiamá tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

Jadiósoftanama

¹³ Atše ba soyënga sëntsebmna aca jauyanama, pero ndoñe quetsátsboše tsbuanáchañe juábobemana. ¹⁴ Atše sëntsejuabná betso chjobenaye ácbioye jama jauatsëtsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebmna. Quem luarentša amiguënga cmontsechuaná. Diosmanda, bëngbe amiguëngbioye choca cada ona cochjácheuaye.

San Judas

Jacheuayama

¹ Atše Judas, Jesucristbe oservená y Santiagbe catšata, quem tsbuanácha sentsabiamná, ndēmuanŷengbioye Bēngbe Bētsá, chē Taitá chabe entsānga chamotsemnama tojáchembo, chabe bonshánēnga, y ndēmuanŷenga Jesucristo endánŷena. ² Atše, Bēngbe Bētsá sēntseimpadana, cha puerte lastemado tsēngaftangaftaca chaotsemnama, cha chaoma tsēngaftanga ainaniñe tšabe ebionana chašmotsebonnama, y chaoma tsēngaftanga cada te más Bēngbe Bētsábioye y ínŷengbioye chašmotsababuánŷeshanama.

Chē ndoñe ndegombre soyēnga buátēmbayēnga

³ Atšbe bonshánēnga, atše tša sēndboše tsēngaftanga jubuábiamama, ntšamo Jesucristo bēngbe bacna soyēnguentšana šojátsebacama, tsēngaftangbioye y bēngbioyaca; pero atše sēntsejuabná atše šojtsemna tsēngaftanga jubuábiamana, jáimpadama bētsá chašmotsama Jesucristbe soyēngama, chē mondošbuaché soyēngama jenujuéřzama, ndoñe chaondopochocama. ⁴ Er tsēngaftanga ntšamo ínŷenga imomnama ntjatatsēmboncá, básefta entsānga tsēngaftangaftaca tmojenutaná. Chēnga mondmēna Bēngbe Bētsá ndoñe adórayēnga, y chē buátēmbana soyēnga tmojtsetrocá. Bēngbe Bētsá bēngbe tšabiamana juabna yobómnayeca, chēnga jtsichámuana tsēngaftanga šmojtsobena nŷetsca bacna soyēnga jtsamēse jtsiyenana, jenomándama ntsoibencá ca; y chca, chēnga montseboše jinŷanŷiyama, Jesucristo ndoñe bēngbe canŷe Nduiño y Bēngbe Utabná chēngbiama yondmēna ca. Y bayté, Bēngbe Bētsabe uabemana palabrēnguiñe tmojanábema, chē chca amēngna jtsamnana nŷetsca tescama castigánēnga jtsemnama ca.

⁵ Masque tsēngaftanga lempe quem soyama ya šmondétatsēmbo, atše sēntseboše jamama tsēngaftanga chašmotsenujabná, Bēngbe Utabná, Israeloca entsānga Egiptoquēngbe cucuatšentsana tojanatsebacá chentšana, cachá chē Israeloquēnguentše chábeñe ndošbuáchiyēnga tojánapochocama; ⁶ y cachcá chē angelēngbiámnaca, ndēmuanŷenga ndoñe tmonjanoquedá chē tmojanóyēngacñe mándoca, pero aiñe chēngbe luarēnga cachcá imojēftsonŷaye. Chē causa, Bēngbe Bētsá tojanmandá cadenējuangaca nŷetsca tescama chamoquedama, chē más ibetiñe, tondaye binŷiñe luarentse, chēnga bacna soyēnga tmojanmama nŷetsca tescama castigánēnga jtsemnama yojtsamna ca, cha jayanama tescama. ⁷ Y chē Sodoma y Gomorra, y chē béconana pueblēnguentše entsāngbiámnaca; chēngnaca cach angelēngcá ndoñe tšabá monjánama, y nŷetsca bacna soyēnga imojánama boyabása o shembásaftaca, y ínŷengaftaca y bayēngaftácnaca. Chíyeca chēnga tmonjansufri chē íñesheca castigo nŷetsca tescama, y chca, nŷetsca entsāngbioye tmojaninŷanŷé, ndayá wochjopása chē chca Bēngbe Bētsábioye ndoñe tbontsobedecenáftaca.

⁸ Cachcá, chē ndoñe ndegombre soyēnga buátēmbayēngnaca chē mo otjenayoquécá tmojáninŷe soyēngama jtsichámuana, y chē causa cachēngbe cuerpēngama bacna soyēnga jtsamana, chē mando bomnēngbioye jtsēbátēnana, y chē espíritēnga obenana bomnēngbiama ndoñe tšabá ntsichámuana, mo chēngbioye cuafjoyanguangcá. ⁹ Pero ni mo chē

angelëngbe mandayá Miguel quem buatëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanensatsénayé ora, ndoñe tonjanenñemó jayanama chë diablëbïama podesca soyënga, jóyenguanguse, ndayá nÿe mëntśá ibojauyana: “Bëngbe Utabná chacmácacana ca.” ¹⁰ Pero quem buatëmbayëngna, chë ndoñe tonsësertana soyëngama podesca jtsichámuana, y ntśamo tojtsebionama y tmojtseboşama, nÿe mo bayëngcá, chë soyëngama tşabá josértama juabna ndbomnënga, ndayá chentşana tmojtsësertancá jtsamëse, jamana chënga nÿetsca tescama castigánënga jtsemnana chamotsajnama.

¹¹ ¡Tşa lastema quem buatëmbayëngbïama! Er chënga ndoñe tşabá tmojanma, mo Caincá; cha tojanaboté ntśamo Bëngbe Bëtsá inétsama bacna soyënga japerdónama, y cabana chabe catşátbiyoe tbojanóba. Chënga crocénana juacánama, mo Balaam yojanmcá, Bëngbe Bëtsabe tşabe benachentşana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbiyoe ndoñe ntsayaunanana, ntśamo Coré, Moisés y Aarónbiyoe joyaunayama ndoñe tonjanboşencá; y chë causa chënga pochocánënga mochántsemna, ntśamo Coré pochocaná chaotsemnana Bëngbe Bëtsá tojanmcá.

¹² Chëngna tşëngaftangbïama jtsemnana mo canÿe ndëtsenga luarentşe canÿe bëts tsengacá, tşëngaftangftaca tmojenutaná ora, canÿiñe jasama mo Jesucristbeñe oşbuachiyëngcá. Chënga chca jtsemnana, er chca fiestënguiñe chënga oyejuayënga jtsemnana, nÿe chënga tşabá jtsomñama soyënga jtsamëse, y chënga chama ndoñe ntsëuatjana. Chënga nÿe cachëngbïama jtsantjeşnana, ínÿëngbïama ndoñe. Chënga tşa jtsaşebuachiyana, pero chëngbe buatëmbana soyënga ínÿëngbïama tondayama ntsoşervénana; y chca, chënga jtsemnana mo chë tşa jënÿá ora jantşetëşhëngcá, tondaye ntjuaftena, binÿiaca ochñëjuanëşhënga; y mo betiyëşhënga jashtsnëşhënga y buaşanëşhëngcá, chë jashacama tojtsemna ora tondaye shajuana causa. ¹³ Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntśamo tmojtsamcá jtsinÿanÿnyayana chënga chë bacna juabnënga imobomnama. Chca, chënga jtsemnana mo mar béjayoca oleşhëngcá, chentşana espumushënga bëtscá tsenguësheca jtsóboacanana. Y cabana, chënga jtsemnana mo estrellëngcá chëtemëngbe benachentşana tmojtseboşna, y chentşana jtsefsanana. Bëngbe Bëtsá tojamandá, chë buatëmbayënga ntśamo tmojamamna, chë más ibetoca, tondaye binÿiñe luarentşe nÿetsca tescama chënga chamoquedama.

¹⁴ Adánbentşana chnënguana pamillo entşanga tmojánachnëjna chentşana Enoc tojánashjango. Chánaca Bëngbe Bëtsabe juabna tojanoyebuambá chë bacna buatëmbayëngbïama, mëntśá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, ¹⁵ nÿetsca entsangbïama jabáyanama ntśamo tmojamcá tşabá o ndoñe tşabá bëtsemnana; y cha echanjamánda chë Bëngbe Bëtsábiyoe ndoñe adórayënga nÿetsca tescama castigánënga chamotsemnana, tşa bacna soyënga chabe contra tmojamama, y bacna soyënga chabe contra tmojayanama, chënga, chë puerte bacna soyënga amënga ca” —tojánayana. ¹⁶ Chënga mondmëna chë tşabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tşabá jtsomñama, y puerte botamana palabrenga jtsichámuana uámanënga jtseñobi-amnayëse, y tşabe soyënga ínÿëngbiyoe jtsëtsénayana, chënga tşabá joquédama

y chëngbentšana ndayánaca josháchíñama.

Ošbuáchiyënga jábuayenama

¹⁷ Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntšá: ¹⁸ “Jesucristo quem luare jésabama tempo chaojtsobeco ora, mochántsemna entsanga, y chënga mochantsiyena jtsamëse nýe cachënga tšabá jtsomñama bacna juabnéngaca, y tšëngaftanga cmochantsëbuayajuana ca.” ¹⁹ Chënga mondmëna chë ošbuáchiyënguentšë nýetscanga ndoñe cachcá chamondëtsjuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

²⁰ Pero tšëngaftanga, atšbe bonshánënga, nýets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbocana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá. ²¹ Yëjuana šmochtsantješna tšëngaftanga nýets tempo chašmotsiyenama, Bëngbe Bëtsá cmababuánýeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nýetsca tescama yomna tšabe vida chašmotsebomnama.

²² Chë inýe ora aiñe y inýe ora ndoñe Jesucristbeñe ošbuáchiyana bomnënga šmochtsalastemana. ²³ Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inýengbiana chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nýa tondaye chacmondëtsogusetana.

Judas, Bëngbe Bëtsá jëtschuyama

²⁴⁻²⁵ Chë nýe canýe Bëngbe Bëtsá, bëngbe Atsebacayá obenana endbomna tšëngaftanga jtsanýenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canýe puerte uamaná y obená bëtsemnana chaojinýanyé ora. Bëngbe Utabná Jesucristbeyeca, nýetscanga Bëngbe Bëtsá chamotsatschuaná; y cha puerte bëtsá chauesomñe, nýets obenana bomná y nýets mando bomná, nýets tempscana, tempo, mora y nýetsca tescama. Chca chaotsemna.

Apocalipsis

Ndayá quem librésañe yomna

¹ Quemuentše entsábemana ndayá Bëngbe Bëtsá Jesucristbiöye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábïöye chašuinÿinÿema. ²Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjaniyana ndegombre bëtsemna soyëngama.

³Oyejuayá nda tojtsalía, y oyejuayënga ndëmuanÿënga botamana tmojtsuenana quem yochjopása soyëngama, chë muentše entsabemancá ndegombre tmojÿeunanga, er chca jopasa tempo entsobeco.

Asia luaroca ošbuachiyëngcá enefjuanënga jacheuayama

⁴Atše Juan, sentsabiamná chë Asia luaroca canÿsëftañe ošbuachiyëngcá enefjuanëngbiama. Atše, Bëngbe Bëtsá sëntseimpadana, tšabe bendicionënga chábiocana chašmoháchiñe y ainaniñe puerte tšabe ebionana chašmotsebomna, Bëngbe Bëtsábentšana, chë canÿsëfta espritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espritënga, chabe uámana puesto natsanoica mondmënénga; ⁵⁻⁶ y Jesucristo, chë ntšamo Bëngbe Bëtsabiamna yotatšëmbcá ndegombre oyebuambnayá, chë natsaná ndabiamna Bëngbe Bëtsá tojama obanënguentsana cháuatayenama, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentsana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnama, y Bëngbe Bëtsá chabe Taitá mo bachnangcá chamotseservënama. ¡Nÿetscanga nÿets tempo chamotsinÿanÿná Cristo puerte bëtšá y uamaná bëtsemnama y obenana nÿetsca tescama yobomnama! Chca chaotsemna.

⁷Mouenënga. Cristo jantšetëšhënguiñe echanjésabo.

Chábïöye nÿetscanga mochanjinÿe,

chë tmonjancrucificángnaca;

y quem luarentša nÿetsca entšanga puerte ngmëná mochántsemna

y mochantšoachna chábeyeca.

Ndegombre, chca chaotsemna.

⁸“Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

Juan mo otjenayoquécá Cristbiamna tojáninÿe

⁹Atše Juan, Jesucristbeyeca tšëngaftangbe catšata, cháftaca cánÿiñe mo canÿacá bëtsemnama, cach tšëngaftangcá sëndëpadecena, tšëngaftangcá chanjëftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsábeñe jtsobátmanëse, uantado sëndmëna chë padecena soyënguiñe. Bëngbe Bëtsabe palabra sënjanabuayinÿama y Jesusbiamna ntšamo ndegombre endmëncá sënjanóyebuambnama, atše šmonjetsanëtsena mar béjayoca canÿe fshantsentše, Patmos ca uabáinoca.

10 Y tonjanopasá, canye tmengo, chë ošbuáchiyënga Bëngbe Utabnábioye cánýiñe jëtschuayama te, atše sënjanoquedá chë Uámana Espíritbeyeca corente mandaná, mo otjenayoquécá soyënga sënjetsonýaye, y atšbe stëtsoica canye jabuache oyebuambnayana sënjanuena, mo canye trompetëfjua cuafjuajatëtcá; 11 mëntšá sontsanatsëtsná: “Canyë librëšañe mábema lempe ntšamo contsonýacá y cochjuíchmua chë Asia luaroca canýsëftañe ošbuachiyëngcá enefjuanëngbioye: Efeso, Esmirna, Pérgamo, Tiatira, Sardis, Filadelfia y Laodiceoquëngbioye ca.”

12 Sënjanobuértana jinýama nda chca šojtsanatsëtsná, y chca sënjanma ora, sënjáninýe canýsëfta castellano candelerëšënga; 13 y chë canýsëfta castellano candelerëšënguiñe tsëntsaca canýa sënjáninýe, mo entsacá inýná, canýe bën entsáyá uichëtjoná, y cochóntscoca canýe tëntša castellano uasnanëjaca. 14 Chabe stjënashana uafjantsësha, puerte uafjantsësha mo canýe oveshabe boboshëshacá, y chabe fšnëbenga mo iñeshcá enjëtšinýna. 15 Chabe shecuatsënga enjëtsebuashinýinýana mo bronscá, ndaybé natsana iñëjana tcojuchnëngo enabé chaotsemnana y chentsana entsëjuaca becá tcojajojó corente chaotsebuashinýinýanama; y chabe oyebuambnayana jabuache enjëtšenana mo bëtscá béjaye cuaftsebuachquëcjancá. 16 Chabe catšbioica cucuatšinë enjëtšatbëna canýsëfta estrellënga, y chabe uayoicana enjëtšobocana canýe espadëja, nýets utoicajana puerte efsánëja, y chabe jubiá tša enjëtsebuashinýinýana, mo chë shinýe corente, lempe ntšamo tojobenacá tojtsebuashinýinýana orcá.

17 Cha sënjáninýe ora, chabe shecuatsëntše mo obanacá sënjánshajaye. Pero cha, chabe catšbioica cucuatše átšbeñe jajájuase, šonjanianana: “Ndoñe matauatjana; atše sëndmëna chë nýetsca soyënga bojatšayá y pochocayá, 18 chë sempre vida bomná. Atše obaná sënjamna, pero mora nýetsca tescama vida sëntsebomna. Atše obenana sëndbomna, y chë obenánaca entsángbioye ndoñe quenátamna infiernoca nýetsca tescama castigánënga jtsemnana, mo nýets tempo cuaftsobancá. 19 Ntšamo tconjinýcá mábema, chë quem tempo endmëna soyëngama y chë más chcoye echántsemna soyëngama. 20 Mëntšá endmëna chë atšbe catšbioica cucuatšinë tconjinýe canýsëfta estrellëngaca y chë canýsëfta castellano candelerëšëngaca: chë canýsëfta estrellënga montsinýinýná chë canýsëftañe ošbuachiyëngcá enefjuanëngbeñe chamotsemándama uámana ichmónënga, y chë canýsëfta candelerëšëngna chë canýsëftañe ošbuachiyëngcá enefjuanënga.”

2

Efesoca ošbuachiyëngcá enefjuanënga jábuayanama

1 Mëntšánaca cha šonjanianana:

“Mëntšá mabobema chë Efesoca ošbuachiyëngcá enefjuanëngbeñe chaotsemándama uámana ichmonábioye:

Mëntšá entsichamo chë chabe catšbioica cucuatšinë canýsëfta estrellënga entsatbëná y chë canýsëfta castellano candelerëšënga luarëjana entsaná: 2 Atše lempe sëndëtatšëmbo ntšamo tšëngaftanga šmoyenana; atše corente sëndëtatšëmbo tšëngaftanga jabuache šmotrabájama, y ntšamo tšëngaftanga Bëngbe Bëtsábeñe jtsobátmanëse šmnëtsauantana padecena soyënguiñe šmojtsemna ora. Y átšnaca sëndëtatšëmbo tšëngaftanga ndoñe šmontsobena jtsëuantánana ntšamo bacna entsanga tmojtsamcá. Atšnaca

sëndétatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnana. ³ Padecena soyënguïñe becá šmojoboyá y chca ora, Bëngbe Bëtsábeñe šmobátmana. Chë soyënguïñe šmojasufri, tšëngaftanga atše šmoservënama; y tšëngaftanga chca šmondëserveda, ainariñe añemo jtsebonnama ntjajbanacá.

⁴ Pero canye soye sëntsebonna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiana ni nyetsca entšangbiama, ntšamo átšbeñe jtsošbuáchiyama šmonjanbojatšé orcá. ⁵ Menójuabonga ntšamo chë tempo šmonjábobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatšé orcá. Ndoñe chcase, atše tšëngaftangbiöye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentšana cuaftsejuanacá. Chca chanjama, tšëngaftanga juabnayana ndoñe chašmonjatrocace. ⁶ Pero tšëngaftangbe pavor quem tšabe soye šmontsebonna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tšabá chamojábocana mo ayëñjanayëngcá, chëngbiama chanjama chë nyetsca tescama yomna tšabe vida chamotsebonnama, y chca chënga mochántsemna mo chë nyetsca tescama yomna tšabe vida jtsebonnama betiyeshentsana cuaftsesacá, chë entšanga sempre oyejuayënga mondbetsemno ca” —cha šonjaniyana.

Esmirnoca ošbuachiyëngcá enefjuanënga jábuayenama

⁸ Mëntšánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyetsca soyënga bojatšayá y pochocayá, chë tonjanobaná y ndabiama Bëngbe Bëtsá tonjama cháuatayenama: ⁹ Atše sëndétatšëmbo tšëngaftanga tša jabuache šmojasufrima y ndbomnejëmënga šmomnana, pero ndegombre Bëngbe Bëtsábiocana bëtscá tšabe soyënga šmondëtsóboñe. Y sëndétatšëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanabe entšangcá, nye chábiöye jtseservëñese y jtsatschuanayëse.

¹⁰ Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínýenga chacmëtámia, jinýama ntsachetšá Cristbeñe ošbuáchiyana šmobomnana, padecena soyënguïñe šmojtsemna ora; y entsamna baseftaytë jasúfrina. Sempre bëtscá ošbuáchiyana, y ainariñe bëts añemo šmochtsebonna, masque jobanámna chacmotsamna, Cristbiana trabájaye causa. Chca chašmojtsamëse, atše chanjama tšëngaftanga chašmotsebonnama mo canye uacanana soycá, chë nyetsca tescama yomna tšabe vida.

11 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë pade-cena soyënguentšana tšabá chamojábocana mo ayëñjanayëngcá, ndegom-bre chënga ndoñe queochátamna játauatjana nyetsca tescama castigánënga jatsmënama ca” —cha šonjaniyana.

Pérgamoca ošbuachiyëngcá enefjuanënga jábuayenama

12 Mëntsánaca cha šonjaniyana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo chë nyets utoicajana puerte efšana espadëja entsatbëná: 13 Atše sëndëtatšëmbo ntšamo yomna tšëngaftangbe oyenentše, canye luare ndayentše Satanás entšángbioye puerte iuamënda. Masque chca, tšëngaftanga sempre nye atše šmondëtseserverna, y ndocna te chešmáisayana átsbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

14 Pero básefta soyënga sëntsebojna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuatambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca imojanajuabná soyënga jadórana uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. 15 Chéntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. 16 Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betso tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadëjaca.

17 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë pade-cena soyënguentšana tšabá chamojábocana mo ayëñjanayëngcá, chëngbioye maná chanjátsataye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinÿanyé; y canye fjantse ndëtšëtema chanjáyentšbuachiye, chënga oyejuayënga šmojábemama. Chiñe canye tsëm uabaina echantsábemana; ndocná chë uabaina quenátabuatma, ndayá nye chë chamojóyëngacñënga ca” —cha šonjaniyana.

Tiatiroca ošbuachiyëngcá enefjuanënga jábuayenama

18 Mëntsánaca cha šonjaniyana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábioynaca mëntsá mabobema:

Mëntsá entsichamo Bëngbe Bëtsabe Uaquíñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronce shecuatšënga bomná: 19 Atše sëndëtatšëmbo ntšamo tšëngaftanga šmoyenama; sëndëtatšëmbo ntsachetsá tšëngaftanga Bëngbe Bëtsábioye y nyetscángbioye

šmababuánjeshanama, ntšamo tšëngaftanga Bëngbe Bëtsábeñe puerte šmošbuáchema, ntšamo chábioye šmoservénama, ntšamo tšëngaftanga ínŷenga šmojujabuache y ntšamo Bëngbe Bëtsábeñe jtsobátmanëse becá šmojoboyá padecena soyënguñe; y sëntsetatšëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsé orscama.

²⁰ Pero canŷe soye sëntsebmna tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservénënga entsaíngña, shembása o boyabásaftaca bacna soyënga chënga chamotsamama, y chë ínŷenga diosënga yojamna ca imojanajuabná soyënga jadórama uátšëmbona saná chamosama. ²¹ Cha sënjuená atše chjacastíga ca, chca juabnayana ndoñe tonjatrocace, y canŷe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena. ²² Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmonsajbanase, chëngbiana chanjama puerte chamosufrima; ²³ y chë shembásabe básenga chantsëbaye. Chca, nŷetsquénache ošbuachiyëngcá enefjuanënga mochántsetatšëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentše, ínŷenga Tiatira pueblentše šmojtsemnënga, chë shembásabe buatëmbana soyënguñe ndoñe šmontsošbuachenga, y chë ínŷenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inŷe más toto soye chašmotsamama. ²⁵ Pero nŷe sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

²⁶ Chë padecena soyënguentsana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nŷetsca mándayëngbentša entšángbeñe jtsemándayama, ²⁷ ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canŷe hierro varëfjaquécá, y chëngbe contra chamojtsemnëngbioye mochántsapochocaye, mo nŷe matbajënga tmojtsëtsjanjncá. ²⁸ Y chë jabínŷnama ora bínŷnaye estréllnaca chanjátšataye.

²⁹ Chë jouenama tmojtsobenënga, chamouena ndayá Espiritu chë ndayenache ošbuachiyëngcá enefjuanënga yojtsëtsëtsnacá ca” —cha šonjanaryana.

3

Sardisoca ošbuachiyëngcá enefjuanënga jábuayenama

¹ Mëntšánaca cha šonjanaryana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Měntšá entsichamo chě Běngbe Bětsabe canyšefta espíritēnga y chě canyšefta estrellēnga bomná: Atše lempe sēndētatsēmbo ntšamo tšēngaftanga šmoyenama; atše sēndētatsēmbo tšēngaftangbiana inyēnga tša jtsichámuana Běngbe Bětsá jaserviama bētsćá šmojtsama ca, pero ndegombre tšēngaftanga nye batšatema šmontsama, y chca, chabiama mo obanēngćá šmondmēna. ² Botamana šmochjenóbonye y más šmochtsama chě Běngbe Bětsá jaserviama cabá šmondama básefta soyēnga. Ndoñe yapa quenatájamna chě tšabe soyēngnaca chašmotsajbanama, er atše sēnjinye chě Běngbe Bětsábioye jaserviama ntšamo jtsamēse šmoyencá, atšbe Bětsabiama ndoñe yapa tšabá quenatšmēna. ³ Asna, šmochtsenójuabnaye ndayá Běngbe Bětsábicana šmojóyēngacñama, y chabiama šmojouena soyēnguñnaca. Ntšamo chě soyēnga yomncá šmochtsiyena, juabnyana šmochjatróca y šmochjónťša bētsćá jtsamana Běngbe Bětsá jaserviama. Ndoñe tšabá cach tšēngaftanga chašmonjenójuabose y juabnyana ndoñe chašmonjatrocasa, nye ndeolpe chanjá tšēngaftangbioye, mo canye atbēbanacá, chabiama ndocná tontsejuabná ora, y ndegombre tšēngaftanga ndoñe quešmochátstatšēmbo motna ora atše tšēngaftangbioye chjama.

⁴ Masque chca, Sardisēntše tšēngaftangbeñe básefta entšanga mondmēna, chēnga ndoñe chematajbaná oyenana tšabe soyēnga jtsamēse, bacna soyēnga játamama. Chēngna átšeftaca mochántšajna uafjantsējuangá uichětjonēnga, chēnga chca mercedo montsebuajónayeca. ⁵ Chě padecena soyēnguentshana tšabá chamojábocana mo ayēnjayanayēngćá, chca uafjantsējuangá uichětjonēnga mochántsemna, y chēngbe uabaina ndoñe quichatsjuána chě tšabe vida mochjónyēnēngbe uabaina enduábemana librēsentšana, ndayá atše, Běngbe Bětsabe delante y chabe angelēngbe delante, chēnga atšbe entšanga imomna ca chanjayana.

⁶ Chě jouenama tmojtsobenēnga, chamouena ndayá Espíritu chě ndayenache ošbuachiyēngćá enefjuanēnga yojtsētsētnacá ca” —cha šonjaniyana.

Filadelfiaca ošbuachiyēngćá enefjuanēnga jábuayenama

⁷ Měntšánaca cha šonjaniyana: “Filadelfia bēts puebloca ošbuachiyēngćá enefjuanēngbeñe chaotsemándama uámana ichmonábioynaca mēntšá mabobema:

Měntšá entsichamo chě uamaná y ndegombre oyebuambnayá, chě jtsemándayama puerta obenana bomná, ntšamo Rey David enjanbomncá, chě nda ndayá chaotsemnama tojamandá ora, ndocná ntobenana jamama chca ndoñe chaondětsemnama, y ndayá ndoñe chaondětsemnama tojamandá ora, ndocná ntobenana jamama aiñe chaotsemnama: ⁸ Atše lempe sēndētatsēmbo ntšamo tšēngaftanga šmoyenama. Minyēnga, atše sēnjama tšēngaftanga bētsćá tšabe soyēnga chašmotsebobnana, y ndocná quenátobena jamama chca ndoñe chaondětsemnama; y chca entsemna mo atše tšēngaftangbiana canye bēsáša cuafjatēfćá, y chěša jtatámiana ndocná quenátobena. Atše sēndētatsēmbo tšēngaftanga batšatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmēna ca. ⁹ Atše chanjama, chě mo Satanasbe entšangćá imomnēnga, nye chábioye jt-seservēnēse y jtsatschuanayēse, chě judiēnga imomna ca ichámēnga, pero chě Běngbe Bětsabe bocacana entšangćá ndámēnga y bosterēnga,

chënga tšëngaftangbiöye chamua y tšëngaftangbe delante chamoshamentšé, tšëngaftangbiama respeto jinŷanŷiyama, y chca, chënga chamotsetátšëmbo atše sempre chababuánŷeshanama. ¹⁰ Atše tčonjanamëndá, Bëngbe Bëtsábeñe jtšobátmanëse, lempe chašmotsoboyá padecena soyënguñe, y tšëngaftanga chca šmonjama. Chíyeca, atše puerte tšabá cbochántsanŷena, chë quem luarentse oyenënga nŷetscanga jasúfriama y padecena soyënguñe jtsemnama chaojtsemna ora, Bëngbe Bëtsábeñe aíñe o ndoñe mondošbuáchema jinŷanŷiyama.

¹¹ Cachiñe quem luaroye betscó chanjésabo. Sempre šmochtsama ntšamo mora šmondamcá, y Bëngbe Bëtsábiocana šmojóyëngacñe soyënga šmochtsinŷena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábíoye jtšeservënama ndoñe tmontsajfanángbiöye yochjatsataycá, chëngbe uacanana soye. ¹² Chë padecena soyënguentsana tšabá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábiocana. Y chëngbeñnaca chanjuábema atšbe tsëm uabaina. Lempe chca chanjama jinŷanŷiyama chënga Bëngbe Bëtsábenga mochtsemnama.

¹³ Chë jounama tmojtšobenënga, chamouena ndayá Espiritu chë ndayenache ošbuachiyëngcá enefjuanënga yojtšëtsëtsnacá ca” —cha šonjaniyana.

Laodiceoca ošbuachiyëngcá enefjuanënga jábuayenama

¹⁴ Mëntšánaca cha šonjaniyana: “Laodicea bëts puebloca ošbuachiyëngcá enefjuanëngbeñe chaotsemándama uámana ichmonábíoyñaca mëntšá mabobema:

Mëntšá entsichamo chë sempre Ndegombrá endmëná, chë Bëngbe Bëtsabe soyëngama ndegombre oyebuambnayá, y chë ndábeyeca Bëngbe Bëtsá quem luare tojanmá: ¹⁵ Atše lempe sëndëtatšëmbo ntšamo šmoyenama. Atše sëntsetatšëmbo tšëngaftanga ndoñe yapa šmontseboše Bëngbe Bëtsá jaserviama, pero Bëngbe Bëtsabe buayenana soyënga ndoñe lempe šmontsaboté. Y chca, nŷe batšatema šmojtseboše Bëngbe Bëtsá jaserviama; chca, tšëngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sëntseboše tšëngaftanga chašmotsemna mo ntšniñiye o shécbaniye buyeshcá, tšabá jtsamëse o tondaye! ¹⁶ Chca, tšëngaftanga tibiye buyeshcá šmondmëna, y ndoñe quešmátsboše bëtscá jamama, pero Bëngbe Bëtsabe soyënga ndoñe lempe šmontsaboté. Chíyeca atše sëntsejuabná jtšëbatena, mo nda tibiye býyeshe tojëtšbuashëjtjá, chcaye ndoñe bondogustana causa.

¹⁷ Er tšëngaftanga jtsichámuana bomnënga šmomna ca, puerte tšabá šmojábocana y tondaye cmontsabuáshebena ca, pero ndoñe quešmátsatšëmbo Bëngbe Bëtsabe soyënga bëtscá cmojtsabuáshebena. Chca, tšëngaftanga šmontsemna nŷa ndoñe tšabá, ínŷyenga ngmënanaca chacmotsabamna, mo ndbomnëjemëngcá, mo jtanëngcá, Bëngbe Bëtsabe soyëngama ntšosertancá, y mo enašëngcá, bëtscá Bëngbe

Bětsabe soyēnga ntsebmncá. ¹⁸ Chíyeca cba buayená, átsbentšana chašmuatsjinýe chě Běngbe Bětsabe soyēnga y uámana soyēnga, mo chě ena castellano jabemama, inějana fjěchněnguěse castellano átsbioye šmojtsonšabuamnańcá. Tšěngaftanga Běngbe Bětsabe delante mo enašěngcá šmondměna, er cha endonýa chě ba bacna soyēnga ntšamo tšěngaftanga šmojtšamcá. Šmochjaleséncia atše chachějabuache tšěngaftanga Běngbe Bětsabe bominyíne tšábenga chašmotsemnama, mo juichětjuama uafjantse entšayá átsbioye šmojtšantšabuamnańcá. Chca šmochjama, tšěngaftanga Běngbe Bětsabe delante ndoñe chašmondětsěuatjama. Šmochjaleséncia atše chachějabuache tšěngaftanga Běngbe Bětsabe soyēngama chacmósertama, mo tšěngaftanga bominyě šocanama šnana átsbioye šmojtšantšabuamnańcá. Chca šmochjama, Běngbe Bětsabe soyēngama puerte tšábá chacmósertama.

¹⁹ Atše chě sěndábabuanýěshaněnga sěndbaucácana y sěndbábuayenaye. Chíyeca, lempe ntšamo šmojobenacá šmochtsama Běngbe Bětsá jasěrviana, y juabnayana šmochjatróca, y nýets tempo puerte šmochtseboše Běngbe Bětsá jteservénana. ²⁰ Nderado canýe tšabe amigo yebnoye tojabo y tojachembo, tšěngaftanga šmojoueněse y běšása šmojebiatěfjěse, cha jamashěnguana, y cánýine cháftaca joyejuayana y jasana. Cachcá, atše entšanga sěntsachembuana chašmoleséncia chěngbe ainaniñe jtsiyenama. Nderado nda šojóyeunase, atše chanjámashěngo chabe ainaniñe jtsiyenama, y nýets tempo cháftaca cánýine mo canýacá chanjěftsemna.

²¹ Chě padecena soyěnguentšana tšabá chamojábocana mo ayějanayěngcá, atše chanjama chěnga puerte bětsětsanga chamotsemnama ntšamo atše sěndměncá, y átsěftaca chamótbemama, atšbe uámana tbemanentše jtsemándayama, ntšamo atše atšbe uayayěngbioye sěnjayějanacá, y atšbe Taitáftaca chabe uámana tbemanentše tijotbemcá.

²² Chě jouenama tmojtšobeněnga, chamouena ndayá Espíritu chě ndayenache ošbuachiyěngcá enefjuaněnga yojtšětsětsnacá” —cha šonjaniyana.

4

Chě Ainěnga Běngbe Utabnabe uámana tbemanentša natsana imojtsechuanaye

¹ Chentšana mo otjenayoquěcá sěnjáninyě. Sěnjánrepará y sěnjáninyě celoca canýe běšása enjětsatěfjna, y chě natsana sěnjanuena oyebuambnayana, chě enjamna mo canýe trompetěfjua cuafjuajatětcá, měntšá šonjětsatsaye: “Moye mášěngo, atše cbochanjinyńinye ntšamo más chcoye yochjopasacá ca.”

² Cachora, chě Uámana Espíritbeyeca, mo atšbe ainana celoca cuaftsemncá atše sěnjanoquedá, y sěnjáninyě celoca enjětsemna canýe reybe uámana puesto, y chentše canýa enjětsetbemana. ³ Chentše enjětsetbemaná enjamna, puerte těshinyńá mo jaspe ndětsbecá, puerte buanganá mo cornalina ndětsbecá, y chě uámana puesto shěconana canýe tsěfcuácuatjo enjamna, y enjětsebuashinyńyana mo canýe esmeralda ndětsbecá. ⁴ Chě reybe uámana puesto juachajana, inýe uta bnětsana y canta puesto sěnjáninyě, y chiñe uta bnětsana y canta bětsějéměnga aměndayěnga monjětsetbiamana, uafjantsějuangá uichětjoněnga, y castellano coroněshangá monjětsabestšajona. ⁵ Chě uámana puestentšana enjětsobocana tcuinyějěnga, becá shauenanana

y juesasanana; y chë uámana tbemaniñentša natsanoicna, canýsëfta uajuinýanësha enjétsangbototjuana; chë uajuinýanëshangá entsayana chë Bëngbe Bëtsabe canýsëfta espíritënga. ⁶ Y chë uámana puestentša natsanoica enjëtsemna mo canýe mar bejaycá, tëshínýniye mo canýe cristal ca uabaina ndëtšbecá.

Chë luariñe tsëntsaca, chë uámana puesto enjëtsemnentše y chë shëconánëjana monjëtsemna canta Ainënga, nyétsañe fšněbëngaca, natsanoica y stëtsoica. ⁷ Chë natsana Ainá enjamna mo canýe leoncá, chë inýe Ainá mo canýe torošcá, chë inýe Ainá enjánbomna mo canýe entšabe jubiácá, y chë inýe Ainá mo canýe águila tojtsongüefjnacá. ⁸ Chë canta Ainënga, cada ona chñënguana juatëngmiáša enjanábomna, y tsoicajana y shjoicajana nyétsañe fšněbënga monjánbomna. Y chënga nyëts tempo, ntjochnacá mëntšá monjánichamo:

¡Uamaná, Uamaná, Uamaná, Bëngbe Utabná,
Bëngbe Bëtsá nyëts obenana bomná,

nda enjamná, endmëná y sempre echanjëtsemná ca!

⁹⁻¹⁰ Chca chë Ainënga Bëngbe Bëtsá bëtscá tmontanchuá, Bëngbe Bëtsá chë uámana puestentše tbemaná, chë nyëts tempo y nyëtsca tescama oyená. Chënga puerte respeto chabiana monjëtsebomna y bëtscá tmontanchuá. Cada ora chënga chca tmonjanma ora, chë uta bnëtsana y canta bëtsëjëmënga amëndayënga, chë uámana puestentše tbemanabe shecuatšentše joshamentšiyana y chábioye jtsatschuanayana, chë coronëshangá chë natsanoica jutšanana, y mëntšá jtsichámuana:

¹¹ Aca nyëts mercedo condëtsobuájoñe, Bëngbe Utabná y Bëngbe Bëtsá, entšanga chamotsinýanýnama, aca puerte bëtsá comnama, y chamotsichamo

aca nyëts respeto buajoná comna, y nyëts obenana bomná comna ca, er aca nyëtsca soyënga tcojama;

aca icnabóseyeca chë soyënga yojtsemna y aca chca tcojanma ca.

5

Chë uabemana uándmanana tsbuanácha y chë Oveshatema

¹ Chë uámana puestentše enjëtsetbemanabe catšbioica cucuatšíñe canýe uándmanana tsbuanáchanaca sënjáninýe, y nyétsañe enjëtšabemana tsoicajana y shjoicajana, y canýsëfta tsengájaše sellëngaca enjëtšajandmanana. ² Y canýe ángel puerte obenana bomná sënjáninýe, y cha mëntšá enjëtšayebuache: “¿Nda mercedo yobuájona, quem uándmanana tsbuanácha jutëfjonama y chë sellënga jutsécama ca?”

³ Pero, ni celoca, ni quem luarentše, ni quem luarentša jashenoye, ndocná quenjatšmëna obenáca chë uándmanana tsbuanácha jutëfjonama, ni juinýama. ⁴ Y atše puerte sënjánenobošachna, er ndocná ntjónýnana mercedo buajoná chë uándmanana tsbuanácha chautëfjonama, ni chauinýama. ⁵ Pero canýa chë bëtsëjemënguentsá šonjaniyana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davídbentšana Entšá, tonjayëñaná; cha entsobena chë uándmanana tsbuanácha jutëfjonama, y chë canýsëfta sellënga jutsécama ca.”

⁶ Chora sënjáninýe, chë uámana puesto y chë canta Ainënga y chë bëtsëjemëngbe tsëntsaca, canýe Oveshatema tsanana, pero enjëtšinýna mo cuaftsobacá. Chë Oveshatema enjánbomna canýsëfta tsëtjonëše y canýsëfta fšněbé. Chë canýsëfta fšněbé monjaninýinýná chë Bëngbe

Bětsabe canyśeřta eřpířitēnga, chē Bēngbe Bětsá nřets quem luarējana tojaníchamonga. ⁷ Chē Oveshatema tonjanobeconá y chē uándmanana tsbuanácha tonjanaca, chē uámana puestentše tbemanabe catšbioica cucuatšentšana; ⁸ y chabe cucuatšíne tonjanaca ora, chē canta Ainēnga y chē uta bnětsana y canta bētsējémēnga amēndayēnga chē Oveshatembe shecutšentše tmonjanoshamentšé. Nřetscanga monjětsētbēna arpaná y castellano cobbēnga jútjena inciensiyeaca; chē cobbēnga inciensiyeaca enjamna chē Bēngbe Bětsabe entšanga tmojayana palabrenga, cháftaca jencuéntama ora. ⁹ Y quem tsēm canto montsancántaye:

Aca mercedo condětsobuájoñe, chē uándmanana tsbuanácha chacuacama y chē sellēnga chacutsēcama;

er acbe buiñe juabuáshanēse tconjanóbana, y chca enjamna mo crocénana cuafjětsajocá, Bēngbe Bětsabiama chamotsemnana,

entšanga nřetsca cachca buiñe bomnēnguentšana, nřetsca biyana bomnēnguentšana, nřetsca canye entšanguentšana, y nřetsca mándayēngbentša entšanguentšana.

¹⁰ Aca tcojama chēnga chamotsobena ácaftaca jtsemándayama

y uámanēnga chamotsemnana, Bēngbe Bětsábioye mo bachnangcá chamot-seservénama,

y quem luarentše chēnga montsemánda ca —chēnga monjětseversiaye.

¹¹ Y chca sēnjětsonyaye ora, mallajta angelēngbe oyebuambnayana sēnjuenuena, y chēnga monjětsemna chē uámana puestentše, chē Ainēnga y chē bētsējémēnga amēndayēngbe shēconana. Nřetšá bětscá angelēnga monjětsemna, corente mallajta; ¹² y chēnga mēntšá monjětsayebuache:

¡Chē Oveshatema cuafjobacá endmēná,

mercedo endětsobuájoñe, nřets obenana, nřets bomnana,

nřets osertánana y nřets añemo chaotsebomnana,

y entšanga chabiama chamotsichamo cha nřets respeto buajoná yomna ca,

y chamotsinřanřnama cha puerta bětšá y uamaná yomnana,

y nřetscanga chamotsatschuanama ca! —chēnga monjětsayebuache.

¹³ Y sēnjuenuena, lempe ntšamo Bēngbe Bětsá tojanmca aina soyēnga, celoca, quem luarentše, quem luarentša jashenoye y chē mar bėjayoca, chēngnaca mēntšá monjětsichamo:

¡Chē uámana puestentše tbemanábioye y chē Oveshatema nřetscanga nřets tempo y nřetsca tescama chamótsatacheuanaye

y chamotsichamo chata puerta uámanata y nřets respeto buajonata ibomna ca,

y chamotsinřanřná chata puerta bětšétsata y obenata bětsemnana ca!

¹⁴ Y chē canta Ainēngna monjětsichamo: “Chca chaotsemna ca.” Y chē bētsējémēnga amēndayēngna tmonjanoshamentšé y chátbioye monjětsatacheuanaye.

6

Chē Oveshatema chē canyśeřta sellēnga tonjanětsēcá

¹ Chentšana más sēnjáninře; chē Oveshatema chē canyśeřtentšana natšana sello tonjanětsēcá ora, sēnjuenuena canya chē canta Ainēnguentšana puerta jabuache, mo cuafjajuesascá, mēntšá enjětsichamo: “¡Mabo ca!”

² Sēnjanrrepará y sēnjáninře canye fjantse couaye, y chábeñe enjetsenjaquená

canÿe arquëja enjétsatbëna. Chábioye canÿe coronësha tmonjaníyë, y mo canÿe ayëñjanayacá tonjëftsanbocna, y cabá más jatsyënjanámnaca.

³ Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentšana mëntśá enjétsichamo: “¡Mabo ca!” ⁴ Y inÿe couaye tonjánbocna, canÿe buanganá; y chë enjetsenjaquená obenana tonjanóyëngacñe jamama chë fshantsentśa natjëmbana vida chaotsopochocama, entśanga chamotsenóbama; y canÿe bëts espadëja tmonjanoyé.

⁵ Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentšana mëntśá enjétsichamo: “¡Mabo ca!” Sënjanontjëšë y canÿe ftsenga couaye sënjáninÿe, y chë enjetsenjaquená canÿe romanëša enjétsëtbëna. ⁶ Y chë canta Ainëngbeñe canÿe oyebuambnayana mëntśá sënjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitiye y chë vínoyna ndoñe cattsepochoçaye ca.”

⁷ Chë Oveshatema chë inÿe sello tonjanëtsécá ora, chë ústonoca Ainá enjétsichamo: “¡Mabo ca!” ⁸ Sënjanontjëšë y canÿe shatsësiye couaye sënjáninÿe; chë enjetsenjaquená Obanana ca enjanabaina, y stëtsoica bonjëtsëstona canÿa, Obanënga imomna luare ca uabainá; y chátbioye obenana tmonjanatśa cántañentšana cáñyentśe quem luarentśe jtsepochoçama, chentśa entśanga jtsapochócase, entśanga tmojtsentsjanama, bëts shëntsánëngaca, šocanëngaca y quem luarentśa tsátjaye bayëngaca.

⁹ Chë inÿe sello tonjanëtsécá ora, sënjáninÿe chë altarentśa tajsoye chë tmojanóbanëngbe espíritënga, chë Bëngbe Bëtsabe palabra entśanga abuayiy-nayama tmojanóbanënga. ¹⁰ Chora chënga tmonjanontśë tša uayebuáçhana: “Uamaná y ntśamo tojašebuachenacá lempe amá bëngbe Nduiño, ¿ntseco quem luarentśa entśangbiana cochjayana ndoñe tsábá tmonjamama, y chë bëngbioye obanayama cochjácastigaye ca?” ¹¹ Chentšana nÿetscángbioye uafjantse entśayá tmonjaníyë y tmonjanëyana batśatema más chamobatmá ca, chë cachëngcá Crístbeyeca catśátanga y oservënënga, chë cachëngcá mochjanóbanënga, nÿetscanga choça chamojtsemnëntscuana.

¹² Y más sënjáninÿe; chë inÿe sello cha tonjanëtsécá ora, jabuache fshantse tontsanangmëmana; shinÿe tontsanftśënganga, mo chë obaná tojtsemnama juichëtjuama entśayacá, y nÿets juashcona mo buiñcá enjétsinÿna, ¹³ y estrellatëmënga celocana fshantsoye tontsantquëcjana, mo canÿe higo betiye jabuache bínÿiaca tojtseshatíyeyna ora, chë nguëfshna higuëbenga cuafjatquëcjancá. ¹⁴ Y celoca luare tontsanenatjëmbe mo canÿe tsbuanácha cuafjuandmanacá, y nÿetsca tjañe y béjayoca fshantsënga, chë ndayentśe enjannentšana tontsanojuaná; ¹⁵ y nÿetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nÿetscanga chë nÿets tempo nÿe inÿabiana oservënënga y chë cachëngbiana trabájayëngnaca, chë cuevëshënguiñe y bëts ndëtšbenguenache tjañe tmonsanoítana; ¹⁶ y chë tjañëngoye y chë ndëtšbengoye montsanichamo: “¡bëngbioye smotsëtebuantsá y smotsaitame, chë uámana puestentśe tlemanabe bominÿentšana, y chë Oveshatembe uabouana castigo, cha bëngaftaca tbojetnama, bëngbeñe ndoñe chaondëtsemnama! ¹⁷ Er chë uachuana te chabe castigo jtsebínÿnama te tojóshjango; y mora ¿nda nanjobenaye chë sóyeca ndoñe chamondëtsepochoçama ca?” —chënga montsanichamo.

7

Chë Bëngbe Bëtsábioye oservénënga chë uabouana castigüentšana mochántsatsebacana

¹ Chca tonjanopasá chentsana, canta angelënga sënjánanÿe, monjétsatsana chë quem luarentša canta opochócayenache; chënga ndoñe quemënjatanleséncia chë canta binÿiënga jtsebínÿnama, ndoñe chaondëtsebinÿiyama, ni fshantsentse, ni mar bëjayoca, ni ndocna betiyeshënguifne. ² Inÿe ángelnaca sënjáninÿe, shinÿe bocana luaroicana enjetsabó, y chë Bëngbe Bëtsá Ainabe sello enjétsiyëboye. Chë ángelna chë inÿe canta angelëngbioye, ndëmuanÿengbioye obenana tmojanatsatá chë fshantsentse y mar bëjayoca lempe jtsepochócama, chëngbioye jabuache tonjánabachembo: ³“¡Tondaye šmatjapochóca, ni fshantsoca, ni mar bëjayoca, ni betiyeshënguifne, chë Bëngbe Bëtsabíama oservénëngbioye chë sélloca juentsaca fchayaúinÿnanantsuana, ndoñe chamondëtšapochocama ca!”

⁴ Y sënjanuena buétanga chë sélloca tmojánauinÿnanayama: canÿe patse, canta bnétsana y canta uaranga entšanga uinÿnanánënga nÿetsca Israeloquentša bëts pamillanguentšana.

⁵ Judabe pamillentšana, bnétsana uta uaranga uinÿnanánënga; Rubenbe pamillentšana, bnétsana uta uaranga; Gadbe pamillentšana, bnétsana uta uaranga;

⁶ Aserbe pamillentšana, bnétsana uta uaranga; Neftalibe pamillentšana, bnétsana uta uaranga; Manasesbe pamillentšana, bnétsana uta uaranga;

⁷ Simeonbe pamillentšana, bnétsana uta uaranga; Levibe pamillentšana, bnétsana uta uaranga; Isacarbe pamillentšana, bnétsana uta uaranga;

⁸ Zabulonbe pamillentšana, bnétsana uta uaranga; Josebe pamillentšana, bnétsana uta uaranga; y Benjaminbe pamillentšana, bnétsana uta uaranga entšanga.

Chë mallajta entšanga uafjantsëjuangá uichëtjonënga

⁹ Chentsana, sënjanrrepará y mallajta entšanga sënjánanÿe, ndocná quentaisobenaye jacúntana, nÿetsca mándayënguentsana, nÿetsca cachca buiñe bomnënguentsana, nÿetsca canÿe entšanguentsana, y nÿetsca biyana bomnënguentsana; chënga monjétsatsana chë uámana puesto chë Oveshatembe natsanentse, uafjantsëjuangá uichëtjonënga y ramëshangá monjétsëtbëna. ¹⁰ Nÿetscanga tša monjétsayebuache:

¡Bënga atsebacayana endobá, Bëngbe Bëtsá,
chë uámana puestentse entsetbemanábentšana,
y chë Oveshatëmbentšana ca!

¹¹ Y nÿetsca angelënga, chë uámana puesto y chë bëtsëjémënga amëndayënga y chë canta ainëngbe shéconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, ¹² mëntšá jayanëse:

¡Chca chaotsemna!

Bëngbe Bëtsábioye nÿets tempo y nÿetsca tescama chamotsadorana y nÿets ainánaca cha chamotsatschuaná.

Entšanga chamotsinÿanÿná cha puerte bëtsá y uamaná bétsemnama; cha endmëna nÿets osertánana bomná, y nÿets respeto buajoná, y nÿets obenana y añemo bomná.

¡Chca chaotsemna ca! —chënga monjétsichamo.

¹³ Chentšana, canya chë bêtsëjemënguentsá tonjanoyebuambá y šonjantjá: “¿Ndëmuanyënga imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiama cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentsana tsabá tmojabocanënga; chë Oveshatema chëngbiama tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsa-boshabé y chë Oveshatembe buñëca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna,

y chábioye nyëts tempo chabe delante mondëserveda,

y chë uámana puestentše entsetbemaná,

chëngbenache jtsemnëse, chënga echántsanyëna, mo cuafjutsebotscá.

¹⁶ Ya ndoñe más shëntsana, ni uajuendayana quemochátsbomna;

shinyama, ni yapa jënyama ya ndoñe más quemochátsufrina;

¹⁷ er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënyá,

y echanjunatse bëjaye vida bomniye yóbocana luaroye,

y Bëngbe Bëtsá echanjama ya ndoñe más ngmënana chamondëtsebomnama ca” —cha šonjanjuá.

8

Chë ústonoca sello

¹ Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentétsënëna mo tsëntsaca hora nyëtsá.

² Chora sënjananyë chë canyësëfta angelënga, chë Bëngbe Bëtsabe delante monjétsatsanënga; chëngbioye canyësëfta trompetëfjuangá tmonjaníyë.

³ Chentšana inyë ángel tonjánashjango, canyë castellano matbëtémaca incienso jajuiníyama, y altar natsanoica tonjantsá; chábioye bëtscá incienso tmonjanoyé chaojuinýema chë castellano altaroca, chë uámana tbemana natsanoica enjétsemnoca. Chë ángel incienso tonjanjuinýë Bëngbe Utaná jëtschuayama, cánýiñe nyëtsca chë Bëngbe Bëtsabe entšanga tmojoyebuambá palabréngaca, cháftaca jencuéntama ora. ⁴ Y chë incienso juinýnentša ngona, chë ángelbe cucuatšentšana Bëngbe Bëtsabe delante tonjanótsjua, cánýiñe chë Bëngbe Bëtsabe entšanga cháftaca jencuéntama palabréngaca. ⁵ Chentšana chë ángel chë incienso jajuiníyama matbëtëma tonjanca, chë altarentša chebánbengaca tonjanajutjé, y quem luaroye tonjanëtsana. Chora enjétsemma tša juesasanana, corente shauenanana, bëtscá tcuinýënga, y quem luare tontsanangmémana.

Chë trompetëfjuangá

⁶ Chora chë canyësëfta angelënga, chë canyësëfta trompetëfjua uabomnënga, tmonjanoprontá chëfjuangá juajatëtama.

⁷ Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y iñeshe, cánýiñe buñëca. Ungañentšana cánýentše quem luarentše tontsanjuinýë, ungañentšana cánýentše betiyeshënguifne y nyëtsca nguëfshna shacuanënguifnaca.

⁸ Chë inyë ángel chabe trompetëfjua tonjanájatëto, y chora chë mar bëjayoye tmonjanëtsana canyë soye mo canyë bëtš tjañe tojtsangbototjuancá, y chë

mar béjayiñe úngañentsana cánÿentse buiñe tontsanóbema. ⁹ Chê mar béjayiñe vida imobomnéngbeñe úngañentsana cánÿentse tontsanopochocá, y chê barquénguentsnaca úngañentsana cánÿentse.

¹⁰ Chentsana chê inÿe ángel chabe trompetéffjua tonjanájatêto, y canÿe bêts estrella, mo canÿe uajuinÿanëshacá enjétsangbototjuana, celocana tonjanótsatse chê úngañentsana cánÿentse béjayénguiñe, y béjaye óbocanache.

¹¹ Chê estrella enjanabaina Untjana ca; y chê úngañentsana cánÿentse buyeshénguiñe untjiye tontsanóbema, y chê untja búyeshe causa ba entšanga tmonjanóbana.

¹² Chê inÿe ángel chabe trompetéffjua tonjanájatêto, y chora tontsanóndbema chê úngañentsana cánÿentse shinÿiñe, y chê úngañentsana cánÿentse juashconiñe y chê estrellénguñnaca. Chca, nÿetsca chentsá úngañentsana cánÿentse ibetiño tonjanocéda, y chê causa ndoñe queméntétsebinÿnaye posufta horéntsucana, bnété canta hora y ibeta canta hora.

¹³ Chentsana, sënjanrrepará y sënjanuena canÿe águila, tsbanánoca celoca enjetsongüefjná, jabuache mëntsá enjétsichamo: “¡Tša lastema, tša lastema, tša lastema quem luarentša entšangbiama, chê inÿe trompetéffjuangá chê inÿe unga angelénga chamojuájatêto ora ca!”

9

¹ Chentsana chê inÿe ángel chabe trompetéffjua tonjanájatêto, y sënjaninÿe canÿe ángel quem luaroye jastjanguana y enjétsinÿna mo canÿe estrella celocana quem luaroye cuafstsatsšancá; y moye tonjánashjango ora, tmonjanoyé chê uabouana tboca atéffñentša llavéffa. ² Chê uabouana tboca atéffñentse tonjánatéffjo, y chentsana becá ngona tonjanótsjua, mo bêts hornentša ngoncá; y chê uabouana tboye atéffñentse ngona causa shinÿe tontsanibétata y nÿets celoca ena ngona enjétsemma. ³ Chê ngonentšana ba tsátjaye chapulinga tmonjánbocana, y nÿets quem fshantsējana tmonjanáshana; y chéngbioye obenana tmonjanatsatá, chánaca jándbemama, mo chê juetjuama alacranéngbe obenancá. ⁴ Chéngbioye tmonjanaméndá tondaye ntjándbemana chê shacuanénguiñe, ni ndocna nguéfhna maténguiñe, ni ndocna betiyeshiñe; nÿe chê juentsaca chê Béngbe Bétgabe sélloca nduinÿnanana entšangna aíñe. ⁵ Pero ndoñe chematanalesenciá entšángbioye jobáyana, ndayá nÿe jamama chénga shachna shinÿéntsucana tsetšanana chamotsebomnama; y chê chénga monjánama chamotsebomnama tsetšanana enjamna mo canÿe alacranbe uetjoniñcá.

⁶ Chca tempo chaojtsemna ora, entšanga mochántseguaye ntšamo jtsóbanama, chê tsetšanénga jauántama ndoñe quemochátobena causa, pero ndoñe quemochátinÿena ntšamo jamése jtsóbanama; y masque tša mochántseboše jóbanama, chora chéngaftaca ndoñe chca queochatopása, mo jóbanama ndoñe tmonsobencá.

⁷ Chê tsátjaye chapulinga monjétsinÿna mo couayéngcá prontánénga jama entšángaftaca jéntsama; chéngbe bestšašiñe monjanábomna mo castellano coronéshangacá, y chéngbe jubíá enjamna mo entsabe jubiacá. ⁸ Stjénashe monjánbomna mo shembásabe stjénashacá, y chéngbe juatsašénga mo leonbe juatsašéngcá. ⁹ Chéngbe cuerpénga jenéuyanama cochaca monjánbomna morocho soyénga, mo hierro soyéngcá, y chéngbe juaténgmiashangá tmojtsabonjná ora, chê shauenanana bétscá enjamna, mo ba cochéshangá

couayënga cwaftsasjojnacá, chë inyëngaftaca jéntsjama tmojëtsátjajo ora to-tseshauenacá. ¹⁰ Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinÿentscuana entšanga mal chamotsepasama. ¹¹ Chë tsátjaye chapulinga canÿe amëndayá monjánbomna, chë uabouana tboca mándaye ángel; hebreo biyaña cha uabainá Abadón ca y grieguiña Apolión o pochocayá ca.

¹² Chë natsana pochócyana ya tojochnëngo, pero más chcoye cabá inÿe uta soye más pochócyana cachcá echántsemna.

¹³ Chentšana chë inÿe ángel chabe trompetëfjua tonjanájetëto, y canÿe oye-buambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentšana enjët sobocana. ¹⁴ Y chë oyebuambnayana, chë trompetëfjua tonjanájetëto y enjëtsetbëna ángelbioye tbonjaniana: “Chë canta angelënga chë Eufrates bëts fshájaye tsachoca utsbuanënga mëjafjoná ca.” ¹⁵ Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chëngbioye tmojanaprontá, chë quem luarentša entšángbeñe úngañentšana cánÿentšënga jtsëbáyama. ¹⁶ Atše sënjanuena buétanga imojamna chë angelëngaftaca tmojána soldadënga, couayënguñe: uta patse millonënga ca.

¹⁷ Mëntšá sënjananÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenëyuanama, y chë soye buanganana enjáninÿna, mo iñcá, y fchendana mo chë uámana ndëtšbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjët sobocana iñe, ngona y azufrana. ¹⁸ Y chë úngañentšana cánÿentšë entšanga tmonjanóbana quem unga uabouana pochócyaye soyëngaca, chë couayëngbe uayoicana enjët sobocanana: iñe, ngona y azufrana. ¹⁹ Er chëngbe obenana entšanga japochócama monjánbomna uayáshañe y uascuatšëjuañe; er chëngbe uascuatšëjuana enjuamna mo mëtscuayëngcá, bestšašëngaca, y chëjuanga causa entšanga mal montsanpásaye.

²⁰ Pero chë inÿe entšanga, chë uabouana pochócyaye soyëngaca ndoñe tmonjanopochocanga, juabna ndoñe chematantrócá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cwaftsemncá jtsëjuabnayëse imojánadorana castellano soyënga, midio soyënga, bronce soyënga, ndëtšbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama. ²¹ Juabna ndoñe chematantrócá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyanana, ni atbëbanana.

10

Chë ángel base uándmanana tsbuanáchaca

¹ Chentšana sënjaninÿe inÿe ángel, puerte obenana bomná; celocana enjëtstastajuana, y chabe shëconana canÿe jantšetšeshe enjëtsemna; chabe bestšaše tatsëtsacá canÿe tšëfcuácuatjo. Chabe jubiá shinÿcá enjëtsebuashinÿinÿana, y chabe shecuatšënga mo úcuatjona niñëbenga cwaftsoiñcá. ² Chabe cucuatšinë enjëtsetbëna canÿe base uándmanana y utëfjna tsbuanáchaca. Chabe catšbioica shecuátšëca chë mar bëjayoca tonjantsá, y chë uañicuayóicatšëcna, quem fshantsentšë. ³ Y jabuache tonjanoyó,

mo canýe león cuaftseyocá; y tonjanoyó ora, canýsëfta juesasanentsa jabuache shauenanana sënjanuena. ⁴ Chë canýsëfta juesasana chca tmonjanoyebuambá ora, atşe sënjanoprontá ntşamo chënga tmonjanayancá juabemama; pero canýe oyebuambnayana celocana sënjanuena, mëntsá şonjétsatsaye: “Nýe aca cochtsójuabnañe ntşamo chë canýsëfta juesasana tmonjanancá, ndocnábioye catjauyana, y chë soye ndoñe ntşamó abema ca.”

⁵ Chora chë ángel, chë mar béjayoca y quem fshantsentşe atsaná sënjaninyá, chabe catsbioica cucuatşe celoye tonjanatsbaná, ⁶ y tonjanjurá Bëngbe Bëtsabiamá, chë nýets tempo y nýetsca tescama oyenabiamá, chë celoca, quem luare, chë mar béjaye, y lempe chë luarënguife yobinýncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntşamo tojaşebuachenacá, ⁷ er chë tempo chaojóshjango, chë ústonoye ángel chabe trompetëfjua juajatëtamá chaojontsé ora, chora ya echanjochnëngo ntşamo Bëngbe Bëtsá jamama yujuabnacá; chë soye nýetsca entşángbioye cha ndoñe chenatinýanyé, ntşamo tempo cha chabe oservëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atşe sënjanuena oyebuambnayana celocana enjétsobocanana, cachiñe şonjanatsétsá y şonjaninyana: “Motsa y mauaca chë mar béjayoca y quem luarentşe ángel entsemnabe catsbioica cucuatşiñe base uándmanana y utëfjna tsbuanácha ca.”

⁹ As atşe chë ángelbioye sënjáná; chë base uándmanana tsbuanácha chaşuyema sënjaninyana, y cha şonjanjuá: “Quemëcha, motsásañe. Acbe uayoye uameşquénëcha mo tjuangbe meloycá echántsamna, pero acbe uafsbioyna puerte uauntjëcha echantsábema ca.”

¹⁰ As chë base uándmanana tsbuanácha chë ángelbe cucuatşentsána sënjanaca, y sentsanásañe; y atşbe uayoye meloycá enjétsamna, pero sënjanabmuaná y atşbe uafsbioyna puerte uauntjëcha tontsanábema. ¹¹ Chora şmonjaninyana: “Aca cmontsemna cachiñe jtëtabuayenana, ntşamo Bëngbe Bëtsá tojayancá chë ntşamo yochjopásama, ba canýe luarentşa entşángaftaca, ba mándayëngbentsá entşángaftaca, ba biyana bomna entşanguentsëngaftaca y quem luarentşa reyëngaftaca ca.”

11

Chë útata Bëngbe Bëtsabe juabna oyebuambnayata

¹ Chentşana canýe medídaye niñëfja şmonjanoyé, mo jatşëmbonëfjácá, y şmonjaninyana: “Motsa y Bëngbe Bëtsabe bëts yebna y chentşa altar cochjamedída, y cochjácuntaye bueta entşanga chentşe Bëngbe Bëtsábioye imojtsadorana. ² Pero chë Bëngbe Bëtsabe yebnentşe más şhojica luarna cachcá cochjonyáye, ndoñe catjamedída, er chiñe chë ndoñe judiëngbiamá endmëna; y chënga, chë uámána ca uabaina bëts pueblama, canta bnëtsana y uta shinýëntscuana soyënga mochántsama chiñe jtsepochócama, mo cuaftsebotajnyacá. ³ Pero atşe, útata atşbiama tatsëmbuata y oyebuambnayata chanjichamuá atşbe cuenta entşángbioye jábuayenama, canýe uaranga y uta patşe y chnënguana bnëtsana tentscuana. Chatna uajojësha entşayangá uichëtjonata bochántsemna, chca, ngmena bomnama jinýanýiyama ca” —chata tbonjánayana.

⁴ Quem útata atşbiama tatsëmbuata y oyebuambnayata bontsinýinyëna chë uta olivos betíyeca y chë uta candelerëseca, ntşamo Bëngbe Bëtsá, chë

quem luarentše mandayabe delante endmëncá. ⁵ Nderado nda tojtseboše chatbiama bacna soye jamama, ndoñe quentatobenaye ntšámnaca jáborlana, er uayoicana ifíeshe nanjóbcna y chë uayayëngbioye nantsapochócaye; nderado nda tojábošena chatbiama bacna soye jamama, cachcá cha buántsemna jóbanama. ⁶ Chë útata obenana bondbomna celoca jtsachtama, ndoñe chaon-duaftema, entšángbioye Bëngbe Bëtsabiama chabojsabuayiyiná tese; obenana béjayënga buiñe jsebiama, y jamama quem luarentše chaotsóndbemama, nÿetscna pochócaye soyëngaca, bueta sóynaca ntšamo chata tbojtsebošcá.

⁷ Pero ntšamo Bëngbe Bëtsabiama ibotatsëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántatsjaye, echantsayëñjaná y echantsëbaye. ⁸ Y chatbe óbana cuerpo, chë corente bëts pueblentša tsáshenañe echanjo-quéda, chë chatbe Utabná tmojanrucificá luarentše, y chë bëts pueblo inÿetšá juabáyamna nántsemna mo chë Sodoma y Egiptó luaroycá. Chentše endmëna mo chë bëts pueblënga Sodoma y Egiptcá, er chentše chë entšanga yapa bacna soyënga jtsamana. ⁹ Y unga y tsëntsa tentscuana, chë obanatbe cuerpo mochantsonÿaye, nÿetsca canÿe luarentša entšanga, nÿetsca cachca buiñe bomna entšanga, ba biyana bomna entšanguentšana y ba mándayëngbentša entšanga; ndoñe quenátslesenciana chata jutabuantsama. ¹⁰ Chata bochjóbanama, quem luarentše oyenënga mochanjóyejuaye; tša oye-juayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentše oyenënga puerta chamosufrima.

¹¹ Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábuatayenama; chentšana tboatantsata, y chë monjétsantjeñënga tša uatjana tonjanëbuache. ¹² Chora canÿe jabuache oyebuambnayana tbojanuena, celocana mëntšá enjétsëtsëtsnaye: “Moye mašënguata ca.” Y chatna canÿe jantšetëshiñe tbonjántsjua, y chatbe uayayënga chca monjétsónÿaye. ¹³ Cachora quem fshantse jabuache tontsanangmëmëmana, y chë bëts pueblentše bnëtsanentšana canÿentše tontsanáshajaye, y canÿsëfta uaranga entšanga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

¹⁴ ¡Chë inÿe uabouana soye quem luare japochócama, mora tocjochnëngo, pero betso chë ústonoye uabouana pochócaye soye echanjóshjangol!

Chë ústonoye ángelbe trompetëfjua

¹⁵ Chë ústonoye ángel chabe trompetëfjua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentše chaotsemnama,

y chë amëndayana echántsemna nÿets tempo y nÿetsca tescama ca.

¹⁶ Y chë uta bnëtsana y canta bëtsëjëmënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšé, fshantsóntsoñe jotsejbénase, y Bëngbe Bëtsá tmonjanadorá, ¹⁷ mëntšá jayanëse:

Bëngbe Utabná, Bëngbe Bëtsá nÿets obenana bomná,

aca chë mora cha condmëná y chë tempo cha conjamná cbontsatschuaná,

er n̄ya mora acbe b̄ets obenánaca soyenga cochjama, acbe amëndayana jón̄tsama.

¹⁸ Ba luarent̄ša entsanga ácaftaca tmonjanotsatjayaná; pero ch̄engaftaca cmojetnama ch̄e uabouana castigo jtsebín̄yama te tocjóshjango, ch̄e tempo tmojanóban̄ngbiama jayanama t̄sabá o ndoñe t̄sabá tmonjéftsemama.

Tonjóshjango ch̄e hora, uacanána jtat̄satayama ch̄e acbiama oservén̄ngbioye,

ch̄e acbe juabna oyebuambnaȳngbioye, ch̄e acbe entsángbioye, y ch̄e acbe uabaina n̄yetscangbiama más b̄ets uabainana yomnama juabnaȳngbioye,

uáman̄nga y nduáman̄nga;

y ch̄e tempo tonjóshjango, quem luare pochocayenga jtsapochócyama ca — ch̄enga tmonjánayana.

¹⁹ Chora, B̄engbe B̄etsabe b̄ets yebna celoca tonjant̄efjo, y choye enj̄etsebin̄yana ch̄e cajontema, ndaȳetema yojanin̄yan̄yá nt̄samo B̄engbe B̄etsá chabe entsángbioye tojanašebuachenacá; y chora enj̄etsemna tcuin̄yenga, t̄ša shauenanana, juezasanana, quem fshantse tontsanangm̄mana y b̄etscá b̄entstá tonjantquécjana.

12

Ch̄e shembása y ch̄e uabouana bayá

¹ Chent̄šana, can̄ye b̄ets soye celoca tonjanon̄yá entsanga can̄ye soye jin̄yan̄iyama: can̄ye shembása, shin̄ye mo chabe uich̄etjoniacá, juashcna chabe shecuat̄sent̄ša tajsoye, y chabe best̄sasiñe can̄ye coron̄ēsha bn̄etsana uta estrell̄engaca. ² Ch̄e shembása ngomamaná enj̄etsemna, y ch̄e šešona jón̄yama yoj̄etsobecuama jabuache enj̄etseyoye, ch̄e šešona jón̄yama cha puerte jasúfriama ibojamna causa. ³ Y chora in̄ye b̄ets soye celoca tonjanon̄yá, entsanga in̄ye soye jin̄yan̄iyama: can̄ye uabouana dragón buanganá, can̄ys̄efta best̄saš̄engaca y bn̄etsana ts̄etjon̄ēš̄engaca y ch̄e best̄saš̄enguiñe enjanábomna can̄ys̄efta coron̄ēshangá. ⁴ Chabe uascuat̄š̄ejuaca úngañent̄šana cán̄yent̄še ch̄e estrellat̄ém̄nga celocana tontsansjojó, y quem fshantsoye ch̄et̄ém̄nga tontsan̄etsana. Y ch̄e dragón ch̄e šešona jtsebomnama shembásabe delante tonjantsá, ch̄e šešonat̄ém̄bioye jtsósañama, cha tojon̄yá ora. ⁵ Chora ch̄e shembása can̄ye šešona boyab̄asetema bontsanbomna, nda n̄yets luarenache entsángbioye yochtsam̄endaye mo can̄ye h̄erro var̄ēfjaquécá. Pero ch̄e šešona ch̄ábent̄šana tmontsanjuaná y B̄engbe B̄etsábioye, chabe uámana puestoye tmontsanámbañe. ⁶ Ch̄e shembásana entsanga ndoyena luaroye tontsanachá, B̄engbe B̄etsá can̄ye luare ibojabopr̄nta choye, chent̄še saná chamocaredadoma, can̄ye uaranga y uta patse y ch̄n̄ngwana bn̄etsana tentscuana.

⁷ Chent̄šana celoca can̄ye entsjanayana enj̄etsemna: Miguel, ch̄e angel̄engbe am̄endayá, y chabe angel̄enga ch̄e dragónaftaca monj̄étsentsjanaye. Ch̄e dragón y chabe angel̄enga monj̄étsatsjanaye, ⁸ pero ndoñe chematanobená jáȳenjanama, y ch̄engbiama ya ndoñe más luare celoca quent̄etsemna. ⁹ Chcase, ch̄e uabouana dragón chocana tmontanábocna, ch̄e tempsca m̄etscuaye, ch̄e Diablo y Satanás ca uabainá, y ch̄e b̄etscá entsángbioye ainḡñayá; quem fshantsoye cha tmontsantsat̄še, y ch̄e cha yojanam̄enda angel̄engnaca.

10 Chora canye jabuache oyebuambnayana celoca sēnjanuena, mēntšá enjétsichamo:

Chē Bēngbe Bētsá entsānga jātsebacama tempo ya tonjōshjango. Mora Bēngbe Bētsá echanjínjānyīye chabe obenana y mándayana, y chabe Uámana Uabuayaná Jesucristbe obenana jtsemándayama; er chē Cristbe delante bēngbe catšátanga mal aquedayá ya tmontábocna, nda nyētsa tempo Bēngbe Bētsabe delante mal enjaaquedayá.

11 Bēngbe catšátanga cha tmonjayēnjaná, er Cristo, chē mo tmojóba Oveshatemcá, Bēngbe Bētsá bacna soyēngama entsānga cháuaperdonama, tonjanóbana, chabe buiñe juabuáshanēse, y chē ndegombre soyēngama chēnga monjanóyebuambnáyeca; er chēngbe vida chēngbiama ndoñe quenjatámama; Jesucristo jasérvíama jóbanama chēnga monjanprontana.

12 ¡Chcasna, celoca corente oyejuayana chaotsemna,

y tšēngaftanga chē choca oyenēngbeñnaca!

¡Pero tša lastema chē fshantsoca y mar bējayoca oyenēngbiama,

er chē diablo tšēngaftangbiōye tonjástjango, corente tsatjayá,

er cha entsetátšēmo ya nye batšá yojtsábojamna chē chábiōye mochja-castígama ca! —enjétsichamo.

13 Chē dragón quem fshantsoye tmojtsantsatšama tonjáninje ora, chē sešona boyabásetema tbonjanēshjango shembásabiōye tbontsanacmé. 14 Pero uta juatēngmiásha, chē bēts aguilbeshá, chē shembásabiōye tmonjaníyē, chabíama tmojanprontá luaroye chaongüefjoma, entsānga ndoyena luaroca, chē dragónbentsana bēnocá; y chentše enjamna chē shembásabiōye saná chamuájuatšēma, unga y tsēntsa uatēntscuana. 15 Chora chē dragón, chabe uayoicana bēts bējaye tonjanbuashētjo chē shembásabe stētšoica, chaobuama y chabotsambama; 16 pero quem fshantse chē shembásabiōye tbonjanájabuache, er chē fshantse mo uayašacá tonjantēfjo, y chē dragónbe uayoicana bējaye obocniye tontsanobmuánañe. 17 Y chē dragón chē shembásabiōye tondaye jamana chenatanobená causa, corente cacháftaca tbonjánētna, y tonjána chē inyēnga, chē shembásabe basengcá mondmēnēnga játsjayama, ntšamo Bēngbe Bētsá yomandacá imobedecēnēnga, y ntšamo Jesucristo tonjanabuayená ndegombre soyēngaca sempre imoyenēnga. 18 Y chē dragón chē mar bējaye tsachañe tonjantsá.

13

Chē dragón tonjanma, chē mar bējayoca uabouana bayá chabe obenana chaotsebonnama

1 Chentšana atše sēnjaninje, canye uabouana bayá chē mar bejajoicana tonjánbocna; enjánbomna canyēsēfta bestšašēnga y bnētsana tsētjonēšēnga, y chēšēnguiñe bnētsana coronēshangá, y chē bestšašēnguiñe bañe enjétsabemana Bēngbe Bētsabiama contra oyebuambnaye uabaina. 2 Chē uabouana bayá sēnjaninjá enjamna mo canye leopardcá, mo osbe shecuášangaca, y chē uayáshana mo leonbeshacá. Chora chē dragón tonjanma chē uabouana bayá chaotsebonnama chabe obenana, y chabe uámana puesto jtsemándayama, y chabe bēts mando. 3 Canye chabe bestšašēnguentše enjétsinñna mo jóbanama tētšeniñcá; pero chentše tbontanóbema; y chora quem luarentša nyētsca entsānga ojanánēnga monjētsemna, y chē uabouana bayábiōye

montsanëyeunana. ⁴ Y chë dragón montsanadorana, chë uabouana bayábioye obenana tbojánatsetama; y chë uabouana bayábioynaca montsanadorana, mëntsá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

⁵ Chë uabouana bayábioye tbonjanlesenciá corente podesca Bëngbe Bëtsabiana chaotsóyebuambnama, y obenana tbonjanatsetá, canta bnëtsana y uta shinÿëntscuana chaotsemándama. ⁶ Y podesca Bëngbe Bëtsabiana tonjánayana, soyënga chabe contra, chabe bëts yebnama y chë celoca oyenëngbe contra. ⁷ Chábioynaca tbonjanlesenciá chë Bëngbe Bëtsábenga imomnënga játsjayama, jáyénjanantscuana; y obenana tbonjanatsetá chaotsemándama nyetsca cachca buiñe bomna entsángbeñe, nyetsca canÿe entsángbeñe, nyetsca biyañe bomnëngbeñe, y nyetsca mándayëngbentsá entsángbeñe. ⁸ Chë uabouana bayá nyetsca quem luarentša entsanga mochántsadorana. Chë entsanga mondmëna ndëmuanÿengbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librësañe. Bëngbe Bëtsá quem luare cabá ndëma ora, quem librësañe tojanábema nyetscanga chë tšabe vida mochjónÿenëngbe uabaina.

⁹ Chë jouenama obenënga, chamouena.

¹⁰ Chë cárceloye jama ibomná, cárceloye bochanjotóca jama; chë espadéjaca jobanamá, espadéjaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entsángcá.

¹¹ Chentšana inÿe uabouana bayá sënjáninÿe, quem fshantsentšana enjëtsebocana; uta tsëtjonëse mo oveshabešcá enjánbomna, pero mo canÿe dragoncá, mo canÿa Satanásbeyeca mandanacá enjëtsoyebuambnaye.

¹² Y enjánama soyënga chë natsana uabouana bayabe nyëts obenánaca, chabe delante. Chë fshantsentša bayá tonjanma nyetsca luarentše oyenënga chamotsadoránama chë natsana uabouana bayábioye, chë jóbanama tëtseñiñe tbontanobemá. ¹³ Cha ba bëts soyëngnaca enjánama chabe obenana entsanga jinÿanÿiyama, entsangbe delante jamana iñe celocana fshantsoye chaótsatšamnaca. ¹⁴ Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyëngaca entsanga tonjanaíngñé, y quem luarentša entsanga tonjanëyana canÿe soye chamopormá, y chë soye cháótsinÿna mo chë natsana uabouana bayacá, chë espadéjaca tëtšená enjamná, y chora tšabá enjetsatmëná. ¹⁵ Y chë inÿe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entsanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmonsadoránënga chamóbanama. ¹⁶ Y tonjanma, nyetscángbioye, básenga y bëtsëtsanga, bomnënga y ndbomnënga, cachëngbiana trabájayënga y ñe inÿabiana nyëts tempo oservénënga, catšbioica cucuatsiñe o juentsaca chamuinÿnanama. ¹⁷ Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnëse; chë uabouana bayabe uabaina o chë chabe uabainama yomna número.

¹⁸ Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe

entšabe número endmëna. Chë número endmëna chë chnënguana patse y chnënguana bnëtsana y chnënguana.

14

Chë canye patse y canta bnëtsana y canta uaranga entšangbe canto

¹ Y más sëntsanonjá. Sënjáninje, chë Oveshatema, enjétsatsjabna Sión ca uabaina tjoca, y cháftaca monjëtsemna canye patse y canta bnëtsana y canta uaranga entšanga, y chëngbe juentsaca enjétsabemana chë Oveshatembe y chabe Taitabe uabaina. ² Chora sënjanuena celocana canye shauenanana, mo bëtscá bëjayënga y bëts juesasana shauenanancá; y chë shauenanana enjamna mo chë arpësha uenanayënga chëngbe arpëshangá tmojtsabuastocá. ³ Chënga canye tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjmënga amëndayëngbe natsanentše. Y ndocná quenjátanobena chë canto juatsjinýana, nýe chë canye patse y canta bnëtsana y canta uaranga quem luarentšëngbentšana atsebácanëngna aíñe. ⁴ Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndëmoye tojtsá y chëngnaca choye jtsëstonana. Chënga imojamna chë natsanënga chë quem luarentša entšanguentše atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservënama. ⁵ Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntsamo chë unga angelënga tmojánayana

⁶ Chentšana inje ángel sënjáninje, tsbanánoca celëjana enjétsongüefnaye. Cha enjánbomna canye nýets tempscama oservena buayenana soye, entšángbiøye jáuyanama, nýets quem luarentše oyenënga, nýetsca mándayëngbentša entšanga, nýetsca cachca buiñe bomna entšanga, nýetsca biyañe bomnëngbeñe y nýetsca canye entšangbiama. ⁷ Y jabuache mëntšá enjétsichamo: “¡Bëngbe Bëtsabiama šmochjájuaboje cha nýetscangbiama chë más uamaná endmënama, y cha šmochtsatschuanaye, er ya tonjóshjango chë tempo ntsamo entšanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar bëjaye y nýetsca chë fshantsentšana óbocana bëjayënga tojamá šmochtsadorana ca!”

⁸ Chábentšana inje ángel mëntšá enjétsichamo: “¡Ya bëts castigo, ya bëts castigo chë Babilonia bëts puebloca entšángbeñe echántsemnal, ndëmuanýënga tmojinýanýë ntsamo puerta bacna soyënga shembása o boyabásaftaca jtsamama y inje corente bacna soyëgnaca, y chentšana nýets quem luarentša entšanga mo cach Babilonioquëngcá tmojama. Chë causa, Bëngbe Bëtsá echanjama chëngbiámñaca chabe uabouana castigo chaotsemnama ca.”

⁹ Chë útatbentšana inje ángel jabuache mëntšá enjétsichamo: “Nderado nda chë uabouana bayábioye y chë chábioye jadórana pormana soye tojtsadorëna, y tojalesenciá chabe uinýnanana soye juentsaca o cucuatšinë chamojajoma, ¹⁰ chánaca bontsemna, chë Bëngbe Bëtsabe uabouana castigo jasúfriana. Entšanga puerta bacna soye tmojamama, Bëngbe Bëtsá puerta tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerta

mochanjatsetšená, íñeshe y azúfrecá. ¹¹ Chca chamojtsesufrina ora, becá ngona echantsóbocana, y chë ngona nyets tempo chca echantsótsjuaye; y chënga, chë uabouana bayá y chábioye jadórana pormana soye adórayënga, y chabe uinñanana soye homnëngbiama, ndocna te chë tsetšanana queochatëjbana ca” —cha enjëtsichamo.

¹² Chýeca quem luarentse entseyta, chë Bëngbe Bëtsabe mandënga obedecënga y Jesúsbeñe puerte ošbuáchiyana homnënga, chë Bëngbe Bëtsabe entsanga, padecena soyënguiñe tmojtsemna ora, puerte uantana jtsemnana.

¹³ Chentšana canye oyebuambnayana celocana sënjanuena, mëntšá sonjëtsatsaye: “Mëntšá mábema: ‘Tša oyejuayënga mochántsemna chë mëntescana mochjóbanënga, Bëngbe Utabnáftaca cánýiñe mo canýacá jtsomñëse ca.’ ”

“Aíñe ca” —chë Uamana Espíritu tonjayana —, “chënga ya ndoñe más queochátamna jatrabájana, ni jasúfriana, er chënga tmojama tšabe soyënga Jesús jasérviana, y chë soyëngama chënga tšabe bendicionënga mo uacanancá celoca mochanjóyëngacñe ca.”

Ndayá chë angelënga quem luarentse tmojanatbaná

¹⁴ Chora más sënjáninýe; sënjáninýe canye fjantse jantšetëshe, y chëshiñe canya enjëtsëtbemana. Cha enjamna mo canye entšacá; chabe bestšašíñe enjanábomna canye castellano coronësha, y cucuatšíñe canye puerte efsana mëtštá enjëtsatbëna. ¹⁵ Chentšana, chë celoca Bëngbe Bëtsabe bëts yebnentšana inye ángel tonjánbocna, y jabuache bonjëtsatsaye chë jantšetëshiñe tbermanábioye: “¡Acbe mëtštaca machbonja y shajuanënga matbaná, er chë játbanama tempo ya tonjóshjango; chë quem luarentša shajuana ya tonjaboche ca!” ¹⁶ Y chë jantšetëshiñe enjantbemaná chabe mëtštaca quem luariñe tonjánachbonja, y nyets quem luarentse atbanániñe tonjanoquedá.

¹⁷ Chentšana inye ángel chë celoca Bëngbe Bëtsabe bëts yebnentšana tonjánbocna; chánaca canye puerte efsana mëtštaca. ¹⁸ Y chë altarentšana inye ángel tonjánbocna, chë mando bomná íñesheca castigo entsangbiama jamama; y chë puerte efsana mëtštá bomna ángelbioye jabuache tbonjaniana: “¡Acbe mëtštaca machbonja y chë fshantsoca nyetsca uvas betiyeshënguentša uvasëšangá mátabe, er ya uabochenëšangá entsamna ca!” ¹⁹ Y chë ángelna chabe mëtštaca quem luariñe tonjánachbonja, y nyetsca quem luarentša uvasëšangá tonjanátabe, y lempe chë juantsëtetjiana luaroye tonjanëšana. Chë soye entsinýinýná ntšamo yochtsemnana Bëngbe Bëtsabe uabouana castigo. ²⁰ Chë uvasëšangana, chë bëts pueblentšana chaboye tmonjanantsëtetje, y chë luarentšana tša buiñe tonjanóbocna; tonjanotjutjé couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canýsëfta pochócaye soyëngaca

¹ Chentšana, inye bëts soye entsanga inye soyama jinñanýiyama, celoca sënjáninýe, canye puerte bëts soye: canýsëfta angelënga canýsëfta pochócaye soyëngaca, chë ústonoye pochócaye soyënga. Chë soyënga chaotjsemnëntšana ya ndoñe inye pochócaye soye yochántsemna, er chëntscoñe Bëngbe Bëtsá yochjacistiga, lempe ntšamo cha jamama tojanjuabocá.

² Canye mar béjaynaca sênjáninýe, mo cristalca enjétsinýna íñeca enájuaabiye; y chë béjaye juachaca monjétsatsana chë tsabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nyetscanga chënga monjétsabomna Bëngbe Bëtsá tojanëtsatá arpagá. ³ Chënga, canye canto monjétsesantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjétsesantaye:

Puerte bëts soyënga y tsabe soyënga entsemna lempe ntšamo aca tcojamncá, Bëngbe Utabná Bëngbe Bëtsá nyets obenana bomná;

lempe ntšamo jtsamëse aca icyoena, acbe bominiñe puerte tsabe y ndegombre soyënga yomna,

nyets luarënguenache entšangbe Rey.

⁴ Bëngbe Utabná, ¿nda nanjájuabo ye aca nyetscangbiana ndoñe más bëtsá condmëna ca,

o ndoñe cmantsatschuanaye?

Nýe aca uamaná condmëna;

nyetsca mándayëngbentsa entšanga ácbioye mochanjabo,

ácbentse mochanjoshamentšiyé aca jadórama,

er ntšamo tcojamncá lempe entšangbioye mora tcojinýanjé,

y lempe ntšamo aca tcojamncá tsabá jtsemnana ca — monjétsesantaye.

⁵ Chca chentsana sênjanontjësé y sênjáninýe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaníyé leyënga uajajónentse. ⁶ Y Bëngbe Bëtsabe bëts yebnentsana tmonjánbocna chë canýsëfta angelënga, chë canýsëfta pochóca ye soyënga uambayënga, uafjantse lino entšëjuangá uabuashinýinýanjëjuangá uichëtjonënga, y tëntša castellano uasnanëjëngaca cochóntsoñe. ⁷ Chentsana, canya chë canta Ainënguentsá chë canýsëfta angelëngbioye tonjanoyé canýsëfta castellano copbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná. ⁸ Chorna, chë Bëngbe Bëtsabe bëts yebna celoca becá ngónaca tonjanojuté, y chë ngona enjétsobocana Bëngbe Bëtsábentsana, chabe buashinýinýanana y obenana jtsinýanjayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelëngbe canýsëfta pochóca ye soyënga candochnënguentscuana.

16

Chë castígoca copbenga

¹ Chentsana, canye jabuache oyebuambnayana sênjanuena, chë celoca Bëngbe Bëtsabe bëts yebnentsana enjétsobocana, y chë canýsëfta angelëngbioye mëntšá enjétsëtsëtsnaye: “Motsajna y quem canýsëfta copbenga, chë Bëngbe Bëtsábiocana endóbocana uabouana castígoca, fshantsoca smochjabuashcja ca.”

² Chora chë natsana ángel tonjána y chabe copbé quem luariñe tonjanbuashcja, y nyetsca entšanga chë uabouana bayabe uinýnanana soye bomnënga y chë chábioye jadórama pormana soye adórayëngbe cuerpiñe bañe bacna guayanana tonjanóbocna, puerte tsetšënanana.

³ Chentsana, chë inýe ángel chabe copbé mar béjayoca tonjanbuashcja, y choca búyeshe buiñcá tontsanóbema, mo canye entšá obanabe buiñcá, y nyetscanga chë mar béjayoca vida bomnënga tmontsanóbana.

4 Chora chë inÿe ángel chabe copbé béjaye obocanënguiñe y béjaye obocanënguiñe tonjanbuashcja, y buiñe tontsanobiamá. 5 Chentšana sënjanuena, chë béjaye nguiñe mando bomna ángel mëntšá enjétsichamo:

Aca nÿetsca soyënguiñe tšabá amá condmëna, er aca tcojyana chë quem luarentša entšanga chca castigánënga chamotsemnana.

Bëngbe Bëtsá, Uamaná, mora chca condmëna y chca conjamna;

6 er chënga tmonjama, chë acbe entšanga

y acbe juabna oyebuambnayëngbe buiñe chauábuashanama, jtsëbáyëse;

y mora tconjama chënga buiñe chamofšema.

Nÿets mercedo imobuájona chca japásama ca —cha enjétsichamo.

7 Altarocánëna canÿe oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nÿets obenana bomná condmëna, y ntšamo entšanga contsacastigacá, ndegombre y tšabá entsemna ca.”

8 Chentšana, chë inÿe ángel chabe copbé shinÿiñe tonjanbuashcja; chë shinÿe corente tontsanobonÿaná y chíyeca entšángbioye íñeshca tontsanajuinÿe. 9 Y nÿetscanga uabouancá juinÿnënga tmonjanoquedá; pero chënga ndoñe chemátanbošëna bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

10 Chentšana chë inÿe ángel chabe copbé chë uabouana bayabe uamana puestiñe tonjanbuashcja, y nÿets chabe amëndayiñe ibetiñe tonjanoquedá. Chë entšanga bichtaja montsanenójantsnaye, yapa tsetše causa; 11 pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

12 Chentšana chë inÿe ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinÿe bocanoica luarënguentša reyënga y chëngbe soldadënga chëjana chámuachnëjnana.

13 Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnayabe uayoícana tmonjánbocna unga bacna espíritënga; mo saposëngcá monjétsinÿna. 14 Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jóchmbuama, chë uamana te, ndayté Bëngbe Bëtsá, chë nÿets obenana bomná yochjabo entšangbiamá jabáyanama ntšamo chënga tmojamama, chë te chënga chabe contra chamotsetsjama.

15 Bëngbe Utabná Jesucristo mëntšá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiamá ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entšayá totsaboprontañacá, nÿe enašá ndoñe chaondëtsemnana, y entšanga chca tmojinÿe ora ndoñe chaondëtseuatjama ca.” 16 Y chë bacna espíritëngna chë reyëngbioye tmonjanënatse canÿe luare, hebreuiñe Armagedón ca uabáinoe.

17 Chentšana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uamana

puestentšana canýe jabuache oyebuambnayana tonjanóbocna, mēntšá enjétsichamo: “¡Chē jopásama enjamna soye ya tocjochnēngo ca!”

¹⁸ Chora enjētsemna tcuinýēnga, shauenanana y juesasanana, y quem luariñe tontsanangmēmana, yapa jabuache quem luare tontsanēbanjó causa; quem luarentše entšanga imobinýna orscana, ndocna te nýa chca quem luare tontsanēbanjó. ¹⁹ Chē puerte bēts pueblo úngañe tontsanajatá, y nýets luarentša bēts pueblēnga tontsanáshajaye, y Bēngbe Bētsá tojanenojuabó chē puerte bēts pueblama, Babilonia ca uabaina pueblama, chentša entšanga chē uabouana castigo chamotsebomnama, Bēngbe Bētsá tša tbojánetna causa, tša bacna soyēnga chentše tmojanmama. Y chca, chē chēngbe bēts pueblo úngañe tontsanajatá ora, cha chēnga tonjanacastigá. ²⁰ Mar bėjayoca nýetsca fshantsēnga y quem luarentša nýetsca tjañe tontsanatjēmba. ²¹ Celocna bētsētsa bēntstbenga entšángbeñe tonjantquécjana, chēbenga canta bnētsana kilama más utbenga; y entšanga Bēngbe Bētsabe contra ba soyēnga tmonjánayana, er chēnga tša montsansufrina chē bēts pochócaye bēntstá causa, y chē pochócaye bēntstá chēngbiana puerte jabuache castigo enjamnama.

17

Chē puerte bacna vida bomna shembásabe castigo

¹ Canýa chē canýsēfta angelēnguentsá, chē canýsēfta codbenga monjanatbēnēnguentsá, tonjánabo y šonjaniyana: “Mabo; cbochanjinýinýiye ntšamo yochtsemna chē puerte bacna vida bomna shembása, chē bėjayēnguiñe entsetbemanabe castigo. ² Quem luarentša mandadēnga cháftaca puerte bacna soyēnga tmojama, y quem luarentša oyenēnga puerte tmojóyejuanga chē cháftaca bacna soyēnga amama, mo chē bacna vida bomna shembásabe vínoyeca puerte cuafjotmenangcá ca.”

³ Chentšana chē ángel, atše chē Uámana Espiritbeyeca corente mandaná jtsemnēse, šonjanánatse entšanga ndoyena luaroye. Choca sēnjáninýe canýe shembása, canýe uabouana buángana bayábeñe enjaquená; chē bayabe cuerpiñe nýétsañe Bēngbe Bētsabiana puerte bacá oyebuambnaye uabaina enjétsabemana, y enjánbomna canýsēfta bestšaše y bnētsana tsētjonēse.

⁴ Chē shembása enjanichētjona uámana shbuenda uafjatsenga y buángana entšayá, y entsanbotamana castellánoca, uámana botamana ndētsētémēngaca y pērlaca. Chabe cucuatšifne canýe castellano cobbé enjétsabēna, jútjena puerte uaboyēnja soyēngaca, y chē boyabásengaftaca cha tojanma puerte bacna soyēngaca. ⁵ Y chabe juentsaca canýe uabaina enjétsabemana, ndoñe josérta soye, mēntšá: “Chē puerte bēts pueblo Babilonia, tša bacna entšanga chentše, mo chē puerte bacna vida bomna shembásengbe bebmá cuaftsemncá; chentšana tojanóbocna quem luarentša nýetsca puerte uaboyēnja soyēnga ca.” ⁶ Atše sēnjáninýe chē shembása tēmiá, er cha tojanofsé chē Bēngbe Bētsábenga imojamnēngbe buiñe, ndēmuanýēngbioye tmojanēbaye Jesusbiana oyebuambnaye causa.

Chca sēnjáninýe ora, tša sēnjanenjananá. ⁷ Chora chē ángel šonjaniyana: “¿Ndáyeca tcojenjaná ca? Atše cbochanjauyana ntšamo yojtsayana chē shembása y chē chábioye bontsambá uabouana bayá, chē canýsēfta bestšaše bomná y bnētsana tsētjonēse; chē soye ndocná quenátstatšēmo. ⁸ Chē tconjinýe uabouana bayá, tempo chca enjamna, pero mora ya ndoñe. Chē

corente bēts thoicana cha echanjesetsjuá, pero lempe pochocaná jtsemnama chca echántsaye. Quem luarentše oyenēnga, ndēmuanjēngbe uabaina quem luare jobojátšama orscana ndoñe yonduábemana, chē tsabe vida mochjónjēnēngbe uabaina iuábemana librēšañe, chēnga mochanjenjaná, chē bayá chē tempo enjaniyena y mora ya ndoñe, pero cachiñe yochjésabama chamojinjē ora.

⁹ “Muentše canjē soye entsemna chē chca josértama chamojobenangbiana: chē bayabe canjēsēfta bestšaše endmēna canjēsēfta tjañe ndayiñe chē shembása entsetbemana; chē bestšašēgnaca mondmēna canjēsēfta mandadēnga. ¹⁰ Chentšana, shachnēngbe amēndayana ya tonjochnēngo, canjā mora entsetbemana jtsamēndayama y chē inya cabá ndoñe tonjášhjangō. Y cha chaojášhjangō ora, ndoñe bēnana cha queochaisemánda. ¹¹ Chē tempo enjaniyena uabouana bayá pero mora ya ndoñe, endmēna chē canjēsēfta mandadēnguentšana injē mandado, pero chánaca chē injē canjēsēftangcá endmēna y lempe pochocaná jtsemnama entsá.

¹² “Chē tconjinjē bnētsana tsētjonēše mondmēna bnētsana mandadēnga, jamēndama cabá ndoñe tmonjójayenga; pero básefta tescama cánjīñe chē uabouana bayáftaca, mando mo reyēngcá mochanjójyēngacñe. ¹³ Quem bnētsanēnga njētscanga cachcá mochántsejuabnaye, y chē uabouana bayábioye chēngbe obenana y mando mochanjátsetaye. ¹⁴ Chē Oveshatembe contra mochántsejtanaye; pero chē Oveshatema echantsayēnjaná, er chē Oveshatema endmēna njētsca amēndayēngbiana chē más uámana Utabná y njētsca reyēngbiana chē más uámana Rey. Chē bnētsana mandadēnga cháftaca mochántsejtanaye ora, cha chentše chabe entsángaftaca cánjīñe echántsemna. Chēnga mondmēna chē cha tojáchembo y tojubuáyanēnga y chábeñe sempre ošbuáchiyēnga ca” —cha šonjaniyana.

¹⁵ Chē ángel mēntšánaca šonjaniyana: “Chē tconjinjē bējayēnga, ndayiñe chē bacna vida bomna shembása entsetbemana, mondmēna njētsca canjē luarentša entsānga, enutanana entsānga, njētsca biyañe oyebuambnayēnga y njētsca mándayēngbentša entsānga. ¹⁶ Y chē uabouana bayábeñe tcojinjē bnētsana tsētjonēše y chē uabouana bayá, chē bacna vida bomna shembásabioye mochantsáboyēnja; enašá cachcá mochanjesonjaye; chabe cuerpentša mēntšena mochantsósañe y íñesheca mochántsejuinjīye, chaopochocantscuana. ¹⁷ Bēngbe Bētsá tojama chē bnētsanēnga ainaniñe tša chamotseboše, ntšamo cha yobošcá chamotsamama. Chca, chēnga mochanjenjōyeunaye chēngbe mando chē uabouana bayábioye jantšabuáchiyana, ntšamo Bēngbe Bētsá tojayancá chaojopasantscuana. ¹⁸ Chē tconjinjē shembása chē puerte bēts pueblo endmēna, chē ndayentša mandadēnga njēts quem luarentša mandadēngbeñe mando mondbomna ca” —cha šonjaniyana.

18

Babilonia japochócoma

¹ Chentšana injē ángel sēnjáninjē, celocana enjétsastjajuana, puerte obenana bomná, y chabe buashinjīnyánanaca njēts quem luariñe entsanbinjāna.

² Chē ángel jabuache mēntšá enjétsichamo:

¡Ya mochantsepochoáca, ya mochantsepochoáca chē uámana pueblo Babilonia!
 ¡Chentše tojtsóbema diablēngbe oyeniñe,
 njētsca bacna espíritēngbe oyeniñe,

y ndoñe tšabe y uaboyënja shloftšëngbe oyeniñe!

³ Er nyetsca quem luariñe mándayëngbentša entšanga puerte bacna soyënga tmojama chentša entšangbe causa, mo chë bacna vida bomna shembásaftaca bacna soyënga cuafjamcá, mo puerte cuafjotmenangcá chë bacna vida bomna shembásabe vínoyeca. Nyetsca luarënguentša mandadënga puerte bacna soyënga tmojama, mo chë shembásaftaca bacna soye cuafjamcá, y quem luarentša obuámnañënga y enënga, bomnënga tmojobiama chentša entšanga yapa crocénana nyë ndayíñnaca ntsejuabnaycá gástaye causa ca — cha enjëtsichamo.

⁴ Chentšana, celocana inye oyebuambnayana sënjanuena, mëntšá enjëtsichamo: ¡Chë bëts pueblentšana maisebocana!, tšëngaftanga chë atšbe entšanga šmomnënga, chë chentša entšanga mondbëtsama bacna soyënga ndoñe chašmondëtsamama, ni chë chëngbiöye japoçócama soyënga tšëngaftangbiama cach ndoñe chaondëtsemma.

⁵ Chënga tša bacna soyënga tmojama, tša bëtscá nya mo celóntscoñe cuafjojut-jecá, y Bëngbe Bëtsá mora entsejuabná chënga tša puerte bacna soyënga tmojama causa, chë soyëngama jácastigama.

⁶ Ntšamo chentša entšanga ín्यëngbiama ndoñe tšabá tmonjamcá, chë entšangbiámna cachcá chaotsemna; ntšamo tmojamama, cabá uta soye más cachca soye chëngbiama chaotsemna; ntšamo chentša entšanga ín्यënga chamosufrima tmojamcá, chëngnaca cachcá uta soye más chamosufrí.

⁷ Chënga corente jtsenábotamnayana y yapa crocénana nyë ndayíñnaca ntsejuabnaycá jtsegástayana; chë causa, chënga entsamna puerte jasúfriama y becá tsetšanana jtsebonnama.

Er chëngbe ainaniñe mëntšá jtsejuabnayana:

“Muentše mo reyëngcá mondëtbíamana.

Viudacá ngmënana ndoñe quemuátsmëna; tondayama quemochátssufrina ca.”

⁸ Chíyeca, canye ora poçócaye soyënga chëngbiama echanjóshjango:

jóbanama socanënga, puerte ngmënana y jabuache shëntsana,

íñesheca lempe chëngbeñe echántsejuinye;

er Bëngbe Bëtsá corente obenana bomná endmëna,

Bëngbe Utabná chë chënga chca castigo chamotsebonnama tojayaná ca — cha enjëtsichamo.

⁹ Quem luarentša mandadënga, chentša entšangaftaca puerte bacna soyënga tmojamënga, y chëngaftaca nyë ndayíñnaca yapa crocénana, ntsejuabnaycá tmojagastanga, mochanjóschana y puerte ngmenánaca mochántsemna, chë bëts pueblo chaojtsangbototjuanentša ngona chamojinye ora. ¹⁰ Chentšana bënoca mochanjoquéda antješna, chë uabouana castiguama auatja causa, y chentša entšangbiama mochanjayana:

¡Tša lastema, tša lastema tšëngaftanga chë uámana bëts pueblo, Babilonientše oyenëngbiama, chë tša obenana binyëntše!

Canye ora tšëngaftangbe castigo tojóshjango ca — mochántsichamo.

11 Chë quem luarentša obuámnañënga y enëngnaca mochanjošachna y ngmenánaca mochántsemna chë pueblentša entsangbiana, er chora ya ndocná queochátsmëna chë chënga tmojúshjango soyënga chamobuámiñama: 12 tmojúshjango castellano soyënga, midio soyënga, uámana y botamana ndëtsbënga, perlënga, uámana lino y shbuenda uafjatsënga entsáyá y sedëjua y uámana uabuángana entsáyá; nyetsca botamana uanguëtse betiyënga, marfiloca pormana soyënga, uámana niñësëngaca pormana soyënga, bronce soyënga, hierro y marmol soyënga; 13 bëtscá canela y inye botamana uanguëtse y tamna soyënga, botamana uanguëtse bëjayënga, incienso y mirra; vínoye, aceitiye, uámana arninýá, trigo; bayënga ndayánaca uasmëmnyënga, oveshënga, couayënga, cochëshangá y entsanga nyets tempo nye inýabiama oservenëngnaca. 14 Y chë pueblentša entsangbiana mochanjayana: ¡Chë tša cmonjanogúsetana jtsebomnama soyënga, mora ya ndoñe quešmátsbomna;

chë uámana y buashinýinýana soyënga y tša bomnana lempe šmojobuetse, y ndocna te más cachca soye quešmochátsbomna ca!

15 Chë soyënga enënga, chë bëts pueblentša entsángbeyeca bomnënga tmojanobiamënga, bënoca mochanjoquëda antješna, chë bëts pueblentša entsangbiana tša bëts castiguama auatja causa; mochanjošachna, puerte ngmenánaca mochántsemna. 16 Y mëntšá chentša entsangbiana mochanjayana:

¡Tša lastema, tša lastema tsëngaftanga chë uámana bëts pueblentše oyenëngbiamal!

Chë enjáninýna mo canýe shembasacá, uámana lino entsëjua uichëtjoná, uámana shbuenda uafjatsënga y uabuángana entsáyá uichëtjoná, botamananá castellanoca, perlënga y uámana botamana ndëtsbëngaca.

17 ¡Y canýe ora chabe tša bomnana lempe tojtsoepochocá ca! — mochanjayana.

Nyetsca chë barquënguentsha mándayënga, chentša entsanga inye luaroye ajnënga y chentša trabájayënga, y nyetscanga chë vida onguayíne mar bëjayoca trabájayëngnaca, chentšana bënoca mochanjoquëda antješna, 18 y chë bëts pueblo chaojtsangbototjuanentsha ngona chamojinýe ora, jabuache mochanjayana: “¡Quem uámana bëts pueblécá ndocna inye pueblo cachcá quenátsmëna ca!” 19 Chca chamojinýe ora, ngménama bestšašíne polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tsëngaftanga chë uámana bëts pueblentše oyenëngbiamal!

Chentša bomnánaca bomnënga tmojanobiana nyetscanga chë mar bëjayoca barco bomnënga.

¡Canýe ora lempe tojtsoepochocá ca! —chënga mochántseyona.

Chora chë ángel tonjánayana:

20 ¡Celoca oyenënga móyejuanga

chë pueblo chca tojapasama;

y tsëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima, ntšamo tsëngaftanga chašmosufrima chënga tmojanmcá ca! —cha tonjánayana.

²¹ Chentšana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanash-buetše y mëntšá tonjánayana:

Mëntšá, nye ndeolpe y jabuache, Babilonia chë uámana bëts pueblo mochántsetsatše,

y ndocna te más quem pueblo queochátsmëna.

²² Chentše, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe;

ndocna te más quemochátsmëna obrerënga, ni chë nantsnëbeñe trabájayana quemochátuenana.

²³ Chentše, ndocna te más ndocna uajuinýanësha queochátsbinýnaye, ni casamento fiestentsá enbouenanana quemochátuenana.

Er chë bëts pueblo chca mochantsepochoáca, masque chentša obuámnañënga y enënga nyets quem luarentše chë más bomnënga monjamna,

y chentša bocjuanánaca nyetsca luarënguentsá entsanga ingñënënga monjamna ca —cha tonjánayana.

²⁴ Bëngbe Bëtsá chca chë bëts pueblentše echanjama, er chentše tmojinýena chë Bëngbe Bëtsabiama trabájaye causa tmojanóbanëngbe buiñe; chë chabe juabna oyebuambnayënga, chabe entsanga, y chë chábioye oservénama nyets quem luarentše tmojtsëbayëngbe buiñe.

19

¹ Chentšana celoca sënjanuena mo mallajta entsanga cuafsayebuachcá, mëntšá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinýinýana y mando endbomna,

² er ndayama cha tojayancá ndegombre jtsemnana, y ntšamo tšabá chama tojtsemncá.

Cha chë uachuana bacna vida bomna shembásabioye tbojacistigá.

Chë shembásabe puerte bacna soyënga causa, nyets luarentša entságnaca bacna soyënga tmojama.

Chábioye chca jacastígase,

Bëngbe Bëtsá tojama ntšamo jamama ibomerecencá,

chábioye oservënënga chë shembásabeyeca tmojóbana causa ca —chënga monjétsichamo.

³ Y cachiñe mëntšá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentsá ngona nyetsca tescama chca echanjótjuaye ca!

⁴ Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentsé, y Bëngbe Bëtsá, chë uámana tbemanentše enjëtsetbemanabioye tmonjanadorá, mëntšá jayanëse: “¡Chca chaotsemna! ¡Bëngbe Utabná matschuanga ca!” ⁵ Y chë uámana puestentsana canye oyebuambnayana tonjanóbocna, mëntšá:

Bëngbe Bëtsá matschuanga, nyetsca chabe oservënënga

y chë nyetscangbiama cha chë más uamaná yomnama juabnayënga,

básenga y bëtsëtsanga ca.

Chë Oveshatembe casamento fiesta

⁶ Y sënjanuena mo mallajta entšangbe oyebuambnayancá, mo bëtscá béjaye cuafsobonjncá y mo bëts juesasanana shauenanancá; mëntšá monjëtsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyëts obenana bomná tojontsé jamándana.

⁷ Puerte móyejuanga y mochjínýanyíye

Bëngbe Bëtsá puerte bëtsá y uamaná bëtsemnana,

er mora entsemna mo chë Oveshatembe casamento te cuafjoshjangcá;

chabe shema yochjabocná puerte tojtenobotamá;

⁸ tmojalesenciá cha chauatíchéto uámana, nduatsenga uafjantse y uabuashinýinýana lino entšáyá.

Chë shema entsinýinýná chë Bëngbe Bëtsabe entšanga;

y chë lino entšáyá jtsichëtjonana entsinýinýná

chënga lempe ntšamo tšabá yomncá jtsamëse imoyena ca —chënga monjëtsichamo.

⁹ Chentšana chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama ófjanënga ca.’ ” Y mëntšánaca šonjaniyana: “Chca, ndegombre Bëngbe Bëtsabe palabrenga endmëna ca.”

¹⁰ As chabe shecuatšentše sënjanoshamentšé cha jadórana, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canýe oservená sëndmëna, ntšamo aca condmëncá, y chë Crístbeyeca acbe catšátanga, ntšamo chabiana motatšëmbcá y chabe ndegombre palabrenga nyëts tempo imabuayinýanga mondmëncá. Aca cmontsemna Bëngbe Bëtsá jadórana ca.”

Ndayá Jesúš tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnana, chë soyëngama entšángbioye jábuayenama.

Chë fjantse couayíne enjaquená

¹¹ Chora sënjáninýe celoca atëfjniñe; canýe fjantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšángaftaca; y chca chabe uayayëngaftaca monjánentsjanaye.

¹² Chabe fšnëbenga mo iñeshcá enjáninýna, bestšašíne ba uabuashinýinýana coronëshangá enjanábomna, y canýe uabaina chábeñe enjanábemana; nyë cha chë uabaina yojanábuatma. ¹³ Cha enjanichëtjona buíñeca unëtjona entšáyá y chabe uabaina enjanma “Bëngbe Bëtsabe palabra ca”.

¹⁴ Y chabe ústonoye monjëtšajna mallajta soldadënga celoquënga, nduatsenga uafjantse y uámana lino entšáyá uichëtjonënga, fjantse couayënguiñe enjaquenënga.

¹⁵ Chë enjëtsebnatsanabe uayoicana enjanóbocana canýe puerte efšana espadëja, chë Bëngbe Bëtsábeñe ndošbuáchiyënga játatsetšama. Cha puerte obenánaca echántsamëndaye, mo canýe hierro varëfjaquécá. Cha echanjama entšángaftaca mo nda uvasëšangá juantsëtetjama tojtsabotajná ora cuafjamcá; y echanjama chënga chamotsebomnana chë puerte uabouana castigo, Bëngbe Bëtsá chë nyëts obenana bomná tbojetna causa. ¹⁶ Chabe uabonjaníyañe y chabe mëntjoca canýe uabaina enjanábemana: “Nyëtsca

reyëngbiana chë más uámana Rey, y nyetsca amëndayëngbiana chë más uámana Utabná ca”.

¹⁷ Chentsana canye ángel sënjáninye, shinýiñe enjétsatsana, chë celoca tsbanánoca nyetsca monjanongüefjná shloftšënga jabuache mëntšá enjétsétsnaye: “¡Mabënga, menefjna chë Bëngbe Bëtsá tojaprontá bëts saná jasama; ¹⁸ chašmosama reyëngbe mëntšëna, soldadënga amëndayëngbe mëntšëna y valente entsangbe mëntšëna, couayënga y chëngbeñe enjaquenëngbe mëntšëna, y nyetsca entsangbe mëntšëna, cachëngbiana trabájayënga y nye ínÿabiana nyets tempo trabájayënga, básesënga y bëtsétsanga ca!”

¹⁹ Chora atše sënjáninye chë uabouana bayá y quem luarentša reyënga chëngbe soldadëngaftaca tmojánenefjna, chë fiantse couayíñe enjaquená y chabe soldadëngaftaca jétsjama. ²⁰ Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambayá, chë bayabe delante ba bëts soyënga tonjanmá obenana jinÿanÿiyama; y cha chë soyëngaca tojanaingñë chë uabouana bayabe uinÿnanana soye chamuayentsjajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë ñhesheca uafjájónayoye, chë azufre endëjuinÿinÿanentše. ²¹ Chë ínÿengbioyna tmontsanapochocá chë fiantse couayíñe enjaquenabe uayoicana enjanóbocana espadëjaca, y nyetsca shloftšënga chëngbe mëntšëna yapa tmontanoshachá.

20

Chë uaranga uata

¹ Chentsana canye ángel sënjáninye celocana entsanastajuana chë corente asentoye tboca llavëfjaca, y canye bëts cadenëjua entsanëtvena. ² Chë ángel tbontsanbá chë dragónbioye, chë tempsca mëtscuaye, chë Diablo y Satanás endmëná, y canye uaranga uatama tbontsanbátsëca. ³ Chë corente asentoye tboye tbontsantsatše, chentše tbontsanëtame, y chentše bëšáša tsengájšëca tonjaninÿnaná, ndotatsëmbcá jatëfjuama ndocná chaon-dobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjëtshojona.

⁴ Uámana puestënga sënjáninye, y chiñe tmonjanotbiana chë entsanga tsabá o ndoñe tsabá tmonjamama jayanama obenana tmojanóyëngacñënga. Chë bestšaše jtsëstjanguëse tmojanóbanëngbe espíritëngnaca sënjáninÿe. Chënga chca tmojanóbana, Jesús tojánayana soyënguñe y chë Bëngbe Bëtsabe buayenana soyënguñe sempre ošbuáchiye causa. Chënga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinÿnanana soye juentsaca o cucuatšíñe chamuayentsjajoma. Y sënjáninÿe chëngna tmontanayena y Cristoftaca canye uaranga uatama montsanmánda. ⁵ Chë entsanga mondmëna chë natsanënga jtayenama, pero chë tempo chë inÿe obanënga ndoñe chemëntëtanayena, ndayá nye chë canye uaranga uata chentsana. ⁶ ¡Oyejuayënga y Bëngbe Bëtsabe entsanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo

bachnangcá chënga mochántseserverna, y Crístoftaca chë uaranga uatama mochántsemandaye.

Satanás japochócama

⁷ Chë uaranga uata chaojochñëngo ora, Satanás chabe utámenocana mochanjétsboshjona; ⁸ y cha echanjábocna nyets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsjava, y tša chëftanga cha echanjáchembo, nya mo chë mar béjaye chënyoca cascajca mochántsemna.

⁹ Chënga nyetscanga nyets luarëjana mochanjásjua, y chë Bëngbe Bëtsabe entsanga oyenentše y chabe bonshana entsangbe bëts pueblo shëconana mochanjotsaye. Pero celocana iñe echanjatquécjana y chë Bëngbe Bëtsabe contra imomnënga lempe echántsjuiñye. ¹⁰ Y Satanás, chë aingñayá, mochántsatmetše chë iñeshe y azúfrecá uafjajónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmontsanatmetše. Chentše bëts castigo nyets tempo, bnëté y ibeta mochanjasufrina.

Chë obanëngbiana tmonjánayana ntšamo chëngaftaca jamama yojtsemnana

¹¹ Chentšana sënjáninye canye bëts uamana fjantse puesto jamándama y nda chiñe enjetsetbemaná. Celoca y quem luare chabe delante lempe tonjanenatjëmbe, y ndócnentše más chenatanobinyná. ¹² Y chë obanënga sënjánanýe, bëtsëtsanga y básesenga, chë uamana puententša natsanoica monjétsatsana; y chë librëšangá tmonjanëtëfjo, y inye librëšanaca, ndëmuanýenga nyetsca tescama tšabe vida mochjónýenëngbe uabaina uabemana librëša. Chë obanëngbiana tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá. ¹³ Chë mar béjayoye tmojanóbanënga choicana tmontanbocna, y chë obanënga tmojanoqueđanga luarënguentšana tmontanbocna, y cada cánýabiana tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. ¹⁴ Chentšana ya ndoñe más obenana quentëtsemna entsanga chamóbanama chaomama, mo chë obenana chë iñesheca uafjajónayoye cuaftsëtšencá; quem iñesheca uafjajónaye endmëna chë nyetsca tescama castigo jtsebomnama luare; chë choca castigánënga jtsamnama yojtsamñëngbiana entsemna mo chënga cachiñe cuafjatobancá; ¹⁵ y ndëmuanýengbe uabaina chë tšabe vida mochjónýenëngbe uabaina iuábemana librëšañe ndoñe yonjanabemana, chë iñesheca uafjajónayoye tmontsanatmetše.

21

Celoca tsmiñe y fshantse tsmiñe

¹ Chentšana atše sënjáninye canye celoca tsmiñe y canye fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye. ² Sënjáninýe chë “uamana ca” uabaina bëts pueblo, chë tsëm bëts pueblo Jerusalén, Bëngbe Bëtsábocana celocana enjétsostjajuana, puerta botamaniñe, mo canye shembása puerta botamananá, chabe boyá jábocnabiana. ³ Y chora canye jabuache oyebuambnayana Bëngbe Bëtsabe uamana puententšana sënjanuena, mëntšá: “Mouena. Bëngbe Bëtsá

entšángaftaca echántsemna y cha chéngbeñe echantsiyena. Chénga chabe entšanga mochántsemna, cach Běngbe Bětsá chéngaftaca echántsemna, y cha chéngbe Bětsá echántsemna. ⁴ Cha echanjama chénga ndocna te más ngménēnga chamondětsemnana, y ndoñe más chamondóbanama, ndoñe más chamondošachema, ni ngménaca ndoñe chamondětsóyebuambnana y ndoñe más tsetšanana chamondětsebonnana; er ntšamo chénga entšangcá fshantsoca tempo imojětsiyena ora enjamncá, chora ya ndoñe chca queochátsmēna ca.”

⁵ Chě uámana puestentše enjantbemaná šonjanianana: “Atše lempe mo tsēm soyēngcá sēndbama ca.” Y mēntšánaca tonjánayana: “Chě soyēnga mábema, er chě palabrénga endmēna ntšamo ndegombre yomncá, y nýetscanga mondobena chiñe corente jtsošbuáchiyana ca.”

⁶ Chentšana šonjanianana: “Lempe tonjochnēngo. Atše sēndmēna chě nýetsca soyēnga bojatsáyá y pochocayá, chě natsaná y chě ustonoyá. Mo nda tša uajuendayana tojtsebonná canye bėjaye fshantsiñe obocanentšana cuafjofšecá, cachcá nda tša tojtseboše atšbe soyēnga jtsebonnana, atše chanjama cha chě soyēnga chaotsebonnana, y chě nýetsca tescama yomna tšabe vídnaca, chca jtsebonnana chábioye tondaye ntsotjañcá. ⁷ Nda nýetsca soyēnguentšana tšabá chaojabocná mo ayēnjanayacá, lempe echanjóyēngacñe ntšamo atšbe entšángbioye jatšatayama tijašebuachenacá, y atše chabe Bětsá chántsemna y cha atšbe uaquiñá. ⁸ Pero chě auatja causa Crístbioye ndoñe monděservénēnga, chábeñe ndošbuáchiyēnga, chě bacna soyēnga causa Běngbe Bětsabiana puerte uaboyēnjanēnga imomnēnga, chě ínýēngbioye obánayēnga, chě shembása o boyabášaftaca bacna soye amēnga, chě bocjuana soyēnga amēnga, chě soyēnga adórayēnga diosēnga yomna ca jtsejuabnayēse, y nýetscanga bosterēnga imomnēngbiamna, chénga entsamna chě iñesheca uafjónayoca jasúfriana, chě azufre yojuínýinanentše. Chentše puerte castigánēnga sempre mochanjěftsemna, mo uta soyama cuafjobancá ca.”

Chě tsēm běts pueblo Jerusalén

⁹ Chentšana canya chě angelēnguentšá, chě canýsēfta copbenga bomnēnga jútjena chě canýsēfta ústonoye pochócaye soyēngaca, átšbioye tonjánabo y šonjanianana: “Mabo, chochanjinýinýiye chě tojobouamá shembása, chě Oveshatembe shema ca.” ¹⁰ Y atše chě Uámana Espíritoftaca corente mandaná jtsemnēse, chě ángel šonjanánatse canye běts y tsbanana tjoye, y šonjaninýinýé chě tsēm běts pueblo Jerusalén, chě “uámana ca” uabaina pueblo, celocana Běngbe Bětsábiocana enjětsostjajuana. ¹¹ Chě běts pueblo enjětsebuashinýinýana Běngbe Bětsabe buashinýinýanánaca; enjětsebuashinýinýana mo canye uámana botamana ndětsbecá, mo jaspe ndětsbecá, pero mo cristalcá tēshínýniñe. ¹² Chě běts pueblo shéconana canye běts y tsbanana tapiēse enjamna, chě tapiēsiñe bnětsana uta bēsashangá y cada bēsashentše canye ángel, y chě bēsashangañe enjanábemana chě Israeloca bnětsana uta běts pamíllangbe uabaina. ¹³ Shinýe bocanoica unga bēsashangá, shinýe uenatjěmbambanoica ungashá, tsjuanoica unga bēsashangá, y tsmanoica ungashá. ¹⁴ Chě tapiēse enjaněcuatjona bnětsana uta ndětsbēnguiñe, y chěbēnguiñe enjanábemana Jesucristo chě Oveshatembe bnětsana uta ichmónēngbe uabaina.

¹⁵ Chě ángel átseftaca oyebuambnayá canye castellano juinýnaněšěfja enjanábēna jamedídama chě běts pueblo, chentša bēsashangá y chentša

tapiëse. ¹⁶ Chë bëts puebło cach medida enjánbomna nÿets cantoica, cach medida tëntsoye y nÿanëjoye. Chë ángel chabe juinÿnanëšëfjaca chë bëts puebło tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna. ¹⁷ Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

¹⁸ Chë tapiëse enjanpormana jaspe ndëtsbeca, y chë bëts puebło ena castellánoca, tša chca nÿa mo cristalcá tëshínÿniñe enjáninÿna. ¹⁹ Chë ndëtsbenga ndayinë chë tapiëse enjanëcuatjona enjánbotamanana nÿetsca uámana botamana ndëtsbéngaca: canÿebé jaspe ndëtsbeca, chë inÿebé zafíroca, chë inÿebé ágata ndëtsbeca, chë inÿebé esmeráldaca, ²⁰ chë inÿebé ónice ndëtsbeca, chë inÿebé cornalina ndëtsbeca, chë inÿebé crisólito ndëtsbeca, chë inÿebé berilo ndëtsbeca, chë inÿebé topácioaca, chë inÿebé crisoprasa ndëtsbeca, chë inÿebé jacíntoca y chë inÿebena amatista ndëtsbeca. ²¹ Chë bnëtsana uta bëshashangá enjuamna bnëtsana uta perlënga; cada bëshasha nÿe canÿe périlaca uapormanësha. Y chë más bëts tsáshenëjana enjamna ena castellánoca; mo cristalcá tëshínÿniñe enjáninÿna.

²² Chë bëts pueblentse ndocna Bëngbe Bëtsabe bëts yebna chiyátaninÿe, er Bëngbe Utabná, chë Bëngbe Bëtsá nÿets obenana bomná y chë Oveshatema chentše bonjamna, y chata nÿetscangbiana chë bëts pueblentse ndayëntšnaca adoránata bonjëtsemna. ²³ Chë bëts pueblentse ndoñe quenjatsiyta shinÿe o juashcona chaotsebinÿnaye, er Bëngbe Bëtsabe buashinÿinÿanana chentše enjëtsebinÿnaye, y chë Oveshatembe buashinÿinÿanana mo uajuinÿanëshacá enjamna chë bëts pueblama. ²⁴ Chentša binÿnayánaca, entšanga nÿetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. ²⁵ Chë bëts pueblentša bëshashangá ndocna te quemochtëtatame, y chentše ndocna ora ibeta queochátsmëna. ²⁶ Chë bëts puebloye mochanjiyëbo chë nÿetsca luarënguentša entšangbe uámana y bëts soyënga, y chë nÿetsca luarënguentša entšangbeñe bëtsëtsanga y uámanënga iuabiamná soyëgnaca. ²⁷ Pero ndocna te queochatómashëngo ndayánaca, y chë soye chaotsama entšanga ndoñe tšábenga chamotsemnana Bëngbe Bëtsá jadórama; ni ndocná queochátamashëngo, Bëngbe Bëtsabiana nÿa tondayama ogustana soyënga amá o ínÿengbiöye jáingñama soyënga amá. Choye mochanjámarshjina nÿe chë ndëmuanÿengbe uabaina vojtsábemana chë Oveshatembe librëšañe, chë nÿetsca tescama tšabe vida mochjónÿenëngbe uabaina uábemanentše.

22

¹ Chë ángel šonjaninÿinÿé chë enjanobëjna béjaye vida bomniye. Chë búyeshe enjamna ndëtsenguiye y tëshínÿniye mo cristalcá. Enjanóbocana chë Bëngbe Bëtsá y chë Oveshatembe uámana puestocana, ² y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nÿetsca tescama yomna tšabe vida jtsebomnana, canÿe uatiñe bnëtsana uta soye jashájonana, canÿe cada shinÿe; chë betiyeshentša tsbuanáchënga josërviana nÿetsca mándayëngbentša entšanga jáshnama. ³ Choca ndocna soye queochátsmëna chë ndayama Bëngbe Bëtsá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše

echántsemna, y chatbe oservénënga mochántadorana. ⁴ Chënga mochanjinÿe Bëngbe Bëtsabe jubiá, y chabe uabaina chëngbe juentsaca mochantsambaye. ⁵ Chentše ndocna ora ibeta queochátmëna, y chentša oyenënga ndoñe queochátëjamoto canÿe uajuinÿanësha o shinÿe chaotsebínÿnaye, er Bëngbe Bëtsá Bëngbe Utabnabe buashinÿinÿanana chëngbiana echantsebínÿnaye, y chënga mochántsemna mo reyëngcá uámanënga, y Bëngbe Bëtsáftaca nÿetsca tescama mochántsemandaye.

Jesucristo jésabama entsobeco

⁶ Chentšana chë ángel šonjaniyana: “Quem palabrënga endmëna ntšamo ndegombre yomncá, y nÿetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oye- buambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betscó yojtsemna jopásama ca.”

⁷ Chora Jesús tonjánayana: “Mouena. ¡Atše cachiñe betscó chanjésabol Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyeuambana soye tojoyeuná, chë ndayama quem librëšañe entsábemana ca.”

⁸ Atše Juan, chë soyënga sënjanuena y sënjaninÿe. Y chca sënjanuena y sënjaninÿentsana, chë chca šonjaninÿinÿé ángelbe delante atše sënjanoshamentšé, cha jadórama. ⁹ Pero cha šonjaniyana: “Ndoñe, átšeftaca ndoñe chca mátamana, er atše canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catsátanga, chë Bëngbe Bëtsabe juabna oyeuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntšánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. ¹¹ Cachcá monÿá chë bacna entšá bacna soyënga chaotsama; chë puerte bacna soyënguiñe jtšiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entšá, nÿets tempo nÿets ainánaca chábioye chabotseserverna ca” —cha šonjaniyana.

¹² Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. ¹³ Atše sëndmëna chë nÿetsca soyënga bojatšayá y pochocayá, chë natšaná y ustonyá, chë ndábeyeca y ndabiana lempe yomna ca” —šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entšayá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanámana jashjáchama, mo chë nÿetsca tescama yomna tšabe vida jtsebomnama betiyeshentšana cuaftsasacá, y mochanjobenaye chë tsëm bëts pueblöye bësášajana tšabá jamashjnama. ¹⁵ Pero ndoñe quemochatobenaye jamashjnama chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë inÿënga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtšamëse oyenënga.

¹⁶ Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davidbentsana Entšá. Atše sëndmëna mo chë bínñanoye puerte bínñnaye estrellcá ca.”

¹⁷ Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nÿetsca tescama yomna tšabe vídnaca, chca jtsebomnama tondaye ntsotjañcá.

¹⁸ Nÿetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtsá echanjama cha chaosufrí chë quem librëšañe entsábemana pochócaye soyënga. ¹⁹ Y nderado nda ntšamo quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtsá chábioye bochantsebojuána ntšamo chabiama yomncá chë nÿetsca tescama yomna tšabe vida jtsebomnama betiyeshentsana y chë tsëm bëts pueblentsana, chë ndayama quem librëšañe entsábemana.

²⁰ Quem soyënga oyebuambnayá, chë lempe ndegombre echantsemnama tonjayaná, atše, Jesús sëntsichamo: “Aíñe, betscó chanjésabo ca.”

Chca chaotsemna. ¡Cochjabo, Bëngbe Utabná Jesús!

²¹ Bëngbe Utabná Jesús chaoma tšabe bendicionënga tšëngaftangbeñe chaotsemnama.